

Diža' güen ̲che ancho Jesucristo

Zoogocho Zapotec New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

San Mateo	4
San Marcos	40
San Lucas	61
San Juan	97
Hechos	123
Romanos	156
1 Corintios.....	171
2 Corintios.....	186
Gálatas	195
Efesios	201
Filipenses	206
Colosenses.....	210
1 Tesalonicenses	214
2 Tesalonicenses	217
1 Timoteo	219
2 Timoteo	224
Tito.....	227
Filemón	229
Hebreos.....	230
Santiago	242
1 Pedro	246
2 Pedro	251
1 Juan.....	254
2 Juan.....	258
3 Juan.....	259
Judas	260
Apocalipsis.....	262

San Mateo

Xozxtao' Jesucriston' (Lc. 3:23-38)

1 Nga nyoj la bene' gosac xozxtao' Jesucriston' chzolaon len da' xozxta' ocho Abraham. Le Jesús en' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' xa Isaac, na' Isaaquen' goque' xa Jacob, na' Jacoben' goque' xa Judá len yezica' chle bene' biše' ca'. ³ Judán' na' Tamar gosaque' xaxna' Fares na' Zara. Na' Faresen' goque' xa Esrom, na' Esronna' goque' xa Aram. ⁴ Na' Aranna' goque' xa Aminadab, na' Aminadaben' goque' xa Naasón, na' Naasónna' goque' xa Salmón. ⁵ Salmónna' na' Rahab gosaque' xaxna' Booz. Na' Boozen' na' Rut gosaque' xaxna' Obed. Na' Obeden' goque' xa Isaí. ⁶ Na' Isaín' goque' xa rey David, na' rey Davin' goque' xa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónna' goque' xa Roboam, na' Roboanna' goque' xa Abías, na' Abíasen' goque' xa Asa. ⁸ Na' Asan' goque' xa Josafat, na' Josafaten' goque' xa Joram, na' Joranna' goque' xa Uzías. ⁹ Uzíasen' goque' xa Jotam, na' Jotanna' goque' xa Acáz, na' Acázen' goque' xa Ezequías. ¹⁰ Na' Ezequíasen' goque' xa Manasés, na' Manasésen' goque' xa Amón, na' Amónna' goque' xa Josías. ¹¹ Josíasen' goque' xa Jeconías len yezica' chle biše' ca' gosenita' ca' tiemp caten' bene' Babilonia ca' gosezene' bene' Israel ca' na' goseche' xoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' xa Zorobabel. ¹³ Na' Zorobabelen' goque' xa Abiud, na' Abiuden' goque' xa Eliaquim. Na' Eliaquinna' goque' xa Azor. ¹⁴ Na' Azoren' goque' xa Sadoc, na' Sadoquen' goque' xa Aquim. Aquinna' goque' xa Eliud. ¹⁵ Na' Eliuden' goque' xa Eleazar, na' Eleazaren' goque' xa Matán. Na' Matánna' goque' xa Jacob. ¹⁶ Nach Jacoben' goque' xa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža čhen', na' ca' tiemp che da' David bžinte ca' tiemp caten' gosezene' bene' Israel ca' goseche' xoxje' legaque' Babilonia, lecze gosac yežta' diaža čhen', na' ca' tiempen' bžinten ca' žan' golje Criston' ben' gwlej Diosen' cont yedenabi'e, gosac yežta' diaža čhen'.

Can' goc cate' golje Jesucriston' (Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marían' len José, na' za' ca' a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bchendao' bdao'na' lo' le'e. ¹⁹ Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marían' šižize cont nono gacbe'e na' cont bi gwsie' le' zto'. ²⁰ Šlac chone' xbab gone' ca' gwtase' na' to angl bene' gwseja' Xancho Diosen' blo'elagüe' le' lo' bišgal. Na' gože' le':

—José, le' goljo' lo' diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao'na'. ²¹ Na' sane' to bi' byo dao' na' gwsio labe' Jesús, le' len' yeque'e xtoła' bene' gualaž che' ca' bene' yesejnilaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

²³ To no'ol güego' no'ole ne' napsi'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwñede' yelen', bene' can' gož angl che Xancho Diosen' le', jaxi'e Marían' liže' par goque' xo'ole'. ²⁵ Perw bi gwzoalene' le' ca' xo'ole' san gwzoacze' le' respetw bžinte ža gwthane' to bi' byo dao', xi'ine' nechw. Na' gwxi' labe' Jesús.

Magos ca' jaseñe'e Jesús en'

2 Ca' tiempen' cate' gwnabia' rey Herodes, golje Jesús en' Belén, to yež gan' mbane distritw Judea. Na' besežin to čhope magos Jerusalén, za'aque' to nación zito' dan' čhi' do ga čhla' gwbiž. ² Na' gosenabde' bene' lo' ciudan' gose'ene':

—ž Gan' rey che bene' Israel, ben' ba golje? Nežeto' ba golje', le' ba ble'eto' beljw čhen' cate' blan' lažto' dan' zoa gan' čhla' gwbiž. Na' za'to' gonxento'ne'.

³ Cate' gwñeze' rey Herodesen' can' gosenen', goc-čgüe' tole, na' lecze ca' yogo' lo' bene' lo' ciuda Jerusalénna'. ⁴ Nach reyna' btobe' yogo' lo' bxož gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwñabde' legaque' gan' naquen galje Criston' ben' gwlej Diosen' cont yedenabi'e. ⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to beŋe' be' xtiža' Diosen' cani'. Quinga žan: ⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.

Le to beŋe' Belén gaque' beŋe' gwnabia', na' le' güia ne'e nación Israel čhian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyaŋen' be-sele'ede' bla' beljon'. ⁸ Nach gwsele' legaque' Belénna', gože' legaque':

—Le šja'ac na' le šjaydiljw bidao'na' tcho'a. Na' cate' yeže'elebe' le yeda yedyedixjue'ele neda' cont lecze ša'a šjenxena'be'.

⁹ Beyož bosozenag magos ca' can' gož reyna' le-gaque', nach gosa'aque'. Na' beljon' dan' be-sele'ede' do gan' chla' gwbižen' cate' biŋa' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen. ¹⁰ Na' magos ca' besyebe-de' juisyw cate' be-sele'ede' beljon' da' yoble. ¹¹ Nach cate' bešežine' yo'o gan' zoa bidaon', goso'e lo' yo'ona' na' be-sele'ede' bidao'na' len xŋa'be' Marian'. Nach bosozoa xibgaque' gosonxene'be'. Na' gosesaljo caj čhegaquen' gosebeje' oro, ya' na' to nechw da' chla' zix da' nzi' mirra na' gosoen' čhebe'. ¹² Na' šlac ne' nita' magos ca' Belénna', Diosen' gwdixjue'ede' legaque' lo bišgal bich yesyedie' gan' zoa rey Herodesen'. Da'nan' besyeque'e yeto nez yoble jaya'ac laže'.

Bosoxonje' ja'aque' Egipto

¹³ Na' cate' ba besyeya'ac magos ca', to angl che Xancho Diosen' blo'elagüe' Josén' lo bišgal, na' gože'ne':

—Gwyas, gwče' bidaon' na' xŋa'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidao'na' cont gote'be'.

¹⁴ Nach ne' ze bxin gwyas Josén', gwče'e bida'ona' len xŋa'ben' zja'aque' Egipton'. ¹⁵ Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to beŋe' be' xtiže'na' cani', gwne': "Čhixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

¹⁶ Na' rey Herodesen', cate' gocbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwŋabde' le-gaque' batcan' bla' beljon', na' gwsele' soldadw che' ca' par jasete' yogo'lo' bi' byo che'en dao' zelao bi' čhop ize, bi' ca' gosaljé Belénna' na' yezica'chle yež ca' zjanyechj zjambi'i Belénna'. ¹⁷ Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

¹⁸ Nente ši'i beŋe' Ramá, chesebežchgüe' nita'chgüe' yela' güine'.

No'ole ca' zjanaque' xi'in diaža che da' Raquel chesyeyaše' chesyegüine'de' che xi'in'da'ogaque' ca', na' bitw chesaclaže' no yeyoexenlaže' legaque', le ba gosatben'.

¹⁹ Cate' got Herodesen', Josén' ne' zoe' Egipton'. Nach to angl che Xancho Diosen' blo'elagüe' Josén' lo bišgal, na' gože'ne':

²⁰ —Gwyas, beče' bidaon' len xŋa'be'na' na' le šjaya'ac Israel. Ba gosat beŋe' ca' besyeyiljw bidao'na' cont yesote'be'.

²¹ Nach gwyas Josén' beče'e bidaon' len xŋa'ben' jaya'ac lažgaque' Israel. ²² Perw Josén', cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyla' šjaya'aque' distritw Judean', san šjaya'aque' gan' mbane distritw Galilean'. ²³ Da'nan' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' beŋe' goso'e xtiža' Diosen' cani', gosene': "Yososi'e Jesúsén' beŋe' Nazaret."

Juan ben' bzoa beŋe' nis gwdixjue'ede' diža' güen che Diosen'

(Mr. 1:1-8; Lc. 3:1-9, 15-17; Jn. 1:19-28)

3 Na' gwde zan iz, Juan ben' bzoa beŋe' nis gwyeje' latje daš gan' mbane distritw Judean'. ² Na' gwdixjue'ede' beŋe', gože' legaque':

—Le yetinje xto'la'le ca', le ba bžin ža cate' Diosen' ben' zoa yaban' nabi'e yichjlaždao' beŋe' yosozenague' che'.

³ Čhe Juanna' bzoj da' Isaíasen' caten' bzoje' Xtiža' Diosen' cani', gwne':

Bena' chne' žižje latje dašen', že':

"Le gonšagüe' yichjlažda'olen' cont soale lez gwzenagle che Xancho' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

⁴ Na' Juanna', xalane' goquen de yiša' xa camello. Na' da' bčhej lsinen' goquen de yid, na' gwdagüe' biše'zo len šina' beser yixe'. ⁵ Beŋe' že' ciuda Jerusalénna' na' beŋe' že' yogo' yež ca' gan' mbane distritw Judean', na' lecze beŋe' že' yež ca' nychj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. ⁶ Na' cate' gosexoadole' bi da' xinj zjanone', Juanna' bzoe' legaque' nis lo yegw Jordánna'.

⁷ Na' lecze ja'ac zan beŋe' Israel beŋe' ca' zjanzi' fariseo na' beŋe' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' le-gaque' gože'ne':

—iLe'e nacchgualé beŋe' zgot na' beŋe' gwxiye'! čChaquele guac yelale lao castigw dan' se'la' Diosen' caten' gone' yela' justis che beŋačen'? ⁸ Še da' li ba betinjle xto'la'len', cheyla' gonle da' nac güen cont yesacbe'e beŋe' ba boša' yichjlažda'olen'. ⁹ Na' bitw gonle xbab gaquele Diosen' bitw gone' le'e castigw che xto'la'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac

gone' cont yej quinga yesyeyaquen xi'in diaža che da' Abrahanna'. ¹⁰ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. ¹¹ Neda' da' li chzoa' le'e nis neche ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' beņe' ca' bi yeson can' chazlaže' Diosen', sele' legaque' lo' yi' gabilen'. Na' ben' za' za' coža'na' zaca'che' ca neda' na' da' nacchgüe' beņe' zaca', bi zaca' gona' xmandadoe' lechja' no xe'e'. ¹² Benan' gone' len beņachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' beņe' bi chesejnilaže' Diosen', sele' legaque' lo' yi' gabilen' dan' cbi cheyol chenit.

Cate' gwzoa Jesúsen' nis

(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gweje' gan' zoa Juanna' cho'a yegw Jordánna' cont Juanna' bzoe' le' nis. ¹⁴ Na' Juanna' ben cho'alagüe' gague go-claže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedeņabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyla' goncho ca' cont gac yogo'lo' dan' non Diosen' mandadw gac.

Nach gwčheb Juanna' bzoe'ne' nis. ¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. ¹⁷ Na' gosende' gwne' Dios ben' zoa yaban', gwne':

—Bengan' Xi'ina' beņe' chacda' na' chebe chezaque-laže'chgüeda' che'.

Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

4 Na' Spiritw che Diosen' benen cont gweje' Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'. ³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojcz Xtiža' Diosen' žan: "Gague yela' guagw na'zen' chyažje chio' beņach cont gac bancho, san lecze chyažjecho yogo'lo' diža' dan' ža Diosen'."

⁵ Nach gwčhe' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe' sibe, ⁶ na' gožen le':

—Še len' naco' dogualje Xi'in Diosen', nga boslažo' cuino', le' nyojczen le'e Xtiža' Diosen', žan:

Seła' Diosen' beņe' ca' zjanac angl che' yesaclene' le', na' yesoxe' le' cont bi čhego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: "Bitw goncho Xancho Diosen' prueba še lede' can' že'na'."

⁸ Da' yoble gwxiye'na' gozče'en le' to lo' ya'a da' nac-chgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen. ⁹ Nach gožen le':

—Yogo' da' quinga chle'edo' nga gonan' lo' nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczen le'e Xtiža' Diosen' žan: "Cheyla' šejnilaže'cho Xancho Diosen' na' toze le' gonxenko'."

¹¹ Na' becuase Satanásen' cuite'na' beyejen ga yoble nach besežin to čhope angl che Diosen' jasaclene' le'.

Jesúsen' gwzolažüe' chyixjue'ede' diža' güen che

Diosen' distritw Galilea

(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyej' distritw Galilea cate' bende' ba de Juanna' ližya. ¹³ Na' gwze'e yež Nazareten' jasoe' ciuda Capernaum dan' chi' cho'a nisdaon' do gan' zjachi' distritw dan' zjanzi' Zabolón na' Neftalí. ¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan beņe' cbi zjanaque' beņe' Israel,

gan' nita' distritw Zabolón na' distritw Neftalí dan' zjambane yešla'ale nisdaon' na' yegw Jordán,

¹⁶ nčho' yichjlaždao' beņe' ca' že' na'.

Perw Diosen' gwsele' to beņe' gwlo'o to be'ni' xen lo' yichjlažda'ogaquen'.

Gosaque' ca beņe' guat len yichjlažda'ogüen' le' gosone' da' malen',

perw bena' gwseła' Diosen' ba bocobe' yichjlažda'ogaquen'.

¹⁷ Cana' gwzolao Jesúsen' gwdixjue'ede' gwne':

—Le yetinje xtoła'len', le' ba bžin ža cate' Diosen' ben' zoa yaban' nabi'e yichjlaždao' beņe' yosozenague' che'.

Jesúsen' gwleje' tap beņe' gwxen be' cont gosaque' tx-en len le'

(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' che Galilea cate' ble'ede' čhope beņe' gwxen be', Simón Pedro na' beņe' biše' Andrés, na' zjanite' chosozale' yixjw dan' chesezende' be'len' lo' nisa'. ¹⁹ Nach gože' legaque':

—Le šo'o len neda'. Nacle beņe' gwxen be', na' chbejle be' lo' nis, perw na'a gona' cont gaxle beņe' yesyechoje' lo' da' malen'.

²⁰ Na' la' gosebejyichjte' yixjw čhen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len beņe' biše' Juan, zjajo'e to lo' barcw len xagaque', chesyeyonšagüe' yixjw čhegaquen'. Na' lecze gox Jesúsen' legaque' šja'aclene' le'. ²² Na' la'

gosontie' barcon' lo na' xagaque' Zebedeon' na' ja'ac-lene' Jesúsen'.

Jesúsen' bsed blo'ede' beñe' zan
(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' beñe' ca' zjaže' to to yodao' che chio' beñe' Israel. Na' gwduxue'ede' diža' güen can' nabia' Diosen' yichjlaždao' beñe' yosozenag che'. Na' Jesúsen' beyone' beñe' ca' chese'e bite'teze yižgüe'. ²⁴ Na' doxen nación Siria gwxa diža' yogo' da' güen da' ben Jesúsen'. Nach beñe' Siria ca' jasesane' yogo' beñe' chesacšene lagüe'na', beñe' chese'e zan yižgüe', beñe' chesey chesela, beñe' zjajo'o zjanyaz da' xigüe' yichjlažda'ogaque' len beñe' chesaz šon na' beñe' natsi' cuerp čhegaquen'. Na' beyone' legaque'. ²⁵ Na' zan beñe' gosao' le', beñe' za'ac distritw Galilea na' distritw Decápolis, na' beñe' za'ac ciuda Jerusalén, na' beñe' za'ac yezica'chle yež da' zjachi' distritw Judea, na' beñe' za'ac yešla'a yegw Jordán.

Diža' dan' bsed blo'e Jesúsen' to lo ya'a
(Lc. 6:20-23)

5 Na' Jesúsen' cate' ble'ede' beñe' zan zjanžag, na' gwloe' gwchi'e to lo ya'a. Na' beñe' ca' zjanaque' le' txe' gosebigue' gan' chi'ena'. ² Nach gwzolao bsed blo'ede' legaque', gwne':

³ —Mbalaz zoa le'e chacbe'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ Mbalaz soa le'e chacyaše'laže'le, le Diosen' yey-oe'xenlaže' le'e.

⁵ Mbalaz zoa le'e chzexjwlaže'le len Diosen' na' len beñačen', le gon Diosen' cont gac lo na'le doxen yežlion' can' gwne'.

⁶ Mbalaz zoa le'e chzelaže'chguale gacle beñe' güen len Diosen', le ba cheyon Diosen' le'e beñe' güen lagüen'.

⁷ Mbalaz zoa le'e cheyaše'le beñe' yoble, le lecze ca' Diosen' yeyaše' yeži'ilaže'de' le'e.

⁸ Mbalaz zoa le'e ba nacle beñe' laždao' xilaže', le šjayzoale txe' len Diosen'.

⁹ Mbalaz zoa le'e chego'ole yeļa' chxenlaže' che beñe' chesediļe, le Diosen' ñe' nacle xi'ine'.

¹⁰ Mbalaz zoa le'e chosoči chososaca' beñe' le'e lagüe' dan' chonle' dan' nac güen lao Diosen', le chzenagle che Diosen' cont chnabi'e yichjlažda'olen'.

¹¹ Na' mbalaz soale še dan' chejnilaže'le neda' chesezi'diža' beñe' le'e na' chososaca'zi'e le'e na' chosoxie' diža' güenlaže' chele. ¹² Le yebechgüe' na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ocho len da' beñe' ca' gosoe' xtiža' Diosen' cani'.

Naccho ca zede' na' ca be'ni' len beñe' že' yežlio nga
(Mr. 9:50; Lc. 14:34-35)

¹³ Le'e nacle ca zede', le zede' chaclenen cont bi cuiayi' no yid bela', na' le'e chonle cont beñačen' cbi chesontequ'e da' mal. Perw še zeden' bich bi xzi' naquen, žnacxe goncho cont yeyaquen xzi' da' yoble? Na' bich bi zacan', lete cho'onchon na' gwlej gwšošj beñe' len. Na' le'e še cbich gonle can' chazlaže' Diosen', nacle ca zede' dan' bich bi xzi' naquen.

¹⁴ Na' le'e nacle ca be'ni' dan' chaclenle beñe' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beñe' chesele'eden'. ¹⁵ Notno gwguļa' to yi' na' gw dosen' to caj, san chde'en le'e ze'e cont chšenin' len yogo' beñe' že' lo' yo'ona'. ¹⁶ Na' ca nac le'e, cheyaļa' soateze soale gonle da' güenña' cont yesele'e beñe' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

¹⁷ Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle beñe' ca' gosoe' xtiža' Diosen' cani' bich yesonen žin. Za'a cont gac can' ža yogo'lo' Xtiža' Diosen' dan' bosozoj beñe' ca'. ¹⁸ Da' li žia' le'e, te che yežlio nga len da' ca' chle'echo le'e yaban', perw ñe to letr dao' ñe to punt dao' dan' nyoj le'e leyna' bi gac yexin, san gac yogo'lo' dan' nžia' bia' Diosen' gac. ¹⁹ Da'n'an' note'tezle še bi gonle can' žanna', la'czļa' še naquen la'zelagüe to da' dao', na' še lecze gwlo'ele beñe' yoble bi yosozenague' čhen, Dios ben' zoa yaba chnabi'e ñe' bi nacle beñe' blao len le'. Na' note'tezle še gonle can' žanna', na' še lecze gwlo'ele beñe' yoble yesone' ca', Diosen' ben' zoa yaba chnabi'e ñe' nacle beñe' blao len le'. ²⁰ Chnia' le'e, beñe' fariseo ca' na' beñe' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clle' ca' che beñe' ca', bitw yežinle yaban' gan' zoa Diosen' chnabi'e.

Da' malen' choncho še chža'a lježcho
(Lc. 12:57-59)

²¹ Na' lecze bsed blo'e Jesúsen' legaque' gože'ne':

—Ba ñezele can' bzejni'i Moisésen' beñe' ca' goseni-ta' cani', gwne': "Nono gotle. Na' še no got ljež beñače', justis ca' yesečhoglagüe' che' cheyaļa' gate'."

²² Na' neda' žia' le'e, note'tezle še chža'a ljež beñačle, zacan' yesečhoglagüe' gata' castigw čhele. Na' note'tezle še chzi'diža' lježle, zacan' yeson beñe' blao ca' chesenabia' nación Israel chechon' castigw čhele. Na' note'tezle še chado'diža' lježle, zaca'czen' yesela' Diosen' le'e lo yi' gabiļ.

²³ Cheyaļa' soacho binlo len ljež beñačcho. Na' la'czļa' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to beñe' lježle, ²⁴ na'ze cheyaļa' gw-cua'anle šlož dan' noxe'len' na' šjenle cont yezoale

binlo len beŋe' lježlen'. Yeyoža' gwaque šjasanle dan' ba gwleje cont gonxenle Diosen'.

²⁵ 'Cate' to beŋe' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' beŋe' ca' yoseyue' le'e ližya. ²⁶ Da' li žia' le'e, bitw yebeje' le'e še biŋa' čhixwle doxen dan' čała'le.

Da' malen' choncho še chzoa xtocho

²⁷ 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o beŋe' byo bi nac beŋe' chele." ²⁸ Na' neda' žia' le'e, note'tezle še chŋa'le to no'ole na' chzelaže'lene', ba naple doła'. Le tozecz ca malen' ba chonle lo' lažda'olen' len dan' chon beŋe' chzoa xtoe'.

²⁹ 'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clal ca cuiayi'le lo yi' gabilen' neče len. ³⁰ Na' še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clal ca cuiayi'le lo yi' gabil neče len.

Beŋe' ca' zjanšagna' bitw cheyała' yesyele'e

(Mt. 19:9; Mr. 10:11-12; Lc. 16:18)

³¹ 'Lecze nezele ley dan' bzoj da' Moisésen' žan: "Note'teze beŋe' ye'e len no'ol che', cheyała' čhas to yiš ga güen' diža' le besyele'ena'." ³² Na' neda' žia' le'e note'teze beŋe' chele'e len no'ol che', len neztede' no'ole čhen' bitw naque' to no'ole chzoa xtoe', chone' cont gaque' ca to no'ole beŋe' chzoa xto. Na' note'teze yošagna'lene' to no'ole beŋe' bela'a len beŋe' che', lecze tozecz ca da' xinj gone' len dan' chon beŋe' čata'lene' no'ol che beŋe' yoble.

Jesúsen' bzejni'ide' cheyała' güe'cho diža' li

³³ 'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyała' gonle con can' ba gwnalen'." ³⁴ Perw neda' žia' le'e gwbat nale quinga che bite'teze: "Yabana' zoan testigw čhia' cho'a diža' li". Bi nale ca' le yabana' zoa Diosen' chnabi'e. ³⁵ Na' neca nale: "Yežlion' zoan testigw čhia' cho'a diža' li", le yežlion' den xŋi'a Dios. Neca nale: "Ciuda Jerusalénna' zoan testigw čhia' cho'a diža' li", le naquen ciuda che Dios ben' naque' la'zelagüe beŋe' chnabia'. ³⁶ Na' neca nale: "Yičhja' zoan testigw čhia' cho'a diža' li", le bitw gac gonle cont yiša' yičhjen' yesyeyaquen da' šiš o yesyeyaquen da' gasj. ³⁷ Še žale gwaquen, gacczen; še žale bi gac, bi gacczen. Le bichle diža' da' nale cont yeseje'e chele, zan' che Satanás dan' chnabia' da' xigüe' ca'.

Bitw co'olaže'cho beŋe' cheseque'ede' chio'

(Lc. 6:29-30)

³⁸ 'Nezele ley dan' bzoj da' Moisésen' žan: "Še to beŋe' gone' zi' yejlaolen', guac gonle zi' yejlagüen', na' še to beŋe' xope' to layle, guac xople to layen'." ³⁹ Perw ne-

da' žia' le'e, bitw gwžonle gwsaca'zi' beŋe' le'e. Še to beŋe' cape' šla'a xaga'le, le güe' dan' yešla'a. ⁴⁰ Še to beŋe' chagüe' xya na' che'nde' que'e xcamisle, le güe' latje que'e len xadoŋ čhelen'. ⁴¹ Na' še to beŋe' blao gone' byen šejlenlene' gua'le yoa' čhen' do gašj hor, le šejlene' le guan' čhop ca'te'le. ⁴² Na' še bi dan' chŋabe beŋe' le'e, le güen'. Na' le cuej še bi da' chŋabe' cuejlene'.

Cheyała' gaquecho beŋe' chgue'e chio'

(Lc. 6:27-28, 32-36)

⁴³ 'Na' lecze ba nezele ley čhelen' žan: "Cheyała' gaquele beŋe' migw chele na' gue'ele beŋe' chgue'ede' le'e." ⁴⁴ Perw neda' žia' le'e, cheyała' gaquele beŋe' chgue'ede' le'e, na' cheyała' nabele Diosen' gac güen che beŋe' chesezi'diže' le'e. Le gon binlo len beŋe' cheseque'ede' le'e, na' le yol güiž Diosen' cont gac güen che beŋe' ca' chososacazi'e le'e. ⁴⁵ Še gonle ca', gwlo'ele nacle xi'ŋ Diosen' ben' zoa yaban'. Len' chone' chla' gwbižen' cont chsenin' che beŋe' zjanaque' beŋe' güen lente che beŋe' zjanaque' beŋe' mal. Na' lecze chone' yejw par beŋe' zjanaque' beŋe' güen len beŋe' zjanaque' beŋe' mal. ⁴⁶ Še chaquele šinze beŋe' chacde' le'e na' bi chaquele beŋe' yoble žbixčhen' chbezle gon Diosen' da' güen chele? Con can' cheson beŋe' güečhixjw ca' chonle, beŋe' ca' žale zjanaque' beŋe' xi'achgua. ⁴⁷ Na' še con chguaple tiox beŋe' biše' lježle ca'ze žchaquele güenŋa' chonle da' chonle ca'? Bitw chonle güen, le ca'czen' cheson beŋe' ca' bi zjanombi'e Diosen'. ⁴⁸ Cheyała' gacle beŋe' šagüe' beŋe' güen len note'teze beŋe' con can' nac Xacho Diosen' ben' zoa yaban' beŋe' šagüe' beŋe' güen.

Jesúsen' blo'ede' naquen' cheyała' goncho da' chazlaže' Diosen'

6 'Cate' gonle to da' güen, bitw gonlen cont yesele'e beŋe' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. ² Da'nana' cate' gwnežjwle to beŋe' da' čhyažde', bitw gwnežjwlen par yeseŋeze beŋe' ca' dan' chonlen'. Beŋe' gwxiye' ca' chosonežjue' bi da' chosonežjue' do lo' yodao' na' do chanez par yeseŋeze beŋe' na' yeseŋe' güen čhegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čhegaque' še ca'. ³ San le'e, še bi da' gwnežjwle to beŋe', le gwnežjon šižize. ⁴ Gonlen ga cbi yesacbe'e beŋe' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' beŋe'.

Bsed blo'e Jesúsen' nac cheyała' yol güižcho Dios

(Lc. 11:2-4)

⁵ 'Cate' yol güižle Diosen', bitw gonle can' cheson beŋe' gwxiye' ca'. Legaque' chesyebede' chesezeche' choso' güiže'ne' lo' yodao' čhegaque', na' do squin chanez. Chesone' ca' cont yesele'e beŋe' can' chesone'na'. Da' li žia' le'e, ba gosacxenczen' lagüe da'

chesone' ca', perw Diosen' bitw gone' ga gac güen çhegaque' še ca'. ⁶ Na' cate' yoł güižle Diosen', le yeyo'o lo' yo'o çhele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen çhele.

⁷ Na' cate' yoł güižle Diosen' bi güe'le diža' zan can' cheson beñe' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' çhegaque'. ⁸ Bitw gonle can' chesone'na'. Ca nac Xacho Diosen', cate' za' ñabelenen' ba ñezczedede' bi dan' chyažjele. ⁹ Quinga yoł güižlene': Xato' beñe' zoa yaba, chñabto' yogo'loł beñe' yesonxene' le'.

¹⁰ Zelaže'to' ñabi'o yichjlaždao' yogo' neto' beñaçh.

Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, beñšcan ña'a.

¹² Na' bezi'xenšca çheto', le lencze neto' chezi'xento' çhe ljež beñaçhto' bite'teze da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yeļa' guac na' naco' beñe' zaca' juisyw toli' tocañe.

Ca'czen' gacšca.

¹⁴ Na' še chezi'xenle' çhe ljež beñaçhlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoļa'len'. ¹⁵ Perw na' še le'e bi chezi'xenle' çhe ljež beñaçhle, lecze ca' Xacho Diosen' bitw yezi'xene' çhelen'.

Jesúsen' bzejni'ide' nac goncho gwbas

¹⁶ Cate' le'e gonle gwbas cont gonxenle' Diosen', bitw gon cho'alaolen' ca' çhe beñe' chegüine'chgüe', can' cheson beñe' gwxiye' ca'. Legaque' chesone' ca' contze chesele'e beñe' le' chesone' gwbas na' yesonxene' legaque'. Da' li žia' le'e, ba gosacxencze' lagüe' da' chesone' ca', perw Diosen' bitw gone' ga gac güen çhegaque' še ca'. ¹⁷ San le'e cate' gonle gwbas, le gwpa'a yichjle na' le çhib cho'alaole. ¹⁸ Le gon ca' cont bi yesacbe'e beñe' chonle gwbas, san gacbe'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebałen chesezen xçe'en, na' lecze chaš beñe' gwban na' yeseque'en.

²⁰ San le' gaque Diosen' cont gone' da' šagüe' da' güen çhele da' bi te çhen cate' yežinle' yaban' gan' zoe'na', da' bi šo'ba', na' ñeca sen xçe'en, na' ñeca gac šo' beñe' gwban yeseque'en. ²¹ Le gan' de dan' chaquelen' na' zoa yichjlažda'olen'.

Žia yejlaochi cont chle'echo

(Lc. 11:34-36)

²² Žia yejlaole cont chle'ele. Še bitw bi chaquen, chle'eczele binlo. ²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchoł yichjlažda'ole še bi chzenagle çhe Diosen'.

Bitw gac gaquecho Diosen' na' gaquetecho mechw

(Lc. 16:13)

²⁴ Notno gac gon žin len çhope xane' to ši'ize, le še gone' ca', gue'ede' to xan žinña' na' gacde' yetoe'; o gone' žin çhe toe' do yichj do laže' na' çhe ben' yeto gonon' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle beñe' gwñi'a.

Diosen' chapši'e xi'ine' ca'

(Lc. 12:22-31)

²⁵ Da'nana' žia' le'e, bi gacžejaže'le bi da' ye'ej gagwle šlac mbanle, na' lecze ca' bi gacžejaže'le çhe xałana'le. Zaca'ch yeļa' mban çhelen' ca' yeļa' guagw. Lecze ca' cuerp çhelen', zaca'chen ca' xałana'le. ²⁶ Le gon xbab ca' nac be ca' zjažia xil ben' chesaš lo be', bitw chesazba', bitw chesalapba', ñeca zoa da'a xoa' çhegacba', perw na' Xacho Diosen' ben' zoa yaba chguagwcz'e'ba'. jNacchle zaca' le'e ca' be ca' zjažia xilen! ²⁷ Na' ñe tole bi gac yoston' cuinle gašje metr še con cue' yichjle tonle.

²⁸ Na' žbixçhen' chbec yichjle xałana'le? Le gon xbab ca' nac yej ca' da' zjaze yixe' chesecha'oczen'. Bibi žin chesonon, ñeca chesaljen do. ²⁹ Na' žia' le'e, da' rey Salomón gocue' lache' güen juisyw, perw bitw bežinlaže' xałane'na' ca' yeļa' xdan çhe yej ca'. ³⁰ Diosen' none' xdan da' ca' ze yixen' la'czla' to çhop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le çhe'. ³¹ Da'nana' bitw cuec yichjle çhe bi dan' chyažjele, ñale': "žBin' ye'ej gagwcho na' bin' gacwcho?" ³² Beñe' ca' bi chesonxene' Diosen' con chesoe'laže' bi da' gata' yese'ej yesagüe' na' çhe xałana'gaque'. Perw Xacho Diosen' ben' zoa yaban' ñezczedede' bi da' ca' chyažjele. ³³ Cheyaļa' güe'laže'le gwzenagle çhe Diosen' cont ñabi'e yichjlažda'olen' na' cont gacle beñe' güen len le', lenña' naquen da' žialaoch, na' yogo' da' ca' chyažjele, goncze Diosen' len. ³⁴ Bitw cuec yichjle çhe bi dan' gac gwxe güižj, le decze da' cuec yichjcho tža tža. Da'nana' to to ža con cuec yichjcho çhe dan' chac ca' hora'.

Bitw zaca'cho ñacho zjanap beñe' doļa'

(Lc. 6:37-38, 41-42)

7 Bitw gonle xbab zaca'le ñale beñe' zjanape' doļa'. Še ñale çhe beñe' zjanape' doļa', ca'cze Diosen' ñe' le'e naple doļa'. ² Can' chosbaga'le beñe' žale zjanape' doļa', lecze can' yosbaga' Diosen' le'e ñe' naple doļa'. Con can' chonle len beñe', lecze can' gon Diosen' len le'e. ³ žBixçhen' chña'le beb dao' dan' yo'o lo' yejla

beŋe' lježle na' bi chacbe'ele naquech beb xen dan' yo'o lo' yejlaolen'? ⁴ Na' še le'e yo'o to da' xench lo' yejlaolen' žnacxečen' che'le beŋe' lježlen': "Beŋ yebeja' beb dao' dan' yo'o lo' yejlaguon'"? ⁵ iBeŋe' gūexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao beŋe' lježle.

⁶ Perw bitw güe'tezle xtiža' Diosen' len beŋe' ca' cheson yičhjaogüe' cbi chesaclaže' yosozenaguen', le xož yesonde' le'e znia ca cheson bał beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len beŋe' ca' cheson yičhjaogüe', xož yosolej yosošošje' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le gonzen'
(Lc. 11:9-13; 6:31)

⁷ Še žan bi da' chyažecho, chŋabchon. Še žan to da' chaclaže'cho želecho, chyiljwchon. Še žan chaclaže'cho saljw beŋe' puert che' na' ŋecho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'. ⁸ Na' note'tezle še bi da' chŋabelene', gonzen'. Na' še bi dan' che'nele ŋezele, gwzejni'iczden' le'e. Na' še žan chaclaže'le gac to da' gac, yoł güižle Diosen' can' chon to beŋe' chŋie' cho'a puert, nach Diosen' gone' cont gacczen.

⁹ Na' le'e xa bidao', še xi'ingle nabebe' le'e yetextil žgwnežjwlebe' to yej? ¹⁰ Na' še ŋabbe' yid beł gagwbe', žgwnežjwlebe' to be xigüe'? ¹¹ La' nacle beŋe' mal, ŋezele chnežjo xi'ingle to da' güen. Nacchxe güen gon Xacho Diosen' ben' zoa yaban' len beŋe' chŋab lagüe'na' bi dan' chyažjde'.

¹² Na' con yogo' da' güen da' chaclaže'le yeson beŋačen' len le'e, lecze ca' cheyała' gonle len le-gaque', le can' zejen da' nyoj le'e ley dan' bzoj da' Moisésen' na' dan' bosozoj da' beŋe' ca' goso'e xtiža' Diosen' cani'.

Nez da' yežin yaban' zaca'leben ca to nez las
(Lc. 13:24)

¹³ Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' beŋe' zan cheseque'en. Perw cheyała' gonle byen šo'le nez güenŋa' la'czla' chaquele naquen ca to nez las, to nez zdebe, le nez malen' chežinen gabił gan' saca'zi'le toli tocaŋe. Na' nez güenŋa' chežinen yaba ga banle toli tocaŋe.

Dan' choncho chlo'en bin' yo'o lo' yičhjałda'ocho
(Lc. 6:43-44)

¹⁵ Cheyała' gwsaca'le cont bi šejle'le xtiža' beŋe' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' beŋe' güen. Perw zjanaque' beŋe' laždao' xi'a na' chesaclaže' yosožiaye'e le'e. ¹⁶ Con can' nac da' chbia to to yaguen' ŋezecho bi yaga'. Ca nac yag yeše' bitw chbian uvas na' ŋeca yag lay chbian yixgüigw.

Ca'czen' cheyała' gacbe'ele beŋe' ca' yeseziye'e le'e cate' le'ele dan' chesone'na'. ¹⁷ Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian. ¹⁸ Bitw ŋacho to yag frut güen chbian frut da' bi nac güen, na' ŋeca ŋacho dan' bi nac güen chbian da' nac güen. ¹⁹ Na' yogo'te yag frut da' bibi chbia, čhog xan yaga' len na' gwzeyen'. ²⁰ Na' can' nac dan' cheson to to beŋe', ŋezecho še zjanaque' beŋe' güen o beŋe' mal.

Gague yogo' beŋe' yesyežine' gan' zoa Diosen' chnabi'e
(Lc. 13:25-27)

²¹ Beŋe' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Beŋe' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'. ²² Cate' žin ža yosodie' cuent lao Diosen', beŋe' zan yesi'e neda': "Xana', goclen neto' ŋa'a, le ba gwduxjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yičhjałždao' beŋe'. Na' lecze bza' bzetjto' lao'na' bento' da' zan yela' guac." ²³ Perw na' yapa' legaque': "Bitw nombi'a le'e. Le šjaya'ac ca'ale le'e beŋe' güen da' xinj'."

Čhope beŋe' na' yo'o da' chon to toe'
(Mr. 1:22; Lc. 6:47-49)

²⁴ Beŋe' chzenag xtiža'na' na' chone' can' žia'na' zaca'lebde' ca to beŋe' sina' beŋe' ben liže' na' gwduxjue' lenen len yej gual. ²⁵ Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwduxjue' lenen de yej. ²⁶ Na' beŋe' chzenag xtiža'na' perw bitw chone' can' žia'na', zaca'lebde' ca to beŋe' tont beŋe' bzoa ližen' lo yox. ²⁷ Na' goc yejw zil juisywna' na' betj yegon' gwyechjen liže'na' na' gwyechj be bdono'. Nach ližen' bebixen gwžiyin'.

²⁸ Na' cate' beyož be' Jesúsén' diža' ca', beŋe' ca' že' na' besyebande' can' bsed blo'eden'. ²⁹ Le can' bzejni'ide' nacbja' ŋezde' cayaŋen' nac xbab che Diosen', gague bzejni'ide' can' chosozejni'i beŋe' ca' chososed chosolo'e ley dan' bzoj da' Moisésen'.

Jesúsén' beyone' to beŋe' che'ede' yižgüe' dan' nzi' lep-ra
(Mr. 1:40-45; Lc. 5:12-16)

8 Beŋe' zan zesyenagüe' Jesúsén' cate' beyetje' ya'ana'. ² Nach to beŋe' che'ede' yižgüe' dan' nzi' lepra gwbigue' lao Jesúsén' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsén' bli ne'e na' gwxoen' yičhje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'. ⁴ Nach Jesúsén' gože' le':

—Notno yo'ò can' ba beyona' le'. Con gwey ja'na' bxoza' cont le'ede' bach beyacdo'. Na' bnežw da' cheya'la' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' be'ne' yesenezde' ba beyacdo'.

Jesúsen' beyone' xmos to soldadw
(Lc. 7:1-10)

⁵ Na' cate' bežin Jesúsen' Capernaum to xan soldadw be'ne' Roma la' bšagte' le'. Na' gota'yoede' Jesúsen',
⁶ gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' be'ne' zaque' par sa'o liža'na'. Ngateze ben mandadw yeyac xmosan' na' yeyaccze'.

⁹ Neda' zoa be'ne' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe':

“Gwey”, na' cheje', na' cate' chapa' yetoe': “Da”, na' chide', na' cate' chapa' xmosa': “Da' nga gono”, na' chonen'. Nan' nežda' con nao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' be-bande' na' gože' be'ne' ca' zjanagüe' le'na':

—Da' liče žia' le'e, ne toze be'ne' Israel bi'na' šejnilaže'chgüe' neda' ca' benga bi' naque' be'ne' Israel.

¹¹ Žia' le'e, be'ne' zan za'ac doxen yežlion' šjasyenite' tx-en len da' xozxta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'.
¹² Na' ca' nac be'ne' nación Israelen' ben' gwlej Diosen' cont yesenite' len le', choj be'ne' zan bitw yesejnilaže' neda'. Da'nan' se'le' legaque' lo' yi' gabil' gan' nac cho' na' yesebežyaše' na' yesagwxejte laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':
—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'
(Mr. 1:29-31; Lc. 4:38-39)

¹⁴ Na' gwey Jesúsen' liž Pedroa', na' ble'ede' taobi'in che Pedroa' die' yo'e da' la. ¹⁵ Jesúsen' bexue' ne'e na' la' bechojtie' da' lan'. Nach la' gwyaste no'olen' bsi'ne' da' gose'ej gosagüe'.

Jesúsen' beyone' be'ne' zan
(Mr. 1:32-34; Lc. 4:40-41)

¹⁶ Na' cate' ba gwxin, besežin be'ne' gan' zoa Jesúsen' zjanči'e be'ne' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' be'ne' ca' chesacšene'.
¹⁷ Bene' ca' cont goc can' ža Xtiža' Diosen' dan' bzoj da' Isaías che' cani', žan: “Le'na' yeque'e yela' chžaglaoc checho na' yeque'e yogo' yižgüe' chechon'.”

Can' gož Jesúsen' be'ne' ca' gosaclaže' yesa'ogüe' le'
(Lc. 9:57-62)

¹⁸ Gwde na' ble'e Jesúsen' ba besežin be'ne' zan zjanyechjde' le', nach bene' mandadw len be'ne' ca' zjanaque' le' txen cont yeselague' yešla'a nesdaon'.

¹⁹ Na' bchoj to be'ne' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecze chesyžežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwse'la' Diosen' golja' be'nač.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Be'šca latje zgua'tec šjaycuaša'ne'.

²² Jesúsen' gože'ne':

—Yo'ò len neda'. Be'ne' ca' zjanac yichjlažda'ogüe' ca' che be'ne' guat, legaque' guaccze yosocuaše' yezi-ca'chle be'ne' guat.

Jesúsen' bcueze' to be' bdono' lo nisdao'
(Mr. 4:35-41; Lc. 8:22-25)

²³ Beyož be' Jesúsen' diža' ca', gwo'e lo' barcon' len be'ne' ca' zjanaque' le' txen. ²⁴ Na' šlac zej barcon' lo nisen' gwzolao gweyčj to be' bdono' na' nesdaon' leze chas chatan' na' gwzolao cheyož nis lo' barcon', perw ba chtas Jesúsen'.
²⁵ Nach bosyosbane' le' gosi'ene':

—iXanto! iBosla chio! iBach chbiayi'cho!

²⁶ Nach Jesúsen' gože' legaque':

—žBixčen' chžebtecle ca'? žNacxečen' bi chejle'le chia'?

Na' gwyase' na' gwdi'le' be' bdonon' len nesdaon', na' la' gosebe'žiten. ²⁷ Na' be'ne' ca' zjanaque' Jesúsen' tx-en besyebande' can' bene'na', nach gose' lježgaque':

—žNoxe benga? lente be' bdono' na' len nesdaon' chosozenaguen che da' že'.

Čhope be'ne' Gadara zjajo'o zjanyaze' da' xigüe'
(Mr. 5:1-20; Lc. 8:26-39)

²⁸ Na' besežine' yešla'a nesdaon' gan' chi' laž be'ne' Gadara ca'. Na' cate' bechoj Jesúsen' lo' barcoa' bosošag čhope be'ne' le', be'ne' zjajo'o zjanyaz da' xigüe' yichjlažda'ogaque'. Be'ne' quinga ba nite' cap-santw na' gosacchgüe' be'ne' znia juisyw len be'ne' chesyžežague' na' gague no' chac ta tnez. ²⁹ Na' bososye'e gose'e Jesúsen':

—žBixčen' chgoša' chlaže' čchio' len neto', Jesús? Na-co' dogualje Xi'in Dios. žZao' gwsaco' neto' na'a cate' bi'na' žin ža si'to' castigw?

³⁰ Na' ga'la'ze chesaš zan coš chesagwba'. ³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' be'ne' quinga, gwse'la' neto' gan' nita' coš ca' na' be' latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' beṇe' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jaselažo'ba' lo' nisdaon' ga gosatba' gose'ejba' nis.

³³ Na' beṇe' ca' chosoyoe' cošen' besele'ede' dan' ba goquen na' bosyoxonje' jasyeyeže' beṇe' lagüe' yež yo-go' can' ba goquen' na' can' ba besyeyac beṇe' ca' gosoo' gosaz da' xigüen' yichjlažda'ogaquen'. ³⁴ Nach yogo' beṇe' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

Jesúsen' beyone' to beṇe' bi chda šla'a ṇi'a ne'e

(Mr. 2:1-12; Lc. 5:17-26)

9 Nach Jesúsen' beyo'e lo' barcon' len beṇe' ca' zjanaque' le' txen besyelaque' yešla'a nisdaon' par besyežine' Capernaum gan' ba gwzoacze' sša. ² Na' be-sežin xonj beṇe' zjanlene' to beṇe' xinj beṇe' bi chda šla'a ṇi'a ne'e, zjanxoe' le' to lo cam dao'. Cate' gocbe'e Jesúsen' le' gosejnilaže'ne' nach gože' beṇe' güe'na':

—Bebe xi'ina'. Ba bezi'xena' xtoḷon'.

³ Na' baḷ beṇe' ca' chososed chosolo'ede' dan' bzoj da' Moisésen' gosende' dan' gož Jesúsen' beṇe' güe'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca' Dios." ⁴ Jesúsen' gocbe'ede' ca' nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'? ⁵ Še yapa'ne': "Ba bezi'xena' xtoḷo'na'," bi nezele še napa' yela' gwnabia' cont yezi'xena' xtoḷen'. San še yapa'ne': "Gwyas na' gwda", na' nacbia' še napa' yela' guac gac can' gwnian'. ⁶ Perw neda' naca' beṇe' gwseḷa' Dios golja' beṇač gwlo'eda' le'e ṇa'a zoa' yežlio nga napa' yela' gwnabia' cont yezi'xena' xtoḷa' beṇačhen'.

Nach gože' beṇe' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjayde' liže'. ⁸ Na' beṇe' ca' besele'ede' can' goquen' besezebchgüe'. Na' gosonx-ene' Diosen' dan' be'e yela' guac che Jesúsen'.

Jesúsen' gwleje' Mateo cont goque' txen len le'

(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwyejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan beṇe' güečhixjw na' len yebaḷe beṇe' güen da' xinj na' len beṇe' ca' zjanaque' txen len le'. ¹¹ Na' beṇe' fariseo ca' cate' besele'ede' chi' Jesúsen' txen len beṇe' ca', gose'e beṇe' ca' zjanaque' le' txen:

—¿Nacxechen' ben' chsed chlo'ede' le'e che'ej chagw-lene' txen beṇe' güečhixjw na' yebaḷe beṇe' güen da' xinj?

¹² Na' cate' Jesúsen' bende' xtiža'gaquen' na' gože' le-gaque':

—Beṇe' cbi chesacšene bitw cheseyažjde' beṇe' güen rmed. Beṇe' chesacšende', legaquen' cheseyažjde'

beṇe' güen rmed. ¹³ Le šjased bi zeje Xtiža' Diosen' dan' nyojen žan: "Chaclaža' yeyaše' yeži'ilaže'le beṇe', gague con gotle beyixe' gonxenle neda'." Gague beṇe' ba zjanaque' beṇe' güen len Diosen' zedeṇeyoeda' cont yesyetingjde' xtoḷen', san beṇe' güen da' xinjen'.

Goseṇabde' Jesúsen' bixchen' beṇe' ca' zjanaque' le' tx-en bi gosone' gwbas

(Mr. 2:18-22; Lc. 5:33-39)

¹⁴ Nach beṇe' ca' chesone' txen len Juan ben' bzo'e beṇe' nis gosebigue' lao Jesúsen' na' gose'ene':

—Neto' na' len beṇe' fariseo ca' chonchguato' gw-bas, perw beṇe' ca' zjanaque' le' txen bi chesone' gw-bas. ¿Bixchen'?

¹⁵ Nach gož Jesúsen' legaque':

—¿Guac yesezoa beṇe' yela' güine' beṇe' chesaxe' to ga chac yela' güešagna' šlac ben' bšagnan' zoalene' le-gaque'? Še zoa ben' bšagnan' bi gac yesegüine'de'.

Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len beṇe' ca' zjanaque' neda' txen.

¹⁶ Nono zoa beṇe' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen.

¹⁷ Na' lecze ṇeca zoa beṇe' chgue'e vino cobe lo' bzod yide'exo', le vino coben' chšon' yide'exon' na' laḷe vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole beṇe' gwdane' xe'

(Mr. 5:21-43; Lc. 8:40-56)

¹⁸ Na' ṇe' choe'te Jesúsen' dižan', bžin to beṇe' gwn-abia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

¹⁹ Na' gwzoža' Jesúsen' na' gwče'e beṇe' ca' zjanaque' le' txen ja'aclene' beṇe' gwnabian'. ²⁰ Na' šlac zja'aque' liž beṇe' gwnabian' zej to no'ole nagüe' le-gaque', beṇe' ba goc šižinw iz chzoe' gwbao', na' bene' byen gwbigue' cože' Jesúsen' gwdane' lox xen'. ²¹ Le bene' xbab lo' yichjlažda'ogüen', gwne': "Con še ba gw-dana' xen' nach yeyacda'." ²² Na' gwyechj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' ne-da'.

Na' la' beyactede'.

²³ Cate' bžin Jesúsen' liž beṇe' gwnabian' na' ble'ede' beṇe' zan zjaže' chesone' sšag chesebežchgüe' na' ba nita' beṇe' chosocuež bžejo par yosocuaše'be'. ²⁴ Na' gože' legaque':

—Le yechoj ngale. Bi' no'ole daon' biṇa' gatbe', san chtasben'.

Na' beṇe' ca' bosoxiže' gosonle' che'. ²⁵ Na' beyož bešaše' yogo'loḷ beṇe' ca', nach gwo'o Jesúsen', beṇe' taca' bi' no'ol guaten', na' beyasbe'. ²⁶ Na' ca' nac yela' guac dan' ben Jesúsen', gwxxoa diža' chen yo-go' yež dan' zjachi' do na'.

Jesúsen' beyone' čhope beņe' lčhoł

²⁷ Cate' beza' Jesúsen' len beņe' ca' zjanaque' le' txen, ja'aclen čhope beņe' lčhoł legaque' na' gosene' zižje:

—Le' naco' xi'īn diaža čhe da' rey David, beyaše'laže'sca neto'.

²⁸ Na' cate' Jesúsen' len beņe' ca' zjanaque' le' txen besežine' yo'o gan' zjanite' na' besyeyo'e, na' lecze goso'o beņe' lčhoł ca'. Nach Jesúsen' gože' legaque':

—Čhejle'le guac gona' cont yele'ele?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' le-gaque':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaque'.

Jesúsen' beyone' to beņe' bi goc ĩie'

³² Na' cate' besyeya'ac beņe' ca', la' besežinte beņe' yoble zjanči'e to beņe' bi goc ĩie', na' yo'o yaz da' xigüen' yičhjažda'ogüen'. ³³ Jesúsen' bebeje' da' xigüen' na' la' beņete' bena'. Na' beņe' zan besele'ede' can' goquen' besyebanchgüede', na' gosene':

—Chio' beņe' Israel, da' nechon' za' ble'echo yela' guac dan' nac ca'.

³⁴ Perw na' beņe' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yičhjaždao' beņe'.

Jesúsen' cheyaše' cheži'ilaže'de' beņachen'

³⁵ Na' Jesúsen' len beņe' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' beņe' Israel lo' yodao' čhegaque' ca', gwdixjue'ede' diža' güen can' ĩabia' Diosen' yičhjaždao' beņe' yosozenag čhe'. Na' Jesúsen' beyone' beņe' ca' chese'e bite'teze yižgüe' na' bite'teze da' chesac čhegaque'.

³⁶ Na' ble'ede' ba besežag beņe' zan na' beyaše' beži'ilaže'de' legaque', le gocbe'ede' chesacžejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca' nita' no xila' be nono de gwyoe legacba'. ³⁷ Nach gože' beņe' ca' zjanaque' le' txen:

—Chyažje beņe' zan yeseyixjue'ede' xtiža' Diosen', perw to čhoppa beņe' nita' yeseyixjue'eden'. Na' beņe' yosozenague' čhe Diosen' zjazaca'lebe' ca' to coseš xen da' chyažjen yedoben. ³⁸ Da'nana' le ĩabe Xancho Diosen' seła'che' beņe' yesaclene' chio' yotobcho coseš čhen'.

Jesúsen' gwleje' beņe' šižiņw ca' gosaque' txen len le' (Mr. 3:13-19; Lc. 6:12-16)

10 Jesúsen' botobe' beņe' šižiņw ca' zjanaque' le' txen na' bnežjue' legaque' yela' gwnabia' cont besyebeje' da' xigüe' lo' yičhjaždao' beņe', na' cont besyeyone' beņe' bite'teze yižgüe' da' chese'ede' na' bite'teze da' chesac čhegaque'.

² Quinga zjale beņe' šižiņw ca': Simón ben' lecze le' Pedro ben' goque' beņe' blaο, na' Andrés beņe' biše' Pedroa', na' xi'īn Zebedeon' Jacobo len Juan, ³ na' Felipe, na' Bartolomé, na' Tomás, na' Mateo ben' goc beņe' güečhixjw, na' Jacobo xi'īn Alfeo, na' Lebeo ben' lecze le' Tadeo, ⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

Jesúsen' gwsele' beņe' šižiņw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' beņe' šižiņw ca' jasedixjue'ede' xtiža' Diosen', gože' legaque':

—Bitw šejle laž beņe' cbi zjanaque' beņe' Israel, na' ĩeca šejle yež ca' zjachi' distritw Samaria. ⁶ Le šja'ac gan' že' beņe' Israel beņe' ba zjambiyi' dan' bitw ĩa' yesombi'e Diosen'. ⁷ Le šja'ac le šjatixjue'ede' ba bžin ža Diosen' ben' zoa yaban' ĩabi'e yičhjaždao' beņe' yosozenag čhe'. ⁸ Le yeyon beņe' chesacšene, le yeyon beņe' ca' chese'e yižgüe' dan' nzi' lepra, le yosban no beņe' ba gosat, na' le yebej da' xigüe' ca' zjajo'o zjanyaz lo' yičhjaždao' beņe'. Diosen' bibi bčhixjue' le'e da' ba beņe' le'e yela' guac čhen' cont gonle' da' quinga, da'nana' le gaclen beņe' na' bibi gwčhixjwlene'.

⁹ Bitw gua'le mechw de oro, de plata o de cobre šlac co'ole nez. ¹⁰ Na' ĩeca gua'le bzod, o yeto xcamisle, ĩeca gua'le yel, na' ĩeca goxe'le xis da' gwčiše'le. Ca' nac le'e chonle xšinan' zaca'le par goņ beņe' da' ye'ej da' gagwle gan' seła' le'ena'.

¹¹ Na' gate'tez ciuda o yež ga žinle, le ĩab še zoa to beņe' güen beņe' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. ¹² Na' cate' žinle liže'na', le gwguape' tiox, na' le ĩablaže' soa cueze' binlo len yičhjažda'ogüe'. ¹³ Na' še nita' beņe' chesaclaže' yese-zoa yesebeze' binlo len yičhjažda'ogaquen', na' gac can' gwĩablaže'le par yesezoa yesebeze' binlo. Perw še nono zoa beņe' chesaclaže' yesezoa yesebeze' binlo len yičhjažda'ogaque', bi gac dan' ba gwĩablaže'len'. ¹⁴ Na' še zoa ga bi yosolebe' le'e ĩeca yosozenague' čhele, cate' yeza'le na', le cuibe ĩi'alen' yo bište cont nacbia' bi checa'ale čhegaque'. ¹⁵ Da' mal xen goson beņe' ciuda Sodoma na' beņe' ciuda Gomorra cani', perw da' li žia' le'e, cate' žin ža gac juisyw beņe' ca' bi bosolebe' le'e ližen' yesa'le'chde' clē ca' beņe' Sodomana' na' beņe' Gomorran'.

Gac da' saca'zi'cho

¹⁶ 'Neda' seļa' le'e šjatixjue'ele xtižan' len beņe' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'n'an' cheyaļa' gacle beņe' yo'ochgua xbab na' beņe' xenļaže' len legaque'. ¹⁷ Le gwsaca' len beņe' ca' chesegue'ede' le'e. Nita' beņe' yesone' le'e lo na' beņe' gwnabia' ca' cont yesot yeseyine' le'e lo' yodao' čhegaquen'. ¹⁸ Nach lecze dan' chejnilaže'le neda' nita' beņe' yeseče'exoxje' le'e do lao rey, do lao nochle beņe' gwnabia'. Na' can' güe'lenle legaque' xtižan', lecze can' güe'lenle xtižan' len beņe' bi zjanaque' beņe' Israel. ¹⁹ Perw cate' yesezene' le'e na' yeseče'e le'e lao beņe' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyaļa' nale. ²⁰ Le gague le'eczen' ģele, san Spiritw čhe Xacho Diosen' gonen ga nale bin' cheyaļa' nale.

²¹ 'Cana' baļ beņaçh yesečje' yesone' beņe' biše' golje' lo na' beņe' yesote' legaque', na' nita' beņe' yesone' xi'ingaque' lo na' beņe' yesot legacbe', na' nita' beņe' yesone' xaxņe' lo na' beņe' yesote' legaque'. ²² Yo-go'ze beņe' yesegue'ede' le'e dan' chejnilaže'le neda', perw note'tez le'e gwyo gwčhejlaže'le cont bi cuejy-ichjle dan' chejnilaže'le neda' žinten gatle, nach šjayzoale len Diosen'. ²³ Še beņe' že' to yež yosyolague' le'e, le yeza'teze na' yeyejle ga yoble. Biņa' yeyož šjatixjue'ele xtižan' yogo' yež gan' že' beņe' Israel ca' cate' yida' da' yoble, neda' naca' ben' gwseļa' Diosen' golja' beņaçh.

²⁴ 'Ca nac cate' to beņe' chsede' len to maestrw, bitw nacho naque' beņe' blaoch ca maestroa'. Na' to mos bitw naque' blaoch ca xanen'. ²⁵ Con cheyaļa' čazlaže' ben' chseda' še yežinlaže' gague' ca maestrw čhe' na' cheyaļa' čazlaže' mosen' še yežinlaže' gague' ca xanen'. Neda' naca' Xanle, na' beņe' chesegue'ede' neda' chesene' chona' txen len Beelzebú dan' nac xan yogo' da' xigüe', na' naquechxe yesene' čhe le'e nacle neda' txen.

Cheyaļa' žebcho castigw dan' gon Diosen' čhe beņe' güen da' xinj

(Lc. 12:2-9)

²⁶ 'Bitw žeble beņe' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. ²⁷ Da' zan dan' chsed chlo'eda' le'e dan' bi chsed chlo'eda' yezi-ca'chle beņe'. Na' le'e le gwsed le gwlo'en yogo'lo beņe', na' le gon cont beņe' zan yesejni'iden'. ²⁸ Bitw cheyaļa' žeble beņe' ca' yesot le'e. Legaque' bitw gac bi yesonde' yichjlažda'olen'. Cheyaļa' žeble Diosen', le len' nape' yeļa' gwnabia' cont gwžiaye'e cuerp čhelen' len yichjlažda'olen' lo yi' gabiļen'.

²⁹ 'Nezecho byiņe dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje. ³⁰ Na' ca nac chio', chaquechgüe Diosen' chio' na' neztede' baļ yiša' yichj to tocho žia. ³¹ Da'n'an', bitw žeble, le zaca'chle clal ca zan byiņ dao' ca'.

Cheyaļa' güe'cho diža' len beņe' ye'cho legaque' nom-bia'czcho Jesucriston'

(Lc. 12:8-9)

³² 'Na' note'teze beņe' še cho'e diža' len beņaçhen' che'ene' chejle'e čhia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen. ³³ Na' note'teze beņe' še cho'e diža' len beņaçhen' che'ene' bitw chejle'e čhia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

Yesedile beņe' neče dan' bid Jesúsén'

(Lc. 12:51-53; 14:26-27)

³⁴ 'Bitw gonle xbab beņe' že' yežlio nga yesezoa yese-beze' binlo len lježgaque' na'a ba bida'. Bitw yesezoa yesebeze' binlo san yesedile'. ³⁵ Lagüe dan' ba bida' yesedil beņe' byo len xe' na' no'olen' len xņe'e, na' yesedil xo'oliž no'ole len le'. ³⁶ Beņe' lo' yo'oze yesegue'e lježe'.

³⁷ 'Note'tez beņe' še chaquechde' xe' o xņe'e clal ca chacde' neda', bitw zaque' gone' txen len neda'. Lecze ca' še chaquechde' xi'ine' clal ca neda' bitw zaque' gone' txen len neda'. ³⁸ Na' note'teze' še bi chzenague' čhia' lagüe' dan' chacde' yosoči yososaca' beņe' le', bitw zaque' cont gague' neda' txen še ca'. ³⁹ Note'teze beņe' chacde' gone' cont bi čhi saque' o cont nono yesot le', benan' cuiayi'. Na' note'teze beņe' chzanlaže' cuine' saca'zi'e o gate' ne čhia' neda, ba de yeļa' mban čhe' toļi tocaņe.

Beņe' ca' yesenita' mbalaz cate' yesyežine' yaba

(Mr. 9:41)

⁴⁰ 'Note'teze beņe' chosolebe' le'e chosolebe' neda', lecze chosolebe' Dios ben' gwsele' neda'. ⁴¹ Na' note'teze beņe' yebede' gwlebe' beņe' cheso'e xtiža' Diosen', mbalaz soe' cate' yežine' yaban' lecze ca mbalaz soa ben' cheso'e xtiža' Diosen'. Na' mbalaz gac čhe beņe' ca' cheson can' chazlaže' Diosen' caten' yesyežine' yaban'. Na' note'teze beņe' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'. ⁴² Note'teze beņe' gwnežjue' la' to xiga'ze nis ye'ej beņe' chejnilaže' neda', la' gwnežjuen' beņe' bi naque' beņe' blaō, da' ličze gona' cont soe' mbalaz caten' yežine' yaban'.

Juanna' gwsele' čhope beņe' zjanaque' txen len le' gan' zoa Jesúsén'

(Lc. 7:18-35)

11 Cate' beyož ben Jesúsén' mandadw can' yeson beņe' šižiw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalode' xtiža' Diosen' len beņe' ca' že'na'.

² Juanna' ben' bzoe' beņe' nis, cana' ba die' ližya. Na' bende' diža' čhe yogo' dan' chon Criston' ben' gwseļa' Diosen' cont yedenabi'e. Nach Juanna' gwsele' čhope beņe' zjanaque' txen len le' gan' zoa Jesúsén', ³ jaseže'ne':

—¿Len' naco' ben' chbezto' seļa' Diosen', še cheyaļa' cuezchto' yid beņe' yoble?

⁴ Nach Jesúsen' gože' legaue':

—Le šjaya'ac na' le šjajež Juanna' doxen da' ca' ba ble'ele na' da' ca' ba benele. ⁵ Ba ble'ele chona' cont chesyel'e no beņe' lchoļ, na' chesyeda no beņe' zjanx-inj ņi'e. Na' lecze beņe' gose'e yižgüe' dan' nzi' lepra besyeyacde', na' chesyeyene no beņe' cuež. Ba ble'ele bosbana' no beņe' guat, na' ba benele choa' diža' güen čhia' len beņe' yaše' ca'. ⁶ Mbalaz zoa beņe' chejle'e čhia' na' bi chdebde'.

⁷ Na' cate' besyeya'ac beņe' ca' zjanaue' txen len Juanna', nach Jesúsen' be'lene' beņe' ca' zjandoben' xtiža' Juanna', gože' legaue':

—¿Nacxe nac ben' jale'ele latje dašen'? ¿Chaque' quil ca'ale? Bi naue' ca'. ⁸ ¿Nac naue' caten' jale'elne'? ¿Nyaze' lache' šagüe'? ¿še bitw? le beņe' zjanyaz lache' šagüe' nite' yo'o güenchgua ca no liž beņe' gwnabia'. ⁹ ¿Noxen' jale'ele? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze beņe' choe' xtiža' Diosen'. ¹⁰ Čhe benga nyojen le'e Xtiža' Diosen', žan:

Neda' Dios seļa' to beņe' cuialagüe' laguo' güe'e xtižon'

cont cate' šejo' ba zjanita' beņe' yosozenague' čhio'.

¹¹ Da' li žia' le'e notoch no beņaçh ņa' soa beņe' nauech beņe' blao ca Juanna' ben' bzoe' beņe' nis. Perw na' note'tez beņe' chzenague' čhe Diosen' cont nabia' Diosen' yichjlažda'ogüen', la'czļa' naue' beņe' la'zelagüe beņe' bibi zaca', ba chejni'ichde' čhia' clal ca Juanna'.

¹² 'Gwzolaon caten' Juanna' gwdixjue'ede' xtiža' Diosen' na' bzoe' beņe' nis na' chžinten ņa'a, beņe' zan chesone' ga zelao chesezaquede' cont nabia' Diosen' yichjlažda'ogaue'. ¹³ Na' lecz gwzolaon cani'te bžinten cate' bla' Juanna' gwdixjue'ede' xtiža' Diosen', ley dan' bzoj da' Moisés na' dan' bosozoj yezica'chle beņe' goso'e xtiža' Diosen' bzejni'in chio' čhe yela' gwnabia' čhe Diosen'. ¹⁴ Na' Xtiža' Diosen' dan' nyojen žan yid yeto beņe' yedeyene' can' ben Elías ben' be' xtiža' Diosen' cani'. Čhe Juanna' žan ca', con še šejle'le. ¹⁵ Le'e žia' nagle da' chene, le gwzenag xtiža'na'.

¹⁶ '¿No gwsaca'lebda' le'e zoale ņa'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe': ¹⁷ "Ba bcuežto' bžejo, ņeca bya'ale, na' ba bilyaše'to', ņeca gwchežle." ¹⁸ Juan ben' bzoe' beņe' nis bide' laole nga, bitw güe'ej gwdag-wšagüe' can' chese'ej chesagw beņe' yoble, nach gw-nale čhe': "Yo'o yaz da' xigüen' yichjlažda'ogüe'." ¹⁹ Na' neda', Diosen' gwsele' neda' golja' beņaçh, na' chle'ele che'ej chagua' can' chese'ej chesagw beņe' yoble, na' žale čhia' naca' beņe' ļia na' beņe' borrašw. Na' lecze žale čhia' naca' xmigw beņe' güečhixjw ca' na' xmigw yezica'chle beņe' güen da' xinj. Perw nacbia' yela' sina' čhe Diosen' dan' napto' naquen da' güen, le ba ble'eczele can' chon neto' napton'.

Yež ca' gan' bitw bosozenague' čhe Jesúsen'

(Lc. 10:13-15)

²⁰ Nach Jesúsen' be'e xtiža' beņe' ca' že' yež ca' gan' bene' da' zan da' zaca' yesyebande', na' gwdiļe' legaue' dan' bitw besyetingjde' xtoļa'gaquen'. Nach gwne':

²¹ —¿Nyaše'chguaze gac čhe le'e beņe' Corazín! ¿Nyaše'chguaze gac čhe le'e beņe' Betsaida! Beņe' ca' nita' Tiro na' Sidón ba besyetingjde' xtoļa'gaue' šaca' blo'egacda'ne' yela' guac čhia' ca dan' ba blo'eda' le'e. Na' bosose'e ca gosone' šaca' bena' ca', chesazļje' to lache' gasj da' naquen zeše' na' chosože'elja cuine' no de cont yesacbe'e beņe' ba boša' yichjlažda'ogaquen'. ²² Žia' le'e, saca'zi'chle clal ca beņe' že' Tiro na' Sidón cate' žin ža gac juisyw. ²³ Na' le'e nita'le Capernaum chonle xbab šeca Diosen' gone' gacxenchgual cate' yežinle yaba gan' zoe'na'. Bi gone' ca', san seļe' le'e lo yi' gabil. Šeca' bena' da' zaca' yesyebane beņe' ca' gwnita' Sodomān' can' ba bena' laole nga, zesyetingjde' xtoļa'gaquen', na' ņe' chi' ciudan' šeca'. ²⁴ Žia' le'e, gaļe'chle clal ca beņe' Sodomān' cate' žin ža gac juisyw.

Beņe' ca' yesejnilaže' Jesúsen' nite' mbalaz

(Lc. 10:21-22)

²⁵ Nach Jesúsen' boļ güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxclen čhio' ba bzejni'ido' baļ beņe' diža' güen čhio' quinga. Bzejni'ido' beņe' ca' gosacbe'e cheseyažjde' no gwsed gwlo'e legaue'. Na' bitw bzejni'ido' beņe' ca' cheson xbab zjanaue' beņe' sina' na' beņe' zjanejni'i. ²⁶ Beno' ca' Xa', le can' gw-nalažo'.

²⁷ Na' gože' beņe' ca' že'na':

—Xan' ba bene' lo na' gona' cont chombia' beņe' le'. Le' nombia'yaņe' neda', na' neda' nombia'yaņa' le'. Na' beņe' ca' ba gwleja' ba zjanombi'e Xan'. Na' noch no zjanita' beņe' zjanombi'e Xan', ņe neda' ca zjanombi'e. ²⁸ Le'e chjaxe'laže'le na' chacyaše'laže'le da' chaquele nac gonle cont soale binlo len Diosen', cha-ta'yoeda' le'e, le šejnilaže' neda'. Neda' gona' ga soale mbalaz. ²⁹ Le gwzenag čhia' na' gwzejni'ichda' le'e. Neda' naca' beņe' xenlaže' na' beņe' šagüe' na' gona' ca soale mbalaz lo' yichjlažda'olen'. ³⁰ Dan' žia' cheyaļa' gonle bitw naquen zed, na' can' chsed chlo'eda' bitw naquen zdebe.

Ža čhe Dios beņe' ca' zjanaue' Jesúsen' txen goseļeč-je' trigon' da' gosagüe'

(Mr. 2:23-28; Lc. 6:1-5)

12 Ca tiempen' gozac to ža čhe Diosa' cate' Jesúsen' gwdie' len beņe' ca' zjanaue' le' txen gan' nyaž trigw. Nach beņe' ca' gosodone', na' goseļečje' dao čhe trigon' cont gosagüe' xsenņa'.

² Na' besele'e beņe' fariseon' can' gosone', na' gosi'e Jesúsen':

—Gwņašc ¿bixčhen' beņe' ca' zjanaue' le' txen chesone' žin da' bi de lsens goncho ža čhe Dios?

³ Na' Jesúsen' gože' legaque':

—¿Bina' gwlable can' ben da' rey Davin' to ža cate' le' na' beñe' lježe' ca' gosedone'? ⁴ Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw beñe' bi nac b̄xoz, na' lecze bnežjue' che beñe' zja'ac len le'. ⁵ Na' ¿bina' gwlable le'e ley dan' bzoj da' Moisés gan' žan b̄xoz ca' chesoncze' mandadw che yodao' blaon' yogo' ža che Diosen'? Na' bitw nacho zjanape' doļa' dan' chesone' žin ža che Diosen'. ⁶ Žia' le'e, neda' zoa' nga zaca'cha' clal ca yodao' blaon'. ⁷ Xtiža' Diosen' dan' nyojen žan: "Chaclaža' yeyaše' yeži'ilaže'le beñe', gague con gotle beyixe' par gonxenle neda'." Šaca' chejni'ile bi zejenna' žan ca', bilja nale beñe' quinga zjanape' doļa', le bibi da' mal chesone'. ⁸ Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseļa' Diosen' golja' beñačh.

Beyac to beñe' n̄xo'oñ šļa'a taque'

(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to lo' yodao' che čhio' beñe' Israel. ¹⁰ Na' lo' yodaon' zoa to beñe' n̄xo'oñ šļa'a taque', nach beñe' fariseo ca' gose'e Jesúsen':

—¿De Isens yeyoncho beñe' xinj ža che Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' legaque':

—Še nita' xila' dao' čhele na' lažo' toba' to lo' yechw zitjw ža che Diosen' cate' bi de Isens goncho žin, ¿cbi la' yebejteleba' lo' yechon' lo žana'? ¹² Da'na'na' žia' le'e de Isens gaclencho beñe' ža che Diosen'. Le zaca'ch to beñe' clal ca to xila' dao'.

¹³ Nach Jesúsen' gože' ben' n̄xo'oñ taque'na':

—Bli' naon'.

Na' blien' na' taquen' beyaquen binlo can' nac dan' yešļa'a. ¹⁴ Nach beñe' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

¹⁵ Gocbe'e Jesúsen' can' bosoxi'a beñe' fariseo ca' na' gwze'e gwyeje' ga yoble. Beñe' zan ja'aclene' le', nach beyone' yogo' beñe' ca' chesacšene. ¹⁶ Na' bene' mandadw nono yesoe'lene' diža' non' beyon legaque'.

¹⁷ Bene' ca' cont goc can' ža Xtiža' Diosen' dan' bzoj da' Isaíasen', žan:

¹⁸ Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' seļa' Spiritw čhian' soateze soan len le'.

Na' čhixjue'ede' yogo'loj beñe' can' chazlaža' yesone'.

¹⁹ Bitw gacyože' len beñe', neca yosye'e,

na' neca nie' zižjo lo nez cont yesene beñe' bin' že'.

²⁰ Bi gwzoe' ca'ale beñe' chesejnilaže' le' late' lasze.

Soe' gaclene' legaque'.

Nach žin ža gone' cont gac con da' zej to liča lo yežlion'.

²¹ Na' beñe' že' yogo' nacióñna' yesebeze' gaclene' legaque'.

Gosene' Jesúsen' bebeje' da' xigüe' len yeļa' guac che Beelzebú

(Mr. 3:19-30; Lc. 11:14-23; 12:10)

²² Na' zoa to beñe' lchoj na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte beñie'.

²³ Na' yogo' beñe' ca' besele'ede' can' goca' besye-banchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

²⁴ Perw cate' beñe' fariseo ca' gosende' diža' quinga gosene':

—Bitwbi yeļa' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' beñe'.

²⁵ Gocbe'e Jesúsen' can' goson beñe' fariseo ca' xbaben', nach gože' legaque':

—Note'teze gobiern še choje' čhop šon cuen na' yeyoža' yesedi'e' legacze', cuiayi' gobierna'. Na' lecze še beñe' že' bite'teze yež yesaque' čhople na' yesedi'e' legacze', lecze bi sibia' yež čhegaquen' še ca'. Na' še beñe' lo' bite'teze yo'o yesechoje' čhople na' yesedi'e' legacze', gague sša yesenite' t xen. ²⁶ Lecze ca' še Satanásen' yebejen yeto da' xigüe' yo'o nyaz yichjlaždao' beñe', cuiayi' yeļa' chnabia' čhen, le chdi'llen cuinen še ca'.

²⁷ Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen beñe' lježle chesyebeje' da' xigüe' zjajo'o zjanyaz yichjlaždao' beñe'. Na' beñe' lježle ca'ze chosolo'e clen' čnele.

²⁸ Spiritw che Diosen' choñen neda' yeļa' guac cont chebeja' da' xigüe' ca', na' da' chona' ca' chlo'en ba bžin ža n̄abia' Diosen' yichjlaždao' beñe' yosozenag che'.

²⁹ ¿Nac gac šo' beñe' gwban liž to beñe' gual na' que'e bi da' de che' še bi zgua'tec gwčheje' beñe' guala'? Lete gone' ca' nach gac que'e bi da' de che'.

³⁰ Beñe' bi chone' neda' t xen, chone' contr neda'. Na' beñe' bi chaclene' cont yosozenag beñe' yoble čhia', zeje diža' chone' par bi yosozenague' čhia'.

³¹ Da'n'an' žia' le'e, yogo' da' xinj da' chon beñačh, na' yogo' diža' bya' dan' chesene' che Diosen', Diosen' yezi'xene' čhen, perw note'teze beñe' čne' yeļa' ya' che Spiritw che Diosen', gwbat yezi'xen Diosen' che'.

³² Na' note'teze beñe' še ne' yeļa' ya' čhia' neda' naca' ben' gwseļa' Diosen' golja' beñačh, Diosen' yezi'xene' che', perw note'teze beñe' še ne' yeļa' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'

(Lc. 6:43-45)

³³ Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. ³⁴ Na' ca'czen' nac len le'e

nacchgualē beṇe' zgot na' beṇe' gwxiye'. Bitw gac güe'le diža' šagüe' dan' nacle beṇe' laždao' xi'a. Le yogo'te diža' da' chchoj cho'achon', lo' yichjlažda'ocho nan' za'aquen. ³⁵ To beṇe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beṇe' laždao' xi'a cho'e diža' xi'a, le can' ža lo' yichjlažda'ogüen'. ³⁶ Na' žia' le'e, cate' žin ža gon Diosen' yesežaglaogü'e beṇe' cheson da' xiṅj toli tocaṇe, cana' yogo'lo' beṇe' yosodie' cuent che yogo' diža' dan' ba goso'e da' bitwbi zjazacan'. ³⁷ Na' con ca diža' dan' choe'le, Diosen' čhoglagüen' čhele še naple doļa' o še bi naple doļa'.

**Beṇe' bi bosozenag che Diosen' gosenabe' gon
Jesúsen' to yela' guac**
(Mr. 8:12; Lc. 11:29-32)

³⁸ Nach baḷ beṇe' ca' chososed chosolo'e dan' bzoj da' Moisés, na' beṇe' fariseo ca' gose'e Jesúsen':

—Maestrw, chaclaže'to' gono' to yela' guac da' le'eto' cont nezeteto' še da' licze Diosa' gwsele' le'.

³⁹ Nach Jesúsen' gože' legaue':

—Le'e zoale ṇa'a nacchgualē beṇe' laždao' xi'a na' ba gwlejičijle Diosen'. Na' chṇable gona' yeto yela' guac da' le'ele cont nezele še Diosa' gwsele' neda', perw bi gona' can' chṇablēna', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. ⁴⁰ Cate' za' šej Jonásen' Nínive, Diosen' bene' cont to beḷ xen be yo'o lo' nisdaon' gwdebbā' le' na' šoṇe ža šoṇe yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šoṇe ža šoṇe yel. ⁴¹ Na' cate' žin ža gon Diosen' cont yogo' beṇe' cheson da' mal yesežaglagüe' toli tocaṇe, žana' beṇe' Nínive beṇe' ba gosat yedesečiše' le'e mbanle ṇa'a lao Diosen', le legaue' besyētinjde' xtoḷen' cate' da' Jonásen' gwdičijue'ede' xtiža' Diosen' len legaue'. Na' neda' zoa' nga naccha' beṇe' blao clēl ca da' Jonásen', na' bitw chzenagle čhia'. ⁴² Na' lecze žana' cate' gon Diosen' cont yogo' beṇe' cheson da' mal yesežaglaogüe' toli tocaṇe, da' no'olen' gwnabia' beṇe' Seba ca' yedecuiše' le'e mbanle ṇa'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' beṇe' blao clēl ca da' rey Solomónṇa', na' bitw chzenagle čhia'.

Da' xigüen' cheyo'on da' yoble lo' yichjlaždao' beṇe'
(Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' beṇe' yechojen, nach lažen nile nale yeyiljon ga soan mbalaz. Na' še bibi latje želen, nach ṇan: ⁴⁴ "Da' yoble šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, ⁴⁵ nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clēl ca goc che'

cana'. Can' goc che bena', lecze ca' gac che le'e mbanle ṇa'a dan' nactecle beṇe' laždao' mal.

Xṇa' Jesúsen' len beṇe' biše' ca' besežine' ga zoe'
(Mr. 3:31-35; Lc. 8:19-21)

⁴⁶ Ne' choe'te Jesúsen' diža' len beṇe' quinga, cate' bžin xṇe' len biše' ca'. Gosaclačže' yeso'e yesoe'lene' le' diža' na' beṇe' zan nita' lagüe' na'ate. ⁴⁷ Beṇe' ca' že' na', toe' gože' Jesúsen':

—Xṇa'o len beṇe' bišo' ca' zjanite' chyo'o na' chesaclačže' yesoe'lene' le' diža'.

⁴⁸ Nach Jesúsen' gože' le':

—čNezele no nac xṇa'a na' no zjanac biše' lježa'?

⁴⁹ Nach bli ne'e blo'e beṇe' ca' zjanaque' le' txen na' gože' bena':

—Beṇe' quinga zjanaque' xṇa'a na' zjanaque' biše' lježa'. ⁵⁰ Le note'teze beṇe' chone' da' chnalaže' Xa' Diosen' ben' zoa yaban', bena' nac beṇe' biša', beṇe' zana', lecze naque' xṇa'a.

Jempl che beṇe' goz trigon'
(Mr. 4:1-9; Lc. 8:4-8)

13 Na' lo žana' gwza' Jesúsen' yo'o gan' zoen' jači'e cho'a nisdaon'. ² Nach catec beṇe' zan juisyw besedobe' gan' či'en' na' benten byen gwyo'e gwči'e to lo' barcw. Na' yogo' beṇe' ca' besedoben' gosenite' cho'a nisdaon' ga nac yo biž. ³ Nach da' zan da' bsd blo'e Jesúsen' legaue' len jempl da' bi'e. Na' be'e to jempl, gwne':

—To beṇe' güen žin jeze' trigw, ⁴ na' šlac zej chose' trigon' late' biṅ che trigw dan' chazen' jasechazen chanez, nach be ca' žia xil be chaš le'e yaba gosagwban'. ⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. ⁶ Perw na' cate' bla' gwbiža' na' bzeyen len na' gosebižen, le gague zjajo'otec loenṇa' sitjw. ⁷ Yelaten' jasechazen ga nac lo yag yeše', na' yag yešen' gosecha'on na' bosoloḷen len. ⁸ Perw na' yelaten' jasechazen ga nac yo šagüe' na' beselan'. Na' baḷen' gosebjan to gayoa güeje to ton, na' yebaḷen gosebjan gayon güeje, na' yebaḷen šichoa güeje. ⁹ Le'e žia nagle da' chene, le gwzenag xtižan'.

Jesúsen' be'e diža' bixchen' bzejni'ide' beṇe' jempl
(Mr. 4:10-12; Lc. 8:9-10)

¹⁰ Nach beṇe' ca' zjanaque' Jesúsen' txen gosebigue' lagüen', na' gose'ene':

—čBixchen' chsed chlo'edo' beṇe' quinga len jempl?

¹¹ Na' gož Jesúsen' legaue':

—Nono ṇa' neze can' nac yela' gwnabia' che Diosen', na' ba chone' cont le'e chejnilaže'lene' nezenen. Perw bi chon Diosen' ca' len beṇe' bi chesaclačže' yesejni-laže'ne'. ¹² Note'teze beṇe' chosozenague' xtiža' Diosen', gwzejni'ich Diosen' legaue' cont šanch dan' yesejni'ide'. Perw na' note'teze beṇe' bi chosozenague', da' daon' ba zjanēzde', yeca'a Diosen' len. ¹³ Da'nan' chsed chlo'eda' beṇe' quinga len jemplen', le chesele'ede' dan' chona' perw bitw

chesacbe'ede' bi zejen, na' chesende' xtižan' perw bitw chesejni'iden'. ¹⁴ Len beñe' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'. Na' da' li le'ele, perw bi gacbe'ele bi zejen dan' le'elen'.

¹⁵ Nacle beñe' güedenag na' bačh natcze yičhjalaž-da'olen'.

Bi chazlaže'le gwzenagle dan' chenele na' dan' chle'ele;

con nacle beñe' güedenag.

Šaca' bi nacle beñe' güedenag, šejni'ile bi zejen dan' chenele na' dan' chle'ele.

Nach yetinjele xtoja'le cont yeca'an na' yocoba' yičhjalažda'olen'.

¹⁶ Perw le'e nacle neda' t xen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen. ¹⁷ Da' li žia' le'e, zan da' beñe' ca' gosoe' xtiža' Diosen' cani' na' zan da' beñe' ca' yezica'chle beñe' bosozenag che Diosen' cani', gosaclačhe'chgüe' yesele'ede' dan' chle'ele na'a, perw bitw goja' yesele'eden'. Na' gosaclačhe'chgüe' yesende' dan' chenele na'a, perw bitw goja' yesenden'.

Jesúsen' bzejni'ide' bi zejen jempl che ben' goz trigon'
(Mr. 4:13-20; Lc. 8:11-15)

¹⁸ Na' le gwzenag, quinga zejen jempl che ben' goz trigon'. ¹⁹ Ca dan' byažen zejen xtiža' Dios da' chzejni'i che yeja' gwnabia' che'. Na' biñ dan' beselažo' chanezen', zejen beñe' ca' chesende' xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen' lo' yičhjalažda'ogaquen'. ²⁰ Na' biñ dan' beselažo' ga nac lo yej na' bi ben loen, zjanaquen ca beñe' la' chesyebetede' xtiža' Diosen' cate' chesenden', ²¹ perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal čhegaquen' o cate' chesegue'e beñe' legaque' dan' chosozenague' xtiža' Diosen', la' chesebejyichjte' xtižen'. ²² Na' biñ dan' beselažon' ga nac lo yag yeše', zejen ca beñe' ca' ba zjanende' xtiža' Diosen', perw šlac zjambane' chesyela' chesyěžejde' na' da' chesaclačhe' yeseñi'e chziye'en legaque'. Yogo' da' qui bi choen' latje yega'añ xtiža' Diosen' lo' yičhjalažda'ogüen', na' da'nana' bi chesejnilaže' le' ca cheyala'. ²³ Na' biñ dan' beselažo' lo yo šagüe' zejen ca beñe' chesende' xtiža' Diosen' na' chesejni'iden' na' chosozenaguen'. Bažen gosebjan to gayoa güeje, na' yebažen gosebjan gayon güeje, na' yebažen šichoa güeje.

Jempl che trigon' na' yixe'

²⁴ Na' gozoe'len Jesúsen' beñe' ca' yeto jempl, goze'e legaque':

—Yeja' gwnabia' che Diosen' ben' zoa yaban' zaca'leben ca dan' goquen' cate' to beñe' jeze' trigw lo yežlio che'na'. ²⁵ Na' do šeže'le gwyej to beñe' chgue'e le' šlac chesetas beñe' ca' yezica'chle na' jeze' xsa yixe' gan' ba naz xan yežlion' trigon', nach beze'e. ²⁶ Na' to š'ize trigon' len yixe' ca' beselan', na' trigon' gwzolao

chbian. ²⁷ Na' beñe' güen žin che xan yežlion', cate' gosacbe'ede' nach jaya'aque' gan' zoa xangaque' jasyeže'ne': "Beñe', žgague biñ trigon' goz yežlio čhion'? žBixchen' nčhixen len yixe'?" ²⁸ Nach xangaquen' gože' legaque': "To beñe' chgue'e neda' jen ca'." Nach xmosen' gose'ene': "žChe'ndo' lažo'to' yixen'?" ²⁹ Na' gože' legaque': "Bitw lažo'len. Le xož lažo'le lente trigon'. ³⁰ Jaseyenna'. Guac yesecha'on txen. Na' cate' ba goje' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjaytoble trigon' co'ošagüe'len."

Yeja' gwnabia' che Diosen' naquen ca biñ che xomdas
(Mr. 4:30-32; Lc. 13:18-19)

³¹ Nach gozo'e yeto jempl, gozne':

—Šanch beñe' yosozenag che Diosen' cont nabi'e yičhjalažda'ogaque'. Da'nana' yeja' gwnabia' che Diosen' ben' zoa yaban' zaca'leben ca to biñ che xomdas dan' goz to beñe' yežlio čhen'. ³² Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'očen ca bichle yixe' cuan na' chaquen ca to yag cha'o, nach byiñ dao' ca' chjasen ližda'ogacba' lo xozenna'.

Yeja' gwnabia' che Diosen' naquen ca levadura
(Lc. 13:20-21)

³³ Nach gozoe' Jesúsen' yeto jempl, gozne':

—Yeja' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' beñe' len jempl
(Mr. 4:33-34)

³⁴ Yogo' da' quinga bsd blo'e Jesúsen' beñe' ca' bešežag gan' zoe'na'. Bsd blo'ede' legaque' be'e jempl, bitwbi bzejni'ide' legaque' sin ca be'e jempl. ³⁵ Bene' ca' cont goc can' bzoj da' beñe' be' xtiža' Diosen' cani', žan:

Gwsed gwlo'egacda'ne' len jempl, na' yapegaca'ne' dan' nono na' neze da' ba ngaše' cate' gwmete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsd blo'e Jesúsen' beñe' ca' zjaže' na', beze'e txen len beñe' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on beñe' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwseje' neda' golja' beñe' na' zaca'lebda' ca ben' goze' biñ che trigon'. ³⁸ Na' doxen yežlio nga zaca'leben ca pedas yežlio gan' goze' trigon'. Na' beñe' ca' chosozenague' che Diosen' cont nabi'e yičhjalažda'ogaque' zaca'lebde' ca biñ che trigon'. Na' beñe' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'. ³⁹ Satanásen'

zaca'leben ca beṇe' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca beṇe' ca' yosyotobe' cosešen'. ⁴⁰ Na' can' šey yixen' yosyotoben', can' gac che beṇe' ca' chosozenag che Satanásen' cate' žin ža gac juisyon'. ⁴¹ Diosen' gwsele' neda' golja' beṇačh na' cate' žin ža, neda' seļa' angl čhia' ca' cont yosyotobe' yogo' beṇe' ca' chesege'oyele' beṇe' yoble yesone' da' mal na' lecze yosyotobe' yezica'chle beṇe' cheson da' mal. Na' angl ca' yesyebeje' legaque' cont bich yesenite' txen len beṇe' ca' chosozenague' che Diosen' cont ṇabi'e yichjlažda'ogaquen'. ⁴² Nach yesesele' legaque' lo yi' gabił gan' yeseye' toli tocaṇe. Na' yesebežyaše' yesagwxejte laye' tantw yesežaglaochgüe'. ⁴³ Cana'ch Xacho Diosen' gone' cont beṇe' ca' cheson da' güen ṇite' len le', le zjanaque' xi'iṇe' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To beṇe' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lo! bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ 'Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant beṇe' cha'o perla dan' zjanacchgua xdan. ⁴⁶ Na' bželde' to perla da' leca zacan'. Na' beyote' yogo'lo! bi da' de che' na' gwxi'e perlan'. Ca'czen' zaca'lebe beṇe' ca' chesacbe'e zaca'chguan yosozenague' che Diosen'.

Jempl che yixjw beł

⁴⁷ 'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bał beṇe' gwxcen beł na' bosozale' yixjw beł čhegaquen' lo' nisdaon' na' gwxcenen zan cuen beł. ⁴⁸ Nach cate' ba gwža' lo' yixjon', besyebejen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. ⁴⁹ Ca'czen gac che yogo' beṇe' cate' žin ža te che yežlion'. Angl ca' yesebeje' beṇe' mal ca' ladjo beṇe' ca' zjanaque' beṇe' güen lao Diosen' ⁵⁰ na' yosoza!e' legaque' lo yi' gabił gan' yesebežyaše' na' yesagwxejte laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsén'

⁵¹ Nach Jesúsén' gože' beṇe' ca' zjanaque' le' txen:

—čZyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsén' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'lebe ca to xan yo'o beṇe' nape' yogo'lo! da' zaca' dan' chyažj chčhinde', bałen zjanaquen da' cobe na' bałen zjanquen da' gole.

Beṇe' yež Narzaret bi gosejle'e che Jesúsén'

(Mr. 6:1-6; Lc. 4:16-30)

⁵³ Nach cate' beyož be' Jesúsén' jempl ca', beze'e latjen' len beṇe' ca' zjanaque' le' txen ⁵⁴ jaya'aque' laže'. Na' jaysed jaylo'ede' beṇe' gualaž che' ca' lo' yodao' čhegaquen'. Na' leca besyebande' len xtižen' na' gose' lježe':

—čGa jasede' yela' sina'? na' čnacxečen' chac chone' yela' guac ca'? ⁵⁵ Nombia'chone', le naque' xi'iṇ ben' chonšagüe' yag. Na' xṇe'ena' lie' María, na' Jacobo, José, Simón na' Judas zjanaque' beṇe' biše'. ⁵⁶ Na' lecze beṇe' zane' ca' nite' lažcho nga. čNacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsén' con to beṇe' gualaž čhegaque', bi gosaclaže' yesejle'e che'. Na' gož Jesúsén' legaque':

—Yogo'ze beṇe' chonla'aṇe' beṇe' choe' xtiža' Diosen', perw beṇe' gualaž che' na' beṇe' lo' yo'o che' bi chesonla'aṇe' le'.

⁵⁸ Na' to čopze yela' guac ben Jesúsén' Nazareten' dan' bitw gosejle'e che'.

Quingan' goc gosote' Juan ben' bzoa beṇe' nis

(Mr. 6:14-29; Lc. 9:7-9)

14 Na' ca tiempen' Herodes ben' naque' gobernador che distritw Galilean', bende' diža' ca nac yogo'lo! dan' chon Jesúsén'. ² Nach gože' xmose' ca':

—Bengan' da' Juanna', ben' bzoa beṇe' nis. Ba bebane' ladjo beṇe' guat ca', da'nan' chaque' chone' yela' guac.

³ Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole beṇe' biše' Felipe. Na' Juanna' gože' Herodesen':

—Bi cheyała' soalen no'ol che beṇe' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezene' Juanna' na' bosočheje' ṇi'a ne'e len gden lo' ližya gan' gosegüe'ene'.

⁵ Herodesen' goclaže' gote' Juanna', perw bitwbi bende' le', le gwṇezde' beṇe' zan chesejle'e Juanna' cho'e xtiža' Diosen', na' bžebe' bi yeson beṇe' ca'.

⁶ Perw na' cate' gosone' ṇin' ža la Herodesen', bi' no'ol che Herodías bya'abe' lao beṇe' ca' ja'ac ṇin'. Na' leca bebe Herodesen' can' bya'a no'ol güegon', ⁷ na' bzo'e Diosen' testigw che' gwnežjue'be' bite'teze ṇabebe' le'.

⁸ Na' gwlo'oyela' xṇa'ben' lebe' cont gožbe' Herodesen':

—Beṇ neda' to lo platw yichj Juan ben' chzoa beṇe' nis.

⁹ Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzo'e Diosen' tes-

tigw che' lao bene' ca' jasa'ac Inin' gwnežjue'be' bite'teze nabebe' le', da'nan' benšaze' mandadw gac can' gwñabebe' le'. ¹⁰ Ca' goquen' bene' mandadw jasechogue' yen Juanna' lo' ližya gan' yo'ena'. ¹¹ Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xña'be'.

¹² Nach bene' ca' zjanaque' txen len da' Juanna' jasyexi'e cuerp chen' na' jasecuašen'. Gwde na' ja'aque' gan' zoa Jesúsen' jaseže'ne' can' ba goquen'.

Bguagw Jesúsen' gayo' mil bene'

(Mr. 6:30-44; Lc. 9:10-17; Jn. 6:1-14)

¹³ Na' cate' bene' Jesúsen' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nisdaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'. ¹⁴ Na' cate' bžin Jesúsen' cho'a nisdaon', ble'ede' nita' bene' zan na' beyaše' beži'ilaže'de' le-gaque'. Na' beyone' yogo' bene' ca' chesacšene. ¹⁵ Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

¹⁶ Nach Jesúsen' gože' legaque':

—Bitw cheyała' šjaya'aque', san le'e güe'elne' da' yesagüe'.

¹⁷ Nach gose'ene':

—Čhoppa beł ya'a čechon' de na' gayo'ga yetextil dao'.

¹⁸ Nach Jesúsen' gože' legaque':

—Le šjaxin' ni.

¹⁹ Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' beł ya'a ca' čhope, na' gwñe'e yabale be'e yeła' choxclen che Diosen', na' bzožjen' be'en bene' ca' zjanaque' le' txen cont goseyisen' len to to bene' ca'. ²⁰ Na' yogüe' gosagüen' na' goseljde'. Na' bososše'e šžižnw žome len yetextil bixjw len late' güeje beł dan' bega'anna'. ²¹ Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

Jesúsen' gwze'e lo nisdaon'

(Mr. 6:45-52; Jn. 6:16-21)

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdaon' šlac bega'añ le' besele' bene' ca' ližgaque'. ²³ Na' beyož besele' bene' ca' ližgaque', gwloe' to lo ya'a jał güiže' Diosen' toze'. Na' cate' gol, toz Jesúsen' zoe' lo ya'an. ²⁴ Na' ca nac barcon' gan' zesyeyo'o bene' ca' zjanaque' Jesúsen' txen, ba zejen do gachoł nisdaon' nžiga'ses nisen' len dan' chas chata' nisdaon', le ben' chečhjen clele. ²⁵ Na' do šbal beyetj Jesúsen' ya'ana' na' gwze'e lo nisdaon' na' ba zejgałe' gan' zja'aquen'. ²⁶ Nach cate' besele'ede' le'

zeje' lo nisdaon' leca besežebe', na' bososye'e gosene':

—iŠe da' chda chelen' chle'echo!

²⁷ Na' la' boł güižte Jesúsen' legaque', gože'ne':

—Le gončhač laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo nisdaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nisdaon' zeje' gan' zoa Jesúsen'. ³⁰ Perw na' cate' gocbe'ede' chečhchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

³¹ Na' la' blite na' Jesúsen' bežue'ne', na' gože'ne':

—čBixčhen' chac čhoppo'? Gwejle'ch chia'.

³² Nach cate' beyo'o Jesúsen' len Pedroa' lo' barcon', la' gwlezte be'na'. ³³ Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret

(Mr. 6:53-56)

³⁴ Na' gosełague' nisdaon' na' besežine' yežlio gan' nzi' Genesaret. ³⁵ Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gała'ze cont gosenezde' ba bžin Jesúsen' lažgaque'. Na' bene' ca' že' yež ca' goseče'e yogo' bene' chesacšene lao Jesúsen'. ³⁶ Na' goseneyoede' Jesúsen' gwnežjue' latje yesoxe' la'ch late'ze xñi'a xen'. Na' yogo' bene' gosoxen' besyeyaquede'.

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr. 7:1-23)

15 Na' bał bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

² —čBixčhen' bene' ca' zjanaque' le' txen bitw zjana'ogüe' da' cheson bene' gol ca'? čBixčhen' cbi chosyone'e zan ni'a cate' za' yesagüe'?

³ Nach Jesúsen' gože' legaque':

—Na' le'e čbixčhen' chbejyichjle cbi chonle can' ža Diosen' cheyała' goncho san chonxen costumbr čhelen'? ⁴ Diosen' none' mandadw can' goncho, gwne': "Le gap bala'añ xaxña'le", na' "Note'teze' še chnešaše' len xaxne'e cheyała' gate'." ⁵ Perw le'e žale guaque ye' to bene' xaxne'e: "Bibi de goña' gaclena' le'e, le yogo' da' de chia' ba bnežjuan' lo na' Dios." ⁶ Na' žale bich bi cheyała' gwnežjue' xaxne'en še ca'. Na' dan' žale ca', chozale ca'ale dan' ža Diosen' na' con na'ole costumbr gole che da' xoxta'ole ca'. ⁷ Le'e nacle bene' gwxiye'. Chonle cayanen' bzoj da' Isaíasen' čhele, gan' žan:

⁸ Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁹ Bibi zejen dan' chesonxene' neda',

le dan' chososed chosolo'eden' naquen da' chnalaže' beṇaḇhze.

¹⁰ Nach Jesúsen' bozoł güiže' beṇe' ca' zjanžaguen' cont gosebigue' lagüen' na' gože' legaque':

—Le gwzenag da' nga ṇia' le'e na' le šejni'i. ¹¹ Bitw ṇacho dan' che'ej chagw beṇaḇhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenṇa' chonen cont lažda'ogüen' bi naquen xilaže'.

¹² Nach gosebiga' beṇe' ca' zjanaque' Jesúsen' txen lagüen' gose'ene':

—¿Bi gocbe'edo' beṇe' fariseo ca' beseže'e cate' gosende' xtižo'na'?

¹³ Na' gož Jesúsen' legaque':

—Gwžin ža cate' Xa' Diosen' ben' zoa yaban' gwži-aye'e yogo'loł beṇe' bi chosozenag che'. Gwžiaye'e le-gaque' can' choncho cate' chlažo'cho yix'e ca' chesela'ac lo yel. ¹⁴ Jaseye beṇe' fariseo ca'. Zjanaque' ca to beṇe' lḇhoł beṇe' che'nde' cue'e nez yeto beṇe' lḇhoł. Nezecho to beṇe' lḇhoł bitw gac cue'e nez yeto beṇe' lḇhoł, le txen šjasebiḇe' to lo' yechw.

¹⁵ Nach Pedroa' gože' Jesúsen':

—Bzejni'išque neto' bi zejen can' gwnaon'.

¹⁶ Nach gož Jesúsen' legaque':

—¿Lencze le'e bitw chejni'ile da' quinga ba gwnia'? ¹⁷ ¿Bi ṇezele yogo' dan' che'ej chagw beṇaḇhen' cho'on lo' li'e na' chžin hor cheden? ¹⁸ Perw yogo' diža' dan' chesoe' beṇaḇhen' chesechojen lo' yichjlažda'ogüen'. Na' še choe' beṇe' diža' mal, len chonen cont bi nac lažda'ogüen' xilaže' len Diosen'. ¹⁹ Le lo' yichjlaždao' beṇaḇhen' nan' chchoj yogo' xbab mal cate' žan yesone' da' mal quinga: yesote' beṇe', yesata'lene' no'ol bi nac xo'olgaque' o beṇe' byo bi nac beṇe' che-gaque', na' yesone' gwban, yeso'e diža' güenlaže' che lježgaque', na' yeseneye'e che beṇe'. ²⁰ Xbab mal ca' chesonen cont bi nac laždao' beṇe' xilaže' len Diosen', gague dan' bi chone'e zan ṇi'a cate' za' gagüe'.

To no'ole bi naque' beṇe' Israel chejnilaže' Jesúsen'
(Mr. 7:24-30)

²¹ Beza' Jesúsen' latjen' len beṇe' ca' zjanaque' le' txen jaya'aque' distritw Galilea gała'ze gan' mbane ciuda Tiro na' ciuda Sidón. ²² Na' to no'ole zoa do na', ben' bi naque' beṇe' Israel, gwze'e laže' cont bžine' gan' zoa Jesúsen' na' jašague'ne'. Na' gwṇe' zižje, gože'ne':

—Xana', le' naco' xi'in diaža che da' rey David. Beyaše'šque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

²³ Perw Jesúsen' bitw boži'e xtiža' no'olen'. Nach beṇe' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' choł güiže' le' zižje cont gacleno'ne'.

²⁴ Nach gož Jesúsen' legaque':

—Diosen' gwsele' neda' cont chaclena' beṇe' Israel gualaž checho na'ze, le legaque' zjazaca'lebe' ca xila' dao' be zjanacžeje.

²⁵ Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

²⁶ Nach gož Jesúsen' le':

—Bitw naquen güen yeca'acho yela' guagw che xi'in-cho na' gwnežjwchon gagw beco' ca'.

²⁷ Nach gože'ne':

—Leczdo' Xana'. Perw beco' ca' guac yesagwba' bl'a dao' da' cheselažo' lo yo.

²⁸ Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' beṇe' zan beṇe' chesacšene

²⁹ Beza' Jesúsen' latjen' len beṇe' ca' zjanaque' le' txen goso'e nezen' dan' chde gała'ze cho'a nisdao' Galilean'. Nach gosepe' to lo ya'a jasechi'e lo ya'ana'.

³⁰ Na' besežin beṇe' zan lo ya'a gan' zoa Jesúsen' len beṇe' ca' zjanaque' le' txen. Zjanche'e no beṇe' nxinj ṇi'e, beṇe' lḇhoł, beṇe' bi chac ṇi'e, beṇe' bi zoa ṇi'a na'gaque', na' len beṇe' chese'e gwde gwdele yižgüe', na' bosonite' legaque' xṇi'a Jesúsen'. Na' Jesúsen' beyone' yogüe'. ³¹ Na' leca besyebane beṇe' ca' cate' besele'ede' can' besyene beṇe' ca' bi gosac yesene, na' besyeyac beṇe' bi zjazoa ṇi'a na'gaque', na' besyeda beṇe' nxinj ṇi'e, na' besele'e beṇe' lḇhoł ca'. Nach gosonxene' Diosen' ben' chonxen chio' beṇe' Israel.

Jesúsen' bguagüe' tap mil beṇe'

(Mr. 8:1-10)

³² Gwde na' Jesúsen' goxe' beṇe' ca' zjanaque' le' txen na' gože' legaque':

—Cheyaše'da' beṇe' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesecholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' beṇe' quinga?

³⁴ Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to chopga beł ya'a dao'.

³⁵ Nach Jesúsen' bene' mandadw yesebe' beṇe' zan ca' lo yon'. ³⁶ Na' gwxi'e yetextil ca' gaže na' len beł ya'a dao' ca', nach be'e yela' choxcen che Diosen', nach bzojjen' bnežjue' beṇe' ca' zjanaque' le' txen na' le-gaque' bosonežjue' che yogo' beṇe' nita' na'. ³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'.

³⁸ Na' beṇe' ca' gosagw yetextilen' len bełen' nac tap mil beṇe' byo, na' bi cuent no'ole ca' len bidao' ca'.

³⁹ Nach beyož beseł'a Jesúsen' beṇe' ca' ližgaque', na' beyo'e to lo' barcw len beṇe' ca' zjanaque' le' txen na' ja'aque' distritw gan' nzi' Magdala.

Gosenabde' Jesúsén' gone' to da' yesele'ede' le'e yaba
(Mr. 8:11-13; Lc. 12:54-56)

16 Na' goquen' bał bene' fariseo ca' na' bene' saduceo ca' gosebigue' gan' zoa Jesúsén', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. ² Nach Jesúsén' gože' legaque':

—Cate' chle'ele chexna le'e yaban' šeze'le nach žale: “Yeža'a gwxe dan' chexna le'e yaban'.” ³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chacbe'ele bi zejen da' ca' chon Diosen' tiemp nga zoacho na'a.

⁴ Le'e zoale na'a nacchgualé bene' laždao' xi'a na' ba gwlejičhje Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsén' ca', beze'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura

(Mr. 8:14-21)

⁵ Na' cate' besežine' yešla'a nisdao' Galilean', bene' ca' zjanaque' Jesúsén' txen gosacbe'ede' gosanjaže' yetextil da' yesagüe'. ⁶ Nach Jesúsén' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsén' gocbe'ede' xbab dan' gosone', na' gože' legaque':

—¿Bixčen' chaczejlaže'le da' bibi yetextil de? ¿Bi chejle'le napa' yela' guac par gwguagua' le'e? ⁹ ¿Biņa' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebał žome pedas yetextil botoble dan' becho'oŋen? ¹⁰ Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'oŋen? ¹¹ ¿Bixčen' con benje xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach bene' ca' zjanaque' Jesúsén' txen gosacbe'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan' chososed chosolo'e bene' fariseo ca' na' bene' saduceo ca'.

Pedroa' gwne' Jesúsén' naque' bene' gwseła' Diosen' cont nabi'e

(Mr. 8:27-30; Lc. 9:18-21)

¹³ Nach Jesúsén' len bene' ca' zjanaque' le' txen besežine' gała'ze to ciuda dan' nzi' Cesarea de Filipino. Nach Jesúsén' gože' bene' ca' gosa'aclene' le':

—Diosen' gwsele' neda' golja' beŋačh. Perw ¿bi chesena bene'? ¿non' naca' neda'? ¿Bi chesene'?

¹⁴ Na' gose'ene':

—Bałe' chesene' naco' da' Juan ben' bzoa bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' da' Jeremías o yeto bene' be' xtiža' Diosen' cani'te.

¹⁵ Nach gože' legaque':

—¿Chixe le'e? ¿No žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'iq Dios, Dios ben' zoa toli tocaŋe.

¹⁷ Nach Jesúsén' gože'ne':

—Simón xi'iq Jonás, mbalaz zo' dan' gwnao' ca'. Notno beŋačh bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. ¹⁸ Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošjen bene' ca' yesonxene' neda'. ¹⁹ Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yičhjažda'ogaque'. Na' lecze naquen lo nao' yo'o bene' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰ Nach Jesúsén' gože' legaque' nono yese'e še naque' Cristo ben' gwlej Diosen' cont nabi'e.

Jesúsén' gwdixjue'ede' gate'

(Mr. 8:31-9:1; Lc. 9:22-27)

²¹ Na' žana' Jesúsén' gwzolažüe' bzejni'ide' bene' ca' zjanaque' le' txen cheyała' šeje' Jerusalénna'. Na' gože' legaque' bene' gole blao ca' chesenabi'e nación chechon', na' bxož gwnabia' ca' na' bene' ca' chososed chosolo'ede' dan' bzoj da' Moisés yosočhi yososaque' le' na' yesote' le'. Perw yeyoŋ ža yebane' ladjo bene' guat ca'. ²² Nach Pedroa' gwche'e Jesúsén' gan' nac lchojiže na' gwzolažüe' be'lene' le' diža' gwdiłe' le', gože'ne':

—Xana', Diosen' gaclene' le'. Bitw gac čhio' ca dan' žo' nga.

²³ Perw Jesúsén' gwyečhje' gwne'e Pedroa' gože'ne':

—¿Gwcuas ca'ale Satanás! Chgo'oyelo' neda' bi gona' can' nžia' bia' Diosen' gona'. Bi nsa'o xbab che Dios, san nsa'o xbab che beŋačh.

²⁴ Gwde na' Jesúsén' gože' bene' ca' zjanaque' le' txen:

—Note'teze beŋe' še chaclaže' gaque' neda' txen, cheyała' cuejyichj cuine' la'czła' žaglagüe' na' con gone' can' ñia' neda'. ²⁵ Note'teze beŋe' chacde' gone' cont bi žaglagüe' o cont nono yesot le', benan' cuiayi'. Na' note'teze beŋe' chzanlaže' cuine' žaglagüe' o gate' ñe chia' neda', ba de yeła' mban che' toli tocaŋe. ²⁶ ¿Bixe zejenna' to beŋe' ñabi'e doxen yežlion' na' cuiaye'e bi gata' yeła' mban che' toli tocaŋe? Le bi zoa nacle gon beŋačen' chixjue' cont gata' yeła' mban che' toli tocaŋe. ²⁷ Diosen' gwsele' neda' golja' beŋač na' cate' yida' yežlio nga da' yoble nsa'a yeła' zaca' juisyw che Xa' Diosen' na' nchi'a angl chia' ca', cana'ch gona' cont to to beŋačen' ñite' mbalaz o yesezaca'zi'e ñeche da' goson to toe'. ²⁸ Na' da' li žia' le'e, balje nita'le nga ña'a biŋa' gatle cate' žin ža le'ele neda' yida' gwlo'a yeła' gwnabia' chian', neda' naca' ben' gwseła' Diosen' golja' beŋač.

Jesúsen' goque' ca to be'ni'

(Mr. 9:2-13; Lc. 9:28-36)

17 Gwde xop ža Jesúsen' gwchi'e Pedroa' len Jacobo na' Juan beŋe' biše' Jacobo na' ja'aque' to lo ya'a sibe. Na' nono nochle ja'aclen legaque'. ² Na' lao legaque' bža' ca goc Jesúsen', cho'alagüen' goctiten ca gwbiž, na' xałanen' beyaquen šiš xila' ca be'ni'. ³ Na' concze besele'ede' da' Moisésen' len da' Elíasen' na' chosošalje' len Jesúsen'. ⁴ Nach Pedroa' gože' Jesúsen': —Xanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

⁵ Ne' choe'te Pedron' dižan' ca' cate' to bejw da' chactiten gwechjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaque-laže'chgüeda' che'. Le gwzenag che'.

⁶ Na' cate' beŋe' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'. ⁷ Nach gwbiga' Jesúsen' gwxo'a ñe'e yichjgaquen' na' gože'ne': —Le yeyas. Bitw žeble.

⁸ Na' cate' besyečhis lagüen', noch no besele'ede' san toze Jesúsen' zie'.

⁹ Na' gwde na' šlac cheseyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo beŋe' guat ca', neda' naca' ben' gwseła' Diosen' golja' beŋač, cana'ch güe'le diža' čhen.

¹⁰ Nach beŋe' ca' zja'aclen Jesúsen' gose'ene':

—Beŋe' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoa canii' cheyała' yide' da' yoble cate' za' yedenabia' ben' seła' Diosen'. ¿Bixčhen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Elíasen' na' yeyonšagüe' yogo'loj. ¹² Perw žia' le'e, Elías ba bide' na' bi gosacbe' beŋe' še nac le'. Na' gosonde' le' con ca gosacłaže'. Na' ca'czen' yosoči yososaque' neda' naca' ben' gwseła' Diosen' golja' beŋač.

¹³ Nach beŋe' ca' zja'aque' len Jesúsen' gosacbe'ede' cho'e diža' che da' Juan ben' bzo'e beŋe' nis.

Beyon Jesúsen' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag beŋe' zan, to beŋe' bšague' Jesúsen' na' bzoa xibe' lagüe'na' gože'ne':

¹⁵ —Xana', beyaše'laže'šca xi'ina' nga. Chazbe' šon na' leca chžaglaobe' len len. Na' zan ñi'a ba jačazbe' lo yi' na' lecze zan ñi'a ba blažo'be' lo nis. ¹⁶ Ba bedesana'be' lao beŋe' ca' zjanaque' le' txen, perw bitw gosaque' yesyeyone'be'.

¹⁷ Nach Jesúsen' gože' beŋe' ca' že'na':

—iLe'e beŋe' bi chejnilaže', chonchguale clele! ¿Bat-ca' zelao ña'lagua' le'e? Bedesan bidaon' ni.

¹⁸ Nach Jesúsen' bene' mandaw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

¹⁹ Na' gwde goc ca', beŋe' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixčhen' bi goc neto' yebejto' da' xigüen'?

²⁰ Jesúsen' gože' legaque':

—Bitw goc yebejlen dan' bitw gwejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czła' dan' chejnilaže'le Diosen' naquen ca to xsa xomdas lagüe dan' bi chejnilaže'tec-lene', še šejnilaže'lne', guaque ye'le ya'a nga: "Gwcuas nga, na' jayzoa na'ate", na' gac can' ñalen'. Bitw bi de dan' bi gac gonle con še chejle'le Diosen' gone' gaquen. ²¹ Na' cont yebejle da' xigüe' ca' dan' zjanac ca dan' bebeja' yichjlaždao' bidao'na', cheyała' gwyo gwchejle gonle gwbas na' zoatezle yol güižle Diosen'.

Da' yoble Jesúsen' gwdixjue'ede' gate'

(Mr. 9:30-32; Lc. 9:43-45)

²² Na' šlac zjayda Jesúsen' len beŋe' ca' zjanaque' le' txen do gan' mbane distritw Galilea, Jesúsen' gože' le-gaque':

—Diosen' gwsele' neda' golja' beŋač, na' yosodie' neda' lo na' beŋe' chesegue'ede'nda', ²³ na' yesote'nda'. Perw na' yeyon ža yosban Diosen' neda' ladjo beŋe' guat ca'.

Nach beŋe' ca' zjanaque' Jesúsen' txen cate' gosende' xtiže'na' gosacyaše'chgüede'.

Jesúsen' gwdixjue' da' chosočhixjue' che yodao'

²⁴ Na' cate' besyežine' Capernaum, beŋe' ca' chosočhixjue' che gastw che yodao' blao che chio' beŋe' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyała' chixjue' che yodaon'?

²⁵ Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca nac beñe' gwnabia' ca' nita' yežlio nga, ¿non' chacdo' chosočhixjue'? ¿beñe' gualaž che' o še beñe' zito'?

²⁶ Nach Pedroa' gože'ne':

—Chosočhixjue' beñe' zito'.

Nach Jesúsen' gože' le':

—Beñe' zjanaque' biše' lježe' bitwbi cheseyixjue'. Na' chio' naccho xi'ñ Dios ben' zoa yaba chnabi'e, bitw cheyała' chixjwcho che yodaon'. ²⁷ Perw cont nono yeson xbab chgue'echo yodao' blaon', na' chixjwcho. Gwyej cho'a nesdaon', na' bzała' yixjw chion' na' bel' nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che čhopcho.

Gosacyož beñe' ca' zjanaque' Jesúsen' txen noe' nacch blao

(Mr. 9:33-37; Lc. 9:46-48)

18 Nachen' beñe' ca' zjanaque' Jesúsen' txen gosebigue' cuite'na', na' gose'ene':

—¿No neto' gacchto' blao cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol' legaue'. ³ Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabi'a' Diosen' ben' zoa yaban' yičhjažda'ole. ⁴ Na' note'teze beñe' še yeyaque' ca bidao' nga na' gwzexjwlaže' lao Diosen', nach gague' beñe' blao len neda' cate' Diosen' ben' zoa yaba gone' cont solao nabi'a'. ⁵ Note'teze beñe' chone' güen len to bidao' ca bi' nga neče' da' chejni-laže' neda', choncze' güen len neda'.

Bitw cheyała' goncho cont gon beñe' da' xinj

(Mr. 9:42-48; Lc. 17:1-2)

⁶ Note'teze beñe' chon cont lažo' to beñe' za' gwzola-güe' chejni-laže' neda' gone' da' xinj, yejni'acle yosočeje' yene' to yiše xen na' yosozale'ne' lo' nesdaon' cl' ca da' gone' cont lažo' beñe' yoble gone' da' xinjen'. ⁷ Nyaše'chguaze gac che beñachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' beñe' yesone' da' xinj, perw nyaše'chguaze gac che beñe' chon cont lažo' beñe' yoble gone' da' xinjen'.

⁸ Na' da' li žia' le'e, še ni'a na'len' chonen cont gonle da' xinj, cheyała' cuejyichjle da' malen' chonle. Yejni'a bibi ni'a na'len' soa cl' ca gonle da' xinjen' len len. Na' yejni'a šjayzoale len Diosen' toli' tocañe bi zoa šla'a taca'len' o nchog šla'a ni'alen' cl' ca yeyejle lo yi' gabil' nya' cuerp chelen'. ⁹ Na' še yejlaolen' chonen cont gonle da' xinjen', cheyała' cuejyichjle da' malen' chonle. Yejni'a bibi yejlaolen' cuia cl' ca gonle da' xinjen' len len. Na' yejni'a šjayzoale len Diosen' toli' tocañe zoa šla'aze yejlaole cl' ca yežinle lo yi' gabil' žia chop la'a yejlaolen'.

Jempl che xila' be gocžeje

(Lc. 15:3-7)

¹⁰ Bi gonle note'teze beñe' chejni-laže' neda' ca beñe' bibi zaca'tec, la'czla' bitec zaque' len beñach. Žia' le'e, angl ca' chesape' legaue' lecze nite' lao Xa' Diosen' yaban' gan' zoe'na'. ¹¹ Na' ca naca' neda', Diosen' gwsele' neda' golja' beñach cont gwnežjua' yela' mban toli' tocañe che beñe' ba zjambiyi'.

¹² ¿Bixe chonle xbab? Še nita' to gayoa xila' chele na' yexjw toba' ¿bi yocua'anle be ca' yetaplalj togalj do lo ya'a na'ze na' šjaydiljwle ben' beñjua'? ¹³ Na' da' li žia' le'e, cate' yeželebe' yebechle dan' beželban' cl' ca can' chebele che be ca' taplalj togalj ben' bi gosacžeje. ¹⁴ Ca'czen' naquen len beñe' ca' chesejni-laže' neda' beñe' ca' bitec bi zjazaque' len beñachen'. Xacho Diosen' ben' zoa yaban' bitw che'nde' cuiayi' ne toe'.

Cheyała' yezi'xenko che beñe' lježcho beñe' chesejni-laže' Diosen'

(Lc. 17:3)

¹⁵ Še to beñe' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjen'. Na' še gwzenague' diža' dan' šje'elenlenen', yezoe' binlo len Diosen' da' yoble. ¹⁶ Perw še bi gwzenague' diža' dan' šje'elenlenen', güenč che'ele yeto o yechope beñe' lježle cont yesaque' testigw ba gota'yoele ben' yoša' xbab chen'. ¹⁷ Na' še bitwczle gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še ne-ca gwzenagcze' che yogo'le, cbich gonle' cuent len le'e chdop chžagle chonxenle Diosen'. Perw le gon cuent naque' txen len beñe' ca' bi chesejni-laže' Diosen', ca no beñe' güečhixjw beñe' chesonchgüa da' xinj.

¹⁸ Da' li žia' le'e, naquen lo na'le ye'le beñe' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen ye'gaclene' cont yežaguen len dan' ža Diosen'.

¹⁹ Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. ²⁰ Na' gan' nžag čhope šonle chonxenle neda', zoacza' txen len le'e.

²¹ Nach Pedroa' gwbigue' gože' Jesúsen':

—Xana', še beñe' lježa' chone' da' mal contr neda', ¿bał ni'a cheyała' yezi'xena' che'? ¿zelao do gaž ni'a?

²² Nach Jesúsen' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

Jempl che ben' bi bezi'xene' che dan' čala' beñe' lježe'

²³ Na' yela' gwnabia' che Diosen' ben' zoa yaban' za-ca'leben ca da' nga goc. Zoa to beñe' gwnabia' ben' chesala' xmose' ca' xmechue'. Na' goclaže' yebeje' cuent len legaue'. ²⁴ Na' cate' gwzola-güe' bezi'e cuent che to toe', da' nechw bžin to xmose' ben' čala' zan

millón. ²⁵ Na' mosen' bitwbi xmechue' gota' par yonežjue'. Da'nana' bene' gwnabian' bene' mandadw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čaļe' čhen'. ²⁶ Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yeļa' chxenļaže' len neda', na' yeyoņa' doxen dan' čaļa' čhion'." ²⁷ Nach bene' gwnabian' beyaše'de' le' na' bezi'xene' che doxen dan' čaļe' na' bsane' le'. ²⁸ Perw na' cate' bechoj mosen' liž xanen', la' bežagtie' yeto mos lježe' bene' čaļa' late' xmechue'. Nach la' gwnizte' yene' gože'ne': "Yeyoņa' dan' čaļo' čhian' ņetec ņa'a." ²⁹ Nach mos lježen' la' bzoate' xibe' lagüen', gože'ne': "Gwdapešca yeļa' chxenļaže' čhia' na' yeyoņa' doxen dan' čaļa' čhion'." ³⁰ Perw na' mos nechon' bitw bzenague' che mos lježen'. La' gwyetje' jene' mandadw goseyixjue'ne' ližya na' bi yechoje' še biņa' yonežjue' dan' čaļe' čhen'. ³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'loļ can' goca'. ³² Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čaļo' čhian' dan' gota'yoedo' neda' yezi'xena' čhion'. ³³ ¿Bixčhen' bi beyaše'do' mos lježo' ben' čaļe' čhion' can' beyaše'da' le'?" ³⁴ Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še biņa' yeyixjue' doxen dan' čaļe' čhen'.

³⁵ Nach Jesúsen' gože' bene' ca' zjanaque' le' txen:
—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

Bi cheyaļa' yela'acho len no'ol čechon' cont soalencho no'ole yoble
(Mr. 10:1-12; Lc. 16:18)

19 Na' Jesúsen' cate' beyož gwne' da' ca' beze'e distritw Galilean' na' gwlaque' yegw Jordánna' beyeje' gan' mbane distritw Judean'. ² Na' bene' zan ja'aclen le', na' beyone' bene' ca' chesacšene.

³ Na' baļ bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosožie'ne' xya čhol, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' čhen'?

⁴ Nach gože' legaque':

—¿Biņa' gwlable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. ⁵ Na' gwna Diosen': "Da'nana' bene' byon' gwsane' xaxŋe'e cont soalene' no'ole čhen' na' chope' yesaque' ca toz bene'." ⁶ Na' ca' bich yesac čhope' san toze'. Da'nana' bi cheyaļa' yesyele'e, le Diosen' ba bcode' legaque'.

⁷ Nach gose'ene':

—Še naquen ca' ¿bixčhen' ben da' Moisésen' mandadw cate' to bene' yele'e len no'ol čhen' cheyaļa' čhas to yiš da' gwnežjue' no'ol čhen' ga güen' diža' besyele'ena'?

⁸ Jesúsen' gože' legaque':

—Da' Moisésen' be'e latje yela'ale len no'ol čhele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw ņacho gocláže' yesyele'e. ⁹ Žia' le'e, note'teze bene' chele'e len no'ol čhe' na' cheque'e no'ole yoble, len ņeztede' no'ol čhen' bitw naque' to no'ole chzoa xtoe', toz ca da' xiŋjen' chone' ca nac dan' chon ben' chata'lene' no'ol čhe bene' yoble. Na' note'teze bene' yošagna'lene' to no'ole bene' bela'a len bene' che', lecze tozce ca da' xiŋj gone' ca nac da' chon bene' chata'lene' no'ol čhe bene' yoble.

¹⁰ Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güench nono gwšagna'.

¹¹ Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen. ¹² Nita' bene' bi žan yosošagne'e dan' gosalj'e bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp čhegaque'. Na' lecze ca' nita' bene' cbi chosošagne'e lagüe dan' chesa-zlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'

(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsen' cont xoa ne'e yichjgacbe' na' ņabe' lao Diosen' gaclene' le-gacbe'. Perw bene' ca' zjanaque' le' txen gosediļe' bene' ca' zjanče'ebe'. ¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyož gwxoā na' Jesúsen' yichjgacbe' gwŋabe' lao Diosen' gaclene'be', nach gwyetje' ga yoble.

Bene' güego' bene' goc bene' gwŋi'a

(Mr. 10:17-31; Lc. 18:18-30)

¹⁶ Na' goquen', to bene' güego' bžine' gan' zoa Jesúsen', na' gože'ne':

—Maestrw, le' naco' bene' güen. ¿Bi da' güen cheyaļa' gona' cont gata' yeļa' mban čhia' toļi tocaņe'?

¹⁷ Nach Jesúsen' gože'ne':

—¿Bixčhen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yeļa' mban čhio' toļi tocaņe, cheyaļa' gono' can' non Diosen' mandadw goncho.

¹⁸ Nach gože' Jesúsen':

—¿Bica' da' ca'?

Nach Jesúsen' gože' le':

—Nono gotle, bi gata'lenle no'ol bi nac no'ol čhele o bene' byo bene' bi nac bene' čhele, bi cuanle, bitw güe'le diža' güenļaže' che bene' lježle. ¹⁹ Le gap bala'an xaxŋa'le, na' le gaque lježle can' chaque cuinle.

²⁰ Nach bene' güegon' gože' Jesúsen':

—Yogo'lo! da' quinga gwzolagua' chonczan' cate' ne' nactia' bidao'. ¿Bixe dan' chyažjeh gona'?

²¹ Jesúsen' gože'ne':

—Še chaclažo' gaco' cayanen' chazlaže' Diosen', jayete' yogo' da' de čhio', na' da' le'edo' čhen bnežjon beŋe' yaše'. Nach še gono' ca', cate' yežino' yaba gan' zoa Diosen', da' zaca'ch gata' čhio'. Na' še ba beyož beno' can' žia' le', nach sao' gaco' neda' txen.

²² Perw na' beŋe' güegon' cate' beyož bende' diža' can' gož Jesúsen' le', beza'yaše', le beŋe' gwŋi'achgua goque'.

²³ Gwde na' Jesúsen' gože' beŋe' ca' zjanaque' le' txen:

—Da' li žia' le'e, leca zdebe naquen to beŋe' gwŋi'a gwzenague' čhe Dios ben' zoa yaba cont Diosen' ŋabi'e yičhjažda'ogüe'. ²⁴ Da' yoble žia' le'e, bedao'ch te to be xen be nzi' camello to lo' nag yeše' clal ca to beŋe' gwŋi'a gwzenague' čhe Dios cont Diosen' ŋabi'e yičhjažda'ogüe'.

²⁵ Na' beŋe' ca' zjanaque' Jesúsen' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

²⁶ Jesúsen' gwŋe'e legaque', nach gože'ne':

—Bibi de da' gac yeson beŋachen' cont šjasyenite' len Diosen', perw bi zoa da' ŋacho da' bi gac gon Dios.

²⁷ Nach Pedroa' gože' Jesúsen':

—Neto' ba gwlejičhito' yogo' da' de čheto' cont nacto' le' txen. ¿Bi da' güen gata' čheto' dan' ba gwlejičhito' da' ca'?

²⁸ Jesúsen' gože' legaque':

—Da' li žia' le'e, Diosen' gwsele' neda' golja' beŋačh na' cate' yocobe' yežlion', neda' cui'a ŋabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' ŋabia'le šižinw cuen beŋe' ca' zjanaque' xi'in diaža čhe da' Israel. ²⁹ Na' note'teze beŋe' ba gwlejičhje' liže', biše', zane', xaxŋe'e, xo'ole', xi'ine' o yežlio čhe', dan' chzenague' čhia', Diosen' gwnežjue' le' da' zaca'ch da' xench ca yogo' da' ca'. Na' leceze gata' yela' mban čhe' toli tocaŋe. ³⁰ Perw zan beŋe' zjanaque' beŋe' žialao ŋa'a, gwžin ža cate' yesaque' beŋe' bzebe. Na' beŋe' zjanaque' beŋe' bzebe ŋa'a, gwžin ža cate' yesaque' beŋe' žialao.

Jempl čhe beŋe' güen žin ca'

20 Nach Jesúsen' gože' legaque': —Yela' gwnabia' čhe Diosen' ben' zoa yaban' zaca'leben ca da' nga goc. To beŋe' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' beŋe' güen žin cont yesone' žin yežlio čhen' žana'. ² Na' gosexenjaže' beŋe' güen žin ca' to denario čhixue' to toe' con ca chac mosen' tža žin. Nach gwsele' legaque' gan' jasene' žinŋa'. ³ Na' do cheda ga gozeje' gan' chac ya'an, na' ble'ede' nita'ch beŋe' bibi žin de yesone'. ⁴ Na' gože' legaque': "Lencze le'e le šja'ac gan' že' yag uvas čhian' le šjen žin na' čhixjwca' le'e ca cheya'la'." Nach ja'ac beŋe' ca'. ⁵ Na' da' yoble gwyeje' do guagwbiz na' do cheda šoŋe. Bezle'ede' nita'ch beŋe' bibi žin chesone' nach gwsele' legaque'

cont yesone' žin gan' že' yag uvas čhen'. ⁶ Na' ca do cheda gayo' šeže'le gozeje' da' yoble ble'eczde' nita'ch beŋe' bibi žin chesone'. Na' gože' legaque': "¿Bixčhen' bi gwyeje žin?" ⁷ Nach gose'ene': "Notno gwŋe neto' šjento' xšine'." Nach goze'e legaque': "Lencze le'e le šja'ac le šjen žin gan' že' yag uvas čhian'. Na' čhixjwca' le'e ca cheya'la'." Nach ja'ac beŋe' ca'. ⁸ Na' cate' bžin hor bosa' xan yag uvasen' beŋe' güen žin ca', nach gože' mos blao čhen': "Beyax beŋe' güen žin ca' cont čhixjo'ne', solao čhixjo' beŋe' ca' besela'ac bzebe, na' yeyožle len beŋe' ca' besela'ac da' nechw'." ⁹ Nach mos blaon' zgua'tec gwduxjue' beŋe' ca' gosezolagüe' gosone' žin cheda gayo' šeže'le tgüeje denario to toe'.

¹⁰ Na' cate' gwduxjue' beŋe' ca' gosezolagüe' gosone' žin šezildao', gosacde' čhixjoche' legaque' da' zča'och dan' gosezolagüe' gosone' žin šezildao'. Perw tozceze can' gwduxjue' yogo'lo!te'. ¹¹ Na' cate' beyož gosezi' laxjw beŋe' ca' gosezolao žinŋa' šezildao', gosadoe' diža' xan žinŋa'. ¹² Gose'ene': "Do ža bžaglaochguato' lo da' zeye' bento' žin čhion'. Na' tozceze can' gwduxjo' neto' len beŋe' ca' besela' bzebe, len to hor güejgan' gosone' žin." ¹³ Perw na' xan žinŋa' gože' toe': "Migw čhia', bitwbi da' mal chona' len le'. ¿Gague gwxenjažo' to denario čhixjua' to tole? ¹⁴ Laxjon' ba gwxi'o, guac yeyejo'. Chaclaža' gwnežjua' beŋe' ca' to denario güeje con can' beŋa' le'e la'czla' besela'aque' bzebe. ¹⁵ ¿Bixčhen' chxi'o neda' neče dan' naca' beŋe' šagüe'? Naquen lo na' gona' con ca chaclaža' len da' de čhia'."

¹⁶ Nach Jesúsen' gože' beŋe' ca' bosozenag jemplen':

—Can' naquen, nita' beŋe' zjanaque' beŋe' bzebe ŋa'a, perw leceze gwžin ža cate' legaque' yesaque' beŋe' žialao. Na' nita' beŋe' zjanaque' beŋe' žialao ŋa'a, perw gwžin ža yesaque' beŋe' bzebe. Diosen' chaxe' yogo'lo! beŋe' cont yesejle'e čhe', perw bal' guen' chosozenague' čhe', na' legacze' chbeje' cont chesaque' xi'ine'.

Da' yoble chyixjue'e Jesúsen' gate'

(Mr. 10:32-34; Lc. 18:31-34)

¹⁷ Jesúsen' len yezan beŋe' zja'aque' Jerusalénna'. Na' šlac zjangüe'e nezen' gwlejiže' beŋe' šižinw ca' gwleje' cont zjanaque' txen len le' na' gože' legaque':

¹⁸ —Na'a ba zejcho Jerusalénna' gan' yesone' neda' lo na' bxož gwnabia' ca' na' lo na' beŋe' ca' chososed chosolo'ede' dan' bzoj da' Moisés, na' yesečhoglagüen' čhia' yesote' neda', neda' naca' ben' gwse'la' Dios golja' beŋačh. ¹⁹ Na' yesone'nda' lo na' beŋe' bi zjanaque' beŋe' Israel cont yesonle' čhia', na' yesot yesejine' neda', na' yesote'nda' yosode'e neda' le'e yag cruz, perw yeyoŋ ža yebana' ladjo beŋe' guat ca'.

Xŋa' Jacobo na' Juanna' gwŋabe' yesebe' xi'ine' ca' cuit Jesúsen' gan' ŋabi'ena'

(Mr. 10:35-45)

²⁰ Na' ja'ac xi'in Zebedeo, Jacobo len Juan, na' len xŋa'gaque' lao Jesúsen'. Na' xŋa'gaquen' bzoa xibe' lao Jesúsen' gože'ne':

—Chŋabda' le' to goclen.

21 Nach Jesúsen' gože'ne':
—¿Bi goclen chaclažo' gona?
Nach xḡa'gaquen' gože'ne':
—Chaclaža' gono' cont xi'ḡa' quinga yesebi'e šl'a'a
güje cuito'na' cate' žin ža ḡabi'o.

22 Jesúsen' gože' Jacobo na' Juanna':
—Le'e cabi ḡezele bi dan' chḡable. ¿Gwḡhejlaže'le
tele yeḡa' zi' yeḡa' ya' ca dan' tia' neda' na' gac ḡhele
can' gac ḡhia'?

Nach bosyoži'e xtižen' gose'ene':

—Gwḡhejlaže'to'.

23 Nach Jesúsen' gože' legaque':
—Da' ḡicze tele yeḡa' zi' yeḡa' ya' ca dan' tia' neda' na'
gac ḡhele can' gac ḡhian', perw bi naquen ḡo na' ḡia'
non' cue' cuitan' cate' žin ža ḡabi'a, san yesebe' beḡe'
ba mbej Xa' Diosen' gaquen ḡhe'.

24 Nach cate' yeši beḡe' ca' zjanaque' le' txen
gosende' can' gosena beḡe' ca' ḡhope, beseloque' le-
gaque'. 25 Nach Jesúsen' goxe' yogüe' cont gosebigue'
lagüen' na' gože' legaque':

—Nezeczle beḡe' gwnabia' ḡhe to to nación na'
beḡe' bla' ca' chesone' byen chosozenag beḡe' ḡhe-
gaque'. 26 Perw bi naquen ca' len le'e. San note'tezle
chaclaže'le gacle beḡe' bla', cheyaḡa' gwzexjwlaže'le
gac len beḡe' ḡježle. 27 Na' še note'tezle chaclaže'le
gacle beḡe' žialao, cheyaḡa' gon cuinle ca xmos beḡe'
ḡježle. 28 Ca'cze naquen len neda' naca' ben' gwseḡa'
Diosen' golja' beḡaḡh. Gague za'a cont yesaclen beḡe'
neda' san za'a cont gaclena' beḡe', na' chzanḡaže'
cuina' yesote' neda' ḡeḡhe xtoḡa' beḡaḡhen'.

Jesúsen' bene' cont ḡhope beḡe' ḡchoḡ besyele'ede'
(Mr. 10:46-52; Lc. 18:35-43)

29 Nach cate' besyeya'aque' ciuda Jericó, beḡe' zan
zjasenagüe' Jesúsen' len beḡe' ca' zjanaque' le' txen.

30 Na' ḡhope beḡe' ḡchoḡ zjachi' chanez gan' zjayda
Jesúsen'. Na' cate' gosacbe'ede' Jesúsen' zej gan'
zjachi'ena' nach chososya'adie' gose'e le':

—Xanto', len' naco' xi'ḡ diaža ḡhe da' rey Davin'.
Beyaše'laže'šca neto'.

31 Nach beḡe' ca' chesyede gan' zjachi'ena' gosedile'
legaque' cont yesenite' šize. Perw na' goseḡe' zižjeh
gose'ene':

—iXanto', len' naco' xi'ḡ diaža ḡhe da' rey Davin',
beyaše'laže'šca neto'!

32 Jesúsen' gwleze' gan' nite'na', nach goxe' legaque'
gosebigue' lagüen'. Nach gože'ne':

—¿Bin' chaclaže'le gonda' le'e?

33 Nach gose'ene':

—Xanto', chaclaže'to' yele'eto'.

34 Jesúsen' beyaše'laže'de' legaque' na' gwdane'
yejlaogaquen', nach ḡa' besyele'etede', na' gosa'ogüe'
le'.

Gosonxene' Jesúsen' cate' beyo'e Jerusalén
(Mr. 11:1-11; Lc. 19:28-40; Jn. 12:12-19)

21 Na' cate' ba zoa yesežine' Jerusalénna' besežine'
gan' chi' yež Betfagé, gan' zoa ya'a dan' nzi' Ya'a

Olivos. Na' Jesúsen' gwseḡe' mandadw ḡhope beḡe' ca'
zjanaque' le' txen, 2 gožgaque'ne':

—Le šja'ac yež dan' chi' gaḡa'ze, na' cate' žinlen' na'
yežezele to burr be no'ole da'ba' yag na' ḡhe'te to
xi'ḡda'oba'. Le sežgacba' na' le ḡhe'gacba' nga. 3 Na' še
bi ye' beḡe' le'e na' ye'Ine': "Xanto'na' chyažjde' legac-
ba'." Na' ḡa' yedyesantecze'ba' len le'e.

4 Goc yogo' da' qui cont goc can' bzoj to ben' bzoj
Xtiža' Diosen' cani', gwne':

5 Gož beḡe' ca' nita' Jerusalénna':

"Le ḡa'šc, ba za' rey ḡhelen',

žie' cože' to burr dao', xi'ḡ beyixe' be choa' yoa'.

Ze'e ca to beḡe' bi naque' beḡe' bla'.

6 Na' ja'ac beḡe' ca' yež dao' dan' gož Jesúsen' le-
gaque' ca', na' gosone' can' ben' Jesúsen' mandadw.

7 Na' besyeḡhe'e burroa' len xi'ḡba' lao Jesúsen' na' go-
sexoa no xagaque' cože'ban' na' gwžia Jesúsen' be
daon' cont gwyeje' Jerusalénna'. 8 Na' beḡe' zan
gosonxene' Jesúsen' goseyixjw no xagaque' ḡo nez cont
blej burron' len na' yebaḡe' goseḡogue' xoze' yag na'
goseyixjwen' ḡo neza'. 9 Na' beḡe' zjažialao na' lecze
beḡe' za'ac cože' bososye'e gosene':

—iḡeca beḡe' zaca' benga nac xi'ḡ diaža ḡhe da' rey
David! iMbalaz ben' za' nga gwseḡa' Xancho Diosen' le'
cont ḡabi'e! iḡeca beḡe' zaca' ben' zoa yaban'!

10 Na' cate' bžin Jesúsen' Jerusalénna' yogo' beḡe' ca'
že' ciudan' besyebande', na' gosene':

—¿No benga bla' nga?

11 Na' beḡe' ca' nžag Jesúsen' bosyoži'e xtiža'gaque'
gosene':

—Bengan' Jesús beḡe' za' yež Nazaret gan' mbane
distritw Galilea na' cho'e xtiža' Dios.

Jesúsen' bebeje' beḡe' ca' cheson ya'a yodao' blaon'
(Mr. 11:15-19; Lc. 19:45-48; Jn. 2:13-22)

12 Na' Jesúsen' gwyo'e chyo'o yodao' blaon' na'
bešaše' yogo' beḡe' ca' chesote' na' beḡe' chesa'o na'.
Nach bchixe' xmes beḡe' ca' chosoša' mechw, na' yag
ga chesebe' beḡe' ca' chesote' ngolbex. 13 Na' gože' le-
gaque':

—Nyojcz Xtiža' Diosen' žan: "Yesene' ližan' naquen
to latje gan' yesoḡ güiž beḡe' neda'", perw le'e chonlen
ca to latje ga že' beḡe' gwban.

14 Na' beḡe' ḡchoḡ ca' na' len beḡe' ca' nxinj ḡi'e gose-
bigue' lao Jesúsen' šlac zoe' chyo'o yodaon'. Nach bey-
one' legaque'. 15 Perw na' bḡoz gwnabia' ca' na' beḡe'
ca' chososed chosolo'e dan' bzoj da' Moisésen' leca be-
seže'e cate' beseže'ede' yeḡa' guac ca' dan' ben
Jesúsen'. Na' lecze beseže'e cate' gosende' can'
bososya'a bi' bixjw ca' chyo'o yodao' blaon', gosnabe':
"ḡeca beḡe' zaca' benga nac xi'ḡ diaža ḡhe da' rey
David." 16 Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' legaque':

—Zenda'. ¿Biḡa' gwlable can' nyoj Xtiža' Diosen'?,
žan:

Ba beno' cont bi' bixjw ca' na' len bi' ḡe' chesaže'
chesonxembe' le'.

¹⁷ Na' bechoje' gan' nita' beṇe' ca' na' beze'e ciudan'. Na' že'na' jayga'aṇe' Betania.

Ben Jesúsén' cont gwbiž yag yixgüigw

(Mr. 11:12-14, 20-26)

¹⁸ Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gw-don Jesúsén'. ¹⁹ Na' ble'ede' to yag yixgüigw zoan cho'a nezen' na' jaṇe'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'. ²⁰ Nach beṇe' ca' zjanaque' le' t xen besyebande' cate' besele'ede' can' goquen', nach gose'ene':

—žNac goquen' la' gwbižte yaguen'?

²¹ Na' Jesúsén' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: "Gwcuase nga na' jasoa lo' nisdaon'", na' gac can' ṇalen'. ²² Na' še chejnilaže'le Diosen', bite'teze dan' ṇabelene' cate' yol güižlene', gončzen' le'e.

Yeja' chnabia' che Jesúsén'

(Mr. 11:27-33; Lc. 20:1-8)

²³ Nach Jesúsén' gozeje' yodao' blaon' da' yoble. Na' šlac chsed chlo'ede' beṇe' ca' že' na', bžox gwnabia' ca' na' beṇe' gole blao ca' chesenabi'e nación chechon' gosebigue' cuit Jesúsén'. Nach gosenabde' le':

—žBi yeja' gwnabia' napo' chono' da' qui? žNo beṇ yeja' gwnabian' cont chono' da' qui?

²⁴ Nach Jesúsén' boži'e xtiža'gaquen', gwne':

—Lecze de to da' ṇabda' le'e. Še yoži'ile xtižan' nach ṇi'a le'e bi yeja' gwnabia' chonlendand'. ²⁵ Le našc neda': žnon' gwseja' da' Juanna' bzoe' beṇe' nis? žDios nan' gwseje'ne', še beṇačhen'?

Nach legacze' gose' lježe':

—Še ye'chone' Dios gwseja' le', na' ye'e chio': "žBix-čhen' ca' gwyejle'le che'?" ²⁶ Na' bi gac ye'chone' beṇač gwseja' le', le yogo'te beṇe' že' nga chesejle'e Diosen' gwseje' da' Juanna' be'e xtiže'na', na' xož bi yesonde' chio'.

²⁷ Nach gose'e Jesúsén':

—Bi ṇezeto'.

Nach gože' legaque':

—Lecze neda' bi yapa' le'e bi yeja' gwnabian' chonlenda' da' ca'.

Jempl che čhope xi'in beṇe'

²⁸ Na' Jesúsén' gože' legaque':

—Le gon xbab bi zeje jempl nga: Gwzoa to beṇe' gwnita' čhope xi'ine'. Na' gože' tobe': "Xi'ina', chaclaža' šejo' güen žin ṇa'aža gan' že' yag uvas čhia' ca'."

²⁹ Nach xi'inen' gožbe' le': "Bitw ša'a." Perw gwdele bey-ombe' xbab nach gwyejbe'. ³⁰ Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': "Guaccze, na' ša'a." Perw bitw gwyejbe'.

³¹ Gwnašc neda', žno bi' ca' čhope ben can' gwnalaže' xabe'?

Nach gose'ene':

—Bi' nechoa'.

Nach Jesúsén' gože' legaque':

—Ca'cze naquen. Na' da' li žia' le'e, beṇe' güečhixjw ca' na' no'ole ca' čhja'aclen note'teze beṇe' byo yobech yosozenague' che Diosen' cont ṇabi'e yičhjaž-da'ogaque' clal ca' le'e. ³² Ca' nac Juanna' ben' bzoe' beṇe' nis, bide' laolen' na' gwduxjue'ede' le'e naquen' cheyała' gonle cont yebe Diosen' le'e. Perw bitw gwyejle'le che'. Na' beṇe' güečhixjw ca' na' no'ole žle' ca' gosejle'e che'. Na' cate' gocbe'ele beṇe' ca' ba gosejle'e che', bitw betiṇjele xtoła'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12; Lc. 20:9-19)

³³ 'Le gwzenag yeto jempl nga. Gwzoa to beṇe' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca' to campanaryw ga yesecua' beṇe' yosogüia yesene'e yag ca'.

'Na' bcua'aṇe' yežlion' lo na' beṇe' yesonši'e yag uvasen' na' gwze'e gwyeje' zito'. ³⁴ Cate' bžin ža yosy-otobe' cosešen', gwseje' to čhope xmose' gan' že' beṇe' ca' nac lo na'gaque' yag uvasen' cont šjasyexi'e to tlcw cosešen' dan' cheyała' si'e. ³⁵ Perw na' beṇe' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' jej, nach yetoe' gosote'ne'. ³⁶ Nach gosseja' xan yag uvasen' mos zanch clal ca' beṇe' ca' gwseje' da' nechw, perw lecze can' gosonde' beṇe' nechw ca', lecze ca' gosonde' legaque'.

³⁷ 'Nach gwdena' xan yežlion' gwseje' cuincze xi'inen', godce' yesezi'e xtižen'. ³⁸ Perw na' beṇe' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." ³⁹ Nach gosezene'ne', besyebeje'ne' gan' že' yag ca' na' gosote'ne'.

⁴⁰ Beyož be' Jesúsén' jempl nga, gozne':

—žNacxe chaquele gon xan yežlion' len beṇe' ca' bocua'anlene' yag uvas čhen' cate' yežin cuine'?

⁴¹ Nach bosyoži'e xtižen' gosene':

—Šeje' šjetoe' beṇe' mal ca', na' yodie' yežlion' lo na' beṇe' yoble beṇe' yeson güen yosyonežjue'ne' to tlcw cosešen' cate' žin ža yosyotoben'.

⁴² Jesúsén' gože' legaque':

—Ca'czen'. žBiṇa' gwlable ga nyoj Xtiža' Diosen', žan quinga?:

Yej dan' bi gosaclaže' beṇe' güen yo'o ca' yosočhine', len ba naquen yej squin.

Da' nga ben Xancho Diosen', na' naquen to da' yežejecho.

⁴³ Da'nan' žia' le'e, da' bi chzenagle che Diosen', cuejje' le'e na' cueje' beṇe' yoble beṇe' yosozenag che' cont ṇabi'e yičhjažda'ogaque'. ⁴⁴ Na' ca' nac yejen',

note'teze beṇe' lažo' lo yeja' na' cue'žošje', na' note'teze beṇe' chiže' yeja' cate' lažon' na' gwšošjen le'.

⁴⁵ Na' b̄xoz gwnabia' ca' na' beṇe' fariseo ca', cate' gosende' jempl ca' dan' be' Jesúsen', gosacbe'ede' be'e diža' che legaque' dan' bi chesejnilaže' le'. ⁴⁶ Nach gosacbe'ede' yesezene' le', perw besežebe' bi yesone beṇe' ca' nžague' legaque', le yogüe' gosejle'e gwseła' Diosen' Jesúsen' cont cho'e xtiže'na'.

Jempl che ben' bene' Ini cate' bšagna' xi'ine'

22 Na' da' yoble b̄sed blo'e Jesúsen' beṇe' ca' len jempl, gozne':

² —Yela' gwnabia' che Diosen' zaca'leben ca da' nga goc. Gwzoa to beṇe' gwnabia' na' bene' gastw cate' bšagna' xi'ine'. ³ Na' cate' bžin hor solao Inin' gwsele' xmoše' ca' cont jasexi'e beṇe' ca' ba bol güiže' šja'ac Inina', perw notno goclaže' šja'ac Ini chen'. ⁴ Nach gože' yeto xonj xmoše' ca': "Le šjež beṇe' ca' ba bol güižan' ye'Ine' ba b̄sini'a dan' gagwchona'. Ba betua' be dao' be chesaṇe' na' ba b̄sini'a dan' gagwcho lo Inin'. Na' ye'Ine' yeside' gagwcho dan' ba b̄sini'an'." ⁵ Perw beṇe' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jaṇe'e yežlio che', na' yetoe' gwyeje' jene' negosyw. ⁶ Na' yeba'le' gosenize' mos ca' gwseła' beṇe' gwnabian' na' gosonde' legaque' zi' na' gosote' legaque'. ⁷ Na' leca bža'a beṇe' gwnabian'. Na' gwsele' soldadw che' ca' jasete' beṇe' ca' gosot xmosen' na' bosozeye' lažgaquen'. ⁸ Nach beṇe' gwnabian' gože' xmosen': "Ba b̄sini'a dan' gagwcho lo Inin', perw beṇe' ca' ba bol güiža' nabia' bitw zjazaque' yeside'. ⁹ Le šja'ac le šjata yogo' nez na' ye'le yogo' beṇe' yežagle yeside' Inin'." ¹⁰ Na' mos ca' ja'aque' yogo' nez na' jasetobe' con yogo' beṇe' besežague', no beṇe' naque' beṇe' güen na' no beṇe' naque' beṇe' mal, cont beža' yo'o gan' chac Inin'.

¹¹ Perw cate' gwo'o beṇe' gwnabian' jaṇe'e beṇe' ca' že'na' na' ble'ede' to beṇe' bi nyaze' lache' da' bnežjue' yesaze' lo Inin'. ¹² Nach gože' le': "Migw chia', žnac goquen' gwo'o nga bitw nyazo' lache' dan' beṇa' ča-zo'?" Nach bena' bitw beželde' bi ye'ene'. ¹³ Nach beṇe' gwnabian' bene' mandadw yosočej xmoše' ca' ni'a na' bena' cont yesyebene'ne' na' yesebeque'ne' gan' nac čol, ga cuežyaše' na' gan' gagwxejte laye' tantw žaglagüe'. ¹⁴ Can' naquen, Diosen' chaxe' yogo' beṇe' cont yesejle'e che', perw ba' guen' chosozenague' che' na' legacze' chbeje' cont yesaque' xi'ine'.

Ca nac dan' cheya'la' gaxjw

(Mr. 12:13-17; Lc. 20:20-26)

¹⁵ Nach beṇe' fariseo ca' besežague' na' bosoxi'e nacle' yesone' cont yesebeje' Jesúsen' diža' da' yosode'ede' cont yesagüe' xya che'. ¹⁶ Na' beṇe' fariseo ca' gosesele' ba' beṇe' zjanaque' txen len legaque' na' yeba' beṇe' chesone' txen len Herodesen' cont jaseže' Jesúsen':

—Maestrw, ŋezeto' zoatezo' cho'o diža' li. Na' ŋezeto' diža' li cho'o chsed chlo'edo' beṇe' can' chazlaže' Diosen' goncho. Na' bi chono' cuent bi ža beṇe', le toz can' chono' len note'teze beṇe'. ¹⁷ Da'nan' zedeṇabeto' le' cont ŋao' neto' can' chacdo' cheya'la' gonto'. žNaquen binlo no čixjw da' cheya'la' čixjwcho lao ben' nac la'zelagüe beṇe' gwnabia' ben' chi' Roma, še bi?

¹⁸ Jesúsen' gocbe'ede' yela' xi'a čegaquen', nach gože' legaque':

—jNacle beṇe' gwxiye'! žBixčen' chaclaže'le yoslažo'le neda' len xtižan'? ¹⁹ Le gwlo'e neda' to mechw dan' chyixjwle che gobiernen'.

Nach gosone' to mechw dan' nzi' denario. ²⁰ Nach Jesúsen' gože' legaque':

—žNo lao dan' da' le'e mechw nga? na' žno la da' nyoj le'en ni?

²¹ Nach gose'ene':

—Che César ben' nac la'zelagüe beṇe' gwnabia' ben' chi' ciuda Roman'.

Nach Jesúsen' gože' legaque':

—Le gwnežjo beṇe' gwnabian' da' nac che beṇe' gwnabia', na' le gwnežjo Dios da' nac che Dios.

²² Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

Cate' yesyeban beṇe' guat ca'

(Mr. 12:18-27; Lc. 20:27-40)

²³ Na' lo ža na'teze besežin ba' beṇe' saduceo gan' zoa Jesúsen'. Beṇe' ca' chesene' beṇe' guaten' bi yesyebane'. Nach gosenabde' le', gose'ene':

²⁴ —Maestrw, da' Moisésen' gwne': "Še to beṇe' byo nšagne'e na' gate' sin nono xi'ine' zoa, beṇe' biše' ben' ba goten' cheya'la' yošagna'lene' no'ol güezeba' cont yesenita' xi'in diaža che da' bišen'. ²⁵ Na' len neto' gosenita' beṇe' gosac gaž biše'. Na' beṇe' nechua' bšagne'e, na' gote' nono xi'ine' gwnita'. Na' beṇe' gwchopen' bošagna'lene' no'ol güezeba'. ²⁶ Na' lecze gote' nono xi'ine' gwnita'. Lecze ca' goc len beṇe' gwoṇa', bžinten beṇe' gaža' yogo'lole' gosac che' ca'. ²⁷ Na' gwde gosat yogo'lo' beṇe' ca', nach got len no'ola'.

²⁸ Na' cate' yesyebane' ladjo beṇe' guat ca', žnox beṇe' ca' soalene' no'ola' ca' xo'ole'?, le yoguen' bosy-ošagna'lene' le'.

²⁹ Na' gož Jesúsen' legaque':

—Clemen' chonle xbab dan' žale ca', le bi ŋezele can' ža Xtiža' Dios dan' nyojen, neca nombia'le yela' guac čen'. ³⁰ Caten' yesyeban beṇe' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl beṇe' zjazo' yaba. ³¹ Na' ca' nac dan' yesyeban beṇe' guat ca', žbiṇa' gwlable da' nga can' nyoj Xtiža' Diosen'? žan: ³² "Neda' naca' Dios ben' chonxen Abraham, ben' chonxen Isaac na' ben' chonxen Jacob". Beṇe' guat ca' bi chesonxene' Diosen', san beṇe' zjamban.

³³ Na' beṇe' ca' zjanžagen' besyebande' cate' gosende' diža' dan' b̄sed blo'ede' legaque'.

Dan' nac da' blaoch dan' ža Diosen' cheyała' goncho
(Mr. 12:28-34)

³⁴ Na' cate' gosene beŋe' fariseo ca' can' bzoaži Jesúsen' beŋe' saduceo ca', nach besedobe' jasa'aque' lagüen'. ³⁵ Na' to ben' nsedchgüe' ley dan' bzoj da' Moisés ľecze goclaže' cueje' Jesúsen' diža' da' gwĉhine' contr ľe', gože'ne':

³⁶ —Maestrw, ľo ley ĉhe Diosen', ĉnon' nacch da' žialao da' zjanyojen da' ža Diosen' cheyała' goncho?

³⁷ Nach gož Jesúsen' ľe':

—“Cheyała' gaquecho Ĥancho Diosen' con ca zelao chejni'icho do yĉhĵ do laže'cho.” ³⁸ Ľenŋa' naquen da' žialaoch na' da' blaoch lagüe da' ca' ža Diosen' cheyała' goncho. ³⁹ Na' da' gwĉhopen' zejgaľan' ca', žan: “Cheyała' gaque ľježcho ca chaque cuincho.” ⁴⁰ Ćhope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj beŋe' ca' gosoe' xtiža' Diosen' cani'.

Criston' naque' xi'ĩn diaža ĉhe da' rey David
(Mr. 12:35-37; Lc. 20:41-44)

⁴¹ Na' šlac ŋe' zjanžag beŋe' fariseo ca', ⁴² Jesúsen' gože' ľegaque':

—ĉBixe xbab chonľe ĉhe Criston' ben' gwlej Diosen' cont yedenabi'e? ĉNo xi'ĩn diaža ĉhe naque'?

Na' gose'ene':

—Xi'ĩn diaža ĉhe da' rey Davin'.

⁴³ Nach Jesúsen' gože' ľegaque':

—Še ca' naquen, ĉbixĉhen' cate' da' David bzoje' can' blo'e Spiritw ĉhe Diosen' ľe', gwne' Criston' naque' Ĥane'? Quinga bzoje':

⁴⁴ Ĥancho Dios gože' Ĥanan':

“Gwĉhe'edo' cuita' nga ŋabia'cho txen, na' gona' cont yogo' no chesegue'e le' yosozexĵw yĉhĵe' yosozenague' ĉhio'.”

⁴⁵ ĉNacxe gac ŋacho Criston' xi'ĩn diaža ĉhe da' rey David? ľe' cuin Davin' gože' ľe': “Ĥana”.

⁴⁶ Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

Xtoľa' beŋe' fariseo ca' na' beŋe' ca' chososed chosolo'e leyna'

(Mr. 12:38-40; Lc. 11:37-54; 20:45-47)

23 Nach Jesúsen' gwzolao be'e diža' len beŋe' ca' zjanaque' ľe' txen na' len beŋe' ca' zjanžague' gan' zoe'na', gwne':

² —Beŋe' ca' chososed chosolo'e ley na' beŋe' fariseo ca' ba zjanľane' xľatje da' Moisésen' cont chosozejni'ide' beŋe' ley ĉhe Diosen'. ³ Na' da'n'an' cheyała' gwzenagle ĉhegaque' cate' chosozejni'ide' le'e can' ža leyna', na' cheyała' gonľe can' chosozejni'ide' le'e. Perw bitw gonľe can' cheson ľegaque', ľe ľegaque' bitw chesone' dan' chesene' cheyała' gac. ⁴ Ľegaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' beŋe' yoble ľen na' bitw chesaclaže' yeso'en ľegaque'. ⁵ Ca nac beŋe' ca', yogo' dan' chesonen', chesonen' ga yesele'e beŋe' can'

chesonen' contze yesonxene' ľegaque'. Chio' beŋe' Is-rael nĉhejcho caj dao' de yid do na'cho na' do loxgacho na' ľo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac beŋe' ca' chososed chosolo'e ley ĉhe Diosen' na' beŋe' fariseo ca', zjanonĉhe' caj dao' ĉhegaque' da' xench ca yezi-ca'chle beŋe'. Na' ľecze chesone' lox xagaque' da' toŋech clal ca ĉhe beŋe' yezica'chle. ⁶ Chesyebede' chesebi'e gan' chesebe' beŋe' blao cate' ĉhja'aque' gan' ĉhac no ľni na' cate' ĉhja'aque' yodao' ĉhegaque'. ⁷ Chesyebede' chesap beŋe' ľegaque' bala'aŋ cate' chesyežague' lagüe ya'a. Na' chesyebede' yese' beŋe' ľegaque' maestrw.

⁸ 'Perw žia' le'e, bi gonľe byen ye' beŋe' le'e maestrw, ľe toz neda' Cristo naca' Maestrw ĉhele. Na' yogo' le'e chejniľaže'le neda' nac biše' ľježle tole yetole. ⁹ Na' ľecze bitw gonxenľe note'teze beŋe' blao ye'ľne': “Ĥa-to”. Toze Diosen' ben' zoa yaba naque' Ĥacho. ¹⁰ Na' bitw güe'le latje ye' beŋe' le'e: “Ĥana”, ľe toz neda' Cristo naca' Ĥanľe. ¹¹ Še no le'e nacle beŋe' blaoch, cheyała' gwzexĵw yĉhĵle gaclen ľježle. ¹² Ľe note'teze beŋe' chonxen cuine', Diosen' gone' cont si'e zto' lagüen'. Na' note'teze beŋe' chzexĵwlaže' lagüen', Diosen' gone' cont gaxene'.

¹³ 'ĉNyaše'chguaze gac ĉhe le'e ĉhsed ĉhlo'ele ley dan' bzoj da' Moisésen' na' le'e beŋe' fariseo! ĉHiye'le beŋe' cont bi yosozenague' ĉhe Diosen', ľe bi ĉhac-laže'le ŋabia' Diosen' yĉhĵlažda'ogaque', na' ľecze le'e bi ĉhzenagle ĉhe Diosen' cont ŋabi'e yĉhĵlažda'olen'.

¹⁴ 'ĉNyaše'chguaze gac ĉhe le'e ĉhsed ĉhlo'ele ley dan' bzoj da' Moisésen' na' le'e beŋe' fariseo! ĉHiye'le no no'ole güezebe cont ĉheca'ale yo'o ĉhegaque'. Na' cate' ĉhoľ güižle Diosen', sša ĉhoe'le diža' cont yesaque beŋe' ľeca chonxenľne'. Gacĉhe castigw clal ca yezi-ca'chle beŋe' güen da' xinj.

¹⁵ 'ĉNyaše'chguaze gac ĉhe le'e ĉhsed ĉhlo'ele ley dan' bzoj da' Moisésen' na' le'e beŋe' fariseo! ĉNacle beŋe' gwxiye'! ĉHejtez ĉhejle ĉhĵatiljwle beŋe' zito' beŋe' yeson txen len dan' ĉhsed ĉhlo'elen'. Na' cate' ĉželelene' chzejni'iline' cont yesaque' beŋe' xi'ach clal ca le'e.

¹⁶ 'ĉNyaše'chguaze gac ĉhe le'e! ĉNacle ca beŋe' ľĉhoľ beŋe' chesacde' guac yesegüe'e nez beŋe' yoble! Žale note'teze beŋe' še ŋe': “Yodao' blaon' zoan testigw ĉhia' gona' can' ba gwnia”, bitwbi zejen dan' ĉhnen'. Perw še že': “Oro dan' de ľo' yodaon' zoan testigw ĉhia' gona' can' ba gwnia”, nach cheyała' gone' can' gwnen'. ¹⁷ ĉLe'e nacle ca to beŋe' ľĉhoľ na' bitw ĉhejni'ile! Oron' bitec bi zacan'. Yodao'na' gan' yo'o oron' ľenŋa' zaca'ĉhen, ľe dan' yo'o oron' ľo'enŋan', da'n'an' oron' naquen ĉhe Dios. ¹⁸ Na' ľecze žale še to beŋe' že': “Mes gan' chosozejni'ide' beyixe' ca' chesonxene' Diosen', zoan testigw ĉhia' gona' can' ba gwnia”, bitwbi zejen xtižen'. Perw na' še že': “Dan' xoa ľo mes ľo' yodaon' zoan testigw ĉhia' gona' can' ba gwnia”, nachen' cheyała' gone' can' gwnen'. ¹⁹ ĉLe'e nacle ca beŋe' ľĉhoľ na' bitw ĉhejni'ile! Dan' chosozejni'ide' chesonxene' Diosen' bitec bi zacan'. Mes gan' chesexoe' dan' chosonežjue' Diosen', ľenŋa' zaca'ĉhen, ľe naquen ĉhe Dios. ²⁰ Še beŋe' že':

“Mes dan' zoa lo' yodaon' zoon testigw čhia' gona' can' ba gwnia'”, lencze dan' xoa lo mesen' zoon testigw čhe'. ²¹ Na' še beñe' že': “Yodaon' zoon testigw čhia' gona' can' ba gwnia'”, lecce zejen Diosen' naque' testigw čhe', le yodaon' naquen čhe Dios na' nan' zoe'. ²² Na' še beñe' že': “Yaban' zoon testigw čhia' gona' can' ba gwnian'”, zejen Diosen' naque' testigw čhe', le nan' zoa Diosen' chnabi'e.

²³ ¡Nyaše'chguaze gac čhe le'e chsed chlo'ele ley dan' bzoj da' Moisés na' le'e beñe' fariseo! ¡Nacle beñe' gwxiye! La'czla' chnežjwle Diosen' to part lao ši part čhe yixegüej, čhe oreg, čhe comin, na' čhe bichle cuan čhele, bibi zejen dan' bitw chzenagle čhe da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež beñačhle na' cheyała' gonle can' ba gwlo'o cho'ale gonle. Da' ca' zjanaquen da' zejechen gonle, perw lecce bitw cheyała' cuejyichjle bi gwnežjwle da' ca' chnežjwle Diosen'. ²⁴ ¡Nacle ca to beñe' lchoł beñe' chesacde' guac yesegü'e nez beñe' yoble! Zaca'lebele ca to beñe' chebej yogo' beb dao' riz da' nčhixe da' che'eje' perw bitw chacbe'ede' še yo'o to da' xen juisyw da' zaca' yebeje'. Le čhi' yichjle čhe da' ca' bitec bi zaca' da' ža ley čhechon' cheyała' goncho, na' bi chonle da' ca' zjazaca'chguan.

²⁵ ¡Nyaše'chguaze gac čhe le'e chsed chlo'ele ley dan' bzoj da' Moisés na' le'e beñe' fariseo! ¡Nacle beñe' gwxiye! Zaca'lebele ca ye'eñ dan' chčhin beñe' na' chyibe' cožen' perw bi chyibe' lo'en. Chonle cont chesaque beñe' nacle beñe' güen, perw lecca chzelaže'le bi da' de čhe beñe' na' chbechgüele chca'alen. ²⁶ ¡Le'e beñe' fariseo, nčhol yichjlažda'olen! Le yetinje xtoła'le cont da' licze gacle beñe' güen can' chaclaže'le yeson beñe' xbab nacle. Nach gacle ca to ye'eñ dan' nyibe' cožen' na' lo'en.

²⁷ ¡Nyaše'chguaze gac čhe le'e chsed chlo'ele ley dan' bzoj da' Moisés na' le'e beñe' fariseo! ¡Nacle beñe' gwxiye! Zaca'lebele ca to ba dan' zjanone' xdanchgua lagüen perw lo'en že' žit čhe beñe' guat na' chi'chgua da' zban. ²⁸ Chonle cont chesaque beñe' nacle beñe' güen, perw len yichjlažda'olen' nacle beñe' gwxiye' na' beñe' malchgua.

²⁹ ¡Nyaše'chguaze gac čhe le'e chsed chlo'ele ley da' bzoj da' Moisés na' le'e beñe' fariseo! ¡Nacle beñe' gwxiye! Chonšagüe'le cho'a ba čhe da' beñe' gosole xtiža' Diosen' cani', na' chonšagüe'le cho'a ba čhe yezi-ca'chle beñe' goson da' güen. ³⁰ Na' žale: “Šaca' chio' ba zoacho ca tiemp čhe da' xozxta'ocho ca', bitw bencho txen len legaque' cate' gosote' beñe' ca' gosole xtiža' Diosen' cani'.” ³¹ Perw na' yogo'lojte dan' chonle chlo'en tozce can' nacle len da' xozxta'ole ca' beñe' gosot da' beñe' ca' gosole xtiža' Diosen' cani'. ³² Le gwza'laošaze le gon bica'ch da' zgot dan' bitw goła' yeson da' xozxta'ole ca'.

³³ Le'e nacchguale beñe' zgot na' beñe' gwxiye'. Bitw gac yelale lao castigw dan' gon Diosen' le'e, le seje' le'e lo yi' gabilen'. ³⁴ Na' da' gona', neda' seja' no beñe' yesole xtiža'na' len le'e na' no beñe' sina' na' nochle

beñe' yososedde' le'e xtižan'. Na' gotle bałe' gwda'gac-lene' to le'e yag cruz, na' yebałe' čhinle do lo' yodao' čhlen', na' yebałe' gwlaglene' gate'teze yež šja'aque'. ³⁵ Na' dan' gonle ca' gaple doła' čhe yela' got čhe yogo' beñe' ca' goson da' güen, ben' gosot da' xozxta'ole ca' gwzolaozen len da' Abel ben' naque' beñe' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'. ³⁶ Na' da' li žia' le'e, le'e mbanle ņa'a si'le castigw čhe yela' got čhe yogo' beñe' ca' gosot da' xozxta'ole ca'.

Begüine' Jesúsen' čhe xtoła' beñe' Jerusalén

(Lc. 13:34-35)

³⁷ Le'e beñe' Jerusalén, chotle beñe' ca' chseła' Diosen' cont chesoe'lene' le'e xtižen' chčhellene' yej. Zan ņi'a ba goclaža' yotoba' le'e ca to jed xcaca' ben' nčhe' xi'in na' chyežba' legacba', perw bitw goclaže'le. ³⁸ Na' ņa'a ba gwlejyichj Diosen' le'e. ³⁹ Na' žia' le'e, bich le'ele neda' ņa'a, perw cate'ch žin ža le'ele neda' yeto nach ņale: “Mbalaz ben' za' nga nseła' Xancho Diosen' le' ņabi'e”.

Gwžin ža yosyočhinje' yodao' blaon'

(Mr. 13:1-2; Lc. 21:5-6)

24 Na' ba cheza' Jesúsen' yodao' blaon' šeje' ga yoble cate' beñe' ca' zjanaque' le' txen gosebigue' gan' zoe'na' na' gosezolagüe' gosole diža' catec xdan nac yodaon' na' lecce ca' yo'o ca' zjanyechjen. ² Nach Jesúsen' boži'e xtiža'gaque' gwne': —Ca nac yogo' da' quinga chle'ele, da' li žia' le'e, ņe to yej da' zjancua' nga ca yega'añ zjancua' cože' lježen. Yogon' yosyočhinje'.

Dan' gac cate' ba za' bagwze yeyož yežlio nga

(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesúsen' ba čhi'e lo ya'an, beñe' ca' zjanaque' le' txen gosebigue' lagüen' gose'ene' šižize:

—Che'neto' ņao' neto' batcan' gac da' ca'. Na' žnac gac ņezeto' cate' ba zoa bagwze yido' na' ba zoa yeyož yežlion'?

⁴ Nach Jesúsen' boži'e xtiža'gaquen' gwne':

—Le gwsaca' cont notno siye' le'e. ⁵ Le zan beñe' yesaš yežlio nga beñe' yesaclaže' yosolane' xlatja' nga. Na' yesene': “Nedan' Cristo ben' gwlej Diosen' cont ņabi'e.” Na' yeseziye'e beñe' zan. ⁶ Na' yenele chac gwdiłe nile nale, na' yenele guac gwdiłe, perw bi žeble, le can' cheyała' gac. Perw gague lenņa' ņacho ba bžin ža yeyož yežlion'. ⁷ Le yesedił to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'. ⁸ Perw na' yogo' da' qui gac cate' za' solao gata' yela' zi'.

⁹ Nach beñe' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' beñe' ca' chesegue'e le'e na' yososaca'zi'e le'e nach yesote' le'e.

¹⁰ Cana' beṇe' zan beṇe' ba chesejnilaže' neda' yesebejyichje' bich yesejnilaže' neda'. Na' legacteze' yesečhje' yeson lježgaque' lo na' beṇe' da' chesegue'ede' le-gaque'. ¹¹ Na' beṇe' zan yesonlaže' yesene' xtiža' Diosen' cheseyixjue'ede' na' yeseziye'e beṇe' zan. ¹² Na' lagüe dan' šanch beṇe' ca' yeson da' malen', beṇe' zan juisyw beṇe' ba chesejnilaže' neda' bich yesacde' lježe'. ¹³ Perw na' note'tezle gwyo gwčhejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. ¹⁴ Na' šja'ac beṇe' doxen lo yežlion' yesejixjue'ede' diža' güen cont yeseze beṇačhen' cheyała' yosozenague' che Diosen' nach nabi'e yichjlažda'ogaque'. Na' cate' beṇe' že' yogo' naciön ba zjaṇezde' da'na', cana'ch yeyož yežlion'.

¹⁵ 'Da' Daniel ben' gwdixjue'ede' xtiža' Dios cani' bzoje' che da' zbranchua da' gwxinjen latje gan' chonxenchio Diosen'. Na' cate' le'e le'ele ba zoa dan' gan' zoa yodao' blao, cana' beṇe' yesenita' distritw Judea cheyała' yosoxonje' šja'aque' do ya'adao'. (Beṇe' gwlaben' cheyała' šejni'iden'.) ¹⁷ Na' beṇe' chda do yichjo'o che ližen', bi yeyetje' yotobe' xšinlaže' že' ližen', con yoxonje'. ¹⁸ Na' beṇe' chda yixe' bi yeyej liže' šjayxi'e xałane'. ¹⁹ iNyaše'chguaze zjanac no'ol ca' zjanao' xi'in na' no'ol ca' ṇe' chosoguaže' bidao' lo ža ca'! ²⁰ Na' le ṇab lao Dios bi yažjen gwxonjle cate' chac zag o lo ža che Dios. ²¹ Le yesaquen ža da' leca yesale' beṇe'. Cate' gwxe'te yežlion' na' ža ṇa'aža nono ṇa' gałe' ca', ṇeca žinlažen' yesale'de' ca' da' yoble. ²² Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' beṇe' ca' chesejnilaže' le', beṇe' ba gwleje' zjanaque' xi'ine'.

²³ 'Cana' še no ye' le'e: "Le ṇa'šc, nga zoa Criston' ben' gwlej Diosen' cont nabi'e", o "Le ṇa'šc, na' zoe'", ṇe ca'cze bi šejle'le. ²⁴ Yesaš beṇe' gwxiye' beṇe' yesaclaže' yosolane' xlatja' nga, na' yeson cuine' ca beṇe' chesoe' xtiža' Dios. Na' yesone' yeła' guac da' yesele'e beṇe' na' bichle da' zaca' yesyebande' cont yeseziye'e legaque'. Na' len beṇe' ca' ba gwlej Diosen' zjanaque' xi'ine' yesaclaže' beṇe' gwxiye' ca' yeseziye'e šaca' gac yeseziye'e legaque'. ²⁵ Ba ṇezele can' gac, le ba gwdixjue'eda' le'e yogo' can' gac. ²⁶ Na' še yese'e le'e: "Zoa Criston' latje dašen'", bitw gwzenagle čhegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le čhegaque'. ²⁷ Can' chac cate' chep yeschseṇin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' beṇač. Yida' zejzenez na' yogo'loł beṇe' yesele'ede' neda'. ²⁸ Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

²⁹ 'Na' cate' la' yeyožte saca'zi' beṇačhen', gwbižen' yeyaquen čhoł, na' bion' bich gwseṇin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ³⁰ Na' cana'ch beṇe' že' yežlion' yesele'ede' neda' naca' ben' gwseła' Diosen' golja' beṇač za'a ladjo bejon' len yeła'

guac xen na' yeła' beṇe' zaca' juisyw čhia'. Na' beṇe' že' yogo' naciön che yežlion' yesebežyaše', beṇe' bi gosejnilaže' neda'. ³¹ Na' caten' yida', to trompeta' cuežen žiže, na' seła' angl čhia' ca' doxen yežlion' yosyotobe' beṇe' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

³² 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'eṇ dao', chacbe'ele bačh zoa yela' timp yejon'. ³³ Na' lecze cate' le'ele ba chac da' mal ca' ba gwnian', cana'ch ṇezele ba za' juisyw, ba zoa gała'. ³⁴ Da' li žia' le'e, biṇa' yenit diaža che le'e nita'le ṇa'a cate' ba goc yogo'loł da' ca'. ³⁵ Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

³⁶ 'Perw nono ṇeze bi ža bi horen' gac ca', ṇe angl ca' nita' yaba, ṇeca neda' naca' Xi'in Diosen' bi ṇezda'. Toz Xa' Dios ṇeze.

³⁷ 'Diosen' gwsele' neda' golja' beṇač, na' can' goc timp che da' Noé, lecze can' gac caten' neda' yida' da' yoble. ³⁸ Beṇe' ca' gosenita' timp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. ³⁹ Bitw gosacbe'ede' bin' gac. Cate'ch goc yejw sio' juisyw na' bia' nisen' yogo'lołe' cana'ch gosacbe'ede'. Lecz can' gac, con cate'ch yida' da' yoble cana'chen' yesacbe'e beṇe' bin' gac. ⁴⁰ Quingan' gac caten' yida' da' yoble: Čhope beṇe' nite' do yixe', toe' yezi' yeca'a, na' yetoe' yocua'ana'. ⁴¹ Na' čhope no'ole ṇite' chesote', toe' yezi' yeca'a na' yetoe' yocua'ana'.

⁴² 'Da'nan' le soa le cueze, le bi ṇezele bi ža bi horen' yida' da' yoble, neda' naca' Xanle. ⁴³ Le gon xbab che da' nga, šaca' ṇeze xan yo'on' do bi hor lo yelen' žin beṇe' gwbanṇa' ližen', ṇa'ze' cont bitw güe'le latje šo' ben' ližen' cuane' xšinlazen'. ⁴⁴ Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' beṇač.

Mos ben' chon güen, na' mos ben' bi chon güen

(Lc. 12:41-48)

⁴⁵ 'Note'tezle še zoale lez bate'teze, zaca'leble ca to mos beṇe' naque' beṇe' sina' na' beṇe' chon da' cheyała' gone'. Na' še to beṇe' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. ⁴⁶ Še to beṇe' mosen' chontezle' can' gož xanen' le', mbalaz soe' cate' yežin xanen'. ⁴⁷ Da' li žia' le'e, xanen' cue' lo na' mosen' yogo'loł da' de čhe'. ⁴⁸ Perw še mosen' naque' beṇe' zgot na' gone' xbab ṇe': "Ba gwže xanan'". ⁴⁹ Nach solagüe' tile' mos ca' yezica'chle na' ye'ej gagwxate' len no beṇe' borrašw, ⁵⁰ nach xane'na' yežine' to ža senyale' le' to hor bi nacbe'ede'. ⁵¹ Na' dan' bi chon mosen' ca' cheyała' gone', xane'na' činchgüe' le' ca' gatte'. Gac čhe' can' chac che note'teze beṇe' gwxiye', chjaya'aque' gabilen' gan' chesebežyaše' na' chesagwxetje laye' dan' leca chesežaglagüe'.

Jempl che ši no'ole güego' ja'aque' to yela' güešagna'

25 Nach Jesúsen' goze'e beñe' ca' zjanaque' le' txen:

—Cheyała' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che beñe' ca' chosošagnan'. Na' zjanxobe' lintern chegaque' ja'aque' jaseleze' yesyechoj beñe' ca' liž no'olen' par šja'aque' liž beñe' byon' txen. ² Na' gayo' no'ol ca' gosaque' beñe' chejni'i na' yegayoe' bibi xbab gosone'. ³ Cate' no'ol ca' bibi xbab goson gosa'ac liže', zjanxobe' lintern chegaquen', perw bitw gosoxe' botey gan' yože set dan' yosočhine' cate' yebiž dan' yože lo' lintern chegaquen'. ⁴ Na' no'ol ca' chesejni'i, zjanxobe' lintern chegaque' lente botey seten' dan' yosočhine' cate' yebiž dan' yože lo' lintern chegaquen'. ⁵ Na' beñe' güešagna' ca' goseže'de' na' no'ole ca' gosebeze' le-gaque' gosetase' šlac chesebeze'ne'. ⁶ Na' do chel, to beñe' gwñe' zižje, gože' legaque': "Ba chesyechoj beñe' güešagnan'. Le šo'o šjašagchone'." ⁷ Na' cate' gože' le-gaque' ca', yogo' no'ol ca' gosezeche' na' gosečogue' mešw dan' gwyey che lintern' na' bosyogualen' da' yoble. ⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž cheton'." ⁹ Nach no'ol ca' gose'e legaque': "Bitw gac gon'to' late' chele, le dan' de cheton' bitw gaquen par yogo'cho. San le šja'ac le šjaxi' chelen' ga choten'." ¹⁰ Nach no'ol ca' bi goson xbab ja'aque' ja-sexi'e seta'. Na' šlac zja'aque' besyežin beñe' ca' chosošagna' liž beñe' byon'. Na' no'ol ca' gosaque' beñe' chejni'i, goso'e txen len beñe' ca' chosošagnan' lo' yo'o gan' chesone' inin'. Nach mos ca' bososeyjue' puerten'. ¹¹ Na' cate' besyežin no'ol ca' bi goson xbab, gosen'e' cho'a puerten', gose'e ben' zoa lo' yo'on: "Beñe', gwsaljwšca puerta' cont šo'to'." ¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesúsen' beñe' ca' zjanaque' le' txen:

—Ca'czen' cheyała' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwseła' Diosen' golja' beñach.

Jempl che ben' bocua'anlene' xmose' ca' mechon'

¹⁴ Na' dan' yida' yežlio nga da' yoble yedenabi'a zaca'leben ca da' nga goc. To beñe' gwyeje' nación zito'. Na' za' se'e goxe' mos che' ca' na' gwlo'e lo' na'gaque' xmechue' cont gosone' delgens. ¹⁵ Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnežjuen' legaque' con ca ble'ede' da' chac yeson to toe'. Beyož bene' ca' na' gwze'e. ¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan lecce gayo' mil. ¹⁷ Lecce ca' ben ben' bocua'anlene' chope mil, na' bene' gan yechope mil. ¹⁸ Na' ben' bnežjue' to mil gwyeje' jacuaše' xmechw xanen' to lo' yechw da' gwche'ene' lo' yo.

¹⁹ Goc šsa gwza' xan mos ca' cate' bežine', nach bene' mandawd ja'ac xmose' ca' lagüen' cont bosyodie' cuent. ²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beño' neda'. Na' ba bena' gan yegayo' mil." ²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyała' gono'. Na' dan' beno' can' cheyała' gonon' len da' daon' bocua'anlene' len', da'nan' gona' lo' nao' da' xench. Gwyo'o cont so' mbalaz len neda'." ²² Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anleno' neda', na' ba bena' gan yechope mil." ²³ Nach gož xanen' le': "Ba beno' da' güen. Naco' mos güen na' ba beno' ca' cheyała' gono'. Na' dan' beno' can' cheyała' gonon' len da' daon' bocua'anlene' le', da'nan' gona' lo' nao' da' xench. Gwyo'o cont so' mbalaz len neda'." ²⁴ Nach cate' bežin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nežda' naco' to beñe' znia. Chelapo' da' gosaz beñe' yoble, na' chotobo' coseš ga goson beñe' yoble žin. ²⁵ Da'nan' gwya'a jačhe'ena' to yechw na' bcuaša' xmechon', le bžeba' še gwñitan'. Na' ņa'a bežišcan'." ²⁶ Nach xanen' gože' le': "iNaco' mos mal, na' naco' xagüed! Neždo' chelapa' ga gosaz beñe' yoble, na' chotoba' coseš ga goson beñe' yoble žin. ²⁷ Na' lagüe da' neždo' chona' ca' žbixchen' bi gwlejo' xmechuan' beñe' yoble cont yeži'an len yichjen ņa'a ba bela'a?" ²⁸ Nach gože' xmose' ca' yezica'chle: "Yeca'ale mechon' dan' bocua'anlene' beng na' gwnežjwlen ben' ba noxe' ši mil. ²⁹ Can' naquen, note'teze beñe' chon güen len dan' chnežjo xanen' le', xanen' gwnežjochcze' che', cont gata' da' zča'och che'. Perw na' note'teze beñe' bi chgone' žin dan' chnežjo xanen' le', yeca'a xanen' da' daon' noxe'na'. ³⁰ Na' ca' nac mos xagüed nga, le yebeje' le che'əoxje' gan' nac cho' na' cuežyaše' na' gagwxetje laye' dan' leca žaglagüe'."

Can' gac cate' Jesúsen' gone' yela' justis che yogo' nación

³¹ Diosen' gwsele' neda' golja' beñach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chn-abia' Dios ben' zoa yaba. ³² Na' yapa' yogo' beñe' che yogo' nación ca' yeside' laguan'. Na' cate' ba nita' yögüe' na' la'ane' can' chon to beñe' güeye xila' cate' chebeje' partle xila' ca' na' partle šib ca'. ³³ Na' beñe' ca' zjanac beñe' güen lao Diosen' dan' ba gosejnilaže' neda', gwnita' legaque' cuitan' šla'a liča. Perw beñe' mal ca', gwnita' legaque' cuitan' šla'a robes. ³⁴ Na' neda' naca' rey yapa' beñe' ca' nita' šla'a ličan': "Ba ben Xa' Diosen' cont le'e soale mbalaz. Le da' nga cont gona' nabi'a'le txen len neda' can' ba nžia' bia' Diosen' cate' gwxcete yežlio. ³⁵ Gona' cont nabi'a'cho txen, le cate' gw-dona' le'e beñle dan' gwdagua'. Na' cate' gwbiłda' nis, le'e beñle da' güe'ēja'. Na' cate' goca' ca' beñe' zito' le'e bleble neda' ližlen'. ³⁶ Na' cate' bi gota' da' chaza', le'e beñle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." ³⁷ Na'

beṇe' gūen ca' yese'e neda': "Xanto', žbaten' ble'eto' le' gwono' na' beṇto' da' gwago' Na' žbaten' gwbiłdo' na' beṇto' da' gūe'ejo'? ³⁸ Na' žbaten' goco' ca' beṇe' zito' na' blebto' le'? Na' žbaten' ble'eto' le' bi de da' čhazo' na' beṇto' da' gwyazo'? ³⁹ Na' žbaten' gocšendo' o goto' ližya na' bedeṇa'to' le'?" ⁴⁰ Na' neda' naca' rey yape'gaca'ne': "Da' li žia' le'e, beṇe' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le legaque', la'czla' bitec bi zjanaque' len beṇačhen', lencze nedan' beyaše'laže'le."

⁴¹ 'Nach beṇe' ca' nita' šla'a robesle, beṇe' mal ca', yape'gaca'ne': "Le cuas ca'ale. Ba žia' bia' čhele cuiayi'le yela' gūen da' mal čhelen'. Le šja'ac lo yi' gabił dan' bi cheyol, yi' dan' bxn Diosen' cont saca'zi' Satanás toli tocaṇe len da' xigüe' ca' cheson xšinen'. ⁴² Le šja'ac lo yi' gabiłen', le cate' gwona' bitw beṇle dan' gagua'. Cate' gwbiłda' bitw beṇle da' ye'aja'. ⁴³ Cate' goca' ca' beṇe' zito' bitw bleble neda' ližle. Cate' bi gota' da' čhaza' bitw beṇle da' čhaza'. Cate' gocšenda' na' cate' gota' ližya, bitw bedeṇa'le neda'." ⁴⁴ Nach legaque' lecze yosoži'e xtižan' yesene': "Xanto', žbaten' bi beyaše'to' le' cate' gwono' o gwbiłdo', o goco' beṇe' zito', o bi gota' da' čhazo', o gocšendo', o goto' ližyan'?" ⁴⁵ Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le beṇe' ca' chesejnilaže' neda', la'cze bibi zjanaque' len beṇačhen', da'nan' lencze nedan' bi beyaše'laže'le." ⁴⁶ Nach beṇe' mal ca' yesezaca'zi'e toli tocaṇe. Perw beṇe' ca' chesone' gūen lao Diosen' yesezoe' mbalaz toli tocaṇe.

Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

26 Cate' beyož be' Jesúsen' diža' ca', gože' beṇe' ca' gwleje' cont zjanaque' txen len le':

² —Ba nezele yečhope žazen' gała' In'i pascw čechon'. Na' cana' gaca' lo na' beṇe' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' beṇačh.

³ Nach bxož gwnabia' ca' na' beṇe' ca' chososed chosolo'e dan' bzož da' Moisésen' na' beṇe' gole blao ca' chesenabi'e nación Israel čechon' besedobe' chy'o liž bxož blao ben' le Caifás. ⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. ⁵ Na' gosene':

—Bi senchone' lo In'in' cont ca' yesebec beṇe' žaš.

To no'ole bzož set zix' yičhj Jesúsen'

(Mr. 14:3-9; Jn. 12:1-8)

⁶ Nach goquen' Jesúsen' len beṇe' ca' gwleje' cont zjanaque' txen len le' nite' Betania liž Simón ben' gūe'e yižgüe' da' nzi' lepra. ⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chla' zix' da' leca' chzaca' la'ay. Na' no'olen' bzoačochje' seten' yičhj Jesúsen'. ⁸ Na' beṇe' ca' zjanaque' txen len Jesúsen' cate' besele'ede' can' ben' no'olen' beseže'e na' gosene':

—žBixčhen' con benditjde' set zix' nga? ⁹ Ša no' bete' len, yesonen' mechw xen na' yosonežjuen' gaclenen beṇe' yaše'.

¹⁰ Jesúsen' gocbe'ede' bin' gosene' nach gože' le-gaque':

—žBixčhen' chnele čhe no'olen'? Dan' bene' len neda' nga naquen gūen. ¹¹ Le beṇe' yaše' ca' bate'teze nita'cze' len le'e, san nedan' bich soa' yesša len le'e.

¹² Dan' bguazje'nda' set zixen' bene' dan' cheyała' yesone' len neda' cate' gaša'. ¹³ Da' li žia' le'e, doxen yežlio gate'teze šjasedixjue'e beṇe' diža' gūen dan' chzejni'in' čhia', decze de yesene' can' ben' no'ol nga, cont šjasyeze'ede'ne'.

Judas Iscariote bene' Jesúsen' lo na' beṇe' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len beṇe' šižinw ca' ben' gwlej Jesúsen' cont zjanaque' txen len le', gwyeje' jaṇe'e bxož gwnabia' ca'. ¹⁵ Na' ježe' legaque':

—žGaca'te' gonle neda' cont gwdia' Jesúsen' lo na'le?

Nach bosoxi'a beṇe' ca' yosonežjue'ne' šichoa mechw plata na' bosonežjue'nen'. ¹⁶ Nach cana' Judasen' gwzola'güe' gwdiłjwlaže' nac gone' gwdie' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got čhen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' In'i caten' chesagüe' yetextil dan' bibi levadura yo'o, na' ža nechw čhe In'in' beṇe' ca' zjanaque' Jesúsen' txen ja'aque' gan' zoe' na' gose'ene':

—žGan' che'ndo' šjasiṇi'ato' cont gagwcho xše' čhe pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to beṇe' byo ben' nom-bia'cho na' ye'Ine': "Maestron' že' ba zoa žin ža gac da' cheyała' gac čhe', na' ližo' nga che'nde' gagwleno'ne' xše' In'i pascon'."

¹⁹ Nach beṇe' ca' gosone' can' gož Jesúsen' legaque', jasesiṇi'e xše' že' In'ina'.

²⁰ Na' cate' beyož gwxa gwbiž, Jesúsen' len beṇe' šižinw ca' gwleje' cont zjanaque' le' txen gosebi'e cho'a mesen' gosagüe'. ²¹ Na' šlac chesagūen' gož Jesúsen' legaque':

—Da' li žia' le'e, to le'e gwdele neda' lo na' beṇe' ca' chesegue'ede' neda'.

²² Nach legaque' besyeyaše'laže'de', nach gosezo-lagüe' tgüje' tgüje' gosenabde' le' gose'ene':

—Xana', žnedan' gona' ca'?

²³ Nach gože' legaque':

—To ben' chagw len neda' txen tož lo' ye'eṇ, le' gwdie' neda' lo na' beṇe' ca'. ²⁴ Na' gac čhia' can' nyoj le'e Xtiža' Diosen', neda' naca' ben' gwseła' Diosen' golja' beṇačh, perw nyaše'chguaze nac ben' gwdie' neda' lo na' beṇe' ca'. Yejni'acle ša bi golje'.

²⁵ Nach Judasen' ben' za' gwdie' Jesúsen' lo na' beñe' ca' gože'ne':

—Maestrw, ¿nedan' gwdia' le' lo na' beñe' ca'?

Jesúsen' gože'ne':

—Le len'.

²⁶ Na' šlac chesagüen', Jesúsen' gwxi'e to yetextilen' na' beyož be'e yel'a choxclen che Dios, bzojjen' na' bnežjuen' beñe' ca' zjanaque' le' txen, gože' legaque':

—Le gagon'. Lenña' cuerp çhian'.

²⁷ Nach beñe' to vas gan' yože nis uvasen', na' beyož be'e yel'a choxclen che Dios boznežjuen' legaque', gože'ne':

—Yogo'le, le ye'ej late' güeje dan' yože lo' vas nga.

²⁸ Da' nga xçhena' na' chzanlažan' laljen neçhe xtoja' yogo'lo' beñaçh. Na' laljen cont solao gac da' cob dan' gwna Diosen' gone' gaclene' beñaçhen'. ²⁹ Chnia' le'e, bich ye'aja' nis uvas ña'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ajan' da' yoble.

Jesúsen' gwne' Pedroa' bi çhebe' še nombi'e le'

(Mr. 14:26-31; Lc. 22:31-34; Jn. 13:36-38)

³⁰ Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. ³¹ Na' šlac zjangüe'e nezen' Jesúsen' gože' legaque':

—Na'aže' yogo'le cuejyichjle neda' neçhe dan' gac çhian'. Le nyojczen le'e Xtiža' Diosen' žan: "Gota' beñe' güeye' xilan' na' xila' ca' yesaslasba'." ³² Perw na' cate' yosban Diosen' neda' ladjo beñe' guat ca', yobch yeya'a Galilea ca' le'e.

³³ Nach Pedroa' gože' Jesúsen':

—La' yogo' beñe' quinga yesebejyichje' le', neda' gwbat gona' ca'.

³⁴ Jesúsen' gože' le':

—Da' li žia' le', biña' cuež jean' ña'aže' cate' gac šon ñi'a bi chçhebo' še nombi'o neda'.

³⁵ Nach Pedroa' gwne':

—La'czla' še chonen byen quatlenca' le', gwbat ñia' bi nombi'a le'.

Na' lecze ca' yogo' beñe' šižinw ca' zjanaque' Jesúsen' txen gosene' ca'.

Jesúsen' boļ güiže' Diosen' to latje dan' nzi' Getsemaní

(Mr. 14:32-42; Lc. 22:39-46)

³⁶ Nach besežine' latje gan' nzi' Getsemaní, na' Jesúsen' gože' beñe' ca' zjanaque' le' txen:

—Ngaze le' cue' šlac ša'a na'le šjaļ güiža' Diosen'.

³⁷ Na' gwçhe'e Pedroa' len çhop xi'ñ Zebedeo, Jacobon' len Juanña'. Na' Jesúsen' gwzolao gocyas'e'chgüede', na' benchgüe' xbab. ³⁸ Nach gože' legaque':

—Lo' yichjlažda'oguan' chacyas'e'chgüeda', chacda' con gatca' catequen' chžaglagua'. Nga le yega'an bi tasle, le ña' txen len neda'.

³⁹ Nach Jesúsen' gwžialagüe' yelate' na' jaçhaze' lo yon' cosçho'ale nach boļ güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chñaba' gac da' ñia' neda', san gac can' ñao' le'.

⁴⁰ Nach beyeje' gan' nita' beñe' ca' šone na' ble'ede' zjanite' chesetase'. Na' gože' Pedroa':

—¿Ñe šlož dao' ca' goc cuejle bišgal len neda'? ⁴¹ Bi tasle na' le yoļ güiž Dios cont bi gon gwxiyen' le'e gan'. Nežda' che'nele ña'zle len neda' perw bi chzoele.

⁴² Na' gosze'e gan' nite' na' da' yoble jaļ güiže'

Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezyeje' gan' niten' na' da' yoble ble'ede' chesetase' le' ba chesežode' yejlagüen' bišgal. ⁴⁴ Na' gwze'e da' yoble gan' nite'na' jaļ güiže' Diosen' da' gwyone ñi'a, na' goznacze' da' yoble can' ba gwnen'. ⁴⁵ Na' bezžine' gan' nita' beñe' ca' šone nach gože' legaque':

—Ña'ach guaque tasle na' yezi'laže'le. Ba gole gwde to beñe' neda' lo na' beñe' güen da' xinj ca', neda' naca' ben' gwseļa' Diosen' golja' beñaçh. ⁴⁶ Le çhas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' beñe' chesegue'ede' le'

(Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsen' dižan' ca' cate' bžin Judas ben' goque' txen len beñe' šižinw ca' gwlej Jesúsen' cont zjanaque' le' txen. Na' zan beñe' zja'ac len le' zjanoxe' no yag, no spada, beñe' goseseļa' bçox gwnabia' ca' na' beñe' gole blao ca' chesenabi'e nación Israel çhechon'. ⁴⁸ Na' Judas ben' bdie' le' lo na' beñe' ca', gože' legaque' nac yesenežde' non' yesezene', gwne':

—Ben' gwnopa' xague', le'na' Jesús. Le sene'.

⁴⁹ Nach la' gwbiga'te' cuit Jesúsen', gože'ne':

—Patiox, Maestrw.

Na' bnope'ne'. ⁵⁰ Jesúsen' gože'ne':

—Migw çhia', ¿bixçhen' zao' nga?

Nach la' gosebiga'te beñe' ca' gosezene' Jesúsen' na' goseçhe'ne'.

⁵¹ Na' to ben' nac txen len Jesúsen' gwleje' spada çhen' na' gwðinen' mos che bçox blaon' gwçhogte' šla'a naguen'. ⁵² Nach Jesúsen' gože'ne':

—Bego'o spada çhion' lo' liženna', le yogo' beñe' chesote' beñe' len spada, lecze len chesatlene'. ⁵³ ¿Bi neždo' guac ñabda' Xan' cont la' seļa'te' angl zan juisyw beñe' yesaclene' neda'? ⁵⁴ Perw še gona' ca' žnacxe gac dan' cheyaļa' gac dan' nyoj Xtiža' Diosen' žan quinga gaquen'?

⁵⁵ Nach Jesúsen' gože' beñe' ca' zjasezen le':

—¿Bixçhen' nonle neda' ca' to beñe' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsed blo'eda' beñe' že'na' na' bi gwzenle neda'. ⁵⁶ Perw chac da' qui cont chac can' ža Xtiža' Diosen' dan' bosozoj da' beñe' goso'e xtižen' cani'.

Nach yogo' beñe' ca' zjanaque' Jesúsen' txen bosoxonje' gosebeyjyichje'ne'.

Goseče'e Jesúsen' lao beņe' ca' chesenabia' nación Is-raelen'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' beņe' ca' gosezen Jesúsen' goseče'ene' lao Caifás ben' nac bχoz blaο, gan' ba zjanžag beņe' ca' chososed chosolo'e dan' bzoj da' Moisésen' na' len beņe' gole blaο ca' chesenabi'e nación chechon'.

⁵⁸ Nach Pedroa' na'ogüe' Jesúsen' zito' zito'le bžinte' liž bχoz blaon', na' gwyo'e chyo'ona' gwchi'e len beņe' ca' chesape' yodao' blaon', le goclaže' le'ede' naquen' ze-lao gac che Jesúsen'.

⁵⁹ Nach yogo' bχoz gwnabia' ca' na' yezica'chle beņe' gole blaο ca' chesenabi'e nación chechon' chesey-iljwlaže' bi diža' güenlaže' yeso'e che Jesúsen' cont yesote'ne'. ⁶⁰ Perw goc sša bitw besyeželde' bi diža' güenlaže' yosode'ede' le' cont gosozie'ne' xya la'czla' beņe' zan gosenite' gosene' diža' güenlažen' contr le'. Gwde na' besechoj yečhope beņe' na' bediļen can' gosenen'. ⁶¹ Quinga gosene':

—Benga gwne': "Neda' guac yočhinja' yodao' blaο gan' chonxencho Diosen', na' šone žaze yeyonan'."

⁶² Nach gwzoža' bχoz blaon' gože' Jesúsen':

—¿Bibi de bi ņao' ca' nac da' nga chosocuiš beņe' quinga le'?

⁶³ Bitwbi gwna Jesúsen'. Nach gož bχoz blaon' le':

—Chnia' le' gwna neto' še le len' Cristo ben' nac dogualje Xi'iq Diosen', ben' gwleje' cont yedenabi'e. Na' Diosen' ben' zoa toļi tocaņe cue'e da' baļi še ledο can' žon'.

⁶⁴ Jesúsen' gože'ne':

—Le can' žale nan' naca'. Diosen' gwsele' neda' golja' beņač. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yeļa' guac xen, na' ņabi'a txe len le', na' le'ele yetja' yaban' to lo' bejw.

⁶⁵ Cate' bene bχoz blaon' xtiža' Jesúsen', gwšo' gw-čeža'te xen', le par le' da' mal juisyon' gwna Jesúsen' cui'e cuit Diosen' ņabi'e. Nach gwne':

—Ba benecho ņa'a ba gwņe' che Diosen' dan' gwne' ca'. Noch no chyažje no gagw xya che'. ⁶⁶ ¿Nac žale che'?

Nach beņe' ca' bosyoži'en gose'ene':

—Cheyaļa' gate' dan' chon cuine' ca' Dios.

⁶⁷ Nach bosozie' xene' cho'alao Jesúsen', na' gose-baže'ne', na' baļe' gosegape' xague'na'. ⁶⁸ Nach gose'ene':

—Še len' naco' Criston', gwņeya'ašč, gwna neto', ¿non' chgapa' le'?

Pedroa' bi gwčebe' še nombi'e Jesúsen'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txe len Jesús beņe' Galilean'.

⁷⁰ Na' lao yogo' beņe' ca' že' na', Pedroa' bitw gw-čebe' še naque' txe len Jesúsen', na' gože' no'olen':

—Bi ņezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinņa' le', na' goze'e beņe' ca' že'na':

—Lecze len bengā naque' txe len Jesús beņe' Nazareten'.

⁷² Da' yoble bitw gwčebe' še naque' txe len Jesúsen', nach gwne':

—Na' zoa Diosen' cue'e da' baļi bitw nombi'a bena' žo' ca'.

⁷³ Na' goccze šlož, gosebiga' beņe' ca' že'na' goseze'e Pedroa':

—Da' ļicze, naco' txe len ļegaque', le nacbia' chņio' can' cheseņe beņe' Galilea ca'.

⁷⁴ Nach Pedroa' čhop šone ņi'a gwne':

—Diosen' goņe' ga saca'zi'a še chonlaža' dan' žia' bi nombi'a bena'.

Na' la' gwchežte to jea. ⁷⁵ Nach jayze'e Pedroa' can' gož Jesúsen' le': "Biņa' cuež jean' cate' gac šone ņi'a bi chčebo' še nombi'o neda'." Nach beze'e ļeca gw-chežyaše'.

Goseče'e Jesúsen' lao Pilaton'

(Mr. 15:1; Lc. 23:1-2; Jn. 18:28-32)

27 Na' cate' gwyeni', yogo' bχoz gwnabia' ca' na' beņe' gole blaο ca' chesenabia' nación chechon' besyedobe' na' gosečhoglagüen' yesote' Jesúsen'.

² Nach bosocēje'ne' na' goseče'ene' jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo' na' beņe' ca', cate' gocbe'ede' ba gosečhoglagüen' yesote' Jesúsen', betinjde' dan' bdie' le' lo' na' bχoz gwnabia' ca' na' beņe' gole blaο ca'. Nach gwyeje' laogaquen' par bonežjue' ļegaque' šichoa mechw platan'. ⁴ Nach gože' ļegaque':

—Malen' bena' bdia' lo' na'len' to beņe' bi nape' doļa'. Na' gose'ene':

—Bitwbi doļa' nap neto' dan' beno' ca'.

⁵ Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

⁶ Beyož beza' Judasen', bχoz gwnabia' ca' bosyotobe' mechon'. Na' gose' ļježe':

—Bitw gac co'ochon lo' caj gan' yo'o mechw che yo-daon', le naquen mechw dan' gwduxwcho cont yega'a yeļa' mban che to beņe'.

⁷ Na' bosoxi'e yesezi'e len mechon' to yežlio dan' de che to beņe' güen yeso'. Na' gosezi'en par to capsantw ga yosocuaše' beņe' zito'. ⁸ Na' yežlion' ņe' nzin' Yežlio Chen ža ņa'aža, le gosezi'en len mechw dan' gosey-ixjue' cont gosote' Jesúsen'. ⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena beņe' Is-rael zaca' bena'. ¹⁰ Na' gosezi'e yežlio che to beņe' güen yeso', can' gwna Xancho Diosen' neda'."

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseçhe'e Jesúsen' lao gobernadores' na' šlac zeche' lagüen', gobernadores' gože'ne':

—¿Len' naco' rey çhe bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' bçoz gwnabia' ca' na' bene' gole blao ca' chesenabia' nación çhechon' bosocuiše' Jesúsen', bitw bi gwne'. ¹³ Nach Pilaton' gože'ne':

—¿Bi chendo' catec da' zan xya nga chesagüe' çhio'?

¹⁴ Perw Jesúsen' ñe to xtiže'na' bitw boži'e, na' be-banechgüe gobernadores'.

Goseçhoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadores' gwsane' to bene' de ližya cate' çala' lñi pascw çhecho, con bene' yeseñab bene' gualaž çhechon'. ¹⁶ Na' ližya na' de to bene' chzechgua çhe' naque' bene' güen da' xinj, na' le' Barrabás. ¹⁷ Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

¹⁸ Gocbe'e Pilaton' dan' chesacxi'a bçoz gwnabia' ca' Jesúsen', da'nana' bosodie' le' lo ne'en.

¹⁹ Ca' chi' Pilaton' gan' chone' yela' justisen', cate' bžin to rson da' gwsele' no'ol çhen', gože'ne': "Bitw bi gondo' bena', le bibi doła' nape'. Nže'e gwñeda'ne' yel na' bžaglaochgua' ñeche dan' chac çhe bena'."

²⁰ Na' bçoz gwnabia' ca' na' bene' gole blao ca' chesenabi'e nación çhechon' gosego'oyele' bene' ca' že'na' cont yeseñabe' gwsane' Barrabásen' na' yeseñabe' yesote' Jesúsen'. ²¹ Nach gobernadores' gože' legaque' da' yoble:

—¿No bene' quinga çhope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¿Bde'e le'e yag cruz!

²³ Nach gož gobernadores' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—¿Bde'e le'e yag cruz!

²⁴ Gocbe'e Pilaton' bicze bi gac gone'. Ba chyała'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagá' dan' gotlene', xbagá' le'e naquen še ba betwlene'.

²⁵ Nach yogo' bene' ca' gose'ene':

—Xbagá' neto' na' xbagá' xi'iñto' naquen çhe yela' got çhe benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw çhe' ca' Jesúsen', nach bene' le' lo na'gaque' cont yosode'ene' le'e yag cruzen'.

²⁷ Nach soldadw çhe gobernadores' goseçhe'e Jesúsen' lo' yo'o çhe gobernadores', nach bosyotobe' yogo' soldadw ca'. ²⁸ Na' goseyiñe' xałana' Jesúsen' na' bosoguacue'ne' to lache' xña ca' dan' chesaz rey ca'.

²⁹ Na' gosone' to corona de xis yeše' bosozoen' yich-jen', na' ne'e liçha bosogoxe'ne' to xis. Na' bosozoa xibe' lagüen' par gosonle' çhe', nach gose'ene':

—¿Viva rey çhe bene' Israel!

³⁰ Nach bosozí'ene' xene', na' besyeque'e xis dan' noxen' na' bosozeten' yichje'. ³¹ Na' beyož gosonle' çhe', besyeque'e lache' xñan' dan' bosoguacue'nen' na' bosyoguacue'ne' xacze'. Nach goseçhe'ene' cont jasede'ene' le'e yag cruzen'.

Bosode'e Jesúsen' le'e yag cruzen'

(Mr. 15:21-32; Lc. 23:26-43; Jn. 19:17-27)

³² Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz çhe Jesúsen'.

³³ Na' besežine' to latje gan' nzi' Gólgota, zeje diža' latje çhe žit yichj bene' guat. ³⁴ Na' bosonežjue' Jesúsen' vino da' nçixje to da' zła' par ye'ejen', perw le' con bñixen', bitw güe'ejen'.

³⁵ Na' cate' beyož bosode'ene' le'e yag cruzen', soldadw ca' gosone' rifa cate' besyele'e xałane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xałanan' na' yesezi' çhe çhe', yesonen' rifa." ³⁶ Nach gosebi'e gosape'ne'. ³⁷ Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey çhe bene' Israel ca'."

³⁸ Na' lecce cana' bosode'e çhope bene' gwban le'e yeçhope yag cruz. Toe' gwda' cuit Jesúsen' liçha na' yetoe' cuite' robes. ³⁹ Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le', ⁴⁰ gose'ene':

—Len' gwnao' yoçhinjo' yodao' blaon' na' šoñe žaze yeyonon', bosla cuino'. Še len' naco' doguale Xi'iñ Diosen', beyetj le'e yag cruzen'.

⁴¹ Na' len bçoz gwnabia' ca' na' len bene' ca' chososed chosole' dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación çhechon', yogüe' gosezi'diže'ne' na' gosene':

⁴² —¿Yezica'chle bene' bosle' na' bi chac yosla cuine'! Še naque' rey çhe chio' bene' Israel, yeletj cuine' le'e yag cruzen' ña' na' šejle'cho çhe'. ⁴³ Le' chejnilaže' Diosen', le gwne': "Dogualje Xi'iñ Dios neda'." ¿Na' le'echo yosla Diosen' le' ña' še chacde' le'!

⁴⁴ Na' bene' gwban ca' zjada' le'e yag cruzen' chop la'a cuiten', lecce gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

⁴⁵ Na' do guagwbiž doxen yežlion' goc choł bžinte cheda šone. ⁴⁶ Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios čhia', Dios čhia', ¿bixčhen' ba gwlejšyichjo' neda?)

⁴⁷ Na' bał beñe' ca' zjanita' na' gosende' na' gosene':

—Łe gwzenag, beng a choł güiže' da' Elías ben' be' xtiža' Diosen' cani'.

⁴⁸ Nach la' bchojte to beñe' gwejšese' jaži'e to esponja na' bzažeden' vino zičh na' bzoen' to lao xis toñe nach jažiguen' cho'a Jesúsen' cont xopen'. ⁴⁹ Na' yebałe' gose'e bena':

—Cuezcho, yeš še güide Elíasen' yosle'ne'.

⁵⁰ Nach da' yoble Jesúsen' bosye'e zižje na' gote'.

⁵¹ Na' ca hora' lache' da' ze lo' yodao' blaon' bcheza' gacholen gwza'te yičhjen bžinte che'ełe. Na' gwxo'chgua gosoxjte yej ca'. ⁵² Na' łecze beseyaljo ba čhe beñe' ba gosat. Na' zan da' beñe' ca' gosejnilaže' Diosen' besyebane' ladjo beñe' guat ca'. ⁵³ Nach caten' ba beban Jesúsen' ladjo beñe' guat ca', besyechoje' lo' ba čhegaquen' na' jaya'aque' jasele'elagüe' ciuda Jerusalén. Na' zan beñe' besele'ede' legaque'.

⁵⁴ Na' ca nac xan soldadw ca' na' beñe' ca' nče'e, beñe' nita' chesape' Jesúsen', cate' besele'ede' can' gwxo' na' bichle da' ca' goc, besježbchgüe', na' gosene':

—Da' li le beng a goc dogualje Xi'ih Dios.

⁵⁵ Na' łecze nita' zan no'ole ladjo beñe' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesacłene' le' len bi da' chyažjde'. ⁵⁶ Na' len no'ol ca' María beñe' Magdala, na' łecze María ben' nac xna' Jacobo na' José, na' łecze ca' xna' Jacobo na' Juan, xi'ih Zebedeo.

Bosocuaše' Jesúsen'

(Mr. 15:42-47; Lc. 23:50-56; Jn. 19:38-42)

⁵⁷ Na' gwzoa to beñe' gwñi'a beñe' ciuda Arimatea le' José na' ba gwzolao chzenague' čhe Jesúsen'. Na' cate' ba chxo a gwbiž ⁵⁸ Josén' gwyeje' lao Pilaton' jaynabe' cuerp čhe Jesúsen'. Na' Pilaton' bene' mandadw bosyonežjue'ne' cuerp čhen'. ⁵⁹ Nach Josén' bego'o lo ne'e cuerp čhe Jesúsen' na' blaže'ne' to lache' xen da' ny-ach. ⁶⁰ Na' gwlo'e cuerp čhen' to lo' bloj cobe čhe' da' gwče'ene' le'e yej. Na' blol'e' to yej xen cho'a blojen' cont bseyjon len. Nach beze'e. ⁶¹ Na' María beñe' yež Magdalan' na' yeto María yoble jasechi'e cho'a blojen'.

Bosozoe' beñe' chesape' gan' jasecuaše' Jesúsen'

⁶² Na' beteyo, gwde žan' caten' chososiñi'e par ža čhe Diosen', besedobe bxož gwnabia' ca' na' beñe' fariseo ca' na' ja'aque' gan' zoa Pilaton'. ⁶³ Na' gose'ene':

—Beñe', ba jaysalaže'to' can' gwna da' beñe' gwxiyen' cate' ñe' mbane', gwne': "Yeyon ža yebana' ladjo beñe' guat ca'." ⁶⁴ Da'n an' gwseł'ašca beñe'

šjasedape' cho'a blojen' gan' jasecuaše'nen' cont bi šja'ac beñe' ca' gosaque' Jesúsen' txen šeže'le šjasyeleje' cuerp čhen' na' yese'e beñe' le bebane' ladjo beñe' guat ca'. Łe še yesaque beñe' ba bebane' ladjo beñe' guat ca', gonchen malech clal ca len diža' dan' gwdisse' gwne' Diosen' gwsełe' le'.

⁶⁵ Nach Pilaton' gože' beñe' ca':

—Goña' le'e soldadw ca'. Łe čhe'e cont yesape' ga ze-lao yesezoede'.

⁶⁶ Nach ja'aque' len soldadw ca' na' bosociše' sey le'e yej dan' da' cho'a blojen', na' bosonite' soldadw ca' gosapen'.

Jesúsen' bebane' ladjo beñe' guat ca'

(Mr. 16:1-8; Lc. 24:1-12; Jn. 20:1-10)

28 Na' cate' beyečj ža čhe Dios, bał dmigw María beñe' Magdala len María ben' yeto ja'aque' jaseñe'e gan' bosocuaše' Jesúsen'. ² Na' leca gwxo', le angl čhe Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. ³ Na' anglen' leca chactit cho'alagüen' cacze ga chep yes na' xalanan' naquen šiš xila' juisyw ca nac beye'. ⁴ Na' cate' besele'e beñe' gop ca' le', leca gosexize' besezebe' na' gosebixe' gosatte' šlat. ⁵ Perw na' anglen' gože' no'ol ca':

—Bitw žeble. Neda' nežda' Jesúsen' ben' bosode'e le'e yag cruz nan' cheyiljwle. ⁶ Nono de nga. Ba bebane' ladjo beñe' guat ca', can' gwnacze'. Na' le da, le ña' latje nga gan' gosegüe'e cuerp čhen'. ⁷ Bedao' le šjaya'ac le šjaydixjue'e beñe' ca' zjanaque' Jesúsen' txen ye'gaclene' ba bebane' ladjo beñe' guat ca'. Na' ye'gaclene' gwyobech Jesúsen' yežine' Galilean' clal ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acsese' zjasyedixjue'ede' beñe' ca' zjanaque' Jesúsen' txen can' goca'. ⁹ Na' šlac zjaya'aque' besyežague' Jesúsen' chanež. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ñi'e tantw besyebede', na' gosonxene' le'. ¹⁰ Jesúsen' gože' legaque':

—Bitw žeble. Łe šjaydixjue'e beñe' lježcho ca', cheyał'a šjaya'aque' Galilean' cont yesele'ede' neda'.

Beñe' gop ca' jasyedixjue'ede' bxož ca' can' ba goca'

¹¹ Na' šlac zjaya'ac no'ol ca' ciudan', bał soldadw ca' beñe' ca' gosape' gan' bosocuaše' Jesúsen' jaya'aque' ciudan' jasyedixjue'ede' bxož gwnabia' ca' doxen can' ba goquen'. ¹² Nach besedobe bxož gwnabia' ca' len beñe' gole blao ca' chesenabia' nación čhechon' na' bosoxi'e nac yesone' ca nac dan' gose' soldadw ca' le-gaque'. Na' bosonežjue' soldadw ca' da' zča'o mechw. ¹³ Gose' le' legaque':

—Še no ñabe le'e bin' goquen', na' ye'gaclene' šeže'le šlac chtasle beñe' ca' gosaque' le' txen besyebaje' cuerp čhen' lo' blojen' na' besyeyo'en ga yoble. ¹⁴ Na'

še gubernadoren' yende' diža' quinga, neto' šjašaljlen-
to'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue'
legaquen', nach gosone' con can' gose'e legaque'. Na'
ža ņa'aža yogo' can' gosena soldadw ca' ņe' chesene'
doxen gan' nita' beņe' Israel gualaž chechon'.

Jesúsen' gože' legaque' yeso'e xtiže'na' yogo' nación
(Mr. 16:14-18; Lc. 24:36-49; Jn. 20:19-23)

¹⁶ Nach beņe' ca' zjanaque' Jesúsen' txen, beņe' ca'
šnej, jaya'aque' Galilean' cont jasyešague' Jesúsen' to
lo ya'a gan' gože' legaque' yesyežague'. ¹⁷ Na' cate' be-
sele'ede' Jesúsen' gosonxene'ne'. Perw bia'cze to

chope' gosacžejlaže' še le'na'. ¹⁸ Nach gwbiga' Jesúsen'
gan' nite'na' na' gože' legaque':

—Ba ben Diosen' lo na' doxen yeļa' chnabian' dan' de
yaban' na' yežlion'. ¹⁹ Da'nan' le šja'ac le šjased le šja-
lo'e beņe' ca' že' yogo'lo| nación cont yesejnilaže' ne-
da'. Na' le gwzoe' nis cont yosolo'e le chesejnilaže' Xa-
cho Diosen', na' chesejnilaže' neda' naca' dogualje
Xi'iņe', na' lencze Spiritw che'na'. ²⁰ Na' gwsed gw-
lo'elne' cont yesone' yogo'lo| dan' ba bena' mandadw
gonle. Neda' zoacza' len le'e yogo' ža, na' ca'cze ņe'
soa' len le'e cate'ch te che yežlion'. Da' na'zen' chzoja'
ņa'a.

San Marcos

Juan ben' bzoa beṇe' nis gwdixjue'ede' diža' güen çe
Diosen' latje daš

(Mt. 3:1-12; Lc. 3:1-9, 15-17; Jn. 1:19-28)

1 Qui goc cate' gwxe xtiža' Jesucristo ben' nac dogualje Xi'ın Dios.
² Da' Isaías ben' be' xtiža' Diosen' canı' bzoje' da' nga, žan:
 Chsela' to beṇe' cuialagüe' laoguoŋ' güe'e xtižon', cont ba zjanita' beṇe' yosozenague' čhio' cate' šejo'.
³ Beṇa' chne' zižje latje dašen' že':
 "Le gonšagüe' yichjlažda'olen' cont gwzenagle çe Xančon' cate' yide';
 le cuejyichj da' malen' chonle cont yichjlažda'olen' gaquen ca to nez da' ba gosonšagüe'."
⁴ Ca' goquen', Juan ben' chzoa beṇe' nis bžine' latje dašen' na' gože' beṇe' ca' besežag na' cheyala' yesyetingjde' xtoła'gaque' na' yesezoe' nis cont ɳitlao xtoła'gaque'.
⁵ Zan beṇe' za'ac do distritw Judea na' ciuda Jerusalén bosozenague' çe diža' dan' chyixjue'ede'. Na' cate' gosexoadole' bi da' xinj zjanone', Juanna' bzoje' legaque' nis lo' yegw Jordán.
⁶ Xalana' Juanna' goquen de yiša' xa camello na' da' bčhej isine' goquen de yid, na' gwdagüe' biše'zo len ši-na' beser yixe'.
⁷ Na' gwdixjue'ede' beṇe' xtiža' Diosen', gwne':
 —Coža' na' za' za' to beṇe' zaca'che' ca neda', na' da' nacchgüe' beṇe' zaca', bi zaca' gona' xmandadoe' lech-ja' no xele'.
⁸ Neda' ba bzoa' le'e nis, perw ben' za' zan' gone' cont soa Spiritw çe Diosen' lo' yichjlažda'olen' nabian' xbab çehe.

Jesúsen' gwzoe' nis

(Mt. 3:13-17; Lc. 3:21-22)

⁹ Ca tiempa' Jesúsen' gwze'e lagüe yež Nazaret da' chi' ga mbane distritw Galilea, na' Juanna' bzoje' le' nis lo' yegw Jordán.
¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa Diosen', na' Spiritw çe Diosen' betjen jasoan len le', na' ca hora' Spiriton' naquen ca nac ngolbex.
¹¹ Na' gosende' gwṇe Dios ben' zoa yaba gwne':
 —Len' naco' Xi'ına' beṇe' chacchgüeda', na' chebe chezaque'laže'chgüeda' čhio'.

Satanásen' goclažen' co'oyelan' Jesúsen' cont gone' da' mal

(Mt. 4:1-11; Lc. 4:1-13)

¹² Nach Spiritw çe Diosen' benen cont la' gwyejte Jesúsen' latje daš.
¹³ Na' gwzoe' latje dašen' čhoa ža ladjo be znia ca'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. Nach be-žoža' jasadlen angl çe Diosen' le'.

Jesúsen' gwzolao chyixjue'ede' xtiža' Diosen' distritw gan' nzi' Galilea

(Mt. 4:12-17; Lc. 4:14-15)

¹⁴ Beyož gosegüe'e Juanna' ližya, Jesúsen' beze'e beyeje' Galilea gan' jatixjue'ede' diža' güen, gwne' Diosen' ɳabi'e yichjlaždao' beṇe' ca' yosozenag çe'.

¹⁵ Jesúsen' gwne':

—Ba bžin ža cate' Diosen' ɳabi'e yichjlaždao' beṇe' yosozenagüe' çe'.
 Le yetinjje xtoła'len' na' le šejle' diža' güen çe Diosen' da' chyixjue'eda'.

Jesúsen' goxe' tap beṇe' gwxcen bel' šja'aclene' le' txen

(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' çe Galilean' cate' ble'ede' čhope beṇe' gwxcen bel, Simón na' beṇe' biše' Andrés. Na' zjanite' chosoza'le' yixjw dan' chesezende' belen' lo' nisa'.
¹⁷ Na' gož Jesúsen' legaque':

—Le šo'o len neda'. Nacle beṇe' gwxcen bel' na' chbejle belen' lo' nisen', perw ɳa'a gona' cont gaxle beṇe' yesyechoje' lo' da' malen'.

¹⁸ Nach la' bosocua'ante yixjw čhen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'ın Zebedeo na' len beṇe' biše' Juan, zjajo'e lo' barcw chesyeyonšagüe' yixjw čhegaquen'.
²⁰ Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len beṇe' ca' chesaclen le', nach ja'aque' len Jesúsen'.

To beṇe' gwo'o gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža çe Dios Jesúsen' gwo'e lo' yodao' da' zoa na' na' gwzolagüe' bsd blo'ede'.
²² Beṇe' ca' že' na' besyebande' can' bsd blo'ede', le can' bzejni'iden' nacbia' ɳezde' cayanen' nac xbab çe Diosen', gague bzejni'ide' can' chosozejni'i ben' chosolo'e ley dan' bzoj da' Moisés.

²³ Na' lo' yodaon' zoa to beṇe' yo'o nyaze' da' xigüen', na' bosye'e gwne':

²⁴ —¿Bixchen' chgoša' chlaže' chio' len neto', Jesús beṇe' Nazaret? ¿Zedežiayo'o neto'? Neda' nombi'a le' na' ṇezda' naco' beṇe' laždao' xilaže' juisyw beṇe' gwseła' Dios.

²⁵ Nach Jesús'en' gože' da' xigüen':

—¡Sšago', bechoj lo' yichjlaždao' benga!

²⁶ Na' da' xigüen' benen cont gwchoje bena', nach chosya'adiachguan bechojen lo' yichjlažda'ogüen'.

²⁷ Yogo' beṇe' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga?

¡Nacbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesús'en' bedao'nez gos gwlaļje dižan' doxen laḡüe yež ca' gan' mbane Galilea.

Jesús'en' beyone' taobi'in' che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesús'en' len Jacobo na' len Juan ja'aque' liž Simón na' Andrés. ³⁰ Na' taobi'in' che Simón'na' die' che'ede' xla; na' gose'e Jesús'en': —Benga die' che'ede'.

³¹ Nach jabiga' Jesús'en' na' beṇe' taquen' gwliše'ne'. Na' la' beyactede', nach bsiñ'e da' gose'ej gosagüe'.

Jesús'en' beyone' zan beṇe' chese'ede'

(Mt. 8:16-17; Lc. 4:40-41)

³² Cate' ba gwxa gwbižen' na' ba gwxin, jasesane' lao Jesús'en' zan beṇe' chese'ede' na' beṇe' zjajo'o zjanyaze' da' xigüen'. ³³ Na' do yež beṇe' besedop be-sežague' cho'a yo'o gan' zoa Jesús'en'. ³⁴ Na' Jesús'en' beyone' beṇe' chese'ede' gwde gwdele yižgüe' na' be-beje' zan da' xigüe' da' zjajo'o zjanyaz beṇe', perw bitw bi'e latje bi yesenan, le legaquen zjaṇezen non' nac le'.

Jesús'en' chyixjue'ede' xtiža' Diosen' Galilea

(Lc. 4:42-44)

³⁵ Šbaļ cate' ṇe' nac choljesús'en' gwyase' na' gwze'e gwyeje' ga nono nla' na' boļ giüže' Diosen'. ³⁶ Simón na' beṇe' lježe' ca' ja'aque' jasyediljue'ne'. ³⁷ Na' cate' besyeželde'ne' gose'ene':

—Yogo'ze beṇe' chesyeyiljue' le'.

³⁸ Perw Jesús'en' gože'ne':

—Le šo'o ga yoble ga nac gaļa'ze cont ļecze šjatixjue'eda' xtiža' Diosen' na', le da'nan' ba gwza'a.

³⁹ Can' goc, Jesús'en' gwde' doxen gan' mbane Galilea gwduxjue'ede' xtiža' Diosen' to to yodao' che neto' beṇe' Israel, na' bebeje' da' xigüe' da' yo'o nyaz beṇe'.

Jesús'en' beyone' to beṇe' che'ede' lepra

(Mt. 8:1-4; Lc. 5:12-16)

⁴⁰ To beṇe' che'ede' yižgüe' dan' nzi' lepra jabigue' gan' zoa Jesús'en' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesús'en' beži'ilaže'de' le' na' beṇe'ne' gwne':

—Chaclaža' yeyacdo'. Beyaque.

⁴² Cate' gwne' ca' la' bega'ate yižgüen' na' beyacde'.

⁴³ Nach Jesús'en' besele'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jaṇa' bxoza' cont le'ede' bačh beyacdo', na' bnežjw da' cheyaļa' gwnežjo' dan' non Moisés'en' mandadw cont yeyaco' xilaže' len ley che Diosen'. Ben ca' cont yogo' beṇe' yesenezde' ba beyacdo'.

⁴⁵ Perw ben' bi bchejde', yogo'ze beṇe' gože' can' go-ca'. Da'nan' Jesús'a' bich goc šeje' con ca nla'ze gate'teze yež, san con gwde' do yiže', na' bia'cze beṇe' za'ac yogo'ze yež jaseṇe'e le'.

Jesús'en' beyone' to beṇe' bi chda sļa'a ṇi'a ne'e

(Mt. 9:1-8; Lc. 5:17-26)

2 Gwde to čop ža, Jesús'en' beyeje' da' yoble yež dan' nzi' Capernaum, na' beṇe' Capernaum ca' gosenzede' bežine' to yo'o ga ba gwzoacze'. ² Na' bedao'nez besežag beṇe' zan, ṇecach gosezaque' yesenite' lo' yo'ona' ṇe cho'a yo'on, nach Jesús'en' gwduxjue'ede' xtiža' Diosen' len legaque'. ³ Nach be-sežin xonj beṇe' cont jasesane' lao Jesús'en' to beṇe' xinj beṇe' bi chda sļa'a ṇi'a ne'e; tap beṇe' zjano'ene'. ⁴ Perw bi chac yesežine' gan' zoa Jesús'en' catec chyi. Nach goseque'e tej dan' ncu'a yichj yo'on na' beseletje le' na'le to lo cam dao'. ⁵ Na' cate' Jesús'en' gocbe'ede' can' chesejnilaže'nen', gože' beṇe' güe'na': —Xi'ina', ba bezi'xena' xtoļon'.

⁶ Baļ beṇe' chosed chosolo'e ley dan' bzoj da' Moisés'en' zjachi'e na', na' gosone' xbab: ⁷ "¿Bixchen' chna benga ca'? le chon cuine' ca Dios. Nono zoa beṇe' gac yezi'xene' xtoļa' beṇačh. Toz Diosen' gac yezi'xenen'." ⁸ Perw Jesús'en' chacbe'eczedede' can' nac xbab čhegaquen', na' gože' legaque':

—¿Bixchen' chza'laže'le ca'? ⁹ Še yapa'ne': "Ba bezi'xena' xtoļo'na'", bi ṇezele še napa' yela' gwnabia' cont yezi'xena' xtoļe'na', san še yapa'ne': "Gwyas, beyoa' xcamon'", na' nacbia' še napa' yela' guac gac can' gwnian'. ¹⁰ Perw neda' naca' ben' gwseła' Dios golja' beṇačh, gwlo'eda' le'e ṇa'a zoa yežlio nga napa' yela' gwnabia' cont yezi'xena' xtoļa' beṇačh.

Nach gože' beṇe' xinja':

¹¹ —Chapa' le', beyas, beyoa' xcamon' na' beyej ližo'.

¹² La' beyaste beṇe' xinja' cheseṇa'te beṇe' ca' nita'na' na' beyoa' xcamen'. Da'nan' yogo' beṇe' ca' besyebande' na' goso'e yela' choxclen che Diosen', gosene':

—Biṇa' le'echo yela' guac dan' nac ca'.

Jesús'en' goxe' Leví cont gwyejlene'ne'

(Mt. 9:9-13; Lc. 5:27-32)

¹³ Da' yoble gwyej Jesús'en' cho'a nisdao' na' beṇe' zan besedobe' gan' zeje' na' bsed blo'ede' legaque' xtiža' Diosen'. ¹⁴ Na' Jesús'en' gwdie' latje gan' chi' Leví xi'in' Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwyejlene'ne'.

¹⁵ Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan beñe' güe'chixjw na' len yebał beñe' güen da' xinj, na' len beñe' ca' zjanaque' Jesúsen' txen, le zan beñe' zja'ac zjanao' le'.
¹⁶ Perw na' beñe' ca' chososed chosolo'e ley dan' bzoj da' Moisés na' beñe' fariseo ca' cate' besele'ede' che'ej chagüe' txen len beñe' ca', gose'e beñe' ca' zjanaque' Jesúsen' txen:

—¿Nacxe'chen' ben' chsed chlo'e le'e che'ej chagwlene' txen beñe' güe'chixjw na' yebał beñe' güen da' xinj ca'?

¹⁷ Cate' Jesúsen' bende' can' gosene' na' gože' le-gaque':

—Beñe' bi chesacšene bi cheseyažjde' beñe' güen rmed. Beñe' chesacšende', legaquen' cheseyažjde' beñe' güen rmed. Gague beñe' ba zjanaque' beñe' güen len Diosen' zedeneyoeda' cont yesyetingjde' xtolen', san beñe' güen da' xinj. Legaquen' zjaza-ca'lebe' ca' beñe' cheseyažje beñe' güen rmed.

Gosenabde' Jesúsen' bix'chen' beñe' zjanaque' le' txen bi chesone' gwbas

(Mt. 9:14-17; Lc. 5:33-39)

¹⁸ To ža cate' beñe' ca' zjanaque' txen len Juanna' na' beñe' zjanaque' txen len beñe' fariseo ca' gosezoe' gwbas, bał beñe' jasa'aque' jasenabde' Jesúsen':

—Beñe' ca' zjanaque' txen len Juanna' na' beñe' ca' zjanaque' txen len beñe' fariseo ca' chesone' gwbas, na' beñe' ca' zjanaque' txen len le' bi chesone' gwbas. ¿Bix'chen'?

¹⁹ Na' Jesúsen' gože' legaque':

—¿Guaque yesezoa gwbas beñe' chaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan', bi gac yesone' gwbas. ²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len beñe' ca' zjanaque' neda' txen.

²¹ 'Nono zoa beñe' yode'e to lache'exo' na' yezoen' to lache' cobe, le lache' coben' yebeñ' cate' čhiben' na' šon' lache' golen', na' gan' žon'na' gacchen da' xen.

²² Neca zoa beñe' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Beñe' ca' zjanaque' Jesúsen' txen chesalje' dao ža čhe Dios

(Mt. 12:1-8; Lc. 6:1-5)

²³ To ža čhe Dios Jesúsen' gwdie' to ga nyaž trigw, na' beñe' ca' zjanaque' le' txen gosezolagüe' chesalje' dao čhe trigon' šlac gosodie' gan' nyažen'na'. ²⁴ Nach beñe' fariseon' gose'e le':

—Gwna'šč ¿bix'chen' cheson beñe' ca' zjanaque' le' txen žin da' bi cheyał'a' yesone' ža čhe Dios?

²⁵ Na' Jesúsen' gože' legaque':

—¿Biña' gwlable can' ben da' rey David to ža cate' le' na' beñe' lježe' ca' gosodone'? ²⁶ Gwyo'o Davin' ga nac liž Dios cate' da' Abiatar goque' bxoz blao, na'

gwdagüe' yetextil da' nac čhe Dios da' bi chac gagw beñe' bi nac bxoz, na' lecze bnežjue' čhe beñe' zja'ac len le'.

²⁷ Lecze gož Jesúsen' legaque':

—Diosen' gwleje' to ža cate' bi yeson beña'chen' žin cont gaclenen beña'č, gague gwleje' beña'chen' cont yesonxene' ža čhen'. ²⁸ Da'n'an' naquen lo' na' nia' bi da' nac güen goncho lente cate' nac ža čhe Dios, neda' naca' ben' gwseł'a' Diosen' golja' beña'č.

Jesúsen' beyone' to beñe' nxo'oñ šla'a taque'

(Mt. 12:9-14; Lc. 6:6-11)

3 Yeto ža čhe Dios Jesúsen' gwyo'e da' yoble to lo' yodao' čhe neto' beñe' Israel na' ca hora' ba chi' to beñe' nxo'oñ šla'a taque'. ² Na' beñe' ca' že' lo' yodao'na' chosogüia cheseñe'e Jesúsen' še yeyone' bena' žan' nac ža čhe Dios cont de da' yosode'ede' yesagüe' xya čhe'. ³ Nach Jesúsen' gože' ben' nxo'oñ taquen':

—Gwzoža' na' gwzecha nga.

⁴ Nach gwñabde' beñe' ca' yezica'chle:

—¿Bi da' cheyał'a' goncho ža čhe Dios? ¿Goncho da' güen, še goncho da' mal? ¿Cheyał'a' yoslacho beñe', še cheyał'a' gotchone'?

Perw na' legaque' gosenite' šižize. ⁵ Nach Jesúsen' gwñe'e legaque', bže'e can' gosone' xbab, na' lecze go-cyaše'laže'de' dan' bi gosejle'e čhe', nach gože' ben':

—Bli naon'.

Na' blien', na' taquen' beyaquen binlo. ⁶ Nach besyežaš beñe' fariseo ca' na' gosezolagüe' chosoxi'e len beñe' ca' zjada' Herodes naquen' yesone' yesote' Jesúsen'.

Zan beñe' nita' cho'a nisaon'

⁷ Nach Jesúsen' gwyeje' cho'a nisaon' len beñe' ca' zjanaque' le' txen, na' zan beñe' Galilea ja'ac len le'.

⁸ Na' zan beñe' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedeseñe'e le' cate' gosenezde' yela' guac da' chonen'. ⁹ Da'n'an' Jesúsen' gože' beñe' ca' zjanaque' le' txen yeseyiljue' to barcw dao' gan' cuie' cont bi yosoči beñe' ca' zjanžaga' le', ¹⁰ le beñe' zan ba beyone', na' beñe' ca' ñe' chese'ede' chosožiga' lježe' nac gac yesoxe'ne'. ¹¹ Na' beñe' ca' zjayo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'ñ Dios.

¹² Perw Jesúsen' gwdiłe' legaquen na' bene' mandadw bi yesenan no nac le'.

Jesúsen' gwchie' beñe' šižinw ca' gosaque' txen len le'

(Mt. 10:1-4; Lc. 6:12-16)

¹³ Beyoža' Jesúsen' gwloe' to lo' ya'a na' goxe' bał beñe' goclaze' šja'aclene' le', nach gosa'aque' ja'aque' gan' zoen'. ¹⁴ Nach gwleje' šižinw beñe' yesenita' len le', cont sełe' legaque' šjasedixjue'ede' xtižen'. ¹⁵ Na' bnežjue' legaque' yela' guac cont yesyeyone' beñe' güe' na' yela' gwnabia' cont yesyebje' da' xigüe' da'

yo'o nyaz beŋe'. ¹⁶ Šižiw beŋe' quin' gosac: Simón ben' lecze gože'ne' Pedro; ¹⁷ Jacobo len beŋe' biše' Juan beŋe' ca' zjanac xi'ij Zebedeo, na' bsi'e legaque' Boanerges, zeje diža' beŋe' zjanac ca' yi' gwzio' cate' chašiw chtinen; ¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'ij Alfeo, na' Tadeo, na' Simón ben' gwde'e beŋe' ca' zjanzi' cananista, ¹⁹ na' Judas Iscariote ben' gwdechle bdie' Jesús'en' lo' na' beŋe' ca' cheseque'ede' le'.

Gosene' Jesús'en' bebeje' da' xigüe' len yela' guac che Beelzebú

(Mt. 12:22-32; Lc. 11:14-23; 12:10)

Beyoža' Jesús'en' len beŋe' ca' zjanaque' le' txen goso'e lo' yo'o gan' zoe' ca' hora', ²⁰ na' da' yoble besežagchgua beŋe', neca goc yese'ej yesagw Jesús'en' len beŋe' ca' zjanaque' le' txen. ²¹ Na' cate' goseŋeze biše' ljež Jesús'en', ja'aque' cont yesyech'ene', le gosene' chactonte'.

²² Nach beŋe' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesús'en' na' gose'e beŋe' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz beŋe'.

²³ Nach Jesús'en' goxe' beŋe' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? ²⁴ Še to gobiern choje' čop šon cuenle na' yeyoža' yesediŋe legacze', gobiernna' bi sibi'e. ²⁵ Na' še beŋe' že' toz yo'o yesechoje' čople na' yesediŋe legacze', gague sša yesenite' txen. ²⁶ Na' še Satanás'en' len da' xigüe' čhen yesechojen čople na' yesediŋen, lecze bi sibian', san na' yeyož yedon.

²⁷ Nono gac šo'e lo' yo'o čhe to beŋe' gual na' que'e bi da' de čhe' še cbi zgua'tec gwčheje' beŋe' gual na', lete gone' ca' nach gac que'e bi da' de čhe'.

²⁸ Da' li žia' le'e, yogo' da' xiŋj da' chon beŋač na' yogo' diža' bya' da' yesene', Diosen' yezi'xene' čhen še yesyetiŋjde'. ²⁹ Perw note'teze beŋe' ne' yela' ya' čhe Spiritw čhe Dios, gwbat yezi'xen Diosen' čhe', san de doŋa' čhe' toli tocaŋe.

³⁰ Gwne' ca' dan' gosene' čhe' yo'o nyaze' da' xigüe'.

Xŋa' Jesús'en' na' beŋe' biše' gosaxe'ne'

(Mt. 12:46-50; Lc. 8:19-21)

³¹ Na' bžin xŋa' Jesús'en' len beŋe' biše', na' gosenite' chy'ole gosaxe' le'. ³² Na' beŋe' ca' zjanita' cuit Jesús'en' gosaxe'ne':

—Xŋa'o len beŋe' bišo' ca' zjanite' chy'o'o na' chesyey-iljue' le'.

³³ Nach Jesús'en' gože' legaque':

—¿Nezele non' nac xŋa'a na' no zjanac biše' lježa'?

³⁴ Nach gwŋe'e beŋe' ca' zjachi' cuite'na', na' gwne':

—Beŋe' quin' zjanac xŋa'a na' zjanaque' biše' lježa'.

³⁵ Le note'teze beŋe' chone' da' chna'laže' Dios, bena' nac beŋe' biša', beŋe' zana', lecze naque' xŋa'a.

Jempl čhe beŋe' goz trigo

(Mt. 13:1-9; Lc. 8:4-8)

4 Yeto ža yoble gwzolao Jesús'en' chsed chlo'ede' cho'a nisdaon', na' besežagchgua beŋe' zan juisyw gan' chi'ena'. Na' da' besežagchgua beŋe' zan, benten byen gwyo'o Jesús'en' to lo' barcw dao' da' chda' lo' nisdaon' cho'a yo bižen' na' gwchi'e lo'enna', na' yogo' beŋe' ca' gosenite' cho'a nisdaon' ga nac yo biž. ² Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

³ —Le gwzenag da' nga: To beŋe' güen žin jeze' trigw.

⁴ Na' šlac zeje' chose' trigon', late' biŋ čhe trigw dan' chazen' jasechazen chanez nach be ca' žia xil be chaš le'e yaba gosagwban'. ⁵ Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw. ⁶ Perw cate' bla' gwbiža' na' bzejen len na' gwbižen, le gague yo'otec loenna' sitjon'.

⁷ Yelaten' jasechazen ga nac lo yag yeše', na' yag yešen' gosecha'on na' bosolo'len' len, na' bibi gosebjan. ⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebjan, baŋen gosebjan do šichoa güeje to ton, baŋen gayon, na' yebaŋen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Bičen' bzejni'ide' beŋe' len jempl

(Mt. 13:10-17; Lc. 8:9-10)

¹⁰ Gwdena' cate' ba besyeya'ac beŋe' zan ca', beŋe' ca' zjanita' gaŋa'ze len le' na' len beŋe' šižiw ca' zjanaque' le' txen, gosenabde' le' bi zejen jempl dan' bi'en. ¹¹ Na' gože' legaque':

—Nono ŋa' neze can' nac yela' gwnabia' čhe Diosen', perw ba chone' cont le'e chejnilaže'lene' nezenen. Na' beŋe' bi chesaclaže' yesejnilaže' Diosen', choe'lengaca'ne' xtižen' len jempl. ¹² Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden', na' neca yesyetiŋjde', neca yezi'xen Diosen' xto'len'.

Jesús'en' bzejni'ide' bi zejen jempl čhe ben' ben goza'

(Mt. 13:18-23; Lc. 8:11-15)

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? ¹⁴ Ben' ben goza' naque' ca ben' choe' xtiža' Diosa'. ¹⁵ Na' baŋ beŋe' zjanaque' ca biŋ dan' beselažo' chanez, le chosozenague' cate' chas chlalle xtiža' Diosen', na' ca cheyoža' la' chžinte Satanás'en' dan' chnabia' da' xigüe' ca' na' chebejen xtiža' Diosen' dan' ba yo'o yičjlažda'ogüen'. ¹⁶ Yebaŋ beŋe' zjanaque' ca biŋ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', ¹⁷ perw šložga chesezibi'e, na' cate' chesac bi da' mal čhegaque' o bichle chesone beŋe' legaque' neče da' chosozenague' xtiža' Diosen', la' chesebejy-ičhten'. ¹⁸ Na' yebaŋe' zjanaque' ca biŋ dan' besego'onen ga nac lo yag yeše'. Chosozenague' xtiža'

Diosen', ¹⁹ na' šlac zjambane' chesyela' chesyžeje', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlaž-da'ogüen' na' da'nani' bi chesejnilaže' le' ca cheya'la'. ²⁰ Perw na' nita' ba' be'ne' chosozenague' xtiža' Diosa' na' chesejnilaže' le' do yichj do laže', be'ne' qui zjaza-ca'lebde' ca biñ dan' beselažo' lo yo šagüe'. Ba'le' zjanaque' ca biñ dan' gosebjan šichoa güeje to ton, na' yebale' ca da' ca' bexoen' gayon, o ca no da' ca' bexoen' to gayoa güeje to ton.

Jempl che yi' dan' chguala'cho (Lc. 8:16-18)

²¹ Lecze gože' legaque':
—Cate' chguala'cho to yi' zgwadosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwsenin'. ²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. ²³ Le'e žia nagle da' chene, le gwzenag xtižan'.
²⁴ Lecze gože' legaque':
—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'.
²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che biñ dan' chlan' na' chcha'on

²⁶ Lecze gwna Jesús'en':
—Yela' gwnabia' che Diosen' zaca'leben ca dan' chac cate' to be'ne' chaze' bite'teze biñ lo yo. ²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi neзде' naquen' chac.
²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheya'la' cuian. ²⁹ Na' cate' ba go' dan' chbiana' na' chja'aque' chjasyexi'en, le ba bžin cho'a gwlap.

Jempl che biñ che xomdas (Mr. 13:31-32; Lc. 13:18-19)

³⁰ Nach lecze gwna Jesús'en':
—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch be'ne' yosozenag che' cont nabi'e yichjlažda'ogaque'.
³¹ Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'.
³² Perw cate' bač nyažen, chcha'on na' chaquen da' xench lao yixe' cuan ca', na' da' xenchgua chac xol che xozenna', na' lente byiñ dao' ca' chesyezi'laže'ba' lo xozenna'.

Jesús'en bgone' žin jempl (Mt. 13:34-35)

³³ Can' blo'e Jesús'en' xtiža' Diosen' yogo' ni'a, bi'e zan jempl ca che ben' goza' na' che biñ ca', con ga zelao goc gosejni'ide'. ³⁴ Bitwbi bzejni'ide' legaque' sin ca

be'e jempl, nach cate' bich nita' be'ne' zan ca', bzejni'ide' be'ne' ca' zjanaque' le' txen bi zejen yogo' da' ca'.

Jesús'en' bebecžie' be' bdono' len nisdao' (Mt. 8:23-27; Lc. 8:22-25)

³⁵ Lecze lo žana' cate' gwxin, Jesús'en' gože' be'ne' ca' zjanaque' le' txen:
—Le šo'o laga'cho yeš'la'a nisdaon'.
³⁶ Nach bosyocua'ane' yezica'chle be'ne' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesús'en'. Na' yeba' be'ne' lecze ja'aclene' legaque' len yeto chop barcw dao'. ³⁷ Na' gwzolao gwyečjchgua to be' bdono' na' nisdaon' leze chas chatan', na' gwzolao cheyož nis lo' barcon'. ³⁸ Jesús'en' ba chtase' xante barcon' to lo xcogue' caten' goc ca'. Na' bosyosbane' le' gose'ene':
—iMaestro! žBibi de chza'lažon' še ba gwdebe nisdaon' chio'?
³⁹ Nach gwyas Jesús'en' na' gwdi'le' be' bdonon' na' gože' nisdaon':
—iŠižize! iŠižize!
Na' bebe'ži be' bdonon' na' beyata'ži nisdaon'.
⁴⁰ Nach Jesús'en' gože' be'ne' ca' zjanaque' le' txen:
—žBixčen' chžebtecle? žNacxečen' bi chejle'le chia'?
⁴¹ Legaque' besežebchgüe' na' gose' lježe':
—žNoxe benga? lente be' bdono' na' len nisdaon' chosozenaguen che da' že'.

Be'ne' Gadara yo'o nyaze' da' xigüe' (Mt. 8:28-34; Lc. 8:26-39)

5 Besežine' šla'a nisdaon' gan' mbane Gadara, ² na' cate' bechoj Jesús'en' lo' barcon' to be'ne' yo'o nyaz da' xigüen' bchoje' lo' capsantw na' jašague' le'. ³ Bena' ba zoacze' capsantw na'le na' nono chzoe goxe' le', ne len gden ca gosezoede' le'. ⁴ Da' zan ni'a bosocheje' ni'a ne'e gden, perw bia'cze gwchoguen', con bzojx bti-nen', na' nono gwzoe le'. ⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. ⁶ Na' cate' ble'ede' Jesús'en' zito' gwyejsese' jazoa xibe' lagüen', ⁷ na' da' xigüen' benen cont bosya'adie' gože' le':
—žBixčen' chgoša' chlaže' chio' len neda', Jesús? Naco' dogualje Xi'iq Dios be'ne' nape la'zelagüe yela' chnabia' xen. Neče Dios chneyoeda' le' bi gwsaco' neda'.
⁸ Da' xigüen' benen cont gwna ben' ca' dan' gož Jesús'en' len:
—Da' xigüe', bsan benga.
⁹ Na' gwñabe Jesús'en' len:
—žBi lio'?
Na' boži'in xtižen':
—Legión lia', le nac zanto'.
¹⁰ Na' goseneyoen Jesús'a' bi yeselen' zito' cate' yesyežašen' yichjlaždao' ben'. ¹¹ Na' ga'la'ze lo ya'ana' chesaš zan coš chesagwba'. ¹² Nach da' xigüen' goseneyoen le':

—Gwseļa' neto' gan' nita' coš ca' na' beŋ latje šjajo'oto' lo' yichjlažda'oban'.

¹³ Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do čhop mil cošen'. Na' besyeyetjjes coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

¹⁴ Nach beŋe' ca' chosoyoe' cošen' bosyoxonje' jasyeyeže' beŋe' lagüe yež len beŋe' chaš yixe' can' go-ca'. Na' ja'ac beŋe' jaseŋe'e bixen' goc. ¹⁵ Cate' be-sežine' gan' zoa Jesúsen' beše'ede' ben' ba gwyo'o gwyaz da' xigüen', na' ŋa'a ba chi'e nyaz xałane' na' ba bezoa yichjlažda'ogüen' binlo. Na' bešežebe'. ¹⁶ Na' beŋe' ca' beše'ede' can' goquen' goso'e diža' čhe dan' goc len ben' gwyo'o gwyaz da' xigüen', lez ca' dan' goc len coš ca'. ¹⁷ Nach gosezolagüe' gosata'yoede' Jesúsen' yeze'e lažgaquen'.

¹⁸ Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'.

¹⁹ Perw Jesúsen' bi be'e latje, san gože' le':

—Beyej ližo' na' jayež beŋe' lo' yo'o čhio' na' no beŋe' migw čhio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

²⁰ Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' beŋe' gosene xtižen' besyebande'.

Bi' no'ol čhe Jairo, na' no'ol ben' gwdane' xa Jesúsen'
(Mt. 9:18-26; Lc. 8:40-56)

²¹ Cate' bežin Jesúsen' cho'a nisdaon' zeze'e lo' barcw daon' dan' zeza' šla'a nisdaon', beŋe' zan ja'aque' gan' bežinen', na' Jesúsen' bega'aŋe' cho'a nisdao' na'ze.

²² Nach bžin to ben' nac beŋe' gwnabia' čhe yodao' čhe yežna', lie' Jairo. Cate' ble'ede' Jesúsen' bzoa xibe' lagüen' ²³ na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco yichjbe' cont yeyaquebe' na' bi gatbe'.

²⁴ Nach Jesúsen' gwyejlene' le'. Na' beŋe' zan ja'acch, na' bosochichgüe' le'. ²⁵ Ladjo beŋe' ca' len to no'ol che'ede', ba goc šižinw iz chzoe' gwbao'. ²⁶ Ba bžaglaochgüe' jen cuine' rmed len zan beŋe' güen rmed ca', na' ba benditje' yogo' xmechue' da' de, perw bitwbi gwxi'czen, san chyałal'en. ²⁷ Cate' bende' cheso'e xtiža' Jesúsen', no'olna' gwdie' ladjo beŋe' ca' na' bžine' cože'le' Jesúsen' na' gwdane' xen'. ²⁸ Le bene' xbab, gwne': "Con še ba gwdana' xen' nach yey-actecz'a." ²⁹ Na' da' li cate' gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' čhen'. ³⁰ Na' Jesúsen' la' gocbe'etede' to beŋe' ba beyacde' len yeļa' guac čhen', nach gwyečhje' gwŋe'e beŋe' ca' nita' cože'le, na' gwŋabde' legaque':

—¿Non' gwdan xan'?

³¹ Nach beŋe' ca' zjanaque' Jesúsen' txen gose'ene':
—Ba ble'eczedo' ca chosočhie' le', ¿bixčhen' chŋabo' non' gwdan xaon'?

³² Perw Jesúsen' chŋe'e nile na'le cont le'ede' non' gw-dan xen'. ³³ Nach no'olen' ŋezde' can' ba goc čhe' na'

do chaž chžebe' gwyeje' jazoa xibe' lagüen' na' gože'ne' yogo' da' li. ³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' čhion'.

³⁵ Ne' choe'te Jesúsen' dižan' ca' cate' bešežin beŋe' gosa'ac liž xan yodaon', na' gosi'e xa bi' no'ol daon':

—Ba got bi' čhion', ¿bixčhen' choncho' zed Maestro nga?

³⁶ Perw Jesúsen' bi bene' cuent dan' chesena beŋe' ca', na' gože' xan yodaon':

—Bitw žebo', con gwyejle' chia'.

³⁷ Na' bi bi'e latje šja'aclen beŋe' zan le' gan' xoa bi' no'olen', san Pedro, Jacobo na' Juan beŋe' biše' Jacobo, beŋe' ca'ze ja'aclen le'. ³⁸ Na' cate' bešežine' liž xan yo-daon', ble'ede' ba chi' žaš chesosye'e chesebeže'.

³⁹ Nach gwyo'e na' gože' legaque':

—¿Bixčhen' mbecl'e žaš chbežle? Bi no'ol daon' biŋa' gatbe', san chtasben'.

⁴⁰ Perw bosoxiže' gosonle' čhe'. Nach Jesúsen' bešaše' yogo'lole', na' gwčhe'e xaxŋa'be' na' beŋe' ca' zja'aclen le' na'ze na' goso'e len le' gan' de bi' no'ol daon'. ⁴¹ Na' beŋue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izegueben'. Na' beŋe' ca' beše'le' leca besyežejde' can' goca'. ⁴³ Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

Jesúsen' bežine' distritw gan' chi' yež Nazaret
(Mt. 13:53-58; Lc. 4:16-30)

6 Na' beza' Jesúsen' na' bežine' laže', na' beŋe' ca' zjanaque' le' txen ja'aclene' le'. ² Na' cate' bžin ža čhe Dios, Jesúsen' gwzolagüe' bsed blo'ede' lo' yodaon'. Na' beŋe' zan beŋe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yeļa' sinan' ŋezde'? na' ¿nacxečhen' chac chone' yeļa' guac ca'?

³ Benga chonšagüe' yag na' naque' xi'in' María. Nom-bia'chwne' na' beŋe' biše' Jacobo, José, Judas na' Simón, na' lecze beŋe' zane' ca' nite' lažcho nga.

Na' da' zjanombi'ene' nan' bi gosacłaze' yesejle'e čhe'. ⁴ Nach Jesúsen' gože' legaque':

—Yogo'ze beŋe' chesonxene' beŋe' choe' xtiža' Diosen', perw beŋe' gualaž čhe', beŋe' biše' lježe' na' beŋe' lo' yo'o čhe' bi chosozenague' čhe'.

⁵ Na' ne to yeļa' guac ca goc gone' na', lete gwxxoa taquen' yichj to čhop beŋe' güe' na' beyone' legaque'.

⁶ Na' bebande' dan' bi gosejle' beŋe' čhe'. Na' gwdech-le gwda Jesúsen' bsed blo'ede' to to yež dao' ca' nita' gala'ze.

Jesúsen' gwsele' beŋe' ca' zjanaque' le' txen jasedixjue'ede' xtiža' Diosen'
(Mt. 10:5-15; Lc. 9:1-6)

⁷ Na' goxe' beŋe' šižinw ca' na' gwsele' čhop güeje' to to yež, na' bnežjue'ne' yeļa' gwnabia' cont goc besye-

beje' da' xigüe' lo' yichjlaždao' beñe'.⁸ Na' cate' za' yesa'aque' gože' legaque' bibi yesoxe' chanez, ñe bzod, ñe yetextil, ñe mechw, con yesoxe' to xis da' yosochiše'.⁹ Na' yosoleje' yel perw bi yesoe' yeto xcamise'.¹⁰ Na' lecze gože' legaque':

—Cate' žinle to liž beñe', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'.

¹¹ Na' še zoa ga bi yosolebe' le'e ñeca yosozenague' çhele, cate' yeza'le na' le cuibe ñi'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw beñe' ca' bi yosolebe' le'e yesacche' castigw clal ca beñe' Sodoma na' beñe' Gomorra.

¹² Nach gosa'aque', na' goseyixjue'ede' cheyała' yesyetiñje xtoła' beñaçhen'.¹³ Leze besyebeje' da' xigüe' da' yo'o nyaz beñe', na' zan beñe' güe' goseyebe'ne' set na' besyeyacde'.

Gosote' Juan ben' bzoe' beñe' nis

(Mt. 14:1-12; Lc. 9:7-9)

¹⁴ Na' ca nac rey Herodes, gwñezde' can' chesone', le yogo'ze beñe' gosende' can' ben Jesús'en'. Na' Herodesen' gwne':

—Juan ben' bzoe' beñe' nisen' ba beban ladjo beñe' guat ca'. Da'nana' chaque' chone' yeła' guac.

¹⁵ Yebałe beñe' gosene':

—Naque' ben' be' xtiža' Diosen' cani', ben' le Elías. Na' yebałe' gosene':

—Naque' con to beñe' choe' xtiža' Dios ca beñe' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwçhogbi'an goseçhogue' yene', na' ña'a ba bebane' ladjo beñe' guaten'.

¹⁷ Le Herodesen' beque'e Herodías na' gwzoalene' le' goque' xo'ole' la'czła' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen' no'ol çhe beñe' bišon'.

Da'nana' Herodesen' gwçhogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' go-claže' gote'ne', perw bi goc.²⁰ Le Herodesen' gwñezde' Juanna' naque' to beñe' chon da' zej to liçha na' to beñe' yo'o lo' na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czła' bi gwyejni'iteque Herodesen' dan' bšalj Juanna', con bebede' bzenague' çhe'.²¹ Perw Herodíasen' bey-iljwlaže' nac bene' cate' ben Herodesen' lni goła' ža le', bsiñi'e xše' da' gwdagüe' len beñe' gwnabia' çhe' ca' na' no xan soldadw ca' na' nochle beñe' blao že' distritw Galilean'.²² Bi' no'ol çhe Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwñabe neda' con da' žan çhio' na' goñan'.

²³ Na' lecze gože'be':

—Diosen' naque' testigw çhia' goña' le' con da' ñabdo'nda', la' gašjo yež ca' gan' mbanda' chnabi'a.

²⁴ Na' bechojbe' na' gožbe' xña'ben':

—¿Bi ñabda'ne'?

Na' le' gože'be':

—Gwñab yichj Juan ben' chzoe' beñe' nis.

²⁵ Na' la' beyo'otebe' gan' chi' reyna' na' gožbe'ne':

—Che'nda' ñetecña'a goño' neda' to lo' platw yichj Juan ben' chzoa beñe' nis.

²⁶ Na' ñe late'ze bi gwyazlaže' reyna' gone' can' gož no'ol güegon' le', perw baçhle gwne' lao beñe' ca' jasa'ac lñin' Diosen' naque' testigw çhe' gwnežjue'be' bite'teze ñabebe' le', da'nana' bi bžone' gac dan' gwñabebe' le'.²⁷ Nach la' gwseła'te reyna' to soldadw na' gože'ne' šjaxi'e yichj Juanna'.²⁸ Na' gwyej soldadon' lo' yo'o ližyan' na' jaçhogue' yen Juanna', na' bžie' yichje' to lo' platw jasanen' bnežjue' bi' no'ola', na' bi' nga bnežjwben' xña'be'.

²⁹ Cate' goseñeze beñe' ca' zjanaque' txen len Juanna', jasexi'e cuerp çhen' cont bosocuaše'ne'.

Jesúsen' bguagüe' gayo' mil beñe'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesús'en' na' gose'ene' bica' da' ba gosone' na' da' ba bosolo'ede'.

³¹ Na' Jesús'en' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac beñe', ñeca chac latje yesagüe'.³² Nach Jesús'en' len postlw çhe' ca' gosa'aque' ja'aque' legacze' to lo' barcw, ja'aque' ga nac lchojiže'.³³ Perw zan beñe' besele'ede' gosa'aque' na' besyeyombi'e Jesús'en', na' zan yež beñe' ca' bosox-onjsese' na' byobch besežine' ca Jesús'en'.³⁴ Na' cate' Jesús'en' bchoje' lo' barcon' ble'ede' ba besežag beñe' zan na' beyaše' beži'ilaže'de' legaque', le nite' ca' nita' no xila' be nono de gwyoeba'. Nach gwzolaogüe' bsed blo'ede' legaque'.³⁵ Cate' ba zoa xin, beñe' ca' zjanaque' le' txen gose'ene':

—Ba zoa xin, na' latj gan' zoacho nga naquen latj daš.³⁶ Na' besela' beñe' quinga cont šja'aque' ga že' beñe' do ranšw na' do yež dao' ca' dan' nyeçhj mbi'i šjasexi'e da' yesagüe', le bibi de yesagüe'.

³⁷ Na' Jesús'en' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' çhe çhop gayoa ža žin cont šjaxi'to' da' güe'to' legaque' yesagüe'.

³⁸ Jesús'en' gože'ne':

—¿Gaca' yetextilen' de çhele? Le šja'ac le šjana'.

Cate' goseñezde' na' gose'ene':

—De gayo' yetextil na' yeçhop bel ya'a.

³⁹ Nach gože' beñe' ca' yesebi'e to xonj güeje' lo yixyen'.⁴⁰ Na' gosebe' to gayoa güeje' na' yebałe' šiyon güeje'.⁴¹ Nach Jesús'en' gwxi'e yetextil ca' gayo' na' bel ya'an çhope, na' gwñe'le' le'e yaba bi'e yeła' choçclen çhe Dios na' bzoxje' yetextilen' bi'en beñe' ca' zjanaque' le' txen cont goseyisen' len beñe' ca'. Leze gwdisel' bel ya'a ca' çhop lao yogo'lo' beñe' ca'.⁴² Na' yogüe' gosagüen' na' goseljde'.⁴³ Beyoža' bososše'e yešičiñw žome yetextil bixjw na' len late' güeje' bel da'

bega'an. ⁴⁴ Na' beṇe' ca' gosagw yetextilen' gosaque' gayo' mil beṇe' byo, bi cuent no'ol ca' len bidao'.

Jesúsen' gwze'e lo nis
(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o beṇe' ca' zjanaque' le' txen lo' barcon' cont yesyela'gaze' nisdaon' na' yesežine' Betsaida, šlac le' za' chesele' beṇe' ca' žena' ližgaque'. ⁴⁶ Na' cate' beyož bzede' beṇe' ca' diža', gwyeye' lo ya'an boł güiže' Dios. ⁴⁷ Na' ca' nac barcon', cate' goc choł ba zejen gachoł nisdaon', na' toze Jesúsen' ṇe' zie' ga nac yo biž. ⁴⁸ Na' ble'ede' bi chac yosyose'en binlo, le ben' chečjen clele na' bi choen' latje sa' barcon'. Na' šbał beyetj Jesúsen' ya'ana' na' gwze'e lo nisen' ba zej gałe' gan' zja'aquen', na' ba zoa teze' gan' zjaya'aquen' ⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e. ⁵⁰ Le yogüe' besele'ede'ne' na' besežebe'. Perw le' la' boł güižte' legaque', gože'ne':

—Le gončhač laže'le; nedan', bitw žeble.

⁵¹ Nach gwyo'e lo' barcw gan' zjaya'ac beṇe' ca', nach gwche'ži ben'. Na' legaque' leca besyebande' na' besyežejde', ⁵² le bi gosejni'ide' dan' bene' yela' guac len yetextil ca', na' biṇa' yesejnilaže' le'.

Jesúsen' beyone' beṇe' güe' ca' že' Genesaret
(Mt. 14:34-36)

⁵³ Na' gosełague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'. ⁵⁴ Na' cate' beyož besyechoje' lo' barcon' beṇe' ca' la' besyeyombia'te' Jesúsen'. ⁵⁵ Na' ja'acsesse' doxen gan' mbane Genesaret, na' do lo cam dao' zjanxoe' beṇe' güe' ca' jasesane'ne' gan' zjaṇezde' zoa Jesúsen'. ⁵⁶ Na' gate'teze gwyej Jesúsen', do yiže', do yež, con goseyixjue' beṇe' güe' ca' do chanez na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' beṇe' gosoxen' besyeyacde'.

Dan' chchoj lo' laždao' beṇačhen' chonen cont laždagüen' bi naquen xilaže' len Diosen'
(Mt. 15:1-20)

7 Nach beṇe' fariseo ca' na' len beṇe' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsen'. ² Na' besele'ede' bał beṇe' ca' zjanaque' Jesúsen' txen con gosagüe' ṇeca bosyone'e zan ṇi'a can' chesacde' cheyała' yesone', na' da'nan' gosezi'diže' legaque'. ³ (Le beṇe' fariseo ca' na' yogo' beṇe' Israel gualaž čheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biṇa' yosyone'e zan ṇi'a. ⁴ Na' cate' yesyēžine' lagüe ya'a, bi yesagüe' še biṇa' yosyone'e, na' da' zanch costumbr da' zjana'ogüe', ca no yesyibe' xiga' ga chese'eje' nis, no yeso' xguague, no yeso' ya na' no xcame'.) ⁵ Nach beṇe' fariseo ca' na' beṇe' ca' bososed bosolo'ede' dan' bzoj da' Moisésen' gosenabde' le':

—¿Bixčhen' bi cheson beṇe' ca' zjanaque' le' txen can' goson beṇe' gol ca'? san con chesagüe' sin cbi chosyone'e zan ṇi'a.

⁶ Jesúsen' gože' legaque':

—Chonle cayanen' bzoj da' Isaíasen' che le'e nacle beṇe' gwxiye' gan' bzoje', žan':

Beṇe' qui chesonxene' neda' len diža' cho'a, perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' beṇačze.

⁸ Bi chonle ca chnalaže' Dios, san na'ole can' ža beṇačhen' cheyała' gonle, chyible no yeso' xguague, no xiga' ga che'eje' nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che beṇač. ¹⁰ Da' Moisésen' gwne': "Le gap bala'an xaxṇa'le", na' "Note'teze' še chžia chnite' xaxṇe'e, cheyała' gate'." ¹¹ Perw le'e žale to beṇe' guac ye'e xaxṇe'e: "Bibi de goṇa' gaclena' le'e, le yogo' da' de čhia' naquen Corbán" (zeje diža', ba bnežjuen' lo na' Dios). ¹² Na' žale cate' to beṇe' že' ba naquen lo na' Diosen' nach bich cheyała' gaclen xaxṇe'e. ¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' beṇe' ca', na' gože' legaque':

—Yogo'le le gwzenag čhia', na' le šejni'i. ¹⁵ Bite'teze da' ye'ej gagw beṇačhen', bi načo len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenṇa' chonen cont lažda'ogüe' bi naquen xilaže' len Diosen'. ¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšaljlene' beṇe' ca' na' be-yo'e lo' yo'o, nach beṇe' ca' zjanaque' le' txen gosenabde' le' bi zejen dan' gože' legaque'. ¹⁸ Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beṇačhen' chonen cont lažda'ogüe' bi naquen xilaže' len Diosen'? ¹⁹ Le da' che'ej chagw beṇačhen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw naczen xilaže'. ²⁰ Na' lecze gwne':

—Xbab da' yo'o lo' yichjlaždao' beṇačhen', lenṇa' chonen cont lažda'ogaque' bi zjanaquen xilaže' len Diosen'. ²¹ Le lo' yichjlaždao' beṇačhen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o beṇe' byo bi nac beṇe' čhegaque', gwzoa xtogaque', yesote' beṇe', ²² yesone' gwban, yesezelaže' gata' čhegaque' da' de che beṇe' yoble, yesone' da' mal, yeseziye'e beṇe', yesone' bichle da' nac da' yela' zto', yesacxi'ede' beṇe', yeseneye'e che beṇe', yesaque' beṇe' ya'laže', yesone' xbab da' bi zaca'. ²³ Yogo' da' mal qui chesechojen lo' laždao' beṇač na' chonen cont bi nac lažda'ogaque' xilaže' len Diosen'.

To no'ol zito' gwyejnilaže' Jesúsén'
(Mt. 15:21-28)

²⁴ Na' beza' Jesúsén' na' gwyeje' distritw gan' mbane ciuda Tiro na' ciuda Sidón. Na' gwyo'e to lo' yo'o na' go-claže' nono neze, perw bi goc gone' cont bi gosenezde'. ²⁵ Cate la' gwnezetete xna' to bi' no'ole bi' yo'o nyazbe' da' xigüen', na' gwyeje' na' bzoa xibe' xni'a Jesúsén'. ²⁶ No'olen' goque' bene' zito', no'ole Siro-fenicia. Gwyeje' gwñabde' Jesúsén' yebeje' da' xigüe' yo'o nyaz bi' no'ol chen'. ²⁷ Na' Jesúsén' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjue' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze gua que gagw beco' be chi' xan mes bla'a da' chlažo' lo yo.

²⁹ Nach Jesúsén' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

Jesúsén' beyone' to bene' cuež, bene' lecze bi goc nie'

³¹ Jesúsén' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. ³² Na' jasesane' to bene' byo bene' cuež na' bi goc nie', na' gosenabe' xoa na' Jesúsén' yichje'. ³³ Nach Jesúsén' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. ³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwnie' binlo. ³⁶ Na' Jesúsén' gože' bene' ca' nono yes'e ca', perw la'czla' gože' le-gaque' ca', nachle goso'e diža' can' goca'. ³⁷ Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

Jesúsén' cho'e da' chagw tap mil bene'
(Mt. 15:32-39)

8 Ca tiempa' besežagchgua bene' zan na' bibi de yesagüe'. Nach Jesúsén' goxe' bene' ca' gwleje' cont zjanaque' txen len le' na' gože' legaque':

² —Cheyaše'da' bene' qui, le ba goc šone ža zjanite' nga len neda' na' bibi de yesagüe'. ³ Še yesela'ne' liž-gaque' na' biña' yesagüe', chanez yesego'one' yesecho'le', le bale' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsén' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lo' ben' nitan' lo yo, na' gwxi'e da' gaž yetextil ca' na' be'e yela' choxclen che Dios, nach bzoaxjen' bnežjue' bene' ca' zjanaque' le' txen na' legaque' goseyisen' che yogo'lo' bene' nita' na'. ⁷ Leze zjano'e to chop bel ya'a, na' Jesúsén' be'e yela' choxclen che Diosen' che bel ya'a ca' na' leze goseyisen' che yogo'lo' bene'. ⁸ Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'añ. ⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsén' gože' legaque': —“Nayežagcho”, ¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclaže' gon Jesúsén' to yela' guac da' yesele'ede' le'e yaba
(Mt. 16:1-4; Lc. 12:54-56)

¹¹ Na' bene' fariseo ca' gosezolagüe' chesediłdiže' len Jesúsén'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenežde' še da' licze Diosa' gwsele' le'.

¹² Jesúsén' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' ne-da'? Da' li žia' le'e, bitwbi gona' da' le'ele.

¹³ Nach bcua'añe' legaque' na' beyo'e lo' barcon' beze'e beyeje' yešla'a nisdao'.

Levadura che bene' fariseo ca'
(Mt. 16:5-12)

¹⁴ Bene' ca' zjanaque' Jesúsén' txen gosanjaže' yeso'e da' yesagüe', na' totec yetextil zjano'e lo' barcon'. ¹⁵ Na' Jesúsén' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

¹⁶ Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

¹⁷ Jesúsén' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Biña' šejni'ile, neca chacbe'ele? ¿Nac chač lažda'olen' bi chejle'le? ¹⁸ ¿Bi chle'ele len yejlaole, neca chenele len nagle? ¿Bi chjayze'ele? ¹⁹ Gwdisa' gayo' yetextil na' goguen che gayo' mil bene', na' ¿bi chjayze'ele yebale žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

²⁰ —¿Chixe caten' gwdisa' gaže yetextilen' lao tap mil bene'? ¿Yebale žome gwža'te dan' botoblen'?

Na' gosene':

—Gaže žomen'.

²¹ Nach gože' legaque':

—¿Biña' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to beṇe' l̥choḷ beṇe' Betsaida

²² Gwdechle besežine' Betsaida na' jasesane' to beṇe' l̥choḷ lao Jesúsen', na' gosata'yoede' le' yeyone' le'.

²³ Na' beṇue' taca' beṇe' l̥choḷa' na' gwleje'ne' yež. Nach gwdebe' xene' yejlagüen' na' gwxoā taquen' yichje' na' gwṇabde'ne' še chle'ede' late'. ²⁴ Beṇe' l̥choḷa' gwṇe'e na' gwne':

—Chle'eda' beṇe', na' chle'eda'ne' ca yag, perw chesa'aque'.

²⁵ Nach Jesúsen' beṇoa taque' yejlagüen' da' yoble, na' gwṇa'yaṇe' ben' na' beyaque', bele'etede' yogo' binḷo. ²⁶ Nach Jesúsen' besele' le' liže', gože'ne':

—Bi yeyo'o lagüe yežen', ṇeca no yo'o da' nga.

Pedron' gwne' Jesúsen' naque' Cristo ben' gwlej Diosen' cont ṇabi'e

(Mt. 16:13-20; Lc. 9:18-21)

²⁷ Gwdena' gwyej Jesúsen' len beṇe' ca' zjanaque' le' txen yež dao' ca' zjachi' do ga mbane ciuda da' nzi' Cesaarea de Filipino. Na' chanez gwṇabde' beṇe' ca' zja'aclen le':

—¿Bi chesena beṇe'? ¿Non' naca' neda'?

²⁸ Legaque' gose'ene':

—Baḷe' chesene' naco' Juan ben' bzoa beṇe' nis, yebaḷe' chesene' naco' Elías, na' yebaḷe' chesene' naco' yeto beṇe' be' xtiža' Dios cani'.

²⁹ Na' gwṇabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont ṇabi'o.

³⁰ Nach Jesúsen' gože' legaque' nono yese'e ca'.

Jesúsen' gwdixjue'ede' gate'

(Mt. 16:21-28; Lc. 9:22-27)

³¹ Na' gwzolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwseḷa' Diosen' golja' beṇaḥ. Na' beṇe' blao ca' chesenabia' nación chechon' na' b̥xoz gwnabia' ca' na' beṇe' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šoṇe ža yebana' ladjo beṇe' guat ca'.

³² Da' nga gwnen' zaca'laon. Na' Pedron' gwṇe'e Jesúsen' ga nac l̥chojiže' na' gwzologüe' chdiḷe' le' dan' gwne' ca'. ³³ Perw Jesúsen' gwyechje' na' gwṇe'e beṇe' ca' zjanaque' le' txen, na' gwdiḷe' Pedron', gože'ne':

—¡Gwcuase ca'ale Satanás! Bi nsa'o xbab che Diosen' san nsa'o xbab che beṇaḥ.

³⁴ Nach Jesúsen' goxe' beṇe' ca' zjanaque' le' txen na' yezica'chle beṇe' na' gože'ne':

—Note'teze beṇe' še chaclaže' gaque' neda' txen, cheyaḷa' chojyichj cuine', la'czḷa' saca'zi'e, na' gone' can' ṇia' neda'. ³⁵ Note'teze beṇe' chacde' gone' cont bi saca'zi'e o cont nono yesot le', benan' cuiayi', na' note'teze beṇe' chzanḷaže' cuine' saca'zi'e o gate' ṇe chia' neda' o ṇeche xtiža' Diosen', ba de yela' mban

che' toḷi tocaṇe. ³⁶ ¿Bixe zejenna' to beṇe' ṇabi'e doxen yežlion' na' cuiaye'e bi gata' yela' mban che' toḷi tocaṇe? ³⁷ Le bi zoa nacle gon beṇaḥen' chixjue' cont gata' yela' mban che' toḷi tocaṇe. ³⁸ Beṇe' ca' že' ṇa'a bi chesejnilaže' Diosen' na' chesonchgüe' da' xinj. Na' note'teze beṇe' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', ḷecze ca' neda' yeto'eda' che' par ṇia' naque' neda' txen, neda' naca' ben' gwseḷa' Dios golja' beṇaḥ. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' ṇchia' beṇe' ca' zjanac angl che'.

9 ḷecze gož Jesúsen' legaque':

—Da' li žia' le'e, baḷle nita'le nga ṇa'a biṇa' gatle cate' žin ža le'ele Diosen' gwlo'e yela' guac xen chen' can' chnabi'en'.

Bša' Jesúsen' ca goque'

(Mt. 17:1-13; Lc. 9:28-36)

² Gwde xop ža, Jesúsen' gwṇe'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca' goc Jesúsen'.

³ Xaḷane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xaḷanen'. ⁴ Na' concze besele'ede' da' Elías na' da' Moisés chosošalje' len Jesúsen'. ⁵ Nach Pedron' gože' Jesúsen':

—Maestro, ḷleca güenna' zoacho nga! Gonto' šoṇe ranšw, to chio', to che Moisés, na' yeto che Elías.

⁶ Le beṇe' ca' zja'aclen Jesúsen' besežebchgüe', na' Pedroa' bi chacbe'ede' bin' že'. ⁷ Nach gwche' to bejw gan' niten' gwyechjen legaque', na' lo' bejon' gosende' gwna Diosen':

—Bengan' Xi'ina' beṇe' chacda'; le gwzenag che'.

⁸ Na' cate' goseṇe'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca' nac dan' besele'eden'. Gože'ne':

—Cate'ch ba bebana' ladjo beṇe' guat ca', nedan' naca' ben' gwseḷa' Dios golja' beṇaḥ, cana' güe'le diža' chen.

¹⁰ Da'nan' gosezoe' šiže, nono gose'e ca', perw na' gosenabe lježe' bi zejen dan' gwne' yebane' ladjo beṇe' guat ca'. ¹¹ Nach gose'e Jesúsen':

—Beṇe' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyaḷa' yide' da' yoble cate' za' yedenabia' ben' seḷa' Diosen'. ¿Bixchen' chesene' ca'?

¹² Na' boži'e xtižen':

—Da' ḷiczen' zgua'tec Elíasna' yide' na' yeyo'e xṇeze yogo'loḷ da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwseḷa' Dios golja' beṇaḥ? Žan saca'zi'a na' beṇe' zan bi yesejnilaže' neda'. ¹³ Na' žia' le'e, Elías ba bide' na' gosonde' le' con ca' gosaclaže', can' nyoj le'e Xtiža' Diosen' žan can' cheyaḷa' gac che'.

Jesúsen' beyone' to bi' yo'o nyazbe' da' xigüe'
(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle beṇe' ca' zjanaque' Jesúsen' txen, na' besele'ede' beṇe' zan zjanita' zjanyechjde' legaque', na' len beṇe' ca' chososed chosolo'ede' dan' bzoj da' Moisés chesediłdiže' len legaque'. ¹⁵ Na' cate' beṇe' ca' besele'ede' Jesúsen', yogüe' besyežejde' na' ja'acsese' bosoguape' le' tiox. ¹⁶ Nach gwṇabde' legaque':

—¿Bin' chdiłdiža'le len beṇe' ca'?

¹⁷ Na' to beṇe' nchiṇe beṇe' ca' boži'e xtižen', gwne':
—Maestro, zedesana' bi' chia' nga, yo'o nyazbe' da' xigüe' na' benen cont bi chac ṇebe'. ¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwṇaba' lao beṇe' qui zjanaque' le' txen yesyebeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' beṇe' ca' že'na':

—¿Le'e beṇe' bi chejnilaže'! ¿Šna chyažjen soalena' le'e cont šejnilaže'le? ¿Batca' zelao ṇa'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbiṇbe' lo yo, chbiṇ chtoḷbe' na' chbia bžina' cho'abe'. ²¹ Nach Jesúsen' gwṇabde' ṇaben':

—¿Bał iz ba goc chacbe' ca'?

Na' ṇaben' gwne':

—Cate' nacbe' bida'ote gwzolao chacbe' ca'. ²² Na' zan ṇi'a da' xigüen' chzałan' lebe' lo yi' na' lo nis cont goten lebe'. Da'nan' še guac yeyono'be', beyaše'šque neto' na' beyombe'.

²³ Jesúsen' gože'ne':

—Cheyała' šejnilažo' neda', le yogo' da' chzelaže' beṇe' chesejnilaže' neda' chaquen.

²⁴ Nach ṇaben' gwne' zižje:

—¿Chejnilaža' le', goclen neda' šejnilaže'cha'!

²⁵ Na' cate' Jesúsen' ble'ede' chesežagchgua beṇe', gwdiḷe' da' xigüen' gožen':

—Da' xigüe', le' chono' cont bi' nga bi chenebe' na' bi chac ṇebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' be-ga'aṇbe' ca bi' guat, na' zan beṇe' gosene' gotben'.

²⁷ Perw Jesúsen' bexue' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, beṇe' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyała' gonle gwbas na' soatezle yoł güižle Dios.

Da' yoble Jesúsen' gwne' gate'
(Mt. 17:22-23; Lc. 9:43-45)

³⁰ Cate' besyeya'aque' na', besyedie' distritw Galilea. Na' Jesúsen' goclaže' nono yeseneze, ³¹ le chzejni'ide' beṇe' ca' zjanaque' le' txen, che'le legaque':

—Nedan' naca' ben' gwseła' Dios golja' beṇaḥ, yosodie' neda' lo na' beṇe' yesote'nda', perw yeyon ža yebana' ladjo beṇe' guat ca'.

³² Perw bi gosejni'ide' bin' gože' legaque', na' be-sežebe' yeseṇabde'ne'.

Gosedilđiže' gosene' noen' nac beṇe' blaoch
(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gwṇabde' legaque':

—¿Bixchen' chdiłdiža'le chanez'?

³⁴ Perw con gosenite' šižize, le chanezan' gosedilđiže' gosene' noen' nac beṇe' blaoch. ³⁵ Nach Jesúsen' gwchi'e na' goxe' beṇe' šižinw ca' zjanaque' le' txen, na' gože' legaque':

—Še no le'e chaclaže'le gacle beṇe' žialao, cheyała' gonle xbab bibi zaca'teclē, na' cheyała' gon cuinle ca xmos yogo' beṇe' lježle.

³⁶ Nach bexue' to bidao' na' bzeche'be' gachoł le-gaque', na' gwlene'be' na' gože' legaque':

³⁷ —Note'teze beṇe' chone' güen len to bidao' ca bi' nga neče da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwseła' neda'.

Beṇe' bi chon chio' contr, txencza' chone' chio'
(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to beṇe' cho'e lao' na' chebeje' da' xigüe' da' yo'o nyaz beṇe', na' bžonto' gone' ca', le bi chone' chio' txen.

³⁹ Na' Jesúsen' gwne':

—Bi gwžonle gone' ca', le gague' zoa to beṇe' gone' yeła' guac cho'e lan', yeyoža' ṇe' yeła' ya' chia'. ⁴⁰ Le beṇe' bi chone' chio' contr, txencza' chone' chio'.

⁴¹ Chnia' le'e to da' zejen, note'teze beṇe' gone' le'e la' to xiga'ze nis da' ye'ejle neče chejnilaže' neda' na' neče nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yeła'cho beṇe' gone' da' xinj
(Mt. 18:6-9; Lc. 17:1-2)

⁴² 'Note'teze beṇe' chon cont lažo' to beṇe' za' gwzola-güe' chejnilaže' neda' gone' da' xinj, yejni'acle yosočeje' yene' to yiše xen na' yosoza'le'ne' lo' nis-daon' clē ca da' gone' cont lažo' beṇe' yoble gone' da' xinjen'. ⁴³ Na' še yena'len' chonen cont gonle da' xinj, cheyała' cuejyichje da' malen' chonle. Yejni'a bibi na'le zoa clē ca gonle da' xinjen' len len. Na' yejni'a šjay-zoale len Diosen' tołi tocaṇe bi zoa šla'a taca'le clē ca yeyejle lo yi' gabił dan' bi cheyol chenit nya' cuerp che-len'. ⁴⁴ Na' gabiłen' neca chesat bzogan', neca cheyol

jin'. ⁴⁵ Na' še ni'alen' chonen ga gonle da' xinj, lecze cheyala' cuejyichle da' malen' chonle. Yejni'a bibi ni'alen' zoa clal ca gonle da' xinjen' len len. Na' yejni'a šjayzoale len Diosen' toli tocanē bi zoa šla'a ni'alen', clal ca yeyejle lo' yi' gabil dan' bi' cheyol chenit nya' cuerp chelen'. ⁴⁶ Na' gabilen' bzoga' ca' bi chesatba', neca cheyol yin'. ⁴⁷ Na' še yejlaolen' chonen cont gonle da' xinj, cheyala' cuejyichle da' malen' chonlen'. Yejni'a bibi yejlaolen' žia clal ca gonle da' xinjen' len len. Na' yejni'a šjayzoale len Diosen' toli tocanē zoa šla'aze yejlaole clal ca yežinle lo' yi' gabilen' žia chop la'a yejlaolen'. ⁴⁸ Ca nac gabilen', bi chesat bzogan', neca cheyol yin'.

⁴⁹ Le dan' chyi chzaca'le yežlio nga chzejni'in le'e cont bi yeyejle lo' yi' gabil. Na' da' chyi chzaca'le zaca'leben ca zede' da' cheyala' chixe' yezj yogo' ni'a cate' chjas-esane' yezj lao Diosen'. ⁵⁰ Na' zeden' naquen güen, perw še bich bi xzi' naquen, žnacxe goncho cont yeyaquen xzi' da' yoble? Na' le'e cheyala' gwyo gwche-laže'le dan' chyi chzaca'le na' cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

Jesúsen' bzejni'ide' bi cheyala' yela'acho len no'ol che-cho

(Mt. 19:1-12; Lc. 16:18)

10 Jesúsen' beze'e Capernaum na' gwejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'. ² Nach bal bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya čhol, na' gosenabde'ne' še guac to bene' yele'e len no'ol che'. ³ Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

⁴ Legaque' gosene':

—Moisésen' gwne' cate' to bene' yele'e len no'ol čhen' cheyala' čhas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'. ⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: "Bene' legaque', to bene' byo na' to no'ole." ⁷ "Da'nan' bene' byon' gwsane' xaxne'e cont soalene' no'ol čhen', ⁸ na' chope' yesaque' ca toz bene'." Na' ca' bich yesac čhope' san toze'. ⁹ Da'nan' bi cheyala' yesyele'e, le Diosen' ba bcode' legaque'.

¹⁰ Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. ¹¹ Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che bene' yoble. ¹² Na' še no'olen' chsane' bene' čhen' na' cheque'e bene' yoble, lecze toz can' nac da' xinj da' chonen'.

Jesúsen' gwñabde' Diosen' gac güen čhe bidao' ca' be-sežag

(Mt. 19:13-15; Lc. 18:15-17)

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedi'le' bene' ca' zjanče'ebe'. ¹⁴ Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' čhe Diosen' cont chnabi'e yichjlaž-da'ogaque'. ¹⁵ Da' li žia' le'e, note'teze bene' cheyala' yosozenague' čhe Diosen' ca cheson bidao' cate' chosozenagbe' čhe xaxna'be', le bene' bi yosozenague' ca', gwbat nabia' Diosen' yichjlažda'ogaque'.

¹⁶ Nach gwlene' to to bidao' ca' na' gwñabde' Diosen' gac güen čhebe', gwxo' taquen' yichjbe'.

To bene' güego' bšaljlene' Jesúsen'

(Mt. 19:16-30; Lc. 18:18-30)

¹⁷ Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. žBi cheyala' gona' cont gata' yela' mban čhia' toli tocanē?

¹⁸ Jesúsen' gože'ne':

—žBixčhen' žo' naca' bene' güen? Toze bene' güen zoa, na' len' Dios. ¹⁹ Le' neždo' da' none' mandadw goncho: "Bi gata'lenle no'ol bi nac no'ol čhele o bene' byo bene' bi nac bene' čhele; nono gotle; bi cuanle; bi güe'le diža' güenlaže' čhe bene' lježle; bi siye'le bene'; le gap bala'añ xaxna'le."

²⁰ Na' boži'e xtižen':

—Maestro, yogo' da' quinga chzenaga', gwzolagua' chonczan' cate' ne' nactia' bidao'.

²¹ Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de čhio' na' da' le'edo' čhen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' čhio'. Na' še ba beyož beno' can' žia' le', nach yo'o gaco' neda' txen la' saca'zi'o.

²² Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le bene' gwñi'achgua goque'.

²³ Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwñi'a gwzenague' čhe Diosen' cont Diosen' nabi'e yichjlažda'ogüe'.

²⁴ Na' bene' ca' zjanaque' le' txen besyebande' can' gwnen', perw Jesúsen' gože'e legaque':

—Xi'ina', bene' chesacde' zaca'chgua yela' gwñi'a čhegaquen', leca zdebe naquen yosozenague' čhe Diosen' cont nabi'e yichjlažda'ogaque'. ²⁵ Bedao'ch te to be xen be nzi' camello to lo' nag yeše' clal ca to bene' gwñi'a gwzenague' čhe Dios cont Diosen' nabi'e yichjlažda'ogüe'.

²⁶ Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

²⁷ Jesúsén' gwñe'e legaue' na' gože'ne':

—Bibi de da' gac yeson beñačen' cont šjasyenite' len Diosen', perw Diosen' guac gonon'; le bi zoa da' ña-cho da' bi gac gon Dios.

²⁸ Nach Pedron' gože'ne':

—Neto' ba gwlejjichjto' yogo' da' de çheto' cont nacto' le' txen.

²⁹ Jesúsén' boži'e xtižen':

—Da' li žia' le', note'teze beñe' ba gwlejjichje' liže', beñe' biše', zane', xe', xñe', no'ol che', xi'ine', o yežlio che' ñe čhia' neda' na' ñeche chzenague' xtižan',
³⁰ yežlio nga yonežjo Diosen' le' to gayoa ca'te'le, yo'o, biše', zane', xñe', xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocañe. ³¹ Perw zan beñe' zjanaque' beñe' žialao ña'a, gwžin ža cate' yesaque' beñe' bzebe; na' beñe' zjanaque' beñe' bzebe ña'a, gwžin ža cate' yesaque' beñe' žialao.

Da' yoble Jesúsén' gwne' yesote'ne'

(Mt. 20:17-19; Lc. 18:31-34)

³² Zjangüe'e nez zja'aque' bso dan' zoa gała'ze Jerusalénna' na' Jesúsén' žialagüe' lao beñe' ca' zjanaque' le' txen. Legaue' chesyebande' na' do chesežebze' zjana'ogüe' le'. Nach da' yoble Jesúsén' goxe' beñe' šižinw ca' ca'ale ga nac lchojiže' na' gože' legaue' can' gac čhen'. ³³ Gože'ne':

—Na'a ba zejcho Jerusalén gan' yesone' neda' lo na' bxož gwnabia' ca' na' lo na' beñe' ca' chososed choso-lo'ede' dan' bzoj da' Moisés, na' yesečhoglagüen' čhia' yesote' neda' na' yesone'nda' lo na' beñe' bi zjanaque' beñe' Israel, nedan' naca' ben' gwseła' Dios golja' beñač. ³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo beñe' guat ca'.

Jacobo na' Juan gosenabe' to goclen lao Jesúsén'

(Mt. 20:20-28)

³⁵ Nach Jacobo len Juan, beñe' ca' zjanac xi'in' Zebe-deo, gosebigue' cuit Jesúsén' na' gose'ene':

—Maestro, chaclaže'to' gono' to goclen da' ñabto'.

³⁶ Na' gwñabe Jesúsén' legaue':

—¿Bi che'nele gona'?

³⁷ Na' gose'ene':

—Ben cont cue'to' šļa'a güeje cuito'na' cate' solao ñabi'o.

³⁸ Nach Jesúsén' gože'ne':

—Le'e cabi ñezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac čhele can' gac čhia'?

³⁹ Legaue' gose'ene':

—Gwčhejlaže'to'.

Na' Jesúsén' gože' legaue':

—Da' licze tele yela' zi' yela' ya' ca dan' tia' neda' na' gac čhele can' gac čhian'. ⁴⁰ Perw bi naquen lo na' ñia' non' cue' cuitan' cate' žin ža ñabi'a, san yesebe' beñe' ba mbej Diosen' gaquen čhe'.

⁴¹ Cate' yeši beñe' ca' zjanaque' le' txen gosende' xtiža'gaquen', beseloque' Jacobon' na' Juanña'. ⁴² Perw Jesúsén' goxe' yogüe' cont gosebigue' laogüen' na' gože' legaue':

—Ñezeczele beñe' zjambeje' cont chesenabi'e to to nación na' beñe' blao ca' chesone' byen chosozenag beñe' čhegaue'. ⁴³ Perw bi naquen ca' len le'e. San note'tezle chaclaže'le gacle beñe' blao, cheyała' gwzexjwlaže'le gaclenle beñe' lježle. ⁴⁴ Na' note'tezle chaclaže'le gacle beñe' žialao, cheyała' gon cuinle ca xmos yogo' beñe' lježle. ⁴⁵ Le lencze neda', gwseła' Diosen' neda' golja' beñač, gague za'a cont yesaclen beñe' neda', san za'a cont gaclena' beñe', na' gwnežjw cuina' yesote' neda' ñeche xtoła' beñačen'.

Jesúsén' beyone' to beñe' lchoł ben' gože' Bartimeo

(Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsén' ba beze'e ciudan' len beñe' ca' zjanaque' le' txen na' len yezanch beñe', do cho'a ciudan' čhi' to beñe' lchoł chanez chñabe' yosonežjo beñe' le' con gaca' da' chesezande'. Bena' le' Bartimeo na' naque' xi'in' to beñe' le' Timeo.

⁴⁷ Na' beñe' lchoła' cate' gocbe'ede' gwde Jesús beñe' Nazaret gan' čhi'ena', gwzolagüe' gwñe' zižje gwne':

—¡Jesús, xi'in' diaža čhe da' rey David, beyaše'laže'šca neda'!

⁴⁸ Beñe' zan gosedile' le' cont bich yosye'e, perw bosya'adiache' gwne':

—¡Xi'in' diaža čhe da' rey David, beyaše'laže'šca neda'!

⁴⁹ Nach Jesúsén' gwleze' na' gwne':

—Le gaxe'.

Nach gosaxe' beñe' lchoła' na' gose'ene':

—Benčachlažo', gwzoža', le chaxe' le'.

⁵⁰ Nach gwcho'one' lache' da' nřoa cože' na' bxite' jabigue' lao Jesúsén'. ⁵¹ Nach Jesúsén' gwñabde' le':

—¿Bi chaclažo' gonda' le'?

Beñe' lchoła' boži'e xtižen':

—Maestro, che'nda' yele'eda'.

⁵² Nach Jesúsén' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete beñe' lchoła', na' gwda'ogüe' Jesúsén'.

Jesúsén' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

11 Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsén' gwsele' čhop beñe' ca' zjanaque' le' txen mandadw, ² gož-gaque'ne':

—Le šja'ac yež dan' čhi' gała'ze, na' cate' žinlen' na' yeže'lele to burr dao' da'ba' yag be nono ña' cuia. Le sežba' na' le čhe'ba' nga. ³ Na' še no chñab bičhen' chonle ca', le ye'e: "Xanto' chyažjde'ba'", na' la' gwzantecze'ba'.

⁴ Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

⁵ Na' bał beñe' ca' nita' na' gose'ene':

—¿Bixen' chonle? ¿Bixchen' chsežle burron'?

⁶ Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseče'eba'. ⁷ Nach goseče'e burron' lao Jesúsen' na' gosexoa xagaque' cože'ban' na' gwžia Jesúsen' leba'. ⁸ Na' beņe' zan gosonxene' Jesúsen' goseyixjw no xagaque' lo nez cont blej burron' len na' yebaļe' gosečogue' xoze' yag na' goseyixjuen' lo neza'.

⁹ Beņe' zjažialao na' lecze beņe' za'ac cože' gosezo-lagüe' bososye'e, gosene':

—iLeca zaca'chgua benga! iMbalaz ben' za' nga nseļa' Xancho Diosen' le' cont nabi'e! ¹⁰ iMbalaz yeļa' gwnabia' che' da' nse'e, le' nabi'e ca da' xozxta'ochō David! iLeca zaca'chgua Dios ben' zoa yaban'!

¹¹ Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwņe'e yogo'loj da' de na', beyeje' Betania len beņe' šižinw ca' ba gwleje' cont zjanaque' le' txeñ, le ba zoa gaļ.

Jesúsen' gwne' gacxi'a yag yixgüigw da' bibi žia (Mt. 21:18-19)

¹² Beyečj ža cate' besyeya'aque' Betania, Jesúsen' gwdone'. ¹³ Na' zito' ble'ede' to yag yixgüigw da' žia la-ga', na' jaņe'e še žia yaguen' yixgüigw, na' bibi bželde', san lağa'ze ca' da' žian, le gague canan' chesebia yixgüigon'. ¹⁴ Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' beņe' ca' zjanaque' le' txeñ gosende' can' gwneñ'.

Jesúsen' bešaše' beņe' ca' cheson ya'a chyo'o yodaon' (Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzomagüe' bešaše' beņe' ca' chesote' na' beņe' chesa'o na'. Na' bchixe' xmes beņe' ca' chosoša' mechw na' yag ga chesebe' beņe' ca' chesote' ngolbex. ¹⁶ Na' bi be'e latje yesexoa xņez beņe' zjanao' yoa' chyo'o yodaon'. ¹⁷ Na' bsd blo'ede' beņe' ca' že' na', gože'ne':

—Nyojczē Xtiža' Diosen' žan: "Yesene' ližan' naquen latje gan' šja'ac beņe' yogo' nación yosol güiže'nda'", perw le'e ba beñlen ca to latje ga že' beņe' gwban.

¹⁸ Na' bxož gwnabia' ca' na' beņe' ca' chososed chosolo'e dan' bzoj da' Moisés gosende' can' gwneñ, na' goseyiljwlaže' nacle yesone' yesote'ne'. Ba chesežebe' Jesúsen', le yogo' beņe' besyēžejde' can' bsd blo'eden'. ¹⁹ Perw na' cate' goļ, Jesúsen' beze'e ciudan'.

Gwbiž yag yixgüigon' (Mt. 21:20-22)

²⁰ Beyečj ža šezil, gosodie' na' besele'ede' yag yixgüigon' ba gwbižen lente loen. ²¹ Nach Pedron' jayze'ede' na' gože' Jesúsen':

—Maestro, gwņa' yag yixgüigw dan' gwnao' gacxi'an, ba gwbižen.

²² Jesúsen' boži'e xtižen':

—Le šejnilaže' Dios. ²³ Da' li žia' le'e, note'teže beņe' ye'e ya'a nga: "Gwcuase nga na' jayzoa lo' nisdao'", še bi chaczejlaže' lo' yichjlažda'ogüe', san chejnilaže' Diosen', guacczen. ²⁴ Da'nān' žia' le'e, yogo'te da' nable cate' choļ güižle Dios, le šejle' guaquēczen, na' le gaczen. ²⁵ Na' cate' choļ güižle Dios, še zoa da' chac chele len beņe' yoble, le yezi'xen che', cont lecze ca' Xacho Dios ben' zoa yaba yezi'xene' che xtoļa'le. ²⁶ Perw še le'e bi yezi'xenle che beņe', Xacho Dios beņe' zoa yaba bi yezi'xene' che xtoļa'le.

Yeļa' gwnabia' che Jesúsen' (Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bxož gwnabia' ca' na' beņe' ca' chososed chosolo'e dan' bzoj da' Moisés na' len beņe' gole blao' ca' chesenabi'e naciónna'. ²⁸ Na' gosenabde' le':

—¿Bi yeļa' gwnabia' napo' chono' da' qui? ¿No beñ yeļa' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach nia' le'e bi yeļa' gwnabia' chonlendān'. ³⁰ ¿No gwseļa' da' Juanna' bzoe' beņe' nis? ¿Dios nan' gwseļe'ne' še beñāchen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwseļe' le', na' ye'e chio': "¿Bixchen' ca gwyēļe'le che'?" ³² Bi gac ye'chone' beñāch gwseļa' le'.

Gosene' ca' da' besežebe', le yogo'te beņe' že' na' goseļe'e Diosen' gwseļe' da' Juanna' be'e xtiže'na'.

³³ Nach gose'e Jesúsen':

—Bi nēzeto'.

Nach Jesúsen' gože' legaque':

—Lecze neda' bi yapa' le'e bi yeļa' gwnabian' chonlenda' da' ca'.

Jempl che beņe' güen žin ben' gosaque' beņe' mal (Mt. 21:33-46; Lc. 20:9-19)

12 Nach Jesúsen' gwzomagüe' choe'lene' legaque' diža' chzoe' jempl, na' gože' legaque':

—Gwzoa to beņe' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' beņe' yosogüia yesene'e yag ca'.

'Nach bcua'aņe' yežlion' lo na' beņe' yesonši'e yag uvasen', na' gwze'e gwyēje' zito'. ² Na' cate' bžin ža yosyotobe' cosešen', gwseļe' to xmose' lao beņe' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en. ³ Perw na' beņe' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. ⁴ Nach xan yežlion' da' yoble gwseļe' yeto xmose'; perw benga bosožie'ne' yej, gosone' güe' yichje' na' gosonde' le' zgot. ⁵ Nach xan yežlion' gwseļa'che' yetoe', na' benga gosottecze'ne'. Gwdena' gwseļa'che' beņe' zan, na' baļe' gosot goseyine' le' na' yebaļe' gosottecze'ne'.

⁶Ne' zoa yeto beṇe' biṇa' seḷe', bena' xi'ine' beṇe' chacchgüede', na' bzebte gwseḷe' le', le bene' xbab: "Yesezi'e xtižen'." ⁷Perw beṇe' ca' gose' lježe': "Bengan' yega'anlene' yežlio nga cate' gat xen'. Le da gotchone' cont yega'anlenchon." ⁸Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

⁹Nach Jesúsen' gwṇabe':

—¿Bi chaquele? ¿Nacxe gon xan yežlion' len beṇe' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' beṇe' yoble.

¹⁰¿Biṇa' gwlable ga nyoj Xtiža' Diosen'? Žan quinga:

Yež dan' bi gosaclaže' beṇe' güen yo'o ca' yosočhine', le da naquen yej squin.

¹¹Da' nga ben Xancho Dios, na' naquen to da' yežeje-cho.

¹²Nach gosaclaže' yesezene' Jesúsen', le gosacbe'ede' be'e jemplina' neče dan' bi chesejnilaže' le'. Perw besežebe' še bi yesone beṇe' ca' nžaguen' le-gaque', da'nan' bosocua'aṇe'ne' na' besyeya'aque'.

Ca nac che dan' cheyaḷa' gaxjw

(Mt. 22:15-22; Lc. 20:20-26)

¹³Gwdena' goseseḷe' baḷ beṇe' fariseo na' baḷ beṇe' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'. ¹⁴Beṇe' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi že beṇe', le toze can' chono' len note'teze beṇe'. Na' nezeto' diža' li cho'o chsed chlo'edo' beṇe' can' chazlaže' Diosen' goncho. Da'nan' zedeṇabeto' le' žnaquen binlo no čhixjo da' cheyaḷa' čhixjo che ben' nac la'zelagüe beṇe' gwnabia' ben' čhi' Roma? ¿Gwdixjwton', še bi čhixjwton'?

¹⁵Jesúsen' gocbe'ede' gague do lažen' chese'ene' ca', san chesaclaže' yesonlede' le' len xtiža'gaquen', nach gože'ne':

—¿Bixčen' chaclaže'le yoslažo'le neda' len xtižan'? Le gon neda' to mechw cont na'an.

¹⁶Na' goso'enen', na' cate' ble'eden' na' Jesúsen' gwṇabde' legaque':

—¿No lao dan' da' le'e mechw nga? na' žno la dan' nyoj le'en ni?

Nach bosoyoži'en gose'ene':

—Čhe César ben' nac la'zelagüe beṇe' gwnabian' ben' čhi' ciuda Roman'.

¹⁷Nach Jesúsen' gože'ne':

—Le gwnežjo beṇe' gwnabian' da' nac che beṇe' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Goseṇabde' le' bi zejen dan' yesyeban beṇe' guat ca'

(Mt. 22:23-33; Lc. 20:27-40)

¹⁸Nach besežin baḷ beṇe' saduceos gan' zoa Jesúsen'. Beṇe' ca' chesene' beṇe' guaten' bich yesyebane'.

Nach goseṇabde' le', gose'ene':

¹⁹—Maestro, da' Moisésen' bzoje' can' cheyaḷa' goncho, gwne' še to beṇe' byo gate' na' chzeb no'ol čhen'

perw na' nono bi' güezeb chga'aṇ, na' beṇe' biše' ben' ba got cheyaḷa' yošagna'lene' no'ol güezeba' cont yesenita' xi'in diaža che da' bišen'. ²⁰Gosenita' beṇe' gosac gaž biše'. Na' beṇe' nechua' bšagne'e, na' gote' nono xi'ine' gwnita'. ²¹Na' beṇe' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len beṇe' gwyoṇa'. ²²Na' ca' goc gosedaš beṇe' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'loḷ beṇe' ca', ca beyožen got len no'ola'. ²³Gož neto', cate' yesyebane' ladjo beṇe' guat ca' žnox beṇe' ca' soalene' no'ola' ca xo'ole'? le yogo' beṇe' gaža' bosošagna'lene' le'.

²⁴Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' že Xtiža' Dios da' nyojen, neca nombia'le yela' guac chen'. ²⁵Cate' yesyeban beṇe' guat ca' bich yosošagna' beṇe', neca yosonežjo xi'ine' no'ol gwšagne'e, le yesaque' ca angl beṇe' zjazoa yaba. ²⁶Na' ca nac dan' yesyeban beṇe' guat ca', žbiṇa' gwlable gan' bzoj da' Moisés, can' gož Diosen' le' caten' boḷ güiže'ne' to lo yag yeše' dao' da' chey? Gože'ne': "Neda' naca' Dios ben' chonxen Abraham, ben' chonxen Isaac, na' ben' chonxen Jacob." ²⁷Beṇe' guat ca' bi chesonxene' Diosen', san beṇe' zjamban. Na' ca nac le'e, leca clelen' chonle xbab.

Da' nac da' žialao da' cheyaḷa' goncho

(Mt. 22:34-40)

²⁸Leze bžin to beṇe' bsd blo'ede' ley dan' bzoj da' Moisés, beṇe' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwṇabde'ne':

—¿Non' nacch da' žialao da' zjanyojen da' že Diosen' cheyaḷa' goncho?

²⁹Jesúsen' boži'e xtižen' gože'ne':

—Da' nga nacch da' žialao lao yogo'loḷen, žan: "Le gwzenag beṇe' Israel gualaž čhia', toze Xancho Dios naque' beṇe' zaca' gonxenchoncho. ³⁰Da'nan' cheyaḷa' gaguecho Xancho Diosen' con ca zelao chejni'icho, do yičij do laže'cho, do fuerz valor čhecho." Lenṇa' naquen da' žialao lagüe da' ca' že Diosen' cheyaḷa' goncho. ³¹Na' da' gwchopen' zejgaḷan' ca', gan' žan': "Cheyaḷa' gague lježcho ca chaque cuincho." Bich bi de da' že' cheyaḷa' goncho da' zaca'ch ca da' qui.

³²Nach ben' chsed chlo'e dan' bzoj da' Moisésen' gwne':

—Ca'yaṇen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no zoa beṇe' zaca'ch ca le'. ³³Na' še gaguecho Dios, con ca zelao chejni'icho, do yičij do laže'cho, do fuerz valor čhecho, na' gague lježcho ca chaque cuincho, lenṇa' zaca'chen ca yogo' da' choncho chotcho no beyixe' na' chzechoba' chonxenchoncho Diosen'.

³⁴Nach cate' gocbe'e Jesúsen' boži'icze' xtižen' to lliča, gože'ne':

—Gague da' xen chyažjen cont ṇabdo' Diosen' ṇabi'e yičijlažda'oguoṇ'.

Na' ne yetoe' bich beseyaxjde' bichle yesenabde' Jesúsen'.

Criston' naque' xi'in diaža che da' rey David
(Mt. 22:41-46; Lc. 20:41-44)

³⁵ Jesúsen' bsed blo'ede' chyo'o yodaon', gwne':
—¿Nacxechen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David?
³⁶ Cuiin Daviden' gwne' can' blo'e Spiritw che Diosen' le':
Xancho Dios gože' Xanan':
“Gwche'edo' cuita' nga nabi'acho txen, na' gona' cont yogo' no chesegue'e le' yosozexjw yichje' yosozenague' chio'.”
³⁷ ¿Nacxe gac nacho Criston' naque' xi'in diaža che da' David? le' cuiin Davin' gože' le': “Xana’”
Na' zjanyanchgua bene' ca' chosozenag xtižen', na' besyebede' xtižen'.

Jesúsen' bcuiše' bene' ca' chososed chosolo'e ley dan' bzoj Moisés
(Mt. 23:1-36; Lc. 11:37-54; 20:45-47)

³⁸ Jesúsen' caten' chsed chlo'ede' legaque' gwne':
—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyěžague' lagüe ya'a. ³⁹ Chesyebede' chesebi'e gan' chesebe' bene' blao cate' chja'aque' yodao' na' cate' chac Ini.
⁴⁰ Legaque' chesegue'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque' bene' leca chesonxene' Diosen'. Bene' can' yesacche' castigw clel ca yezica'chle bene' güen da' xinj.

To no'ol güezebe be'e Diosen' xmechue'
(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gała'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwni'a ca' chesegüe'e da' zcha'o mechw. ⁴² Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec. ⁴³ Nach Jesúsen' goxe' bene' ca' zjanaque' le' txen na' gože'ne':
—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clel ca yogo' bene' ca' chesego'o mechw lo' cajan', ⁴⁴ le yogo' le-gaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

Jesúsen' gwne' gwžin ža yosyočinje' yodao' blaon'
(Mt. 24:1-2; Lc. 21:5-6)

13 Cate' cheza' Jesúsen' yodao' blaon' to bene' ca' zjanaque' le' txen gože'ne':
—iMaestro, gwna'šc catec xdan zjanac yej qui na' yo'o qui!
² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'
(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

⁴ —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

⁵ Jesúsen' boži'e xtižen', gwne':
—Le gwsaca' cont nono siye' le'e. ⁶ Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

⁷ Na' cate' yenele chac gwdi'le nile nale, o yenele guac gwdi'le, bi žeble, le can' cheya'la' gac. Perw gague lenna' nacho ba bžin ža yeyož yežlion'. ⁸ Le yesedi' to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

⁹ Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yesече'exoxje' le'e no lao rey no lao nochle bene' gwnabia', na' can' güe'lenle legaque' xtižan'. ¹⁰ Le za' te che yežlion', xtiža' Diosen' cheya'la' gas laljen doxen yežlion'. ¹¹ Na' cate' yesezene' le'e na' yesече'le le'e lao bene' gwnabia' ca', bi cuen yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheya'la' nale. ¹² Cana' bal' beñačh yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesot legaque'. ¹³ Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejy-ichjle dan' chejnilaže'le neda' žin žate gatle, nach šjay-zoale len Diosen'.

¹⁴ Da' Daniel ben' gwdixjue'ede' xtiza' Dios bzoje' che da' zbanchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' bi cheya'la' soan, cana' bene' yesenita' distritw Judea cheya'la' yosoxonje' šja'aque' do ya'adao'. (Bene' gwlaben' cheya'la' šejni'iden'.) ¹⁵ Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'. ¹⁶ Na' bene' chda yixe' bi yeyej liže' šjayxi' xalane'. ¹⁷ iNyaše'chguaze zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'! ¹⁸ Le nab lao Dios bi yažjen gwxonjle caten' chac zag, ¹⁹ le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlazen' yesale'de' ca' da' yoble. ²⁰ Na' šaca' Xancho Diosen' bi yozaše' žan' yesac ca', notno yela, perw yozašen' neche

chacde' beṇe' ca' chesejnilaže' le', beṇe' ba gwleje' zjanaque' xi'ine'.

²¹ 'Cana' še no ye' le'e: "Le ṇa'šc, nga zoa Cristo ben' gwlej Diosen' cont ṇabi'e", o "Le ṇa'šc, na' zoe'", bi še-ḷle'le. ²² Le yesaš beṇe' gwxiye' beṇe' yesaclaže' yosolane' xlatja' nga, na' yeson cuine' ca beṇe' chesoe' xtiža' Dios. Na' yesone' yela' guac da' yesele'e beṇe' na' bichle da' zaca' yesyebande' cont yeseziye'e legaque', na' len beṇe' ca' ba gwlej Diosen' zjanaque' xi'ine' yesaclaže' beṇe' gwxiye' ca' yeseziye'e šaca' gac yeseziye'e legaque'. ²³ Perw ca nac le'e, le gwzenag, le ba gwduxjue'eda' le'e yogo' can' gac.

Can' gac cate' ben' gwseḷa' Diosen' golje' beṇačh yide' da' yoble

(Mt. 24:29-35, 42-44; Lc. 21:25-36)

²⁴ 'Perw ca nac ža ca' cate' yeyož gaḷe'le can' gwnia', gwbižen' yeyaquen čhoḷ na' bion' bich gwseṇin'. ²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'.

²⁶ Nach beṇe' že' yežlion' yesele'ede' neda' naca' ben' gwseḷa' Diosen' golja' beṇačh za'a ladjo bejon' len yela' guac xen na' yela' beṇe' zaca' juisyw čhian'. ²⁷ Nach seḷa' angl čhian' yosyotobe' yogo' beṇe' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

²⁸ 'Le gwzenag čhe jempl nga čhe yag yixgüigon': Cate' ba chzolao chebešjw yaguen' na' chelan' laga' che'eṇ dao', ṇezele ba za' lagüe ba. ²⁹ Na' leceze cate' le'ele ba chac da' mal ca' ba gwnia', cana'ch ṇezele ba za' juisyw, ba zoa gaḷa'. ³⁰ Da' li žia' le'e, biṇa' yenit di-aža čhe le'e nita'le ṇa'a cate' yeyož gac yogo'loḷ da' ca'. ³¹ Le'e yaban' na' yežlion' yesede čhen, perw ca nac xtižan', gague da' te cbi gac can' žanṇa'.

³² 'Perw nono ṇeze bi ža bi horen' gac ca', ṇe angl ca' nita' yaba, ṇeca neda' naca' Xi'ine' Diosen' bi ṇezda'. Toze Xa' Dios ṇeze.

³³ 'Da'nan', le soa le cueze, le güia le ṇa', na' le soateze yoḷ güižle Dios, le nono ṇeze batcan' žin ža.

³⁴ Naquen ca nac čhe to beṇe' šeje' zito', na' cate' za' se'e choṇ liž xlatje' lo na' beṇe' güen žin čhe', cho'e žin da' yeson to toe', na' chzoe' beṇe' chape' cho'a yo'ona'.

³⁵ Le soa le cueze ca beṇe' chesape' liže'na', le bi zjaṇezde' batcan' yela' xan yo'on, še cate' ba zoa gaḷ, še chel, še cate' chbež jea, še cate' ba gwyeni'. ³⁶ Le xož yele'e zejzenez na' yedoḷe'de' legaque' chesetase'.

³⁷ Da' nga žia' le'e leze žiczan' par yogo'loḷ beṇe'. Le soa le cuez batcan' žin ža.

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

14 Yečhop ža za' gaḷa' pascw na' In'i dan' chesone' caten' chesagüe' yetextil dan' bibi levadura yo'on. Na' bxož gwnabia' ca' na' beṇe' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'. ² Perw gosene':

—Bi senchone' lo In'in' cont ca yesebec beṇe' žaš.

To no'ole bzoe' set zix yichj Jesúsen'

(Mt. 26:6-13; Jn. 12:1-8)

³ Na' goquen' Jesúsen' zoe' Betania liž Simón ben' gü'e'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoxje' gan' yož seta' na' bzoačhočhje' seta' yichj Jesúsen'. ⁴ Na' baḷ beṇe' ca' zjanita' na' beseže'e, na' gose' lježe':

—ŽBixčhen' benditjde' set zix nga? ⁵ Ša no bete' len güesonen ca no laxjw mos da' gone' gan tgüiz, na' gwṇežjuen' gaclenen beṇe' yaše'.

Na' beseloque' no'ola'.

⁶ Perw Jesúsen' gwne':

—Jayen'. ŽBixčhen' chṇele čhe no'olen'? Dan' bene' len neda' nga naquen güen. ⁷ Le beṇe' yaše' ca' bate'teze nita'cze' len le'e, na' guaque gonle len le-gaque' da' güen cate' žan čhele, san neda' bich soacza' yesša len le'e. ⁸ No'ole nga bene' da' zelao gwzaque'de'. Ba bguazje' neda' set zix can' cheyaḷa' yesone' len neda' cate' gaša'. ⁹ Da' li žia' le'e, doxen yežlio gate'teze šjasedixjue'e beṇe' diža' güen dan' chzejni'in čhia', decze de šjasyeze'ede' can' ben no'ol nga.

Judas gwčhoglaže' gwdie' Jesúsen' lo na' beṇe' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len beṇe' ca' šižinw ben' gwlej Jesúsen' cont zjanaque' le' txen, gwyeje' jaṇe'e bxož gwnabia' ca' cont yosoxi'e nac gone' gwdie' Jesúsen' lo na'gague'. ¹¹ Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzolagüe' gwdiłjwlaže' nac gone' gwdie' Jesúsen' lo na'gague'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' bžin ža čala' In'i caten' neto' beṇe' Israel chagwto' yetextil dan' bibi levadura yo'o. Naquen ža nechw čhe In'i pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' beṇe' Egipto ca'. Na' beṇe' ca' zjanaque' Jesúsen' txen gosenabde' le':

—ŽGa che'ndo' šjasini'ato' cont gagwcho xše' čhe pascon'?

¹³ Nach gwsele' čhop beṇe' ca' na' gože'ne':

—Le šja'ac ciudan', na' yežagle to beṇe' byo no'e to che'e nis. Le šejlene', ¹⁴ na' gan' yežinen', le ye' xan yo'on: "Maestrona' že': Goṇšco' to yo'o gan' gagwto' xše' ža In'i nga len beṇe' ca' zjanaque' neda' txen."

¹⁵ Nach gwlo'ede' le'e to quart xen dan' zoa yichjen na'ale gan' de yogo' da' čhyažjecho. Na' le gwsini'a cont gagwcho na'.

¹⁶ Na' gosa'ac beṇe' ca' čhope, na' besežine' ciudan', na' yogo' can' gož Jesúsen' legaque' goc, na' bososiṇi'e xše' že' In'in'.

¹⁷ Cate' beyož gwxa gwbiž, bžin Jesúsen' len beñe' šižiñw ca' gwleje' cont zjanaque' le' txen. ¹⁸ Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' beñe' ca' chesegue'e neda'.

¹⁹ Nach legaque' besyeyaše'laže'de' na' gosezologüe' tgüejje' tgüejje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

²⁰ Na' Jesúsen' gože'ne':

—Ladjo le'e beñe' šižiñw, to beñe' chagw len neda' txen toze lo' ye'eñ gon ca'. ²¹ Na' gac čhia' can' nyoj le'e Xtiža' Diosen', neda' naca' ben' gwseļa' Diosen' golja' beñačh. Perw įnyaše'chguaze nac ben' gwdie' neda' lo' na' beñe' ca'! Yeįñi'acle ša bi goljen'.

²² Na' šlac chesagüe', Jesúsen' gwxi'e to yetextilen', na' beyož be'e yela' choxclen čhe Dios, bzojjen', na' bnežjuen' legaque', gwne':

—Le gagon'. Lenña' cuerp čhia'.

²³ Nach beñe' to vas gan' yože nis uvasen' na' beyož be'e yela' choxclen čhe Dios, be'en legaque', na' yogüe' gose'eje' late' güej dan' yože lo' vassen'. ²⁴ Na' gože' legaque':

—Da' ngan' xčhena' na' chzanlažan' lajjen neče yogo'loj beñačh. Na' lajjen cont solao gac da' coben' da' gwna Diosen' gone' gaclene' beñačh. ²⁵ Da' li' žia' le'e, bich ye'eja' xis uvass na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

Jesúsen' gwne' Pedroa' bi čhebe' naque' le' txen

(Mt. 26:30-35; Lc. 22:31-34; Jn. 13:36-38)

²⁶ Beyož gosole' gosonxene' Diosen' nach gosa'aque' ja'aque' Ya'a Olivos. ²⁷ Nach Jesúsen' gože'ne':

—Na'aže' yogo'le cuejyichjle neda' neče dan' gac čhian'. Le nyojzen le'e Xtiža' Diosen', žan: "Gota' beñe' güeyoe xilan' na' xila' ca' yesaslasba'." ²⁸ Perw cate' yosban Diosen' neda' ladjo beñe' guat ca', yobch yeya'a Galilea ca' le'e.

²⁹ Nach Pedron' gože'ne':

—La' yogo' beñe' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li' žia' le', biña' cuež jean' čhop ni'a na'aže' cate' gac šon ni'a bi chčhebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat ni'a bi nombia' le'.

Na' lecze ca' gosena' yogüe'.

Jesúsen' boļ güiže' Xe' Dios Getsemaní

(Mt. 26:36-46; Lc. 22:39-46)

³² Nach besežine' latje gan' nzi' Getsemaní, na' Jesúsen' gože' beñe' ca' zjanaque' le' txen, gože'ne':

—Ngaze le' cue'edo' šlac neda' šjel güiža' Dios.

³³ Na' gwče'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. ³⁴ Na' gože' legaque':

—Lo' yichjlažda'ogua' nga chacyaše'chgüeda', chacda' gatcza' catequen' chžaglagua'. Nga le yega'añ na' le soa le na' txen len neda'.

³⁵ Nach Jesúsen' gwžialagüe' yelate' na' jačhaze' cosčo'ale lo' yon' gwñabde' Dios še guac ten ca'ale bi gac can' ba zoa gac čhe'. ³⁶ Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' ñao' le'.

³⁷ Nach beyeje' gan' nita' beñe' ca' šone, na' ble'ede' zjanite' chesetase'. Na' gože' Pedron':

—Simón žchtason'? ¿Ne šlož da'oze ca' goc cuejo' bišgal len neda'? ³⁸ Bi tasle, san le yol güiž Dios cont bi gon gwxiyen' le'e gan. Da' li' lo' yichjlažda'olen' chña'laže'le gonle da' nac binlo, perw cuerp čhelen' bi chzoeczen.

³⁹ Nach gwyeje' da' yoble na' boļ güiže' Dios na' da' yoble gože'ne' dan' ba gožcze'ne' tñi'a. ⁴⁰ Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. ⁴¹ Na' da' gwyoñe ni'a gwyeje' na' bežžine' gan' nita' beñe' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to beñe' neda' lo' na' beñe' güen da' xinj ca', neda' naca' ben' gwseļa' Diosen' golja' beñačh. ⁴² Le čhas, le yeyo'o. Ba za' ben' gon neda' lo' na'gaque'.

Gosezene' Jesúsen' cont yeseče'ene' lao beñe' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan beñe' zja'aque' len le' zjanoxe' no yag, no spada, beñe' goseseļa' bžoz gwnabia' ca' na' beñe' gole blao ca' chesenabia' nación Israel čheton'. (Judasen' goque' to beñe' šižiñw ca' gwlej Jesúsen' cont zjanaque' le' txen.) ⁴⁴ Na' Judasen' ba gože' legaque' nac yeseñezde' non' yesezene', gwne':

—Ben' gwnopa' xague', le'na'; le sene' na' le čhe'e.

⁴⁵ Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnopene'. ⁴⁶ Nach gosezene' Jesúsen' cont yeseče'ene'.

⁴⁷ Perw to ben' zecha cuit Jesúsen' gwlej spada čhen' na' gwdinen' mos čhe bžoz blaon' gwčhogte' šla'a naguen'. ⁴⁸ Nach Jesúsen' gože' beñe' ca':

—¿Nonle neda' ca' to beñe' gwban za'acle zedexi'le neda' len spada na' len yag? ⁴⁹ Yogo' žaze gwzoa' len le'e bsed blo'eda' beñe' chy'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

⁵⁰ Nach yogo' beñe' ca' zjanaque' Jesúsen' txen bosoxonje' gosebejyichje'ne'.

Bi' güego' bin' boxonj

⁵¹ Na' to bi' güego' na'obe' Jesúsén', na' n̄xoá cože'be' toze sábara. Na' beñe' ca' ba gosezene' Jesúsén' lecze gosenize'be'. ⁵² Perw gwlejičhjbe' sábaran' na' boxonjbe' ga'alyidbe'.

Goseče'e Jesúsén' lao beñe ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseče'e Jesúsén' lao b̄xoz blaon', na' bešežag yogo' beñe' ca' zjanac b̄xoz gwnabia', na' beñe' gole blao ca' chesenabi'e nación četon' na' beñe' ca' bososed bosolo'ede' dan' bzoj da' Moisés. ⁵⁴ Na' Pedron' na'ogüe' Jesúsén' zito' zito'le b̄žintie' liž b̄xoz blaon' na' gwyo'e chyo'ona' gwchi'e t̄xen len beñe' ca' chesape' yodao' blaon' boše'e cuine' cho'a yi'.

⁵⁵ Na' ca' nac b̄xoz blaon' na' yogo' beñe' ca' chesenabia' nación četon', besyeyiljwlaže' bi da' yesagüe' xya čhe Jesúsén' cont yesote'ne', perw bi besyeželden'. ⁵⁶ Na' zan beñe' gosone' diža' güenlaže' čhe Jesúsén', perw bi gosene' toz ca' yesene'. ⁵⁷ Baļe' gosezože'e na' bososbague'ne' xya čhol, gosene':

⁵⁸ —Neto' beneto' gwne': "Neda' yočhinja' yodao' nga da' ben beñach, na' šone žaze yeyona' yeto yodao' da' bi gon beñach."

⁵⁹ Perw ñe ca' ca' gosene' toz ca' yesene'.

⁶⁰ Nach b̄xoz blaon' gwzože'e ladjo yogo'lóle' na' gwñabde' Jesúsén':

—¿Bi choži'o xtižen? ¿Bi dan' chosožie' le' xya?

⁶¹ Perw Jesúsén' bitw bi gwne', bitw boži'e xtižen'. Na' b̄xoz blaon' da' yoble gwñabde' le', gwne':

—¿Naco' le' Cristo ben' gwlej Diosen' cont ñabi'e, na' Xi'ñ Dios ben' chonxencho?

⁶² Jesúsén' gože'ne':

—Le can' naca'. Na' le'ele neda' cate' ba chi'a šļa'a liča čhe Dios ben' nac la'zelagüe beñe' gwnabia', neda' naca' ben' gwsele' golja' beñach. Na' le'ele yetja' ladjo bejw dan' ze le'e yaban'.

⁶³ Nach b̄xoz blaon' gwčeza' xaļane' cont nacbia' bi beque'e can' gwna Jesúsén', na' gwne':

—Noch no čyažje beñe' co' da' baļi. ⁶⁴ Le'e ba benele čñe' čhe Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doļa' na' čeyaļa' gate'.

⁶⁵ Nach baļe' gosezolagüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' čhe gose'ene':

—iGwnašč non' čot le'!

Na' beñe' ca' chesape' yodao' blaon' gosot goseyine' le'.

Pedron' bi gwčebe' še nombi'e Jesúsén'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e chyo'o che'ejele, cate' bžin to no'ole güen žin čhe b̄xoz blaon'. ⁶⁷ Na' cate' no'olen' ble'ede'

le' chi'e choše'e cuine' cho'a yin', gwñe'e le' na' gože'ne':

—Lencze le' naco' t̄xen len Jesús beñe' Nazaret.

⁶⁸ Perw Pedron' bi gwčebe', gwne':

—Bi nombi'ane', ñeca ñezda' bin' žo'.

Na' beyej Pedron' jayzie' cho'a puert na'le. Nach gwčež to jea. ⁶⁹ Na' no'ol güen žinña' gwñe'e le' da' yoble na' gože' beñe' ca' nita' na':

—Benga naque' legaque' t̄xen.

⁷⁰ Perw le' da' yoble bi gwčebe' še naque' t̄xen len Jesúsén'. Na' gocze štit da' yoble beñe' ca' nita' na' gose'e Pedron':

—Da' ličze, le' naco' t̄xen len legaque', le naco' beñe' Galilea, nacbia' čñio' can' cheseñe beñe' Galilea ca'.

⁷¹ Nach Pedron' čhop šone ñi'a gwne':

—Diosen' goñe' neda' castigw še chonlaža' žia' bi nombi'a' beña'.

⁷² Na' cate' la' gwčežte jean' da' gwchope. Nach jayze'e Pedron' can' gož Jesúsén' le': "Biña' cuež jean' čhop ñi'a cate' gac šon ñi'a bi čhebo' še nombi'o neda'." Na' cate' jayze'ede' can' gož Jesúsén' le', na' gwčeže'.

Goseče'e Jesúsén' lao Pilato

(Mt. 27:1-2, 11-14; Lc. 23:1-5; Jn. 18:28-38)

15 Ca gwyeni', b̄xoz gwnabia' ca' besežague' len beñe' gole blao ca' chesenabi'e nación četon' na' len beñe' ca' chososed chosolo'e dan' bzoj da' Moisés na' len yezica'chle beñe' gwnabia' ca'. Na' bosocheje' Jesúsén' na' goseče'ene' jasesane'ne' lo na' Pilato ben' nac gobernador. ² Pilaton' gwñabde'ne', gože'ne':

—¿Len' naco' rey čhe beñe' Israel?

Jesúsén' boži'e xtižen', gwne':

—Can' gwnao'na', can' naquen.

³ Na' b̄xoz gwnabia' ca' da' zan da' bosocuiše'ne'.

⁴ Nach Pilaton' da' yoble gwñabde'ne', gože'ne':

—¿Bi choži'o xtiža'gaquen? le' da' zan da' chosocuiše' le'.

⁵ Perw Jesúsén' bitw bi gwne'. Na' Pilaton' bebande' čhe'.

Gosečhogbi'en gat Jesúsén'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to beñe' de ližya caten' čaļa' l̄ni pascw čhe neto' beñe' Israel, con to beñe' yeseñab beñe' gualaž četon'. ⁷ To beñe' lie' Barrabás na' len yexonj bene' gosot beñe' cate' besyedabague' gobiernna' zjajo'e lo' ližya len nochle beñe' güen da' mal. ⁸ Nach besežag beñe' na' gosenabde' Pilaton' gwsane' to beñe' con can' nac costumbr čhegaquen'. ⁹ Na' Pilaton' boži'e xtiža'gaquen' gwne':

—¿Čaclaže'le gwsana' rey čhe le'e nacle beñe' Israel?

¹⁰ Gwne' ca' le' gocbe'ede' dan' chesacxi'a b̄xoz gwnabia' ca' Jesúsén', da'nan' bosodie' le' lo ne'e. ¹¹ Perw b̄xoz gwnabia' ca' bosota bosone' beñe' ca' že' na' cont

goseṇabe' gwsane' Barrabás ben' de Ijžyan'. ¹² Nach Pilaton' gwnabde' legaque':

—¿Bixe gona' len ben' žale nac rey che le'e nacle beṇe' Israel?

¹³ Legaque' bososya'adie' bosyoži'e xtižen':

—¿Bde'e le'e yag cruz!

¹⁴ Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—¿Bde'e le'e yag cruz!

¹⁵ Nach Pilaton', cont bega'ṇe' güen len beṇe' ca', bsane' Barrabásen' can' goseṇabe'. Na' bene' mandadw gosot goseyin soldadw che' ca' Jesúsen', nach beṇe' le' lo na'gaque' cont yosode'ene' le'e yag cruz.

¹⁶ Nach soldadw ca' goseche'ene' yeto latje dan' zoa chyo'o che liž beṇe' gwnabian', na' bosotobe' yogo' soldadw ca', zjanac zane'. ¹⁷ Gosechize' Jesúsen' to lache' moradw, na' gosone' to corona de xis yeše' bosozoen' yichjen'. ¹⁸ Na' gosezolagüe' chesonle' che', chesosye'e: —Viva, rey che beṇe' Israel!

¹⁹ Na' bosozete' yichjen' xis, bosožičene' xene', na' bosozoa xibe' gosone' ca' beṇe' chesonxen le'. ²⁰ Beyož gosonle' che', besyeyiṇe' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

²¹ Na' šlac zjanche'ene' gan' yesote'ne' besyežague' to beṇe' yež Cirene le' Simón, xa Alejandro na' Rufo, za zeze'e yixe', na' bosogüe'ene' yag cruz che Jesúsen'.

²² Goseche'ene' Jesúsen' latje ga nzi' Gólgota, zeje dižan' Latje che Žit Yichj Beṇe' Guat. ²³ Na' gosone' vino da' nchixe' to nechw da' nzi' mirra, perw Jesúsen' bi goclaze' ye'ejen'. ²⁴ Nach bosode'ene' le'e yag cruzen'. Na' soldadw ca' gosone' rifa cate' besyele'e xałana' Jesúsen' cont bla' bi besyechel' to toe'.

²⁵ Cheda ga šezille caten' bosode'ene' le'e yag cruz.

²⁶ Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey che Beṇe' Israel." ²⁷ T xen len Jesúsen' lecze bosode'e le'e yag cruz yechope beṇe' gwban, toe' šla'a licha, na' yetoe' šla'a robes. ²⁸ Na' da' gosone' ca', goc ca' nyoj Xtiža' Diosen', žan: "Gosone'ne' ca' beṇe' güen da' xinj."

²⁹ Na' beṇe' gosede gała'ze gosezi'diže'ne', con chosota yichje' gosene':

—Le' gwnao' yočinjo' yodaon' na' šone žaze yeyon'tion'. ³⁰ Bosla cuino' na' beyetj le'e yag cruza'.

³¹ Lecze ca' bħoz gwnabia' ca' na' beṇe' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' beṇe' yoble, perw bi chac yosla cuine'.

³² Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' beṇe' Israel.

Na' lente beṇe' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

³³ Cate' bžin guagwbiž, doxen yežlion' goc choł, bžinte cheda šone. ³⁴ Na' ca hora' Jesúsen' gwne' ziže gwne':

—Eloi, Eloi žlama sabactani? —zeje diža': Dios chia', Dios chia', žbixchen' ba gwlejičho' neda'?

³⁵ Na' bał beṇe' ca' zjanita' na' gosende' na' gosene':

—Le gwzenag, choł güiže' da' Elías, ben' be' xtiža' Dios cani'.

³⁶ Nach to beṇe' ca' gwejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

³⁷ Nach Jesúsen' bosye'e ziže, na' gote'. ³⁸ Na' lache' da' ze lo' yodao' blaon' bcheza' gacholen, gwza'te yichjen bžinte che'eje. ³⁹ Na' xan soldadw ca' zie' lao Jesúsen', na' cate' bende' can' bosye'en na' ble'ede' can' goten', gwne':

—Da' li le bengan' goc dogualje Xi'in Dios.

⁴⁰ Lecze bał no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo beṇe' naše'te, na' lecze goque' xna' José. ⁴¹ No'ol qui gosa'ogüe' Jesúsen' na' gosaclene' le' cate' chsed chlo'ede' beṇe' ca' že' distritw Galilea. Na' yezanch no'ol zjanita' na', beṇe' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososiñi'e par ža che Dios cate' bi de Isens yesone' žin. Na' cate' ba chxo'a gwbiž, ⁴³ to beṇe' le' José, beṇe' ciuda Arimatea, beyaxjde' gwyeje' lao Pilaton' na' jayṇabe' cuerp che Jesúsen'. José goque' to beṇe' zaque' lao beṇe' ca' gosenabi'e nación Israel cheton', na' ba zoe' chbeze' batcan' solao ṇabia' ben' seła' Diosen'. ⁴⁴ Pilaton' bebande' dan' ba gote', na' goxe' xan soldadw ca' cont gwnabde' le' še da' li ba gote'. ⁴⁵ Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. ⁴⁶ Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jaseło'ote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len. ⁴⁷ Na' María no'ole Magdalan' len María xna' Josén' besele'ede' gan' bosocuaše'nen'.

Beban Jesúsen' ladjo beṇe' guat ca'

(Mt. 28:1-10; Lc. 24:1-12; Jn. 20:1-10)

16 Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che Jesúsen'. ² Na' šezildao' ža dmigw besežine' cho'a ban', cate' za' chla' gwbiž. ³ Na' za' yesežine' gose' lježe':

—¿Noxe ca'a yej xen dan' da' cho'a blojen'?

⁴ Perw cate' besežine' na' gosene'e, besele'ede' yej xen dan' da' cho'a blojen' ba bga'an. ⁵ Nach gosoe' lo'

blojen', na' besele'ede' chi' to beṇe' xcuide' šļa'a liĉha, nyaze' to lache' toṇ da' šiš. Na' besežebe'. ⁶ Na' bena' gože'ne':

—Bitw žeble. Cheyiljwle Jesús beṇe' Nazaret ben' bosode'e le'e yag cruz. Perw ba bebane'; notoch no nļa' nga. Le ṇa' gan' gosexoe'ne'. ⁷ Le šjaya'ac na' le ye' beṇe' ca' gosaque' le' txen, na' len Pedron', gwyobech Jesús' yežine' Galilea clal ca legaque'. Na' Galilean' na' yesele'ede'ne' can' gwnacze'.

⁸ Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesús' blo'elagüe' María no'ole Magdala

(Jn. 20:11-18)

⁹ Beyož beban Jesús' ladjo beṇe' guat ca' šezildao' ža dmigw, Jesús' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. ¹⁰ Na' María nga jatixjue'ede' beṇe' ca' ba gosonita' len le'. Zjanita'yaše' na' chesebeže' cate' bžine'. ¹¹ Na' cate' gosende' be'e diža' mban Jesús' na' gosende' be'e dižan' can' ba ble'ede'ne', bi gosejle'e.

Jesús' blo'elagüe' len ĉhop beṇe' ca' gosaque' le' txen

(Lc. 24:13-35)

¹² Beyož goc ca', ĉhop beṇe' ca' gosaque' Jesús' txen zjangüe'e nez yiže' cate' Jesús' blo'elagüe' legaque', na' nža'le besele'ede'ne'. ¹³ Lecze legaque'

ja'aque' jasedixjue'ede' beṇe' yezica'chle, perw ṇeca gosejle'e ĉhegaque'.

Da' bgon Jesús' yeson beṇe' ca' chsejnilaže'ne'

(Mt. 28:16-20; Lc. 24:36-49; Jn. 20:19-23)

¹⁴ Gwdena' beṇe' šnej ca' gwlej Jesús' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdiļe' legaque' da' bi chsejnilaže' le' do yiĉj do laže' na' zjanaque' laždao' ĉhaĉ, le bi gosejle'e ĉhe beṇe' ca' besele'ede'ne' ba bebane' ladjo beṇe' guat ca'. ¹⁵ Na' gože' legaque':

—Le šja'ac doxen yežlio, na' le šjatixjue'e diža' güen ĉhia' len yogo'lo le beṇe'. ¹⁶ Beṇe' ca' yesejnilaže' neda' na' yesezoe' nis, gata' yeļa' mban ĉhegaque' toļi tocaṇe. Perw beṇe' bi chsejnilaže' neda', yesebiaye'e.

¹⁷ Na' beṇe' ca' chsejnilaže' neda', yesyega'anlene' da' qui: Yeso'e la' na' yesyebeye' da' xigüe' yo'o nyaz beṇe'; yesenjie' diža' cobe da' bi zjansede'; ¹⁸ na' še yesoxe' no beļ znia, o še yese'eje' da' nac venen, bibi yesacde'; na' lecze yesexoa taque' yiĉj beṇe' chese'e na' yesyeyacde'.

Begüe Jesús' yaba

(Lc. 24:50-53)

¹⁹ Beyož bšaljlene' legaque', Xancho Jesús' begüe' yaba, na' gwchi'e cuit Diosen' šļa'a liĉha. ²⁰ Na' beṇe' ca' zjanaque' le' txen besežaše' na' jasedixjue'ede' diža' güen ĉhe' doxen. Na' cuin Xancho Jesús' goclene' legaque' gosone' yeļa' guac cont gosejle' beṇe' le nac da' li dižan' goso'en. Da' na'zen' chzoja'.

San Lucas

Da' nga bzoj Lucasen' par Teófilo

1 Teófilo, naco' beŋe' zaca' na' chzoja' le' diža' quinga cont ŋezdo' da' li ca nac da' ba bosozejni'ide' le' che da' ca' ba gosac. Beŋe' zan bačh bosozoje' che Jesúsen', goso'e diža' che da' ca' bene', con can' bosozejni'i beŋe' ca' neto', beŋe' ca' besele'ede' can' gwzolaon cate' goljte Jesúsen'. Na' beŋe' ca' gosende' na' besele'ede' can' goquen' bososed bosolo'ede' beŋe' yoble diža' güen che'. Na' neda' cate' beyož gwŋaby-oža' can' goquen' na' gwyazlaža' gwzozan' tcho'a cont ŋezdo', Teófilo.

To angl gwdixjue'ede' galje Juan

5 Ca tiemp caten' gwnabia' rey Herodes distritw gana' nzi' Judea, na' gwzoa to bxož che beŋe' Israel ca' beŋe' le Zacarías. Bene' žin len to xoŋj bxož beŋe' zjale Abías. Na' no'ol che Zacarías le Elisabet, na' naque' diaža che da' bxož Aarón. **6** Na' Zacarías len Elisabeten' zja'accze' to liča len Diosen' na' gosonyane' yogo'lo! da' non Xancho Diosen' mandadw da'na' nyoj le'e ley che'na'. **7** Na' nono xi'ingaque' nita' ŋeche Elisabeten' naque' no'ol güiž. Na' chopte' ba zjanaque' beŋe' gole.

8 Na' goquen' beyala' Zacaríasen' len beŋe' lježe' ca' beŋe' ca' zjanaque' bxož cont yesone' da'na' besyeyale' yesone' yesonxene' Dios. **9** Na' bxož ca' yogo' ŋi'a chesone' rifa cont chata'bia' noe' choj gwzeye' yal lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bze-eye' yala' lo' yodao'na'. **10** Na' šlac bzeye' yala' gosonita' yogo'lo! beŋe' zan ca' chyo'ole bosol güiže' Diosen'.

11 Na' to angl beŋe' gwsele' Xancho Dios blo'elagüe' Zacaríasen', na' gwzecha angla' cuít mesa' lichale gan' chosozeye' yala'. **12** Na' cate' ble'e Zacaríasen' anglen', benit becho! lo' yichjlažda'ogüe' na' bžebchgüe'.

13 Perw anglen' gože' le':

—Bitw žebo' Zacarías. Dios'a ba bzenague' che dan' gwŋabdo'ne', na' no'ol čhio' Elisabeten' sane' to xi'ino', na' gwsio'be' Juan. **14** Na' so' mbalaz na' yebedo' na' lece beŋe' zan yesyebede' še ba goljbe'. **15** Gacbe' to beŋe' blao lao Diosen'. Bitw ye'ejbe' vino ŋe bichle da' chzože beŋe'. Na' cate' za' galjtebe' ba yo'o Spiritw che Dios'a lo' yichjlažda'obe' ŋabi'an lebe'. **16** Na' gombe' cont zan beŋe' Israel ca' yosoša' yichjlažda'ogüe' na' yesonxene' Xancho Diosen' can' cheya!a' yesonxene' le'. **17** Na' cuialaobe' lao Xancho', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' beŋe' ca' bi nita' binlo

len xi'ine' ca', gombe' ga yesenite' binlo len legacbe', na' beŋe' güedenag ca' gombe' yosozenague' che Diosen'. Gombe' cont yesenita' beŋe' yesonxene' Xancho' cate' yide'.

18 Nach Zacaríasen' gože' anglen':

—Žnac gac ŋezda' da' nga? Neda' naca' beŋe' gole na' lecz ca' no'ol čhian' ba naque' beŋe' gole.

19 Nach anglen' gože' le':

—Neda' naca' angl Gabriel beŋe' za' yaba. Zoa' len Diosen' na' chonxena'ne', na' gwsele' neda' zede-tixjue'eda' le' diža' güen qui. **20** Le' bi gac ŋio' ŋa'a, le bi chejli'o xtiža' nga. Cate' žin ža gac da' nga, cana' gac yeŋio' da' yoble. Na' da' li gwžin ža gac can' gwnia'.

21 Na' beŋe' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. **22** Na' cate' bechoj Zacaríasen', bene' seŋw len ne'e da' bi goc ŋie'. Nach gosacbe'e beŋe' ca' ble'ebande' lo' yodao'na'.

23 Na' cate' beyož bdelaze' dan' bene' žin lo' yodao'na', beyej liže'. **24** Gwde na' no'ol che' Elisabeten' gwchenda' bidaon' lo' le'e. Na' gayo' bio' gwzoaze'.

25 Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beŋača' xbab bibi zaca'.

To angl gwdixjue'ede' galje Jesucriston'

26 Goc xož bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea. **27** Gwsele' le' gan' zoa to no'ol güego' le' María. Na' Marían' napši'ichgua cuine'. Na' to beŋe' le' José bačh naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. **28** Na' bžin to angl beŋe' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lo! no'ole yezi-ca'chle.

29 Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. **30** Na' anglen' gože'ne':

—Bitw žebo' María, Diosen' nži'ide' le'. **31** Na'a gua' xi'ino' to bi' byo dao', na' sano'be', na' go'o labe' Jesús.

32 Na' Jesúsen' gaque' to beŋe' blao na' beŋachen' yososi'ene' Xi'in Dios, Dios ben' naque' la'zelagüe beŋe' blao. Na' Xancho Diosen' gone' cont ŋabi'e nación Israel chele ca gwnabia' da' xozxta'ogüe' rey David. **33** Na' le' ŋabi'e nación Israelen' toli tocaŋe, na' gwbat te yela' gwnabia' čhen'.

³⁴ Nach gož Marían' angla':

—¿Nacxe gac sana' bdaon'? Bitw nžaga' beņe' byo.

³⁵ Nach gož angla' le':

—Spiritw che Diosen' yiden gana' zo'na', na' yeļa' guac che Diosa' soan len le', Dios ben' naque' la'ze-lagüe beņe' blao. Da'nan' bidaon' za' galje gacbe' laž-dao' xilaže' na' yososi'ebe' Xi'in Dios. ³⁶ Na' beņe' xņa'o Elisabeten' lecze bač gwchendao' bidao' lo' le'e la'czļa' ba naque' beņe' gole. Ba goc xop bio' no'e to bi' byo dao', len gosene' naque' no'ole güiž. ³⁷ Bibi de da' na-cho da' cbi gac gon Dios.

³⁸ Nach gož Marían' anglen':

—Ni zoa' naca' xmos Xana' Diosen'. Gacšca čhia' con can' ba gwnao'.

Nach beza' anglen' gan' zoa Marían'.

Marían' jaņe'e Elisabeten'

³⁹ Gwde na' la' gweyte Marían' to yež da' žia to lo ya'a gan' mbane distritw Judean', ⁴⁰ na' bžine' liž Zacaríasen'. Na' gwyo'e bguape' Elisabeten' tiox. ⁴¹ Na' cate' Elisabeten' bende' choļ güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' ⁴² na' gwņe' zižje da' bebechgüede', gože' Marían':

—Zo' mbalazch ca yogo'loļ no'ole yezica'chle. Na' lecze bidaon' no'ona' soabe' mbalaz. ⁴³ Chebanda' le' naco' xņa' Xana' zedeņa'o neda'. ⁴⁴ Con cate' benda' chguapo' neda' tiox, bidao' čhian' lecze bebebe', bxite' bžiabe' lo' lian'. ⁴⁵ Zo' mbalaz da' gweyji'o gac can' gw-na xtiža' Diosen' dan' gož anglen' le'.

⁴⁶ Nach Marían' gwne':

Chonxena' Xancho Diosen' do yichj do laža'.

⁴⁷ Na' do yichj do laža' chebechgüeda' Dios ben' bebeje' neda' lo da' malen'.

⁴⁸ Ba beyaše'de' neda' naca' xmose' la'czļa' bibi zaca'. Na' ņa'a beņe' yesenita' toļi tocaņe yesene' neda' zoa' mbalaz.

⁴⁹ Dios ben' chac chon da' nono gac gon ba bene' da' güen juisyw len neda'.

Toz len' naque' beņe' laždao' xilaže' juisyw.

⁵⁰ Na' note'teze beņe' chesape' le' bala'aņ do yichj do laže', Diosen' cheži'ilaže'de' legaque'.

Cheži'ilaže'de' beņe' že' ņa'a na' yeži'ilaže'de' xi'in diaža čhegaque' ca'.

⁵¹ Bač blo'e Diosen' beņačen' yeļa' guac che'.

Na' ba bolague' beņe' ya'laže' ca'.

⁵² Ba bene' cont beņe' gwnabia' ca' bich yesenabi'e. Na' beņe' bi naque' beņe' blao, Diosen' ba bnežjue' latje yesaque' beņe' blao.

⁵³ Na' beņe' chesedon, Diosen' ba bnežjue' legaque' da' zan da' güen.

Na' beņe' gwņi'a ca', ba bose'e legaque', bibi bonežjue' legaque'.

⁵⁴ Nach ba goclene' chio' beņe' Israel naccho ca' xmose'.

Ba blo'ede' bitw ganlaže' chio', san ba cheyaše' cheži'ilaže'de' chio'.

⁵⁵ Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža čhe da' Abrahamņa' toļi tocaņe.

⁵⁶ Na' cate' ba goc šoņe bio' zoa Marían' len Elisabeten', nach Marían' beyej liže'.

Golje Juan beņe' bzoe' beņe' nis

⁵⁷ Na' cate' bžin ža san Elisabeten', gwzane' bi' byo dao'. ⁵⁸ Na' cate' goseneze beņe' gualiž čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. ⁵⁹ Na' goc xono' ža goljbe' na' jasezoe'be' seņw dan' že' circuncisión can' gosone' len yogo' bi' byo dao' bi' gos-aljbe' lo diaža čhe da' Abraham. Na' gosaclaže' si' labe' Zacarías can' le xaben', ⁶⁰ perw xņa'be' gwne':

—Bi gac. Cheyaļa' si'be' Juan.

⁶¹ Na' legaque' gose'ene':

—Notno diaža čhele nita' beņe' zjale ca', ņeca xozxta'ole.

⁶² Na' gosone' seņw gosenabde' xaben' nac che'nde' si' labe'. ⁶³ Nach bene' seņw gwņabe' to yagla' dao' da' bzoje': "Si' labe' Juan." Na' yogüe' besyebande'. ⁶⁴ Beyož bzoje' da'na', la' gocte beņie', nach la' gwzolaote be'e diža' benxene' Diosen'. ⁶⁵ Na' besyebane beņe' gualiž čhegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'. ⁶⁶ Na' yogo'loļ beņe' gosende' dižan' gosone' xbab lo' yichjlažda'ogüe' čhe da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

⁶⁷ Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

⁶⁸ Chonxena' Xancho Dios ben' chonxen chio' beņe' Israel.

Cheyaše' cheži'ilaže'de' chio' naccho nación čhe' na' ba chsele' beņe' yebej chio' lo da' malen'.

⁶⁹ Na' bena' bač za' cont yebej chio' lo da' malen', naque' beņe' gwnabia' gual,

na' naque' xi'in diaža čhe da' rey David ben' goc xmos Diosen'.

⁷⁰ Chac can' gwna Diosen' len cho'a da' beņe' ca' gwsele' cani', beņe' gosac lo ne'e goso'e xtižen'.

⁷¹ Ba za' ben' gwne' yosle' chio' lo na' yogo' beņe' chesegue'e chio'.

⁷² Chac can' gože' da' xozxta'ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gac-lene' chio'.

⁷³ Diosen' chone' can' gwlo'e da' balj lao da' xozxta'ocho da' Abraham gože'ne' gaccze can' gwne'.

⁷⁴ Gwne' yosle' chio' lo na' beņe' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho,

na' šejcho lïcha gonxenchone' šlac de yeļa' mban çe-cho.

⁷⁶ Nach Zacaríasen' gože' bdao' čhen':

Bdao' čhia', beñač yesene' čhio' naco' beņe' choe' xtiža' Dios, Dios ben' naque' la'zelagüe beņe' blao.

Yesene' ca' da' cuialaguo' lao Xančon' na' go'o xtižen' cont nita' beņe' yosozenague' çe' cate' yide'.

⁷⁷ Gwsed gwlo'edo' neto' can' chaclaže' Diosa' yebeje' čhio' naccho nación çe' lo da' mala' na' yezi'xene' xtoļa'čon'.

⁷⁸ Diosen' cheyaše' cheži'ilaže'de' čhio',

le len' gwlo'e be'ni' çe' lo' laždao' čhio' beñač.

⁷⁹ Cue'e be'ni' çe' lo' yičhjaždao' čhio' naccho ca beņe' chaš ga nac čhoļ, čhio' chžebcho gatcho.

Na' gwzejni'ide' čhio' beñač naquen' soa cuzcho yežlio nga.

Can' be' Zacaríasen' xtiža' Diosen'.

⁸⁰ Na' Juanna' zej chča'obe' zejte chac yičhjaž-da'oben' can' chazlaže' Diosen'. Na' jasoe' latje daš. Na'ate zoe' cate' gwzolagüe' gwđixjue'ede' xtiža' Diosen' len beņe' Israel ca'.

Caten' golje Jesúsen'

(Mt. 1:18-25)

2 Na' lecz šlac gwnabia' rey César Augusto, bene' mandadw gwyas to censo cont neзде' baļ beņe' že' to to yež da' zjachi' doxen yežlio gan' chnabi'e. ² Na' lecz cana' Cirenio naque' gobernador gan' nzi' Siria. Na' naquen da' nechw bčhel'e' baļ beņe' že' to to yež. ³ Na' yogo'loļ beņe' jaya'aque' lažgaque' jasyede cuent cuine' cont bosochel'e' le'. ⁴ Na' José naque' diaža çe da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. ⁵ Beyeje' jayde cuine' cuent na' zenče'ne' ol' çe' Marían' perw biņa' yeseca'a lježe'. Na' Marían' ba no'e bdao'. ⁶ Na' šlac nite' Belén bžin ža sane'. ⁷ Na' gwxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaque'.

Angl ca' bosozende' beņe' güeyoe xila' ba golje Jesúsen'

⁸ Na' že'na' yiçe' çe yež Belén na'ate že' beņe' güeyoe xila' chesape' xila' čhen'. ⁹ Na' to angl beņe' gwseļa' Xancho Diosen' bžine' gan' nita' beņe' güeyoe xila' ca', na' be'ni' çe Xancho Diosa' gwyechjen bsenin' gan' nite'na'. Na' besežebchgüe'. ¹⁰ Na' gož angla' legaque': —Bitw žeble. Na'a chixjue'eda' le'e to diža' güen da' yesebechgüe yogo'loļ beņe'. ¹¹ Na'aža lo yež çe rey David ba golje bena' gac yebeje' beñačhen' lo da' mal. Naque' Cristo, na' zeje diža' naque' ben' gwseļa' Dios cont nabi'e, na' lecze naque' Xancho. ¹² Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

¹³ Beyož gwna angla' ca' la' besežinte beņe' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

¹⁴ ;Chonxencho Diosa' ben' zoa yaba, na' lo yežlio yesezoa yesebez beñačhen' binlo, con be-na' cheson can' chazlaže' Diosen'.

¹⁵ Na' cate' besyeya'ac angl ca' zjaya'aque' yaba, na' beņe' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwseļa' Xančon' angl quinga bedesedixjue'ede' čhio'.

¹⁶ Na' beseya'acses beņe' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'.

¹⁷ Beyož besele'ede' can' ba goquen, na' gosoe' diža' çe bdao'na' len beņe' ca' yezica'chle ca nac dan' gož anglen' legaque'. ¹⁸ Na' yogo'loļ beņe' ca' gosende' diža' dan' gosoe' beņe' güeyoe xila' ca' besyebande'.

¹⁹ Na' lecze Marían' gwlo'o yičhje' yogo'loļ diža' dan' gosoe' beņe' güeyoe xila' ca' na' bene' xbab lo' yičhjaž-da'ogüe' bi zejen. ²⁰ Nach besyeya'ac beņe' güeyoe xila' ca' chesonxene' Diosen'. Na' cheso'e diža' nacchgua Diosen' beņe' güen da' ba goc yogo'loļ da' ba gosende' na' besele'ede' dan' gož anglen' legaque'.

Diaža çe Jesúsen' jasesane'be' lo' yodao' blaona'

²¹ Cate' goc xono' ža golje bdao'na' jasezoe'be' seřw da'na' nzi' circunciación, na' bososi'e labe' Jesús, can' ben anglen' mandadw cate' za' gua' Marían' lebe'.

²² Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. ²³ Gosone' can' nyoj ley çe' dan' ža: "Yogo' bi' byo dao' bi' nechw cheyaļa' gacbe' lo na' Dios." ²⁴ Nach gosonxene' Diosen', gosone' can' ža ley çe Xancho Dios dan' žan: "Cheyaļa' gotle čhop ngolbex o čhope plomxtil."

²⁵ Na' Jerusalénna' gwzoa to beņe' le' Simeón. Benan' gwyejcze' bene' da' güen lao Diosen' na' benxene' le', na' gwleze' batcan' yid Cristo ben' seļa' Xancho Diosen' cont yebeje' beņe' Israel ca' lo da' mal. Na' Spiritw çe Diosen' gwyo'on lo' yičhjaždao' Simeón, ²⁶ na' bzejni'in le' bi gate' še biņa' le'ede' Criston'. ²⁷ Na' Spiriton' benen cont gwyeye' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley čhegaquen' mandadw. ²⁸ Nach Simeónna' gwlene'be' nach benxene' Diosen', gože'ne':

²⁹ Xana' Dios, bačh goc can' gwnaon'.

Beņ latje yeyeda' binlo gana' zo'na', neda' naca' xmoso'.

³⁰ Ba ble'eda' bena' zedyelej neto' lo da' mal.

³¹ Naque' beņe' gwnalažo' gwseļo' neče yogo'loļ beñač.

³² Na' cue'e be'ni' çe' lo' yičhjaždao' beņe' cbi zjanaque' beņe' Israel.

Na' gaque' la'zelagüe beņe' zaca' len neto' beņe' Israel.

³³ Nach xaben' len xna'ben' besyebande' ca diža' çebe' dan' be' Simeónna'. ³⁴ Na' Simeónna' gwñabde' Diosen' cont gac güen čhegaque'. Na' gože' Marían':

—Beŋe' Israel ca' yesejnilaže' xi'iŋo' nga yesenite' mbalaz, na' beŋe' Israel ca' cbi yesejnilaže'ne' bi yesenite' mbalaz. Zedelo'ede' beŋačhen' can' chaclaže' Diosen' goncho, perw zane' bi yesejle'e' che'. ³⁵ Nach Diosen' gwlo'e' non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguoŋ catequen' žaglaguo' len da' gac che'.

³⁶ Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'iŋ da' ben' le' Fanuel na' naque' diaža che da' Aser. Bšagne'e' cate' naque' no'ol güego', perw na' gaž izga gwzoalene' beŋe' che' na' gote', na' bga'aŋe' güezebe. Na' Anan' ba naque' to beŋe' gole, ³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüje bene' gwbas na' con gwzoachgüe' bol güiže' Diosen'. ³⁸ Na' goquen' gwbiga' Anan' gan' zoa Josén' len Marían' lo' yodao'na' na' be'e yeļa' choxclen che Diosen' bačh gwsele' Jesúsén'. Na' be'e diža' che Jesúsén' len yogo' beŋe' ca' že' Jerusalén ben' chesebeze' batca' seļa' Diosen' ben' yebeje' legaque' lo da' malen'.

Jaya'aque' Nazaret

³⁹ Nach Josén' len Marían' cate' beyož gosone' yogo'lo' dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. ⁴⁰ Na' Jesúsén' zej chcha'ogüe' na' zej chchach-laže'. Na' ca zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsén' chašil yodao' blaona'

⁴¹ Na' xaxŋe'e' ca' yogüiz chja'aque' lŋi da' chaļa' Jerusalén chjaseze'ede' can' goc cate' Diosen' betue' bi' nechw che yogo' beŋe' Egipto na' bosle' beŋe' Israel. Šižinw ize Jesúsén' cate' goseche' xaxŋe'en le' ja'aque' lŋin' Jerusalén. ⁴³ Na' cate' gwde lŋina' besyeya'aque', perw Jesúsén' bega'aŋe' ciuda Jerusalén. Na' xŋe'ena' len Joséna' bi gosacbe'ede'. ⁴⁴ Con gosacde' ba zjayde' txen len beŋe' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža čhegaque' na' no beŋe' xmgüe', ⁴⁵ perw bitw besyeželde' le'. Nach besyebi'e' jaya'aque' Jerusalénna' da' yoble cont šjasyediljue' le'.

⁴⁶ Na' beyoŋ žach besyeželde' Jesúsén' chašil yodao' blaona', chi'e gacho' beŋe' ca' chososed chosolo'ede' dan' bzoj da' Moisés. Jesúsén' chzenague' xtiža'gaquen' na' zanen chŋabde' legaque'. ⁴⁷ Na' yogo'lo' beŋe' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' beŋe' ca' zjansed dan' bzoj da' Moisés. ⁴⁸ Na' cate' be-sele'e xaxŋe'en le', besyebande', na' xŋe'en gože' le':
—Xi'indagua', žbixčhen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsén' gože' legaque':

—žBičhen' beyiljwle neda'? žBi ŋezele liž Xa' ngan' cheyaļa' soa'?

⁵⁰ Perw xaxŋe'e' bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxŋe'e' bzenague' čhegaque'. Na' gwlec yičj xŋe'ena' yogo'lo' dan' goca'.

⁵² Na' ca' chac zej chejni'iche Jesúsén' na' zej gwcha'oche', na' Diosen' len beŋača' zej chesazlaže'che' le'.

Juan gwduxjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

3 Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' beŋe' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisantias gobernador che distritw Abilinia. ² Nach lecze izna' Anás na' Caifás gosacche' bxož blao che beŋe' Israel. Izna' Juan ben' naque' xi'iŋ Zacarías gwzoe' to latje daš. Nach Diosen' be'lene' Juanna' diža'. ³ Na' Juanna' gwyeye' yogo'lo' yež dan' nita' gaļa'ze yegw Jordán, jatixjue'ede' yogo'lo' beŋe' cheyaļa' yesyetingde' xtoļa'gaque' na' yesezoe' nis cont ŋitlao xtoļa'gaquen'. ⁴ Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chŋe' zižje latje dašen', že':

“Le gonšagüe' yichjlažda'olen' cont soale gwzenagle che Xanchoŋ' cate' yide',

le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše',

na' no nez da' nacchgua bxoca' yesyeyaquen liča, na' no nez da' nžaš nche'eŋe yesyeyaquen ba'a.

⁶ Na' yogo'lo' beŋe' yesacbe'ede' can' chaclaže' Diosen' yebeje' beŋačhen' lo da' mal'.”

⁷ Na' beŋe' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchgualle beŋe' zgot na' beŋe' gwxiye'.

žChaquele guac yelale lao castigw dan' seļa' Diosen' caten' gone' yeļa' justis che beŋačhen'? ⁸ Še da' li ba betinjele xtoļa'le, cheyaļa' gonle da' nac güen cont yesacbe'e beŋe' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoļa'len' lagüe da' nacle xi'iŋ diaža che da' Abrahamna'. ⁹ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, čhog xan yaga' len na' gwzeyen'.

¹⁰ Nach beŋe' ca' chosozenag xtiže'na' gosenabde' Juanna', gose'ene':

—žBica' da' cheyaļa' gonto'?

¹¹ Na' gože' legaque':

—Ben' nape' čhope camis cheyaļa' gwnežjue' ton che beŋe' bi de che'. Na' lecze ca' che ben' de da' gagüe', cheyaļa' gwnežjue' che ben' bi de gagüe'.

¹² Na' cate' to čhope bene' güečhixjw ca' jasebigue' cont gwzoa Juanna' legaue' nis, na' gose'ene':

—Maestrw, žbica' da' cheyaļa' gonto'?

¹³ Na' gože' legaue':

—Bitw gwčhixjwchle ca da' cheyaļa' yesejixjue'.

¹⁴ Na' to čhope bene' ca' zjanac soldadw łecze gosenabde' le', gose'ene':

—žChix neto'? žBica'ch da' cheyaļa' gonto'?

Na' Juanna' gože' legaue':

—Bitw ca'ale da' de čhe bene', na' ŋeca gonlaže'le len da' yosbague'le bene' cont ca'ale xmechwgaue'. Łe gon banez len laxjwle.

¹⁵ Na' bene' ca' gosezoe' lez yid Cristo ben' naquen seļa' Diosen' yedenabi'e, na' gosacde' še Juanna' naque' Cristo. ¹⁶ Na' Juanna' gocbe'ede' xbab čhe-gaunen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw čhe Diosen' lo' yichjlažda'olen' ŋabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lečhja' no xele'. ¹⁷ Benan' gone' len beñačen' can' choncho cate' chdecho trigon' lo' rner. Čtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaue' cont šjasyenite' txen len le', na' bene' bi chesejnilaže' le', seļe' legaue' lo' yi' gabiļen' dan' cbi chejol chenit.

¹⁸ Da' zanch da' gwna Juanna' gwđixjue'ede' legaue' diža' güen, na' gwŋeyoede' legaue' yesejle'en. ¹⁹ Nach Juanna' gwđile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' łecze be'e diža' yogo'loł da' mal dan' ba ben Herodes. ²⁰ Na' Herodesen', gualaz da' gwzenague' čhe Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis

(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' legaue' nis. Na' len Jesúsen' gwzoe' nis. Na' lo hora' Jesúsen' boļ güiže' Diosen' na' la' byaljwte yaba gan' zoa Diosen'. ²² Na' betj Spiritw čhe Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwŋe Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' čhio'.

Diaža čhe Jesúsen'

(Mt. 1:1-17)

²³ Na' ca do šichoa ize Jesúsen' cate' gwzolao bene' yogo'loł da' zedeyene'. Na' bene' ca' gwnita' na' gosone' xbab še naque' xi'ing Joséna'. Josén' naque' xi'ing Elí, ²⁴ na' Elí naque' xi'ing Matat, na' Matata' naque' xi'ing Leví, na' Levína' naque' xi'ing Melqui, na' Melquin' naque' xi'ing Jana, na' Janan' naque' xi'ing yeto ben' le' José. ²⁵ Na' Joséna' naque' xi'ing Matatías, na' Matatíasen' naque' xi'ing Amós, na' Amósen' naque'

xi'ing Nahum, na' Nahunŋa' naque' xi'ing Esli. Na' Eslin' naque' xi'ing Nagai, ²⁶ na' Nagain' naque' xi'ing Maat, na' Maata' naque' xi'ing Matatías, na' Matatíasen' naque' xi'ing Semei, na' Semein' naque' xi'ing José, na' Josén' naque' xi'ing Judá. ²⁷ Na' Judán' naque' xi'ing Joana, na' Joanan' naque' xi'ing Resa, na' Resan' naque' xi'ing Zorobabel, na' Zorobabelen' naque' xi'ing Salatiel, na' Salatielen' naque' xi'ing Neri, ²⁸ na' Nerin' naque' xi'ing Melqui, na' Melquin' naque' xi'ing Adi, na' Adin' naque' xi'ing Cosam, na' Cosanna' naque' xi'ing Elmodam, na' Elmodanna' naque' xi'ing Er. ²⁹ Na' Era' naque' xi'ing Josué, na' Josuén' naque' xi'ing Eliezer, na' Eliezeren' naque' xi'ing Jorim, na' Jorinŋa' naque' xi'ing Matat. ³⁰ Na' Mataten' naque' xi'ing Leví, na' Levín' naque' xi'ing Simeón, na' Simeóna' naque' xi'ing Judá, na' Judán' naque' xi'ing José, na' Josén' naque' xi'ing Jonán, na' Jonánŋa' naque' xi'ing Eliaquim. ³¹ Na' Eliaquinŋa' naque' xi'ing Melea, na' Melean' naque' xi'ing Mainán, na' Mainánŋa' naque' xi'ing Matata, na' Matatan' naque' xi'ing Natán. ³² Na' Natánŋa' naque' xi'ing David, na' Davida' naque' xi'ing Isaí, na' Isaín' naque' xi'ing Obed, na' Obeda' naque' xi'ing Booz, na' Boozen' naque' xi'ing Salmón, na' Salmónŋa' naque' xi'ing Naasón. ³³ Na' Naasónŋa' naque' xi'ing Aminadab, na' Aminadaba' naque' xi'ing Aram, na' Aranna' naque' xi'ing Esrom, na' Esronŋa' naque' xi'ing Fares. Na' Faresen' naque' xi'ing Judá, ³⁴ na' Judán' naque' xi'ing Jacob, na' Jacoben' naque' xi'ing Isaac, na' Isaaquen' naque' xi'ing Abraham, na' Abrahanna' naque' xi'ing Taré, na' Tarén' naque' xi'ing Nacor. ³⁵ Na' Nacoren' naque' xi'ing Serug, na' Seruga' naque' xi'ing Ragau, na' Ragaun' naque' xi'ing Peleg, na' Peleguen' naque' xi'ing Heber. Na' Heberen' naque' xi'ing Sala, ³⁶ na' Salan' naque' xi'ing Cainán, na' Cainánŋa' naque' xi'ing Arfaxad, na' Arfaxaden' naque' xi'ing Sem, na' Senŋa' naque' xi'ing Noé, na' Noén' naque' xi'ing Lamec. ³⁷ Na' Lamequen' naque' xi'ing Matusalén, na' Matusalénŋa' naque' xi'ing Enoc, na' Enoca' naque' xi'ing Jared, na' Jareden' naque' xi'ing Mahalaleel. Na' Mahalaleela' naque' xi'ing Cainán, ³⁸ na' Cainánŋa' naque' xi'ing Enós, na' Enósen' naque' xi'ing Set, na' Seta' naque' xi'ing Adán, na' Adánŋa' naque' xi'ing Dios.

Satanásen' goclažen' co'oyeļan' Jesúsen' cont gone' da' mal

(Mt. 4:1-11; Mr. 1:12-13)

4 Na' Spiritw čhe Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. ² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyeļan' le' cont gone' da' mal. ³ Nach gož Satanásen' le':

—Še le' naco' Xi'ing Dios, gož yej nga yeyaquen yetex-til.

⁴ Na' gož Jesúsen' len:

—Nyojcze Xtiža' Diosa' žan: "Gague yeļa' guagw na'zen' chyažje čhio' beñač cont gac bancho, san łecze chyažjecho yogo'loł diža' dan' ža Diosen'."

⁵ Na' gwçhe' Satanásen' le' to lo ya'a sibe na' be-dao'nez blo'en le' yogo'lo' nación da' zjachi' yežlio.

⁶ Nach gožen le':

—Doxen ye'la' gwnabia' da' de yežlio nga naquen lo na' cont gwnežjuan' con no che'nda'. Še le' gwzoo xibo' gonxeno' neda', nach goŋa' le' ye'la' gwnabia' che nación ca' zjachi' yežlio nga na' len ye'la' zaca' ye'la' xdan che nación ca'.

⁸ Nach Jesúsen' gože' Satanásen':

—Becuas ca'ale Satanás. Nyojcz Xtiža' Diosen' žan: "Cheya'la' šejnilaže'cho Xancho Diosen' na' toz le' gonx-encho."

⁹ Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', ¹⁰ le' nyojcz Xtiža' Diosen', žan:

Sela' Diosen' be'ne' ca' zjanac angl che' yesaclene' le' na' yesape' le',

¹¹ yesoxe' le' cont bi chego' no yej.

¹² Nach Jesúsen' gožen':

—Lecz ca' nyoj Xtiža' Diosen' žan: "Bitw goncho Xancho Diosen' prueba še lede' can' žen'."

¹³ Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

Jesúsen' gwzologüe' chyixjue'ede' diža' güen che Diosen' distritw Galilea

(Mt. 4:12-17; Mr. 1:14-15)

¹⁴ Nach Jesúsen' beyeje' distritw Galilea, na' ye'la' guac che Spiritw che Diosen' gwzoan len le'. Na' yogo'lo' be'ne' že' yež ca' zjachi' doxen Galilea gosenezde' che Jesúsen'. ¹⁵ Na' Jesúsen' bsed blo'ede' legaque' lo' yodao' chegaquen', na' yogo'lo' be'ne' ca' gosonxene' le'.

Bežin Jesúsen' Nazaret

(Mt. 13:53-58; Mr. 6:1-6)

¹⁶ Na' bežin Jesúsen' yež Nazaret gan' gwcha'ogüe', na' gwo'e yodao' že' che Dios can' ba yolagüe' chone', na' gwzechede' cont gwlab'e'. ¹⁷ Na' ben' yo'o lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',

na' Diosen' gwleje' neda' zedeya' diža' güen len be'ne' yaše'.

Na' gwsele' neda' zedeyena' cont yesyeyaclaže' be'ne' ca' chesacyaše'de'.

Na' za'a cont gwsana' be'ne' ca' zjade ližya.

Na' zedeyena' cont yesyele'e be'ne' lcho'.

Na' be'ne' chy chzaca', zedeyena' cont noch no yosoči yososaque' legaque'.

¹⁹ Na' zedetixjue'eda' ba bžin že gaclen Diosen' be'načen'.

²⁰ Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e. Na' yogo' be'ne' ca' nita' yo-

daon' la' gosenat'ie' le'. ²¹ Nach gwzolao be'e diža' gwne':

—Ža ŋa'aža ba chac can' že Xtiža' Diosen' dan' ba benele nga.

²² Na' yogo' be'ne' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

²³ Nach gož Jesúsen' legaque':

—Ye'ljale neda' can' že diža' dan' de: "Be'ne' güen rmed le', beyon cuino'." Na' lecz ye'ljale neda': "Dan' chesene' beno' yež Capernaum da' bebane be'ne', lecz can' cheya'la' gono' lažcho nga."

²⁴ Nach goze'e legaque':

—Da' li chnia' le'e, be'ne' gualaž che note'teze be'ne' choe' xtiža' Diosen' bitw chesezi'e che'. ²⁵ Ca tiemp che da' Elías ben' be' xtiža' Diosen' cani', bibi yejw goc šoŋ iz yo gašje na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca' tiempa', ²⁶ perw Diosen' bi gwsele' Elíasen' cont gaclene' ne to be'ne' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. ²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan be'ne' Israel be'ne' gosacšene len yižgüe' da' nzi' lepra. Ne to legaque' bi beyon Eliseon'. Toz be'ne' zito' be'ne' Siria, ben' le' Naamán, beyon Eliseon'.

²⁸ Na' yogo' be'ne' ca' že' yodao'na' cate' gosende' dan' gwna Jesúsen' beseža'achgüe'. ²⁹ Na' la' besyezoža'te' na' besyebaje' Jesúsen' yežen', na' goseche'ene' to lo ya'a da' zoa ga'la'ze, gosacclaže' yososlažoe'ne' lo ya'a na'ate, ³⁰ perw bibi goc yesonde' le'. Con beza' Jesúsen' bedie' gacho' gaque'.

Jesúsen' bebeje' da' xigüe' dan' yo'o yichjlaždao' be'ne'

(Mr. 1:21-28)

³¹ Na' jasoe' yež Capernaum gan' mbane Galilean', na' že che Dios bsed blo'ede' be'ne' ca' že' lo' yodao'na'.

³² Na' be'ne' ca' besyebande' ca' nac dan' bsed blo'eden', le bzejni'ide' cacze to be'ne' nežde' cayanen' nac xbab che Diosen'.

³³ Lo' yodao'na' gwzoo to be'ne' yo'o nyaze' da' xigüen'. Na' bosye'e gwne':

³⁴ —¿Bixchen' chgoša' chlaže' chio' len neto', Jesús be'ne' Nazaret? ¿Zedežiayo'o neto'? Neda' nombi'a le' na' nežda' naco' be'ne' laždao' xilaže' juisyw ben' gwse'la' Diosen'.

³⁵ Nach Jesúsen' gwdile' da' xigüen' na' gožen':

—iŠšago'! Bechoj yichjlaždao' benga.

Na' bchix da' xigüen' bena' gacho' be'ne' ca' že'na' nach bechojen. Perw bitw benen le' zi'. ³⁶ Na' leca besyebane yogo' be'ne' ca', nach gose' lježe':

—¿Bixen' chac? ¿Bixe da' coben' chlo'e benga? Nacia' nape' ye'la' chnabia' na' ye'la' guac, le chone' mandadw na' la' chechojte da' xigüe' da' yo'o nyaz be'ne'.

³⁷ Na' ca nac dan' ben Jesúsen' gos gwłalje dižan' doxen lagüe yež ca' zjachi' do na'.

Jesúsen' beyone' taobi'in che Simónna'
(Mt. 8:14-15; Mr. 1:29-31)

³⁸ Na' cate' beze'e yodao'na', na' gwyeye' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'. ³⁹ Na' Jesúsen' gwzeche' cuite' gan' die', na' bcheque' gwdi'le' da' lan' cont bechojen. Nach taobi'in che Simónna' la' gwyastie' na' bsiñ'e da' gose'ej gosagüe'.

Jesúsen' beyone' beñe' zan
(Mt. 8:16-17; Mr. 1:32-34)

⁴⁰ Na' cate' ba chxoa gwbižen' goseche'e con yogo' beñe' chese'e yižgüe' jasesane' legaque' lao Jesúsna'. Na' Jesúsen' gwxo'a ne'e yichj to toe' na' beyone' le-gaque'. ⁴¹ Na' lecz ca' bebej Jesúsen' da' xigüe' da' yo'o yichjlaždao' beñe' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsen' gwdi'le' legaquen na' bitw be'e latje bi yesenan, le gosenenzen naque' Cristo ben' gwlej Diosen' cont yedenabi'e.

Jesúsna' gwde' doxen Galilean' bsd blo'ede'
(Mr. 1:35-39)

⁴² Na' beteyo cate' gwyeni', beze'e na' beyeye' to latje ga nono nla'. Na' beñe' ca' besyeyiljue'ne' na' ja'aque' gan' zoen'. Na' gosacłaze' yosozague' Jesúsen' cont bi yeze'e. ⁴³ Na' Jesúsen' gože' le-gaque':

—Lecz ca' beñe' ca' nita' yež yoble cheyala' šja-lo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' le-gaque' xtižen'.

⁴⁴ Ca' goquen', Jesúsen' gwde' to to yež che distritw Galilea na' bsd blo'ede' beñe' ca' lo' yodao' che-gaquen'.

Gosezene' be zan bel ya'a
(Mt. 4:18-22; Mr. 1:16-20)

5 Na' šlac zecha Jesúsen' cho'a nisdao' da'na' nzi' Genesaret, besežag beñe' zan na' bosochite' Jesúsen' da' gosacłaze' yosozenague' xtiža' Diosen' dan' bi'e cho'a nisdan'. ² Na' Jesúsen' ble'ede' chope barcw dao' cho'a nisdan'. Na' beñe' gwxen bel ca' ba besyežaše' lo' barcon' ba chesyeyibe' yixjw bel che-gaquen'. ³ Na' Jesúsen' gwo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' beñe' ca' že'na'. ⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senje belen'.

⁵ Nach Simónna' gože' Jesúsen':

—Maestrw, ba bento' žin do yel na' ne to nono bdo'la'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw chegaquen' zjanyico-co'ten belen', yezeze ca' yesyecheza'ten. ⁷ Na' beñe' ca' zjanita' lo' barcw che Simónna' gosone' señw gosaxe' beñe' lježen' že' yeto lo' barcw yoble cont yesacłene' le-gaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel zan lo'enña'.

⁸ Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to beñe' mal, bibi zaca' par so' nga len neda'.

⁹ Gwne' ca' le le' t xen len beñe' lježe' ca' že' lo' barcon' besyebanchgüede' da' gosezene' bel zanña'.

¹⁰ Lecz ca' besyebane xi'in ben' le Zebedeo, zjanac čop biše'tie', Jacobo len Juan. Beñe' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' beñe' gwxen bel, na' chebejo' belen' lo' nisen'; perw na'a gona' cont gaxle beñe' yesyechoje' lo' da' malen'.

¹¹ Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'acłene' Jesúsen'.

Jesúsen' beyone' to beñe' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to beñe' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' bol güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxo'en' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. ¹⁴ Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyey jana' bxoza' cont le'ede' bač beyacdo'. Na' bnežjo da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' beñe' yesenežde' ba beyacdo'.

¹⁵ Na' tža tža gos gwłalje diža' ca' nac yela' guac dan' ben Jesúsen'. Na' besedob beñe' zan cont bosozenague' xtiža' Jesúsen' na' cont beyone' le-gaque' len bite'teze yižgüe' da' chese'ede'. ¹⁶ Nach Jesúsen' bchoje' to ši'i güeje jal güiže' Diosen' to latje daš.

Jesúsen' beyone' to beñe' bi chda šla'a ñi'a ne'e
(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' beñe'. Na' gała'ze zjanita' zan beñe' Israel beñe' zjanzi' fariseo. Na' lecze zjachi' yeto cuen beñe' ca' chososed chosolo'ede' dan' bzoj da' Moisés. Beñe' ca' že'na' za'aque' yogo'lo' yež ca' gan' mbane distritw Galilea len distritw Judea, na' lecze ba'le' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesúsna' na' beyone' beñe' güe' ca'. ¹⁸ Na' besežin xonj beñe' zjanlene'

to beṇe' xinj, beṇe' bi chda šla'a ŋi'a ne'e, zjanxoe' le' to lo cam dao'. Na' gosaclaže' yesedie' šjasesane' le' lao Jesús'a'. ¹⁹ Na' da' že'chgua beṇe' zan bi goc latje yesedie' šjasesane' beṇe' güen' lao Jesús'en'. Nach beṇe' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol beṇe' ca' že' lo' yo'ona' cont bžine' lao Jesús'en'. ²⁰ Cate' gocbe'e Jesús'en' gosejnilaže' le' na' gože' beṇe' güe'na':

—Xi'ina', ba bezi'xena' xtołon'.

²¹ Na' beṇe' ca' chososed chosolo'e dan' bzoj Moisés'a' na' beṇe' fariseo ca' gosene':

—¿Non' chaque benganaque' chṇe' ca'? Chon cuine' ca' Dios. Le nono zoa beṇe' gac yezi'xene' xtoł'a' beṇačhen'. Toz Diosen' gac yezi'xenen'.

²² Jesús'en' gocbe'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? ²³ Še yapa'ne': "Ba bezi'xena' xtoł'ona'", bi nezele še napa' yela' gwnabia' cont yezi'xena' xtoł'e'na'. San še yapa'ne':

"Gwyas na' gwda", na' nacbia' še napa' yela' guac gac can' gwnian'. ²⁴ Na'ach gona' cont gacbe'ele napa' yela' gwnabia' cont yezi'xena' xtoł'a' beṇačh, neda' naca' be'na' gwseł'a' Diosen' golja' beṇačh.

Nach gože' beṇe' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste beṇe' xinja', cheseṇa'te beṇe' ca' nita'na'. Nach beyoa' xcamen' na' beze'e zjayda liže' chonxene' Diosen'. ²⁶ Na' yogo'loł beṇe' ca' že'na' besyebande' yela' guac che Jesús'en' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo ṇa'aža.

Jesús'en' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesús'en' na' ble'ede' to beṇe' güečhixjw beṇe' le' Leví, chi'e latje gan' chčhixjue'. Na' Jesús'en' gože' le':

—Da len neda'.

²⁸ Nach gwzoža' Levín' gwlejyichje' yogo' xšinłaze' na' gwwejlene' Jesús'en'.

²⁹ Nach Levína' bene' to lṇi xen ližen' par Jesús'en', na' ja'ac beṇe' zan beṇe' güečhixjw ca' na' beṇe' yezi-ca'chle na' gosebe'lene' le' cho'a mesen' gosagüe'.

³⁰ Na' beṇe' ca' chososed chosolo'ede' dan' bzoj Moisés'en' na' len beṇe' fariseo ca' gosacyožlene' beṇe' ca' zjanaque' Jesús'en' txen, gose'e legaque':

—¿Nacxečhen' che'ej chagwle txen len beṇe' güečhixjw na' yebałe beṇe' güen da' xinj ca'?

³¹ Jesús'en' gože' legaque':

—Beṇe' cbi chesacšene bitw cheseyažjde' beṇe' güen rmed. Beṇe' ca' chesacšene, legaquen' cheseyažjde' beṇe' güen rmed. ³² Gague beṇe' ba zjanaque' beṇe' güen len Diosen' zedenyoeda' cont yesyetinjde' xtołen', san beṇe' güen da' xinj. Legaque' zjanaque' ca' beṇe' cheseyažjde' beṇe' güen rmed.

Goseṇabde' Jesús'en' bixčhen' cbi gwleje' tgüeje' ža gwbas

(Mt. 9:14-17; Mr. 2:18-22)

³³ Nach bał beṇe' gose'e le':

—Beṇe' ca' zjanaque' txen len Juan na' beṇe' zjanaque' txen len beṇe' fariseo ca' chesonchgüe' gwbas chosoł güiže' Diosen'. Perw na' beṇe' ca' zjanaque' le' txen chese'ej chesagüe'. ¿Bixčhen'?

³⁴ Nach gož Jesús'en' legaque':

—¿Guac yesezoa gwbas beṇe' chaxe' to ga chac yela' güešagna' šlac ben' bšagnan' zoalene' legaque'? Bi gac. ³⁵ Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len beṇe' ca' zjanaque' neda' txen.

³⁶ Na' Jesús'en' be'e jempl nga bzejni'ide' legaque':

—Notno zoa beṇe' čheza' xe' da' cobe na' yode'en de'exo'. Še gone' ca' gwžiyae'e xe' da' coben' na' xe' de'exon' bitw gac leben len lache' coben'. ³⁷ Na' ṇeca zoa beṇe' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. ³⁸ Cheyał'a' yesegue'e vino coben' lo' yid cobe cont bibi gaquen. ³⁹ Na' ca' nac beṇe' bačh yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

Beṇe' ca' zjanaque' Jesús'en' txen goselechje' trigon' gosagüen' ža che Dios

(Mt. 12:1-8; Mr. 2:23-28)

6 Na' to ža nac ža che Dios, Jesús'en' gwdie' gan' nyaž trigw len beṇe' ca' zjanaque' le' txen. Nach beṇe' ca' zjanaque' le' txen goselechje' trigon' na' gosexoben' gosagüen'. ² Na' besele'e bał beṇe' fariseon' can' gosone' na' gose'e legaque':

—¿Bičhen' chonle da' bi de lšens goncho ža che Dios?

³ Na' Jesús'en' gože' legaque':

—¿Biṇa' gwlable can' ben da' rey David to ža cate' le' na' beṇe' lježe' ca' gosedone'? ⁴ Gwyo'o Davin' liž Dios na' jaži'e yetextil da' nac che Dios da' bi chac gagw beṇe' bi nac bxoz, na' gwdagüen', na' lecze bnežjue' che beṇe' zja'ac len le'.

⁵ Na' lecz ca' gwna Jesús'en':

—Naquen lo' na' ṇia' bi da' nac güen goncho cate' nac ža che Dios, neda' naca' ben' gwseł'a' Diosen' golja' beṇačh.

Beyac to beṇe' nxo'oṇ šla'a taque'

(Mt. 12:9-14; Mr. 3:1-6)

⁶ Na' yeto ža che Dios gozeje' lo' yodaon' na' bsed blo'ede' beṇe' ca' že'na'. Na' ladjo beṇe' ca' zjaže'na' yo'o to beṇe' nxo'oṇ taque' lliča. ⁷ Na' beṇe' ca' chososed chosolo'e dan' bzoj da' Moisés na' beṇe' fariseo ca' chosogüia chesene'e Jesús'en' še yeyone' be'na' ža che Dios cont de da' yosode'ede' yesagüe' xya che'. ⁸ Na' gocbe'e Jesús'en' can' chesone' xbaben', na' gože' ben' nxo'oṇ taque':

—Gwzoža' na' gwzecha nga gachol.

Nach bena' bžine' gwzeche' lagüen'. ⁹ Na' Jesúsen' gože' beņe' ca' že'na':

—¿Bi da' cheyaļa' goncho ža čhe Dios? ¿Goncho da' güen, še goncho da' mal? ¿Cheyaļa' yoslacho beņe', še gwžiyai'chone'?

¹⁰ Jesúsen' gwņe'e yogo'te ben' že'na', nach gože' ben' nxo'oņ taque':

—Bļi naon'.

Nach bļien' na' taquen' beyaquen binļo. ¹¹ Na' beņe' ca' chososed chosolo'e leyna' na' len beņe' fariseon' ļe-ca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šižinw postlw

(Mt. 10:1-4; Mr. 3:13-19)

¹² Na' to ža gwej Jesúsen' to ļo ya'a jeļ güiže' Diosen'. Na' do yel be'lene' Diosen' diža'. ¹³ Na' cate' gwe'ni', goxe' beņe' ca' zjanaque' ļe' txeņ, nach gwleje' šižinwe' na' bsi'e ļegaque' postlw. ¹⁴ Beņe' qui gwleje': Simón ben' bsi'e Pedro, na' beņe' biše' Andrés, na' Jacobo, na' Juan, na' Felipe, na' Bartolomé, ¹⁵ na' Mateo, na' Tomás, na' Jacobo xi'iņ Alfeo, na' Simón ben nac cananista, ¹⁶ na' Judas beņe' biše' Jacobo, nach Judas Iscariote ben' bdie' Jesúsen' ļo na' beņe' chesegue'ede' ļe'.

Jesúsen' bzejni'ide' beņe' zan

(Mt. 4:23-25)

¹⁷ Na' beyetje' ļo ya'an len ļegaque' na' gwzeche' ga nac to laše' len beņe' ca' zjanaque' ļe' txeņ. Na' ļecze nita' beņe' zan beņe' za'ac doxen Judean', do ciuda Jerusalénna' na' do gan' mbane yež ca' zjanz' Tiro na' Sidón. Na' Tiro len Sidón zjachin' cho'a nisdao'. Na' len beņe' ca' nita' chosozenague' xtiža' Jesúsen' zjančixe baļ beņe' chese'e yižgüe'. Na' Jesúsen' beyone' ļe-gaque'. ¹⁸ Na' beņe' ca' zjajo'o zjanyaz da' xigüen' yichjlažda'ogaque', Jesúsen' bebejen'. ¹⁹ Na' yogo' beņe' goseyljue' nacle yesone' cont yeselapa' na'gaquen' ļe', ļe gosenēzde' nape' yela' guac cont yega'a yižgüe' čhegaquen' še yesechele'ne'.

Non' zoa mbalaz na' non' cbi zoa mbalaz

(Mt. 5:1-12)

²⁰ Na' Jesúsen' gwļis lagüe' gwņe'e beņe' ca' zjanaque' ļe' txeņ na' gože' ļegaque':

—Mbalaz zoa le'e beņe' yaše', le'e chzenagle čhe Diosen' cont chnabi'e yichjlažda'olen'.

²¹ 'Mbalaz zoa le'e chdonļe ņa'a, gwžin ža cate' bich tonļe.

'Na' mbalaz zoa le'e chbežle ņa'a, gwžin ža cate' gwx-ižle.

²² 'Neda' naca' ben' gwseļa' Diosen' golja' beņaçh. Na' mbalaz soale še dan' chejnilaže'le neda' chesegue'e beņe' le'e, na' chesyebeje' le'e ļo' yodao' čhegaque', na' chesene'e čhele, na' chesene' nacle beņe' mal. ²³ Ļe yebechgüe cate' chac da' quinga, na' ļe soa mbalaz, ļe Diosen' gone' cont gacchgua da' güen čhele cate' yežinļe gan' zoe'na'. Can' chesonde' le'e, ca'czen' goson

da' xozxta'ogaque' len da' beņe' ca' goso'e xtiža' Diosen' cani'.

²⁴ 'Na' nyaše'chguaze nac le'e beņe' gwņi'a. Chac güen čhele ņa'a, perw gague toļi točanen' gac čhele ca'.

²⁵ 'Nyaše'chguaze nac le'e dechgua da' chagwle ņa'a. Gwžin ža cate' bich bi gata' čhele.

'Nyaše'chguaze nac le'e chxižle ņa'a. Gwžin ža cate' yegüine'le na' cuežyaše'le.

²⁶ 'Nyaše'chguaze nac le'e chesonxen yogo'ļoļ beņe' le'e. Ca'czen' goson da' xozxta'ogaque', gosonxene' beņe' ca' goseziye'e gosene' cheso'e xtiža' Diosen' cani'.

Cheyaļa' gaquecho beņe' chesegue'ede' chio'

(Mt. 5:38-48; 7:12)

²⁷ 'Le'e chzenagle čhia', cheyaļa' gaquele beņe' chesegue'ede' le'e. Cheyaļa' gonļe da' güen len beņe' ca' chesegue'ede' le'e. ²⁸ Ļe ņab cont beņe' chesegue'ede' le'e ņite' mbalaz. Ļe soa ļe ņabe Diosen' gaclene' beņe' chososaca'zi' le'e. ²⁹ Še to beņe' čhaze' šļa'a xaga'le, ļe güe' dan' yešļa'a. Še to beņe' que'e xadoņ čhele, ļe güe' latje ļečhje' len xcamisle.

³⁰ Note'teze beņe' bi dan' ņabde' le'e, ļe gwnežjon. Še to beņe' que'e bite'teze da' de čhele, bitw yeņablen.

³¹ Con yogo' da' güen da' chaclaže'le yeson beņaçhen' len le'e, ļecze ca' cheyaļa' gonļe len ļegaque'.

³² 'Še chaquele šinze beņe' chacde' le'e na' bi chaquele beņe' yoble, ¿bixčhen' chaquele chebe Diosen' can' chonļe? Ca'cze cheson beņe' güen da' mal ca'. ³³ Ļecze še chonļe da' güen len beņe' ca' cheson da' güen len le'e na' bi chonļe güen len beņe' yoble, ¿bixčhen' chaquele chebe Diosen' can' chonļe? Ca'cze cheson beņe' güen da' mal ca'. ³⁴ Še chbejle bi da' chbejle len beņe' chaquele yesyeyonēn' le'e, ¿bixčhen' chaquele chebe Diosen' can' chonļe? Ca'cze cheson beņe' güen da' mal ca', chesebeje' bi dan' chesebej lježgaque', na' ņite' lez yosyonežjuen'. ³⁵ Perw na' le'e, ļe soa ļe gaque beņe' chesegue'ede' le'e, na' ļe soa ļe gon da' güen. Na' ļe soa ļe cuej bi dan' cuejle, perw bitw soale lez yesyeyonēn'. Še gonļe ca dan' ba gwnia' le'e, gwlo'ele nacle xi'iņ Dios ben' nac ļa'zelagüe beņe' blaō, na' Diosen' güebi'icze' güen len le'e. Ļe'na' naque' beņe' šagüe' len beņe' ca' bi cheso'e yela' choxclen čhe' na' len yezica'chle beņe' güen da' mal ca'. ³⁶ Na' ca Xacho Diosen' ben' zoa yaba cheyaše' cheži'ilaže'de' yogo' beņaçhen', ca'cze cheyaļa' yeyaše' yeži'ilaže'le ljež beņaçhlen'.

Bitw zaca'cho ņacho beņe' zjanape' doļa'

(Mt. 7:1-5)

³⁷ 'Bitw gonļe xbab zaca'le ņale beņe' zjanape' doļa'. Še ņale čhe beņe' zjanape' doļa', ca'cze Diosen' ņe' le'e naple doļa'. Na' bibi yosbaga'le beņe' cont Diosen' bibi yosbague'de' le'e. Ļe soa ļe yezi'xen čhe beņe' cont Diosen' yezi'xene' čhele. ³⁸ Ļe soa ļe gwnežjo bi da' gwnežjwle beņe' na' Diosen' güeyončze' čhele. Baļ beņe' ļeca naļa' chosochixe' bi dan' chesote',

chosočiše' lao yagarm čhegaquen' na' chesebiben' na' chosozoaya'aten'. Ca'czen' cheyała' gonle gwnežjwle bi dan' cheseyažje beñe' na' lecz ca' gon Diosen' len le'e.

³⁹ Nach Jesúsen' be'lene' beñe' že'na' to jempl, gwne':

—¿Guaque to beñe' l'choł cue'e nez yeto beñe' l'choł? Bi gac. Le nezecho chopte' šjasebiže' to lo' yechw. ⁴⁰ Ca nac cate' to beñe' chsede' len to maestrw, bi nacho naque' beñe' blaoch ca maestroa'. Na' la'czła' še ben' chseda' gwda' yichje' yogo'loł dan' blo'e maestron' le', bitw naque' beñe' sina'ch ca maestroa'.

⁴¹ ¿Bixchen' chña'le beb dao' dan' yo'o lo' yejlao beñe' lježle, na' bi chacbe'ele naquech beb xen dan' yo'o lo' yejlaolen'? ⁴² Na' še le'e yo'o to da' xen lo' yejlaolen' ¿nacxečen' che'le beñe' lježlen': "Beñ yebe-ja' beb dao' dan' yo'o lo' yejlaguon"? ¿Beñe' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao beñe' lježle.

Dan' choncho chlo'en bin' yo'o lo' yichjlažda'ochon'
(Mt. 7:17-20; 12:34-35)

⁴³ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ⁴⁴ Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. ⁴⁵ To beñe' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

Čhope beñe' na' yo'o da' chon to toe'
(Mt. 7:24-27)

⁴⁶ ¿Bičhen' che'le neda': "Xana", na' bi chonle can' nona' mandadw? ⁴⁷ Na'a nia' nac zaca'lebe beñe' nao' neda' na' chzenague' xtiža' na' chone' can' nona' mandadw. ⁴⁸ Naque' ca to beñe' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoačhačhchguan. ⁴⁹ Na' yogo' beñe' chende' xtiža'na' na' bi chone' can' žia'na' naque' ca yeto beñe' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'te yo'on.

Jesúsen' beyone' xmos to xan soldadw
(Mt. 8:5-13)

7 Na' cate' beyož be' Jesúsen' diža' len beñe' ca', beyeje' yež Capernaum. ² Na' zoa to xan soldadw beñe' bitw naque' beñe' Israel. Na' zoa to xmos'e' chacšenchgüede', na' yelez ba de' par gate'. Na' xan soldadon' chacchgüede' le'. ³ Na' cate' xan soldadon' bende' diža' che Jesúsen', gwsele' bał beñe' gole blao che beñe' Israel cont jaseñabde' Jesúsen' šeje' liže' yeyone' xmos'e'. ⁴ Nach cate' besežine' gan' zoa Jesúsen',

goseñabde' le' gaclene' xan soldadon'. Na' gose'e Jesúsen':

—Xan soldadon' naque' to beñe' zaque' gacleno', ⁵ le chacde' chio' beñe' Israel, na' le' bene' yodao' čheto' nga len xmechue'.

⁶ Nach gwyej Jesúsen' len legaque', perw za' yesežine' liže'na' cate' gwseła' xan soldadon' bał beñe' migw che' lao Jesúsen' na' gose'ene':

—Xan soldadon' že' bitw gwša'a yichjo' yido' liže'na', le nežde' bitw zaque' cont šo' liže'na'. ⁷ Da'nan' bitw beyaxjde' yide' ñabde' le' gacleno'ne'. Con che'nde' gonšco' mandadw yeyaque xmos'e'na'. ⁸ Xan soldadon' že' zoa beñe' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono", na' chonen'. Na' nežde' con ñao' yeyac xmos'e'na' na' yeyacde'.

⁹ Na' Jesúsen' cate' bende' diža' dan' gose' beñe' migw che' xan soldadon' le', bebande' na' beyechje' gože' beñe' zan ca' zjanao' le':

—Žia' le'e ne toze beñe' Israel biña' šejnilaže' neda' ca chejnilaže' benga bi naque' beñe' Israel.

¹⁰ Nach jaya'ac beñe' ca' gwseła' xan soldadon'. Cate' besyežine' liže'na' ba beyaque xmosen'.

Jesúsen' bosbane' xi'iq to no'ole güezebe

¹¹ Jesúsen' gwyeye' to yež dan' nzi' Naín len beñe' ca' zjanaque' le' txen na' zan beñe' yoble. ¹² Ba zja'aque' gała'ze par yesežine' cho'a puert che yežna' cate' besele'ede' chesechoj xonj beñe' cho'a puerten' zjanlene' to beñe' guat. Na' ben' goten' naque' beñe' tliša', na' xne'en naque' no'ole güezebe. Na' beñe' zan beñe' lo yeža' zja'aclene' xña' beñe' guaten'. ¹³ Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

¹⁴ Nach gwyeye' jažoa ne'en lo yagla' gan' xoa beñe' guata'. Nach beñe' ca' zjanlen le' gosebeze'. Na' gože' beñe' guata':

—Beñe' güego', neda' žia', beyas.

¹⁵ Nach beñe' guaten' gwchi'e na' gwzolagüe' beñe'. Na' Jesúsen' beyone' le' lo na' xne'e. ¹⁶ Na' yogo'loł beñe' ca' besežebe' dan' beban beñe' guata' nach gosonxene' Diosen' gosene':

—Ba bla' to beñe' blao ga zoacho, beñe' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

¹⁷ Ca nac dan' ben Jesúsen' gos gwlałj diža' čhen' doxen Judea na' yogo'loł yež ca' dan' zjanita' gała'ze.

Juanña' gwsele' čhope ben' gosaque' le' txen gan' zoa Jesúsen'
(Mt. 11:2-19)

¹⁸ Nach beñe' ca' zjanaque' txen len Juanña' jasye'lene' le' diža' yogo'loł ca nac dan' chon Jesúsen'. Nach gox Juanña' čhope beñe' ca' ¹⁹ nach gože' le-gaque':

—Le šja'ac gan' zoa Jesúsen' na' ye'Ine': "¿Len' naco' ben' chbezto' se'la' Diosen' o še cheya'la' cuezchto' yid be'ne' yoble?"

²⁰ Nach be'ne' ca' chope cate' besežine' gan' zoa Jesúsen' gose'ene':

—Juan ben' chzoa be'ne' nis gwsele' neto' laguo' nga nabeto' le' še len' naco' ben' chbezto' se'la' Diosen' o še cuezchto' yid be'ne' yoble.

²¹ Šlacte ņe' nita' chope be'ne' ca', Jesúsen' beyone' be'ne' zan be'ne' ca' chesacšene na' be'ne' chese'ede' yižgüe' gual. Lecze bebeje' da' xigüe' da' zjajo'o zjanyaz yichjlaždao' be'ne' zan. Na' bene' cont besyele'e zan be'ne' lcho'j. ²² Nach Jesúsen' boži'e xtiža' be'ne' ca' gwse'la' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyel'e no be'ne' lcho'j, na' chesyeda no be'ne' zjanxinj ņi'e. Na' lecze be'ne' gose'e yižgüe' dan' nzi' lepra besyeyacde', na' chesyeyene no be'ne' cuež. Ba ble'ele bosbana' no be'ne' guat, na' ba benele choa' diža' güen len be'ne' yaše' ca'. ²³ Mbalaz zoa be'ne' chejl'e' chia' na' bi chdebde'.

²⁴ Na' cate' besyeya'ac be'ne' ca' gwse'la' Juanna', nach Jesúsen' be'lene' be'ne' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'. ²⁵ ¿Nac naque' caten' jale'elne'? ¿Nyaze' lache' šagüe'? ¿še bitw' le be'ne' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž be'ne' gwnabia'. ²⁶ ¿Noxen' jale'ele? ¿Naque' to be'ne' choe' xtiža' Diosen'? Da' li naque' to be'ne' choe' xtiža' Dios, perw chnia' le'e, zaca'che' ca note'teze be'ne' choe' xtiža' Dios. ²⁷ Čhe benga nyojen le'e Xtiža' Diosen' žan:

Neda' Dios se'la' to be'ne' cuialagüe' laguo' güe'e xtižon'

cont cate' yido' ba nita' be'ne' yesonxene' le'.

²⁸ Chnia' le'e, notech no be'nač ņa' soa be'ne' naquech be'ne' blaoch ca Juanna'. Perw na' note'teze be'ne' gwzenague' čhe Diosen' cont Diosen' nabi'e yichjlažda'ogüe', la'cz'la' bi naque' be'ne' blao, gwžin ža cate' šejni'ichde' chia' clel ca Juanna'.

²⁹ Ba bzoa Juanna' be'ne' zan nis na' len ba' be'ne' güečhixjw. Na' yogo' be'ne' ca' gosacbe'ede' Diosen' zejce' to l'icha dan' gwsele' Juanna' jatixjue'ede' legaque' yesyetinjde' xto'la'gaque'. ³⁰ Perw na' be'ne' fariseo ca' na' be'ne' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xto'la'gaquen' can' goclaže' Diosen'. Bi gosaclaže' gwzooa Juanna' legaque' nis. ³¹ Nach Jesúsen' gože' legaque':

—¿No gwsaca'le'bd'a' le'e zoale ņa'a? ¿No chon can' chonjen'? ³² Nacle ca bidao' neče bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': "Ba bcuežto' bžejo, ņeca bya'ale, na' ba biljaše'to', ņeca gwchežle." ³³ Juan ben' chzoa be'ne' nis bide' laole nga, bitw güe'ej gwdagwšagüe' can' chese'ej chesagw be'ne' yoble, na' ņeca güe'eje' vino,

nach gwnale čhe': "Yo'o nyaz da' xigüen' yichjlažda'ogüe'." ³⁴ Na' neda', chle'ele che'ej chagua' can' chese'ej chesagw be'ne' yoble, na' žale čhia' naca' be'ne' lia na' be'ne' borrašw, neda' naca' ben' gwse'la' Diosen' golja' be'nač. Na' lecze žale naca' migw čhe be'ne' güečhixjw ca' na' migw čhe nochle be'ne' güen da' xinj. ³⁵ Perw na' be'ne' chosozenag čhe Diosen' zjanape' to yela' sina' na' chesone' cont nacbia' Diosa' naque' la'ze-lagüe' be'ne' sina'.

Jesúsen' gweje' liž Simón be'ne' fariseo

³⁶ To be'ne' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. ³⁷ Na' to no'ole lo ciudad, no'ole zle', gwnežde' bžin Jesúsen' liž bena'. Na' Jesúsen' len be'ne' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze čla' zix. ³⁸ Na' jabigue' ga'la'ze xņi'a Jesúsen' na' gwcheže' na' nis xčež čhen' bžonen ņi'a Jesúsen' gwbišen. Na' bxie' ņi'ena' len yiša' yichje' na' bnopen' na' gwdeben' set zixen'. ³⁹ Na' ben' goxe' Jesúsen' ližen', cate' ble'ede' can' chon no'ola' na' gocde': "Šaca' benga naque' to be'ne' choe' xtiža' Dios, guacbe'ede' no'olen' chgan ņi'ena' naque' no'ole zle'".

⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónņa' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzooa to be'ne' na' nita' chope be'ne' chesale' xmechue'. Toe' čale' gayo' gayoa mechw da' nzi' denario, na' ben' yeto čale' šiyon mechw lecze denario. ⁴² Na' chopte be'ne' ca' ņe toe' ca de čhe-gaque' cont yesyeyixjue' xyan'. Na' ben' gwlej mechon' gwlejičhje' dan' chesale' čhen'. Gwnašc neda', žnoe' be'ne' ca' chope' gosacchde' čhe'?

⁴³ Nach Simónņa' gože'ne':

—Šeca ben' goc xya čhen' da' xench na' gwlejičhjen'. Jesúsen' gože'ne':

—Da' li can' ba gwnao'na' naquen.

⁴⁴ Nach Jesúsen' gwečhje' gwne'e no'ola' na' gože' Simónņa':

—¿Chle'edo' no'ole nga? Neda' ba gwo'a ližo' nga na' bi be'no' nis čhib ņi'a, perw no'ole nga ba gwdibe' ņi'an len nis xčež čhen' bxien' len yiša' yichje'. ⁴⁵ Bi bnopo' neda', perw na' no'ole nga cate' bla'atia' gwzoo-lagüe' chnopo' ņi'a nga. ⁴⁶ Bi gwdebo' set yichja', perw no'ole nga ba gwdebe' set zix ņi'a nga. ⁴⁷ Na' žia' le', xto'le'na' gosaquen da' zan, perw ba bezi'xena' čhe'. Da'nan' chacchgüede' neda'. Be'ne' bi žinlaže' xto'len' ca xto'la' no'ole nga, cate' yezixena' čhe' bitw gactecde' neda'.

⁴⁸ Nach gože' no'olen':

—Ba bezi'xena' xto'lo'na'.

⁴⁹ Nach be'ne' ca' chesagw len Jesúsen' txen lo mesen' gwzolao chese' lježe':

—¿Nox benga chacde' le'na' chezi'xene' xto'la' be'načhen'?

⁵⁰ Nach gož Jesúsen' no'ola':

—Dan' chejnilažo' neda' da'nán' ba de yeļa' mban chio' toļi tocaņe. Beyej to šagüe' to güen.

No'ol ca' gosaclene' Jesúsen'

8 Na' gwdechle gwey Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' beņe' yosozenague' che'. Na' zja'aclen beņe' šižinw ca' le', beņe' ca' zjanzi' postlw. ² Nach to xonj no'ole lecze zja'aclene' Jesúsen' beņe' ca' ba beyone'. Baļe' ba bebeje' da' xigüe' da' zjajo'o zjanyaz lo' yichjlažda'ogaque' na' yebaļe' ba beyone'ne' cate' gosacšende'. Na' toe' lie' María beņe' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'. ³ Nach lecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio che' ca'. Na' lecze len ben' le Susana gweyjelene' Jesúsen', na' yezan beņe' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesúsen' len beņe' ca' zjanaque' le' txen.

Jempl che beņe' goz trigon'

(Mt. 13:1-9; Mr. 4:1-9)

⁴ Na' beņe' zan besežag gan' zoa Jesúsen' beņe' za'ac to to yež ca'. Na' be'e to jempl, gwne':

⁵ —To beņe' güen žin jeze' trigw na' šlac zeje' chose' trigon' late' biņ jasechazen do cho'a nezen', na' bosolej bosošošj beņe' len, na' be žia xil be chaš le'e yaba gosagwban'. ⁶ Yelaten' jasechazen ga nac lo yej, na' cate' beselan' na' gosebizen, le gague bi gopa' den'. ⁷ Yelaten' jasechazen ga nac lo yag yeše', na' gosecha'on txen, na' bosoloļe' yag yeše' ca' len. ⁸ Perw na' yelaten' jasechazen ga nac yo šagüe' na' beselan', na' baļen gosebian to gayoa güeje.

Na' beyož be'e diža' quinga gwne' zižje gože' le-gaque':

—Le'e žia nagle da' chene, le gwzenag xtiža'na'.

Jesúsen' gwne' bixchen' bi'e jempl cate' bzejni'ide' beņe'

(Mt. 13:10-17; Mr. 4:10-12)

⁹ Nach beņe' ca' zjanaque' Jesúsen' txen gosenabde' le' bi zejen jempl da' ba bi'e. ¹⁰ Na' gož Jesúsen' le-gaque':

—Nono ņa' neze can' nac yeļa' gwnabia' che Diosen'. Perw ba chone' cont le'e chejnilaže'lene' ņezelen. Perw beņe' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

Jesúsen' bzejni'ide' bi zejen jempl che beņe' goz trigon'

(Mt. 13:18-23; Mr. 4:13-20)

¹¹ Na' ca' nac jempl nga zejen quinga: Ca dan' byažen zejen xtiža' Dios. ¹² Na' biņ dan' besego'oņen chanezen', zejen beņe' ca' chesende' xtiža' Diosen',

perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yeļa' mban chegaque' toļi tocaņe. ¹³ Na' biņ dan' besego'oņ ga nac lo yej zjanaquen ca beņe' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejyichjte' xtižen'. ¹⁴ Na' biņ dan' besego'oņen ga nac lo yag yeše', zejen ca beņe' ca' ba gosende' xtiža' Diosen', perw šlac zjambane' chesyelaļ chesyēžejde' na' chese'nde' yeseņi'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nán' bi chesejnilaže' le' ca cheyaļa'. ¹⁵ Na' da' ca' besego'oņen lo yo šagüen', zejen ca beņe' cate' chesende' xtiža' Diosen' chesezi'en chesonen' chegaque', na' chesejnilaže' le' do yichj do laže', na' chesechejde' bite'tez dan' chac chegaque' cont chesone' can' che'ne Diosa'.

Jempl che yi' dan' chguala'cho

(Mr. 4:21-25)

¹⁶ Na' Jesúsen' gwne':

—Notno gwguala' to yi' na' gw Dosen' to yeso', na' ņe-ca gwcuāše' yin' xan xcame'. San chde'en le'e ze'e cont gwseņin' len yogo'loļ beņe' yeso'o lo' yo'o. ¹⁷ Le yogo'loļ da' ngaše' chia' neda', lenņa' gwlo'elaon, na' yogo'loļ da' nono ņa' ņeze chia', žin ža yeseņezden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze beņe' chzenague' xtiža' Diosen' gwzejni'ich Diosen' le', perw na' note'teze beņe' bi chzenague', da' daon' chacde' ba ņezde', yeca'a Diosen' len.

Xņa' Jesúsen' len beņe' biše' ca' besežine' gan' zoe'

(Mt. 12:46-50; Mr. 3:31-35)

¹⁹ Na' xņa' Jesúsen' len beņe' biše' ca' besežine' gan' zoa Jesúsen', gosaclaže' yeso'e, perw catec beņe' zan že' gague goc latje yesežine' lagüe' na'ate. ²⁰ Na' to ben' ze na' gože' Jesúsen':

—Xņa'o len beņe' bišo' ca' zjanite' chyo'o na' chesaclaže' yedesene'e le'e.

²¹ Na' Jesúsen' gože' legaque':

—Beņe' ca' chosozenag xtiža' Diosen' na' chesezi'e cho'alao xtižen', beņe' can' zjanaque' xņa'a na' biša'.

Jesúsen' bcueze' be' bdono' lo nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo barcw len beņe' ca' zjanaque' le' txen. Na' gože' legaque':

—Laga'cho yešļa'ale nisdao'.

Nach bosose'e barcon'. ²³ Šlac zejen lo nisen' gwtas Jesúsen'. Nach gwzolao gweyčj to be' bdono' lo nisdao', na' gwzolao cheyož nis lo' barcon'. Na' besexožde' yesebiaye'e. ²⁴ Nach bosyosbane' Jesúsen' gose'e le':

—jMaestrw! jMaestrw! Bač chbiayi'cho.

Nach gwyase' na' gwdiļe' be' bdono' len nisdao', na' la' gosebe'žiten. ²⁵ Na' gože' legaque':

—¿Nacxeçhen' bi chejle'le çhia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenaguen çhe da' že'.

To beñe' Gadara yo'o nyaze' da' xigüe'

(Mt. 8:28-34; Mr. 5:1-20)

²⁶ Na' besežine' laž beñe' Gadara ca', to yež da' chi' šla'a distritw Galilean', lağa'cho nisdao'. ²⁷ Na' cate' bechoj Jesúsen' lo' barcoa', to beñe' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. ²⁸ Na' beñe' gualaž che' ca' bosoçheje' ni'a ne'e len gden na' gosape' le'. Na' da' xigüe' ca' gosonen cont bzoj btine' gdena' zan ni'a. Na' gosonen cont gwyeye' ga nono beñe' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixçhen' chgoša' chlaže' çhio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chñeyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'. ³⁰ Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'. ³¹ Nach da' xigüe' ca' gosata'yoen Jesús'a' bi yesele'n lo yi' gabil. ³² Na' to ya'a da' zoa gała'ze chesaž zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. ³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjjes coš ca' le'e ya'a gan' nita'ba' na' jase-lažo'ba' lo' nisdao' ga gosatba' gose'ejba' nis.

³⁴ Na' beñe' ca' chosoyoe' cošen' besele'ede' dan' ba goquen' bosyoxonje' jasyeyeže' beñe' lagüe yež len beñe' chaš yixe', gose'e legaque' can' ba goquen.

³⁵ Nach ja'ac beñe' jaseñe'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gała'ze cuit Jesúsen' nyaz xałane', na' ba bezoa yichjlažda'ogüe' binlo. Na' besežebe'. ³⁶ Na' beñe' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'.

³⁷ Nach yogo'lo' beñe' ca' že' gan' mbane yež Gadaran' jaseta'yoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e.

³⁸ Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

³⁹ —Beyej ližo' na' jayež beñe' lo' yo'o çhio' yogo' da' güen da' ba ben Diosen' len le'.

Nach beza' ben' na' gwzolagüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole beñe' gwdane' xe'

(Mt. 9:18-26; Mr. 5:21-43)

⁴⁰ Na' cate' Jesúsen' bełague' nisdaon', beñe' zan ba nita' chesebeze' le'. Chesyebechgüede' da' bežine' na'. ⁴¹ Na' bžin to beñe' le' Jairo, ben' nac to beñe' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', ⁴² le ba zoa gat bi' no'ol che'. Nacbe' bi' tliša', na' šižinw izgüebe'. Na' šlac zej Jesúsen' len le', beñe' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwba'o na' ba benditje doxen xmechue' len beñe' güen rmed ca'. Na' notno goc gon le' rmed. ⁴⁴ Na' gwbiga' no'olen' cože' Jesúsen' na' gwdane' lox xen', nach la' gwlezte gwba'o dan' zoen'.

⁴⁵ Na' gwna Jesúsen':

—¿Non' gwdan neda'?

Na' ne toe' ca goseçhebe' še ba gosegane' le'. Nach Pedron' len beñe' ca' zja'aclen Jesúsen' gose'e le':

—Maestrw, beñe' zan beñe' za'ac nga chosoçhie' le' na' chosožigue' le' nile na'le. ¿Bixçhen' chñabo' no gw-dan xaon'?

⁴⁶ Nach Jesúsen' gože' legaque':

—To beñe' ba gwdane' neda'. Chacbe'eda' ba beyacde' len yela' guac çhia'na'.

⁴⁷ Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' beñe' ca' že'na' bixçhen' gwdane' le' na' can' goc la' beyactede'. ⁴⁸ Nach gož Jesús'a' no'ola':

—Xi'in'a', ba beyacdo' dan' chejnlažo' neda'. Beyej binlo.

⁴⁹ Ne' choe'te Jesús'a' dižan' ca' cate' bžin to beñe' gwza' liž Jairo ježe' le':

—Ba got bi' no'ol dao' çhion'. Bich gondo' Maestroa' zed.

⁵⁰ Perw cate' bene Jesúsen', na' gože' Jairo:

—Bitw žebo', con gweynilaže' neda' na' yeyaquebe'.

⁵¹ Na' cate' besežine' liž Jairo'na', Jesúsen' bi be'e latje yeso'o zan beñe' ca' zja'aclen le', san Pedro, len Juan, len Jacobo, na' len xaxña' bi' guat na'ze goso'o. ⁵² Na' ba chi'chgua žaš na' yogo' beñe' ca' že'na' chesebežchgüe'. Na' Jesúsen' gože' legaque':

—Bitw cuežle. Biña' gatbe', san chtasbe'.

⁵³ Na' bosoxiže' gosonle' che' da' zjanezde' ba gotbe'. ⁵⁴ Perw Jesúsen' beñe' taca' bi' no'ol guaten' na' boł güiže'be' gože'be':

—No'ol dao', beyas.

⁵⁵ Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'. ⁵⁶ Na' xaxña'be' besyebanchgüede'. Perw Jesúsen' bene' mandadw bi yeso'e diža' can' goca'.

Jesúsa' gwsele' bene' šižinw ca' jasedixjue'ede' xtižen'
(Mt. 10:5-15; Mr. 6:7-13)

9 Jesúsen' botobe' bene' šižinw ca' gwleje' cont zjanaque' le' txe' na' bnežjue' legaque' yela' gwn-
abia' na' yela' guac cont goc besyebeje' da' xigüe' lo'
yichjlaždao' bene', na' lecze ca' besyeyone' bene' ca'
chesacšene. 2 Na' lecze bene' mandadw
šjasedixjue'ede' Dios' nabi'e yichjlaždao' bene'
yosozenag che'. Na' bene' mandadw yesyeyone' no
bene' güe'. 3 Na' gože' legaque':

—Bibi goxe'le tnez. Bitw goxe'le xis da' gwčiše'le,
neca gua'le bzod, ne yet, ne mechw, na' bitw gua'le
yeto xcamisle. 4 Cate' žinle to liž bene', na'ze yega'anle
šlac zoale lagüe yeža'; cate'ch yeža'le yeža', cana'ch
yeža'le latja'. 5 Na' še zoa ga bi yosolebe' le'e, cate'
yeža'le na', le cuibe ni'alen' yo bište cont nacbia' malen'
chesone' bi chosozenague' xtiža' Diosen'.

6 Nach bene' šižinw ca' ja'aque' to to yež, na'
gate'teze ja'aque' jasedixjue'ede' diža' güen che
Jesúsen' na' besyeyone' no bene' güe'.

Ba gosote' Juan ben' bzoe' bene' nis
(Mt. 14:1-12; Mr. 6:14-29)

7 Na' gobernador Herodes goque' tole bende' yo-
go'lo' da' güen da' chon Jesúsen'. Goczejlaže', le ba'
bene' gose'e le' ba' beban da' Juan ladjo' bene' guat ca'.

8 Na' yeba'le' gosene' šeca da' Elías ben' be' xtiža'
Diosen' cani' ba' bela' yežlio nga da' yoble. Yeba'le'
chesene' yeto bene' be' xtiža' Diosen' cani'te ba' be-
bane' ladjo' bene' guat ca'. 9 Na' Herodesen' gwne':

—Neda' bena' mandadw gosečogue' yen Juan'na',
perw žnoxen' chon da' güen ca' dan' chesoe' bene'
diža'?

Na' gwdiljwlaže' nacle gone' cont le'ede' Jesúsen'.

Bguagw Jesúsen' gayo' mil bene'
(Mt. 14:13-21; Mr. 6:30-44; Jn. 6:1-14)

10 Na' cate' besyežin postlw ca' gan' zoa Jesúsen' nach
gose'e le' can' ba' gosonen'. Na' gwči'e legače' na'
ja'aque' to latje gan' mbane yež Betsaida. 11 Cate'
gosacbe' bene' ca' nita' gan' zoa Jesúsen' ba
gosa'aque' len bene' ca' zjanaque' le' txe', nach
zja'aque' zjana'ogüe' legaque'. Jesúsen' blebe' legaque'
na' bsed blo'ede' legaque' Diosen' nabi'e yichjlaždao'
bene' yosozenag che', na' beyone' bene' ca'
chesacšene.

12 Cate' gwzolaogwxoa gwbižen', nach bene' šižinw
ca' zjanaque' Jesúsen' txe' gose'ene':

—Besela' bene' quinga cont šjaya'aque' ga že' bene'
do ranšw na' do yež ca' dan' nyečj mbi'i cont yesey-
iljue' ga yesetase' na' yeseyiljue' da' yes'ej yesagüe', le
ca' nac latje gan' zoacho nga, naquen to latje daš.

13 Perw na' gož Jesúsen' legaque':

—Le'e le' güe'e da' yesagüe'.

Na' gose'e le':

—Gayo'ga yetextil na' yečhopga be' ya'a de čecho,
lete še si'chon cont gaquen yesagw yogo'lo' bene'
quina.

14 Gosene' ca' le' že' ca' gayo' mil bene' byo, bi cuent
no'ol ca' len bidao'. Nach Jesúsen' gože' bene' ca'
zjanaque' le' txe':

—Le gon mandadw yesebe' šiyon güej bene' ca'.

15 Nach gosone' mandadw gosebe' yogo' bene' ca',
16 na' Jesúsen' gwxi'e gayo' yetextilen' na' čhope be'
ya'ana', na' gwne'e yabale, be'e yela' choxclen che
Diosen' na' bzoxjen' na' be'en bene' šižinw ca' cont
goso'e che to to bene' ca'. 17 Na' gosagüen' ca
goseljde'. Nach bososše'e šižinw žome len yetextil
bixjw na' len late' güeje be' da' bega'an.

Pedron' gwne' Jesúsen' naque' bene' gwse'la' Dios
(Mt. 16:13-19; Mr. 8:27-29)

18 Na' gozac yeto, bene' ca' zjanaque' Jesúsen' txe'
zjanite' len le' lchojiže, na' Jesúsen' cho' güiže' Diosen'.
Nach gože' legaque':

—ŽBi chesena bene'? ŽNon' naca' neda'?

19 Na' gose'e le':

—Ba'le' chesene' naco' da' Juan ben' bzoe' bene' nis.
Na' yeba'le' chesene' naco' Elías ben' be' xtiža' Diosen'
cani'. Na' yeba'le' chesene' naco' yeto bene' be' xtiža'
Diosen' cani' ben' ba' beban ladjo' bene' guat ca'.

20 Nach gože' legaque':

—ŽČhixe le'e? ŽNo žale naca'?

Na' gož Pedron' le':

—Len' naco' Cristo ben' gwlej Diosen' cont
yedenabi'o.

Jesúsen' gwdixjue'ede' gate'
(Mt. 16:20-28; Mr. 8:30-9:1)

21 Nach Jesúsen' gože' legaque' nono yese'e naque'
ben' gwlej Diosen' cont yedenabi'e. 22 Na' gože' le-
gaque':

—Da' zan da' saca'zi'a, neda' naca' ben' gwse'la' Dios
golja' be'nač. Na' bene' gole blao ca' chesenabia'
nación čechon' na' b'xoz gwnabia' ca', na' bene' ca'
chososed chosolo'e ley dan' b'zoy da' Moisés, bi yese-
le'ede' neda' güen dan' bi gosejle'e čhia', na'
yesote'nda', perw yeyon' ža yebana' ladjo' bene' guat
ca'.

23 Nach gože' yogo' bene' ca' zjanaque' le' txe':

—Note'tez bene' še chaclaže' gaque' neda' txe',
čeya'la' cuejyichj cuine' yogo' ža, la'czla' saca'zi'e, na'
gone' can' nia' neda'. 24 Note'tez bene' chacde' gone'
cont bi saca'zi'e o cont nono yesot le', benan' cuiayi'.
Na' note'tez bene' chzanlaže' cuine' saca'zi'e o gate'
ne čhia' neda', ba de yela' mban che' toli toca'ne.

25 ŽBixe zejenna' to bene' nabi'e doxen yežlion' še
cuiaye'e na' bi gata' yela' mban che' toli toca'ne? 26 Na'
note'tez bene' še cheto'ede' par ye'e lježe' chejnlaže'
neda' na' še cheto'ede' par gwzenague' xtižan', lecze
ca' neda' yeto'eda' che' par nia' naque' neda' txe', ne-
da' naca' ben' gwse'la' Diosen' golja' be'nač. Yeto'eda'
che' cate' yida' da' yoble nsa'a yela' zaca' juisyw čhia'

na' yeĵa' zaca' juisyw ĉhe Xa' Diosen' na' ĉhe ben' zjanac angl ĉhe'. ²⁷ Da' ĵi žia' le'e, balĵe nita'le nga ŋa'a biŋa' gatle cate' žin ža le'ele gwlo'e Diosen' yeĵa' gwn-
abia' ĉhen'.

Jesúsen' goque' ca to be'ni'

(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gwyeje' to ĵo ya'a jeĵ güiže' Diosen' na' gwĉhe'e Pedro len Juan len Jacobo. ²⁹ Na' šlac choĵ güiže' Diosen' goc cho'alagüen' ca da' bža'. Na' xaĵanen' beyaquen šiš xila' na' goctiten. ³⁰ Na' ĵo hora' besežin ĉhop beŋe' gan' zoa Jesúsen', toe' da' Moisés na' yetoe' da' Elías bosošajlene' ĵe'.

³¹ Goso'e diža' gosene' ba zoa gat Jesús'a' Jerusalén. Na' be'ni' ĉhe Diosen' gwyechjen bseŋin' ĵegaque'. ³² Na' Pedron' len beŋe' ca' yeĉhope ĵeca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moisésen' len da' Elíasen' diža'. ³³ Na' cate' ba cheza' da' Moisésen' len da' Elíasen', Pedroa' gože' Jesúsen':

—ĵMaestrw, ĵeca güenŋa' zoacho nga! Gonto' šone ranšw, to ĉhio', to ĉhe Moisés, na' yeto ĉhe Elías.

Con gwne' ca' sin ca bene' xbab. ³⁴ Ne' choe'te Pedron' diža' cate' to bejw gwyechjen ĵegaque' na' besežebe' lagüe dan' goc ca'. ³⁵ Na' ĵo' bejon' gosende' gwŋe Diosen', gwne':

—Benga Xi'ŋa' ben chacda'. ĵe gwzenag ĉhe'.

³⁶ Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' beŋe' ca' yezica'chle can' nac dan' ba gosende' na' dan' ba besele'ede'. Con gosenita'teze' šišize.

Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

³⁷ Na' beteyo cate' ba besyeyetje' ya'ana' beŋe' zan jasešague' ĵegaque' gan' nite'na'. ³⁸ Na' toe' gwŋe' ziž-
je, gože' Jesúsen':

—Maestrw, chata'yoeda' le' gaclenšco' xi'ŋa' nga. Nacbe' xi'ŋa' tliša'. ³⁹ Chŋiz da' xigüen' ĵebe' na' ĵa' ĉhgosya'aten ĵebe', chonen cont chazbe' šon na' cont ĉžia bžina' cho'abe' na' chonen ĵebe' zi', na' caŋe chsanen ĵebe'. ⁴⁰ Ba gota'yoeda' beŋe' ca' zjanaque' le' txen cont yesyebetje' da' xigüen' yo'o nyazbe', perw bitw gosezaque'de'.

⁴¹ Nach Jesúsen' gože' beŋe' ca' že' na':

—ĵLe'e beŋe' bi chejnilaže', chonchgual clele! ĵšna čhažjen soalena' le'e cont šejnilaže'le? ĵBatca' zelao ŋa'lagua' le'e?

Nach gože' xa bidao'na':

—Beŋ bidao' ĉhion' nile.

⁴² Na' šlac zjasane'be' lao Jesúsen', da' xigüen' benen cont gwyazbe' šon, na' bchix btoĵen ĵebe' ĵo yo. Na' Jesúsen' gwdiĵe' da' xigüen' cont bechojen ĵo' yichjlaž-da'obe'. Nach beyaquebe'. Gwdena' beyoŋe'be' ĵo na' xabe'. ⁴³ Na' yogo' ben' že'na' besyebande' cate' besele'ede' yeĵa' guac ĉhe Diosen'.

Da' yoble Jesúsen' gwdixjue'ede' gate'

(Mt. 17:22-23; Mr. 9:30-32)

Na' besyebande' ĉhe yogo'ĵoĵ dan' chon Jesúsen', na' šlac nite' ca', Jesúsen' gože' beŋe' ca' zjanaque' le' txen:

⁴⁴ —ĵe gon cont diža' nga šo'on yichjlažda'ole, na' bi ganĵaže'len. Neda' gaca' ĵo na' ben' chesegue'enda', neda' naca' ben' gwseĵa' Diosen' golja' beŋaĉh.

⁴⁵ Perw ĵegaque' bitw gosejni'ide' diža' dan' be' Jesúsen', ĵe naquen ca to da' ngaše' len ĵegaque'. Na' besežebe' yesenabde'ne' bi zejen dan' gože' ĵegaquen'.

Gosacyože' noe' nacch blaow

(Mt. 18:1-5; Mr. 9:33-37)

⁴⁶ Na' beŋe' ca' zjanaque' Jesúsen' txen gosacyože' noe' nacch blaow. ⁴⁷ Jesúsen' gocbe'ede' xbab dan' chesonen', na' beŋue' to bidao' na' bzeche'be' cuite'na' ⁴⁸ na' gože' ĵegaque':

—Note'teze beŋe' chone' güen len to bidao' ca bi' nga neĉhe da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwseĵa' neda'. Na' note'tez le'e cate' chonĵe xbab ĉhe cuinĵe bibi zaca'tecle, canan' ba nacle beŋe' blaow.

Beŋe' bi chon contr ĉhio' txenczen' chone' len ĉhio'

(Mr. 9:38-40)

⁴⁹ Nach Juanna' gože'ne':

—Maestrw, bežagto' to beŋe' cho'e lao' na' chebeje' da' xigüe' da' yo'o nyaz beŋe'. Na' bžonto' gone' ca', ĵe bi chone' ĉhio' txen.

⁵⁰ Nach Jesúsen' gože'ne':

—Bitw gwžonĵe gone' ca', ĵe še to beŋe' bi chone' contr ĉhio', txenczen' chone' len ĉhio'.

Jesúsen' gwdiĵe' Jacobo len Juan

⁵¹ Na' lagüe' ba zoa bagwze yezi' yeca'a Diosen' ĵe', beĉhoglaže' šeje' Jerusalén. ⁵² Na' gwseĵe' to ĉhope beŋe' gosebialao lagüe'na'. Na' ja'aque' to yež gan' mbane distritw Samaria cont šjasesiŋi'e gan' soa Jesúsen' len beŋe' ca' zjanaque' ĵe' txen. ⁵³ Perw beŋe' Samaria ca' bi bosolebe' Jesúsen' len beŋe' ca' nžague', ĵe gosacbe'ede' zja'aque' Jerusalén. ⁵⁴ Na' ĉhope beŋe' ca' zjanaque' Jesúsen' txen, Jacobon' len Juanna', cate' besele'ede' can' goson beŋe' Samaria ca', nach gosenabde' Jesúsen':

—Maestrw, ĵche'ndo' gonto' can' ben da' Elías ben' be' xtiža' Diosen' cani', ŋabeto' Diosen' seĵe' yi' gwzeyen beŋe' qui?

⁵⁵ Nach Jesúsen' gwyechje' gwdiĵe' ĵegaque' gwne':

—Le'e bitw nezele non' chnabia' yichjlažda'ole. ⁵⁶ Neda' bitw za'a cont gwžiaaya'a beŋaĉh, san za'a cont gwnežjua'ne' yeĵa' mban toĵi tocaŋe, neda' naca' ben' gwseĵa' Diosen' golja' beŋaĉh.

Nach ja'aque' yež yoble.

Can' gož Jesúsen' beņe' ca' gosaclaže' yesaque' le' txen
(Mt. 8:19-22)

⁵⁷ Šlac zja'aque' na', to beņe' gože' le':

—Sa'lena' le' gate'teze šejo'.

⁵⁸ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwseļa' Diosen' golja' beņaçh.

⁵⁹ Nach Jesúsen' gože' yeto beņe':

—Yo'o len neda'.

Perw bena' gože' le':

—Xana', za' got xa'. Beņšca latje zgua'tec šjay-cuaša'ne'.

⁶⁰ Na' gož Jesúsen' le':

—Beņe' ca' zjanac yichjlažda'ogüe' ca che beņe' guat, legaque' guaccze yosocuaše' yezica'chle beņe' guat. Perw le', jatixjue'e beņe' Diosa' nabi'e yichjlaždao' beņe' yosozenague' che'.

⁶¹ Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxña'a len diaža chia'.

⁶² Jesúsen' gože' le':

—Beņe' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to beņe' chņe'e cosože'le šlac chgua'aņe' go'ņ.

Jesúsen' gwseļe' gayonši beņe' šjasedixjue'ede' xtiže'

10 Na' gwdechle Xancho Jesúsen' gwleje' yegay-onši beņe' na' bene' mandadw yesebialagüe' šja'ac chope güeje' to to yež ga za' šej le'. ² Na' cate' za' yesa'aque' gože' legaque':

—Chyažje beņe' zan yeseyixjue'ede' xtiža' Diosen', perw to chopga beņe' nita' yeseyixjue'eden'. Na' beņe' yosozenag che Diosen' zjazaca'lebe' ca to coseš xen da' chyažje yedobe. Da'nan' le nabe Xancho Diosen' seļa'che' beņe' yesaclene' chio' yotobcho coseš chen'.

³ Le šja'ac, le neda' chseļa' le'e šjatixjue'ele xtižen' len beņe' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. ⁴ Bitw gua'le bzod, ne mechw, ne yel, na' bi šele guaple beņe' tiox beņe' yeža-gle chanez. ⁵ Note'tez liž šo'le zgua'tec nale:

“Chņablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.” ⁶ Na' še zoa to beņe' chaclaže' soa cueze' binlo len yichjlažda'ogüe'na', nach gac can' gwņablaže'le cont soa cueze' binlo; perw še nono zoa beņe' chaclaže' soa cueze' binlo len yichjlažda'ogüe', bi gac dan' ba gwņablaže'len'. ⁷ Na' lo' yo'o na'teze yega'aņle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to beņe' güen žin cheyaļa' si' laxjue', lecz ca' le'e zaca'le yesoņe' da' ye'ej gagwle. ⁸ Na' cate' žinle to yež ga chesonxene' le'e, le ye'ej le gagwteze da' yesoņe' le'e. ⁹ Le yeyon beņe' güe' beņe' nita' yež gan' žinle, na' le' ye'e: “Ba bžin ža gwzenagle che Diosen' cont nabi'e yichjlažda'ole.” ¹⁰ Perw na' cate' žinle to yež ga bi yosolebe'

le'e, le šja'ac la cay na' le ye'e: ¹¹ “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chy-ixjue'eto' le'e Diosen' chazlaže' gwzenagle che' cont nabi'e yichjlažda'olen'.” ¹² Da' mal xen goson beņe' ciu-da Sodoma cani', perw žia' le'e, žan' gac juisyw beņe' ca' bi bosolebe' le'e ližen', yesaļe'chde' clle ca beņe' Sodomam'.

Beņe' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—iNyaše'chguaze gac che le'e beņe' Corazín!

iNyaše'chguaze gac che le'e beņe' Betsaida! Beņe' ca' nita' Tiro na' Sidón ba' besyetingde' xtoļa'gaque' šaca' blo'egacda'ne' yeļa' guac chia' ca da' ba blo'eda' le'e. Na' bosoše' ca gosone' šaca' bena' ca', chesazlje' to lache' gasj da' naquen zeše' na' chosože'eļja cuine' no de cont yesacbe'e beņe' ba boša' yichjlažda'ogüen'.

¹⁴ Saca'zi'chle clle ca beņe' že' Tiro na' Sidón cate' žin ža gac juisyw. ¹⁵ Le'e nita'le yež Capernaum chonle xbab šca Diosen' goņchgüe' le'e yeļa' bala'aņ. Bi goņe' le'e yeļa' bala'aņ san goņe' le'e castigw toļi tocaņe dan' bi chejle'le chia'.

¹⁶ Nach Jesúsen' goze'e beņe' gayonši ca':

—Beņe' gwzenag xtiža'len' lecze gwzenague' xtiža'na', na' beņe' goncze yichjlagüe' bi gwzenague' xtiža'len', lecze bi gwzenague' chia' neda'. Na' beņe' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseļa' neda'.

Besyēžin beņe' gayonši ca'

¹⁷ Beņe' gayonši ca' cate' beyož jasedixjue'ede' xtiža' Jesúsen', besyēžine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' beņe' choe'to' lao'.

¹⁸ Na' gože' legaque':

—Ble'eda' bedao'nez gwnit yeļa' gwnabia' che Satanásen' dan' chnabia' da' xigüe' ca'. ¹⁹ Ba beņa' le'e yeļa' guac cont gwlej gwšošje no beļ znia na' no bexjoni' na' cont soele Satanásen' bi gonen le'e gan. Na' bibi de da' gonen le'e zi'. ²⁰ Perw bi yebele neče da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'lo' xi'iņe' ca'.

Bebechgüe Jesúsen'

(Mt. 11:25-27; 13:16-17)

²¹ Za' beyožte gwna Jesúsen' ca' nach ben Spiritw che Diosen' cont bebechgüede' na' boļ güiže' Diosen', gwne':

—Xa', le' chnabi'o beņe' ca' že' yaba na' yežlion'. Na' choņa' yeļa' choxclen chio' ba bzejni'ido' baļ beņe'. Ba bzejni'ido' beņe' ca' gosacbe'ede' cheseyažjde' no gwsed gwlo'e legaque'. Na' bitw bzejni'ido' beņe' ca'

cheson xbab zjanaque' beṇe' sina' na' beṇe' zjanejni'i. Beno' ca' Xa', le can' gwyazlažo'.

²² Nach gože' beṇe' ca' že'na':

—Xan' ba bene' lo na' chona' cont chombia' beṇe' le'. Le' nombia'yaṇe' neda', na' neda' nombia'yaṇa' le'. Na' beṇe' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

²³ Na' gwyechj Jesúsen' gwṇe'e beṇe' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'. ²⁴ Na' chnia' le'e zan beṇe' ca' goso'e xtiža' Diosen' can' len beṇe' zan rey gosaclače' yesele'ede' dan' chle'ele ṇa'a, perw bitw goļa' yesele'eden', na' gosaclače' yesende' dan' chenelen', perw bitw goļa' yesenden'.

Jempl che to beṇe' güen, beṇe' Samaria

²⁵ Na' gwzoža' to beṇe' nsedchgüe' ley dan' bzoj da' Moisés, goclače' cueje' Jesúsen' diža' da' gwchine' contr le' na' gože'ne':

—Maestrw, žbi da' cheyaļa' gona' cont gata' yela' mban chia' toļi tocaṇe'?

²⁶ Na' gož Jesúsen' le':

—Žbi nyoj le'e leyna'? ŽNac žan?

²⁷ Na' ben' chejni'ichgüe' leyna' boži'e xtiža' Jesúsen', gože' le':

—Ley che Dios' žan: "Cheyaļa' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho."

²⁸ Nach gož Jesúsen' le':

—Da' licze can' ba gwnao'na'. Can' cheyaļa' gono' cont bano' toļi tocaṇe'.

²⁹ Na' bena' goclače' gwlo'ede' choncze' can' ža leyna', na' gože' Jesúsen':

—ŽNon' nac beṇe' lježa' ben' cheyaļa' gacda'?

³⁰ Na' Jesúsen' gože' le':

—To beṇe' beza' Jerusalén par yežine' yež Jericó, jasyxen beṇe' gwban le'. Na' goseyine' xaļane' na' gosot goseyine' le'. Nach besyeya'aque' bosocua'ane' le' cacze to beṇe' guat. ³¹ Na' to bxož che beṇe' Israel ca' gwdie' lo neza', na' cate' ble'ede' bena' dena', nach gwcuase' to šļa'ale neza' na' con gwdeze'. ³² Lecz ca' ben to diaža che da' beṇe' Leví ca'. (Xi'iq diaža che da' Leví yo'o lo na'gaque' chesone' mandadw lo' yodao' bla.) Bena' zeje' tnez na' cate' ble'ede' ben' dena', na' gwcuase' to šļa'ale neza' na' con gwdeze'. ³³ Nach to beṇe' Samaria ngüe'e neza' nļague' xpurrue' na' bžine' gan' de bena', perw na' le' cate' ble'ede' ben' beyaše'laže'. ³⁴ Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beche'e le' ga zoa to mesón ga gwṇe'e le'. ³⁵ Na' beteyo cate' beza' beṇe' Samaria, gwleje' mechw da' zaca' ca' čop ža žin na' bnežjuen' xan mesónna' ca' laxjue', na' gože' le': "Gwṇa' bengā na' še žan bichle da' gono' gastw na' čhixjuan' cate' zeza'a."

³⁶ Beyož be' Jesúsen' diža' can' goc che ben' jasyxen beṇe' gwban ca', nach gože' bena' chsed chlo'e leyna': —ŽNac chono' xbab? ŽNo beṇe' ca' šone' godce'ne' ca' beṇe' lježe'?

³⁷ Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyxen gwban ca'.

Nach gož Jesúsen' le':

—Lecze ca' cheyaļa' gono' le', yeyaše' yeži'ilaže'do' yogo'loļ beṇe'.

Jesúsa' jaṇe'e Marta na' María

³⁸ Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeye' liže'na'. ³⁹ Na' zoa to bile' le' María. Na' Marían' gwchi'e cuit Jesúsen' bzenague' xtiže'na'. ⁴⁰ Perw na' Martān' belāchgüede' bsiṇi'e da' yesagüe'. Na' gwyeye' lao Jesúsen' na' gože' le':

—Xana', žbi chacdo' median can' bcua'aṇ beṇe' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, chi'chgua yichjo' mandadua' na' chacže'jlažo' dan' nyanchguan. ⁴² María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyaļa' gonle.

Jesúsen' blo'ede' can' yosoļ güiže' Diosen'

(Mt. 6:9-15; 7:7-11)

11 Na' gwzoa Jesúsa' to latje choļ güiže' Diosen'. Cate' beyož boļ güiže'ne' to beṇe' ca' zjanaque' le' txen gože' le':

—Xanto', bzejni'i neto' nac cheyaļa' yoļ güižto' Diosen', can' bzejni'i da' Juanna' beṇe' ca' gosaque' txen len le'.

² Na' Jesúsen' gože' legaque':

—Cate' yoļ güižle Diosen', quinga ṇale:

Xato' beṇe' zoa yaba, chṇabto' yogo'loļ beṇe' yesonxene' le'. Zelaže'to' ṇabi'o yichjlaždao' yogo' neto' beṇač. Gačšca can' chazlažo' yežlio nga can' chac yabana'.

³ Ca' nac dan' che'ej chagwto' tža tža, beṇšca čheto' ṇa'a.

⁴ Na' bezi'xenšca čheto', le lencze neto' chezi'xento' che ljež beṇačto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal,

san bcuase bcue'ejšca neto' len da' mala'.

⁵ Nach gož Jesúsen' legaque':

—Le gon xbab še šejle liž beṇe' migw čhele do chel na' ye'ine': "Migw chia', beṇšca neda' šone yetextil. ⁶ Ba bla' to beṇe' migw chia' beṇe' za' zito', na' bibi de chia' da' gua'ane' gagüe'." ⁷ Na' čhixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' čheto' ca'. Bi' gac čhasa' goṇa' dan' chyažjdo'." ⁸ Chnia' le'e, la'czļa' naque' migw čhele, bitw ye'nde' chase' gone' dan'

chyažjele, perw še gata'yoelne' sša na' čhasšaze' goņe' bite'tez da' chyažjele. ⁹ Na' chnia' le'e, še žan bi da' chyažjecho, chñabchon. Še žan to da' chaclaže'cho želecho, chyiljwchon. Še žan chaclaže'cho saljw beņe' cho'a yo'o čhe', na' ņecho cho'a yo'on cont saljue'. Na' ca'cze cheyaļa' ye'le Diosen' cate' bi da' chyažjele o bi da' chaclaže'le gone'. ¹⁰ Na' note'tezle še bi da' ņabele'ne', goņczen'. Na' še bi dan' che'nele gwzejni'ide' le'e, gwzejni'iczden'. Na' note'tezle še žan chaclaže'le gac to da' gac, yoļ güižle Diosen' can' chon to beņe' chñie' cho'a yo'o, nach Diosen' gone' cont gacczen.

¹¹ 'Na' le'e nacle xa bidao', še xi'iqle ņabebe' le'e yetextil, žgwnežjwlebe' to yej? Na' še ņabebe' le'e yid beļ gagwbe' žgwnežjwlebe' to be xigüe'? ¹² Na' še ņabebe' le'e to žit gagwbe' žgwnežjwlebe' to bexjoni'? Cabi gonļe ca'. ¹³ Ļa' nacle beņe' mal, ņezczele gwnežjo xi'iqle to da' güen. Nacchxe güen gon Xacho Diosen' ben' zoa yaba gwnežjue' Spiritw čhen' soan lo' yichjlaždao' beņe' chñab ļen.

Gosene' Jesúsen' bebeje' da' xigüe' len yeļa' guac čhe Beelzebú

(Mt. 12:22-30; Mr. 3:19-27)

¹⁴ Gwzoa to beņe' gwyo'o gwyaz da' xigüe' yichjlaždao'ogüe' na' benen cont bi goc ņie'. Na' Jesúsen' bebeje' da' xigüe' lo' yichjlaždao'ogüe'na'. Na' cate' bechoj da' xigüen', na' goc beņie'. Na' beņe' ca' že'na' besyebanchgüede'. ¹⁵ Perw baļe' gosene':

—Beelzebú dan' chnabia' da' xigüe' ca' chaclenen ļe' cont chebeje' da' xigüe' zjajo'o zjanyaz yichjlaždao' beņe'.

¹⁶ Na' yebaļe' cont gosagüe' xya čhe' gosēnabde'ne' gone' to yeļa' guac da' yesele'ede' le'e yaban' cont yeseņezde' še da' ļicze Diosa' gwseļe' le'. ¹⁷ Perw Jesúsen' gocbe'ede' xbab dan' gosone', na' gože' ļe-gaque':

—Ša to gobiern choje' čhop šoņ cuen na' yeyoža' yesediļe' ļegacze', gobiernna' bi sibi'e. Na' še beņe' to lo' yo'o yesechoje' čhople na' yesediļe' ļegacze', gague sša yesenite' txen. ¹⁸ Na' še Satanásen' dan' chnabia' da' xigüen' len da' xigüe' čhen ca' yesechojen čhople na' yesediļen, ļecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' beņe'. ¹⁹ Sacā' naquen can' žalen', ļecze zējen dan' chnabia' da' xigüe' ca' chaclenen beņe' ļježle ca' chesybeje' da' xigüe' zjajo'o zjanyaz yichjlaždao' beņe'. Beņe' ļježle ca' yese'e le'e cleden' žale. ²⁰ Neda' chebeja' da' xigüe' len yeļa' guac čhe Dios, na' dan' chona' ca' chlo'en ba bžin ža Diosen' ņabi'e yichjlaždao' beņe' yosozenag čhe'.

²¹ 'Satanásen' naquen ca to beņe' gual, na' neda' nacza' beņe' gualch. Na' ņezele cate' to beņe' gual chape' ližen' len spada, bibi gac čhe da' de čhe'. ²² Perw cate' žin to beņe' gualch ca ļe' na' tillene' ļe', nach ben' nac beņe' gualch gon gan. Na' que'e spada čhe ben' da'na' zoe' lez gaclen ļe' na' ca'atie' bichle da' de čhe' na' čhisen' len beņe' migw čhe' ca'.

²³ 'Beņe' bi chone' neda' txen, chone' contr neda'. Na' beņe' bi chaclene' cont yosozenag beņe' yoble čhia', zeje diža' chone' par bi yosozenague' čhia'.

Da' xigüe'na' yeyo'on da' yoble lo' yichjlaždao' beņe'
(Mt. 12:43-45)

²⁴ 'Na' še to da' xigüe' da' gwyo'o gwyaz lo' yichjlaždao' beņe' yechojen, nach lažen nile na'le yeyiljon ga soan mbalaz. Na' še bibi latje želen, nach ņan: "Da' yoblece šjajo'a lo' yichjlaždao' ben' gan' ba gwyo'a." ²⁵ Nach yeyejen da' yoble gan' zoa ben'. Cate' le'en bačh cheyone' güen, na' ba zoache' binļo, ²⁶ nach šjaytoben yegaže da' xigüe' ca' da' zjanacch malech ca ļen, na' txen yeso'on lo' yichjlaždao'ogüe'na'. Na' še bačh goc ca', gacch mal čhe bena' cled ca dan' ba goc čhe' da' nechw.

Mbalaz nita' beņe' ca' chosozenag xtiža' Diosen'

²⁷ Šlac be' Jesúsen' diža' quinga, gwzoa to no'ole gachol beņe' ca' že' gan' bsd blo'ede', na' no'ola' gwņe' zižje, gože'ne':

—Mbalaz zoa no'ola' gwxañ le' na' bguaže' le'.

²⁸ Perw na' Jesúsen' gože'ne':

—Nacchxe mbalaz nita' beņe' ca' chosozenag xtiža' Diosen' na' chesone' can' žanna'.

Beņe' bi chosozenag čhe Diosen' chesenabe' gon Jesúsen' to yeļa' guac

(Mt. 12:38-42; Mr. 8:12)

²⁹ Na' beņe' zan gosebigue' gosečhjde' Jesúsen', nach Jesúsen' gwne':

—Le'e zoale ņa'a nacchgualē beņe' laždao' xi'a.

Chñable gona' yeto yeļa' guac da' le'ele cont ņezele še Diosā' gwseļe' neda', perw bi gona' ca dan' chñablēna', le ba ble'ele da' ca' chona'. Lete gac čhia' can' goc čhe da' Jonás ben' be' xtiža' Diosen' cani'. ³⁰ Na' ca dan' goc čhe Jonásen' blo'en beņe' Níneve ca' Diosen' gwseļe' le', ca'cze dan' gac čhia' gwlo'en le'e zoale ņa'a Diosen' gwseļe' neda' golja' beñaçh. ³¹ Cate' žin ža gon Diosen' castigw čhe yogo'loļ beņe' cheson da' mal, da' no'olen' gwnabi'e beņe' Seba ca' yedecuiše' le'e mbanļe ņa'a. Ļe' gwze'e gan' nac zito'chgua na' bide' nga cont be-zenague' diža' sina' dan' be' da' rey Salomón len ļe', na' neda' zoa' nga naccha' beņe' blaoch ca da' Salomón na' bitw chzenagle čhia'. ³² Na' cate' žin ža gon Diosen' castigw čhe yogo'loļ beņe' cheson da' mal, ļecze žana' yesyeban beņe' Nínive ca' na' yosocuiše' le'e nita'le ža ņa'aža. Ļe' ļegaque' besyetiņjde' xtoļa'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' beņe' blaoch ca da' Jonása' na' bi chzenagle čhia'.

Dan' bsd blo'e Jesúsen' naquen ca to yi'

(Mt. 5:15; 6:22-23)

³³ 'Notno gwguala' to yi' na' gwdosen' caj, na' ņeca gwcuāšen' ga yoble ga nono le'e ļen, san chde'en ļe'e ze'e cont gwseñin' len yogo'loļ beņe' yeso'o lo' yo'ona'.

³⁴ Žia yejlaŋcho cont le'echo. Con še bibi chaquen chle'eczecho binlo. Perw še nchoľcho, bi chle'echo. Ca'czen' naquen len yichjlažda'ochon'. Še naccho beņe' laždao' güen, yo'o be'ni' che Diosen' lo' yichjlažda'ochon'. Perw še naccho beņe' mal, choľ nac yichjlažda'ochon'. ³⁵ Da'n'an' le gon cont gacle beņe' laždao' güen, na' šo' be'ni' che Diosen' yichjlažda'ole. ³⁶ Še nyeni' yichjlažda'olen' na' bibi da' mal yo'on, gwseņi'czen xņezle can' chseņi' to yi' ga nac choľ.

Jesúsen' gože' beņe' fariseo ca' zjanape' doľa' na' len beņe' ca' chososed chosolo'e ley
(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsen' diža' quinga, to beņe' fariseo gwče'e le' liže' cont yesagüe'. Na' gwo'yo Jesúsén' liž beņe' fariseon' na' gwchi'e cho'a mesen'. ³⁸ Na' beņe' fariseon' bebande' ble'ede' bitw bona' Jesúsén' cate' za' gagüe' can' cheson legaque' chesacde' chebe Diosen' legaque' dan' chesone' ca'. ³⁹ Na' Xancho Jesúsén' gože' le':
—Le'e beņe' fariseo nacle ca xiga' ye'eņ da' chchin beņe' na' chyibe' cožen' binlo perw bi chyibe' do lo'en. Chonle cont chesaque beņe' nacle beņe' güen, perw chebele chca'ale bi da' de che beņe' na' nacle beņe' mal juisyw. ⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheyaľa' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. ⁴¹ Le yeyaše' beņe' na' le gwnežjo bi da' cheseyažjde'. Še gonle ca', nacbia' nacle beņe' laždao' xilaže'.

⁴² 'iNyaše'chguaze gac che le'e beņe' fariseo! La'czľa' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'iNyaše'chguaze gac che le'e beņe' fariseo! Chze-laže'le cue'le lo' yodao' txe len beņe' blao ca', na' cate' chejle do gan' chac ya'a chaclaže'le yesonxen beņe' le'e.

⁴⁴ 'iNyaše'chguaze gac che le'e chsed chlo'e le da' bzoj da' Moisés na' len le'e beņe' fariseo! Chonle cont nacbia' gan' xoa ba che beņe' guaten', le ley chechon' žan zjanaquen zban na' bi cheyaľa' gwlejchon. Perw le'e nacle ca ba da' bi zjanacbia'. Chosozenag beņe' chele na' bi chesacbe'ede' nacle beņe' laždao' zban.

⁴⁵ To beņe' chsed chlo'e ley boži'e xtiža' Jesúsén', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsén' legaque':

—Lecz ca' le'e chsed chlo'e le da' bzoj da' Moisés, įnyaše'chguaze gac chele! Da' žale da' zan da' cheyaľa' yeson beņe', chonle leyna' ca to yoa' da' nocze no do'e, to yoa' da' chaclaže'le yesoa' beņe' yoble, perw le'e ne late'ze bi chaclaže'le gua'len.

⁴⁷ 'iNyaše'chguaze gac che le'e chonšagüe'le cho'a ba che da' beņe' ca' gosoe' xtiža' Diosen' cani! Chacle toze

len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

⁴⁹ 'Da'n'an' Diosen' lao yeľa' sina' che' gwne' sele' beņe' yesoe'lene' le'e xtižen' na' sele' postlw che' ca' len le'e. Na' gwne' gotle baľe' na' gwchi' gwsaca'le yebaľe'. ⁵⁰ Na' da' li ba chonle can' gwne'. Da'n'an' si'le castigw che yeľa' got che yogo' beņe' ca' gosoe' xtižen' gwzolaon caten' gwxeťe yežlion' chžinten ža ŋa'aža. ⁵¹ Zan beņe' gosot beņe' yoble legaque' gwzolaon len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyixe' cont chesonxene' Diosen'. Na' le'e mbanle ŋa'a si'le castigw che yeľa' got che yogo' beņe' ca'.

⁵² 'iNyaše'chguaze nac le'e chsed chlo'e le ley che Diosen'! Bitw chzejni'ile beņe' leyna' to ľicha can' naquen, neca chzenagle čhen. Na' beņe' chesacľaže' yosozenaguen', neca choe'le latje yosozenaguen'.

⁵³ Na' cate' beyož be' Jesúsén' diža' quinga, nach beņe' fariseo ca' na' beņe' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' ⁵⁴ le gosaclaže' choj dižan' cho'e da' yosode'ede' yesagüe' xya che'.

Yeľa' güexoayag che beņe' fariseo

12 Na' goc zan mil beņe' besežague' gan' zoa Jesúsén', catec beņe' zan besežag bosolej bosošožitje ŋi'a ľježe'. Na' Jesúsén' zgua'tec gwzolaģüe' be'e diža' len beņe' ca' zjanaque' le' txe, gože' le-gaque':

—Le gwsaca' len levadura che beņe' fariseo ca'. Dan' cheseziye'e beņe' cont yesacde' zjanaque' beņe' güen zaca'leben ca levadura dan' chchixede' yetextil. Bitw gonle can' chesonen'. ² Le bitwbi de da' ngaše' da' ŋa-cho cbi gwlo'elaon, neca de da' nono ŋa' neze da' ŋa-cho cbi yesenežden'. ³ Da'n'an' bite'teze da' gwnale багаše'ze, beņe' zan yesenden'. Na' dan' ba gwnale šižize lo' yo'o chelen', yogo'ze beņe' yesenežden'.

Non' cheyaľa' žebcho

(Mt. 10:28-31)

⁴ Beņe' migw chia', chyixjue'eda' le'e bitw žeble beņe' ca' yesot le'e, le cate' ba gotle bich bi gac yesonde' le'e.

⁵ San zoa ben' cheyaľa' žeble, cheyaľa' žeble Diosen', le cate' bač beque'e yeľa' mban chele, lecze nape' yeľa' chnabia' cont yesele' le'e gabiľ. Da' yoble chnia' le'e, cheyaľa' žeble Diosen'.

⁶ 'Nezecho byiņ dao' ca' bibi zjazaca'tecba', perw na' Diosen' ne toba' bi chanlaže'. ⁷ Na' ca nac chio', da' leca chaque Diosen' chio' neztede' baľ yiša' yichj to tocho žia. Da'n'an' bitw žeble, le zaca'ch le'e clal ca yogo' byiņ dao' ca'.

Cheyaľa' ye'cho beņe' nombia'czcho Jesucriston'

(Mt. 10:32-33; 12:32; 10:19-20)

⁸ 'Na' chnia' le'e, note'tez beņe' še cho'e diža' len beņačhen' che'ene' chejle'e chia', lecze ca' neda' gua'a

diža' len angl che Diosen' beŋe' že' yaba yapegaca'ne' bena' naque' neda' txen, neda' naca' ben' gwseła' Diosen' golja' beŋač. ⁹ Na' note'teze beŋe' še cho'e diža' len beŋačen' che'ene' bitw chejle'e čhia', lece ca' neda' gua'a diža' len angl che Diosen' beŋe' že' yaba yapegaca'ne' bena' bitw naque neda' txen.

¹⁰ Na' note'teze beŋe' še ŋe' yeła' ya' čhia' neda' naca' ben' gwseła' Diosen' golja' beŋač, Diosen' yezi'xene' che' še yetiŋjde'. Perw note'teze beŋe' še ŋe' yeła' ya' che Spiritw che Diosen', gwbat yezi'xen Diosen' che'.

¹¹ Na' cate' yeseče'exoxje' le'e lao beŋe' gwnabia' che yodaon' o lao justis o še lao nochle beŋe' gwnabia', bi cuec yičjle nac yoži'ile xtiža'gaquen' o še nacle ŋale. ¹² Lo hor na'teze gwzejni'i Spiritw che Diosen' le'e bin' cheyała' ŋalen'.

Bitw cheyała' cuec yičjcho tloaze bi da' de čhecho

¹³ To beŋe' bchoje' ladjo beŋe' zan juisyw ben' zjanžag na', na' gože' Jesúsen':

—Maestrw, gonščo' mandadw cont beŋe' bišan' goŋe' neda' bien che da' xaxŋa'to' da' cheyała' si'a.

¹⁴ Na' Jesúsen' gože' le':

—Bitw naca' neda' juez čhele. Bi cheyała' gua' neda' laze da' de čhele.

¹⁵ Nach gože' yogo'loł beŋe' ca' že'na':

—Le gwsaca' cont bi selaže'le bi da' gata' čhele yežlio nga, la' de bi de čhecho o la' bibi de čhecho bi da' čhyaž čhčhinecho, gague da' can' nac yeła' mban čhecho.

¹⁶ Na' be'lene' legaque' to jempl, gwne':

—To beŋe' gwŋi'a gocchgua coseš che', ¹⁷ na' bene' xbab lo' yičjlažda'ogüe' gwne': "¿Nacxe gona? Bich bi latje de ga gwže'šagua' coseš čhian'." ¹⁸ Nach gozne': "Quinga gona', yočhiŋja' yo'o gan' že' coseš čhia' quinga na' gona' yo'o xench. Na' gwže'šagua' cosešen' na' bichle da' de čhia'. ¹⁹ Na' lagüe ba de da' yažjda' da' zan iz, bich gona' žin. Ye'ej gagwteza' con da' chačlaža' na' gona' legr." ²⁰ Perw Diosen' gože' bena': "Chono' xbab da' bibi zaca'. Na'aže' bžin hor gato', na' žnola lo na' gac yogo' da' de čhio'?" ²¹ Can' gac che note'tez beŋe' še con chbec yičjje' tloaze da' de che' šlac mbane' na' bi chone' da' chazlaže' Dios.

Diosen' chapšie xi'ine' ca'

(Mt. 6:25-34)

²² Na' gož Jesúsen' beŋe' ca' zjanaque' le' txen:

—Da'nana' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xałana'le. ²³ Zaca'ch yeła' mban čhelen' ca yeła' guagw. Lece ca' cuerp čhelen', zaca'chen ca xałana'le. ²⁴ Le gon xbab che bečj ca', bitw chesazba', bitw chesyelapba', ŋeca zoa da'a xoa' čhegacba', ŋeca zoa ga ncu' no goš čhegacba' ga že' da' yesagwba', perw na' Diosen' chguagwce'ba'. ¡Nacchle zaca' le'e ca be ca' zjažia xil! ²⁵ Na' ŋe tole bi gac yoston' cuinle gašje metr še con cue' yičjle tonle. ²⁶ Nezele bitw gac yoston' cuinle, na' ŋeca naquen da' zaca'. Da'nana' bi gacžejlaže'le che bica'chle da' čhyažjele.

²⁷ Le gon xbab ca nac yej ca' da' zjaze yiče'.

Chesecha'oczen, bibi žin chesonen, ŋeca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xałane'na' ca yeła' xdan che yej ca'. ²⁸ Diosen' none' xdan da' ca' ze yičen' la'czla' to čop žaze nitan' na' chosozejen'. ¡Nacchxe gon Diosen' len le'e gwleccze yičjje' goŋe' yogo' da' čhyažjele, le'e late' lasze chejle'le che! ²⁹ Da'nana' bitw güe'laže'le cont gata' da' ye'ej da' gagwle. Bitw gacžejlaže'le čhen. ³⁰ Beŋe' ca' bi chesonxene' Diosen' con chesoe'laže' che bi da' gata' yese'ej yesagüe' na' che xałana'gaque'. Perw Xacho Diosen' ŋezcede' bi da' ca' čhyažjele. ³¹ Cheyała' güe'laže'le gwzenagle che Diosen' cont ŋabi'e yičjlažda'olen', na' yogo' da' ca' čhyažjele, goŋcze Diosen' len.

Da' zaca'ch gata' čhecho yežincho yaba

(Mt. 6:19-21)

³² Bitw žeble la'czla' nac to čhople. Diosen' chbede' chnabi'e yičjlaždao' le'e chzenagle che' na' chaclene' le'e. ³³ Le yeyote' da' de čhele cont gata' da' gwnežjwle beŋe' ca' cheseyažje. Še gonle ca', Diosen' goŋe' le'e da' zaca'ch na' da' cbi te čhen cate' yežinle yaba gan' zoe'na'. Na' bitw gac šo' beŋe' gwban que'en, na' ŋeca gac šo' be dao' gwžiai' len. ³⁴ Gan' de dan' chaquele nan' zoa yičjlažda'olen'.

Cheyała' soa cuezcho batcan' yide Criston' yeto

³⁵ Le soa le cueze batcan' yida' yeto. Le soa can' nita' beŋe' chesape' liž xangaquen' šlac zeje' to yeła' güešagna'. Zjanyaz xałana'gaque' na' čala' yi'. Nach cate' yežine' na' ŋie' cho'a yo'on, na' la' yesesaljwte' cont yeyo'e. ³⁷ Mba gac che beŋe' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsin'le da' yesagüe' na' cuine' gwnežjue' legaque' dan' yese'ej yesagüe'. ³⁸ Mba gac čhegaque' še chesebeze' batcan' yežine' la'czla' yežine' do chel o do šbal. ³⁹ Le gon xbab che da' nga. Šaca' ŋeze xan yo'on baten' žin beŋe' gwban liže'na', le gwŋa'ze' cont bi güe'e latje šo' bena' liže'na' cuane' xšinlazen'. ⁴⁰ Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' beŋač.

Mos ben' chon güen, na' mos ben' bi chon güen

(Mt. 24:45-51)

⁴¹ Pedroa' gože' Jesúsen':

—Xanto', čho'o jempl nga par neto'ze o še par yogo'loł beŋač?

⁴² Nach gož Xanchon' Pedroa':

—Naquen par note'tez beŋe' še chone' can' chon mos blao ben' chejni'i, ben' chon can' cheyała' gone'. Ben' chon ca', co' xane' lo ne'e ližen' cont ŋe'e mos ca' yezica'chle. Na' gone' da' yesagw to toe' cate' žin hor yesagüe'. ⁴³ Še to beŋe' mos chonteze' can' ben xanen' mandadw gone', mba soe' cate' yežin xanen'. ⁴⁴ Da' li chnia' le'e, xanen' cue'e lo na' mosen' yogo'loł da' de

che'. ⁴⁵ Perw na' še mosen' gone' xbab na' ne': "Ba gwže xanan", na' solagüe' got chine' mosa' yezica'chle na' ye'ej gagwxate' na' sožde', ⁴⁶ nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyała' gone', xane'na' got chinchgüe' le' na' gone' cont si'e castigw txen len yezica'chle beñe' bi cheson can' cheyała' yesone'.

⁴⁷ 'Na' mos ben' nac beñe' güedenag, la'czla' ba neзде' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nan' xanen' got chinchgüe'ne'. ⁴⁸ Na' beñe' bi neзде' bin' non xanen' mandadw gone' na' da'nan' chone' da' zaca' chine' le', na' xanen' bi chintequē' le' zi'. Note'teze beñe' zjanyechgua xbab, chesego'o beñe' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

Yesedił beñe' neče da' bid Jesúsen'

(Mt. 10:34-36)

⁴⁹ Nach gwna Jesúsen':

—Dan' zedeyena' yežlio nga naquen ca to yi' da' cuēc beñe'. Na' yebeda' šaca' ba chi' yi'na'. ⁵⁰ Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. ⁵¹ ¿Chonle xbab beñe' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesediłe' na' yosošaše'. ⁵² Quinga so-lao gac na'a, še žan nita' gayo' beñe' to lo' yo'o, yesedił legacze', chhope' contr šone' na' šone' contr chhope'. ⁵³ Yesedił beñe' byo len xi'ine' na' xi'ine' len le'. Na' yesedił no'olen' len xi'ine' no'ole, na' xi'ine' no'olen' len le'. Na' yesedił no'olen' len xo'oliže' na' xo'oliže' len le'.

Bitw gosacbe'ede' bi zeje da' ca' chon Diosen'

(Mt. 16:1-4; Mr. 8:11-13)

⁵⁴ Nach lecze gož Jesúsen' beñe' ca' nita' na':

—Cate' chle'ele chi' bejw gan' chxoa gwbiža' na' žale: "Gac yejw", na' chac ca'. ⁵⁵ Na' cate' chečhj be' da' za' ži'le na' žale: "Guac zeye", na' chac zeye'. ⁵⁶ Beñe' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chacbe'ele bi zejen da' ca' chon Diosen' tiemp nga zoa-cho na'a?

Cheyała' goncho cont yezoacho binlo len beñe' che'e chio' lao justis

(Mt. 5:25-26)

⁵⁷ ¿Bixchen' bi chonle xbab cont nezele can' cheyała' gonle? ⁵⁸ Cate' to beñe' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' beñe' ca' yoseyjuē' le'e ližya. ⁵⁹ Chnia' le'e bitw yebeje' le'e še biña' chixjwle doxen da' čala'le.

Cuiayi'cho še bitw yetinjecho xtoła'chon'

13 Na' len beñe' ca' že'na' gwnita' bał beñe' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj beñe' Galilea ca' na' bchixde' xčhengaquen' len che beyixe' ca' ba gosote' cont yesonxene' Diosen'. ² Nach boži'i Jesúsen' xtiža'gaquen' gože' legaque':

—¿Chonle xbaba' gosac čhegaque' ca' lagüe dan' gosonche' da' malech clēl ca beñe' Galilea ca' yezi-ca'chle? ³ Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. ⁴ Nezele che beñe' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' beñe' mal clēl ca beñe' ca' zjaže' Jerusalén? ⁵ Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejni'ide'ne' cheyała' yesyetinjde' xtoła'gaque', na' gože' legaque': —To beñe' zoa to yag yixgüigw che' gan' že' yag uvas che' ca'. Na' gwyeje' lo' yaguen' jañe'e še de toga yixgüigw gagüe', perw bitw bi bželde'. ⁷ Na' gože' ben' chape' yag che' ca': "Ba chac šon iz chedena'a yag nga še chbian yixgüigw, perw bitw bi chbian. Gwčhoguen, lažjw con zoan nlanen, na' neca bi chbiazen." ⁸ Na' gož ben' le': "Xana', jayenna', za' zoašazen yetgüiz, che'ena' xanenna' na' cuēcan' yo beb. ⁹ Na' še cuian yixgüigw do yetgüiz, bitec da' güen, perw še bicze bi cuian, nach čhogchon."

Jesúsen' beyone' to no'ole ža che Dios

¹⁰ Na' to ža che Dios bsed blo'e Jesúsen' beñe' že' to lo' yodao'. ¹¹ Na' zoa to no'ole beñe' ba goc šino'šone iz yo'o nyaz da' xigüen' yičhjažda'ogüe'na'. Na' ben da' xigüen' cont bdože cuerp che'na', na' gague gocch se' to lliča. ¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gwxoā ne'e cuerp che no'ola', na' la' bezete' to lliča. Na' no'ola' benxene' Diosen'. ¹⁴ Perw na' beñe' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' beñe' ca' nita' lo' yodaon':

—De xop ža cont gonle žin. Le da lo ža ca' cont yey-one' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Beñe' gwxiye' le' len beñe' lježo'. ¿Gague lo ža che Dios bia'cze chsežle go'ñ chele o burr chele ga zja-da'ba' chjasanlba' güe'ej nis? ¹⁶ No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdože cuerp čhen' šino'šone iz. Da'nan' nacczen lliča ba beyona'ne' ža che Dios.

¹⁷ Cate' gwne' ca', beṇe' ca' cheseque'e le' gosacde' zto', perw yogo'loḷ beṇe' ca' yezica'chle nita'na' besye-banchgüede' len yogo' dan' ben Jesúsén', le leca güen zjanac dan' benen'.

Yela' gwnabia' che Diosen' naquen ca biṇ che xomdas
(Mt. 13:31-32; Mr. 4:30-32)

¹⁸ Nach gwna Jesúsén':

—Na'a gwlo'eda' le'e cont nezele šanch beṇe' yosozenag che Diosen' cont nabi'e yichjlažda'ogaque'.

¹⁹ Da'nan' yela' gwnabia' che Diosen' naquen ca biṇ che xomdas. To beṇe' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

Yela' gwnabia' che Diosen' naquen ca levadura
(Mt. 13:33)

²⁰ Nach da' yoble gozne':

—Na'a nia' le'e yelate' nac nac yela' gwnabia' che Diosen'. ²¹ Naquen ca levadura dan' gwlec no'olen' len to rob yezj cont gwcha'o doxenen.

Cheyaḷa' chiljwlaže'cho nac goncho cont soacho binḷo len Diosen'
(Mt. 7:13-14, 21-23)

²² Na' gwda Jesúsén' bsd blo'ede' beṇe' ca' že' ciuda ca' na' yež ca' gan' bedie' cont bežine' Jerusalénṇa'.

²³ Na' to beṇe' gože' Jesúsén':

—Xanto', žcon to čhopze beṇe' šjasyenite' len Diosen'?

Nach Jesúsén' gože' legaque':

²⁴ —Chnia' le'e, beṇe' zan chese'nde' yesenite' binḷo len Diosen', perw gwžin ža cate' bich gac yesone' cont yesenite' binḷo len le'. Da' nac žialao gonle, čhiljwlaže'le nac gonle cont soale binḷo len Diosen' ²⁵ cont bi gone' len le'e ca ben to xan yo'o cate' bžin hor gwseyjuen'. Gwžože'e bseyjue', na' gwdechle besežin beṇe' bososiže' le'e puert che'na' na' bich gwsaljue' cont yeso'e. Na' gose'ene': "Gwsaljwšca cont šo'to'." Na' gože' legaque': "Bitw nombi'a le'e, neca nežda' ga za'acle." ²⁶ Can' gac che baḷle. Nach solaole ye'lne': "Güe'ej gwdagwto' len le' na' bsd blo'edo' neto' la cay lažto'." ²⁷ Perw na' da' yoble ye'e le'e: "Bitw nežda' ga beṇe' le'e. Le šjaya'ac yogo' le'e beṇe' güen da' mal." Can' ye'e le'e. ²⁸ Na' le'ele Abraham na' Isaac na' Jacob na' yogo'loḷ beṇe' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxetje ḷayle dan' leca žaglaole cate' gacbe'ele bich gac šo'le. ²⁹ Beṇe' zan beṇe' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. ³⁰ Nita' beṇe' zjanaque' beṇe' bzebe ṇa'a perw gwžin ža cate' yesaque' beṇe' žialao. Na' nita' beṇe' zjanaque' beṇe' žialao ṇa'a, perw gwžin ža cate' yesaque' beṇe' bzebe.

Begüine' Jesúsén' neche xtoḷa' beṇe' Jerusalén ca'
(Mt. 23:37-39)

³¹ Lo ža na'teze baḷ beṇe' fariseo ca' besežine' gan' zoa Jesúsén' gose'ene':

—Cheyaḷa' yoxonjo' nga gan' chnabia' rey Herodes, le chaclaže' gote' le'.

³² Jesúsén' gože' legaque':

—Herodesen' naque' ca to beza' yela' gwxiye' čhen'. Le šja'ac na' ye'lne' yeto čhope žazen' soa' yebejcha' da' xigüe' ca' zjajo'o zjanyaz yichjlaždao' beṇe' na' yeyoncha' beṇe' chesacšene. Ba zoa yeyož gona' dan' cheyaḷa' gonan'. ³³ Perw ca nac dan' chona' ṇa'a gonchczan' gwxe güižj. Gague ngan' chesote' beṇe' ca' chesoe' xtiža' Diosen', san Jerusalén chesote' beṇe' ca'.

³⁴ 'Le'e beṇe' Jerusalén, chotle beṇe' ca' chesoe' xtiža' Diosen' na' ca nac nochle beṇe' ca' chseḷa' Diosen' len le'e, chcheḷlene' yej. Zan ṇi'a goclaža' yotoba' le'e ca to jed xcaca' be nche' xi'iṇ na' chyežba' legacba', perw bitw goclaže'le. ³⁵ Na' ṇa'a ba gwlejičj Diosen' le'e. Na' chnia' le'e, bich le'ele neda' ṇa'a. Cate'ch žin žana' ṇale: "Mbalaz ben' za' nga nseḷa' Xancho Diosen' le' cont nabi'e", cana'ch le'ele neda' da' yoble.

Jesúsén' beyone' to beṇe' de yi

14 Na' to ža che Dios Jesúsén' gwyeje' jatagüe' liž to beṇe' fariseo ben' nac beṇe' blao. Na' yezi-ca'chle beṇe' fariseo ca' chosogüia cheseṇe'e bixen' goncze' cont gata' da' yosode'ede' yesagüe' xya che'. ² Na' lagüe'na' zecha to beṇe' chacšene, de cuerp čhen' yi. ³ Na' gož Jesúsén' beṇe' fariseo ca' na' beṇe' ca' chososed chosolo'e ley dan' bzoj da' Moisés:

—žDe ḷsens len ley čechon' yeyoncho to beṇe' güe' ža che Dios o še bitw bi ḷsens de?

⁴ Perw notno boži'i xtiže'na'. Nach Jesúsén' beṇe' na' bena' na' beyone' le', na' gože'ne':

—Guac yeyejo'.

⁵ Nach gož Jesúsén' beṇe' ca' že' liž beṇe' fariseon':

—Le'e še zoa to burr o to go'ṇ čhele na' lažo'ba' to lo' yechw sitjw, žcabi ḷa' yebejteleba' ḷa'šaze nac ža che Dios?

⁶ Na' nono goc yoži'i xtiža' Jesúsén'.

Beṇe' ca' gosaxe' gan' chac güešagna'

⁷ Na' ble'e Jesúsén' can' cheson beṇe' ca' gosaxe' liž beṇe' fariseon', gosebeje' gan' zjachi' beṇe' blao ca' cont gosebi'ena'. Na' Jesúsén' be'e to jempl, gože' le-gaque':

⁸ —Cate' to beṇe' gaxe' le'e gan' chac güešagna', bitw cue'le gan' cheyaḷa' cue' beṇe' blao ca', le še cue'le na', guacte yid beṇe' nacch beṇe' blao ⁹ na' xan yo'ona' ye'e le'e: "Le soža' cont cue' benga." Nach do chaquele zto' soža'le cue'le ga yoble len beṇe' ca' bitec bi zjazaca'.

¹⁰ Na' cate' gan' gaxe' le'e cue'le len beṇe' bitec bi zjazaca', na' cate' yid xan yo'ona' na' ye'e to tole: "Beṇe' migw čhia', da cui'o len beṇe' blao ca'." Nach gacxenle lao beṇe' ca' zjachi' len le'e cho'a mesen'. ¹¹ Le

note'teze beñe' chonxen cuine', Diosen' gone' cont si'e zto' lagüen'. Na' note'teze beñe' chzexjwlaže' lagüen', Diosen' gone' cont gacxene'.

¹² Na' lecze gož Jesúsen' ben' goxe' le' ližen':

—Cate' gono' to lñi na' gaxo' beñe' yesagüe' len le', bitw gaxo' beñe' biše' lježo', beñe' migw čio' o beñe' zjanaque' beñe' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. ¹³ Cate' gono' to lñi gox beñe' yaše' na' beñe' nchog no ñi'a na'gaque', beñe' nxinj ñi'e, na' beñe' lchoj. ¹⁴ Še gaxo' legaque', Diosen' gone' so' mbalaz, le beñe' ca' bi gac yesyegüe'e gwzon čio'. So' mbalaz cate' Diosen' yosbane' le' ladjo beñe' guat ca' txen len yezica'chle ben' ja'ac to lñi cate' gosebane'.

Jempl če to beñe' ben lñi xen

¹⁵ Na' to beñe' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo lñi da' gac caten' ba chnabia' ben' seja' Diosen'.

¹⁶ Nach Jesúsen' gwne':

—To beñe' bene' to lñi xen, na' goxe' beñe' zan šja'ac ližen' cont yesagüe'. ¹⁷ Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane'e to toe', gože' legaque': "Le šo'o, ba bsiñi'e dan' gagwchon'." ¹⁸ Na' yogo'lole' gose'e ben' bi zjazoe' latje šja'aque' gan' chone' lñin'. Beñe' nechon' gwne': "Za' gwxia' to yežlio, na' cheyala' šjana'an. Na' ye'šco' xanon' bitw gac yida'." ¹⁹ Na' yetoe' gwne': "Za' gwxia' gayo' cue' go'ñ na' ña'a šjengaca'ba' prueba. Ye'šco' xanon' si'xene' chia', bitw gac yida'." ²⁰ Na' yetoe' gože'ne': "Za' bšagna'. Da'nan' bitw gac yida'." ²¹ Na' mosen' beyeje' na' jayeže' xanen' can' gose' beñe' ca' le'. Nach xan yo'ona' ben' chon lñin' bže'e. Nach gože' xmosen': "Gwyej jata to to cay na' to to nez lo ciudan', na' gwtobo' beñe' yaše' na' beñe' nchog ñi'a na'gaque' na' beñe' nxinj ñi'e, na' beñe' lchoj cont yeside' yesagüe'." ²² Gwde bene' ca' nach gože' le': "Xana', ba jatoba' beñe' ca' ba gwnaon', na' ñe' dechcze latje par beñe' yoble." ²³ Nach xane'na' gože' le': "Bchoj lo' ciudan' na' gono' byen yesid ben' nita' chanez. Na' šjaxi'o beñe' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. ²⁴ Na' ca' nac beñe' ca' goxa' da' nechw, bich gua' latje yesagw legaque' dan' ba bsiñi'ana'."

Dan' cheyala' goncho cont gaccho txen len Jesucriston'

²⁵ Na' beñe' zan juisyw zjana'ogüe' Jesúsen', na' gwyečhje' gože' legaque':

²⁶ —Note'teze beñe' še chaclaže' šejnilaže' neda' na' gwzenague' chia', še bi gacchde' neda' clel ca' xaxñe'e, no'ol če', xi'ine', biše', zane', na' lente cuine', bi gac gone' neda' txen. ²⁷ Na' note'teze beñe' bi chzanlaže' cuine' saca'zi'e o gate' ñe' chia' neda', lecze bitw gac gone' neda' txen. ²⁸ Še tole che'nele gonle to campanaryw, zgua'tec cue'le na' gonle xbab gwsaca'le ca' do gaca' da' chyažjele cont gonlen, še gaque xmechwle

cont yeyož campanaryon'. ²⁹ Še bi gwchix gwtole xbab čhelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' beñe' yesele'ede' lenenna' yesezi'diže' le'e, ³⁰ yesene': "Benga gwzolao chone' to campanaryw perw bitw beyož xšinen'." ³¹ Na' še to rey chone' xbab tiže' len yeto rey, lecze zgua'tec gwsaque' še gwzoede' len ši mil soldadw če' gone' gan yeto rey beñe' nče' galje mil soldadw. ³² Na' še chacbe'ede' bi gone' gan, šlac ñe' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. ³³ Ca' naquen len le'e, note'tezle še bi cuejyichjele yogo'lo' bi da' de čhele, bitw gac gonle neda' txen.

Cate' zeden' bich naquen xzi'

(Mt. 5:13; Mr. 9:50)

³⁴ Zeden' naquen güen, perw na' še bich naquen xzi', žnacxe goncho cont yeyaquen xzi' da' yoble? ³⁵ Bibi zacan', ñeca gaclenen yežlio, ñeca gaquen par beb, lete čho'oñchon. Le'e žia nagle da' chene, le gwzenag xtiža'na'.

Jempl če xila' ben' gocžeje

(Mt. 18:10-14)

15 Na' beñe' güečhixw ca' na' yebaļe beñe' güen da' xinj, yogüe' gosebique' gan' zoa Jesúsen' cont gosende' xtiže'na'. ² Na' beñe' fariseo ca' na' beñe' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' beñe' güen da' xinj ca' na' chagwlene' legaque'.

³ Nach Jesúsen' be'e to jempl, gože' legaque':

⁴ —Še nita' to gayoa xila' čhele na' gacžeje toba', žbi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'? ⁵ Na' cate' yeželban' yebečgüele na' yexoalba' ya'axičhjele yeyo'alba'. ⁶ Na' cate' yežin ližle, gwtoble beñe' migw čhele na' beñe' gualiž čhele na' ye'ine': "Le yebe len neda'. Ba bežel xila' chia' ben' gocžeje." ⁷ Chnia' le'e, gwbeche Diosen' txen len angl če' ca' cate' to beñe' chon da' mal yetinjde' xtole' clel ca' yesyebede' če' taplalj togalj beñe' zjanaque' beñe' güen beñe' bitw de xtoļa'gaque' da' yesyetingjde'.

Jempl če mechw dan' gwnit

⁸ Na' le'e no'ole še de ši mechw plata čhele na' še ñit ton, la' gwguala'tele to yi' na' gwloale lo' yo'o čhele na' yeyiljwožlen cont yeželen. ⁹ Na' cate' yeželenña', na' yotoble no'ole migw čhele ca' na' beñe' gualiž čhele na' ye'le legaque': "Le yebe len neda', le ba beželda' mechw chia' dan' gwnit." ¹⁰ Chnia' le'e lecze chesyebe chesyzaque' angl če' Diosen' beñe' zoa yaba cate' to beñe' chon da' xinj chetingjde' xtole'na'.

Jempl če ben' benditje xi'inen' xmechue'

¹¹ Na' lecze gože' legaque':

—Gwzoa to beñe' na' gwnita' ĉhop xi'ine' beñe' byo. ¹² Na' bžin ža beñe' xcuiden' gože' xen': "Xa', beñ neda' dan' cheyaļa' sia' da' de ĉhio'." Nach xen' bnežjue' dan' cheyaļa' si'en. ¹³ Goc to ĉhop ža nach beñe' xcuiden' btobe' yogo'loj bi da' de ĉhe' na' gwze'e gwyeye' nación zito' na' zlez da' bi zaca' jene'. Na' benditjde' xmechue'na' zejlene' da' malen'. ¹⁴ Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'. ¹⁵ Da'nana' gwyeye' gan' zoa to beñe' naciónna' gwñabe' žin, na' bena' gwsele' le' yiçe' ga že' be zan xcoše' na' jayoe'ba'. ¹⁶ Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'. ¹⁷ Na' beyone' to xbab šagüe', gwne': "Nita' mos zan ĉhe xan' na' dechgua da' chesagüe', na' neda' gatda' yela' chdon. ¹⁸ Yeza' ža na' yeya'a gan' zoa xa' na' yapa'ne' bena' da' mal lao Diosen' na' lao le', ¹⁹ na' bich zaca' gone' neda' cuent ca xi'ine', con še goñe' latje gaca' ca to xmore'." ²⁰ Nach beze'e beyeye' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopene'. ²¹ Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." ²² Na' xe'na' gože' xmore' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcuae' yel na' gwdelen ni'abe'. ²³ Na' le šjaxi' go'ñ dao' ben' chañe' na' le gotba' cont gagwchoba', le goncho lni. ²⁴ Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejiyichjbe' ĉhio', perw na'a ba bela'be'." Na' gosezolaogüe' chesone' lni. ²⁵ Na' xi'ine' beñe' nechon' zeje' yiçe' cate' bežin xi'inen' yeto ben' benditje xmechuen', na' cate' zeza' ben' gwyey yißen', ba zoa yežine' liž xen' cate' bende' chosocueže' na' chosoye'e. ²⁶ Na' goxe' to mosen' na' gwñabde' le' bixchen' chesone' lni. ²⁷ Na' mosen' gože'ne': "Bi' bišo'na' ba bela' na' xaon' ba betue' go'ñ daon' ben' chañe'chgua da' bela'be' to šagüe' to güen'." ²⁸ Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. ²⁹ Perw xi'ine' beñe' nechua' gože' xen': "Zan iz ba chac zoa' nga chonteza' žin con can' žo' le', na' biña' gaca' beñe' güedenag. Na' ne to šib dao' cana' goño' neda' cont gota'ba' gona' lni len beñe' migw ĉhia' ca'. ³⁰ Na' na'a ba bela' xi'ino' nga benditjbe' yogo'loj da' bnežjo'be' gwdalembes' no'ole zle', na' beto' par lebe' go'ñ dao' ben' chañe'." ³¹ Na' xe'na' gože'ne': "Xi'indagua', le' zoatezo' len neda', na' yogo'loj da' de naquen ĉhio'. ³² Perw cheyaļa' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejiyichjbe' ĉhio', perw ba bela'be'."

Jempl ĉhe to mos blao ben' benditjde' da' de ĉhe xane'

16 Nach gož Jesúsen' beñe' ca' zjanaque' le' txen:
—Gwzoa to beñe' gwñi'a na' gwzoa to mos
blao ĉhe' ben' gwyo'o lo ne'e yogo'loj da' de ĉhe'. Na'

beñe' gwñi'ana' bende' rson xmore' blaon' ba benditjde' bi da' de ĉhe'. ² Na' xanen' goxe' le' na' gože'ne': "Ba benda' diža' can' chonon'. Cheyaļa' yodio' cuent yogo'loj da' ba benditjedo' ĉhia'. Bich gac gono' xšinan' na'a." ³ Nach mosen' bene' xbaben': "Ž Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. ⁴ Nežda' bi gona' cont nita' beñe' yesene'e neda' cate' bich chona' žin ĉhe xanan'." ⁵ Nach goxe' yogo'loj beñe' ca' chesala' xmechw xane'na' tgüej tgüeje' na' gože' beñe' nechw: "Ž Gaca' ĉalo' ĉhe xana'?" ⁶ Na' bena' gože'ne': "Čaļa' ĉhe tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan ĉalo' ĉhe ĉhop mil litrwze seten'." ⁷ Gwde na' gože' beñe' gwchopen': "Ž Gacan' ĉalo' ĉhe xanan'?" Nach bena' gože'ne': "Čaļa' ĉhe to mil rob trigw." Nach mosen' gože' bena': "Gwche'edo' na' bzoj lo cuent ĉhio'na' bzoan ĉalo' ĉhe xono' gayoa robze trigon'." ⁸ Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' beñe' ca' chesala' ĉhe xanen'. Le beñe' ca' zjachi' yiçhje' to zleze dan' chac lo yežlion' chesonchgüe' xbab nacle yesone' len dan' zjade ĉhegaque', perw zan beñe' ba zjajo'o be'ni' ĉhe Diosen' lo' yiçhjažda'ogaque' bitw chesone' xbab naclen' yosoçhine' dan' de ĉhegaque'.

⁹ Na' chnia' le'e, dan' de ĉhele yežlio nga da' te ĉhen', perw le gwçhinen cont nita' migw ĉhele. Na' cate' ba beya bi dan' de ĉhele yežlio nga, nach nita' beñe' yosolebe' le'e cate' yežinle yaba gan' soale toli tocañe.

¹⁰ Še to beñe' chone' can' cheyaļa' gone' len da' bibi zaca'tec, lecz ca' gone' len da' zaca'chgua. Na' beñe' bi chone' can' cheyaļa' gone' len da' bibi zaca'tec, lecz bitw gone' can' cheyaļa' gone' len da' zaca'chgua. ¹¹ Še le'e bi chonle can' cheyaļa' gonle len dan' de ĉhele yežlio nga da' te ĉhen', bitw goñ Diosen' le'e da' zaca'ch da' bi te ĉhe. ¹² Dan' de ĉhele yežlio nga, ĉhe Diosen' gague ĉhelen'. Na' še bitw chonle can' cheyaļa' gonle len da' nac ĉhe', bitw goñe' le'e da' zaca'ch da' bi te ĉhen.

¹³ Nono mos gac gone' žin len ĉhop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin ĉhe toe' do yiçh do laže' na' ĉhe ben' yeto gonon' do chža'alaže'ze'. Leceze ca' le'e, bitw gac gonle xšin Diosen' do yiçh do laže'le na' gonte xšinle cont gacle beñe' gwñi'a.

¹⁴ Na' leceze nita' beñe' fariseo ca' chesende' xtiža' Jesúsen', na' gozezi'diže' le', le gosaclaže' yesaque' beñe' gwñi'a. ¹⁵ Na' gož Jesúsen' legaque':

—Le'e chonle cont beñaçhen' chesacde' chdaczle licha, perw Diosen' neze nle'ede' yiçhjažda'ole, na' Diosen' chgue'ede' bał da' chesaque beñaçhen' zjanaquen da' žialao xen.

Ley ĉhe Diosen' na' beñe' ca' chnabia' Diosen' yiçhjažda'ogaque'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle beñe' gosoe' xtiža' Diosen' bzejni'in chio' che Diosen'. Na' ña'a gwzolaon len Juanna', ñe' nita'cze beñe' cheseyixjue'ede' Diosen' ñabi'e yichjlaždao' beñe' yosozenague' che'. Na' beñe' zan cheseyiljue' nacle yesone' cont ñabia' Diosen' yichjlažda'ogaque'.

¹⁷ 'La'czla' še yežlion' len da' ca' zjažia le'e yaban' yesede čhegaquen, ca nac Xtiža' Diosen' dan' nyojen, ñe late' daon' cbi te čhen.

Bi cheyała' yela'acho len no'ol čechon' cont soalencho no'ole yoble

(Mt. 19:1-12; Mr. 10:1-12)

¹⁸ 'Note'teze beñe' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che beñe' yoble. Na' note'teze beñe' yošagna'lene' to no'ole beñe' bela'a len beñe' che', lecze tozcze ca da' xinj gone' len dan' chon beñe' chata'lene' no'ol che beñe' yoble.

Beñe' gwñi'a na' Lázaro

¹⁹ Nach gozna' Jesúsén':

—Gwzoa to beñe' gwñi'a na' xdanchgua goc xalane'na', na' leca gwdagwšagüe' yogo' ža. ²⁰ Na' to beñe' yaše' le' Lázaro, yogo' ža jasedixjue' le' cho'a puert zaguan che beñe' gwñi'ana' cont gwñabe' yosonežjue'ne' con gaca' da' chesezandé'. Na' Lázaron' leca gwžia yežo' doxen cuerp čhen'. ²¹ Na' catec gwdone' goclaže' gagüe' bla'a dao' yela' guagw da' bese-lažo' cho'a mes che beñe' gwñi'an'. Na' beco' ca' ja'ac-ba' jasele'eba' yežo' dan' gwžia cuerp che'na'. ²² Na' got beñe' proben' nach angl beñe' že' gan' zoa Diosen' besyezi' besyeque'e le' yaban' gan' zoe' ña'a len da' xozxta'ocho Abraham. Na' lecze got beñe' gwñi'ana' na' bosocuaše'ne' ²³ na' beyeje' lo yi' gabil. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. ²⁴ Nach beñe' gwñi'an' gwñe' zižje gwne': "Xa' Abraham, beyaše'laže'šca neda' na' gwseła' Lázaron' cont yos-bise' loža' nga len late' nis da' gwlapa' xbene'na', le le-ca chžaglagua' lo yi' nga." ²⁵ Perw na' Abrahanna' gože' le': "Xi'ina', bosa'laže' cate' gwban'o' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga ña'a na' le' chžaglaguo'. ²⁶ Bi gac gona' can' chaclažon', le Diosen' bačh nze' to bdiñj xen ga nono gac te, cont nono gac sa' nga šeje' gan' zon', ñeca nono gac sa' gan' zon' na' yide' nga." ²⁷ Nach beñe' gwñi'ana' gože' Abrahanna': "Beñe' gol dao', chata'yoeda' le' gwseła'šca Lázaron' liž xan'. ²⁸ Nita' gayo' beñe' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'." ²⁹ Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle beñe' ca' goso'e xtiža' Diosen' cani'. Cheyała' yosozenague' che da' ca' zjanyojen." ³⁰ Na' gože' Abrahanna': "Bitw, beñe' gol dao'. Še to beñe'

yebane' ladjo beñe' guat na' güe'lene' legaque' diža', nach yesyetingjde' xtoła'gaquen'." ³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle beñe' ca' goso'e xtiža' Diosen', la'czla' še yeban to beñe' ladjo beñe' guat ca', bi yesele'cze' che Diosen'."

Bitw cheyała' goncho cont gon beñe' da' xinj

(Mt. 18:6-7, 21-22; Mr. 9:42)

17 Na' gož Jesúsén' beñe' ca' zjanaque' le' t xen: —Decze da' gonen cont lažo' beñe' yesone' da' xinj, perw nyaše'chguaze gac che beñe' chone' cont beñe' yoble yesone' da' xinj. ² Yejni'a šaca' yosočeje' yene' to yiše na' šjasezałe' le' lo' nisdao' clel ca soe' gone' cont to beñe' za' gwzolažgüe' chejnilaže' neda' lažo'e gone' da' xinj. ³ Da'nan' le' gwsaca' cont bi gonle ga lažo' beñe' gone' da' xinj.

'Na' še to beñe' lježle gonde' le'e mal, le tiłe' na' še gwšee' xbab na' ñe' bich gone' ca', le yezi'xen che'. ⁴ La'czla' gaž ñi'a lao tža gone' da' mal contr beñe' lježen', še gaž ñi'ate ñe': "Ba betinjda' che dan' benan', bezi'xen čhia'", na' cheyała' yezi'xene' che'.

Gosaclaže' yesele'che' che Diosen'

⁵ Na' gose' postlw ca' Xancho Jesúsén':

—Gaclenšco' neto' cont šejle'chto' che Diosen'.

⁶ Nach gož Xanchon' legaque':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca to xsa xomdas lagüe' dan' bi chejnilaže'teclne', še šejnilaže'lné', guaque ye'le yag nga: "Gwcuase nga na' jayzoa lo' nisdan'", na' guaccze can' nalna'.

Dan' cheyała' yeson mos ca'

⁷ 'Le'e še mos čhelen' chgua'ane' go'ñ, o še chyo'e' xila', cate' chele'e güeyeban' bitw che'lné': "Beyo'o ngale, gwche'edo' gagu'o' xše'." ⁸ San che'lné': "Bsiñi'a da' ye'ej gagua' na' goñon'. Te yedaguan' nach gago'." ⁹ Na' bitw cho'elne' yeła' choxclen cate' ba bene' dan' gož-lene'. ¹⁰ Na' lecz ca' le'e, cate' ba beñe' yogo'lo' dan' ža Diosen' gonle, cheyała' ñale: "Bitw zaca'to' no gon yeła' choxclen čheto' ca dan' ba bento', le bento' con da' cheyała'cze gonton'."

Jesúsén' beyone' ši beñe' chese'ede' yižgüe' da' nzi' lepra

¹¹ Na' zej Jesúsén' Jerusalénna' len beñe' ca' zjanaque' le' t xen na' gwdie' gan' ndil distritw Samaria len distritw Galilean'. ¹² Na' besežine' to cho'a yež dao' na' besechoj ši beñe' chese'e yižgüe' da' nzi' lepra jasešague' Jesúsén'. Na' gosezie' zito' ¹³ na' gosene' žižje gosene':

—Maestrw Jesús, beyaše'laže' neto'.

¹⁴ Na' Jesúsén' cate' ble'ede' legaque' na' gože'ne':

—Le šjaya'ac lao bxož ca' cont yesene'e le'e še ba beyacle.

Na' goquen' lo neza' besyeyacde'. ¹⁵ Nach toe' cate' gocbe'ede' baçh beyaque', na' bebi'e na' gwnie' zižje benxene' Diosen', ¹⁶ na' bzoa xibe' lao Jesúsen' bi'e le' yela' choxclen. Ben' ben ca' naque' to beñe' Samaria. ¹⁷ Nach gwna Jesúsen':

—Beyona' ši beñe'. ¿Gañxe beñe' ca' yega? ¹⁸ ¿Toz beñe' zito' nga bebi'e chonxene' Diosen'?

¹⁹ Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'

(Mt. 24:23-28, 36-41)

²⁰ Na' beñe' fariseo ca' gosenabde' le' batxen' yid ben' seļa' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo. ²¹ Nono cheyaļa' güe' diža' ne': "Gwna' nga chnabi'e", o "Gwna' na' chnabi'e." Le ba zoe' len le'e na'a chnabi'e.

²² Nach gože' beñe' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwseļa' Diosen'", perw bitw gac can' nablaze'len'.

²³ Yesenita' beñe' yesi'e le'e: "Gwna'šc nga zoa ben' gwseļa' Diosen'", o "Gwna'šc na' zoa ben' gwseļa' Diosen'." Perw bitw ga'ole ben' yesi'e le'e ca'. ²⁴ Can' chac cate' chep yes, chsenin' doxen le'e yaban' ze-jenez, lecze can' gac cate' žin ža yida' da' yoble, neda' naca' ben' gwseļa' Diosen' golja' beñaçh. Yida' zejenez na' yogo'loļ beñe' yesele'ede' neda'. ²⁵ Zgua'tec de da' zan da' cheyaļa' saca'zi'a na' beñe' ca' že' na'a bitw yesejle'e chia'. ²⁶ Lecz ca' goc ca' tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwseļa' Diosen' golja' beñaçh. ²⁷ Beñe' gwnita' ca' tiemp che da' Noén' gosaše' gose'ej gosagüe' gosolaže' bosošagne'e na' bosošague' na' no xi'ñ che' cate' bžin ža gwo'o Noén' lo' barcon'. Nach goc to yejwsio' juisyw. Na' gosebiayi' yogo' beñe' ca' bi gosola' lo' barcon'. ²⁸ Lecz ca' goc ca' tiemp che da' Lot, beñe' Sodomán' gose'ej gosagüe' gosote' bi da' de che-gaque', na' gosezi'e bi da' beseyažjde', na' gosaz gosa'ane', na' goson liže'. ²⁹ Perw na' žan' beza' Loten' Sodomán', Diosen' bene' cont byinj yi' na' azufre yaba na' gosebiayi' yogo'loļe'. ³⁰ Can' gac cate' yida' da' yoble, neda' naca' ben' gwseļa' Diosen' golja' beñaçh, na' yogo'loļ beñe' yesele'ede' neda'.

³¹ Na' ža caten' yida' še chda to beñe' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' beñe' chda do yixe', bitw gacde' yeyej liže'. ³² Le šjayza'laže' can' goc che no'ol che Loten'. ³³ Note'tez beñe' chacde' gone' cont cbi saca'zie' o cont nono yesot le', bena' cuiayi'. Na' note'tez beñe' chzanlaže' cuine' saca'zie' o gate' ne' chia' neda', ba de yela' mban che' toli tocañe.

³⁴ Chnia' le'e, quinga gac caten' yida' da' yoble. Çhope beñe' zjadie' chesetase' toz cam. Toe' yeca'a Diosen' na' yetoe' yega'añ. ³⁵ Na' çhop no'ole nite' txen chesote', toe' yeca'a Diosen' na' yetoe' yega'añ. ³⁶ Na'

çhope beñe' nite' do yixe', toe' yeca'a Diosen' na' lecze yega'añ yetoe'.

³⁷ Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': "Gan' de be guat nan' chesežag šod ca'."

Jempl che to no'ol güezeb len to juez mal

18 Na' be'len Jesúsen' legaque' to jempl bsed blo'ede' legaque' cheyaļa' nita'teze' yesonçhaçh-laže' yosoļ güiže' Diosen'. ² Na' gože' legaque':

—Gwche' to ciuda ga gwzoa to juez na' juezen' bi gw-dape' Diosen' bala'añ na' neca gwche'yichje' še chesazlaže' beñaçhen' can' chonen'. ³ Na' ciudan' gwzoa to no'ol güezeb, na' goxje cheje' lao juezen' na' che'e le': "Ben yela' justis chia' len beñe' chgue'ede' neda'." ⁴ Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'añ na' neca chi'yichja' še chesazlaže' beñaçhen' can' chonan'. ⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

⁶ Nach gož Xanchon' legaque':

—Le gon xbab che dan' gwna juezen' ben' bi zej to licha. ⁷ Nacchxe gon Diosen' gwzenagche' che beñe' ca' ba gwleje' cont zjanaque' xi'ñe', beñe' ca' chosoļ güiže' le' do ža do yel. ¿Gwleze' sša cont yosle' legaque' lo na' beñe' ca' chesegue'ede' legaque'? ⁸ Chnia' le'e, Diosen' bedao'nez yosle' legaque' lo na' beñe' ca'. Perw cate' neda' yida' yežlio nga yeto, neda' naca' ben' gwseļa' Diosen' golja' beñaçh, žne' nita'ch beñe' chesejnilaže' neda'?

Jempl che to beñe' fariseo len to beñe' güeçhixjw

⁹ Gwnita' baļ beñe' gosacde' zjanaque' beñe' güen lao Diosen' neçhe da' chesone'. Beñe' ca' chesacde' beñe' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen beñe' ca', gwne':

¹⁰ —Çhope beñe' ja'ac yodao' blao jaseļ güiže'

Diosen', toe' beñe' fariseo na' yetoe' beñe' güeçhixjw.

¹¹ Beñe' fariseon' gwzeze' boļ güiže' Diosen' na' con chonxen cuine', gwne': "Dios, neda' chona' yela' choxclen çhio' bitw chona' cana' cheson yezica'chle beñe'. Bitw chca'a bi da' de che beñe' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' beñe' mal can' nac beñe' güeçhixjw ni.

¹² Çhope ni'a to xman chona' gwbas, na' yogo'loļ da' chona' gan, chbecan' ši cuen na' chnežjua' to cuen che yodao'." ¹³ Na' beñe' güeçhixjon' gwzeteze' zito'le, neca cheyaxjde' lis lagüe' yabale. Nach chbaže' lçho'e gwne': "Dios, beyaše'laže' neda' naca' beñe' güen da' xinj."

Da'na'z da' gwna beñe' güeçhixjon'. ¹⁴ Na' chnia' le'e, Diosen' bezi'xene' che beñe' güeçhixjon' na' beyej liže' bibi xtole' gota'. Perw bi goc ca' len beñe' fariseon'. Le note'tez beñe' chonxen cuine', Diosa' gone' cont si'e zto', na' note'tez beñe' chzexjwlaže' lagüen', Diosen' gone' cont gacxene'.

Jasesane' bidao' lao Jesúsen'

(Mt. 19:13-15; Mr. 10:13-16)

¹⁵ Na' jasesane' bidao' lao Jesúsen' cont xoa ne'e yichjgacbe'. Na' cate' beñe' ca' zjanaque' le' txen besele'ede' can' chesonen', gosedile' legaque'. ¹⁶ Perw na' Jesúsen' goxe' beñe' ca' cont yeside' len bidao' chegaquen', na' gože' beñe' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le beñe' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'. ¹⁷ Na' da' li žia' le'e, note'teze beñe' bi yosozenague' che Diosen' ca cheson bidao' quinga cate' chosozenagbe' che xaxña'be', gwbat ñabia' Diosen' yichjlažda'ogaque'.

To beñe' gwni'a be'lene' Jesúsen' diža'

(Mt. 19:16-30; Mr. 10:17-31)

¹⁸ To beñe' gwnabia' gože' Jesúsen':

—Maestrw, le' naco' beñe' güen. ¿Bi cheyała' gona' cont gata' yeła' mban chia' toli tocanē?

¹⁹ Nach Jesúsen' gože'ne':

—¿Bixchen' žo' naca' beñe' güen? Toz beñe' güen zoa, na' len' Dios. ²⁰ Le' ñezdo' da' none' mandadw goncho: "Bi gata'lenle' no'ol bi nac no'ol chele o beñe' byo beñe' bi nac beñe' chele. Nono gotle. Bi cuanle. Bi güe'le diža' güenlaže' che beñe' lježle. Le gap bala'añ xaxña'le."

²¹ Na' gož ben' le':

—Yogo'lo! da' quinga gwzolagua' chonczan' cate' ñe' nactia' bidao'.

²² Nach cate' bene' Jesúsen' xtižen' na' gože'ne':

—Zoa to da' ñe' chyažjen gono', jayete' yogo' da' de čhio', na' mechw dan' le'edo' čhen, bnežjon beñe' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' čhio'.

²³ Perw na' bena' cate' beyož bende' diža' dan' gož Jesúsen' le', gocyaše'chgüede', le beñe' gwni'achgua goque'. ²⁴ Na' Jesúsen' gwñe'e beñe' gwni'ana' na' gože'ne':

—Leca zdebe naquen to beñe' gwni'a gwzenague' che Diosen' cont Diosen' ñabi'e yichjlažda'ogüe'. ²⁵ Bedao'ch te to be xen be nzi' camello to lo' nag yeše' cnel ca to beñe' gwni'a gwzenague' che Diosen' cont Diosen' ñabi'e yichjlažda'ogüe'.

²⁶ Na' beñe' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

²⁷ Na' Jesúsen' gože' legaque':

—Da' bi gac gon beñačhen', bitw ñacho bi gac gon Diosen' len.

²⁸ Nach Pedroa' gože' le':

—Neto' ba gwlejičhito' yogo' da' de čheto' cont nacto' le' txen.

²⁹ Na' gož Jesúsen' legaque':

—Da' li žia' le'e, note'teze beñe' ba gwlejičhje' liže', xaxñe'e, biše', xo'ole' o xi'ine' ñeche chzenague' che Diosen' cont Diosen' chnabi'e yichjlažda'ogüe', ³⁰ yežlio

nga yonežjo Diosen' le' da' nac da' zaca'ch, na' cate' yežine' yaban' gata' yeła' mban čhe' toli tocanē.

Da' yoble gosyixjue'e Jesúsen' ba zoa gate'

(Mt. 20:17-19; Mr. 10:32-34)

³¹ Na' gwlejiže' Jesúsen' beñe' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lo! dan' nyoj čhia' dan' bosozoj da' beñe' ca' gosoe' xtiža' Diosen' cani', neda' naca' bena' gwseła' Diosen' golja' beñač. ³² Gaca' lo' na' beñe' ca' bi zjanac beñe' Israel, na' yesezi'diže' neda', na' yesene' yeła' ya' čhia', nach yosoži'e xene' cho'alagua'. ³³ Yesot yeseyine' neda' na' yesote' neda', perw yeyon' ža yebana' ladjo beñe' guat ca'.

³⁴ Perw beñe' ca' zjanaque' Jesúsen' txen bi gosejni'ide' dan' gože' legaque', le zjančo! yichjlažda'ogüen', da'nan' bi gosejni'iden'.

To beñe' lcho! beñe' Jericó bele'ede'

(Mt. 20:29-34; Mr. 10:46-52)

³⁵ Nach cate' ba zoa yežin Jesúsen' Jericó, to beñe' lcho! čhie chanezen' chñabe' yosonežjo beñe' le' con gaca' da' chesezande'. ³⁶ Na' bende' chesede beñe' zan gan' čie'ena', na' gwñabe' bin' chac. ³⁷ Na' gose'ene':

—Jesús beñe' Nazaret chdie' laguo' nga.

³⁸ Na' bosya'adie' gwne':

—Jesús, xi'in' diaža' čhe da' rey David, beyaše'laže'šca neda'.

³⁹ Nach beñe' ca' zjažialao lao Jesúsen' gosedile' beñe' lcho!en', gose'e le' cheyała' soe' šize, perw nachle bosya'adiache', gwne':

—Xi'in' diaža' čhe da' rey David, beyaše'laže'šca neda'.

⁴⁰ Jesúsen' gwleze', nach bene' mandadw šjasexi'e beñe' lcho!en' lagüe'na'. Na' cate' gwbiga' beñe' lcho!en' lao Jesúsen', nach gože'ne':

⁴¹ —¿Bi chaclažo' gonda' le'?

Na' beñe' lcho!en' gože'ne':

—Xana', benšca cont yele'eda'.

⁴² Jesúsen' gože'ne':

—Bele'e. Dan' chejnilažo' neda' bač beyac yejlagon'.

⁴³ Na' la' bele'ete beñe' lcho!a' na' gwda'ogüe' Jesúsen' benxene' Diosen'. Na' lecze ca' yogo' beñe' ca' besele'ede' can' goquen' gosoxene' Diosen'.

Jesúsen' na' Zaqueo

19 Nach Jesúsen' gwyo'e yež Jericó na' gwdeze' yešla'a ciudan'. ² Na' zoa to beñe' le' Zaqueo. Naque' beñe' gwnabia' čhe beñe' güečhixjw ca', na' naque' beñe' gwni'a. ³ Gwdiljwlaže' naclen' gone' le'ede' Jesúsen', perw bitw goc, le gwnita' beñe' zan len Jesúsen' na' Zaqueon' goque' to beñe' bčhecw dao'. ⁴ Da'nan' gwza'sese' gwdie' lao beñe' ca' cont gwyep'e to lo' yag da' zoa gała'ze gan' te Jesúsen'. ⁵ Perw na' cate' bžin Jesúsen' xan yaguen', gwñe'e lo' yaguen' na' gože'ne':

—Zaqueo, bedao'nez beyetj. Cheyała' yega'ana' ližo' na'aže'.

⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'. ⁷ Perw na' beņe' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž beņe' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' beņe' yaše'. Na' dan' ba gwca'a che beņe', gwziya'a legaque' cont goseyixwche' da' zča'och ca dan' cheyała' yeseyixjue', yonežjwgaca'ne' tap ca'te'le.

⁹ Na' Jesúsen' gože'ne':

—Na'aža ba beņ Diosen' yeła' mban čhio' toli tocaņe len che beņe' lo' yo'o čhio'. Na' da' li ba naco' xi'iq diaža che da' Abraham lagüe dan' ba chejnlažo' Diosen' can' ben da' xozxta'och Abraham. ¹⁰ Ca nac neda', gwseła' Diosen' neda' golja' beñačh cont zedyediljua' note'tez beņe' ba mbiayi', na' gwnežjua' legaque' yeła' mban toli tocaņe.

Jempl che ši beņe' bnežjw xangaque' legaque' mechw xen

¹¹ Na' šlac ne' zjanžag beņe' chosozenague' diža' dan' choe' Jesúsen', be'lene' legaque' to jempl, le ba nite' gała'ze Jerusalénna' na' gosacde' la' solaote nabi'e nación Israelen'. ¹² Nach gwne':

—To beņe' blao gwyeje' to yež zito' jene' dan' cheyała' gone' cont jaxi' lo ne'e nabi'e yež che', le gose-beje'ne' nabi'e yež čhen' cate' yežine'. ¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': "Mechw nga gonele negosyw šlac bi zoa". ¹⁴ Perw beņe' gualaž čhen' be-segue'ede' le', nach cate' beyož gwze'e, gosesele' beņe' lao xane'na' ben' gwnabia'che' lao yogüe', jaseže'ne': "Bitw chaclaže'to' nabi'a' benga neto'." ¹⁵ Perw la'czla' bi gosaclaže' beņe' gualaž čhen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' beņe' ši ca' lagüe'na', beņe' ca' bocua'anlene' xmechuen'. Goclaže' nežde' gaca' gosone' gan len mechw dan' bocua'anlene' to toe'.

¹⁶ Beņe' nechw bžine' lagüen' na' gože'ne': "Xana', xmecho' dan' bocua'anleno' neda' benen gan ši ca'te'le ca dan' bocua'anon'." ¹⁷ Nach xanen' gože'ne': "Ba beno' da' güen. Naco' mos güen. Beno' can' cheyała' gono' len da' daon' bocua'anlena' le', da'nan' gona' cont nabi'o ši ciuda." ¹⁸ Na' beņe' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'."

¹⁹ Nach gože' le': "Le' nabi'o gayo' ciuda." ²⁰ Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažečhačan' bay nga. ²¹ Bžeba' le' dan' naco' to beņe' znia. Chono' gan da' bi beno' žin na' chelapo' dan' gosaz beņe' yoble." ²² Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to beņe' znia, na' neždo' chona' gan da' bi bena' žin na' chelapa' dan' gosaz beņe' yoble. ²³ Na' še neždo' chona' ca',

žbičen' bi gwlejo' xmechuan' beņe' yoble cont yezian' len yichjen na'a ba bela'a?" ²⁴ Nach gože' beņe' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." ²⁵ Nach gose'e le': "Xanto', ba noxe'cze' ši ca'te' ca dan' bocua'anleno'ne'." ²⁶ Nach gož beņe' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zča'och, perw na' bena' bi chgone' žin dan' chnežjua'ne', yeca'a da' daon' noxe'na'. ²⁷ Na' ca nac beņe' ca' chesegue'ede' neda', beņe' ca' bi chesaclaže' nabi'a'gaca'ne', le šjaxi'e na' gotlene' lagua' nga."

Gosonxene' Jesúsen' cate' beyo'e Jerusalén

(Mt. 21:1-11; Mr. 11:1-11; Jn. 12:12-19)

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén. ²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' čhop beņe' ca' mandadw ben' zjanaque' le' txeñ, ³⁰ gože' legaque':

—Le šja'ac yež dan' chi' gała'ze, na' cate' žinlen' na' yeže'lele to burr dao' da'ba' yag, be nono na' cuia. Le sežba' na' le che'ba' nga. ³¹ Še no náb bixčen' chsežle-ba', na' ye'ine': "Xanto' chyažjde'ba'."

³² Nach beņe' ca' gwseła' Jesúsen' gosa'aque' na' be-sele'ede'ba' da'ba' gan' gož Jesúsen' legaque' ca'.

³³ Nach šlac cheseseže'ba', xamba' ca' gose'e legaque': —žBixčen' chsežle burr daon'?

³⁴ Nach beņe' ca' gwseła' Jesúsen' gose'e legaque':

—Xanton' chyažjde'ba'.

³⁵ Nach goseče'eba' lao Jesúsen' na' gosexoa xagaque' cože'ban' nach bosožie' Jesúsen'. ³⁶ Na' šlac ze-je' ngüe'e nez beņe' ca' zjanžag gosonxene'ne', na' goseyixjw no xagaque' lo nez cont blej burron' len.

³⁷ Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' beņe' ca' zja'aclene' le' gwzolao gosonxene' Diosen', zižje cheso'e diža' che yo-go'lo' yeła' guac da' ba besele'ede' da' ben Jesúsen'.

³⁸ Nach gosene':

—jMbalaz rey čhechon' ben' ba za' nga gwseła' Xancho Diosen' le' cont nabi'e! Cheyała' gonxencho Diosen' txeñ len beņe' ca' nita' gan' zoe'na', le ba bene' cont beñačen' gac yesyenite' binlo len le'.

³⁹ Na' len beņe' zan ca' zja'aclene' Jesúsen' zja'ac ba' beņe' fariseo. Nach to čhope' gose'e Jesúsen':

—Maestrw, ben mandadw len beņe' ca' za'ac len le' txeñ cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

⁴¹ Cate' bžine' gała'ze Jerusalénna', gwne'e ciudan', na' bene' xbab che beņe' lo' ciudan' na' gwchežyaše', ⁴² na' gwne':

—Šaca' la'čh na'aža šejni'ile nac gonle cont soale binlo len Diosen', perw na'a ne' ngašen'. ⁴³ Gwžin ža cate' beņe' ca' chesegue'ede' le'e yesone' to yež de yej da' šechjen ciudan' cont nono gac yoxonj. ⁴⁴ Na' yesote' le'e len xi'iqle ca'. Na' yosyočhinje' ciudan' na'

yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya'a yodao' blaon'
(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chyo'o yodao' blaona' na' gwzo-lagüe' bešaše' bene' ca' chesote' na' bene' chesa'o na'.

⁴⁶ Na' gože' legaque':

—Nyojczé Xtiža' Diosen' žan: "Ližan' naquen to latje gan' yesol' güiž bene' neda'", perw le'e ba benjen ca to latje ga že' bene' gwban.

⁴⁷ Na' bsd blo'ede' bene' ca' že' yodao' blaona' yogo' ža. Na' bχoz gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyljwlaže' nacle yesone' yesote'ne'.

⁴⁸ Perw bi besyeželde' nacle yesone' le' neče yogo' bene' besyebchgüede' xtiže'na'.

Yela' gwnabia' che Jesúsen'
(Mt. 21:23-27; Mr. 11:27-33)

20 To ža šlac chsed chlo'e Jesúsen' bene' ca' chyo'o yodao' blaona' na' chyixjue'ede' diža' güen che Diosen', besežin bχoz gwnabia' ca' na' len bene' gol ca' chesenabi'e naciōnna' na' bene' ca' chososed chosolo'e dan' bzoj da' Moisés. ² Na' gose'e le':

—Gwnašč neto' bi yela' gwnabia' napo' chono' da' qui, na' no ben yela' gwnabian' cont chonon'.

³ Na' boži'e xtiža'gaquen', gwne':

—Lecze de to da' nabda' le'e. Le našč neda' ⁴ žnon' gwseła' da' Juanna' bzo'e bene' nis? žDios nan' gwsele'ne', še benačen'?

⁵ Na' legacze' gose' lježe':

—žBi nacho? Še ye'chone' Dios gwseła' le', na' ye'e chio': "žBixčen' ca' gweyle'le che'?" ⁶ Na' bi gac ye'chone' benač gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

⁷ Na' gose'e Jesúsen':

—Bi nezeto' non' gwseła' da' Juan.

⁸ Nach Jesúsen' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

Jempl che mos mal ca'
(Mt. 21:33-44; Mr. 12:1-11)

⁹ Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gweje' zito' na' jasoe' sša. ¹⁰ Cate' bžin ža yosytobe' cosešen', nach gwseła' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. ¹¹ Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. ¹² Na' xan yežlion' gwseła'che' mos gwyone, na' lecze gosotlate'ne'

gosone'ne' güe', na' besyebje'ne' gan' že' yag uvas ca'.

¹³ Na' xan yežlion' gwne': "žNacxe gona'?" Nach beyone' xbab gwne': "Seła' xi'ina' ben' chacchgüeda', le še-ca güesezi'e xtiža' le'." ¹⁴ Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon." ¹⁵ Nach besyebje' le' gan' že' yag ca' na' gosote'ne'.

Nach Jesúsen' gwñabde' bene' ca' zjanžaguen':

—žNacxe gon xan yežlion' len bene' ca' bocua'anlene' yežlio čhen'? ¹⁶ Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—žCatec da' mal juisyw dan' goc!

¹⁷ Na' Jesúsen' gwñachgüe' legaque' na' gwne':

—žBixe zejen da' nga nyojen le'e Xtiža' Diosen'? žan: Yej dan' bi gosaclaže' güen yo'o ca' yosočhine', len ba naquen yej squin.

¹⁸ Na' ca nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

Ca nac dan' cheyala' gaxjw
(Mt. 21:45-46; 22:15-22; Mr. 12:12-17)

¹⁹ Na' bene' ca' chososed chosolo'e dan' bzoj da' Moisés na' bχoz gwnabia' ca' la' besyeyilwlaže'te nacle yesone' yesezene' Jesúsen', le gosacbe'ede' Jesúsen' be'e jemplna' neče dan' bi chesejnilaže' le'. Perw bibi gosone', le besežebe' bi yeson bene' ca' že'na' bene' chesejle'e che Jesúsen'. ²⁰ Da'nana' gosesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab da laže'gaque' chosozenague' che'. ²¹ Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to liča. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. ²² Na' da'nana' zedenabeto' le' žnaquen binlo no čhixjo da' cheyala' čhixjwcho che ben' nac la'zelagüe bene' gwnabia' ben' chi' Roma, še bi?

²³ Na' gocbe'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaque':

—žBixčen' chaclaže'le yoslažo'le neda' len xtižan'?

²⁴ Le gwlo'e neda' to mechw. žNo lao dan' da' le'e mechw nga? na' žno la' dan' nyoj le'en ni?

Nach gose'ene':

—Čhe César ben' nac la'zelagüe bene' gwnabia' ben' chi' ciuda Roma.

²⁵ Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

²⁶ Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban beṇe' guat ca'
(Mt. 22:23-33; Mr. 12:18-27)

²⁷ Na' lece besežin baḷ beṇe' saduceo gan' zoa Jesúsen'. Beṇe' ca' chesene' beṇe' guaten' bi yesyebane'. Nach gosenabde' le', gose'ene':

²⁸ —Maestrw, da' Moisésen' bzoje' can' cheyaḷa' goncho, gwne' še to beṇe' byo gate' na' chzeb no'ol chen' perw na' nono bi güezeb chga'aṇ, na' beṇe' biše' ben' ba gota' cheyaḷa' yošagna'lene' no'ol güezeba' cont yeseṇita' xi'iṇ diaža che da' bišen'. ²⁹ Na' gosenita' beṇe' gosac gaž biše'. Na' beṇe' nechua' bšagne'e, na' gote' nono xi'iṇe' gwnita'. ³⁰ Na' beṇe' gwchopen' bošagna'lene' no'ol güezeba', na' lece gote' nono xi'iṇe' gwnita'. ³¹ Na' beṇe' gwyoṇa' lece bošagna'lene' no'olen', na' lecz ca' goc len le'. Na' ca' goc gosedaš beṇe' gaža' bosošagna'lene' no'ola', na' ne toe' ca' gosezoa xi'iṇe' len le'. ³² Gwde gosat yogo'loḷ beṇe' ca', nach got len no'ola'. ³³ Na' cate' yesyebane' ladjo beṇe' guat ca', žnox beṇe' ca' soalene' no'ola' ca' xo'ole'?, le yogo' beṇe' gaža' bosošagna'lene' le'.

³⁴ Na' Jesúsen' boži'e xtiža'gaquen', gože' legaque':
—Beṇe' ca' nita' lo yežlio nga chosošagne'e na' lece chosošague' na' no xi'iṇgaque'. ³⁵ Perw na' beṇe' ca' chaque Diosen' zjazaque' cont yosbane' legaque' ladjo beṇe' guat ca' cont šjasyenite' len le' toḷi tocaṇe, caten' yesyežine' gan' zoa Diosen' bich yosošagne'e neca yosonežjo xi'iṇe' no'ol yosošagne'e. ³⁶ Bich yesate', le yesaque' ca' angl ben' že' yaba, na' yesaque' xi'iṇ Dios lagüe dan' ba bosban Diosen' legaque' ladjo beṇe' guat ca'. ³⁷ Na' lece da' Moisésen' bzoje' che dan' chesyeban beṇe' guat ca'. Bzoje' can' gož Diosen' le' caten' boḷ güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. ³⁸ Na' beṇe' guat ca' bi chesonxene' Diosen', san beṇe' zjamban. Na' yogo' beṇe' ba gosejnilaže' Diosen', ne' zjambane' cont chesonxene' le'.

³⁹ Na' baḷ beṇe' chososed chosolo'ede' ley dan' bzoj da' Moisés gose'e Jesúsen':

—Maestrw, binḷo boži'o xtiža'gaquen'.

⁴⁰ Na' bich besyeyaxjde' bi yeseṇabde' le'.

Criston' naque' xi'iṇ diaža che da' rey David
(Mt. 22:41-46; Mr. 12:35-37)

⁴¹ Jesúsen' gože' legaque':

—žNacxečen' chesena beṇe' Criston' ben' yedeṇabi'e naque' xi'iṇ diaža che da' rey David? ⁴² Cuiṇ Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

"Gwche'edo' cuita' nga ṇabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' čhio'."

⁴⁴ žNacxe gac ṇacho Criston' naque' xi'iṇ diaža che da' rey David? le cuiṇ Davin' gože' le': "Xana'".

Xtoḷa' beṇe' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Beṇe' zan zjanžag chosozenague' cate' gože' beṇe' ca' zjanaque' le' txen:

⁴⁶ —Le gwsaca' cont bi gonḷe can' cheson beṇe' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' toṇ. Na' chesyebede' chesonxen beṇe' legaque' cate' chesyēžague' lagüe ya'a. Chesyebede' chesebi'e gan' chesebe' beṇe' blao cate' chja'aque' yodao' na' cate' chac ḷṇi. ⁴⁷ Na' chesyegue'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque' beṇe' leca chesonxene' Diosen'. Beṇe' can' chesacche' castigw clal ca' yezica'chle beṇe' güen da' xinj.

To no'ole güezebe bnežjue' Diosen' xmechue'na'
(Mr. 12:41-44)

21 Šlac zoa Jesúsen' chy'o yodao', gwne'e na' ble'ede' beṇe' gwṇi'a ca' gosego'o xmechw-gaquen' lo' cajen' gan' chesegüe'e mechw che yodaon'. ² Na' lece ble'ede' to no'ol güezebe beṇe' yaše' gwlo'e čhop centav dao' che'na'. ³ Nach Jesúsen' gwne':
—Da' ḷi žia' le'e, no'ol güezebe yaše' nga ba gwlo'oche' mechw da' zaca'ch clal ca' yogo' beṇe' ca' yezi-ca'chle. ⁴ Le yogo' legaque' chesegüe'e da' checho'oṇen lo yela' gwṇi'a čhegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chacbande'.

Gwžin ža yosyočhinje' yodao' blaona'
(Mt. 24:1-2; Mr. 13:1-2)

⁵ Na' baḷ beṇe' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo beṇe'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'aṇ zjancua' cože' lježen. Yogon' yosyočhinje'.

Dan' gac cate' ba za' bagwze yeyož yežlion'
(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':
—Maestrw, ždo bat gac dan' žo' nga? na' žnac gac nezeto' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le beṇe' zan yesaš yežlio nga beṇe' yesaclaže' yosolane' xlatja' nga, yesene': "Nedan' Criston' ben' gwlej Diosen' cont ṇabi'a", na': "Ba za' gac juisyw." Perw le'e bitw gwzenagle xtiža'gaquen'. ⁹ Na' cate' yenele chac gwdiḷe nile na'le o yenele chi' žaš contr beṇe' ca' chesenabia', bi žeble, le zgua'tec da' quinga cheyaḷa' gac. Perw gague ḷenna' ṇacho ṇa'tec ṇa'a yeyož yežlion'.

¹⁰ Nach gože' legaque':

—Na' yesediŕle to yeŕŕ len yeto yeŕŕ yoble na' to naci3n len yeto naci3n yoble, ¹¹ na' zan cuen ga xo'chgua na' zan latje lo yeŕŕlion' ga gata' gwbin na' cue' yiŕŕgüe', na' yesac yeŕŕa' guac da' yesele'e beŕe' le'e yaban' da' zaca' yesyebande', na' yesezebchgua beŕaŕhen' neŕe dan' chac.

¹² Perw za' gac yogo' da' quinga cate' yesezene' le'e na' yosoŕhi yososaque' le'e na' yesone' le'e lo na' beŕe' gwnabia' che yodao' chelen', na' yeseyixjue' le'e liŕya. Na' yeseŕhe'xoŕje' le'e do lao rey na' do lao nochle beŕe' gwnabia' dan' chejnilaŕe'le neda'. ¹³ Na' cate' gac da' quinga güe'le xtiŕa'na'. ¹⁴ Na' le gon xbab zoacza' chaclena' le'e, nach cate' gacle lo na' beŕe' ca' bi cuec yiŕhje nacle yoŕi'ile xtiŕa'gaquen', ¹⁵ le neda' goŕa' le'e xbab len yeŕŕa' sina' ŕhian' cont yoŕi'ile xtiŕa'gaque' sin cbi bi gac yesene'. ¹⁶ Na' baŕle xaxŕa'le na' beŕe' biŕe'le le'e lo na' beŕe' chesegue'e le'e. Na' yesote' baŕle. ¹⁷ Na' yogo'ze beŕe' yesegue'ede' le'e dan' chejnilaŕe'le neda'. ¹⁸ Perw chape Diosen' le'e na' bitw güe'e latje cuiayi'le, ¹⁹ na' goŕe' yeŕŕa' mban chele toŕi tocaŕe ŕe soale gwyo gwchejle yogo'loŕ dan' yesonde' le'e.

²⁰ Na' cate' le'ele ba besela'ac soldadw zan cue'ej cuit Jerusal3nna' ben' yesediŕlen le'e, canan' nezele ba zoa cuiayi' ciudadan'. ²¹ Cana' beŕe' yesenita' Jerusal3n cheyaŕa' yosoxŕje'. Na' beŕe' ŕe' yeziŕa'chle yeŕŕ ga mbane Judea cheyaŕa' ŕja'aque' do ya'adao'. Na' beŕe' yesenita' yixe', bi cheyaŕa' yesone' xbab yesyeyo'e lo' ciuda. ²² Cana' gwneŕŕo Diosen' castigw che xtoŕa' beŕe' ca' ŕe' Judean', cont gac can' nyojen le'e Xtiŕa' Diosen'. ²³ iNyaŕe' zjanac no'ol ca' zjanao' xi'ŕn na' no'ol ca' ne' chosoguaŕe' bidao' lo ŕa ca'! Leca yesesaca'zi' beŕe' ca' ŕe' doxen Judean', le Diosen' ŕa'achgüe' le-gaque'. ²⁴ Soldadw ca' yesote' baŕe' lo gwdile na' yebaŕe' yeseŕhe'xoŕje' naci3n ca' dan' zjachi' doxen yeŕŕlion'. Na' beŕe' ca' bi zjanaque' bene' Israel yosy-oŕhŕje' yo'o ca' dan' ŕe' Jerusal3nna' na' yosolej yosoŕoŕjen'. Perw ba bŕia' Diosen' bia' ŕin ŕa cate' beŕe' ca' bi zjanaque' beŕe' Israel bich yesenabi'e naci3n Israel.

Yid Jesucriston' da' yoble
(Mt. 24:29-35, 42-44; Mr. 13:24-37)

²⁵ Ca' nac gwbiŕ, bio' na' beljw ca', gac da' yebanecho len legaquen. Na' beŕe' ŕe' yeŕŕlion' yesaque' tole na' yesacŕejlaŕe' catec sŕag gon nisdaon' chas chata' gaquen. ²⁶ Na' beŕe' ŕe' yeŕŕlio nga yesatte' ŕlat yeseze-bchgüe' dan' gaquen, le yogo' da' chle'echo le'e yaban' yesaquen ca' chac yeŕŕlion' cate' chxo'. ²⁷ Na' cana'ch beŕe' ŕe' yeŕŕlion' yesele'ede' neda' naca' ben' gwseŕa' Dios golja beŕaŕ, za'a to lo' bejw len yeŕŕa' guac xen na' yeŕŕa' beŕe' zaca' juisyw chia'. ²⁸ Na' cate' solao gac da' quinga, le gonŕaŕ laŕe'le na' le yebe. Ba zoa ŕin ŕa yida' da' yoble yebeja' le'e lo da' malen'.

²⁹ Na' Jes3sen' be'lene' legaque' to jempl, na' goŕe' le-gaque':

—Le na'ŕc can' chon yag yixgüigw na' bite'teze yag yoble, ³⁰ cate' chle'ele ba chebian ŕaga' che'eŕ dao'

nach nezele baŕh zoa yela' tiemp ba. ³¹ Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yeŕŕa' gwnabia' che'.

³² Da' li ŕia' le'e, biŕa' yenit diaŕa' che le'e nita'le na'a cate' yeyoŕ gac yogo'loŕ da' ca'. ³³ Le'e yaba na' yeŕŕlion' yesede ŕhen, perw ca' nac xtiŕan', gague da' te cbi gac can' ŕanna'.

³⁴ Na' le gon xbab cont bi gacle beŕe' lia na' beŕe' borraŕw na' cont bi soale yeŕŕa' yeŕejele. Beŕe' ca' yesac beŕe' lia na' borraŕw na' beŕe' ca' yesyela' yesyeŕje' bi yesebeze' batcan' gac yogo' da' quinga. ³⁵ Na' toz can' gac che beŕe' ŕe' doxen yeŕŕlion', yesac yogo' da' quinga cate' nono chon xbab. ³⁶ Perw yogo' ŕa le soa le cuez batcan' gac da' quinga na' le yoŕ güiŕ Diosen' cont bibi gac chele na' gac yedyesoale len neda' naca' ben' gwseŕa' Diosen' golja' beŕaŕ.

³⁷ Yogo' ŕa gwzoa Jes3sen' bsed blo'ede' beŕe' yodao' blaow, na' yogo' ŕe' beyeje' lo ya'a da' nzi' Ya'a Olivos.

³⁸ Na' yogo' zil beseŕin beŕe' zan bosozenague' che' ŕlac bsed blo'ede' legaque' chyo'o yodao' blaow.

Bosoxi'e cont yesezene' Jes3sen'

(Mt. 26:1-5, 14-16; Mr. 14:1-2, 10-11; Jn. 11:45-53)

22 Na' ba zoa gaŕa' ŕni pascw caten' chesagüe' yetextil da' bibi levadura yo'on. ² Na' bŕoz gwnabia' ca' na' beŕe' ca' chososed chosolo'e ley dan' bzoj da' Moises3n' beseyiljue' nacle yesone' na' bi da' yosode'ede' cont yesezene' Jes3sen' na' yesote'ne', le beseŕebe' ŕe cate' bi yesone yeziŕa'chle beŕe' legaque'.

³ Nach Satan3sen' dan' chnabia' da' xigüe' ca' gwyo'o gwyzen lo' yiŕhŕlaŕdao' Judas Iscarioten' ben' goque' tŕen len beŕe' ŕiŕiŕw ca' zjanaque' Jes3sen' tŕen, ⁴ na' gwyeje' jaŕe'e bŕoz gwnabia' ca' na' beŕe' gwnabia' che beŕe' ca' chesape' yodao'na' cont bosoxi'e nacle gone' gwdie' Jes3sen' lo na'gaque'. ⁵ Na' leca besyebede' na' gose'e le' yosoneŕjue'ne' mechw. ⁶ Na' Judasen' gwxenlaŕe' len legaque', na' gwzolagüe' gwdiljwlaŕe' nacle gone' gwdie' Jes3sen' lo na'gaquen' cate' bi ŕe' beŕe' zan.

Jes3sen' blo'ede' legaque' can' cheyaŕa' yesone' ŕjasyeza'laŕe' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bŕin ŕa gaŕa' ŕni caten' chesagüe' yetextil dan' bibi levadura yo'o. Naquen ŕa cate' chesote' xila' dao' cont ŕjasyeza'laŕe' can' bosla Diosen' da' xoŕx-ta'ogaquen' lo na' beŕe' Egipto ca'. ⁸ Na' Jes3sen' gwleje' Pedroa' len Juanna' na' goŕe' legaque':

—Le ŕja'ac na' le ŕjasiŕi'a dan' gagwcho lo ŕnin'.

⁹ Na' gose'ene':

—ŕGa che'ndo' ŕjasiŕi'ato'?

¹⁰ Nach goŕe' legaque':

—Le ŕja'ac na' cate' ba gwyo'ole ciudadan' na' yeŕagle to beŕe' byo no'e to che'e nis. Na' ŕejlenŕne' na' gan' yeŕinen' ¹¹ le ye' xan yo'on': "Maestron' ŕe': Gonŕco' to yo'o ga gagua' xŕe' ŕe' ŕni nga len beŕe' ca' zjanaque' neda' tŕen." ¹² Nach gwlo'ede' le'e to cuart xen dan' zoa

yichjen na'ale gan' de yogo' da' chyažjecho. Na' le gwsini'a cont gagwcho na'.

¹³ Na' gosa'aque' na' yogo' can' gož Jesúsen' legaque' goc. Nach bososini'e xše' že' Inina'.

¹⁴ Na' cate' bač gwchi'e cho'a mesen' len postlw che' ca', ¹⁵ na' gože' legaque':

—Le'ca gwzelaža' gagua' yela' guagw che Ini nga len le'e na'a za' saca'zi'a na' gata'. ¹⁶ Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

¹⁷ Na' gwxi'e vas gan' yože nis uvasen', na' beyož be'e yela' choxcen che Dios, nach gwne':

—Le sin', na' le ye'ej yogo'le late' güeje dan' yože lo' vas nga. ¹⁸ Chnia' le'e na'a zelao che'eja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

¹⁹ Nach gwxi'e yetextilen' na' be'e yela' choxcen che Diosen' na' bzojxen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

²⁰ Na' le'ce be'xue' vassen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwla'lxchenan' neche le'e.

²¹ Na' da' li ben' gwdie' neda' lo' na' be'ne' ca' chesegue'e neda' nga chagwlene' neda' txen. ²² Na' gac chia' can' nžia' bia' gac, neda' naca' bena' gwse'la' Diosen' golja' be'nač, perw nyaše'chguaze' nac ben' gwdie' neda' lo' na' be'ne' ca'.

²³ Nach gosezolagüe' gosenabe lježgaque' noen' gon da' malen' nac ca'.

Gosacyože' noe' nacch blaol

²⁴ Na' le'ce gosezolagüe' gosacyože' noe' nacch blaol.

²⁵ Na' Jesúsen' gože' legaque':

—Nita' be'ne' gwnabia' che to to nación ca' na' chesone' byen chosozenag be'ne' chegaque', na' be'ne' gwnabia' ca' chesac'laže' yesoe' be'ne' diža' chegaque' zjanaque' be'ne' güen'chgua. ²⁶ Perw le'e gague can' cheya'la' gonle. Še no le'e nacchle be'ne' blaol, cheya'la' gwzexjwlaže'le len be'ne' lježle na' gonle ca be'ne' xcuide' ben' bibi na' neze. Na' še no le'e chnabia'le, cheya'la' soale gaclen lježle. ²⁷ Le gon xbab noe' nacch be'ne' blaol, še bena' chi' cho'a mesen' o še xmosen' ben' chon mandadw che'. Nacbia'cze ben' chi' cho'a mesen' naccze' be'ne' blaolch. Perw neda', zoa' cont gaclena' le'e la'cze naca' Xanle.

²⁸ Le'e bina' cuejyichjile neda' la'czla' be'ne' zan ba chesegue'ede' neda'. ²⁹ Na' ca' nac Xan' ba none' chia' cont nabi'a txen len le', le'ce neda' ba nona' chele cont nabi'a'le txen len neda'. ³⁰ Na' gona' cont ye'ej gagwle txen len neda' cate' yela'le gan' nabi'a', na' cue'le cui'ta'na' nabi'a'le šižinw cuen be'ne' ca' zjanaque' xi'in di-aža che da' Israel.

Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

³¹ Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo' ne'en cont gonon cuejyichjo' bich šejnilažo' neda'. Na' dan' gonon len le' naquen ca dan' chon be'ne' caten' chdie' trigon' lo' rner. ³² Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xto'lo'na', gono' chač laže' be'ne' lježo' quinga.

³³ Nach Pedroa' gože'ne':

—Ba be'choglaža' sa'alena' le', gague ližya na'ze, san gatlenca' le'.

³⁴ Na' Jesúsen' gože'ne':

—Pedro, žia' le', bina' cuež jean' na'aže' cate' gac šon ni'a bi chchebo' še nombi'o neda'.

Gwne' ba zoa yosoči yososaca' be'ne' legaque'

³⁵ Na' gože' be'ne' ca' zjanaque' le' txen:

—čByažjele bi da' byažjele cate' gwse'la' le'e jatixjue'ele xtiža'na? Gwse'la' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw na'a še nape mechw, cheya'la' gua'len, na' le'ce ca' gua'le bzod. Na' še bitw bi spada chele de, le gote' xado' chelen' cont si'le to spada. ³⁷ Chnia' le'e gonle ca', le gac chia' can' nyojzen le'e Xtiža' Diosen' žan: "Gosone'ne' ca be'ne' güen da' xinj." Na' cheya'la' gac yogo'lo' dan' nyojen.

³⁸ Nach gose'ene':

—Xanto', gwña'šc nga noa'to' chope spada.

Na' gože' legaque':

—Güesaqueczen.

Jesúsen' cho' güiže' Diosen' latje gan' nzi' Getsemaní

(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' be'ne' ca' zjanaque' le' txen zjana'ogüe' le'.

⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len legaque' zito' ca gan' zelao žin to yej da' gwza'la'cho, na' bzoa xibe' na' bol güiže' Dios, ⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chñaba' gac da' žia' neda', san gac can' nao' le'.

⁴³ Na' to angl be'ne' za' yaba blo'elagüe' le' na' be'e le' fuerz valor. ⁴⁴ Na' šlac chžaglaochgüe' len yichjlažda'ogüe'na' gwzolao chžaglaoch' cho' güiže' Diosen' beyac'lojje' yes. Na' nis yes che'na' beyaquen ca tlab'a güeje chen dan' zjanaquen chelson, besyeyinjten lo' yo.

⁴⁵ Na' bezeche', na' beyeje' gan' nita' be'ne' ca' zjanaque' le' txen, ble'ede' zjanite' chesetase' dan' leca gosacyaše'chgüede'. ⁴⁶ Na' gože' legaque':

—¿Bixchen' chtasle? Le chas, le yoł güiž Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin beņe' zan gała'ze gan' zoen'. Na' ben' le' Judas, ben' goque' txen len beņe' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnop'e xague', perw gague do lažen' bene' ca'.

⁴⁸ Na' Jesúsen' gože' le':

—Judas, žchnopo' neda' cont gwdio'nda' lo na' beņe' quinga? neda' naca' bena' gwseł'a' Diosen' golja' beņačh.

⁴⁹ Na' cate' beņe' ca' zjanaque' Jesúsen' txen besele'ede' can' gac che'na' nach gose'ene':

—Xanto', žgwyinto' beņe' quinga spada čheton'?

⁵⁰ Na' toe' gwdinen' mos che bxyz blaon', gwčhogtechgüe' nague' l'icha. ⁵¹ Perw Jesúsen' gože'ne':

—Bich gonle' ca'.

Nach gwdane' nag mosen' na' beyone' le'. ⁵² Jesúsen' gože' bxyz gwnabia' ca' na' beņe' ca' chesenabi'e beņe' ca' chesape' yodao', na' beņe' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle' neda' ca to beņe' gwban za'acle zedexi'le' neda' len spada na' len yag? ⁵³ Yogo' žaze gwzoa' len le'e chy'o' yodao' blaon' na' bitw gwzenle' neda'. Perw na' ba bžin ža gonele' neda' con can' chaclaže'le', na' ba bžin ža gac can' chaclaže' Satanásen' dan' chnabia' beņe' ca' chesaš lo čhołen'.

Pedroa' bi gwčhebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Nach gosoxe' Jesúsen' na' goseče'ene' liž ben' naque' bxyz blaon' che nación Israelen'. Nach Pedroa' na'ogüe' Jesúsen' zito' zito'le. ⁵⁵ Na' bosoxene' yi' chy'o' che bxyz blaona' na' gosebi'e cho'a yi'na'. Na' gwche' Pedroa' len legaque'. ⁵⁶ Na' to no'ole güen žin ble'ede' čhi'e cho'a yi'na' na' gwñe'e le' na' gwne':

—Lecze len bengal' naque' txen len Jesúsen'.

⁵⁷ Perw Pedroa' bitw gwčhebe' še nombi'e Jesúsen'. Gože'ne':

—No'ole, bitw nombi'ane'.

⁵⁸ Na' gocze šlož, yeto beņe' ble'ede' Pedroa' gože'ne':

—Lenczo' naco' txen len beņe' ca'.

Na' Pedroa' gože'ne':

—Bitw lena' len legaque'.

⁵⁹ Gwde to hor yetoe' gwne':

—Da' l'icze nac bengal' txen len Jesúsen', le' naque' beņe' Galilea.

⁶⁰ Na' Pedroa' gože'ne':

—Beņe', bi nežda' bi dižan' cho'o.

Na' ne' choe'te Pedroa' dižan' ca', gwchež to jea.

⁶¹ Na' Xancho Jesúsen' gwyechje' gwñe'e Pedroa' na' jayze' Pedroa' diža' dan' gož Xancho' le' caten' gwne': "Biņa' cuež jean' na'aže' cate' gac šone' ni'a bi

čhebo' še nombi'o neda'." ⁶² Na' Pedroa' beze'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' beņe' ca' goseče'e Jesúsen' gosezi'diže' le', na' gosot goseyine' le'. ⁶⁴ Na' bosocheje' to lache' lao Jesúsen' na' goseyine' le' na' gose'ene':

—Gwñeya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseče'e Jesúsen' lao beņe' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyeni', beņe' gole blao ca' chesenabia' nación Israelen' na' bxyz gwnabia' ca' na' beņe' ca' chososed chosolo'e ley dan' bzoj da' Moisés besežague' na' gosone' mandaw gwyej Jesúsen' laogaque' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación čhechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabi'a' nación čhechon', bitw šejle'le čhia'.

⁶⁸ Na' šaca' bi nabda' le'e, neca yoži'ile xtižan', neca gwsanlenda. ⁶⁹ Neda' naca' ben' gwseł'a' Diosen' golja' beņačh. Na' na'a cui'a cuit Diosen' nabi'a' txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—iNoch no chyažje no gagw xya če'! Chio' ba benecho na'a čñe' čhe Diosen' dan' že' ca'.

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

23 Na' yogo'loł beņe' ca' gosezože'e na' goseče'ene' lao Pilaton' ben' nac gobernador.

² Na' gwzolao bosocuiše' Jesúsen' gosene':

—Ba gwčhoglaoto' čhe bengal' cheyał'a' gate' dan' chde' chgo'oye'le' nación Israelen' cont yesejle'e čhe' na' lecze čžone' čhixjwto' da' cheyał'a' čhixjwto' lao rey César. Na' lecze že' len' naque' Criston' ben' gwlej Diosen' cont nabi'e nación čheton'.

³ Nach Pilaton' gwñabde'ne' gože'ne':

—¿Len' naco' rey čhe beņe' Israel'?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bxyz ca' len yogo'loł beņe' ca' zjanžag lagüe'na':

—Bibi nla'lagüe' še bi doł'a' nap bengal'.

⁵ Perw na' goseneche', gosene':

—Chde' chgo'oye'le' yogo' beņe' že' distritw Judea nga yesejle'e dan' chsed chlo'ede'. Gwzolaogüe' bsed blo'ede' distritw Galilean' perw lencze nga bačh chsed chlo'ede' na'a.

Pilaton' gwsele' Jesúsen' lao Herodes

⁶ Cate' bene Pilaton' can gosene', nach gwṇabe' še Jesúsen' naque' beṇe' Galilea. ⁷ Na' cate' gocbe'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'. ⁸ Cate' Herodes ble'ede' le' bebe-de', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. ⁹ Nach da' zan da' gwṇabde' Jesúsen', perw ṇe to xtižen' ca boži'i Jesúsen'. ¹⁰ Bxoz gwnabia' ca' na' beṇe' ca' chososed chosolo'e ley dan' bzoj da' Moisés gosezeche' gała'ze na' bosocuiše'ne' len zan diža'. ¹¹ Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosele'ne' da' yoble lao Pilaton'. ¹² Na' žana' Pilaton' len Herodes gwzolaogosaque' migw, la'czla' cate' za' gac ca' be-segue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bxoz gwnabia' ca' na' beṇe' ca' chesenabia' nación Israelen' len yezan beṇe' yež, gan' chesone' yela' justisen'. ¹⁴ Nach gože' legaque':

—Le'e bedesanle' benga lagua' nga, na' gwnale chde' chgo'oyele' beṇe' Israelen' yesone' contr gobiernā'. Neda' baḥ gwṇabyožda'ne' lao le'e ca xyan' dan' chagwle che', ṇe to da' xinj ca chželda' še bi dan' none'.

¹⁵ Na' lecz ca' Herodes bitw bi xtole' bželde', na' besele' le' laoto' nga. Na' nacbia' bibi ben benga da' cheyala' gate'. ¹⁶ Na' ṇa'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to beṇe' pres lo lṇi pascw chegaque'. ¹⁸ Na' yogo' beṇe' ca' že' bososye'e toz ca gosene':

—Chojtega benga gate' na' gwsano' Barrabásen'.

¹⁹ Na' Barrabásen' goseyixjue'ne' ližya da' bxie' gwdi'le lo' ciudan' na' goque' to beṇe' güet beṇe'. ²⁰ Na' da' yoble Pilaton' gwṇabde' legaque' še gwsane' Jesúsen', ²¹ perw bososye'e zižjech gosene':

—iBde'e le'e yag cruz! iBde'e le'e yag cruz!

²² Da' gwyon ṇi'a gož Pilaton' legaque':

—iBixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

²³ Perw gosone' byen bososye'e yelate' zižjech gosenabe' gwde'ene' le'e yag cruz. Nach Pilaton' bzenague' chegaquen' ²⁴ na' gwchoglagüe' che' gac can' gosenabde' le'. ²⁵ Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdi'le na' beṇe' güet beṇe'. Na' Pilaton' bodie' Jesúsen' lo na'gaque' cont yesone' len le' ca chesacłaze'.

Bosode'e Jesúsen' le'e yag cruz

(Mt. 27:32-44; Mr. 15:21-32; Jn. 19:17-27)

²⁶ Na' šlac zjanche'ene' gan' yesote'ne' besyežague' to beṇe' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeye' gw-da'ogüe' Jesúsen'.

²⁷ Na' beṇe' zan zjana'ogüe' le' na' zjalen zan no'ole. Na' no'ol ca' gwzolaogosaque' gosebeže' che'. ²⁸ Na' Jesúsen' gwyechje' na' gože' legaque':

—No'ole Jerusalén, bitw cuežle čhia'. Yejni'a le cuež chele na' che xi'ṇle. ²⁹ Da' li gwžin ža cate' yesene': "Mbalaz nita' no'ole güiž no'ole cono gwaxan na' nono bguaze'." ³⁰ Cana' yesenablaže' yesebiže' ya'a ca' cont čhenen legaque'. Yesenablaže' che' bdiñj goten le-gaque'. ³¹ Še yesot beṇe' neda' len bibi xtoła' de, ṇacchxe yesonde' le'e nacle beṇe' güen da' xinj!

³² Na' lecze goseche'e čhop beṇe' güen da' xinj cont bosode'e legaque' le'e yag cruz can' gosone' len Jesúsen'. ³³ Na' cate' besežine' latje gan' nzi' Latje che Žit Yičj Beṇe' Guat, bosode'e Jesúsen' le'e yag cruzen'. Na' lecze bosode'e beṇe' mal ca' čhop le'e yag cruzen' len le', toe' gwda' cuit Jesúsen' liča, na' yetoe' gwda' cuiten' robes. ³⁴ Na' Jesúsen' gwne':

—Xa', bezi'xen che beṇe' quinga chesegue'ede' neda'. Gague zjañezde' bin' chesone'.

Na' gosone' rifa cate' besyele'e xalane' cont gota'bia' noe' yechelen. ³⁵ Na' beṇe' zan besyežejde' le'. Na' beṇe' gwnabia' chegaque' ca' gosonle' che', gosone':

—Yezica'chle beṇe' bosle'. Še da' li naque' Criston' ben' gwlej Diosen' yedenabi'e, žbixchen' bi chosla cuine'?

³⁶ Nach soldadw ca' lecz ca' gosonle' che'. Gosebigue' gała'ze gan' zoa yag cruzen' na' bosonežjue'ne' vino zičj. ³⁷ Nach gosene':

—Še len' naco' rey che beṇe' Israel, bosla cuino'.

³⁸ Na' yičj yag cruz che'na' gwzoa to dan' nyojen, žan: "Bengan' rey che beṇe' Israel." Na' byojen diža' griego, diža' latín na' diža' hebreo.

³⁹ Na' to beṇe' mal ben' da' le'e yag cruz cuit Jesúsen' lecz gwdi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecz bosla neto'.

⁴⁰ Na' ben' yeto gwdi'le beṇe' lježen' gože'ne':

—iBi chžebo' Diosen'? Chio' ba da'cho le'e yag cruz cont gatcho can' da' le', ⁴¹ na' dan' gat chio' naquen liča cont si'cho castigw che xtoła'chon'. Perw benga, bitw bi doła' nape'.

⁴² Nach gože' Jesúsen':

—Jesús, šjayza'laže'go' neda' cate' žin ža ṇabi'o.

⁴³ Na' gož Jesúsen' le':

—Da' li chnia' le', ṇa'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

⁴⁴ Na' cate' bžin guagwbiž goc cho' doxen lo yežlion' bžinte do cheda šone. ⁴⁵ Bitw bseñi' gwbižen'. Na' ca

nac lache' dan' ze lo' yodao' blaona', bcheza' gacholen.

⁴⁶ Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

⁴⁷ Na' cate' ble'e xan soldadon' can' goquen', benx-ene' Diosen' na' gwne':

—Da' licze benga goque' beņe' gwej to licha.

⁴⁸ Na' beņe' zan beņe' besežag besele'ede' can' goc na' yogo'lole' besyeya'aque' chesebaže' lcho'e gosacde' da' juisyw ba goc. ⁴⁹ Na' yogo' beņe' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

⁵⁰ Na' zoa to beņe' ciuda Arimatea gan' mbane Judean' na' le' José. Naque' txen len beņe' ca' chesen-abia' nación Israel, na' naque' to beņe' güen beņe' zej to licha. ⁵¹ Ba zoe' chbeze' batcan' solao nabia' ben' seļa' Diosen'. Bitw bene' txen len beņe' ca' goseçhoglagüen' yesote' Jesúsen'. ⁵² Bena' gweje' lao Pilaton' jaynabe' cuerp che Jesúsen'. ⁵³ Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen' to ba cobe ga nono na' yosocuaše'. ⁵⁴ Na' yogo' da' ca' goc ža cate' chososini'e che ža che Dios. Na' ba bžin hor cate' cheyaļa' yosocueze' bite'teze žin o mandaw da' chesone'.

⁵⁵ Na' no'ol ca' za'aclene' Jesúsen' cate' gwze'e dis-tritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'. ⁵⁶ Nach gosa'aque' na' gosone' to da' chlā' zix da' yeseyebe' cuerp che Jesúsen'. Na' ža che Diosen' gosenita'cze can' ža ley chegaquen', bibi žin gosone'.

Jesúsen' bebane' ladjo beņe' guat

(Mt. 28:1-10; Mr. 16:1-8; Jn. 20:1-10)

24 Ba l dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chlā' zix, na' yeba l no'ole ja'aclene' le-gaque'. ² Na' cate' besežine' na' besele'ede' ba bga'a yejen' dan' bosode'e cho'a blojen'. ³ Na' goso'e, na' bitw besyeželde' cuerp che Xancho Jesúsen'. ⁴ Šlac zjanite' chesyebande' che da' quinga, besele'ede' çhope beņe' zjazecha cuitgaquen' zjanyaze' lache' da' chactitchgua. ⁵ Na' no'ol ca' besežebe' na' bosocheque' yiçhjaquen' gosene'e lo yole. Nach beņe' ca' gose'e no'ol ca':

—žBixçhen' cheyljwle to beņe' mban nga ladjo beņe' guat? ⁶ Notoch no nla' nga. Ba bebane' ladjo beņe' guat na' mbancze'. Le šjayza'laže' can' gwne' cate' ne' zoale Galilean'. ⁷ Gwne' le' naque' ben' gwseļa' Diosen' golje' beņach. Na' gwne' cheyaļa' gaque' lo na' beņe' mal ca' cont yesote' le' yosode'ene' le'e yag cruz, na' yeyon ža yebane' ladjo beņe' guat.

⁸ Na' no'ol ca' jasyeze'ede' xtiže'na'. ⁹ Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle beņe' ca'

nita' txen len legaque'. ¹⁰ Na' no'ol ca' jasedixjue'ede' postlw ca' zjanaque' beņe' quinga: María beņe' Magdala, na' Juana, na' María xna' Jacobo, na' len yeba le no'ole. ¹¹ Na' postlw ca' bitw gosejle'e che no'ol ca', gosacde' chesenazen'.

¹² Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

Blo'elao Jesúsen' çhop beņe' ca' šlac zja'aque' Emaús

(Mr. 16:12-13)

¹³ Na' lecze ža dmigwna' çhop beņe' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusalénna'. ¹⁴ Na' legacze' bososalje' che yogo' da' ca' ba goquen'. ¹⁵ Ne' chesone' xbab na' ne' chesoe'te' diža' çhen cate' Jesúsen' gwbigue' len le-gaque' na' gwza'lene' legaque' txen, ¹⁶ perw bitw gosacbe'ede' noxen' zejlen legaque'. ¹⁷ Nach gože' le-gaque':

—žBi dižan' choe'le šlac ngo'ole nezen'? žBixçhen' chacyaše'le?

¹⁸ Na' toe' le' Cleofas boži'e xtižen' gože'ne':

—žNacxe chaquen' gwza'o Jerusalén na' biņa' gacbe'edo' da' ca' ba goc lo' ciudadan'? žTozo' le' zo' Jerusalén na' biņa' gacbe'edo'!

¹⁹ Na' Jesúsen' gože' legaque':

—žBi goquen' žale ca'?

Nach gose'ene':

—Dan' goc che Jesús beņe' Nazaret. Goque' to beņe' gwseļa' Dios cont be'e xtižen', na' Diosen' len beņachen' besyebede' yeļa' guac çhen' dan' blo'e na' diža' dan' be'e. ²⁰ Perw na' bxož gwnabia' checho ca' len beņe' ca' chesenabia' nación chechon' gosone' le' lo na' beņe' ca' goseçhoglagüe' che' cheyaļa' gate', na' bosode'e le' le'e yag cruz. ²¹ Ba goc šone ža na'a goc da' quinga. Na' neto' gwzoato' lez Diosen' gwseļa' le' cont yebeje' nación checho lo da' malen'. ²² Na' no'ol ca' zjanac txen len neto', ba le' goso'e diža' da' chebaneto', ja'aque' cho'a ban' be'e ²³ na' bitw besyeželde' cuerp che'na'. Cate' besyela'aque' gosene' besele'eda'ogüede' angl beņe' gose'e legaque' ba bebane' ladjo beņe' guat ca'. ²⁴ Na' lecze to çhop beņe' byo beņe' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesúsen'.

²⁵ Na' gož Jesúsen' legaque':

—Nyaše'chguaze le'e bi chejni'ile na' bi chejle'le yogo' dan' bosozoj beņe' ca' gwseļa' Diosen' goso'e xtižen' cani'. ²⁶ žChaquele bi cheyaļa' gac dan' ba goca'? Cristo ben' gwlej Diosen' cont yedenabi'e, benen byen gwza-ca'zi'e yogo' da' quinga ba goc, perw yeyoža' la'laon naque' beņe' zaca' juisyw.

²⁷ Na' be'e diža' len legaque' bsd blo'ede' legaque' yogo' dan' nyoj che'na' le'e Xtiža' Diosen', gwzo-laoteque' len dan' bzoj da' Moisés na' len dan' bosozoj yezica'chle beņe' gwseļa' Diosen' goso'e xtižen' cani'.

²⁸ Na' besežine' gaļa'ze yežen' gan' zja'aquen', na' Jesúsen' bene' ca chon beņe' šejch yelate' zito'ch.
²⁹ Perw beņe' ca' gosone' byen yega'aņe' len ĩegaque', gose'ene':
 —Yega'aņczo' len neto', ĩe ba chaĭ na' ba nac bagwže' par šejo'.

Na' gwyo'e cont yega'aņlene' ĩegaque'. ³⁰ Na' šlac zjachi'e cho'a mesen' txen, Jesúsen' gwxi'e yetextilen' na' be'e yeĭa' choxclen che Diosen' na' bzojjen' bnežjuen' ĩegaque'. ³¹ Cana'ch gosacbe'ede' ĩe'na'. Na' šlac ĩe' nite' ca' con beņite'. ³² Nach gose' ĩježgaque':
 —Ľeca bebe lažda'ochon' cate' be'lene' chio' diža' chanez na' bsed blo'ede' chio' can' nyojen che' ĩe'e Xtiža' Diosen'.

³³ Na' ĩa' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len beņe' ca' yezica'chle. ³⁴ Na' beņe' šnej ca' gose'e beņe' ca' za' besyežin:

—Da' ĩicze ba beban Xanchon'. Ba blo'elagüe' Simónna'.

³⁵ Nach beņe' ca' čhop gose'e ĩegaque' dan' goc šlac zjangüe'e nezen', na' gose'e ĩegaque' besyeyombi'e ĩe' cate' bzojje' yetextilen' cont yesagüen'.

Jesúsen' blo'elagüe' beņe' ca' zjanaque' ĩe' txen
 (Mt. 28:16-20; Mr. 16:14-18; Jn. 20:19-23)

³⁶ Ne' chesoe'te' dižan' ca', cate'cze gwzecha Jesúsen' gachoĭ. Nach gože' ĩegaque':

—Ľe soa binĭo len xbab dan' yo'o ĩo' yičhĭlažda'olen'.

³⁷ Perw ĩeca besežebe' na' besyebande', gosacde' še chesele'ede' bxin che da' beņe' guata'. ³⁸ Nach Jesúsen' gože' ĩegaque':

—¿Bičhen' chacle tole? na' žbičhen' chonĭe xbab ca' ĩo' yičhĭlažda'olen'? ³⁹ Ľe ĩa'šc ĩi'a na' nga cont gacbe'ele nedan'. Ľe can neda' cont gacbe'ele. Šaca' naca' beņe' guat, bi nac žit bela' čhia' ca dan' chle'ele nga.

⁴⁰ Beyož gwne' ca', blo'ede' ĩegaque' ĩi'a ne'e ca'.

⁴¹ Na' ĩegaque' biņa' yeyož yesejĭe'e catec chesyebande' na' catec chesyebede'. Nach Jesúsen' gože' ĩegaque':

—¿De late' da' gagua'?

⁴² Nach bosonežjue'ne' late' yid beĭ gagüe' na' late' čhixe beser da' yože šina'ba'. ⁴³ Gwxi'en na' gwdagüen' laogaquen'. ⁴⁴ Nach gože' ĩegaque':

—Ba gwnia' le'e cate' ĩe' zoalena' le'e cheyaĭa' gac yogo'ĭoĭ da' ca' bsi' Diosen' xņeze zjanyoj čhia' ĩe'e ley dan' bzoj da' Moisés, na' ĩe'e dan' bosozoj beņe' ca' gosoe' xtiža' Diosen' cani', na' ĩecz ca' da' nyoj ĩe'e Salmos ca'.

⁴⁵ Nach ben Jesúsen' cont gosejni'ide' da' ca' zjanyoj che' ĩe'e Xtiža' Diosen'. ⁴⁶ Na' gože' ĩegaque':

—Benen byen goc da' quinga cont goc can' nyojen žan neda' gata' na' yebana' ladjo beņe' guat yeyon ža, neda' naca' Cristo ben' gwleĭ Diosen' yedenābia'. ⁴⁷ Na' le'e cheyaĭa' güe'le xtiža'na' len beņe' že' yogo' nación. Solaoteclē güe'len Jerusalén. Güe'le xtižan' ĩale cheyaĭa' yesyētĩnje beņachen' xtoĭa'gaquen' cont Diosen' yezi'xene' čhegaque'. ⁴⁸ Le'e cheyaĭa' güe'le diža' che da' quinga ba ble'ele dan' ba goc čhia'. ⁴⁹ Na' ĩecze seĭa' Spiritw che Xa' Diosen' yedesoan len le'e can' gwnen'. Na' ĩe yega'aņ ĩo' ciuda nga ĩa'a cuezle gon Xa' Diosen' le'e yeĭa' guac da' za' yaba.

Beyep Jesúsen' yaba
 (Mr. 16:19-20)

⁵⁰ Na' Jesúsen' gwče'e ĩegaque' ja'aque' gan' chi' yež dan' nzi' Betania na' gwĭis ne'e gwņabde' Diosen' gone' cont ĩite' mbalaz. ⁵¹ Na' ca beyoža' beyepe' yaban'.

⁵² Na' beņe' ca' gosaque' ĩe' txen besyega'aņe' yešlož dao' gosonxene' Jesúsen' nach jaya'aque' Jerusalénna', chesyebchgüede'. ⁵³ Na' gwnita'teze' ĩo' yodao' blaona' chesonxene' Diosen'. Da' na'ze chzoja' ĩa'a.

San Juan

Jesucristo ben' nzi' Xtiža' Dios golje' goque' beṇaḅ

1 Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. ² Cate' gwxe yežlion' ba zoacze' len Diosen'. ³ Len' bene' yogo' beṇaḅ, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. ⁴ Le' nse'e yela' mban. Na' ben' ba zjanape' yela' mban toli tocaṇe da' noṇe', le-gaqueṇ' ba yo'o be'ni' lo' yichjlažda'ogaquen'. ⁵ Ben' nzi' Xtiža' Dios bide' nse'e be'ni' che yichjlaždao' beṇaḅen', na' la'czla' beṇe' zan bi gosejnilaže'ne' na' bi gwyo'o be'ni' čhen' lo' yichjlažda'ogaque', bi goseza-queda' yosocue'eje' be'ni' čhe'na'.

⁶ Gwzoa to beṇe' le Juan, na' Diosen' gwsele'ne'. ⁷ Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇaḅ guac yesejnilaže'ne'. ⁸ Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇaḅen'. ⁹ Ba bžin ža be'ni' da' nac da' dogualje ba blan' yežlio nga, na' blan' cont gwseṇin' lo' yichjlaždao' note'teze beṇe'.

¹⁰ Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosacbe'ede' non' naque'. ¹¹ Golje' ladjo neto' beṇe' gualaž che', perw zan neto' beṇe' gualaž che' bi gwyeljeto' čhen'. ¹² San bałteze chio' gwyejle'cho che', chio' gwyejnilaže'chone', bene' cont naccho xi'in' Dios. ¹³ Na' gague lagüe goljcho nita' xaxna'cho zjanaque' beṇe' bela' chen ba naccho xi'in' Dios. Na' gague lagüe to beṇe' byo gwzoalene' to no'ole ba naccho xi'in' Dios, na' gague lagüe beṇe' byon' goclaže' soa xi'ine' ba naccho xi'in' Dios, san da' chejnilaže'chone', da'n'an' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' beṇaḅ na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in' Dios. Leca nži'ilaže'de' chio' beṇaḅ na' bedezejni'ide' chio' diža' li che Diosen'. ¹⁵ Juanna' ben' bzoe' beṇe' nis be'e diža' che', gwne':

—Čhe bengan' bi'a diža' cate' gwnia: "Beṇe' za' za' zaca'che' ca neda', le ba zoacze le' cate' biṇa' soa neda'."

¹⁶ Jesucriston' nži'ilaže'chgüede' yogo' chio' chejni-laže'chone' na' zoacze' chaclenchgüe' chio'. ¹⁷ Da' Moisésen' bzejni'ide' da' xozxta'o neto' beṇe' Israel ley che Diosen' na' chlo'en yogo'cho napcho doļa', na' Jesucriston' bedelo'ede' nži'ilaže' Diosen' chio' beṇaḅ

na' bedezejni'ide' chio' diža' li che Diosen'. ¹⁸ Nono ṇa' soa beṇe' ba ble'ede' Diosen'. Toz ben' nac dogualje Xi'in' Dios beṇe' tliša' ba bzejni'ide' chio' beṇaḅ can' nac yichjlaždao' Diosen', le chacchgüe Diosen' le'.

Juan ben' bzoe' beṇe' nis be'e xtiža' Jesúsén

(Mt. 3:11-12; Mr. 1:7-8; Lc. 3:15-17)

¹⁹ Beṇe' chesenabi'e nación Israel četon' beṇe' že' Jerusalén gososele' to čhope bxož na' yebaḷe beṇe' gosaljle lo diaža che da' Leví cont gosenabde' Juanna' non' naque'. ²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seļa' Diosen' yedenabi'e nación čechon'.

²¹ Nach gose'ene':

—ŽNox naco'? ŽNaco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—ŽNaco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—ŽNon' naco'? cont ye'to' beṇe' ca' gosesele' neto'. ŽBi ža togo' che cuino'?

²³ Nach Juanna' gože' legaque':

—Neda' naca' ben' chṇe zižje to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaías ben' be' xtiža' Diosen' cani'.

²⁴ Beṇe' ca' ja'ac lao Juanna', beṇe' fariseo ca' gosesele' legaque'. ²⁵ Nach gose'ene':

—ŽBixčhen' chzo' beṇe' nis še bi naco' Criston' ṇeca naco' Elíasen' na' ṇeca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoa' beṇe' nis, na' gachoḷ le'e ba zoa to beṇe' biṇa' gombia'le. ²⁷ Len' za' gwlo'elagüe' na' zaca'che' ca neda', na' da' nacchgüe' beṇe' zaca' bitw za-ca' gona xmandadoe' lečja' no xele'.

²⁸ Yogo' da' quinga goquen gan' nzi' Betábara dan' chi' yešļa'a yegw Jordán gan' chzoa' Juanna' beṇe' nis.

Jesúsén' yeque'e xtoļa' beṇaḅen'

²⁹ Na' beteyo Juanna' ble'ede' zej Jesúsén' gan' zoen' na' gože' ben' chosozenag che':

—Le ŋa' ben' za' nga, Diosen' ba gwsele'ne' cont yequ'e xtoĵa' beŋaĉen'. Bena' zaca'lebe' ca xila' dao' ben' chot chio' beŋe' Israel cont Diosen' chezi'xene' xtoĵa'chon'. ³⁰ Ĉhe len' bi'a diža', gwnia': "Ben' za' za' za-ca'che' ca neda', na' le' ba zoacze' cate' biŋa' soa' neda'." ³¹ Neda' bi gocbe'eda' non' naque' perw Diosen' bzejni'ide' neda', na' da'nan' zedezoa' beŋe' nis cont yogo' chio' beŋe' Israel gacbe'echo non' naque'.

³² Juanna' lecze gwŋe':

—Ble'eda' cate' betj Spiritw ĉhe Diosen' yaban' bžinen gan' zoa Jesúsen'. Bžinen ca to ngolbex na' bega'aŋen len le'. ³³ Neda' bi gocbe'eda' še Jesús nan' naque' ben' gwseĵa' Diosen', nach Dios ben' gwseĵe' neda' chzoa' beŋe' nis gože'nda': "Le'edo' yetj Spiritw ĉhia' na' yega'aŋen len beŋe' ba mbeja'. Len' naque' beŋe' gon cont soa Spiritw ĉhian' lo' yichĵlaždao' beŋe' na' ŋabian' legaque'." ³⁴ Ba ble'eda' goc can' gwne' na' cho'a diža' le bengan' Xi'ŋ Dios.

Beŋe' nechw ca' gwleĵ Jesúsen' cont gosaque' le' txen

³⁵ Beteyo Juan ben' bzoa beŋe' nis zeche' da' yoble len yeĉhope beŋe' zjanaque' txen len le'. ³⁶ Na' cate' ble'ede' gwde Jesúsen', nach gože' beŋe' ca':

—Le ŋa' ben' gwseĵa' Diosen' ben' zaca'lebe' ca xila' dao' ben' chot chio' beŋe' Israel cont Diosen' chezi'xene' xtoĵa'chon'.

³⁷ Na' cate' beŋe' ca' ĉhope, ben' zjanaque' txen len Juanna', gosende' can' gwnen' nach ja'aclene' Jesúsen'.

³⁸ Nach beyeĉĵ Jesúsen' na' gwŋe'e legaque' zjana'ogüe'ne', na' gože' legaque':

—ĴBi chaclaže'le?

Na' gose'ene':

—Maestrw, ĵgan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'aŋlene' le' žana', le ba nac bagwže', ca do che-da tap.

⁴⁰ Na ca nac beŋe' ca' ĉhope' bosozenag xtiža' Juanna' na' gosa'ogüe' Jesúsen', toe' Andrés, beŋe' biše' Simón Pedro. ⁴¹ Na' Andrésen' za' gone' bichle da' za' gone' na' jeĵ ĵiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel ĉhechon'.

—Na' Mesías zeje diža' Cristo.

⁴² Nach Andrésen' gwĉhe'e beŋe' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'ŋ Jonás. Perw yososi' beŋe' le' Cefas. (Na' Cefas zeje diža' Pedro.)

Jesúsen' gwleĵe' Felipe na' Natanael cont bsd blo'ede' legaque'

⁴³ Beteyo Jesúsen' gwĉhoglagüen' yeyeĵe' Galilean' na' jaŋe'e Felipen' na' gože'ne':

—Yo'o len neda'.

⁴⁴ Felipen' goque' beŋe' Betsaida gan' nac laž Andrésen' len Pedron'. ⁴⁵ Nach Felipen' jaŋe'e Natanaelen' na' gože'ne':

—Baĉ ble'eto' ben' bzoj da' Moisésen' xtižen' le'e da' ca' gan' bzoje' ley ĉhechon', na' lecze xtiže'na' bosozoj beŋe' ca' goso'e xtiža' Diosen' cani'. Len' Jesús beŋe' Nazaret, ben' nac xi'ŋ José.

⁴⁶ Nach Natanaelen' gože'ne':

—ĴBat benecho yesene' Nazaret na' choj beŋe' zaca' Nach gož Felipen' le':

—Yo'o cont le'edo'.

⁴⁷ Na' Jesúsen' ble'ede' baĉ zej Natanaelen' gan' zoe'na' nach gwne':

—Na' za' to beŋe' Israel gualaž ĉhechon' beŋe' naque' beŋe' güen. Ne late'ze bi naque' beŋe' gwxiye'.

⁴⁸ Natanaelen' bende' xtiža' Jesúsen' na' gože'ne':

—ĴNac chac nombi'o neda'?

Na' Jesúsen' gože'ne':

—Ble'eda' le' šlac zechao' xan yag yixgüigw cate' za' ŋe Felipen' le'.

⁴⁹ Nach Natanaelen' gwne':

—Maestrw, len' naco' dogualje Xi'ŋ Dios. Len' naco' ben' chbezto' seĵa' Diosen' yedenabi'o nación Israel ĉhechon'.

⁵⁰ Na' Jesúsen' gože'ne':

—ĴDa' gwnia' ble'eda' le' xan yag yixgüigw nan' cheĵli'o ĉhia'? Da' zaca'ch ca da' quinga za' le'edo'. ⁵¹ Da' ĵi ĉhnia', le'ele yaban' gan' zoa Diosen' gaquen ca to da' chyaljo na' beŋe' ca' zjanac anĵ ĉhe' chep chetj yesaque' yežlio gan' zoa' nga, le neda' naca' ben' gwseĵa' Dios golja' beŋaĉh.

Gota' to yeĵa' güešagna' yež da' nzi' Caná

2 Beyoŋ ža gota' to yeĵa' güešagna' yež da' nzi'

Caná gan' mbane distritw Galilea. Na' xŋa' Jesúsen' gweĵe' liž ben' gan' gota' yeĵa' güešagna'na'. ² Na' lecze gosaxe' Jesúsen' len beŋe' ca' zjanaque' le' txen cont ja'aque' gan' chac yeĵa' güešagnan'. ³ Na' bebiž vino dan' chese'ej beŋe' ca' že'na', na' xŋa' Jesúsen' gože' le':

—Bich bi vino ĉhegaque' de.

⁴ Na' gož Jesúsen' le':

—ĴBixĉen' žo' ca'? le biŋa' žin hor gwlo'a non' naca'.

⁵ Na' xŋe'ena' gože' beŋe' ca' cheson mandadon':

—Le gon bite'tez da' ŋe'.

⁶ Na' nita' xop yeso' de yeĵ ga chož nis da' chosoĉhin beŋe' Israel gualaž ĉheto' ca' par chesa' cheseyib cuine' can' ža ley ĉheton'. Na' to to yeĵ ca' chožen do xono' che'e o do ši che'e nis. ⁷ Nach Jesúsen' gože' beŋe' güen mandadw ca':

—Le yosša' yeso' yeĵ ca' nis.

Na' gosegue'en nis goseža'ten. ⁸ Nach gože' le-gaque':

—Le gaše' laten' ŋa'a na' le šjanežjon ben' yo'o lo ne'e ĵnin'.

Na' gosone' can' gwnen'. ⁹ Na' ben' yo'o lo ne'e ĵnin' con bŋixen' bi ŋezde' gan' zan', con beŋe' ca' cheson mandadw na'ze gosenezde' nisen' beyaquen vino, le

legaquen' gosaše' nisen'. Na' bena' bñixen' na' goxe' beñe' byo ben' bšagnan', ¹⁰ na' gože'ne':

—Yogo'ze beñe' chon Inji chdie' vino güen da' chzaca' la'ay cate' chzolao Injin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' ña'ba cheyož Injin'.

¹¹ Da' nga ben Jesúsén' yež Caná distritw Galilea goquen yel'a' guac nechw da' bene' cont blo'e naque' beñe' zaca'chgua, nach beñe' ca' gwleje' cont gosaque' le' txen gosejnilaže'ne'.

¹² Gwde na' Jesúsén' gwyeje' Capernaum len xñe'e na' len beñe' biše' ca', na' len beñe' ca' zjanaque' le' txen, na' besyega'ane' na' čhop šone ža.

Jesúsén' bebeje' beñe' cheson ya'a chyo'o yodao' blao
(Mt. 21:12-13; Mr. 11:15-18; Lc. 19:45-46)

¹³ Na' ba zoa ga'la' Inji che neto' beñe' Israel da' nzi' pascw, nach Jesúsén' gwyeje' Jerusalén len beñe' ca' zjanaque' le' txen. ¹⁴ Cate' bžine' chyo'o yodao' blaon' beñe' zan že' chesote' go'ñ na' xila' na' ngolbex, na' zjachi' beñe' chosoše'e mechw. ¹⁵ Jesúsén' ble'ede' can' chaca' na' bene' to tašjw de do na' bčhinen' cont bebeje' yogo' beñe' ca' že' chyo'o yodaon', len xila' ca', len go'ñ ca', na' beslase' xmechw beñe' chosoša' mechon' na' gwlo'oñi'ane'e xmesgaquen'. ¹⁶ Na' gože' beñe' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach beñe' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua."

¹⁸ Na' ben' chesenabia' nación Israel čheton' gose'ene':

—¿Bi yel'a' guac gono' da' le'eto' cont šejle'to' zaco' bebejo' beñe' ca'?

¹⁹ Jesúsén' boži'e xtiža'gaquen' gwne':

—Le yočhiñj yodao' nga na' šone žaze yeyonan'.

²⁰ Nach beñe' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonan' šone žaze?

²¹ Perw Jesúsén' bsaca'lebde' cuerp čhen' yodao' cate' gwne' ca', na' legaque' gosone' xbab che yodao' na'zen' gwne' ca'. ²² Na' cate' bžin ža beyas bebane' ladjo beñe' guat ca', beñe' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsén'.

Jesúsén' ñezde' bin' yo'o lo' yichjlaždao' beñačen'

²³ Šlac gwzoa Jesúsén' Jerusalénna' lo Inji pascon' beñe' zan besele'ede' yel'a' guac ca' dan' benen' na' gosejle'e naque' beñe' gwse'la' Dios. ²⁴ Perw Jesúsén' bi ben cuine' lo na'gaque', le nombi'e yichjlaždao' beñačen'. ²⁵ Bi byažjde' no ye' le' xbab da' yo'o lo' yichjlaždao' beñe' ca'. Le ñezeczede' bin' yo'o lo' yichjlaždao' to to chio' beñačh.

Jesúsén' len Nicodemo

3 Na' gwzoa to beñe' fariseo beñe' le' Nicodemo. Goque' to beñe' gwnabia' che nación Israel čheton'. ² Gwyeje' lao Jesúsén' šeže'le na' gože'ne':

—Maestrw, ñezeto' Diosen' gwsele' le' cont chzejni'ido' neto', le nono gac gon yel'a' guac ca' dan' chonon' še bi zoa Diosen' len le'.

³ Na' gož Jesúsén' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to beñe' galje' še' ba naque' beñe' gole? ¿Guaquech yeyo'e lo' le'e xñe'en' cont galje' yeto?

⁵ Na' Jesúsén' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. ⁶ Beñe' zjanaque' bela' chen cheseni'ta' xi'inga'que' lecze bi' bela' chen. Na' Spiritw che Diosen' chnežjon yel'a' mban toli tocañe che beñe' chesejnilaže' Diosen'. Da'n'an' žacho chesalje' yeto. ⁷ Bi yebando' dan' gwnia' chonen byen yogo' beñe' galje' yeto. ⁸ Cate' chečhj be' chečhjen gate'teze, na' chendo' cho'lyoyen perw bi ñezdo' ga zan' na' ñeca ñezdo' ga šejen. Ca'czen' naquen len yogo' beñe' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlaždao'gaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsén' le':

—Le' chsed chlo'edo' beñe' Israel gualaž čechon' xtiža' Diosen', ¿bi chejni'ido' da' quinga? ¹¹ Da' li neto' chyixjue'eto' da' ñezeto' na' choe'to' diža' che da' ba ble'eto' na' bi chejle'le. ¹² Ba bia' diža' che dan' chac yežlio nga na' bi chejle'ele. ¿Nac gac šejle'le še ñia' le'e da' chac yaban'?

¹³ 'Toze neda' naca' ben' gwse'la' Diosen' golja' beñačh za'a yaba na' noch no zoa no ba beyep yaba cont ñezde' che Diosen'. ¹⁴ Na' can' goc latje daš cani' cate' gwliš da' Moisésen' be' de bronze bde'eba' to le'e yag, can' cheya'la' gac yeselise' neda' to le'e yag, neda' gwse'la' Diosen' golja' beñačh. ¹⁵ Na' gac čhia' ca' cont note'teze beñe' yesejnilaže' neda' bi cuiaye'e san gata' yel'a' mban che' toli tocañe.

Chaque Diosen' beñačen'

¹⁶ 'Leca chaque Diosen' chio' beñačh, na' gwse'la' Xi'ine' beñe' tliša' cont note'tez beñe' chejnilaže'ne' bi cuiaye'e, san gata' yel'a' mban che' toli tocañe. ¹⁷ Na' Diosen' gwsele' Xi'inen' yežlio nga gague cont gwnežjue' castigw che xto'la' beñačen', san cont gwnežjue' yel'a' mban čhegaque' toli tocañe.

¹⁸ 'Note'tez beñe' chesejnilaže' Xi'in Diosen' beñe' tlišan', bi yesezi'e castigw che xto'la'gaquen', perw beñe' bi chesejnilaže'ne' ba nchoglaon čhegaque' yesezaca'zi'e toli tocañe da' bi chesejnilaže' Xi'in Dios

beṇe' tlišan'. ¹⁹ Na' can' naquen, beṇe' bi chesejnilaže' Xi'ṇ Diosen' ba nchoglaon čhegaque' yesezaca'zi'e toli tocaṇe. Nchoglaon yesezacazi'e, le ba bid Xi'ṇ Diosen' nse'e be'ni' čhe yichjlaždao' beṇačhen' perw na' chesyebchde' dan' nac čhoḷ clel ca be'ni' čhen', dan' chesone' da' malen'. ²⁰ Yogo' beṇe' cheson da' mal chesegue'ede' be'ni' čhen' na' bi chesazlaže' yosozenague' čhe' cont bi gwlo'elaon še chesone' da' mal. ²¹ San note'tez beṇe' cheson can' ža diža' li čhe Diosen', chesyebede' chosozenague' čhe Criston', le chlo'en zoacze Diosen' chaclene' legaque' cont chesone' can' ža diža' li čhen'.

Juan ben' bzoa beṇe' nis be'che' diža' čhe Jesúsén'

²² Gwde na' Jesúsén' len beṇe' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' beṇe' nis. ²³ Na' Juanna' lecze bzo'e beṇe' nis yež gan' nzi' Enón da' chi' gała'ze Salim, le na' dechgua nis. Na' ja'ac beṇe' gan' gwzoen' cont bzo'e legaque' nis. ²⁴ Caten' biṇa' yese-yixjue' Juanna' ližyan' goc ca'.

²⁵ Nach gwche' to žaš len beṇe' ca' zjanaque' txen len Juanna' na' yeto čhope beṇe' Israel gualaž čheto' čhe dan' chesezoa beṇe' nis. ²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bač chzoe' beṇe' nis na' yogo'ze beṇe' chja'aque' gan' zoe'na'.

²⁷ Nach Juanna' gože' legaque':

—Nono gacxene' še bi gon Diosen' cont yesonxen beṇe' le'. ²⁸ Nezczele can' ba gwnian', bi naca' Cristo ben' chbezcho seła' Diosen' yedenabi'e chio', san naca' ben' gwseła' Diosen' cont bia' xtižen' žialaole. ²⁹ Cate' chac to yeła' güešagna', toz beṇe' byo ben' chšagnan' chzi'e no'olen'. Perw še zoa beṇe' migw čhe' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' beṇe' zan chosozenague' čhe Criston'. ³⁰ Len' cheyała' šejch yesonxen beṇe' le' na' neda' cheyała' šejch yesanlaže' neda'.

Beṇe' za' gan' zoa Diosen'

³¹ Ca nac Cristo ben' za' gan' zoa Diosen', le' naque' beṇe' zaca'ch ca yogo'loḷ beṇe'. Yezica'chle beṇač zjanaque' beṇe' čhe yežlio ngaze na' čhe yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'loḷ beṇe'. ³² Le' cho'e diža' čhe da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. ³³ Na' note'tez beṇe' chosozenag xtiža' ben' za' gan' zoa Diosen', nacbia' bena' nežde' Diosen' cho'e diža' li. ³⁴ Na' bena' gwseła' Diosen', bena' za' gan' zoe'na', len' cho'e xtiža' Diosen', le Spiritw čhe Diosen' zoan len le', na' cate' Diosen' choṇe' Spiritw čhen' bi chyisen' late' güeje. ³⁵ Diosen' chacde' Xi'ṇe' Criston' na' ba bene' lo' ne'e yogo'loḷ da' de yežlion'. ³⁶ Na' beṇe' ca' chesejnilaže' Xi'ṇ Diosen' de yeła' mban čhegaque' toli tocaṇe, san beṇe' cheson

güedenag len Xi'ṇ Diosen', bi gata' yeła' mban čhegaque', le Diosen' gone' cont yesezaca'zi'e toli tocaṇe.

Jesúsén' be'e diža' len to no'ole Samaria

⁴ Na' goquen' beṇe' zanch chosozenague' čhe Jesúsén' ca beṇe' chosozenag čhe Juanna', na' beṇe' zanch chesezoa nis len Jesúsén' ca beṇe' chesezoa nis len Juanna', la'czla' gague cuin Jesúsén' bzo'e beṇe' nis, beṇe' ca' zjanaque' le' txen gosonen'. Nach cate' Jesúsén' gwnežde' beṇe' fariseo ca' gosacbe'ede' beṇe' zanch zjana'ogüe' le', nach beze'e distritw Judean' na' beyeje' distritw Galilean' len beṇe' ca' zjanaque' le' txen.

⁴ Na' benen byen zjaya'aque' nez da' chde Samaritan'. ⁵ Ca' goquen' besežine' to yež da' nzi' Sicar lo distritw Samaritan'. Yežen' chega'aṇen gała'ze gan' de yežlio dan' bnežjw da' Jacob da' xi'ṇe' José. ⁶ Na' žia to bej da' nacchgua sitjw da' nzi' Bej čhe da' Jacob. Ca do guagwbiž Jesúsén' ba chja'xaquede' ngüe'e nezen' nach gwchi'e cho'a bejen'. Na' beṇe' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsén' gože'ne':

—Beṇ late' nis ye'eja'.

⁹ Na' no'ole Samaritan' boži'en gože'ne':
—¿Nacxečhen' le' naco' beṇe' Israel chṇabdo' neda' nis ye'ejo'? le' no'ole Samaria neda'.

(Na' ca nac beṇe' Israel gualaž čheto' ca', bi chesene lježe' len beṇe' Samaria ca'.) ¹⁰ Nach Jesúsén' gože'ne':

—Neda' ba goša' le': "Beṇ late' nis ye'eja'", na' šaca' neždo' da' chaclaže' Diosen' gone' le' na' šaca' chacbe'edo' non' naca' neda', ba gwṇabdon' neda' na' ba beṇa' le' nis da' choṇ yeła' mban toli tocaṇe šaca'.

¹¹ Na' no'olen' gože'ne':

—Beṇe', bi noxo' bi gaše'don' na' bej nga naquen sitjw. ¿Gaxe si'o nis da' choṇ yeła' mbanṇa' žo' ca'?

¹² ¿Chacdo' zaca'cho' ca da' xozxta'ocho Jacob ben' bocua'aṇ len neto' bej nga gan' güe'eje' len xi'ṇe' ca' na' len beyixe' čhe' ca'?

¹³ Gož Jesúsén' le':

—Note'tez beṇe' ye'ej nis čhe bej nga bia'cze biḷde' da' yoble. ¹⁴ Na' note'tez beṇe' ye'ej nisen' gwnežjua'ne' neda', gwbatech biḷden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yeła' mban čhe' toli tocaṇe.

¹⁵ Na' no'olen' gože'ne':

—Beṇe', beṇ neda' nisen' žo' ca' cont bich biḷdan' na' bich yida' dexian' nga.

¹⁶ Jesúsén' gože'ne':

—Beyej jel' güiž beṇe' čhio' na' le da nga.

¹⁷ Nach gože' Jesúsén':

—Notno beṇe' čhia' zoa.

Na' Jesúsén' gože' no'olen':

—Ledo' can' gwnaon' nono beṇe' čhio' zoa, ¹⁸ le gayo' beṇe' čhio' ba gwnita' na' beṇe' zoaleno' ṇa'a gague naque' beṇe' čhio'. Da' li can' ba gwnaon'.

¹⁹ Na' gož no'olen' le':

—Beñe', chacbe'eda' naco' to beñe' chac chy-ixjue'ede' bi da' ža Diosen'.²⁰ Da' xoxxta'o neto' beñe' Samaria gosonxene' Diosen' lo ya'an zoa nga, na' le'e nacle beñe' Israel žale Jerusalénna' cheyała' gonxen-chone'.

²¹ Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalénna'.²² Le'e nacle beñe' Samaria bi nombia'yañe'le Dios ben' chonxenle. Neto' beñe' Israel nombia'to' Dios ben' chonxento', na' ladjo' neto' beñe' Israel choj ben' yebej beñačen' lo da' malen'.²³ Chžin ža na' na'a ba gole', cate' beñe' yesonxene' Xacho Diosen' can' cheyała'cze yesonxene' le', gate'tez nite', lo' yichjlažda'ogaquen' yesonxene' beñe' naque' dogualje Dios, le Xacho Diosen' cheyiljue' beñe' yesonxene' le' ca'.²⁴ Diosen' bi naque' beñe' bela' chen, naque' spiritw. Da'nan' beñe' yesonxen le', lo' yichjlažda'ogaque' cheyała' yesonxene' beñe' nac dogualje Dios.

²⁵ Nach no'olen' gože'ne':

—Nezda' yid ben' ba gwlej Diosen' cont yedeñabi'e chio', ben' nzi' Mesías o Cristo, na' cate' le' yide' yedezejni'ide' chio' yogu' da' quinga.

²⁶ Nach Jesúsen' gože' no'olen':

—Neda' choe'lenta le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' beñe' ca' zjanaque' le' txe besyežine' cho'a bejen'. Na' besyebande' choe'lente' to no'ole diža', perw ne toe' bi gosenabde'ne' bi dižan' choe'lente' no'olen' o bixčen' chšaljlene' le'.²⁸ Nach no'olen' bocua'añ che'e nis čhen' na' beyeje' lo yežen' jayeže' beñe' gualaž che' ca':

²⁹ —Le šo'o le na' to beñe' ba gože' neda' yogu'te da' ba bena'. Že bengan' Cristo ben' chbezcho yedeñabi'e?

³⁰ Na' besežaše' yežen' ja'aque' gan' chi' Jesúsen'.

³¹ Na' šlac zjayda no'olen', beñe' ca' zjanaque' Jesúsen' txe gosata'yoede' le', chese'ene':

—Maestrw, gwdagw.

³² Na' Jesúsen' gože' legaque':

—Bi nezele de to yeła' guagw chia'.

³³ Na' gose' lježe':

—Ž Gague ba bedesesan beñe' da' gwdagüe'?

³⁴ Na' gož Jesúsen' legaque':

—Len neda' naquen ca to yeła' guagw chona' can' chazlaže' Dios ben' gwseła' neda' cont gac yogu' da' chnalaže'.³⁵ Le'e žale: "Ne' dech yetap bio' cont yedobe cosešen'." Na' neda' chnia', le na' na' le'ele to coseš da' chyažje yedob na'a.³⁶ De da' goncho na'a cont beñe' yosozenague' che Diosen' na' gata' yeła' mban čhegaque' toli' tocañe. Na' beñe' cheseyixjue'ede' xtiža' Diosen' na' lente beñe' chesone' cont yosozenag beñe' xtižen' txe yesenite' mbalaz.³⁷ Diža' nga naquen da' li, žan: "Beñe' yoble chaz na' beñe' yoble chelap."³⁸ Bač chseła' le'e šjaylape gan' bi gozle, le le'e gonle cont yosozenag beñe' xtiža' Diosen' dan' ba goseyixjue'e beñe' yoble.

³⁹ Na' ca nac beñe' yež Sicar ga mbane Samaria, zane' gosejnilaže' Jesúsen' da' gosende' gwna no'olen': "Ba

gože' neda' yogu' da' ba bena'."⁴⁰ Nachen' besežin beñe' Sicaren' gan' chi' Jesúsen' gosata'yoede' le' yega'anlene' legaque', na' bega'añe' čhope ža.⁴¹ Na' beñe' zanch gosejnilaže' Jesúsen' cate' gosende' diža' da' be' cuine'.⁴² Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' neze-to' bengan' Cristo ben' gwlej Diosen' cont yebeje' beñačen' lo da' malen'.

Jesúsen' beyone' xi'in to beñe' gwnabia'

⁴³ Na' cate' goc čhop ža, Jesúsen' len beñe' ca' zjanaque' le' txe gosata'que' jaya'aque' Galilea.⁴⁴ Le cuin Jesúsen' ba gwne' note'teze beñe' cho'e xtiža' Diosen', bi chesonla'añcze beñe' gualaž čhen' le'.⁴⁵ Na' cate' besežine' Galilean' beñe' gualaž čhegaquen' bosolebe' Jesúsen' dan' ba besele'ede' yogu' da' güen da' bene' Jerusalénna' lo lnin', le lencze legaque' ja'aque' lnina'.

⁴⁶ Na' gozej Jesúsen' yetñi'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to beñe' gwnabia' beñe' chon žin čhe rey, na' chacšenchgüe xi'in'e'.⁴⁷ Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwñeyoede' le' šeje' šjayene' xi'in'en', le ba zoa gatbe'.⁴⁸ Na' Jesúsen' gože'ne':

—Še bi chle'ele yeła' guac na' bichle da' zaca' yebanele, bi chejle'le chia'.

⁴⁹ Nach ben' chon žin čhe reyen' gota'yoede' le' gwne':

—Beñe', yo'ošca šlac biña' gat bi' čhian'.

⁵⁰ Na' Jesúsen' gože'ne':

—Beyej ližo', bi gat bi' čhion'.

Nach gwyejle' bena' dan' gož Jesúsen' le' na' beze'e.

⁵¹ Ba zoa yežine' cate' jasešag xmose' ca' le' na' gose'ene':

—Ba beyac bi' čhion'.

⁵² Na' gwñabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

⁵³ Na' xaben' gocbe'ede' ca hor na'czen' gož Jesúsen' le' bi gat bi' čhen'. Nach gwyejnilaže' Jesúsen', le' len yogu' beñe' že' ližen'.

⁵⁴ Da' nga goc yeła' guac gwchop da' ben Jesúsen' šlac beze'e Judean' na' bežine' Galilea.

Jesúsen' beyone' to beñe' nat late' cuerp čhe'

5 Na' gwde to tiemp bžin ža goc yeto lnj čhe neto' beñe' Israel Jerusalénna', na' Jesúsen' gwyeje'.

² Jerusalénna' gała'ze cho'a puert čhe ze'e da' nyečhj ciudad' dan' nzi' Puert čhe Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'.³ Na' beñe' zan beñe' güe' zjadie' chalšil ca', no beñe' lčhoj, no beñe' nxiñj ñi'e, no beñe' natsi' late' güeje cuerp čhegaquen'. Zjadie' chesebeze' batcan' ta nisen'.⁴ Le tgüeje betj to angl na' bte' nisen', na' beñe' nechw beñe' cho'e lo' nisen' cheyož čhta anglen' len,

cheyacde' bite'tez yižgüe' che'ede'. ⁵ Na' cate' bžin Jesúsén' na' de to beñe' ba goc šino'šonechoa iz chacšende'. ⁶ Na' Jesúsén' ble'ede' ben' na' gocbe'ede' ba chac sša de' ca', na' gože'ne':

—¿Chaclažo' yeyaco'?

⁷ Na' beñe' güen' gože' Jesúsén':

—Beñe', nono zoa no co' neda' lo' nisen' cate' chdan. Na' šlac zya'a cont šo'a, beñe' yoble chyobde' chetje' lo' nisen'.

⁸ Nach gož Jesúsén' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de lsens gon neto' beñe' Israel žin. ¹⁰ Nach beñe' gwnabia' che neto' beñe' Israel gose'e bena' beyaquen':

—Ža che Dios na'a. Bi de lsens yeyoa' xta'ona'.

¹¹ Na' gož ben' legaque':

—Bena' beyon neda' gože'nda': "Botobe xtaon' na' gwda."

¹² Nach gose'ene':

—¿Non' gož le': "Botobe xtaon' na' gwda"?

¹³ Na' ben' beyaquen' bi gwnezde' non' beyon le', le Jesúsén' benite' ladjo beñe' zan ca'. ¹⁴ Gwdechle Jesúsén' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejyichjo' da' malen' bich gonon', cont bi gac čhio' to da' malech.

¹⁵ Nach beza' bena' jatixjue'ede' beñe' gwnabia' che nación Israel čheton' gože' legaque' Jesúsna' ben' beyon le'. ¹⁶ Da'nana' beñe' gwnabia' ca' gwzolao gosebe'na'ogüe' Jesúsén' na' cheseyiljue' nacle yesone' yesote'ne' da' chone' yeja' guac ca' ža che Dios cate' bi de lsens gon neto' beñe' Israel žin. ¹⁷ Na' Jesúsén' gože' legaque':

—Xan' zoacze' chelalde' bate'teze na' lecze ca' neda'.

¹⁸ Da'nana' goseyilwlaže'che' nacle yesone' yesote' Jesúsén', perw gague neče bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca zaque' len Diosen'.

Yeja' chnabia' da' nape Xi'ñ Diosen'

¹⁹ Na' gož Jesúsén' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ñe'.

²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele. ²¹ Ca Xa' Diosen' chosbane' beñe' ladjo beñe' guat ca', ca'cze chona' neda' naca' Xi'ñe', chnežjua' yeja' mban che note'tez beñe' chbeja' cont gata' yeja' mban čhegaque'. ²² Na' Xan' bi chčhoglagüe' che ne to beñe' še nape' doja', san ba gwlo'e lo na' čhoglagua' che yogo' beñač še non' nap doja'. ²³ Xan' chaclaže' yogo' beñe' yesonxene' neda' lecze can' chesonxene' le'. Na' beñe' bi chonxen neda', ne Xa' Diosen' bi chonxene', le le'na' gwseje' neda'.

²⁴ Chnia' le'e to da' zejen, beñe' chosozenag xtižan' na' chesejnilaže' Dios ben' gwseja' neda', de yeja'

mban čhegaque' toli tocañe. Na' bi yesezaca'zi'e toli tocañe da' bi chesejnilaže'ne'. Bich zjanaque' ca beñe' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neče ba chesejnilaže'ne'. ²⁵ Chnia' le'e to da' zejen, gwžin ža cate' beñe' zjanac ca beñe' guat len yichjlažda'ogaque' yesende' xtiža' neda' naca' Xi'ñ Dios, na' beñe' yosozenag čhia' gata' yeja' mban čhegaque' toli tocañe, na' bač chzolao chac ca' na'a. ²⁶ Xa' Diosen' zoacze' toli tocañe na' chone' cont zjamban beñačen', na' lecze ba bene' cont neda' naca' Xi'ñe' zoa' toli tocañe na' chona' cont zjamban beñe'. ²⁷ Na' lecze ba beñe' neda' yeja' chnabia' cont nia' non' nap doja', le ba gwseje' neda' golja' beñač. ²⁸ Bi yebanele dan' chnia' nga, le gwžin ža cate' yogo'loj beñe' guat že' lo' ba yesende' cate' yol güiža'ne'. ²⁹ Na' beñe' ca' goson da' güen šlac gosebane' yesyechoje' na' yesebane' toli tocañe. Na' beñe' ca' goson da' mal šlac gosebane' yesyechoje' na' yesezaca'zi'e toli tocañe.

Jesúsén' bzejni'ide' nape' yeja' chnabia'

³⁰ Bibi gac gona' to gualaza'. Chzenaga' bin' ža Xan' cont nia' che beñačen' noe' nap doja'. Na' dan' nia' gac che to to beñe' naquen da' cheyala' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseja' neda'. ³¹ Šaca' toz neda' chgua'a da' balj non' naca', bi naquen to da' šejle'le.

³² Perw zoa Xan' cho'e diža' li non' naca', na' nezdá' diža' da' cho'e čhia' naquen da' šejle'le. ³³ Bač gwseja'le beñe' lao Juanna' cont jaseñabde' le' nac nac čhia', na' Juanna' be'e diža' li non' naca'. ³⁴ Perw neda' bi chyažjda' diža' da' güe' ne to beñač čhia'. San chnia' da' quinga cont le'e šejle'le čhia' na' gata' yeja' mban čhele toli tocañe. ³⁵ Juanna' goque' ca to yi' da' chseñičgua dan' bzejni'ide' le'e che Diosen', na' šlož daon' bebele dan' bsed blo'eden'. ³⁶ Na' de to da' choe' xtiža' da' zaca'ch ca diža' da' choe' Juanna' čhia': chona' yogo'loj da' ba gwlo'o Xan' lo na' gona', na' da' ca' chonan' choen' diža' le Xan' gwseje' neda'. ³⁷ Nach Xan' ben' gwseja' neda' lecze cho'e xtižan', la'czla' biña' yenele can' chnen' na' biña' le'ele can' naquen'.

³⁸ Xtižen' biña' šon' lo' yichjlažda'olen', le bi chejni-laže'le neda' naca' ben' gwsejen'. ³⁹ Chsedyañe'le gan' nyoj Xtiža' Diosen', le chaquele gapple yeja' mban toli tocañe neče chsedlen. Na' da' ca' chsedlen' zjanyojen chesoen' xtiža'. ⁴⁰ Perw bi chaclaže'le šejnilaže'le neda' cont gata' yeja' mban čhele toli tocañe.

⁴¹ Na' neda' bi chyažjda' yesena beñačen' naca' beñe' zaca'. ⁴² Nombi'a le'e na' nezdá' bi chaquele Diosen'. ⁴³ Xan' ba gwseje' neda' chona' con da' že', perw bi chejle'le čhia'. Na' cate' za'ac beñe' cheson con bi da' ža xbab čhegacze', nachle chejle'le čhegaque'.

⁴⁴ ¿Nacxe gac šejle'le čhia'? le chzelaže'le yesena beñe' chonle güen, na' bi chzelaže'le gonle cont toz Diosen' ne' chonle güen. ⁴⁵ Bi gonle xbab neda' gwcuíša' le'e lao Xan'. Da' Moisésén' hcuiše' le'e lagüen', le chsed-chgualé dan' bzojen' chaquele cont soale binlo len Diosen', perw bi chejle'le xtižen'. ⁴⁶ Šaca' chejle'le xtiža'

da' Moisésen', čhia' neda'czen' chejle'le še ca', le xtiža' nedan' bzoje'. ⁴⁷ Na' da' bi chejle'le dan' bzoj da' Moisésen', čnacxe gonle šejle'le bi dan' žia' le'e?

Jesúsen' bguagüe' gayo' mil beñe'
(Mt. 14:13-21; Mr. 6:30-44; Lc. 9:10-17)

6 Gozde goc ca' Jesúsen' gwyeje' yešla'a nisdao' čhe Galilea len beñe' ca' zjanaque' le' txen. Na' nisdao' na' lecze nzin' Nisdao' Tiberias. ² Na' beñe' zan zjanao' Jesúsen' da' ba besele'ede' yeļa' guac dan' chonen' cheyone' beñe' güe' ca'. ³ Na' gwloe Jesúsen' to lo ya'a len beñe' ca' zjanaque' le' txen na' gosebi'e. ⁴ Na' da' yoble ba zoa gaļa' ĩni čhe neto' beñe' Israel da' nzi' pascw. ⁵ Na' cate' gwña' Jesúsen' ble'ede' beñe' zan ba zjanao' le' na' gože' Felipen':

—ČGaxe si'cho da' yesagw yogo' beñe' quinga?

⁶ Gwne' ca' yešque bi ĩa Felipen', le Jesúsen' nezezede' naquen' gone'. ⁷ Na' Felipen' gože'ne':

—Čhop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsen' txen le Andrés na' naque' beñe' biše' Simón Pedro. Na' Andrésen' gože' Jesúsen':

⁹ —Nga zoa to bi' byo dao' na' de gayo' yetextil de cebada čhebe' na' yečhope beļ ya'a. Perw čbi de gon da' quinga? le beñe' zannā' že' nga.

¹⁰ Nach Jesúsen' gože' beñe' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' beñe' ca' lo yixye-na', ca do gayo' mil beñe' byo, bi cuent no'ole len bidao'. ¹¹ Nach gwxi' Jesúsen' yetextil ca', na' beyož be'e yeļa' choxclen čhe Diosen' bnežjuen' beñe' ca' zjanaque' le' txen cont goseyisen' len beñe' ca' zjachi' na'. Na' lecč ca' bene' len beļ ya'a ca'. Na' goso'e to toe' con ca'te'te' gosaclačže' gosagüe'. ¹² Na' beyož gosagüe' ca'te'te' goseljde', Jesúsen' gože' beñe' ca' zjanaque' le' txen:

—Le yotobe da' ca' bega'añ late' güeje cont bibi cuiayi'.

¹³ Nach bosyotobe' da' bixjw ca' dan' besyega'añ lao gayo' yetextil ca' de cebad, na' goquen šižinw žome.

¹⁴ Cate' beñe' ca' besele'ede' yeļa' guac dan' benen' nach gosene':

—Da' ĩi bengan' choe' xtiža' Dios na' naque' ben' ba gwlezcho seļa' Diosen' yežlio nga.

¹⁵ Na' cate' Jesúsen' gobce'ede' ba zoa yesečhe'exoč-je' le' cont yesone' le' rey čhegaque', nach gozze'e gozeje' ya'adaon' toze'.

Jesúsen' gwze'e lo nisdao'
(Mt. 14:22-27; Mr. 6:45-52)

¹⁶ Cate' ba gwxin, beñe' ca' zjanaque' Jesúsen' txen jaya'aque' cho'a nisdao'. ¹⁷ Na' besyeyo'e to lo' barcw zjaya'aque' ciuda Capernaum. Ba goļ na' Jesúsen' biñā' yežine'. ¹⁸ Na' chas chata' chac nisdao' le chečjchgua be'. ¹⁹ Ba goc sša zjaya'aque' len barcon' lo nisdao' cate' besele'ede' ba zjajda Jesúsen' cheze'e lo nisen'

gaļa'ze gan' zej barcon'. Na' besežebe'. ²⁰ Na' gože' le-gaque':

—Nedan', bi žeble.

²¹ Nach chesyebede' besyegüe'ene' lo' barcon'. Na' ĩa' besyežintie' ga nac yo biž cho'a nisdao' gan' zjaya'aquen'.

Beñe' zan chesyeyiljue' Jesúsen'

²² Na' beteyo beñe' zan beñe' ca' besyega'añ yešla'a cho'a nisdao' gosacbe'ede' nono Jesúsen' ĩļa' na' gosacbe'ede' bibi barcw yoble gota'ch san toga dan' besyeyo'o beñe' ca' zjanaque' Jesúsen' txen, na' zjaņezde' Jesúsen' bi beyo'e len legaque' lo' barcon'. ²³ Nach besežin barcw da' za'ac ciuda Tiberias gaļa'ze gan' gosagüe' yetextilen' caten' beyož be' Xancho Jesúsen' yeļa' choxclen čhe Diosen'. ²⁴ Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yeļa' guagw da' chnežjon beñe' yeļa' mban toļi tocaņe

²⁵ Na' cate' beñe' zan ca' besyeželde' Jesúsen' yešla'ale nisdao' nach gose'e le':

—Maestrw, čbatca' bla'o nga?

²⁶ Na' Jesúsen' gože' legaque':

—Čhnia' le'e to da' zejen, cheyiljwle neda' neče dan' gwdagwle ca beljele na'zen', gague neče chejle'le čhia' lagüe ba ble'ele yeļa' guac ca' ba benan'. ²⁷ Bi cheyaļa' cuecyichjle gata' da' ye'ej gagwle da' chbiayi', san cuecyichjle gata' da' goņ yeļa' mban čhele toļi tocaņe. Diosen' gwseļe' neda' golja' beņač na' neda' goņa' to da' ye'ej gagwle cont gata' yeļa' mban čhele toļi tocaņe. Na' Xa' Diosen' ba blo'e naca' ben' ba gwseļe'.

²⁸ Na' gose'ene':

—ČBi cheyaļa' gonto', cont yebe Diosen' neto'?

²⁹ Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwseļen'.

³⁰ Na' gose'e Jesúsen':

—ČBi yeļa' guac gono' še ca' cont le'eto' na' šejnilaže'to' le'? ČBi gono'? ³¹ Da' xozxta'ocho ca' gosagüe' yeļa' guagw da' nzi' maná šlac gosenite' latje dašen', na' nyoj Xtiža' Diosen' čhegaquen', žan: "Yeļa' guagw da' za' yaban' be'e legaque' gosagüe'."

³² Nach Jesúsen' gože' legaque':

—Čhnia' le'e to da' zejen, gague da' Moisésen' bnežjue' da' xozxta'ocho ca' yeļa' guagon', san Xa' Diosen' bnežjuen' legaque'. Na' bi ĩa'cho ĩenñā' zan' yaba gan' zoe'na', san de to yeļa' guagw da' ba gwseļa' Diosen' ĩa'a da' za' yaban' na' betjen yežlion', na' chnežjon yeļa' mban čhe note'teze beñe' chesagw ĩen.

³⁴ Nach beñe' ca' gose'e le':

—Beñe', beņšca neto' yeļa' guagon' žo' ca' gagwton' yogo' ža.

³⁵ Nach Jesúsen' gože' legaque':

—Neda' naca' yela' guagw da' chnežjon beñe' yela' mban toli tocañe. Note'teze beñe' yosozenag chia' na' yesejnilaže' neda', guata' da' chyažje yichjlaž-da'ogaque' toli tocañe. ³⁶ Na' ba gwnicza' le'e, la'czla' ba ble'ele neda' bi chejnilaže'le neda'. ³⁷ Yogo' beñe' chbej Xan' cont yesaque' neda' txen, chžin ža chesejnilaže' neda'. Na' note'teze beñe' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. ³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwseļa' neda'. ³⁹ Len' chaclaže' bi gua'a latje cuiayi' ne toze beñe' ba gwleje' cont yesaque' neda' txen. Nach cate' žin ža te che yežlion' cana' yosbanga-ca'ne' ladjo beñe' guat še ba gosate'. ⁴⁰ Xan' chaclaže' yogo'loj beñe' yesejni'ide' non' naca' na' yesejnilaže' neda' cont gwnežjue' legaque' yela' mban toli tocañe, na' neda' yosbana' legaque' ladjo beñe' guaten' še ba gosate' cate' žin ža te che yežlion'.

⁴¹ Na' zan beñe' Israel gualaž čheto' legacze' be-sežeše' che dan' gwna Jesúsen': "Neda' naca' yela' guagw da' za' yaba." ⁴² Gosene':

—¿Gague bengan' Jesús xi'in José? Nombia'cho xaxña' benga. ¿Bi dižan' cho'e že' ze'e yaba betje' yežlio?

⁴³ Nach Jesúsen' gože' legaque':

—Bich žešele chia'. ⁴⁴ Nono gac yesejnilaže' neda' še Xan' ben' gwseļa' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. ⁴⁵ Le'e gan' bosozoj beñe' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

⁴⁶ Bi nacho zoa beñe' ba ble'ede' Xan'. Toza' neda' ba ble'eda'ne', le za'a gan' zoen'. ⁴⁷ Chnia' le'e to da' zejen, beñe' chesejnilaže' neda', de yela' mban čhegaque' toli tocañe. ⁴⁸ Neda' naca' yela' guagw da' chnežjon yela' mban toli tocañe che beñachen'. ⁴⁹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. ⁵⁰ Neda' cho'a diža' che to yela' guagw da' za' yaban' na' beñe' chagw len bi gate'. ⁵¹ Neda' naca' yela' guagw dan' za' yaban' dan' nsa' yela' mban toli tocañe. Beñe' šejnilaže' neda', bane' toli tocañe. Na' yela' guagw da' chnežjua' cont gata' yela' mban che beñachen' naquen cuerp chia'.

⁵² Nach beñe' Israel gualaž čheto' ca' legacze' be-sežeše', gosene' che':

—¿Nacxe gone' gone' cuerp čhen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwseļa' neda' golja' beñach, na' še bi chagwle cuerp čhian' na' še bi che'ejele xčhenan', bi de yela' mban chele toli tocañe.

⁵⁴ Beñe' chesagw cuerp čhian' na' chese'eje' xčhenan' de yela' mban čhegaque' toli tocañe, na' še ba gosate', cate' te che yežlion' yosbana' legaque' ladjo beñe' guat ca'. ⁵⁵ Le cuerp čhian' naquen dogualje yela' guagw, na' xčhenan' naquen dogualje da' ye'ejele. ⁵⁶ Beñe' ca' chesagw cuerp chia' na' chese'eje' xčhenan' de yela'

mban čhegaque' toli tocañe, na' zjanaque' txen len neda' na' neda' naca' txen len legaque'. ⁵⁷ Xa' Diosen' gwseļa' neda' na' de yela' mban chia' da' naca' toze len le'. Na' ca'cze gac len beñe' yesagw cuerp čhian', yesenite' toli tocañe dan' zjanaque' txen len neda'.

⁵⁸ Cuerp čhian' naquen yela' guagw da' za' yaba. Na' len bi naquen ca' da' gosagw da' xozxta'ocho ca' latje dašen', le beñe' gosagw len bia'cze gosate'. Na' beñe' chesagw yela' guagw dan' žia' ca', yesenite' toli tocañe.

⁵⁹ Jesúsen' bsd blo'ede' da' ca' lo' yodao' che beñe' Israel gualaž čheto' ca' da' zoa Capernaum.

Xtiža' Jesúsen' chnežjon yela' mban toli tocañe che beñe' chosozenag čhen

⁶⁰ Na' zan beñe' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'.

¿Noxen' gac gon can' žen'?

⁶¹ Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'? ⁶² ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwseļa' Diosen' golja' beñach. ⁶³ Spiritw čhian' chnežjon beñachen' yela' mban, na' cuerp čhian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocañe še šejle'le čhen.

⁶⁴ Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao beñe' ca' gosedalene' le' noe' bi chesejle'e che' na' noe' gwdie'ne' lo na' beñe' ca' chesegue'ede' le'. ⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan beñe' ca' ba chosozenag xtižen' gosebejyichje' bich bosozenaguen'. ⁶⁷ Nach Jesúsen' gože' šižinw beñe' ca' gwleje' cont gosaque' le' txen:

—¿Len le'e chaclaže'le yeyejle?

⁶⁸ Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che beñe' chzenague' čhen. ⁶⁹ Neto' chejnilaže'to' le' na' nezetto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocañe.

⁷⁰ Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

⁷¹ Gwne' ca' che Judas Iscariote ben' naque' xi'in to beñe' le' Simón, le gwnezde' Judasen' ba naquen gwdie' le' lo na' beñe' ca' chesegue'e le', na' Judasen' naque' to beñe' šižinw ca'.

Beñe' biše' Jesúsen' bi gosejnilaže' le'

7 Gwde na' Jesúsen' gwdacze' bsd blo'ede' ben' že' distritw Galilean'. Bich goclaže' šejche' Judean', le beñe' gwnabia' che nación Israel čheton' že' na' cheseyiljue' nacle yesone' yesote'ne'. ² Na' ba zoa gala'

Ἰη̄ι ̄che neto' beṇe' Israel da' nzi' Ḳ̄ni ̄che Ranšw̄ Yix.

³ Na' beṇe' biše' Jesúsen' gose'ene':

—Bitw̄ yega'aṇo' nga. San gwyej Judean' cont beṇe' ca' chosozenag ̄chio' yesele'ede' yeḷa' guac dan' chonon'. ⁴ Note'teze beṇe' še chaclaže' yesacbe'e beṇe' naque' to beṇe' zaca', bi gone' yeḷa' guac bagaše'ze. Še da' ḷi chono' yeḷa' guac, ben cont yesele'e yogo'ḷoḷ beṇe' can' chonon'.

⁵ Beṇe' biše' Jesúsen' gose'ene' ca', ḷe ne ḷegaque' bi gosejnilaže'ne'. ⁶ Nach gož Jesúsen' ḷegaque':

—Biṇa' žin ža ša'a, san le'e guac šja'acle bate'teze.

⁷ Beṇe' ca' bi zjanombi'e Diosen' bi gac yesegue'ede' le'e, san chesegue'ede' neda', ḷe chzejni'ida'ne' chesone' da' xiṇj. ⁸ ḷe šja'ac ḷḷin'. Neda' bi sa'a ṇa'a, ḷe biṇa' žin ža chia'.

⁹ Beyož gože' ḷegaque' ca' bega'aṇe' Galilean' yeto ̄chop ža.

Jesúsen' gwyeje' Jerusalén gan' yo'o ḷḷin'

¹⁰ Nach gwde gosa'ac beṇe' biše' ca' zja'aque' ḷḷin' gwza' Jesúsen' len beṇe' ca' zjanaque' ḷe' t xen zja'aque' ḷḷin', perw bi ja'aque' can' nḷa'ze san bagaše'ze. ¹¹ Na' beṇe' gwnabia' ̄che nación Israel ̄cheton' že' Jerusalénṇa' besyeyiljue' ḷe' ḷo ḷḷin', chesene':

—¿Gaṇxe bena'?

¹² Na' beṇe' ca' zjandop zjanžag ḷo ḷḷin' šižize gosole diža' ̄che Jesúsen', na' gague toze ca gosene'. Baḷe' gosene': "Naque' beṇe' güen", na' baḷe' gosene': "Bi naque', chonḷede' beṇe'."

¹³ Na' gosole diža' šižize ̄che Jesúsen', le yogo'ze beṇe' chesežebe' bi yesone beṇe' gwnabia' ca' le-gaque' še yesacbe'ede' cheso'e diža' güen ̄che Jesúsen'.

¹⁴ Na' do gašje zej ḷḷin' cate' gwyej Jesúsen' gan' zoa yodao' blao ̄che neto' beṇe' Israel na' gwzolao chsed chlo'ede'. ¹⁵ Na' besyebane beṇe' gwnabia' ca', gosene':

—¿Nacxeṇen' da' zan ṇeze benga? ḷe gague bi nseden'.

¹⁶ Na' Jesúsen' gože' ḷegaque':

—Dan' chsed chlo'edan' bi naquen xbab ̄cheza', san naquen xbab ̄che beṇe' gwseḷa' neda'. ¹⁷ Note'tez beṇe' chesacḷaže' yesone' can' chazlaže' Dios ben' gwseḷa' nedan', guacbe'ede' še dan' chsed chlo'edan' zan' ̄che Dios o še naquen da' chaljlaže'za'. ¹⁸ Cate' to beṇe' chsed chlo'ede' xbab ̄cheze', cheyiljue' nacle gone' cont gacxene'. San cate' to beṇe' chaclaže' gacxen beṇe' gwseḷa' ḷe', ṇezecho xtižen' naquen da' ḷi na' bi chziye'e.

¹⁹ "Da' Moisésen' beṇe' le'e ley dan' nsedlen' perw ṇe tole bi chonḷe can' žanna'. ¿Bixṇen' cheyiljwle nacle gonḷe gotlenda'?

²⁰ Beṇe' ca' že'na' gose'ene':

—Yo'o da' xiḡüen', nan' choḷ chṇenošo'. ¿No chaclaže' got le'?

²¹ Jesúsen' gože' ḷegaque':

—Toz yeḷa' guac da' bena' ža ̄che Dios cate' bi de ḷsens gon ̄chio' beṇe' Israel žin, na' yogo'le chebanele. ²² Da' Moisésen' bene' mandadw soacho seṇw dan' že'

circuncisión (ḷa'czḷa' bi gwzolao seṇon' len ḷe' san len da' xozxta'ocho ca' beṇe' gwnita' cani'te), na' da'nan' chzoale bi' byo dao' ca' seṇwna' ža ̄che Dios. ²³ Can' naquen, ḷa'czḷa' še naquen ža ̄che Dios, chzoale no bi' byo dao' seṇw cate' chaquebe' xono' ža cont chonḷe can' ža ley dan' bzoj Moisésen', na' ¿bixṇen' chža'ale neda' dan' ba beyona' to beṇe' güe' ža ̄che Diosen'? ²⁴ Bi cheyaḷa' yosbaga'le beṇe' ̄che da' chle'ele chone', ḷe bi ṇezele še chazlaže' Diosen' can' chone', san ḷe ṇabyaṇe' cont ṇezele bi ža Diosen', nachen' gacbe'ele non' cheyaḷa' yosbaga'le.

Jesúsen' gwne' ze'e gan' zoa Diosen'

²⁵ Nach to ̄chope beṇe' Jerusalén ca' gosene':

—¿Gague benga ben' chesyeyiljue' cont yesote'ne'?

²⁶ ḷe ṇa' can' cho'e dižan' lao yogo' beṇe' na' bibi chese'e ḷe'. ¿Gague ba cheson beṇe' gwnabia' ̄checho xbab ḷe naque' Cristo ben' chbezcho yedenabia'?

²⁷ Perw ṇezecho ga beṇe' benga, na' cate' yid Criston' nono yeseneze ga beṇe' ḷe'.

²⁸ Jesúsen' chsed chlo'ede' chalšil ̄che yodao' blao cate' gosene' ca'. Nach gwṇe' zižje gože' ḷegaque':

—Chaquele nombia'le neda' na' chaquele ṇezele ga beṇe' neda'. Perw gague con za'a to gualaza'. Da' ḷi zoa beṇe' gwseḷe' neda', na' le'e bi nombia'ḷne'. ²⁹ Neda' nombi'ane', le za'a gan' zoen' na' ḷe' gwseḷe' neda'.

³⁰ Na' da' gwne' ca' baḷ beṇe' gosacḷaže'chgüe' yesezene' ḷe', perw nono gwzen ḷe' da' biṇa' žin ža gague' ḷo na'gaquen'. ³¹ Na' beṇe' zan gosejle'e Jesúsen' naque' beṇe' gwseḷa' Dios, na' gosene':

—Cate' yid Criston' ¿gonche' yeḷa' guac da' zaca'ch ca da' chon benga?

Beṇe' chesape' yodao' blaon' ja'aque' cont šjasexene' Jesúsen'

³² Beṇe' fariseo ca' gosende' diža' cheso'e beṇe' ca' ̄che Jesúsen'. Da'nan' bosoxi'e len beṇe' ca' zjanac b̄xoz gwnabia' ̄che nación Israel ̄cheton' na' gosesele' beṇe' chesape' yodao' blaon' cont šjasexene' Jesúsen'.

³³ Nach Jesúsen' bsd blo'echde' beṇe' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseḷa' neda'. ³⁴ Na' yeyiljwle neda' na' bi yeželele neda', ḷe gan' soan' bi gac yidle.

³⁵ Nach beṇe' gwnabia' ̄che nación Israel ̄cheton' gose' ḷježe':

—¿Gan' chacde' yeyeje' ga bi yeželechone'? ¿Yeyeje' gan' zjanasḷas beṇe' gualaž ̄checho ladjo beṇe' griego ca' na' gwsed gwlo'ede' ḷegaque'? ³⁶ ¿Bi zejen dan' gw-nen': "Yeyiljwle neda' na' bi yeželele neda' na' gan' soan' bi gac yidle"?

Jesúsen' be'e diža' ̄che Spiritw ̄che Diosen'

³⁷ Ža cate' zelao chesone' ḷḷin' naquen ža xench, na' Jesúsen' zeche' chsed chlo'ede' na' gwṇe' zižje, gwne':

—Note'tezle še ḷo' yichjlažda'olen' nacle ca beṇe' chbilljaže', cheyaḷa' šejnilaže'le neda' na' goṇa' le'e yeḷa'

m̄ban tołi tocaṇe, na' lenṇa' gaquen lo' yichjlažda'olen' ca to nis da' gwbat cheyo'ojen cont bich gacle ca to beṇe' chbiłlaže'. ³⁸ Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoaṇ lo' yichjlaždao' note'tezcho chejnilaže'chone'. Na' caten' gwne' ca' Spiriton' biṇa' yedesoaṇ lo' yichjlaždao' beṇe', le biṇa' gac yogo' da' cheyał'a' gac cont gacbia' Jesúsen' naque' beṇe' zaca' juisyw.

Gosaque' čhople ṇeche Jesúsen'

⁴⁰ Beṇe' ca' chosozenag xtiža' Jesúsen' bałe' gosene':
—Da' li benga naque' ben' choe' xtiža' Diosen' ben' naquen yide'.

⁴¹ Na' yebałe' gosene':
—Benga Criston' ben' naquen yedenabia'.
Perw yebałe' gosene':

—žBixe ṇacho beṇe' Galilea ba gwlej Diosen' cont yedenabi'e chio'? ⁴² Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' beṇe' Belén gan' nac laž da' David.

⁴³ Can' goc beṇe' ca' gosaque' čhople ṇeche Jesúsen'.
⁴⁴ Na' bałe' gosacłaze' yesezene'ne', perw nono gwzen le'.

Beṇe' gwnabia' che nación Israelen' bi gosejle'e che Jesúsen'

⁴⁵ Na' beṇe' chesape' yodao' blaon' jaya'aque' gan' ni-ta' bxož gwnabia' ca' len beṇe' fariseo ca', le beṇe' can' gosesele' legaque' cont yesezene' Jesúsen'. Na' beṇe' ca' gose'e legaque':

—žBixčhen' bi ṇche'elne'?

⁴⁶ Na' beṇe' chesape' yodao' blaon' gose'ene':
—Biṇa' yeneto' beṇe' cho'e diža' güen ca dan' choe' bena'.

⁴⁷ Nach beṇe' fariseon' gose'e legaque':
—žLente le'e ba gwxiye'e? ⁴⁸ Ne toz neto' nacto' beṇe' fariseo biṇa' šejle'to' xtižen' na' neca beṇe' gwnabia' čhechon', ne toze' biṇa' šejle'e xtižen'. ⁴⁹ Perw beṇe' quinga že' nga bi zjanombi'e ley dan' bzoj da' Moisésen' na' ba zjambiaye'e, da'nana' chesejle'e xtižen'.

⁵⁰ Na' Nicodemo ben' gwyej lao Ješusen' šeže'le naque' txen len beṇe' gwnabia' ca'. Na' Nicodemon' gože' legaque':

⁵¹ —Ley čhechon' bi choen' latje čhoglaochi' che to beṇe' ba ben da' mal še biṇa' güe'e diža' naquen' goc na' še biṇa' nezecho bi dan' bene'.

⁵² Nach yezica'chle beṇe' gwnabia' ca' gose'e le':
—žLeno' le' ba beyaco' beṇe' Galilea? Bsed Xtiža' Diosen' da' nyojen na' nezd'o' ne to beṇe' choe' xtiža' Diosen' ca ṇa' choje' Galilean'.

⁵³ Nach besyeya'ac to toe' jaya'ac ližgaque'.

No'olen' besyedole'de' len xtoe'

⁸ Na' Jesúsen' gwyeje' ya'a da' nzi' Ya'a Olivos. ² Na' beteyo cate' gwyeje' gwyeje' yodao' blaon' da' yoble na' yogo' beṇe' ca' že' na' gosebique' lagüen' na' gwchi'e na' gwzolağüe' chsed chlo'ede' legaque'.
³ Nach beṇe' chososed chosolo'e ley dan' bzoj da' Moisésen' na' beṇe' fariseo ca' jasesane' to no'ole beṇe' besyedole'de' len xtoe'. Na' bosozече' le' gachol beṇe' ca' chosozenag che Jesúsen'. ⁴ Na' gose'e Jesúsen':

—Maestrw, no'ole nga ba bedole'to' delene' xtoe'.

⁵ Na' ley čhechon' da' bzoj Moisésen' žan cheyał'a' gotcho no'ol ca' cheson ca' gwčhelchone' yej. Na' žbi žo' le'? žbix cheyał'a' gonechone'?

⁶ Gose'e Jesúsen' ca' da' gosacłaze' yesebeje' le' diža' da' yosočhine' yesağüe' xya che'. Na' Jesúsen' con bcheque' bzoje' lo yon' len xbene'. ⁷ Na' beṇe' ca' gosone' byen gosenabchde' le' bi že'. Nach Jesúsen' bebe'šagüe' na' gože' legaque':

—Guaque con note'tezle bi de xtoł'a'le solaole gw-čhellene' yejen'.

⁸ Nach bcheque' da' yoble bzojche' lo yon'. ⁹ Na' beṇe' ca' zjanche' no'olen' cate' gosende' can' gož Jesúsen' legaque', zjanezde' lecze ba zjanoncze' da' xinj, nach tgüeje' tgüeje' besyechoje' gwzolaotequen' len beṇe' golech na' bžinten len beṇe' xcuide'ch, nach bega'aṇ yetoze no'olen' len Jesúsen' gan' že' beṇe' ca' chsed chlo'ede'. ¹⁰ Nach Jesúsen' bebe'šagüe' da' yoble na' ble'ede' noch no beṇe' ca' zjanla' na' gože' no'olen':

—No'ole, žganxe beṇe' ca' chosociš le'? žNe toe' bi beṇ le' castigw?

¹¹ Na' no'olen' gože'ne':

—Ne toe', beṇe'.

Na' Jesúsen' gože'ne':

—Ne neda' bi gona' le' castigw. Beyej na' bich gono' da' malen'.

Jesúsen' nse'e be'ni' che yichjlaždao' beṇačh

¹² Jesúsen' gozo'e diža' da' yoble chzejni'ide' beṇe' ca' že' na', gwne':

—Neda' nsa'a be'ni' che yichjlaždao' beṇačhen'.

Beṇe' zjanaque' neda' txen bich zjanaque' ca beṇe' yichjlaždao' lchoł beṇe' cheson da' xinj, san lo' yichjlažda'ogaque' naquen ca to da' yo'o be'ni'. Da'nana' ba de yela' mban čhegaque' tołi tocaṇe.

¹³ Nach beṇe' fariseo ca' gose'e Jesúsen':

—Cho'o diža' che cuino' naco' beṇe' zaca', na' da'nana' bi naquen to da' yesejle' beṇe'.

¹⁴ Na' gož Jesúsen' legaque':

—La'czł'a' cho'a diža' che cuina', xtižan' naquen da' li. Neda' nežda' gan' gwza'a na' gan' yeya'a, perw le'e bi nezele gan' za'a na' gan' yeya'a. ¹⁵ Le'e chosbaga'le neda' con can' chon beṇačhen' xbab, san neda' nono chosbaga' bi da' yosbaga'. ¹⁶ Perw na' šaca' bi da' yosbaga' beṇe', gonan' ca cheyał'a', le bibi de da' chona' to gualaza', san chona' dan' ža Xan' ben' gwseł'a' neda'.

¹⁷ Ley chechon' dan' chsedlen' žan cheyała' šejle'cho cate' chedił diža' da' chesoe' čhope testigw. ¹⁸ Na' nac čhopto' choe'to' xtiža': neda' cho'a diža' che cuina' na' Xan' ben' gwseła' neda' lecce cho'e diža' čhia'.

¹⁹ Na' gose'ene':

—¿Gaxe zoa xaoon'?

Na' gwna Jesúsen':

—Ne neda' ne Xan' bi nombia'le. Šaca' nombia'le neda' lecce nombia'le Xan'.

²⁰ Diža' ca' bsd blo'e Jesúsen' cate' ze' gała'ze gan' chesegüe'e mechw lo' yodao' blao che neto' beñe' Israel. Na' nono gwzen le', le biña' žin ža gaque' lo na' beñe' chesegüe'ede' le'.

Jesúsen' gože' legaque' bi gac šjaya'aque' gan' yeyejen'

²¹ Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le biña' yetinjele xtoła'len' cate' žin ža gatle.

²² Na' da' gwne' ca' beñe' gwnabia' che nación Israel čheton' gosene':

—¿Yeyot cuinen' že' gan' yeyejen' bi gac šejcho?

²³ Nach Jesúsen' gože' legaque':

—Le'e nacle beñe' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'. ²⁴ Da'n'an' gwnia' biña' yetinjele xtoła'len' cate' žin ža gatle. Le še bi šejle'le neda' naca' doxen can' gwnian', gatle biña' yetinjele xtoła'len'.

²⁵ Nach gose'e Jesúsen':

—¿Nox naco' le'?

Na' gož Jesúsen' legaque':

—Zan nia' ba gwnia' le'e non' naca'. ²⁶ Ne' dech da' zan da' nia' cont gwzejni'ida' le'e naple doła'. Perw beñe' gwseła' neda' neзде' yogo'lo' na' cho'e diža' li, na' neda' choe'lena' beñachen' diža' da' ba benda' gwne'.

²⁷ Beñe' gwnabia' ca' bi gosejni'ide' choe'lene' legaque' diža' che Xe' Diosen'. ²⁸ Nach Jesúsen' gože' legaque':

—Cate' ba gwde gwłisle neda' to le'e yag, neda' naca' beñe' gwseła' Diosen' golja' beñach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenna' žia'.

²⁹ Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

³⁰ Na' šlac Jesúsen' choe'lene' beñe' ca' dižan' nach beñe' zan gosezolao chesejnilaže' le'.

Beñe' ca' chnabia' da' malen' yichjlažda'ogaquen'

³¹ Nach Jesúsen' gože' beñe' gualaž čheto' ca' bač gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'. ³² Na' še soacze gonle can' ba gwnian', nachen' šejni'ile diža' li čhian' na' gaclenen le'e cont yechoje lo na' da' chnabia' le'e.

³³ Bał beñe' ca' gose'e Jesúsen':

—Neto' nacto' diaža che da' Abrahanna' na' nono na' soa beñe' nabia' neto'. ¿Bixchen' žo' yechojto' lo na' da' chnabia' neto'?

³⁴ Na' gož Jesúsen' legaque':

—Chnia' le'e to da' zejen, yogo' beñe' cheson da' xinj zjanaque' lo na' da' mal da' chnabian' legaque'.

³⁵ Beñe' zoa liž xan xšine' bi naque' xi'in ben' gan' chone' žinna', san šlož güeje zoe' txen len legaque' len bi da' chesone'. San beñe' golje' txen len le', bate'teze zoe' len legaque'. ³⁶ Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechoje lo ne'en na' bich gaquen ca xanle. ³⁷ Nežda' nacle diaža che da' Abrahanna', perw bia'cze cheyiljwlaže'le nac gonle cont gotle neda'. Na' chonle ca' da' bi chzenagle xtižan'. ³⁸ Neda' cho'a diža' che da' ca' ba ble'eda' cate' zoa' cuit Xan', na' le'e lecce chonle da' ba benele gwna xalen'.

³⁹ Nach beñe' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'. ⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyiljwlaže'le nac gonle gotle neda'. Da' Abrahanna' bi bene' can' chonlen'. ⁴¹ Toz can' chonle len xalen'.

Nach beñe' ca' gose'e le':

—Toz Diosen' naque' Xato' na' bi chzenagto' che nochle beñe'.

⁴² Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. ⁴³ ¿Bixchen' bi chejni'ile dan' chnia' le'e? Nežda' bi chejni'ile dan' bi chaclaže'le gwzenagle čhia'. ⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet beñe' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. ⁴⁵ Na' neda', da' cho'a diža' li, bi chejle'le čhia'. ⁴⁶ Bibi da' mal nona' na' da'n'an' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le čhia'? ⁴⁷ Beñe' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle čhen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach beñe' gwnabia' che nación Israel čheton' gose'e Jesúsen':

—Can' ba gwnaczo' nacia'cze naco' txen len beñe' Samaria ca' na' yo'o to da' xigüe' lo' yichjlažda'oguo' chonen ga choł chjenošo'.

⁴⁹ Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chjele čhia'. ⁵⁰ Bi chyljua' no gonxen neda', perw zoa Xan' chaclaže' beñachen' yesonxene'

neda' na' Xan' choglagüen' chele napple doĵa' da' chnele chia'. ⁵¹ Chnia' le'e to da' zejen, note'teze beñe' yosozenague' xtižan', guata'cze yeĵa' mban che' toĵi tocañe.

⁵² Nach da' yoble beñe' gwnabia' ca' gose'e ĵe':

—Nach beyož gwñezeto' yo'o to da' xigüe' lo' yichjlaž-da'oguoñ' chonen ga choĵ chñenošo'. Ba got da' xozxta'ocho Abrahanna', na' len beñe' ca' gosoe' xtiža' Diosen' cani' ĵecze ba gosate', na' chñenošo' žo' beñe' chosozenag xtižon' gata' yeĵa' mban che' toĵi tocañe.

⁵³ ĴChacdo' zaca'cho' ca' da' xozxta'ocho Abrahanna' len beñe' ca' gosoe' xtiža' Dios beñe' ba gosat? ĴNoxen' chacdo' naco'?

⁵⁴ Gož Jesúsen' ĵegaque':

—Šaca' chonxen cuina' bibi zejen, perw Xan' ben' žale naque' Dios ben' chejnlaže'le chonxene' neda'.

⁵⁵ Le'e bi nombia'ĵne', san neda' nombi'ane'. Šaca' ĵia' bi nombi'ane' gaca' beñe' güenlaže' can' naclena'. Perw neda' nombi'ane' na' chzenaga' xtižen'. ⁵⁶ Da' Abrahanna' ben' žale nac xozxta'ole bebechgüede' gwñezde' le'ede' ba za'a len beñachen' na' zoe' mbalaz ba ble'eden'.

⁵⁷ Na' gose' beñe' blaoc che naciön Israel cheton' ĵe':

—Biña' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesúsen' gože' ĵegaque':

—Chnia' le'e to da' zejen, ba zoacza' neda' cate' biña' galje Abrahanna'.

⁵⁹ Nach gosenize' yej da' yosochele' ĵe', perw Jesúsen' bcuaše' na' beze'e yodaon'. Neca gosacbe'ede' cate' bedie' ladjogaque'.

Jesúsen' bene' cont ble'e to beñe' golje' nchoĵe'

9 Txen zej Jesúsen' len beñe' ca' zjanaque' ĵe' txen cate' besele'ede' to beñe' byo golje' nchoĵe'. ² Na' gose'e Jesúsen':

—Maestrw, Ĵnon' nap doĵa' golje' bengala nchoĵe', še ĵe' o še xaxñe'en?

³ Na' Jesúsen' gože' ĵegaque':

—Bengala golje' nchoĵe' gague da' nape' doĵa' na' gague da' zjanap xaxñe'en doĵa', san golje' ca' cont le'ele can' chon Diosen'. ⁴ Cheyaĵa' goncho xšin Dios ben' gwseĵa' neda' šlac ñe' de latje. Gwžin ža bich gaĵa' gonchon. ⁵ Šlac ñe' zoa' yežlion' chgua'a be'ni' lo' yichjlaždao' beñachen'.

⁶ Beyož gwne' ca' gwcho'oñ xene' lo' yon' na' bene' late' gona' len xene' na' gwdebe' gonan' yejĵao beñe' lchoĵen'. ⁷ Nach gože' ben':

—Gwyej jaydib yejĵaguoñ' cho'a yel da' nzi' Yel Siloé. (Na' Siloé zeje diža' Nseĵa'.) Na' gwyeje' na' beyib yejĵagüen' na' cate' beze'e zjajde' ba chle'ede'. ⁸ Na' beñe' gualž che' na' nochle beñe' ba besele'e ĵe' yogo' ža cate' ñe' nchoĵen' gosene':

—ĴGague bengan' ba ble'echo chbe' chñabe' carida?

⁹ Na' baĵe' gosene':

—Ĵe bengan'.

Na' yebaĵe' gosene':

—Bi nac ĵe' san yeto beñe' yoblen', perw toz ca naque' len bengala.

Perw ben' beyaquen' gože' ĵegaque':

—Nedan'.

¹⁰ Na' gose'ene':

—ĴNac goquen' gwzolao chle'edo'?

¹¹ Na' gože' ĵegaque':

—To beñe' le Jesús bene' late' gona' na' gwdeben' yejĵaguan' na' gože'nda': "Gwyej cho'a yel da' nzi' Yel Siloé na' jaydiben'." Na' gwy'a na' beyiban' na' gwzolao chle'eda'.

¹² Nach gose' beñe' ca' ĵe':

—ĴGañxe bena'?

Na' gože' ĵegaque':

—Bi ñezda'.

Beñe' fariseo ca' gosenabyože' nac goquen' ba chle'ede'

¹³ Nach goseche'e ben' goc lchoĵen' gan' že' beñe' fariseo ca'. ¹⁴ Nac to ža che Dios caten' Jesúsen' bene' gonan' dan' gwdebe' yejĵao bena' cont ble'ede' na' bi de ĵsens gon neto' beñe' Israel žin ža che Diosen'.

¹⁵ Na' beñe' fariseo ca' ĵecze gosenabde' ĵe' nac goquen' ba chle'ede'. Na' gože' ĵegaque':

—Gwdebe' gona' yejĵaguan' na' jaydiban' na' ĵa'a ba chle'eda'.

¹⁶ Nach baĵ beñe' fariseo ca' gosene':

—Nezecho bi zoa Diosen' len bena' beyone' beñe' lchoĵen', ĵe chone' da' bi cheyaĵa' gone' ža che Diosen'.

Na' yebaĵe' gosene':

—ĴNac gon to beñe' güen da' xinj gone' yeĵa' guac ca dan' ben bengala?

Na' ĵegacze' besechoje' chop cuen. ¹⁷ Na' da' yoble gose'e ben' golje' nchoĵe':

—ĴBi žo' le' che ben' bene' cont chle'edo'?

Na' bena' gwne':

—Naque' to beñe' choe' xtiža' Dios.

¹⁸ Na' beñe' gwnabia' che naciön Israel cheton' bi gosejle'e golje' ben' nchoĵe' na' ĵa'a bañ chle'ede'.

Nach gosaxe' xaxñe'ena'. ¹⁹ Na' gosenabde' ĵegaque', gose'ene':

—ĴXi'iqñe' bengala ben' žale golje' nchoĵe'? ĴNacxe goquen' chle'ede' ĵa'a?

²⁰ Xaxñe'ena' gose'e ĵegaque':

—Ñezeto' bengan' xi'iqñto', na' ñezeto' golje' nchoĵe'.

²¹ Perw bi ñezeto' nac goquen' ba chle'ede' ĵa'a, na' ñeca ñezeto' non' ben cont ba chle'ede'. Ba zejeczede' iz, ĵe ñabe cuine' cont güe'e diža' naquen' goc.

²² Xaxñe'en gosene' ca' da' chesežebe' beñe' gwnabia' ca', ĵe beñe' gwnabia' ca' ba gosechoglagüen' bi yosolebe' lo' yodaon' note'teze beñe' güe'e diža' chejle'e Jesúsen' naque' Cristo ben' chesebeze' yedenabi'e. ²³ Da'nan' xaxñe'en gosene': "Ba zejeczede', ĵe ñabe cuine'."

²⁴ Nach da' yoble gosaxe' ben' golje' nchoĵe' na' gose'ene':

—Be' diža' l̥i lao Diosen', l̥e bi naquen can' gwnao' bače. Ñezeto' ben' gwnao' beyon le' naque' beñe' güen da' xin̥j.

²⁵ Na' ben' beyac yejlagüen' gwne':

—Bi ñezda' še naque' beñe' güen da' xin̥j o še bi naque'. Da' ñezda', goca' beñe' l̥cho̥l̥ na' ña'a ba chle'eda'.

²⁶ Na' da' yoble gose'e l̥e':

—¿Bi bende' le? ¿Nac benen' chle'edo'?

²⁷ Na' gože' l̥egaque':

—Ba gwnicza' le'e na' bi chzenagle. ¿Bixchen' cha-claže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' l̥e', gosene':

—Le' naco' txen len l̥e', san neto' nacto' txen len da' Moisés. ²⁹ Ñezeto' Diosen' be'lene' Moisésen' diža', perw benga bi ñezeto' ga ze'e.

³⁰ Na' ben' golje' n̥cho̥le' gože' l̥egaque':

—¿Da' zaca' yebanecho, bi ñezele ga za' benga, na' bene' cont chle'eda'? ³¹ Ñezecho Diosen' bi chzenague' che beñe' cheson da' xin̥j, san chzenague' che note'tez beñe' chejnilaže' l̥e', beñe' cheson can' chnalažen'.

³² Na' gwzolaoten cate' gwxe yežlion' biña' yenecho zoa beñe' chac chone' cont chle'e beñe' golje' n̥cho̥le'.

³³ Šaca' bengan' bi ze'e gan' zoa Diosen' bibi gac gone'.

³⁴ Beñe' fariseo ca' beselocchgüe' na' gose'e l̥e':

—Len' goljtio' naco' beñe' mal juisyw, ¿chacdo' zaco' gwseddo' neto'?

Na' besyebeje' l̥e' l̥o' yodaon'.

Beñe' ca' zjančo̥l̥ yichjilažda'ogaque'

³⁵ Jesús'en' bende' diža' che ben' beyac yejlagüen' can' goc che' ba besyebeje'ne' l̥o' yodaon' nach jašague'ne' na' gože'ne':

—¿Chejnilažo' Xi'iq̥ Diosen' ben' gwseleñ'?

³⁶ Na' gož ben' l̥e':

—Beñe', gwna neda' non', cont šejnilaža'ne'.

³⁷ Jesús'en' gože'ne':

—Nedan' ben' ba ble'eczedo' na' nedan' choe'lena' le' diža'.

³⁸ Nach bena' bzoa xibe' benxene' Jesús'en', gwne':

—Xana', chejnilaža' le'.

³⁹ Nach Jesús'en' gwne':

—Za'a yežlio nga cont gata'bia' non' nap do̥la' na' non' bi nap do̥la'. Zedeyena' cont beñe' ca' bi chesejni' bich yesaque' ca beñe' l̥cho̥l̥, na' zedeyena' cont beñe' ca' chesacde' chesejni'ide' yesaque' ca beñe' l̥cho̥l̥ len yichjilažda'ogaquen'.

⁴⁰ Nach bḁl̥ beñe' fariseo ca' nita' gḁla'ze caten' gwne' ca' na' gosende' xtižen', gose'e Jesús'en':

—¿Chacdo' len neto' nacto' ca beñe' l̥cho̥l̥?

⁴¹ Nach Jesús'en' gože' l̥egaque':

—Šaca' nacle ca beñe' l̥cho̥l̥, bibi xto̥la'le de, san žale chejni'ile, na' da'nan' naple do̥la'.

Jempl che beñe' güeye' xila' ca'

¹⁰ Chnia' le'e to da' zejen, beñe' bi cho'o l̥o' le'ej che xilan' gan' nac cho'a puerten' san chepe' ga yoble cont cho'e, benan' naque' beñe' gwban. ² Ben' chsaljue' na' cho'e cho'a puerten', len' güeyoe' xilan'.

³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', l̥e zjanombia'ba' ši'en cate' chaxe'ba' cho'e lagacba' cont chbeje'ba'.

⁴ Na' cate' ba gwleje' yogo'ba' l̥o' le'ejen', chbialagüe' laogacban', na' xila' che' ca' chesa'oba' l̥e' da' zjanombia'ba' ši'en. ⁵ Bi chesa'oba' beñe' yoble, san chosyox-onjba' dan' bi zjanombia'ba' ši'en.

⁶ Jesús'en' be'e diža' che beñe' güeye' xila' ca' par bzejni'ide' beñe' ca' že'na', perw bi gosejni'ide' bi zejen dan' gože' l̥egaquen'.

Jesús'en' zaca'lebde' ca to beñe' chyoe' xila' chen' binl̥o

⁷ Nach Jesús'en' bsed blo'echde' l̥egaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' l̥o' le'ej chegacban'. ⁸ Yogo' nochle beñe' ba goside' cate' za' yida' neda', beñe' bosozejni'ide' diža' güenlaže', guac ñacho zjanaque' beñe' gwban. Perw beñe' chesejnilaže' neda' bi chosozenague' xtiža' beñe' ca'. ⁹ Neda' naca' ca cho'a puert che le'ej che xila' ca'. Na' note'tez beñe' yesejnilaže' neda', gata' yela' mban chegaque' to̥li tocan̥e na' soacza' gaclena' l̥egaque' bite'tez da' cheseyažjde'.

¹⁰ 'Beñe' ca' žia' beñe' gwban chesaclaže' yesone' cont beñe' ca' žia' zjanaque' xila' čhia' yesebejyichje' xtižan' na' yosozenague' che l̥egaque'. Na' še yosozenague' che l̥egaque', yesebiaye'e. Na' neda' za'a chnežjua' yela' mban to̥li tocan̥e che beñe' chesejni-laže' neda' cont ñite' güenchgua. ¹¹ Neda' binl̥o chgüia chña'a beñe' chesejnilaže'nda' ca chon to beñe' güeye' xila' beñe' chyoe' xila' chen' binl̥o. Na' da' nži'ida' l̥egaque', da'nan' chzane cuina' gata' ñeče l̥egaque'.

¹² Nita' beñe' chesezi' laxjue' cont chosoyoe' xila' che beñe'. Na' beñe' chesezi' laxjue' chesebejyichje' xila' ca' cate' chesele'ede' za' beco'yo, l̥e xila' ca' bi zjanacba' be chegaque'. Cheso'e latje chñiz beco'yon' xila' ca' na' chesoslasba' legacba'. ¹³ Na' beñe' bi zjanaque' xan xila' ca' chosoxonje' da' bi zjanži'ide' xilan', l̥e bi zjanac xilan' be chegaque', san chosoyoeba' dan' chesezi' laxjuen'.

¹⁴ 'Neda' binl̥o chgüia chña'a beñe' ca' chesejni-laže'nda', chona' ca chon to beñe' chyoe' xila' chen' binl̥o. Na' nombi'a beñe' ca' chesejnilaže' neda' na' l̥egaque' zjanombi'e neda'. ¹⁵ Nombi'a l̥egaque' ca Xan' nombi'e neda' na' neda' nombi'a Xan'. Na' da' nži'ida' l̥egaque' chzane cuina' gata' ñeče l̥egaque'. ¹⁶ Nita' beñe' yoble beñe' bi zjanaque' beñe' Israel beñe' yesejnilaže' neda'. Na' cheyała' šjatoba' l̥egaque' cont yosozenague' čhia', nach yesaque' toze len yezica'chle beñe' ba chesejnilaže' neda' na' toz neda' gwgüia ña'a yogo'l̥ole'.

¹⁷ Chzane' cuina' yesot beṇe' neda', na' techle yebana' da' yoble. Na' Xan' chacchde' neda' le chazlaže' da' chona' ca'. ¹⁸ Nono checa'a yeḷa' mban ḡhian' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo beṇe' guaten', can' non Xan' mandadw gona'.

¹⁹ Na' da' yoble beṇe' nación Israel ḡheton' besechoje' ḡhople ṇeḡhe xtiža' Jesúsén'. ²⁰ Zane' gosene':

—Yo'o da' xigüen' yichjlažda'ogüe', nan' chol ḡhenoše'. ¿Bixḡhen' chzenagle xtižen'?

²¹ Na' yebaḷe' gosene':

—Beṇe' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e beṇe' lḡhol'?

Beṇe' gwnabia' ḡhe nación Israel besegue'ede' Jesúsén'

²² Na' cate' bžin ža gwyo'o lṇi dan' chesone' chjasyeze'ede' žan' beyož besyeyone' yodao' blao ḡhe Diosen', ba bžin tiemp zag Jerusalénṇa'. ²³ Na' Jesúsén' chde' chašil ḡhe yodao' blaon' gan' nzi' Chašil ḡhe Salomón'. ²⁴ Na' beṇe' gwnabia' ḡhe nación Israel ḡheton' goseḡhe' Jesúsén' na' gose'ene':

—¿Bixḡhen' chono' cont chacžejlaže'to' še naco' Cristo ben' chbezto' seḷa' Diosen' cont yedenabi'e nación ḡhechon'? Še len' Criston', gwnatega neto' za-ca'lao.

²⁵ Na' gož Jesúsén' legaque':

—Ba gwnia' le'e na' bi chejle'le. Da' ca' ba bena' len yeḷa' guac ḡhe Xan' chlo'en naca' beṇe' gwseḷe'. ²⁶ Perw bi chejle'le ḡhia' da' bi nacle txen len beṇe' chesejni-laže' neda', can' ba gwnicza' le'e. ²⁷ Nombi'a beṇe' chesejni-laže' neda', na' žia' legaque' xila' ḡhia'. Legaque' chosozenague' ḡhia' na' chesone' con can' chzejni'ida'ne'. ²⁸ Na' chnežjua' legaque' yeḷa' mban toḷi tocaṇe na' gwbat yesebiaye'e na' nono gac yesyeca'a legaque' lo na'. ²⁹ Xan' ba gwleje' beṇe' ca' chesejni-laže' neda' cont chgüia chṇa'a legaque'. Na' nono gac yesyeca'a legaque' lo na' Xan', le nape' la'zelagüe yeḷa' chnabia' xen. ³⁰ Neda' na' Xan' toz beṇe' nacto'.

³¹ Beyož gwne' ca' beṇe' gwnabia' ca' gosenize' yej cont yosoḡheḷenen'. ³² Na' gož Jesúsén' legaque':

—Da' zan da' güen ba ble'ele bena' len yeḷa' guac ḡhe Xan'. ¿ḡhe nonṇa' chaclaže'le gwḡheḷle neda' yej?

³³ Na' beṇe' gwnabia' ca' gose'e le':

—Gague ḡhe yeḷa' guac ca' benon' gwḡheḷto' le' yej san da' chṇeya'o ḡhe Diosen'. Con beṇaḡhze le' na' chon cuino' ca' Dios.

³⁴ Na' gož Jesúsén' legaque':

—Nezeczzele can' nyoj Xtiža' Diosen' dan' nsedle gan' žan: "Neda' ba gwnia', le'e nacle ca neda' Dios." ³⁵ Na' Xtiža' Diosen' da' nyojen gague da' te ḡhen', na' lenṇa' žan Diosen' gwne' ḡhe beṇe' ca' bosozenag xtižen' cani' gosaque' ca' le'. ³⁶ Diosen' gwleje' neda' cont gaclena' beṇaḡhen' že' yežlio nga na' žnacxeḡhen' ža le'e chṇeya'a ḡhe Diosen' da' žia' naca' Xi'iṇe'? ³⁷ Še dan' chonan' bi chlo'en yeḷa' guac ḡhe Xa' Diosen', bi cheyaḷa' šejle'le ḡhia' šeca'. ³⁸ Perw še chacbe'ele chona' da' zaca' len yeḷa' guac ḡhe Diosen', cheyaḷa' še-

jle'le len' gwseḷe' neda', la'czḷa' bi chaclaže'le šejle'le xtižen'. Na' še šejle'le ḡhe da' ca' chonan', nachen' ṇezele zoa Xan' len neda' na' neda' zoa' len le', le toz beṇen' nacto'.

³⁹ Nach da' yoble gosaclaže' yesezene' Jesúsén' perw bitw bdoḷe'.

⁴⁰ Jesúsén' beyeje' jayzoe' yešḷa'a yegw Jordanna' latje gan' gwzoa da' Juanna' šlac ṇe' chzoe' beṇe' nis. ⁴¹ Na' beṇe' zan ja'ac gan' gwzoen' cont bosozenague' xtižen' na' gosene':

—Da' Juanna' ṇe to yeḷa' guac bi bene', perw yogo'loḷ dan' gwne' ḡhe benga naquen da' li.

⁴² Na' beṇe' zan gosejni-laže' Jesúsén' latje na'.

Can' goc cate' got Lázaro

11 Na' gwzoa to beṇe' gocšene beṇe' yež Betania le' Lázaro. Betania naquen laž María na' beṇe' bile' Marta, na' legaque' zjanaque' beṇe' zan Lázaron'. María nan' bzoe' to set zix ṇi'a Xancho Jesúsén' na' bosbiže' ṇi'en len yiša' yichje'. ³ Na' beṇe' zan Lázaron' goseseḷe' diža' gan' zoa Jesúsén', chese'e le':

—Xanto', beṇe' xmigo' Lázaron' ba chacšende'.

⁴ Cate' gwṇeze Jesúsén' chacšene Lažaron', na' gwne':

—Ca nac yižgüe' ḡhen', bi che'eden' cont yeḷa' goten' gonen le' gan, san che'eden' cont gacbe'ele catec beṇe' zaca' nac Diosen' na' gacbe'ele naca' beṇe' za-ca'chgua, neda' naca' dogualje Xi'iṇ Dios.

⁵ La'czḷa' Jesúsén' chacde' Martan' len beṇe' bilen' na' len Lázaron', ⁶ cate' gwṇezde' chacšene Lázaron', be-ga'aṇche' yeḡhope ža gan' zoen'. ⁷ Nach gože' beṇe' ca' zjanaque' le' txen:

—Le šo'o šejcho distritw Judean' da' yoble.

⁸ Na' gose'ene':

—Maestrw, bi ža na'zen' beṇe' gwnabia' ḡhe nación ḡhechon' gosaclaže' yesote' le' yosoḡheḷe' le' yej. ¿Da' yoble šejo' na'?

⁹ Jesúsén' gože' legaque':

—Lagüe žan' nsa' šižiṇw hor, na' beṇe' chda lagüe ža bi chḡhegüe', le nseni' gwbižen' lo yežlion'. ¹⁰ Na' beṇe' chda ba goḷ chḡhegüe', le nac ḡhol.

¹¹ Gwde gwne' ca' nach gože' legaque':

—Beṇe' xmigwcho Lázaron' ba chtase' na' ša'a šjays-bana'ne'.

¹² Na' gose'ene':

—Xanto', še ba chtase' güeyacczede'.

¹³ Jesúsén' gwne' ca' dan' gwṇezde' ba got Lázaron', na' beṇe' ca' zjanaque' Jesúsén' txen gosacde' še chtaszen'. ¹⁴ Nach Jesúsén' bochiḡgaten' bi zejennā' gwne' ca':

—Ba got Lázaron'. ¹⁵ Na' chebeda' bi gwzoa' na' šlac chacšende', cont gona' šejle'le ḡhia'. Le šo'o šejcho gan' de'na'.

¹⁶ Nach ben' le' Tomás ben' bososi'e Tomás Cuaš gože' yezica'chle beṇe' ca' zjanaque' Jesúsén' txen:

—Le šo'o cont gatcho txen len Jesúsén' še yesote'ne'.

Jesúsen' že' chac chosbane' beṇe' guat

¹⁷ Na' ja'aque' Betanian' len Jesúsen', na' cate' be-sežine'na' beṇe' Betania ca' bosozende' le' ba goc tap ža bosocuaše' Lázaron'. ¹⁸ Betanian' chin' gaļa'ze Jerusalénna' ca do gašjw hor. ¹⁹ Na' beṇe' zan beṇe' gualaž čhegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got beṇe' zangaquen'. ²⁰ Nach Martan', cate' gwnezde' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'.

²¹ Nach Martan' gože' Jesúsen':

—Xana', šaca' zo' nga caten' gocšene beṇe' zanan' bilja gote' šaca'. ²² Na' ņezda' la'czla' ba gote', bite'tez da' ņabdo' Diosen' gone', gonczen'.

²³ Nach gož Jesúsen' le':

—Güeban beṇe' zanon'.

²⁴ Nach Martan' gože'ne':

—ņezda' yebane' cate' yesyeban beṇe' guat ca' žan' te čhe yežlion'.

²⁵ Na' gož Jesúsen' le':

—Neda' chac chosbana' beṇe' guat ca' le' nsa'a yela' mban toli tocaṇe. Da'nan' beṇe' ca' yesejnilaže' neda', la'czla' yesate', guata' yela' mban čhegaque' toli tocaṇe. ²⁶ Na' note'tez beṇe' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷ Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chñie' le'.

²⁹ Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'. ³⁰ Biṇa' žin Jesúsen' lagüe yežen' ca horen', ņe' nga'ane' cho'a yežen' gan' jašag Martan' le'. ³¹ Na' beṇe' Jerusalén ca' nita' liž María, beṇe' cheso'e le' yela' chxenlaže' da' got beṇe' zanen', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjačeže'.

³² Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' beṇe' zanan', bilja gote' šaca'.

³³ Na' cate' ble'e Jesúsen' chbež Marían' na' lecze chesebež beṇe' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

³⁴ Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

³⁵ Na' gwchež Jesúsen'. ³⁶ Na' beṇe' Jerusalén ca' gosene':

—Le ṇa' catequen' chacde' le'.

³⁷ Na' baļe' gosene':

—Bengan' bene' ga ble'e beṇe' lchoļen', na' šaca' gwzoe' nga caten' gocšene Lázaron', benļje' cont bi gote'.

Jesúsen' bosbane' Lázaron' ladjo beṇe' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enṇa'. ³⁹ Na' Jesúsen' gože' beṇe' ca':

—Le ca'a yejen'.

Na' Martan' beṇe' zan da' Lázaron' gože'ne':

—Xana', ba chļa' ben' zigw, le bačh goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' beṇe' zaca' juisyw.

⁴¹ Nach beṇe' ca' goseque'e yejen'. Na' Jesúsen' gwṇe'e yabale na' gwne':

—Xa', choxcleno' ba bzenago' chia'. ⁴² ņezda' yogo' ṇi'a chzenago' chia', perw žia' ca' cont beṇe' ca' že' nga yesejle'e len' gwseļo' neda'.

⁴³ Beyož boļ güiže' Diosen', gwṇe' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ṇi'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan beṇe' Jerusalén ca' beṇe' ja'aclene' Marían' besele'ede' yela' guac da' ben Jesúsen' na' gosejni-laže'ne'. ⁴⁶ Perw baļ beṇe' Jerusalén ca' ja'aque' lao beṇe' fariseo ca' na' jaseže' legaque' Jesúsen' bosbane' Lázaron'. ⁴⁷ Nach bṇoz gwnabia' ca' čhe neto' beṇe' Israel len beṇe' fariseo ca' bosyotobe' yogo'loļ beṇe' ca' chesenabia' nación četon'. Na' bosoxi'e gosene':

—¿Nac goncho? le yela' guac zan chon benga. ⁴⁸ Na' še ṇacho jayenṇa', yogo'ze beṇe' yesejnilaže'ne', na' yesid beṇe' nación Roma na' yeseque'e yodao' blao čhechon' na' yosožiaye'e nación čhechon'.

⁴⁹ Na' to beṇe' gwnabia' zoa ca horen' le' Caifás. Le' naque' bṇoz blao lo izen'. Na' gože' legaque':

—Le'e gague bi ņezele. ⁵⁰ Na' bi chacbe'ele napen chio' cuent toz ben' gat, clal ca cuiayi' yogo'cho lente nación čecho nga.

⁵¹ Gague con ca gwnalaže'ze Caifásen' gwne' ca', san da' naque' bṇoz blao iznan', Diosen' bene' ga gwne' ca' cont gwdixjue'ede' gat Jesúsen' ņeče nación četon'.

⁵² Na' ca nac dan' gaten', gague gate' ņeče nación četo' na'zen' san gate' cont yogo' beṇe' ba gwlej Diosen' yesaque' xi'iṇe' gate'teze nación, yesaque' txen yesejnilaže'ne'. ⁵³ Ca' goquen', žana' beṇe' gwnabia' ca' gosezolagüe' bosoxi'e nacle yesone' yesote' Jesúsen'.

⁵⁴ Na' da'nan' Jesúsen' bich gw dacze' con can' ṇļa'ze gan' že' beṇe' gwnabia' čhe nación četon'. Nach gwze'e distritw Judean' na' gwče'e beṇe' ca' zjanaque' le' txen to yež da' nzi' Efraín da' chi' gaļa'ze latje dašen', na' besyega'ane' na'.

⁵⁵ Na' ba zoa gaļa' l̄ni pascw che neto' beņe' Israel. Na' beņe' zan beņe' za'ac to to yež zja'aque' Jerusalénna' cate' za' gaļa'le l̄nin' cont yeson cuine' xilaže' can' ža ley chton'. ⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' l̄ni nga, še bi yide'?

⁵⁷ Gosene' ca' le b̄xoz gwnabia' chto' ca' na' beņe' fariseo ca' ba gosec̄hoguen' še note'tez beņe' nežde' gan' zoa Jesúsen' cheyaļa' gwzende' legaque' cont yesezene' le'.

Marian' chgüe'e set zix̄ n̄i'a Jesúsen'

(Mt. 26:6-13; Mr. 14:3-9)

12 Na' yeḡop ža za' gaļa' l̄ni pascon', Jesúsen' gwche'e beņe' ca' zjanaque' le' txen yež Betanian' gan' zoa Lázaron' ben' bosbane' ladjo beņe' guaten'. ² Na' baļ beņe' Betanian' bososiñi'e to xše' da' gwdagw Jesúsen' cont gosonxene'ne'. Na' Martan' bdie' yela' guagw na' Lázaron' gwche'lene' beņe' ca' cho'a mesen' txen len Jesúsen'. ³ Na' Marian', de ca do tya set zix̄ che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gaļa'ze xñi'a Jesúsen' na' gwlo'e set zix̄en' n̄i'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zix̄en'. ⁴ Na' Judas Iscariote xi'ñ to beņe' le' Simón, le' naque' to beņe' šžinw ca' zjanaque' Jesúsen' txen, na' len' ba naquen gwdie' Jesúsen' lo na' beņe' ca' chesegue'ede' le'. Na' Judasen' gwne:

⁵ —¿Bixchen' bi bete' seten' na' goņe' mechon' cont gaclenen beņe' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' beņe' yašen' san da' goque' beņe' gwban. Len' bexue' mechw da' bosochin yogüe' na' gwlejlane' mechon'.

⁷ Nach Jesúsen' gože'ne':

—Bibi ye'Ine', le ba bene' da' non gone' len neda' che ža cate' gaša'. ⁸ Beņe' yaše' ca' nita'cze' len le'e bate'teze, san neda' bich soacza' yesša len le'e.

B̄xoz gwnabia' ca' bosoxi'e yesote' Lázaron'

⁹ Na' beņe' zan beņe' Israel gualaž chton' gosenežde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo beņe' guaten'. ¹⁰ Na' b̄xoz gwnabia' che nación Israel chton' bosoxi'e lecze yesote' Lázaron', ¹¹ le beņe' zan beņe' Israel ba chesyecuase' len legaque' na' ba chesejnilaže' Jesúsen' dan' gosenezde' bosbane' Lázaron'.

Jesúsen' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsen' len beņe' ca' zjanaque' le' txen gosa'aque' Betanian' na' ja'aque' Jerusalén. Na' beņe' zan chesežag Jerusalénna' da' ba zoa gaļa' l̄nin', na' zane' cate' gosenezde' žin Jesúsen' Jerusalénna', ¹³ be-

sežaše' jaseleze' le' zjanoxe' no zin. Na' chesegüe'e l̄ban' che', chesene':

—¡Leca beņe' zaca' benga! Mbalaz ben' za' nga nseļa' Xancho Diosen' le' cont nabi'e. ¡Mbalaz beņe' naque' Rey che nación Israel chechon'!

¹⁴ Na' bžel to burr dao' be gwžia Jesúsen', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble; le na', ba za' Rey chelen' žie' to burr dao'.

¹⁶ Na' beņe' ca' zjanaque' Jesúsen' txen gague cate gosejni'ide' chac con can' bosozoj ben' gosoe'xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le Jesúsen' naque' beņe' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

¹⁷ Beņe' ca' besele'e cate' Jesúsen' boļ güiže' Lázaron' na' bosbane' le' cont bechoje' lo' ban' gosoe'lene' beņe' ca' že' lo ciudan' diža' can' goquen'. ¹⁸ Na' da'nan' beņe' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'. ¹⁹ Nach beņe' fariseo ca' gose' lježe':

—Ba chle'ele bibi chac bi goncho. Yogo'ze beņe' ba chosozenague' che'.

To c̄hope beņe' griego gosenabe' yesoe'lene' Jesúsen' diža'

²⁰ Na' zjalen to c̄hope beņe' griego beņe' ca' ja'aque' gosonxene' Diosen' lo l̄nin'. ²¹ Na' beņe' ca' besežine' gan' zoa Felipen' ben' nac beņe' Betsaida ga mbane distritw Galilean', na' gose'lene':

—Si'xenšco', chaclaže'to' güe'lento' Jesúsen' diža'.

²² Na' Felipen' gweje' jaņe'e Andrésen' nach choptie' jaseže' Jesúsen' ca'. ²³ Nach Jesúsen' gože' legaque':

—Na'a ba bžin hor gac yogo'loļ da' cheyaļa' gac cont la'lagüe naca' beņe' zaca' juisyw. ²⁴ Žia' to da' zejen, še to trigon' bi yexinjen cate' lažon' lo yon', con chega'aņcze tozen; perw še yexinjen na' yelan', da' zan trigon' goņen. ²⁵ Note'tez beņe' con chi' yichje' gac güen c̄hegaque' yežlio nga, beņe' ca' yesebiaye'e. Na' note'teze beņe' chesene' bibi nonen še bi gac c̄hegaque' yežlio nga, šjasyezoe' len Diosen' toļi tocaņe.

²⁶ Na' note'tez beņe' chesac̄laže' yesone' xšinan', cheyaļa' yesejnilaže' neda' na' yosozenague' chia'. Na' gan' soa' neda' lecze na' yesezoa beņe' ca' yeson xšinan'. Note'tez beņe' yeson xšinan', Xan' gone' cont yesacxene'.

Jesúsen' gwđixjue'ede' yesot beņe' le'

²⁷ 'Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach boļ güiže' Diosen', gwne':

—Xa', ben len neda' cont yesacbe'e beņe' naco' beņe' zaca' juisyw.

Beyož gwne' ca' na' gwņe Dios ben' zoa yaban', gwne':

—Ba bena' len le' cont chesacbe'e beṇe' naca' beṇe' zaca' juisyw na' za' goncha' ca' yeto.

²⁹ Na' zan beṇe' ca' že' na' gosende' dan' gwna Diosen' na' gosene' gwzcion' gwṇe. Na' yebaḷe' gosene':

—To angl gwṇe' le'.

³⁰ Na' Jesúsen' gwne':

—Diosen' gwṇe' neda' zižje gague cont ṇezda' neda' chzenague' chia' san cont ṇeze le'e. ³¹ Ba bžin ža Diosen' čhogbi'en' čhe beṇe' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te beṇe' ca' bi chosozenag čhe Diosen' solao ṇit yela' chnabia' čhen. ³² Na' cate' yesejise' neda' to le'e yag, cana'ch gona' cont zan beṇe' že' doxen lo yežlion' yesejnilaže' neda'.

³³ Gwne' ca' cont gosenezde' yesot beṇe' le' yosode'ene' to le'e yag cruz. ³⁴ Na' beṇe' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' ṇezeto' žan Cristo ben' seḷa' Diosen' yedeṇabi'e nación čhechon' soe' toḷi tocaṇe. Na' le' žixčhen' žo' naco' beṇe' gwseḷa' Dios goljo' beṇač na' žo' yesote' le' to le'e yag cruz še ca'? žNox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' čhe yičhjažda'olen'. Le gwzenag chia' šlac ṇe' de latje šo' be'ni' čhian' lo' yičhjažda'olen', cont bi cuiayi'lenle da' mal dan' chnabia' le'e. Ben' chda gan' nac čhoḷ bi chacbe'ede' gan' zeje'. Can' naquen len le'e. ³⁶ Le šejnilaže' neda' šlac ṇe' zoa' len le'e, cont šo' be'ni' čhian' lo' yičhjažda'olen'.

Gwde gwna Jesúsen' ca' beze'e na' bcuaše'de' legaque'.

Zan beṇe' Israel bi gosejnilaže' Jesúsen'

³⁷ Na' la'czla' beṇe' Israel gualaž čheto' ca' besele'ede' ben Jesúsen' da' zan yela' guac, zane' bi gosejni-laže'ne'. ³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton', na' nono chesacbe'e blo'o yela' guac čhion'.

³⁹ Bi goc yesejle'e, le goc čhegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' beṇe' güedena.

Ba bene' cont chesele'ede' na' bi zjaṇezde' bi zejen, na' bi chesacbe'ede' lo' yičhjažda'ogaque' bi zejen dan' chlo'ede' legaque'.

Šaca' chesejni'ide' na' chesacbe'ede' bi zejen dan' chlo'eda' legaque',

ba besyetiṇjde' na' ba beca'a xtoḷa'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' beṇe' zaca' juisyw nach be'e diža' čhe'.

⁴² Na' la'czla' zanch beṇe' Israel gualaž čheto' ca' bi gosejnilaže' Jesúsen', bia'cze beṇe' zan na' len no beṇe' gwnabia' čheto' gosejnilaže'ne', perw bi goso'e diža' chesejnilaže'ne' le besežebe' bich yosoleb beṇe' fariseo ca' legaque' lo' yodaon'. ⁴³ Gosaclačže'che'

yesenite' binlo len beṇačhen' clel ca yesenite' binlo len Diosen'.

Xtiža' Jesúsen' naquen da' žialao

⁴⁴ Nach Jesúsen' gwne' zižje gože' beṇe' ca' že'na':

—Beṇe' chesejnilaže' neda' gague neda'zen' chesejnilaže' san lente Xan' ben' gwseḷa' neda'. ⁴⁵ Na' beṇe' chṇe'e neda' chle'ede' beṇe' gwseḷa' neda'. ⁴⁶ Neda' za'a yežlio nga chgua'a be'ni' lo' yičhjaždao' beṇe' ca' chesejnilaže' neda', cont bi yesenite' yesonche' da' malen'. ⁴⁷ Na' note'tez beṇe' ṇezde' can' ba gwnian' na' bi chzenague' chia', gague neda' gwnežjua' castigw čhe xtoḷen', le bi za'a yežlion' cont gwnežjua' castigw čhe xtoḷa' beṇačhen', san za'a cont gwnežjua' yela' mban toḷi tocaṇe čhe beṇe' yesejnilaže' neda'. ⁴⁸ Perw de da' čhoglaon čhe beṇe' ca' bi chesejnilaže' neda' na' bi chosozenague' čhe dan' ba gwnian', xtižan' dan' ba bian', lenṇa' čhoglaon čhe beṇe' ca' zjanape' doḷa' cate' žin ža te čhe yežlion'. ⁴⁹ Gague bia' diža' to gualaza', san Xa' ben' gwseḷa' nedan' none' mandadw bin' cheyaḷa' ṇia' na' bin' cheyaḷa' gwsed gwlo'eda'. ⁵⁰ Na' ṇezda' dan' none' mandadw ṇia' nsan' yela' mban toḷi tocaṇe čhe beṇe' yosozenag čhen. Na' da' li, con can' ža Xan', can' choe'lena' le'e diža'.

Gwdib Jesúsen' ṇi'a beṇe' ca' zjanaque' le' txen

13 Na' Jesúsen' ba ṇezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' beṇe' ba chejnilaže' le' lo yežlio nga. Da'nan' za' gaḷa' ḷṇi pascon' bzejni'ide' beṇe' ca' zjanaque' le' txen, le chacyaṇe'czede' legaque'.

² Bač gwlo'o Satanásen' xbab lo' yičhjaždao' Judas Iscariote, ben' nac xi'ṇ to beṇe' le Simón, cont gwdie' Jesúsen' lo na' beṇe' ca' cheseque'ede' le'. Na' ba zjanite' chesagüe' xše'. ³ Na' Jesúsen' ṇezde' Xen' ba bene' cont nape' la'zelagüe yela' chnabia', na' ṇezde' gan' zoa Diosen' gwze'e na' gan' zoe' nan' yeyeje'. ⁴ Da'nan' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bčhej ḷsinen'.

⁵ Nach gwxi'e nis na' gwde'en to lo' ša' na' gwzolagüe' gwdibe' ṇi'a beṇe' ca' zjanaque' le' txen ca to mos, na' bosbiže' ṇi'agaquen' len lachen' nčhej ḷsinen'.

⁶ Na' cate' ba zoa čhibe' ṇi'a Simón Pedro, Pedron' gože'ne':

—Xana', žle' čhibo' ṇi'an'?

⁷ Na' Jesúsen' gože'ne':

—Dan' chona' nga bi chejni'idon' ṇa'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje čhibo' ṇi'an'.

Jesúsen' gože'ne':

—Še bi čhiban', bich gaco' txen len neda'.

⁹ Na' Pedron' gože'ne':

—Xana', gague ṇi'a na'zen' čhibo' še ca', san doxena'.

¹⁰ Nach gož Jesúsen' le':

—Beñe' noša' nazje', ñi'e na'zen' chyažjen çhibe', le doxen cuerp çhen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwñezde' non' gwde' le' lo na' beñe' chesegue'ede' le'. Da'nan' gwne': "Gague yogo'le nac lažda'olen' xilaže'."

¹² Na' cate' beyož gwðibe' ñi'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaue':

—¿Chejni'ile bi zejen dan' ba bena' nga len le'e?

¹³ Le'e nsi'le neda' Maestrw na' Xanle, na' güenczen' žale, le can' naca'. ¹⁴ Na' neda' la'czla' naca' Xanle na' Maestrw çhele, ba gwðiba' ñi'alen' ca to mos, na' can' cheyała' gaclen lježle ca to mos. ¹⁵ Ba gwðiba' ñi'alen' cont blo'eda' le'e cheyała' gonle can' ba benan'.

¹⁶ Chnia' le'e to da' zejen, note'teze mos bi naque' beñe' blaoch ca xane', na' to beñe' zej mandadw bi za-ca'che' ca beñe' gwseła' le'. ¹⁷ Še chejni'ile da' quinga na' gonle can' gwnian', nach soale mbalaz.

¹⁸ Bi žia' ca' çhe yogo'le. Nombi'a yichjlaždao' to to le'e ba gwleja' cont soale txen len neda'. Na' ñezda' gac can' ža Xtiža' Diosen' da' nyojen žan: "Beñe' gwðagw len neda' txen ba blej bšošje' neda'." ¹⁹ Chnia' le'e da' quinga cate' za' gac ca' cont cate' ba goc ca' soačhaçhle šejle'le le naca' ben' gwseła' Diosen' can' ba gwnia' le'e. ²⁰ Chnia' le'e to da' zejen, beñe' ca' chosolebe' note'tez beñe' chseła', neda'czen' chosolebe' še ca', na' beñe' chosolebe' neda' lecce chosolebe' Dios beñe' gwsele' neda'.

Jesúsen' gwne' toe' gwðie' le' lo na' beñe' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao cha-çaše'chgüede' lo' yichjlaždao'ogüen', na' bochixgaten' gwne':

—Da' li chnia' le'e, to le'e gwðelenda' lo na' beñe' chesegue'e neda'.

²² Na' beñe' ca' zjanaque' le' txen con chesena' cho'ala' lježe' chesone' xbab çhe noen' gwne' ca'.

²³ Na' toe' chi'e cuiten' dan' chaquechgüe' Jesúsen' le'.

²⁴ Nach Pedron' bene' señw len bena' cont gwñabde' Jesúsen' no çhen' gwne' ca'. ²⁵ Nach gwbigue' bago gože' Jesúsen':

—¿Non' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscariote beñe' nac xi'in' to beñe' le' Simón. ²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

²⁸ Na' ñe to ben' zjachi' cho'a mesen' bi gosejni'ide' bixçhen' gože' le' ca'. ²⁹ Bałe' gosacde' da' noxe' Judasen' bols mechon' Jesúsen' gože' le' šjaxe' da' cheseyažjde' lo lñin' o šjanežjue' mechw da' chyažje no

beñe' yaše'. ³⁰ Nach cate' beyož gwðagw Judasen' pedas yetextil dan' bnežjw Jesúsen' le', la' bchojte'. Na' ba nac ba goł gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' beñaçh na' ña'a ba ñla'laon naca' beñe' zaca' juisyw, na' neda' lecce ba chlo'a Diosen' naque' beñe' zaca' juisyw. ³² Na' dan' chlo'a naque' beñe' zaca', lecce le' gwlo'e naca' beñe' zaca', na' la' gontien' ña'a. ³³ Xi'in'nda'ogua', yešložga soa' len le'e. Na' yeyiljwle neda', na' chnia' le'e dan' goša' beñe' gwnabia' çhe nación Israel çhechon', bi gac sa'lenle neda' gan' yeya'an. ³⁴ Na' to da' cobe chžia' bia' gonle, gague lježle tole yetole. Can' chacda' le'e, leccz can' cheyała' gague lježle tole yetole. ³⁵ Na' yeseneze yogo'lol beñe' nacle neda' txen še soaczele gague lježle tole yetole.

Jesúsen' gwne' Pedron' bi çhebe' nombi'ene'

(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'lenu' neda' ña'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixçhen' bi gac sa'lenu' le' ña'a? Gwzanlaže' cuina' gata' še chonen byen cont gaclenu' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gaclenu' neda'? Da' li chnia' le', cate' cuež jean' ba goc šoñ ñi'a bi chçhebo' nombi'o neda'.

Beñe' chesejnilaže' Jesúsen' lecce zjanombi'e Xe' Diosen'

14 'Bich gacžejlaže'le. Le šejnilaže' Diosen' na' lecce le šejnilaže' neda'. ² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de çhele, san yeya'a šjajenšagua' yo'o çhe to tole. ³ Na' cate' yeyož šjajenšagua' yo'o çhele ca', cana'ch yida' da' yoble yeçhi'a le'e cont yedyezoale gan' šjayzoa' neda'.

⁴ Nezele gan' yeya'an' na' ba nezele nac gonle cont yežinle na'. ⁵ Na' gož Tomásen' le':

—Xanto', bi ñezeto' gan' yeyejo'. ¿Nacxe gac ñezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' beñe' yela' mban toli tocañe. Ne toze beñe' bi yežine' gan' zoa Xan' še bi šejnilaže' neda'. ⁷ Še nombia'yane'le neda', lente Xan' ba nombia'le še ca'. Na' baçh nombia'ine' ña'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chñabeto' le'.

⁹ Jesúsen' gože'ne':

—Felipe, sša xen ba gwzoa' nga len le'e na' ¿bina' gombi'o neda'? Note'tez beñe' ba ble'e neda' lencze Xan' ba ble'ede'. ¿Bixchen' chnabo' gona' cont le'ele Xan'? ¹⁰ ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. ¹¹ Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. ¹² Na' chnia' to da' zejen, beñe' ca' chesejnilaže' neda', da' ca' chonan' lencze legaquen yesone'. Na' da' zaca'ch ca da' ca' yesone', le yeya'a gan' zoa Xan'. ¹³ Na' bite'teze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' beñe' zaca' juisyw. ¹⁴ Bite'tez da' nable gona' lagüe da' chejnilaže'le neda', neda' gonan'.

Jesúsen' gwne' sele' Spiritw che Diosen'

¹⁵ Še chaquele neda', gonle can' nona' mandadw. ¹⁶ Na' nabda' Xan' cont sele' Spiritw chen' soan len le'e toli tocañe na' gaclenen le'e. Na' Spiritw che Diosen' gwzejni'in le'e da' nac da' li. ¹⁷ Na' beñe' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e. ¹⁸ Bi yocua'aña' le'e ca bi' güezebe. Güidcza' yeto gan' zoale nga. ¹⁹ Yešlož beñe' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocañe, da'nana' soale toli tocañe. ²⁰ Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e. ²¹ Beñe' zjanezde' dan' nona' mandadw yesone' na' chesonen', beñe' ca' chesacde' neda'. Na' beñe' ca' chesacde' neda' lencze chaque Xan' legaque', na' neda' lencze soa' gacda' legaque' na' gona' cont yesombia'che' neda'.

²² Na' Judas (perw gague Judas Iscariote) gože'ne':
—Xanto', ¿bixchen' gono' cont neto' nezeto' zoaczo' len neto' na' bi gono' ca' len beñe' bi chesejnilaže' Diosen'?

²³ Na' Jesúsen' gože'ne':
—Beñe' chesacde' neda' chosozenague' xtižan', na' Xan' lencze gacde' legaque' na' neda' len xan' yedesoa-to' len legaque'. ²⁴ Beñe' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseja' neda'.

²⁵ 'Da' quinga ba gwnia' le'e šlac ne' zoa' len le'e. ²⁶ Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyała' nezele na' gonon cont šjayza'laže'le yogo' dan' ba gwnia' le'e. ²⁷ 'Na' hcua'aña' le'e na' chona' cont soa cuezle binlo len xbab chelen'. Chaclaža' soa cuezle binlo len xbab chelen' can' zoa' neda'. Nono beñačh gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble. ²⁸ Ba benele gwnia'

yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa Xan', le Xan' zaca'che' ca neda'. ²⁹ Na' ba gwnia' le'e na'a bibi na' gac, cont soačhačle šejnilaže'le neda' caten' gac ca'.

³⁰ 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te beñe' ca' bi chesejnilaže' neda', na' tiļlenen neda', perw bi gonon neda' gan'. ³¹ Chona' con can' non Xan' mandadw cont neze beñačhen' chacda' Xan'. Le šo'o na'a, ba gole šejcho.

Jesúsen' zaca'lebe' ca to yag da' chbia uvas

15 'Neda' zaca'leba' ca to yag da' chbia uvas. Na' Xan' zaca'lebe' ca beñe' chonši'i yaguen'. ² Na' le'e chejnilaže'le neda' zaca'lebe' ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. ³ Na' le'e ba nacle ca to xozen' da' ba mpe'e, le bačh chzenagle xtižan' dan' ba be'lena' le'e. ⁴ Le soačhačh len neda' cont soačhača' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chaclaže' Diosen' še bi soačhačle len neda'.

⁵ 'Neda' zaca'leba' ca to yag da' chbia uvas na' le'e zaca'lebe' ca xozen'. Note'tezle še soačhačle len neda' lencze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. ⁶ Beñe' bi zoačhače' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont cheseyen.

⁷ 'Na' le'e še zoačhačle len neda' na' zoačhačle chzenagle xtižan', bite'tez da' chaclaže'le nabele Diosen', gonczen'. ⁸ Chacxen Xan' cate' zoale chonchguale dan' chazlažen', na' še chonle ca', yesacbe'e beñe' da' li chejnilaže'le neda' na' chzenagle chia'. ⁹ Ca Xan' chacde' neda', lencz ca' neda' ba chacda' le'e. Le soa le gon can' žia' cont gacbe'ele chacda' le'e. ¹⁰ Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

¹¹ 'Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw. ¹² Na' da' nga nona' mandadw gonle, gague lježle tole yetole can' chacda' neda' le'e. ¹³ Nono zoa beñe' chaquech lježe' ca beñe' chzanlaže' cuine' gate' neče beñe' migw che'. Na' can' chona' neda'. ¹⁴ Na' le'e nacle migw chia' še chonle con can' nona' mandadw. ¹⁵ Na' bich žia' nacle beñe' güen žin chia', le to beñe' güen žin bi nezde' yogo' da' chon xanen', san žia' nacle migw chia'. Le yogo'lo' da' ba benda' gwna Xan' ba bzejni'idan' le'e. ¹⁶ Gague le'e gwlejele neda' naca' Xanle. Neda' gwleja' le'e cont chejnilaže'le neda'. Na' chseja' le'e cont šjenle can' chazlaže' Xan', na' gague da' te che da' ca' gonlen'. Na' yogo'lo' da' nabele Xan' gone' lagüe da' chejnilaže'le neda', gonczen'. ¹⁷ Da' nga da' chona' mandadw gonle, gague lježle tole yetole.

Beñe' bi chesejnilaže' Diosen' cheseque'ede' beñe' chosozenag che Jesúsén'

¹⁸ Še beñe' bi chesejnilaže' Diosen' cheseque'ede' le'e, le gon xbab ba cheseque'eczede' neda' cate' za' yeseque'ede' le'e. ¹⁹ Ša nacle txen len beñe' ca' bi chesejnilaže' Diosen', nachen' yesacde' le'e can' chesaque' beñe' lježen' šaca'. Perw ba gwleja' le'e cont chzenagle chia'. Da'nán' cheseque'ede' le'e da' bi nacle legaque' txen. ²⁰ Le šjasa'laže' dan' gwnia' le'e: "Note'teze mos bi naque' blaoch ca xanen'." Bosochi bososaca' beñe' neda', na' lecze ca' yesonde' le'e. Na' balze beñe' bosozenague' xtižan', lecze balze' yosozenague' xtiža'len'. ²¹ Na' da' bi zjanombi'e Diosen' ben' gwseja' neda', da'nán' yesonde' le'e yogo' da' ca', le cheseque'ede' le'e da' chzenagle chia'.

²² Ša neda' bi bedezejni'ida' legaque', bi zjanape' doļa' da' cheseque'ede' neda' šaca'. Perw ņa'a bibi de da' yosode'ede' yesene' bi zjanape' doļa'. ²³ Beñe' chgue'ede' neda' lente xan' chgue'ede'. ²⁴ Ba bena' yeļa' guac da' nono nochle ņa' gon, na' šaca' bi besele'eden' bi zjanape' doļa' da' cheseque'ede' neda'. Perw ba besele'ede' da' ca' na' bia'cze cheseque'ede' neda' len xan'. ²⁵ Na' chac can' nyoj xtiža' Diosen' dan' chososed' gan' žan: "Besegue'ede' neda' la'czla' bibi da' mal bena'."

²⁶ Ba gwnia' le'e seļa' Spiritw che Xa' Diosen' gaclenen le'e. Spiriton' san' gan' zoa xan' na' gwzejni'in le'e diža' li chia' neda'. ²⁷ Na' lecze ca' le'e cheyaļa' güe'le xtižan', le ba gwzoale len neda' šlac ba gwđixjue'eda' xtiža' Xa' Diosen'.

16 ² Le yesyebeje' le'e lo' yodao' chegaque' ca', na' gwžin ža cate' note'tez beñe' yesote' le'e yesacde' chebe Diosen' dan' chesonen'. ³ Yesonde' le'e yogo' da' ca' le bi zjanombi'e xan' ņeca neda'. ⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw che Diosen'

'Bi gwnia' le'e yogo' da' ca' gac chele cate' za' gwzola' bzejni'ida' le'e xtiža' Diosen', le ņe' zoacza' chacle-na' le'e. ⁵ San ņa'a yeya'a gan' zoa xan' ben' gwseja' neda', na' ņe tole bi chñabele neda' gan' yeya'a. ⁶ Na' ba chacyaše'le dan' ba gwnia' yeya'a. ⁷ Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach seļan' len le'e. ⁸ Na' cate' yid Spiriton' gwzejni'in beñachen' zjanape' doļa', na' gwzejni'in non' nac beñe' güen len Diosen', na' gwzejni'in gata' castigw toļi tocañe che beñe' bi chosozenague' chia'. ⁹ Spiriton' gwzejni'in legaque' zjanape' doļa' da' bi chesejnilaže' neda'. ¹⁰ Na' gwzejni'in legaque' non' nac beñe' güen len Diosen', le yeya'a gan' zoa Xa' Diosen' na' le'e bich le'ele neda'. ¹¹ Na' gwzejni'in legaque' gata' castigw che xtoļa'gaquen' toļi tocañe, le Satanás dan' chnabia' da' xigüe' ca' na' dan' chnabia'te beñe' ca' bi

chesejnilaže' Diosen' ba nchoglaon çhen gwnežjw Diosen' castigw çhen toļi tocañe.

¹² 'Ñe' dech da' zan da' ņia' le'e, perw naquen zdebe šejni'ilen ņa'a. ¹³ San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyaļa' ņezele chia', le Spiriton' chñen diža' li. Bi güe'en diža' to gualazen, san güe'en bite'tez diža' da' chzene xan' len, na' chixjue'en le'e bica' da' za' za'ac. ¹⁴ Spiriton' gonen cont gwlo'elaon naca' beñe' zaca' juisyw, le gwzejni'in le'e xtiža'. ¹⁵ Xan' ba bene' cont ņezda' yogo' da' ņeze le', na' da'nán' gwnia' Spiriton' chixjue'en le'e xtižan'.

Jesúsén' gwne' šlože' yesacyaše'de' na' techle yesyebede'

¹⁶ Šlož bi le'ele neda', na' te yešlož na' yezle'ele neda' da' yoble, le yeya'a gan' zoa xan'.

¹⁷ Na' baļe beñe' ca' zjanaque' Jesúsén' txen gose' lježe':

—žBi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' žbi zejen dan' že' yeyeje' gan' zoa xan'? ¹⁸ žBi zejen dan' že' yešlož? Bi chejni'icho bin' že'.

¹⁹ Jesúsén' gocbe'ede' chesaclaže' yesenabde'ne' bi zejen, na' gože' legaque':

—žBa chñabe lježe' bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? ²⁰ Da' li chnia' le'e ba zoa cuežle na' yegüine'le šlac beñe' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. ²¹ Cate' chzan no'olen' chžaglagüe' šlac chaque' bes che yeļa' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto beñach yežlio nga. ²² Lecze ca' le'e ba chacyaše'le ņa'a, perw cate' yežagcho da' yoble soachle mbalaz na' nono gac yeca'a yeļa' chebe chelen' lo' yichjlažda'olen'.

²³ 'Na' cate' ba bžin ža šjayzoa' da' yoble gan' zoa xan', cana'ch bich yažjele bi ņable gwzejni'ida' le'e. Da' li chnia' le'e, da' chejnilaže'le neda' bite'tez da' ņabele xan', gonçzen' le'e. ²⁴ Ža ņa'aža bibi ņa' ņabele xan' ye'ine' chñablen da' chejnilaže'le neda'. Na' ņa'a le ņabe xan' bi da' ņabelene' ye'ine' ca', na' gone' can' ņabelenen' cont soale mbalaz juisyw.

Criston' ba bene' cont yenit yeļa' chnabia' che gwxiyen'

²⁵ 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che xan'. ²⁶ Na' cate' ba bžin žana', cana'ch ņabele xan' bi da' ņabelene' ye'ine' chñablen da' chejnilaže'le neda'. Na' bi yažjen ņabda' xan' gaclene' le'e. ²⁷ Le cuinçe xan' chacde' le'e dan' chaquele neda' na' chejle'le gwseļe' neda'. ²⁸ Gan' zoa Xa' Diosen' gwza'a na' ba bida' yežlio nga. Na' ņa'a yeza' yežlio nga na' yeya'a gan' zoa xan'.

²⁹ Nach gose'ene':

—Baç cho'o diža' da' chejni'ito' na' bi cho'o jemplw. ³⁰ Ba chacbe'eto' nombi'o yogo' xbab che beñachen'.

Ba ñezledo' bi chesaclaže' beñe' yesenezde' cate' biña' yesenaben'. Da'nan' baçh chejle'to' zao' gan' zoa Diosen'.

³¹ Na' gož Jesúsen' legaque':

—¿Ba chejle'le ña'a? ³² Ba bžin ža na' ña'a ba gole' gaslasle. To tole ca'a xñez che chele na' gwcua'anle toza'. Perw bi zoa' toza', le zoa Xan' len neda'. ³³ Ba gwnia' le'e ca' cont soa cuezle binlo len xbab chele, le chejnilaže'lenda'. Yežlio nga saca'zi'le, perw bi gaczejlaže'le, neda' ba bena' cont yenit yela' chnabia' che gwxiyen' dan' zoa ña'a chnabian' yežlio nga.

Jesúsen' gwnabde' Diosen' gaclene' beñe' ca' zjanaque' le' tñen

17 Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ño' naca' beñe' zaca' juisyw cont neda' gona' ga gacbia' le' naco' beñe' zaca' juisyw. ² Ba beño' neda' yela' chnabia' lao yogo' beñaçh cont chnežjua' yela' mban toli tocañe che yogo' beñe' ca' ba gwlejo' chesejnilaže' neda'. ³ Na' beñe' ca' zjanape' yela' mban toli tocañe zjanombi'e le', le tozon' zaco' gonxento', na' lecze zjanombi'e neda' Jesucristw beñe' gwseło'.

⁴ Lo yežlion' ba bena' cont nacbia' naco' beñe' zaca' juisyw, le ba beyož bena' yogo'loł da' gwlo'o lo na' gona'. ⁵ Na' ña'a Xa', ben cont la'laon naca' beñe' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

⁶ Ba gwlejo' bał beñaçh chesejnilaže' neda', na' baçh blo'eda' legaque' can' naco' na' can' chonon'. Zjanaque' xi'ño' na' beno' cont chesejnilaže' neda' na' chesone' can' žon'. ⁷ Na' ba zjanezde' yogo'loł da' chona' na' yogo' diža' da' choa' zjanaquen chio' le'. ⁸ Le ba be'lena' legaque' diža' dan' ba bzejni'ido' neda' na' ba bosozenague' çhen, na' ba chesacbe'ede' da' li gwza'a gan' zon', na' chesejle'e le len' gwseło' neda'.

⁹ Chñaba' gacleno' legaque'. Bi chñaba' gacleno' yogo' beñaçh, san gacleno' beñe' ca' gwlejo' chesejnilaže'nda' le ba zjanaque' lo nao'. ¹⁰ Na' yogo' beñe' chesejnilaže' neda' lecze chesejnilaže' le'. Na' ca'cze naquen, note'tez beñe' zjanaque' xi'ño' lecz zjanaque' xi'ña', na' beñe' ca' chesejnilaže'nda' chosolo'e naca' beñe' zaca' juisyw.

¹¹ Na' ña'a bich soa' yežlio nga, perw beñe' quinga chesejnilaže' neda' ñita'cze' yežlio nga, na' neda' ba zeza' gan' zo'na'. Xa', naco' la'zelagüe beñe' laždao' xilaže', na' chñaba' gwçhino' yela' chnabia' chio' cont gwcuas gwcuizo' da' malen' len legaque' cont ñita'cze' yesaque' toze len lježgaque', ca chio' naccho toze.

¹² Šlac ba gwzoa len legaque', neda' ba bçhina' yela' chnabia' çhion' cont bcuas bcuiža' da' malen' len legaque'. Da'nan' ñe toe' bi gwžiai', con toz ben' ba naquen cuiaye'e cont gac doxen can' ža Xtižo' dan' nyojen.

¹³ Na' ña'a ba zeza' gan' zon', na' šlac ñe' zoa' yežlio nga cho'a diža' quinga cont beñe' qui ñita'chgüe' mbal-

az ca mbalazen' zoa' neda'. ¹⁴ Neda' ba be'lena' le-gaque' xtižon', na' beñe' ca' bi chesejnilaže' le' chesegue'ede' legaque' dan' bi chesone' tñen len le-gaque', ca' neda' bi naca' tñen len beñe' ca' bi chesejnilaže' le'. ¹⁵ Na' ca nac beñe' ca' chesejnilaže' neda', bi chñaba' yeca'o legaque' lo' yežlio nga, san chñaba' gacleno'ne' cont Satanás dan' chnabia' da' xigüe' ca' bi siye'en legaque'. ¹⁶ Legaque' bi zjanaque' tñen len beñe' bi chesejnilaže' le', ca neda' bi naca' tñen len beñe' bi chesejnilaže' le'. ¹⁷ Ben cont beñe' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. ¹⁸ Len' gwseło' neda' yežlion' cont ba bia' xtižon', na' lecze ca' chseła' legaque' yeso'e xtižan'.

¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

²⁰ Na' bi chñaba' gacleno' legacze', san lecze gacleno' beñe' ca' yesejnilaže' neda' cate' yesende' diža' dan' yesoe' beñe' quinga. ²¹ Xa', ben cont yogo'lole' yesaque' toze len lježgaque' na' yesaque' tñen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont beñe' ca' bi chesejnilaže' le' yesacbe'ede' len' gwseło' neda'. ²² Na' yela' bala'añ dan' noño' neda' ba bnežjuan' legaque' cont zjanaque' toze len beñe' lježe' ca chio' naccho toze. ²³ Legaque' zjanaque' tñen len neda' na' neda' naca' tñen len le' cont yogo'cho gaccho toze. Gaccho toze cont beñe' ca' bi chesejnilaže' le' yesacbe'ede' len' gwseło' neda' na' yesacbe'ede' chacdo' beñe' ca' can' chacdo' neda'.

²⁴ Xa', chacdo' neda' cate' biña' xe yežlio nga na' nono' neda' beñe' zaca' juisyw. Na' chaclaža' beñe' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' beñe' zaca' juisyw. ²⁵ Xa', naco' la'zelagüe beñe' chon da' zej to lliča. Na' ca nac beñe' ca' bi chesejnilaže'nda', lecze bi zjanombi'e le', perw neda' nombi'a le', na' beñe' ca' ba gwlejo' cont chesejnilaže' neda' zjanezde' len' gwseło' neda'. ²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

Judasen' bdie' Jesúsen' lo na' soldadw ca'

(Mt. 26:47-56; Mr. 14:43-50; Lc. 22:47-53)

18 Beyož gwna Jesúsen' da' ca', gwza'lene' beñe' ca' zjanaque' le' tñen ja'aque' šla'a Yegw Cedrón gan' gota' to le'ej ga goseze zan yag olivos. Na' gosole' lo' le'ejen'. ² Na' Judasen' ben' ba naquen gone' Jesúsen' lo na' beñe' ca' chesegue'ede' le' lecze nombi'e latjen', le zan ñi'a Jesúsen' len beñe' ca' zjanaque' le' tñen ba besedobe' na'. ³ Ca' goquen' bžin Judasen' na' nçhe'e xonj soldadw na' yexonj beñe' chesape' yodao' blaon' beñe' goseseja' bçoz gwnabia' ca' na' beñe' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjanałe' spada.

⁴ Jesús'en' ba ñezde' yogo'lo' da' za' gac che', na' bchoje' jašague' legaque' na' gwne':

—¿Non' cheyiljwle?

⁵ Na' gose'ene':

—Cheyiljwto' Jesús beñe' Nazaret.

Na' gož Jesús'en' legaque':

—Nedan'.

Na' Judasen' ben' ba naquen gone' Jesús'en' lo' na'gaquen' zelene' legaque'. ⁶ Cate' Jesús'en' gože' legaque': "Nedan", la' besyebiga'te' cosxan'le na' jasec-haze' lo' yon'. ⁷ Na' da' yoble Jesús'en' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús beñe' Nazaret.

⁸ Na' Jesús'en' gwne':

—Ba gwnia' nedan'. Na' še nedan' cheyiljwle, le güe' latje šjaya'ac beñe' quinga.

⁹ Gwne' ca' cont goc can' ba gwdixjue'ede' caten' gwne': "Ne to beñe' ca' ba gwlej Diosen' chesejnilaže' neda' bi yesebiaye'e." ¹⁰ Na' Simón Pedron' no'e to spada na' goljen' gwdinen' mos che b̄xoz blaon' gw-čhogtechgüe' nague' l'icha. Na' mosen' le' Malco. ¹¹ Na' Jesús'en' gože' Pedron':

—Bego'o spada čhion' lo' ližen'. ¿Chacdo' bi cheya'la' gac da' ba nžia' bia' Xa' Diosen' gac čhia'?

Goseče'e Jesús'en' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len beñe' chesape' yodao' blao che nación Israel čheton' gosezene' Jesús'en' na' bosocheje'ne'. ¹³ Na' goseče'ene' da' nechw lao Anás ben' naque' xta'obi'in' che Caifás. Na' Caifás'en' goque' b̄xoz blao che nación Israel čheton' lo' izen'. ¹⁴ Na' Caifásna' ben' gože' beñe' gwnabia' čheton' napen' legaque' cuent toz ben' gat clél ca cuiayi' yogüe'.

Pedron' bi gwčebe' naque' Jesús'en' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto beñe' naque' Jesús'en' txen gosa'ogüe'ne'. Na' nombia' ben' nac b̄xoz blao ben' yeto. Da'n'an' goc gwyo'e len Jesús'en' chyo'o che b̄xoz blaon'. ¹⁶ Na' Pedron' bega'añe' do cho'a puerten'. Nach ben' yeto, da' nombia' b̄xoz blaon' le', gwyeje' na' be'lene' diža' bi' no'olen' chap cho'a puerten' cont gw-lo'obe' Pedron'. ¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Beñe' güen žin ca' na' beñe' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyēže'ede'. Na' Pedron' ze' len legaque' cho'a yin' cheže'ede'.

Goseñabde' Jesús'en' che dan' chsed chlo'eden'

(Mt. 26:59-66; Mr. 14:55-64; Lc. 22:66-71)

¹⁹ Na' ben' nac b̄xoz blaon' gwñabde' Jesús'en' che beñe' ca' chosozenag che dan' chsed chlo'eden' na' che da' ca' chzejni'iden'. ²⁰ Na' Jesús'en' gože'ne':

—Ba bi'a diža' doxen latje lagüe. Zan ñi'a bsed blo'eda' lo' yodao' checho ca' na' chyo'o yodao' blaon' gan' chesežag yogo' beñe' gualaž chechon'. Bibi diža' gwnia' bagaše'ze. ²¹ ¿Bixčhen' chñabdo' neda'? Gwñabe beñe' ca' gosende' dan' bsed blo'edan'. Legaque' zjañezde' bi dižan' bia'.

²² Beyož gwna Jesús'en' ca', to ben' chape yodao' blaon' zie' na', na' gwdape' xaguen', gože'ne':

—¿Ca' choži'o xtiža' ben' nac b̄xoz blaon'?

²³ Jesús'en' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixčhen' chgapo' neda'?

²⁴ Nach Anás'en' bdie' Jesús'en' ncheje' lao Caifás'en' ben' nac b̄xoz blaon'.

Da' yoble Pedron' bi gwčebe' še naque' txen len Jesús'en'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' beñe' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gwčebe', gwne':

—Bi lena' neda'.

²⁶ To xmos b̄xoz blaon' naque' biše' ljež ben' gwčhog Pedron' nague'n', na' le' gože' Pedron':

—¿Gague ble'eda' le' len Jesús'en' lo' le'ej gan' ze yag olivos?

²⁷ Na' Pedron' da' yoble bi gwčebe', na' la' gwchežte to jea.

Goseče'e Jesús'en' lao Pilaton'

Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las beñe' gwnabia' ca' gosebeje' Jesús'en' gan' zoa Caifás'en' na' goseče'ene' gan' zoa gobernador Pilato ben' chon ye'la' justis. Na' legaque' bi goso'e len Jesús'en' yo'o gan' zoa Pilaton', le can' nac costumbr čheton' bi chac yesagüe' xše' l'ni pascon' še yeso'e gan' že' beñe' bi zjanac beñe' Israel. ²⁹ Da'n'an' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' beñe' gwnabia' ca' gosene':

—Šaca' benga bi naque' beñe' güen da' xinj bi bde'to'ne' lo' naon'.

³¹ Na' gož Pilaton' legaque':

—Le yeče'e, na' le gon ye'la' justis che' can' ža ley čhelen'.

Nach beñe' gwnabia' che nación Israel čheton' gose'ene':

—Bi de l'sens gotto' beñe'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'. ³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che beņe' Israel ca'?

³⁴ Jesúsen' gože'ne':

—¿Con da' goljlažon' chņabo', še beņe' yoble gose'e le' ca'?

³⁵ Pilaton' gože'ne':

—¿Chacdo' naca' neda' beņe' Israel? Beņe' Israel gualaž čhio' na' bχoz gwnabia' čhele ca' bosodie' le' lo na' nga. ¿Bi da' xinj beņon'?

³⁶ Jesúsen' gože'ne':

—Yeļa' chnabia' čhia' nža'le naquen len yeļa' chnabia' che beņe' chesenabi'e yežlio nga. Šaca' yeļa' chnabia' čhia' naquen che yežlio nga na' šaca' ŋabi'a nación ca' že' yežlio nga, beņe' ca' chosozenag čhian' gosediļe' cont bi goca' lo na' beņe' gwnabia' che nación Israel čheton' šaca'. Perw yeļa' chnabia' čhian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' beņaçhen' diža' li na' yogo' beņe' chesone' t xen len diža' li chosozenague' čhia'.

³⁸ Nach gož Pilaton' le':

—¿Bi dan' diža' li?

Gosečhoglagüen' yesote' Jesúsen'

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' beņe' gwnabia' che nación Israel čheton' na' gože' le-gaque':

—Bibi nļa'lagüe še bi da' xinj non benga. ³⁹ Perw na' de costumbr čhele gwsana' to beņe' de ližya lo lņi pascon'. ¿Chaclaže'le gwsana' benga naque' Rey che le'e beņe' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to beņe' gwban.

19 Nach Pilaton' bene' mandaw goseyine' Jesúsen'. ² Na' soldaw ca' gosone' to corona de xis yeše' na' bosozoen' yičhj Jesúsen' na' bosoguacue'ne' to lache' moradw ca da' chosočhin no rey. ³ Nach gosonle' che', gosene':

—¡Viva Rey che beņe' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' beņe' gualaž čheto' ca' že' na':

—Cueja'ne' da' yoble cont ŋezele bibi da' xinj chžel-da' še bi da' none'.

⁵ Na' bechoj Jesúsen' chyo'ona', na' zoa corona de xis yešen' yičhje' na' ŋe' nyaze' lache' moradon'. Na' Pilaton' gože' le-gaque':

—Le ŋa', nga ze ben'.

⁶ Na' bχoz gwnabia' ca' na' beņe' chesape' yodao' blaon' cate' besele'ede' Jesúsen' na' bososye'e zan ŋi'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' le-gaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' beņe' gwnabia' ca' che nación Israel čheton' gose'e le':

—De to ley čheto' da' žan cheyaļa' gate' da' že' naque' Xi'iq̄ Dios, le con to beņaçhen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'. ⁹ Na' beyo'e yo'o gan' zoe' da' yoble, nče'e Jesúsen', na' gože' Jesúsen':

—¿Ga beņe' le'?

Na' Jesúsen' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi ŋezdo' napa' yeļa' chnabia' cont gwsana' le' na' napa' yeļa' chnabia' cont čhogbi'an yosode'e le' le'e yag cruz?

¹¹ Jesúsen' gože'ne':

—Bibi yeļa' gwnabia' napo' šaca' Diosen' bi nonen' le'. Da'n'an' beņe' bdie' neda' lo naon' napche' doļa' ca le'.

¹² Nach Pilaton' beyiljwlaže' nacle gone' gwsane' Jesúsen'. Perw beņe' gwnabia' che nación čheton' bososye'e gosene':

—Še gwsano' benga, contr rey che nación Roman' chono' še ca', le note'tez beņe' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yeļa' justisen', to latje da' nzi' Gan' Nagw Yej, na' diža' hebreo nzin' Gabata. ¹⁴ Do guagwbiž ža cate' za' solao lņi pascon' Pilaton' gože' beņe' gwnabia' čheto' ca':

—Le ŋa', nga zoa rey čhelen'.

¹⁵ Nach da' yoble gosezolagüe' bososye'e gosene':

—¡Cheyaļa' gate'! ¡Bde'e le'e yag cruz!

Nach Pilaton' gože' le-gaque':

—¿Rey čhele nga gona' mandaw yosode'e le'e yag cruz?

Nach bχoz gwnabia' ca' gose'ene':

—Gague rey čheto' benga. Toze César naque' rey čheto'.

¹⁶ Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénŋa' goseče'e Jesúsen' cho'a ciudan'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesúsen' zeje' no'e yag cruz čhen' na' besežine' to latje nzi' Latje che Žit Yičhj Beņe' Guat, na' diža' hebreo nzin' Gólgota. ¹⁸ Na' soldaw che gobernadore' bosode'ene' le'e yag cruzen', na' lecze bosode'e yečhope beņe' le'e yečhope yag cruz cuiten' na' Jesúsen' gwyo'e gachoļ beņe' ca' čhope'. ¹⁹ Na' gobernador Pilaton' bene' mandaw byoj diža' da' gwda' yičhj yag cruz che Jesúsen'. Na' bosozojen' žan: "Jesús beņe' Nazaret, Rey che beņe' Israel". ²⁰ Bosozojen' diža' hebreo, diža' griego na' diža' latín. Na' zan beņe' Israel

gualaž četo' bosolaben', le gan' gwda' Jesúsen' le'e yag cruzen' naquen gała'ze ciuda Jerusalénna'. ²¹ Nach b̄xoz gwnabia' ca' na' yezica'chle beñe' gwnabia' che nación Israel četon' gose'e Pilaton':

—Bi gwzojo' "Rey che beñe' Israel", san bzoj: "Le' gwne' naque' rey che beñe' Israel."

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xałana' Jesúsen' na' besyele'en gosebejen' tap cuenle na' tgüejen gosezi' to toe'. Na' lece goseque'e yeto xe' da' naquen to güelize, na' bibi dia čhen de. ²⁴ Na' gose' lježe':

—Bi gwzoxjchon san gonchon rifa cont nezecho no yečhen.

Na' dan' gosone' ca' goc can' nyoj Xtiža' Diosen', žan: "Besyele'e xałanan' legacze', na' gosone' rifa lache' dan' chazan'."

²⁵ Na' do gała'ze yag cruz che Jesúsen' zecha Marían' ben' nac xña' Jesúsen' na' beñe' bile xñe'ena', na' María beñe' naque' no'ol che Cleofas na' María beñe' naque' beñe' Magdala. ²⁶ Na' cate' Jesúsen' ble'ede' zecha xñe'en gała'ze len to beñe' naque' le' txen, beñe' chaquechgüe Jesúsen' le', nach gože'ne':

—Bena' gaque' ca xi'ño'.

²⁷ Nach gože' bena':

—Bži'ilaže' xña' nga ca xñao'.

Na' žana' gwque'ene' bene'ne' ca beñe' lo' yo'o.

Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsen' ba nezde' bač goc yogo' da' cheyała' gac. Nach cont goc can' ža yelate' Xtiža' Diosen' da' nyojen gwne':

—Chbiłda' nis.

²⁹ Na' de late' vino zičj da' yože' to lo' xguag dao'. Na' to beñe' bzaže'de' vino zičjjen' to esponja bzoen' to lo' xis da' že' hisopo na' gwłisen' blapen' cho'a Jesúsen'. ³⁰ Na' beyož gwzop Jesúsen' vinon' na' gwne':

—Bač goc yogo'loł da' cheyała' gac.

Nach bcheque' yičjjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža Ini xen, da'nan' beñe' gwnabia' che nación četon' jaseñabde' Pilaton' gone' mandadw yeseyišjw soldadw che' ca' ni'a beñe' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosacłaze' yeseda'ch beñe' ca' le'e yag cruzen' ža che Dios.

³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lece ca' gosone' len ben' gwda' le'e yag cruzen' cuiten' yešla'a. ³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis. ³⁵ Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. ³⁶ Na' goc da' ca' len

Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'." ³⁷ Na' yeto da' žan: "Yesene'e ben' ba bosozie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José beñe' nac beñe' ciuda Arimatea jañabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' beñe' gwnabia' četo' ca'. ³⁹ Na' len Josén' lece gwyej Nicodemo ben' ba gwyej gan' zoa Jesúsen' šeže'le. Na' Nicodemon' no'e to da' chl'a zix da' none' len yal dan' že' mirra, na' len to bište dan' že' aloes, ca do šona roben'. ⁴⁰ Nach bosyočhele' cuerp che Jesúsen' to lache' xen na' len dan' chl'a zixen', ca' chon neto' beñe' Israel cate' hcuaše'to' beñe' guat. ⁴¹ Na' gała'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseče'ene' to bloj cont yosočhinen' ca to ba, na' nono beñe' guat na' šo' lo'enna'. ⁴² Ža caten' got Jesúsen' naquen ža caten' chososiñi'e che ža che Diosen'. Na' da' chesacbyende' yosocuaše'ne', da'nan' jaseło'e Jesúsen' lo' bloj coba', le naquen gała'ze.

Jesúsen' bebane' ladjo beñe' guaten'

(Mt. 28:1-10; Mr. 16:1-8; Lc. 24:1-12)

20 Na' bal dmigw María beñe' Magdalan' gwyeje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. ² Nach beza'sese' beyeje' gan' zoa Simón Pedron' len yeto beñe' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nezetot' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'. ⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enna' ca le'. ⁵ Na' bcheque' gwne'e lo'enna' na' ble'ede' lache' ca' zjachin' lo' yo perw bi gwyo'e. ⁶ La' bla'te Simón Pedron' na' le' gwyo'e lo' blojen' na' lece ble'ede' lache' ca' gan' zjachin'na'. ⁷ Na' bay dan' bosoguazje' yičjjen' bi chin' gan' chi' lache' ca', san ndoben chin' šla'ale. ⁸ Nach lencze ben' yeto gwyo'e, le biña' šo'e la'czla' byobech bžine' cho'enna', na' ble'ede' can' naquen na' gwyejle'e. ⁹ Le biña' yesejni'ide' Xtiža' Diosen' da' nyojen žan cheyała' yebane' ladjo beñe' guaten'. ¹⁰ Na' besyeya'aque' jaya'aque' yo'o gan' nite'na'.

María beñe' Magdalan' ble'ede' mbancze Jesúsen'

(Mr. 16:9-11)

¹¹ Na' Marían' bega'ane' na' gwzeche' gała'ze cho'a blojen' chbeže'. Na' ne' chbežte' ca' bcheque' gwne'e lo' blojen'. ¹² Na' ble'ede' chope angl beñe' zjanyaz lache' šiš zjachi'e lo' blojen', toe' chi' zej yičjle na' yetoe' chi' zej xñi'ale gan' gota' cuerp che Jesúsen'.

¹³ Nach gose'e no'olen':

—¿Bixchen' chbežo' no'ole?
Na' boži'en gože' legaque':
—Ba besyeyo'e Xanan' na' bi nežda' gale jas-
esane'ne'.
¹⁴ Beyož gwna' Marían' ca' gwyečhje' ble'ede' zecha
Jesúsen' cožen', perw bi gocbe'ede' še naque' le'. ¹⁵ Na'
gož Jesúsen' le':
—¿Bixchen' chbežo', no'ole? ¿Non' cheyiljo?
Marían' bene' xbab še ben' chape' yaguen' nach bol
güiže' le', gože'ne':
—Beņe', še len' beyo'one' ga yoble, gwna neda' gale
jaysano'ne' cont yeyoa'ne'.
¹⁶ Jesúsen' gože'ne':
—¡María!
Na' Marían' gwyečhje' da' yoble na' gože'ne':
—¡Raboni! —naquen to diža' hebreo na' zejen
Maestrw.
¹⁷ Jesúsen' gože'ne':
—Bi goxo' neda', le biņa' yeyepa' gan' zoa Xan'. Beyej
len yezica'chle beņe' ca' ba bosozenag xtižan' beņe' ca'
zjanaque' ca biše' zana', na' gožgaque' yeyepa' gan'
zoa Xan' ben' lecz naque' Xale. Naque' Dios ben' chonx-
ena' na' lecze naque' Dios ben' chonxenle.
¹⁸ Nach beza' María beņe' Magdalan' na' jay-
dixjue'ede' yezica'chle beņe' ca' chosozenag xtiža'
Jesúsen' le ba ble'ede' Xanchon'.

Beņe' ca' zjanaque' Jesúsen' txen besele'ede' mbancze'
(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choł že' dmigon', beņe' ca'
zjanaque' Jesúsen' txen zjandop zjanžague' lo' yo'o na'
zjanseyjwte' puert ca' da' besežebe' beņe' gwnabia'
che nación Israel cheton'. Nach Jesúsen' ble'e na' gwze'
gachol legaque'. Na' gože' legaque':
—Le soa binlo len xbab da' yo'o lo' yichjlažda'ole.
²⁰ Beyož gwne' ca' na' blo'ede' legaque' taque' ca' na'
cuit le'ena'. Na' besyebede' cate' besele'ede' le naque'
Xanchon'. ²¹ Na' gozne' da' yoble:
—Le soa binlo len xbab da' yo'o lo' yichjlažda'olen'.
Can' gwseļa' Xan' neda' yežlio nga bia' xtižen', lecze ca'
neda' chseļa' le'e güe'le xtižan'.
²² Beyož gwne' ca' blobe' legaque' na' gože' legaque':
—Le si' Spiritw che Diosen'. ²³ Beņe' ca' yesyetinge
xtoļa'gaquen', naple yela' chnabia' ye'ine' ba gwnit-
laon, na' naple yela' chnabia' cont ye'le beņe' bi
yesyetinge xtoļa'gaquen' bitw nitlaon.

Tomás ble'ede' mban Jesúsen'

²⁴ Na' Tomás ben' bososi'e Tomás Cuaš lene' len
beņe' šižinw ca' ba gosedalene' Jesúsen', na' bi gwzoe'
cate' Jesúsen' bedyelo'elagüe' legaque' že' dmigon'.
²⁵ Na' beņe' ca' yezica'chle gose'ene':
—Ba ble'eto' Xanchon'.
Na' Tomásen' gože' legaque':
—Bi šejli'a mbancze' še bi le'eda' yiž che claven' le'e
taque' ca' na' gwzebe xbenan' gan' gwdebe clav ca' na'
gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa
Tomásen' len legaque'. Na' da' yoble nyeyjw puert ca',
cate' bezla' Jesúsen' na' gozzeche' gachol legaque'. Na'
gwne':
—Le soa binlo len xbab da' yo'o lo' yichjlažda'olen'.
²⁷ Nach gože' Tomásen':
—Gwņa' lo' taca' quinga na' bzeben xbenon'. Na'
bzebe naon' cuit li'a nga cont šejli'o. Na' bich gaco'
beņe' bi chejle', san šejli'o.
²⁸ Nach Tomásen' gože'ne':
—¡Xana' na' Dios chia'!
²⁹ Na' Jesúsen' gože' Tomásen':
—Tomás, ba chejli'o da' ba ble'edo' neda'. Mbalaz
beņe' ca' ba chesejle'e la'czļa' biņa' yesele'ede' neda'.

Da' quinga zjanyojen cont šejle'cho Jesúsen' naque' beņe' gwseļa' Dios

³⁰ Da' zan yela' guac ben Jesúsen' da' besele'e beņe'
ca' zjanaque' le' txen da' bi nyojen nga. ³¹ Perw zjanyoj
da' quinga cont šejle'le' Jesúsen' naque' Cristo ben'
gwlej Diosen' cont nabi'e na' naque' Xi'in Dios, na' cont
gata' yela' mban toli' tocaņe chele da' chejnilaže'lene'.

Jesúsen' blo'elagüe' gaže beņe' ca' zjanaque' le' txen

21 Gwdechle yeto ža yoble Jesúsen' bozlo'elagüe'
beņe' ca' zjanaque' le' txen cho'a nisdao' da' nzi'
Nisdao' Tiberias. Quinga goc: ² Txen nite' Simón Pe-
dron' len Tomásen' ben' bososi'e Tomás Cuaš, na'
Natanael beņe' yež Caná gan' mbane Galilean', na'
chope xi'in Zebedeo na' yečhope beņe' ca' zjanaque'
Jesúsen' txen. ³ Na' Simón Pedron' gože' legaque':
—Ša'a gwxen beļ da' yoble.
Na' gose'e le':
—Lecze sa' neto'.
Nach gosa'aque' ja'aque' cho'a nisdaon' na' goso'e to
lo' barcw. Na' nocze no beļ beseželde' že'na'. ⁴ Na' do
ba zoa šeni' besele'ede' zecha Jesúsen' cho'a nisdaon',
perw bi gosacbe'ede' še Jesús nan'. ⁵ Nach Jesúsen'
gože' legaque':
—Beņe' migw chia' ¿nono beļ chdoļe'le?
Na' gose'ene':
—Nono chdoļe'to'.
⁶ Nach gože' legaque':
—Le gwzala' yixjw beļ chelen' cuit barcon' lichale na'
senlba'.

Nach bosozala' yixjw beļ čhegaquen', na' tantw be
zan besedoļa', bi gosezoede' yosyocuen' lo' barcon'.
⁷ Nach ben' chaquechgüe' Jesúsen' le', gože' Pedron':
—Xancho nan'.
Na' cate' gože' Simón Pedron' Xancho nan', la' bey-
acwte Pedroa' xalanen', le gague bi nyaze' cha'len'
chone' žinņa', na' la' bxite'te' lo' nisen' cont byob
bežine' gan' zoa Jesúsen'. ⁸ Na' yezica'chle beņe' ca'
zja'aclene' barcw daon' zjanxobe' yixjw gan' že' beļ ya'a
ca'. Bi naquen zito' cho'a nisdaon', ca do yeto gayoa
metrze. ⁹ Na' cate' besyēžine' cho'a nisdaon' bese-

le'ede' chi' yi' ya'alj na' xoa beḷ ya'a lagüenna' na' len yetextil. ¹⁰ Na' Jesúsen' gože' ḷegaque':

—ḷe yeyoxe' ngale to čhope beḷ ya'a ca' za' gwxenḷe.

¹¹ Na' Simón Pedron' gwyeye' jaxi'e yixjw beḷen' gan' chi' barcon' na' bexoben' ga nac yo biž. Žen' to gayoa ši'inyon beḷ xen, perw bi bcheza' yixjon' ḷa'czḷa' be zan gwže' ḷo'enna'. ¹² Na' Jesúsen' gože' ḷegaque':

—ḷe da gagwle xsil.

Na' ne toe' bi besyeyaxjde' ye'ene': "¿No le'?", ḷe ba gosacbe'ede' naque' Xanchon'. ¹³ Jesúsen' gwbigue' na' gwxi'e yetextilen' na' bnežjue' čhe to toe' na' ḷecz ca' bene' len beḷ ya'an.

¹⁴ Da'na' goc da' gwyon ḷi'a blo'elao Jesúsen' beḷe' ca' zjanaque' ḷe' txeḅ gwde bebane' ladjo beḷe' guaten'.

Jesúsen' be'lene' Simón Pedron' diža'

¹⁵ Na' cate' besyedagüe', Jesúsen' gože' Simón Pedron':

—Simón xi'iḅ Jonás, ¿chaquechdo' neda' clel can' chesaque beḷe' quinga neda'?

Pedron' boži'en gože'ne':

—Xana', nezdó' chacda' le'.

Jesúsen' gože'ne':

—Bsed blo'e beḷe' ca' za' gwzolao chesejnilaže' neda', beḷe' ca' zjanac ca me' xila' čhia'.

¹⁶ Na' da' gwchop ḷi'a gože' ḷe':

—Simón xi'iḅ Jonás, ¿chacdo' neda'?

Na' da' yoble gwna Pedron':

—Xana', le' nezdó' chacda' le'.

Jesúsen' gože'ne':

—Bgüia gwḅa' beḷe' ca' chesejnilaže' neda', beḷe' ca' zjanac ca xila' čhia'.

¹⁷ Da' gwyon ḷi'a gož Jesúsen' ḷe':

—Simón xi'iḅ Jonás, ¿chacdo' neda'?

Na' Pedron' gocyas'e'de' dan' gož Jesúsen' ḷe' ca' da' gwyon ḷi'a, na' gože' ḷe':

—Xana', le' neze ḷe'edo' yogo'ḷoḷ. Nezdó' chacda' le'.

Jesúsen' gože' ḷe':

—Bsed blo'e beḷe' ca' chesejnilaže' neda', beḷe' ca' zjanac ca xila' čhia'. ¹⁸ Da' ḷi chnia' le', cate' goco' beḷe' güego', cuino' gwyaz xaḷanon' na' gwyejo' con ga žan čhio'. Perw cate' gaco' beḷe' gole, gwḷi naon' na' beḷe' yoble čhize' xaḷano' na' yeče'e le' ga bi chaclažo'.

¹⁹ Gože'ne' ca' cont gwnežde' can' gacxen Diozen' len da' gac čhe' cate' žin ža gate'. Na' gwde gwna Jesúsen' can' gac čhe Pedron' nach gože'ne':

—Con gwyejnilaže' neda' na' bzenag čhia'.

Can' gwna Jesúsen' čhe ben' chacchgüede'

²⁰ Na' yeto beḷe' naque' Jesúsen' txeḅ na'ogüe' ḷegaque'. Na' beyečj Pedron' na' ble'ede' ḷe' na' gože' Jesúsen':

—Xana', ¿nac gac čhe benga?

Jesúsen' gože'ne':

—Še chaclaža' ne' zoacze' cate' yida' yeto ¿bin' chacžejlažo'? Con gwzoateze gwyejnilaže' neda' na' bzenag čhia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txeḅ cate' gosagüe' xše' žen' cate' za' gac Jesúsen' ḷo na' beḷe' ca' chesegue'ede' ḷe'. Na' cana' bena' gwḅabde'ne': "Xana', ¿noxen' gwdie' le' ḷo na' beḷe' ca'?"

²³ Na' dan' gož Jesúsen' Pedron': "Še chaclaža' ne' zoacze' cate' yida' yeto ¿bin' chacžejlažo'?", da'nan' gwdiť diža' len beḷe' ca' chsejnilaže' Criston' gosene' bi gat beḅa'. Perw Jesúsen' gague gože'ne' bi gate', san gože'ne': "Še chaclaža' ne' zoacz benga cate' yida' yeto, ¿bin' chacžejlažo'?"

²⁴ Nedan' nezdá' can' goc yogo' da' quinga na' da'nan' ba bia' diža' čhegaquen na' ba bzojan'. Na' ḷecze le'e nezczele choa' diža' ḷi.

²⁵ Na' da' zanch da' ben Jesúsen' da' bi zjanyojen, ḷe ša zjanyoj yogon' tgüje tgüjejen, libr zan juisyw yesaquen še ca'.

Da' na'ze chzoja' ḅa'a.

Hechos

Jesúsen' gwne' sele' Spiritw che Diosen'

1 Teófilo, ca nac dan' bzoja' da' nechw, bzoja' yogo'lo' da' ben Jesúsen', na' lecze bzoja' yogo' dan' bsd blo'ede' cate' gwzolaote' bsd blo'ede' ² žinten cate' beyepe' yaba. Šlac bsd blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. ³ Nach gwde gosot beņe' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont goseņezde' mbanczen'. Na' gwdalene' legaque' čhoa ža na' bzejni'ide' legaque' can' chnabia' Diosen'.

⁴ Na' šlac ňe' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e. ⁵ Da' zaque' ben Juan da' bzoe' beņe' nis, perw yeto čhope ža da' zaca'ch gac čhele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teze šlac ňe' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo' na' beņe' zito' ca'?

⁷ Jesúsen' gože' legaque':

—Bitw naquen ňezele bi ža bi hor gon Xacho Diosen' da' ca' toze' ba bžie' bia' gone'. ⁸ Perw na' cate' yedesoa Spiritw che'na' len le'e, gaclenen le'e len yela' guac čhenŋa' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

⁹ Beyož gwna Jesúsen' ca', cheseņa'te beņe' ca' chesejnilaže' le', beyepe' yaba to lo' bejw na' bich besele'ede' le'. ¹⁰ Na' ňe' cheseņa'te beņe' ca' le'e yaban' gan' besele'ede' beyepe', cate'cze gosacbe'ede' ba zjazeča čhope angl len legaque' beņe' zjanyaz lache' šiš. ¹¹ Na' beņe' ca' čhope gose'e legaque':

—Beņe' Galilea, žbixčen' čhna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gała'ze con ca'te' de lsens yesa'aque' ža che Dios can' ža ley che beņe' Israel ca'. ¹³ Na' cate' besyežine' Jerusalénna' postlw ca' šnej

na' beņe' ca' zjanžague' gosegüe' gan' nite'na' lo' cuart zoa yichjen'. Postlw ca' šnej beņe' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'iq Alfeo, na' Simón ben'chon txen partid dan' nzi' cananista, na' Judas ben' nac beņe' biše' Jacobon'.

¹⁴ Na' gosenita'teze postlw ca' šnej choso' güiže' Diosen' txen len beņe' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa galje beņe' chesejnilaže' Jesucriston' cont be'lene' legaque' dižan', na' gože' legaque':

¹⁶ —Beņe' migw, Spiritw che Diosen' benen cont rey David bzoje' na' be'e diža' che Judasen' ben' gwče' beņe' ca' gosezen Jesúsen' gan' jasešague' le'. Na' benen byen goc can' nyoj Xtiža' Diosen'. ¹⁷ Judasen' goque' txen len neto' na' bene' txen len neto' yogo'lo' dan' gwo'o lo' na'to' bento'. ¹⁸ Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo' na' beņe' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj. ¹⁹ Yogo' beņe' že' Jerusalénna' goseņezde' can' goc čhen' na' da'nan' bososi'e yežlion' Acéldama na' xtiža'gaque'na' zejen Yežlio Chen. ²⁰ Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te beņe' yoble yołane' žin dan' bene'.

²¹ Na' nga nita' beņe' ba gosone' txen len chio' šlac gwdalen Xancho Jesúsen' chio'. ²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyała' cuejcho toe' gone' txen len neto' postlw güe'to' diža' can' beban Xancho Jesúsen' ladjo beņe' quat ca'.

²³ Na' gosebeje' čhope beņe', toe' José ben' le Barsabás, na' lecz le' Justo, na' ben' yeto Matías.

²⁴ Nach bosol güiže' Diosen' gose'ene':

—Xanto', le' nombi'o yichjlaždao' yogo'lo' beņe'. Lao beņe' ca' čhope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca nac Judasen', gwlejiyichje' dan' ngo'o lo' ne'e gone' na' ba zjayde' gan' naquen yeyeje' yela' güen da' mal che'na'.

²⁶ Nach gosone' rifa cont goseņezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

Can' goc cate' bla' Spiritw he Diosen'

2 Na' bžin a lni dan' e' Pentecostés, na' postlw ca' na' yogo'loj bee' ca' ba gosejnilae' Jesúcriston' zjandop zjanague' toze latje. 2 Na' zejzenez goc to sšag le'e yaban' ca' sšag he to be' bdono' gual na' nenxeje lo' yo'o gan' zjachi'ena'. 3 Na' besele'ede' gaa'ze yihj to toe' gosezoa tgüejje yi' bej da' ala'ni. 4 Ca' goc jašo'o Spiritw he Diosen' lo' yihjadao' to toe', na' Spiriton' benen cont gosezologüe' goso'e gwde gwdele dia' da' gosejni'i bee' zito' ca'.

5 Na' ca' tiempen' bee' zan bee' Israel e' Jerusalénna' bee' chesonxene' Diosen', za'aque' doxen yežlion'. 6 Na' cate' gosende' chac sšaguen' gan' e' postlw ca', zan bee' Israel ca' beseague', na' leca besyebande', le to to postlw ca' bosozejni'ide' legaque' len dia' da' chesejni'i to toe'. 7 Bi gosejni'ide' bin' chac na' besyebande' gosene':

—Gague bee' distritw Galilea bee' quinga?

8 Nacxehen' to tocho chenecho cheso'e dia' can' chesoe' bee' guala hecho dia'? 9 Bacho naccho bee' nación Partia, na' bacho bee' nación Media, na' bacho bee' nación Elam, na' bacho bee' distritw Mesopotamia. Na' yebacho bee' distritw Judea, na' yebacho bee' distritw Capadocia, yebacho bee' distritw Ponto, na' yebacho bee' distritw Asia, 10 yebacho bee' distritw Frigia na' bee' distritw Panfilia, na' yebacho za'cho nación Egipto, na' yebacho za'cho ye ca' zjachi' Africa do te ciuda Cirene. Na' chio' naccho cuent len bee' nación Roma, bacho goljcho naccho bee' Israel na' yebacho ben cuincho txen len bee' Israel. 11 Na' bacho naccho bee' ye ca' zjachi' Creta na' bee' distritw Arabia. Na' gate'tez bee' naccho, yogo'cho chenecho chesoe' bee' distritw Galilea quinga xtia'chon' da' chaccho, cheso'e dia' he da' zan da' ba ben Diosen' da' zaca' yebanecho.

12 Na' yogo' bee' ca' besedobe' chosozenague' besyebande' na' gosacejlae' bin' chac, na' zane' gosene':

—Bi zejen dan' chaquen'?

13 Na' yebae' gosene'ye'e gosene':

—iBee' quinga chesezode'!

Dia' dan' be' Pedroa' len bee' Israel ca' beseag

14 Na' Pedroa' gwzeche' lao ben' zjandop zjanague' txen len postlw ca' yešnej na' be'e dia' zije gwne':

—Le'e bee' Judea na' note'tezechle zoale ciuda Jerusalén ni, che'nda' gwzenagle hia' na' gonle xbab he da' za' ni'a le'e. 15 Bene' ljea' quinga bitw chesezode' can' chaquele, le e' nac tempran. 16 Ba chac can' bzoj da' Joel ben' be' xtia' Diosen' cani' bzoje' dan' gwna Diosen', an:

17 Cate' ba zoa in a cont yeyo yežlion', neda' Dios gona' cont Spiritw hian' yedesoan len bee' e' doxen yežlion'.

Na' gona' cont xi'ile ca' yeso'e xtia'na',

na' bee' byo xcuide' ca' yesele'edagüede' bi da' gona',

na' güe'lena' bee' byo gol ca' dia' lo bišgal hegaquen'.

18 Na' yogo' bee' ca' chesejnilae' neda', bee' byo na' no'ole,

yedesoa Spiritw hian' len legaque' cont yeso'e xtian'.

19 Gona' cont yesele'e beahen' da' zaca' yesyebande' le'e yaban' na' lagüe yežlion',

na' gona' yela' guac hia'na' len chen, len yi' na' len en da' nac ca' bejw.

20 Bich gwsei' gwbižen', na' bio'na' yeyaquen xa ca' chen

cate' za' in a yida' da' yoble gwnejua' castigw he yogo' bee' cbi chesejnilae'nda', neda' naca' Xanle.

ana' gaquen to a ialao xen.

21 Nach note'tez bee' yesene'abe' gaclena' legaque', neda' naca' Xanle yebeja' legaque' lo da' malen'.

Can' gwna Diosen'.

22 'Na' le'e bee' Israel guala hia', le gwzenag hia'.

Jesúsen' ben' nac bee' ye Nazaret, Diosen' blo'ede' naque' bee' zaque'. Diosen' bene' cont Jesúsen' bene'

yela' guac na' bichle da' zaca' yebanecho can' ezecze-len'.

23 Lo yela' eze he Diosen' bin' za' gac, bi'e latje gwzenle Jesúsen' na' bdelene' lo na' bee' mal ca' gosote'ne' bosode'ene' le'e yag cruzen'.

24 Perw na' Diosen' behis bosbane'ne' ladjo bee' guat ca', le bi gwzoe yela' goten' nabian' le'.

25 Quinga bzoj da' rey David xtia' Jesúsen' cani'te, an:

Nezda' Xana' Diosen' zoe' len neda' do a do yel,

na' zoe' chaclene' neda' cont bi eba'.

26 Da'na'na' zoa' mbalaz na' choa' dia' leca chebeda'.

Na' lecze chebeda' ezda' yehis yosbane' neda' ladjo bee' guat ca' cate' ba gota'.

27 Dios hia', ezda' bi yocua'ao' neda' gan' e' bee' guat ca',

eca go'o latje goo' cuerp hia'na', neda' naca' xi'io' na' nac lada'oguan' xilae'.

28 Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyo gwna Pedroa' ca' nach goe' legaque':

29 —Bee' Israel, ezecho da' xoxta'ocho rey David gote' na' bosocuaše' le'. Na' nombia'cho ba gan' bosocuaše' le'.

30 Na' da' rey Davin' be'e dia' can' bzejni'i Diosen' le' na' gwnede' gwlo'o Diosen' da' bai gague da' te bi gac can' gwne'.

Gwnede' gon Diosen' cont Criston' galje' lo diaa he' na' nabi'e nación Israe-len' can' gwnabia' le'na'.

31 Diosen' bene' cont da' rey Davin' gwnede' can' gaquen' na' da'nan' be'e dia' he Criston' ben' ba gwsea' Diosen' cont nabi'e.

Gwne' Criston' yebane' na' bi yega'ane' gan' e' bee' guat ca' na' eca goo' cuerp he'na'.

32 Na' Diosen' behis bosbane' Jesúsen' ladjo bee' guat ca', na' yogo' neto' choe'to' dia' ezeto' beyas bebane'.

33 Na' Diosen' len yela' guac he'na' bene' cont beyep Jesúsen' gan' zoe'na' na' chnabi'e txen len le'.

Na' Diosen' bnejue'ne' Spiritw he'na' can' gwne'. Na' Jesúsen' ba bene' yela'

guac nga da' ba benele na' da' ba ble'ele. ³⁴ Gague da' rey Davin' beyep yaban', san da' David bzoje' che Jesúsen' gwne':

Ḳancho Diosen' gože' Ḳanan':

"Gwche'edo' cuita' nga ḡabia'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'."

³⁶ Da'n'an' yogo' chio' beḡe' Israel cheyaḷa' ḡezecho Jesúsen' ben' betwle bda'Ine' le'e yag cruz, Diosen' gwleje'ne' cont naque' Ḳancho' na' naque' Cristo, zeje diža' naque' ben' gwseḷa' Diosen' ḡabi'e naci3n che-chon'.

³⁷ Na' cate' beḡe' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Beḡe' gualaž, žbin' cheyaḷa' gonto'?

³⁸ Nach Pedroa' gože' legaque':

—To tole cheyaḷa' yetinjele xtoḷa'le ca' na' soale nis dan' ba chejnilaže'le Jesucriston', na' Diosen' yezi'xene' chele na' goḡe' le'e Spiritw che'na' soan lo' yichjlaž-da'olen'. ³⁹ Ḳancho Diosen' goḡe' note'tezle Spiritw che'na' can' ba gwne', le'e na' xi'inje ca' na' note'tez beḡe' zito', le chnežjuen' yogo' beḡe' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwḡneyoede' legaque' gwne':

—Le yechoj ladjo beḡe' mal quinga beḡe' cbi zjanom-bia' Dios.

⁴¹ Ca' goquen' beḡe' ca' gosejle'e diža' dan' be' Pedroa' gosezoe' nis. Na' lo žana' šon mil beḡe' gosejni-laže' Jesúsen' na' gosaque' txen len yezica'chle beḡe' chesejnilaže' le'. ⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle beḡe' gosejnilaže' Jesúsen' na' gose'ej gosagüe' txen na' gosenite' bosol güiže' Diosen' txen.

Can' goson beḡe' ca' gosejnilaže' Criston' da' nechw

⁴³ Na' yogo'ze beḡe' besyebande' can' goson postlw ca' da' zan da' güen da' zaca' yebanecho len yeḷa' guac che Diosen'. ⁴⁴ Na' beḡe' ba chesejnilaže' Jesúsen' gosaque' toze na' gosone' toze yogo'loḷ da' zjade che-gaque'. ⁴⁵ Na' gosote' yežlio na' bichle da' zjadede' na' mechw dan' besele'ede' chen goseyisen' lao yogo'loḷe' con da' beseyaže to toe'. ⁴⁶ Na' tža tža besedop be-sežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. ⁴⁷ Gosenita'teze' gosonxene' Diosen'. Na' gosazlaže' beḡe' yezica'chle can' gosone'na'. Na' tža tža Ḳancho Diosen' bene' cont gosanch beḡe' ca' gosejnilaže' Jesucriston'.

Beyac to beḡe' nxinj ḡi'e

3 Na' to ža Pedroa' na' Juan ja'aque' yodao' blaona' do cheda šoḡe, hor cate' beḡe' Israel ca' chosoḷ güiže' Diosen' yogo' ža. ² Na' gwzoa to beḡe' nxinj ḡi'e ca' goljte' na' yogo' ža gosebec beḡe' le' cho'a puert

che yodao'na', puert dan' nzi' Puert Xdan, cont gwḡnabe' mechw lao beḡe' ca' chja'ac yodao'na'. ³ Nach cate' bžin Pedroa' len Juan yodao'na' na' ben' nxinj ḡi'ena' boḷ güiže' legaque' yosonežjue'ne' mechw.

⁴ Nach Pedroa' len Juanna' gosebeze' na' goseḡa'chgüe' le' na' Pedroa' gože'ne':

—Gwḡa' neto'.

⁵ Na' bena' bene' xbab yosonežjue'ne' mechw. ⁶ Perw Pedroa' gože'ne':

—Bibi mechw chia' de da' goḡa' le', perw zoa to da' gona' gaclena' le': len yeḷa' guac che Jesucriston' beḡe' naque' beḡe' yež Nazaret, chona' mandadw gwzoža' na' gwda.

⁷ Na' Pedroa' beḡoe' ne'e liča na' bsože'ene', na' gocte gwzeche' na' ḡi'ena' la' besyeyacten da' gual na' lecz ca' bečhj ḡi'e ca'. ⁸ Na' cate' gocbe'ede' ba besyey-ac ḡi'en', bxite' yeḷa' chbe che'. Na' gwyo'e chašil che yodao'na' len legaque' chxite' na' cho'e yeḷa' choxclen che Diosen'. ⁹ Na' beḡe' ca' že' chašilen' besele'ede' can' chde' chxite' cho'e yeḷa' choxclen che Diosen'.

¹⁰ Na' besyeyombi'e le' naque' ben' chbe' chḡab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ḡi'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salom3n dan' ze gan' zoa' yodao'na'. Na' ben' beyac ḡi'ena' bi bsane' Pedroa' len Juanna'. Nach yogo' beḡe' že' yodaon' besežagsese' chašila' cont jasene'e ben' beyaquen', le besyebanchgüede'. ¹² Na' cate' Pedroa' ble'ede' ba zjanžag beḡe' zan gan' nite'na' nach be'lene' legaque' diža', gože' legaque':

—Le'e beḡe' gualaž chia' beḡe' Israel, žbixchen' chebanele? žChaquele len yeḷa' guac cheton' bento' cont beyac bengaz? žŠe chaquele beyaque' dan' chonchguato' can' chazlaže' Diosen'? Bi naquen ca'.

¹³ Dios ben' gosonxen da' xozxta'ocho Abraham, Isaac na' Jacob, blo'e nac Xi'inje' Jesúsen' beḡe' zaca' juisyw. Perw le'e bdele Jesúsen' lo' na' justis ca' cont gosote'ne' na' bžonle cate' Pilaton' goclaže' gwsane'ne'. ¹⁴ Can' benle len Jesúsen' la'czla' naque' beḡe' laždao' xilaže' juisyw na' naque' la'zelagüe beḡe' chon da' güen. Nach gwḡnable bosan Pilaton' to beḡe' güetw beḡe' na' bi gwḡnable yosane' Jesúsen'. ¹⁵ Na' ca' nac Jesúsen' ben' bxe yeḷa' mban toḷi tocaḡe, le'na' betwle, perw na' Diosen' bečhis bosbane' le' ladjo beḡe' guat ca'. Neto' ble'eto'ne' na' choe'to' diža' ba bebane' ladjo beḡe' guat ca'. ¹⁶ Na' chle'ele bengaz cbi goc se'e na' nom-bia'Ine', na' ḡa'a ba beyac ḡi'ena' len yeḷa' guac che Jesúsen' ben' chejnilaže'to'. Le da' chejnilaže'to' Jesúsen', da'n'an' besyeyacšagüe' ḡi'a bengaz na' ba chle'ele can' beyaquen'.

¹⁷ Beḡe' migw, ḡezda' le'e na' beḡe' gole blao chele ca' betwle Jesúsen' lagüe bi gwyejni'ile Diosen' gwsele'ne'. ¹⁸ Na' da' benle ca', goc can' gwna Diosen' gac, da' bene' mandadw bosozoj da' beḡe' ca' goso'e xtižen' cani', bosozoje' che Criston' ben' gwlej Diosen' cont ḡabi'e. Bosozoje' che' gosene' yosoči yososaca'

beṇe' le'. ¹⁹ Da'nan' le yeyonšca xbab čhele na' le yetinje xtoł'a'len' cont Xancho Diosen' gwnitlagüen' na' gone' ga soale mbalaz. ²⁰ Nach Xancho Diosen' sele' Jesúsén' yežlio nga yetn'a, ben' gwleje' cani'te cont naque' Cristo čhecho. ²¹ Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena beṇe' gwleje' cani' cont goso'e xtižen'. ²² Da' Moisésén' be'lene' da' xozxta'ocho diža', gože' le-gaque': "Xancho Diosen' sele' yeto beṇe' gualaž čhechon' cont güe'lene' le'e xtiže'na' can' gwsele' neda'. Čhe bena' gwzenagle bite'tez ne'. ²³ Na' Diosen' gone' yesebiayi' yogó' beṇe' ca' cbi yosozenague' čhe bena' selen', na' bich yesenite' txen len beṇe' ca' chesonxene' le'." Can' gož Moisésén' da' xozxta'ocho ca'.

²⁴ "Lezac ca' yogó'loł beṇe' goso'e xtiža' Diosen' cani', gwzoloazen len da' Samuel na' yogó' beṇe' ca' gosedeč, goso'e diža' čhe da' ca' ba chac tiemp na'a. ²⁵ Le'e nacle xi'in diaža čhe da' beṇe' ca', na' dan' gož Diosen' legaque' gone', na' dan' gože' yezica'chle xozxta'ole ca', lecz naquen čhe le'e. Gože' da' Abrahamna': "To beṇe' galje lo diaža čhio' gone' cont beṇe' že' doxen yežlion' nite' mbalaz." ²⁶ Da'nan' cate' Diosen' bosbane' Xi'in'e' Criston' ladjo beṇe' guat ca', zgua'tec gwsele'ne' lao chio' beṇe' Israel da' goclaže' gaclene' chio' cont to tocho yetinjecho xtoł'a'chon'.

Pedroa' na' Juanna' nite' lao beṇe' gwnabia' ca'

4 Ne' chesoe'lente Pedroa' na' Juanna' beṇe' ca' diža' cate' besežin bał bχoz čhe beṇe' Israel ca', na' beṇe' gwnabia' čhe ben' chesape' yodao' blao čhe-gaque'na' na' beṇe' saduceo ca' beṇe' cbi chesejle'e še yesyeban beṇe' guat ca'. ² Beṇe' ca' cheseže'e čhe dan' chososed chosolo'e Pedroa' len Juanna', le chesene' nezecho gwžin ža cate' yesyeban beṇe' guat ca' da' beban Jesúsén'. ³ Na' beṇe' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi goł'a' yesone' yeł'a' justis čhegaquen' ca' cheyał'a' že'na', san bosocuezen' beteyoch. ⁴ Na' ca' nac beṇe' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len beṇe' ca' ba gosejnilaže'ne' cana', gosac do gayo' mil beṇe' byo cbi cuent no'ole.

⁵ Na' beteyo beṇe' gwnabia' čhe beṇe' Israel ca', beṇe' gole blao ca' na' beṇe' bososed bosolo'e ley dan' bzoj da' Moisés, besedop besežague' ciuda Jerusalénna' ⁶ len Anás ben' naquech bχoz blao, na' len Caifás, na' Juan, na' Alejandro na' nochle beṇe' zjanaque' biše' ljež ben' naquech bχoz blaon'. ⁷ Na' gosone' mandadw jasexi'e Pedroa' na' Juanna' na' cate' ba zjzie' laogaquen' gosenabde' legaque':

—ŽNo beṇe' lsens čhele cont beyonle beṇe' nxinjen? o žno yeł'a' guac čhe bčhinle beyonlene'?

⁸ Na' Spiritw čhe Diosen' dan' yo'o lo' yičhjał'dao' Pedroa' benen cont gože' beṇe' ca':

—Le'e beṇe' gwnabia' na' beṇe' gole beṇe' blao čhe nación Israel čhechon', ⁹ chñable nac bento' da' güen beyonto' bena' nxinj n'ena'. ¹⁰ Le'e na' yogó' beṇe'

gualaž cheyał'a' nezele Jesucriston' ben' naque' beṇe' Nazaret bene' yeł'a' guac čhe' cont beyacšagüe' benga. Le'e betwle Jesucriston' bda'Ine' to le'e yag cruz, perw Diosen' bečhis bosbane'ne' ladjo beṇe' guat ca'. ¹¹ Bi gwyejle'le čhe Jesucriston', da'nan' zaca'leble ca' beṇe' cheson yo'o beṇe' bi chesazlaže' yej güen da' ba naquen yej squin čhe yo'ona'. ¹² Toze Jesucriston' guac goṇe' chio' yeł'a' mban tołi tocaṇe, na' noch no zoa doxen lo yežlion' beṇe' gac goṇe' yeł'a' mban tołi tocaṇe čhe chio' beṇačh.

¹³ Besyebane beṇe' gwnabian' can' boži'i Pedroa' na' Juanna' xtiža'gaquen' sin cbi besežebe', le nacbia' zjanaque' beṇe' yix'e na' bi zjansedteque'. Nach gosacbe'ede' legaquen' ba gosodalene' Jesúsén'. ¹⁴ Na' dan' zecha ben' beyaque n'ena' txen len Pedroa' na' Juanna', bi besyežele beṇe' gwnabian' bi yeseṇe' čhe-gaque'. ¹⁵ Nach beṇe' gwnabian' besyebeje' postlw ca' chy'ole šlac bosoxi'e legacze' nacle yesone'. ¹⁶ Na' beṇe' gwnabian' gose' lježgaque':

—ŽBi goncho len beṇe' quinga? Yogó' beṇe' že' ciuda Jerusalén ni zjaṇezde' gosone' to yeł'a' guac xen na' bi gac ye'cho beṇe' bi gosone' yeł'a' gvaquen'. ¹⁷ Lete-choze goncho cont cbi gaslas diža' dan' cheso'ena'. Da'nan' cheyał'a' ye'cho legaque' gata' castigw čhe-gaque' še yesoe'che' xtiža' Jesúsén'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' čhe Jesúsén' na' noch no yososed yosolo'ede'. ¹⁹ Nach Pedroa' na' Juanna' bosyoži'e xtižen' gose'e legaque':

—Le gon xbab čhe da' n'ga, žchaquele chaclaže' Diosen' gwzenagto' čhele o še chaclaže' gwzenagto' čhe le? ²⁰ Bi gac cuzto' bich güe'to' diža' čhe da' ba ble'eto' na' ba beneto'.

²¹ Na' da' zan da' gose' beṇe' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le beṇe' zan chesonxene' Diosen' dan' beyac bena' len yeł'a' guac čhe Diosen'. Ba gwdie' čhoa iz na' ca' goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan beṇe' gwnabian' legaque' jaya'aque' gan' nita' yezica'chle beṇe' chesejnilaže' Criston' na' gosoe'lene' legaque' diža' yogó'loł can' gose' bχoz gwnabia' ca' na' beṇe' gole blao ca' legaque'. ²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' beno' yaban' na' yežlion' na' nisdaon'. Len' beno' beṇačh na' be ca' chesaš na' bica'chle da' zjade, na' len' chnabi'o doxen. ²⁵ Na' le' beno' cont da' rey David bzoje' diža' quinga dan' gož Spiritw chion' le', žan:

Beṇe' ca' cbi zjanaque' beṇe' Israel chesase' contr le', Xanto' Dios, perw bicze gac can' chesone' xbabén'.

²⁶ Beṇe' gwnabia' čhe nación ca' na' čhe yež ca'

txen zjanaque' chesone' contr le' Xanto' Dios, na' contr Xi'ino' Criston' ben' gwse'lo' cont nabi'e.
²⁷ Na' Xanto' Dios, naquen da' li rey Herodes na' Pontio Pilato na' be'ne' cbi zjanaque' be'ne' Israel gosaque' txen len be'ne' Israel ca' lo ciuda nga. Na' yogüe' gosone' txen cont gosote' Xi'ino' Jesúsen' ben' nac be'ne' laždao' xilaže' juisyw, ben' gwlejo' cont nabi'e.
²⁸ Gosone' can' gwčhogbi'o gac dan' bžio' bia' cani'te.
²⁹ Na' na'a Xanto', gwna can' cheson be'ne' gwnabia' ca', le chesaclaže' yosošebe' neto' be'ne' güen žin čio'. Na' goclen neto' cont bi žebto' güe'to' xtižo'na'.
³⁰ Na' cate' güe'to' xtižo'na' blo'ešca ye'la' guac che Xi'ino' Jesúsen' be'ne' laždao' xilaže' juisyon' cont gac ye'la' guac, na' yesyeyac no be'ne' chesacšene na' gac bichle da' yesyebane be'ne'.
³¹ Na' cate' beyož bosol' güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach goso'e xtiža' Diosen' sin cbi besežebe'.

Gosone' dan' zjade čhegaque' toze

³² Na' yogo' be'ne' ca' gosejnilaže' Criston' toz ca gosac yičhjažda'ogaque'. Na' yogo' bi da' zjade čhegaque' gosonen' toze, na' nono gwna: "Čhia' da' nga", o "Čhia' da' na'", le naquen che yogo'lo' gaque'.
³³ Na' postlw ca' len ye'la' guac xen che Diosen' bosozejni'ide' be'ne' Jesúsen' bebane' ladjo be'ne' guat ca'. Na' Diosen' goclenchgüe' legaque' len bi dan' gosone'.
³⁴ Na' bibi goc falt bi da' beseyažje be'ne' gosejnilaže' Criston', le be'ne' zjanape' no yežlio o no yo'o gosoten'. Na' mechw dan' besele'ede' che to ton ³⁵ bosonežjuen' postlw ca', na' postlw ca' goseyisen' len be'ne' beseyažden'.
³⁶ Can' ben to be'ne' Chipre be'ne' le José. Naque' xi'ino' diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' be'ne'.
³⁷ José na' bete' to yežlio che' na' mechw dan' ble'ede' čhen bnežjuen' postlw ca'.

Da' mal dan' goson Ananías na' Safira

5 Na' zoa to be'ne' le Ananías na' no'ol che'na' Safira, na' gosote' to yežlio čhegaquen'.
² Perw na' le-gacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwyey Ananíasen' na' bnežjue' postlw ca' mechon'.
³ Nach Pedroa' gože'ne':
 —Ananías, žbixčhen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Čhi'o neto' cho'no' doxen mechon' dan' ble'edo' che yežlion', len ba gwlo'ošagüe'le laten' par cuin'le.
⁴ Čhio' yežlion' cate' bina' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. žBixčhen' benle da' malen' nac ca'? Gague contr neton' ba benle benlaže'le, san contr Diosen'.
⁵ Nach Ananíasen' cate' bende' xtiža' Pedroa' to gw-bixze' na' gote'. Na' yogo' be'ne' ca' gosende' diža' can' goquen' besežebchgüe'.
⁶ Na' besežin to čhope be'ne'

xcuide' gan' gwbič da' Ananíasen' na' bosyočhele' cuerp čhen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwyo'e lo' yo'on sin cbi nežde' bin' ba goc che be'ne' čhen'.
⁸ Na' Pedroa' gože'ne':

—žTo ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—žBixčhen' goco' toze len be'ne' čhion' chaquele gonle Diosen' prueba še lede' can' že' bi cheya'la' xoayagcho? Cho'a puert nga zjazecha be'ne' ba bosocuaše' be'ne' čhio'na' na' na'a yeso'e le'.

¹⁰ Na' la' gwbičte Safiran' lao Pedroa' na' gote'. Na' cate' goso'o be'ne' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' be'ne' che'na'.
¹¹ Na' yogo' be'ne' chesejnilaže' Criston' besežebe' can' goquen' na' lecze besežeb yezica'chle be'ne' gosende' diža' can' goquen'.

Gosone' da' zan ye'la' guac

¹² Na' postlw ca' gosone' da' zan ye'la' guac na' bichle da' besele'e be'ne' da' zaca' yesyebande'. Na' be'ne' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Čašil che da' Salomón.
¹³ Na' yezica'chle be'ne' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'.
¹⁴ Perw na' zane' gosejnilaže' Xancho' na' gosaque' txen, zan be'ne' byo na' no'ole.
¹⁵ Na' cate' no be'ne' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'.
¹⁶ Na' be'ne' ca' že' yež da' zjachi' ga'la'ze ciuda Jerusalénna' ja'aque' zjanče'e be'ne' chesacšene na' be'ne' zjajo'o zjanyaz da' xigüe'. Na' yogo'lo'le' besyeyacde'.

Be'ne' saduceo ca' goseyixjue' Pedroa' len Juanna' ližya

¹⁷ Nach ben' nacch bxož blao na' yezica'chle be'ne' saduceo be'ne' cbi chesejle' yesyeban be'ne' guat, beseque'ede' postlw ca'.
¹⁸ Na' gosezene'ne' na' goseyixjue' legaque' ližya.
¹⁹ Na' to angl be'ne' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

²⁰ —Le šja'ac yodao' blaona' na' le güe' diža' len ben' chesežagna' naquen' yesone' cont gata' ye'la' mban čhegaque' toli toca'ne.

²¹ Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bxož blao len be'ne' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'.
²² Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao be'ne' gwnabia' ca' jasyedixjue'ede'.
²³ Gose'e be'ne' ca':

—Nyeyjwčhač ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

²⁴ Na' ben' nacch bχoz blao na' beņe' gwnabia' čhe ben' chesap yodaon' na' bχoz gole blao ca' cate' gosende' rsonna' besyebande', gosene':

—¿Nac gac da' nga ŋa'a?

²⁵ Na' šlac chesacžejlaže', bžin to beņe' gože' le-gaque':

—Beņe' ca' gwđixjwle ližyan' zjaze' chašil čhe yodao' blaona' chososed chosolo'ede' beņe'.

²⁶ Nach beņe' gwnabia' čhe ben' chesap yodaon' len beņe' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' beņe' chosozenag xtiža' postlw ca' še yosožie' legaque' yej.

²⁷ Na' cate' besežin postlw ca' lao beņe' gwnabia' ben' nita' chosoxi'a, nach ben' nacch bχoz blao gože' le-gaque':

²⁸ —Ba bento' mandadw bi güe'le diža' čhe Jesúsen' na' bich gwsed gwlo'ele beņe' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

²⁹ Nach Pedroa' na' postlw ca' gose'e legaque':

—Nacchen da' žialao xen gwzenagto' čhe Diosen' clel ca' čhe beņač. ³⁰ Le'e betwle Jesúsen' bda'Ine' to le'e yag cruz, perw Dios ben' chonxenko na' ben' gosonxen da' χozxta'ocho ca' bečhis bosbane'ne' ladjo beņe' guat ca'. ³¹ Na' ŋa'a Diosen' ba bnežjue'ne' yela' bala'aŋ xen na' yela' gwnabia' xen cont chnabi'e na' chnežjue' yela' mban toli tocane čhe beņe' chesejnilaže'ne'. Na' le'na' chazlaže' gaclene' yogo' chio' beņe' Israel yetinjecho xtoja'chon' nach yezi'xene' čhechon'. ³² Neto' ŋezeto' can' ben Diosen' len Jesúsen' na' choe'to' diža' čhen, na' lecze Spiritw čhe Diosen' choen' diža' čhe Jesúsen' lo' yichjlažda'oton', le Diosen' ba gwsele' Spiritw čhen' zoan lo' yichjlaždao' beņe' chosozenag čhe'.

³³ Na' beseža'achgua beņe' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. ³⁴ Perw gwzoa to beņe' fariseo len legaque' beņe' le Gamaliel. Chsed chlo'ede' beņe' ley dan' bzoj da' Moisésen' na' gosapchgua beņe' le' bala'aŋ. Na' Gamalielen' gwzeche' na' bene' mandadw yesechoj postlw ca' chy'ole šlac güe'lene' beņe' ca' že'na' diža'. ³⁵ Na' gože' beņe' ca' že'na':

—Beņe' gualaž, cheyała' goncho xbab nac goncho len beņe' quinga cont goncho da' nac güen. ³⁶ Le yosa'laže' can' goc cate' bchoj ben' le Teudas gwne' naque' beņe' zaque'. Na' do tap gayoa beņe' bosozenag čhe' na' gosaque' le' txen. Perw na' bžin ža gosot beņe' le' na' besyeyaslas ben' gosaque' le' txen, gague bi gocch yesone'. ³⁷ Na' gwdechle ca' tiempen' bosochele' bał beņe' že' to to yež, bchoj to beņe' distritw Galilea ben' le Judas na' beņe' zan gosaque'ne' txen. Na' lecze bžin ža gosote'ne' na' beņe' ca' gosaque' le' txen lecze besyeyaslaše'. ³⁸ Na' da'n'an' žia' le'e can' chacda' cheyała' goncho, jaseye beņe' quinga, bibi gonecho legaque'. Le še chososed chosolo'ede' xbab čhegacze', yeniten. ³⁹ Na' še dan' chososed choso-

lo'ede' naquen čhe Dios, bibi gac goncho cont cbi gaslasen. Cheyała' gwsaca'cho cont bi tillencho Diosen'.

⁴⁰ Na' gosazlaže' beņe' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' čhe Jesúsen' bate'tezechle. Nach bososane' legaque'.

⁴¹ Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' beņe' legaque' neče dan' chososed chosolo'ede' čhe Jesúsen'. ⁴² Na' yogo' ža bososed bosolo'ech postlw ca' čhe Jesucriston' do liž beņe' na' cate' chja'aque' yodao' blaona'.

Beņe' ca' chesejnilaže' Criston' gosebeje' gaže beņe' goson žin bixjw

6 Na' ca' tiempen' zej chanch beņe' ca' chesejnilaže' Jesucriston' na' beņe' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'. ² Nach postlw ca' šižinw bosyotobe' yezi-ca'chle beņe' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' beņe' xtiža' Diosen' cont čhisto' dan' yese'ej yesagw beņe'. ³ Da'n'an' beņe' migw, le cuej gaže beņe' lježle, beņe' zoachgua Spiritw čhe Diosen' len legaque', beņe' zjanac beņe' sina' na' beņe' cheson da' güen, na' le gon lo' na'gaque' yeseyise' dan' yese'ej yesagw beņe' ca'. ⁴ Na' neto' soateze soato' yoł güižto' Diosen' na' gwsed gwlo'eto' beņe' xtižen'.

⁵ Na' gosazlaže' yogo' beņe' ca' na' gosone' can' gose' postlw ca' legaque', na' gosebeje' to beņe' le Esteban beņe' chejnilaže'chgua Diosen' na' zoachgua Spiritw čhe Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás beņe' ciuda Antioquía ben' bene' txen len beņe' Israel. ⁶ Na' bosozoe' legaque' lao postlw ca' na' postlw ca' bosol güiže' Diosen' čhegaque' na' gosexoa na'gaquen' yichj beņe' ca' cont gosezi' lo' ne'e žin dan' yesonen'.

⁷ Na' beņe' zanch gosende' xtiža' Xancho Jesucriston', na' zan beņe' Jerusalénna' gosejnilaže'ne' na' lecze zan bχoz ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac čhe Diosen' len le' na' Diosen' goclenchgüe' le'. Da'n'an' bene' yela' guac na' bichle da' zaca' yesyebane beņe' lao beņe' ca' že' na'. ⁹ Na' zoa to yodao' dan' chesene' Yodao' čhe Beņe' ca' Bich Zjanaque' Esclavos. Beņe' ca' chesedop chesežag yodao'na' za'aque' ciuda Cirene na' ciuda Alejandria na' distritw Cilicia na' distritw Asia. Na' bał beņe' ca' gwzolao gosacyože' len Estebanna', ¹⁰ perw na' bi besyeželde' nac yosyoži'e xtižen', le Spiritw čhe Diosen' bnežjon le' yela' sina' na' bzejni'in le' bin' gwne'. ¹¹ Nach gosego'oyele' to čhop beņe' cont goso'e

diža' güenlaže' che', gosene' Estebanna' gwñeye'e che da' Moisésen' ben' bzoj ley che beñe' Israel ca'. Na' lecze gosene' Estebanna' gwñe' diža' ya' che Diosen'.¹² Na' beñe' ca' gosacyože' che Estebanna' bosota bosone' beñe' lo ciuda na' beñe' gole blao che beñe' Israel ca' na' beñe' ca' chososed chosolo'ede' ley dan' bzoj da' Moisésen' cont gosaque' toze. Na' ja'acsese' gan' zoa Estebanna' na' gosezene'ne' na' goseche'ene' gan' že' beñe' ca' chesenabia' nación Israelen'.¹³ Na' goseyiljue' beñe' gosoe' diža' güenlaže' beñe' gosene' che':

—Benga bicze šize zoe' chñe' diža' bya' che yodao' blao che Diosen' nga na' ley dan' bzoj da' Moisés.¹⁴ Ba beneto' že' Jesús ben' naque' beñe' yež Nazaret yočñije' yodao' blaona' na' yoše'e costumbr checho dan' ben da' Moisés mandadw na' ocho.

¹⁵ Na' yog'o' beñe' ca' zjachi' gan' chesone' yela' justisen' goseñe'e cho'alao Estebanna' na' besele'ede' chactiten ca cho'alao angl.

Choe' Estebanna' diža'

7 Nach ben' nacch bꝛoz blaona' gože' Estebanna':
—¿Naquen can' chesena beñe' quinga?

² Na' Estebanna' gože' legaque':

—Le'e beñe' gole na' note'teze beñe' gualaž, le gwzenag čhia' len to čhop da' ñia' le'e. Diosen' ben' nac la'zelagüe beñe' zaca' blo'elagüe' da' xozxta'ocho Abraham cate' gwzoe' distritw Mesopotamia cate' za' šjasoe' ciuda Harán.³ Na' Diosen' gože'ne': "Bchoj lažo' na' gwlejyichj beñe' biše' lježo' na' gwyej jaso' latje gan' gwlo'eda' le'."⁴ Beyož gož Diosen' Abrahanna' ca', nach Abrahanna' bchoje' gan' že' beñe' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

⁵ Diosen' bi bnežjue' da' Abrahanna' yežlio gaquen che', ñe late' da'ozen', san gwne' gaquen che xi'ñ diža' che' cate' ba gote', la'czla' nono xi'ñe' ña' soa cate' gož Diosen' le' ca'.⁶ Nach Diosen' gwne' šjasenite' laž beñe' zito' tap gayoa iz ga yesaque' esclavos na' yesežaglaochgüe'.⁷ Nach Diosen' lecze gože'ne': "Neda' gwnežjua' castigw che nación gan' yesone' xi'ñ diža' čhio' ca' esclavos na' gona' cont yesyechoje' naciónna' na' yeside' yesonxene' neda' nga."⁸ Nach Diosen' gože' Abrahanna' gone' güen len xi'ñ diaža che'na'. Na' bene' mandadw soa Abrahanna' to señw dan' že' circuncisión, le' na' len beñe' byo ca' zjanaque' diaža che', cont gacbia' le' chesejle'e che dan' gwna Diosen'. Da'na'na' cate' golje xi'ñe' Isaaquen' bzoe'be' señw to xmanzebe', na' lecze can' ben da' Isaaquen' cate' gol je xi'ñe' Jacob. Na' ca'cze ben da' Jacoben' len da' xi'ñe' ca' šižñw, beñe' ca' gosac šižñw diaža che beñe' Israel.

⁹ Na' xi'ñ da' Jacoben' ben' le José, beñe' biše' ca' gosacxi'ede' le' na' gosote'ne' gosezi' beñe' nación Egipto le'. Perw Diosen' gwzoe' len Josén'.¹⁰ Na' gocene'ne' len yog'o'lo' da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gobce'ede' naque' beñe' sina'. Na' da'nan'

faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

¹¹ Na' goc gwbin doxen Egipton' na' lecze can' goc gan' nzi' distritw Canaán na' da' xozxta'ocho ca' bi beseželde' da' yesagüe' na' besežaglaochgüe'.¹² Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw.¹³ Na' bechop ñi'a ja'aque' cate' ben Josén' ga besyeyombia' beñe' biše' ca' le', nach gwñeze faraónna' can' nac diža' che Josén'.¹⁴ Na' Josén' bene' mandadw šjasexi'e xagaque' Jacoben' na' yog'o'lo' biše' lježe' ca', zjanaque' ca do gayonšino' beñe'.¹⁵ Can' goc gwyej Jacoben' jasoe' Egipton' na' Egiptona' gote', na' lecz na' gosat xi'ñe' ca' beñe' ca' gosac xozxta'ocho.¹⁶ Na' gwdechle besyeyo'e žit benat čhegaquen' na' jasecuše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'ñ da' Hamor gwduxjue' mechw.

¹⁷ Na' cate' ba zoa žin tiemp gwnežjo Diosen' le-gaque' yežlio can' gože' Abrahanna', ba zej chan beñe' Israel ca' že' laž beñe' Egipto ca'.¹⁸ Na' ca' chac beža' rey che Egipton' na' rey coben' bi gwñezde' can' goclen Josén' nación čhen'.¹⁹ Na' rey nga gwdiłjwlaže' bi da' mal bene' len da' xozxta'ocho beñe' Israel ca' na' bene' mandadw šjasecho'oñ xi'ñgaque'na' cont yesatbe'.

²⁰ Na' ca' tiempen' golje da' Moisésen' na' bebe Diosen' lebe', na' xaxña'be' bososča'ogüe'be' šone bio'.

²¹ Perw na' bžin ža jasecho'oñšaze'be' na' xi'ñ faraónna' to no'ole beželde'be' na' beyo'ebe' liže' bosča'ogüe'be' ca' xi'ñe'.²² Ca' goquen' bsd da' Moisésen' tcho'a yela' sina' che beñe' Egipto ca' na' bene' da' zaca' na' be'e diža' da' zaca'.

²³ Na' čhoa ize da' Moisésen' cate' gwnan šjane'e beñe' Israel gualaž che' ca'.²⁴ Na' jale'ede' to beñe' Egipto chčhi chsaque' to beñe' Israelen'. Nach da' Moisésen' betue' beñe' Egipton', boži'e da' malen' bende' beñe' gualaž che'na'.²⁵ Bene' xbab gocde' yesacbe'e beñe' gualaž che' chaclen Diosen' le' cont yosle' legaque' lo na' beñe' Egipto ca', perw bi gosacbe'ede'.²⁶ Na' beteyo gosedił čhopze beñe' Israel. Na' bžin da' Moisésen' gocde' gone' cont yesenite' binlo, na' gože' legaque': "¿Bixčhen' chdiłlen lježle le'e nacle beñe' gualažze?"²⁷ Nach ben' nap doła'na' bžigue' da' Moisésen' ca'ale gože'ne': "¿No gwna le' gaco' beñe' gwnabia' cont gono' yela' justis čheto'na'?"²⁸ ¿Lez chaclažo' goto' neda' can' beto' beñe' Egipton' ñeje?"²⁹ Na' cate' bene' da' Moisésen' can' gož bena' le' nach bxonje' jasoe' nación gan' nzi' Madián la'czla' naque' beñe' zito' len beñe' ca'. Na' bšagne'e na' gwnita' čhope xi'ñe'.

³⁰ Na' goc čhoa iz zoe' na', cate' to angl beñe' gwseła' Dios blo'elagüe' le' latje dašen' gała'ze Ya'a Sinaí, yo'o anglen' to lo' yi' beł chdoljen to lo' yag xis yeše'.³¹ Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' choł güiž Xancho Diosen' le', che'ene':³² "Neda' naca' Dios ben' chonxen Abraham, ben' chonxen Isaac, na' ben'

chonxen Jacob." Nach da' Moisésen' gwixize' catec bžebe', gague cheyaxjde' ŋe'e. ³³ Na' gož Xanchon' le': "Gwlečhj xelo'na' cont gapo' neda' bala'an, le latje gan' zechao'na' naquen čhia'. ³⁴ Neda' ba ble'eda' yela' yaše' yela' zi' da' chde nación čhia' Israelen' beŋe' že' Egip-ton' na' ba benda' ca chesonyaše'. Da'na'na' gaclena' legaque'. Beda ŋa'a cont seļa' le' Egip-ton'."

³⁵ Diosen' gože'ne' ca' la'czļa' beŋe' Israel ca' cbi gozezi'e čhe', gose'e Moisésen': "¿No gwna le' gaco' beŋe' gwnabia' cont gono' yela' justis čheto'?" Diosen' gwseļe' da' Moisésen' cont gwnabi'e da' xozxta'ocho ca' na' cont bebeje' legaque' lo na' beŋe' Egip-ton' ca', na' angl čhe Diosen' ben' ble'e da' Moisésen' lo' yi' beļ gwzoe' goclene'ne'. ³⁶ Na' da' Moisésen' bebeje' legaque' Egip-ton' gan' bene' zan yela' guac na' bichle da' zaca' yebane beŋe', na' lecz ca' bene' cate' besežine' Nisdao' Xŋan' na' šlac gosenite' latje dašen' čhoa iz. ³⁷ Na' da' Moisésnan' gože' da' xozxta'ocho ca': "Xancho Diosen' seļe' yeto beŋe' gualaž čhecho' cont güe'lene' le'e xtiže'na' can' gwseļe' neda'. Čhe benan' gwzenagle." ³⁸ Da' Moisésen' gwzoe' len da' xozxta'ocho ca' latje dašen', na' lo Ya'a Sinaín' to angl beŋe' gwseļa' Diosen' gože' le' diža' da' zjansa' yela' mban, na' bzoje' dižan' par chio'.

³⁹ Perw na' da' xozxta'ocho ca' zan las bi bosozenague' čhe da' Moisésen', bosozoe'ne' to šļa'ale. Gosaclaže' šjaya'aque' Egip-ton'. ⁴⁰ Na' šlac zej da' Moisésen' lo Ya'a Sinaí, gose'e beŋe' biše' Aarónna': "Ben da' le'echo da' šejnilaže'cho na' da' cuialao laocho tnez. Le ca nac Moisésen' ben' bebej chio' Egip-ton', nono ŋeze bin' ba goc čhe'." ⁴¹ Nach gosone' to me' go'n dao' de oro na' gosote' no beyixe' gosonxene' me' daon', na' gosone' lŋi čhe bena' gosone' len ŋi'a na'gaque'. ⁴² Da'nana' Diosen' gwlejyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' beŋe' ca' gosote' xtiža' Diosen' cani', žan:

Le'e beŋe' Israel, gague nedan' benxenle caten' be-twle beyixe' latje dašen' lao čhoa iz.

⁴³ Benle no da' benxenle, na' bia'le yodao' da' chacte chedobe gan' benxenle dan' nzi' Moloc, na' bia'le beljon' benxenle dan' nzi' Renfán.

Na' dan' ba gwlejyichje' neda', da'nana' cueja' le'e gan' zoalen' na' seļa' le'e nación zito' do gan' nzi' Babilonia.

⁴⁴ Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley čhegaque'na'. Na' gosonen' con can' gož Diosen' da' Moisésen' na' con can' blo'ede' le'. ⁴⁵ Nach cate' da' Josué gwče'e legaque' gan' ben Diosen' cont goseque'e yežlio čhe beŋe' zito' ca', leczze gosote' yodao' da' chacte chedobe. Na' ŋe' bosochine' yodaon' bžin-ten tiemp čhe da' rey David. ⁴⁶ Na' Diosen' bebede' da' rey Davin', na' da' Davin' goclaže' gone' to yodao' čhe Diosen', Dios ben' leczze benxen da' Jacoben' cani'te.

⁴⁷ Perw na' da' xi'ŋe' Salomón benen'. ⁴⁸ Na' Diosen' ben' chnabia' doxen, bi ŋacho zoe' lo' yo'o da' chon beŋačhen', san chac can' gwna Diosen' dan' bzoj to beŋe' be' xtiže'na' cani', žan:

⁴⁹ Neda' zoa' yaba chnabia', na' guac gona' con bi chazlaža' lo yežlion'. Na' žchaquele gonle to liža'na'?

Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ Dan' bi chzenagle, dan' bi chejle'le lo' lažda'olen' nacchguale beŋe' güedenag can' gosac da' xozxta'ocho ca'. Bicze chzenagle čhe Spiritw čhe Diosen'.

⁵² Da' xozxta'ocho ca' leczze bosochi bososaque' beŋe' ca' gosote' xtiža' Diosen' cani', na' gosote' legaque' caten' gosote' diža' can' seļa' Diosen' Xi'ŋe' ben' nac beŋe' güen juisyw. Na' cate' bide', le'e bdelne' lo na' beŋe' ca' gosote'ne' na' le'e naple doļa' dan' gosote'nen'.

⁵³ La'czļa' nombia'le ley dan' bosonežjw angl ca' da' Moisésen', bi chzenagle čhen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxetje laye'. ⁵⁵ Perw na' Esteban' gwzoachgua Spiritw čhe Diosen' len le', bcos lagüen' gwŋe'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsen' cuit Diosen' chnabi'e txen len le'. ⁵⁶ Nach Estebanna' gwne':

—Le ŋa'šc nļa'xeje yaban' na' nļa' Jesúsen' ben' golje' beŋač zeche' cuit Diosen' chnabi'e txen len le'.

⁵⁷ Nach beŋe' ca' zjanžaguen' leca beseloque' na' bososya'adie' na' bososejw naggaque'na' na' to ši'ize ja'acese' gan' ze Estebanna'. ⁵⁸ Nach gosebeje' Estebanna' cho'a yež na' bosožie'ne' yej. Na' beŋe' ca' bosožie' le' yejen' bosonežjue' xagaque' da' zjandobe' to beŋe' xcuide' beŋe' le Saulo cont gapen'. ⁵⁹ Na' šlac chosožie' Estebanna' yej, Esteban' boļ güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo yon' na' gwŋe' zižje, gwne':

—Xana' bi gono' cuent xtoļa' beŋe' quinga dan' chesote' neda'.

Na' beyož gwne' ca', gote'.

Saulo bchi bsaque' beŋe' chesonxen Jesucriston'

8 Na' ca nac Saulon', gwyazlaže' dan' gosote' da' Estebanna'.

Na' beŋe' ca' chesejnilaže' Jesucriston' ciuda Jerusalénna' jasecuaše' da' Estebanna', na' gosebežchgüe' čhe'. Na' gwde gosote' da' Estebanna' gosezologüe' bosochi bososaque' beŋe' ca' chesedop chesežag chesonxene' Jesucriston' Jerusalénna', na' yogo' beŋe' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. ³ Na' Saulon' gwzologüe' cheje' liž to to beŋe' ca' chesonxen Jesucriston' chjažobe' no beŋe' byo na' no no'ole cont chče'e legaque' ližya.

Beñe' ciuda Samaria gosende' diža' güen çe Jesucriston'

⁴ Na' beñe' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. ⁵ Na' ben' le Felipe bžine' ciuda Samarian' na' be'e diža' çe Jesucriston'. ⁶ Na' cate' gosende' xtižen' na' besele'ede' yeła' guac dan' bene' len le-gaque', beñe' zan besedobe' bosozenague' çe'. ⁷ Be-beje' da' xigüe' ca' zjajo'o zjanyaz yichjlaždao' beñe' zan, na' cate' besyechojen chososya'adian. Na' zan beñe' natzi' late' güeje cuerp čhegaque'na' beyone' le-gaque', lecze beyone' no beñe' nxinj ni'e. ⁸ Na' besyebchgüe beñe' ca' že' ciudan'.

⁹ Na' lo ciudan' zoa to beñe' guaža' beñe' le Simón. Da' zan da' bene' da' besyebane beñe' Samarian' gwziye'e legaque' gože'ne' naque' beñe' zaque'. ¹⁰ Na' šlac bene' da' ca', yogo' beñe' lo ciudan' bosozenague' çe' tcho'a, no beñe' gole ca' lente no bi' xcuide' ca', gosene' çe':

—Le bengan' nse'e yeła' guac xen çe Diosen'.

¹¹ Zan iz bosozenague' çe', le gwziye'e legaque' len yeła' guaža' çe'na'. ¹² Perw cate' Felipen' gwdixjue'ede' diža' güen çe Jesucriston' len legaque' na' bzejni'ide' legaque' çe yeła' chnabia' çe Diosen', zane' gosejle'e çe' na' gosezoe' nis, beñe' byo na' no'ole. ¹³ Na' lencze Simón gwyejle'e çe' na' gwzoe' nis na' gwzolaogüe' gwdalene' Felipen', na' bebande' ca' nac yeła' guac ca' dan' chon Felipen' na' yezica'chle da' zaca' yebanecho.

¹⁴ Na' postlw ca' nite' ciuda Jerusalénna' gosende' beñe' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. ¹⁵ Na' cate' besežine'na' bosol güiže' Diosen' gosenabde'ne' soa Spiritw čhen' lo' yichjlaždao' beñe' Samaria ca', le ca hora' biņa' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsén'. ¹⁷ Nach gosexoa na' postlw ca' yichjgaque' cont gwzoa Spiriton' lo' yichjlažda'ogaquen'.

¹⁸ Na' ble'e Simón can' cheson postlw ca' chesexoa ne'e yichj beñe' cont chzoa Spiriton' len legaque', na' bšabde' legaque' mechw. ¹⁹ Gože' legaque':

—Le gon cont neda' gac xoa na'a yichj note'teze beñe' na' soa Spiriton' len legaque' can' chon le'e.

²⁰ Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. ²¹ Bi zaco' gono' da' nga chonto', le yichjlažda'oguo' naquen mal lao Diosen'. ²² Da' cheyała' gono', betinje da' malen' chono' na' gwñab goclen lao Diosen' cont yezi'xene' čhio' ca' nac xbabén' yo'o lo' yichjlažda'oguo'. ²³ Nacbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

²⁴ Nach Simónna' boži'e xtižen' gože' le':

—Le nab goclen lao Xancho' cont ne to da' mal dan' bač gwnao' nga bi gac chia'.

²⁵ Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož gosoe' diža' can' ba goclen Xancho Jesucriston' legaque', nach

jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len beñe' ca' že' yezica'chle yež ca' gan' mbane distritw Samaria.

Felipe na' beñe' Etiopía

²⁶ Nach Xancho Diosen' gwsele' to angl beñe' gože' Felipe:

—Gwey gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to beñe' nación Etiopía zeyo'e to lo' carret zeze'e gwyeje' Jerusalénna' jenxene' Diosen'. Le' naque' to beñe' blao na' ba none' le' capar cont gone' xšin no'ole gwnabia' çe beñe' Etiopía ca', šo'o lo' ne'e mechw çe'. Na' no'ole gwnabian' le' Candace. ²⁸ Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'. ²⁹ Nach Spiritw çe Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaíasen'. Nach gože'ne':

—Čhejni'ido' dan' chlabo'na'?

³¹ Na' beñe' Etiopían' boži'e xtižen' gože' Felipen':

—ČNacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob beñe' cont gote'ba', na' ca to xila' dao' be bi chosya'a cate' čšibe'ba', can' bene', bibi gwñe' caten' gozezi' gosebague'ne'.

³³ Na' gosone' le' ca to beñe' bibi zaca'.

Na' bi gosone' yeła' justis çe' ca cheyała' gaquen. Na' nono diaža' çe' nita', le goseque'e yeła' mban çe' lo' yežlio nga.

³⁴ Nach beñe' Etiopían' gože' Felipen':

—Benšca goclen gwna neda' no čhen' ža ben' bzoj Xtiža' Diosen' ca', čche cuinen' že' ca' o še çe beñe' yoble?

³⁵ Nach Felipen' gwzolağüe' bzejni'ide' bi zejen dan' chlab beñe' Etiopían', gože' le' diža' güen çe Jesúsén'.

³⁶ Na' ca' chac, besežine' ga žia nis, nach bena' gože' Felipen':

—Nga žia nis, čcbi gac soa' nisen' na'a?

³⁷ Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'iq Diosen'.

³⁸ Nach bene' mandadw bcueze' carreten' na' betj Felipen' len beñe' Etiopían' jasežo'e lo' nisen' cont Felipen' bzoe'ne' nis. ³⁹ Na' cate' besyechoje' lo' nisen', Spiritw çe Diosen' la' beče'eten Felipen' ga yoble, na' bich ble'e beñe' Etiopían' le'. Na' mbalaz beza' ben' beyo'e lo' carreten'. ⁴⁰ Nach Felipen' bžine' yež dan' nzi' Azoto na' gwzolağüe' gwdixjue'ede' diža' güen çe Je-

sucriston' to to yež da' zjachi' gaļa'ze ga gwdie' bžinte' Cesarean'.

Diosen' bocobe' yichjlaždao' Saulon'

(Hch. 22:6-16; 26:12-18)

9 Na' Saulon' con chdacze' cho'e diža' can' chaclaže' gote' beņe' chesejnilaže' Xancho Jesucriston' na' chdacze' cheyiljwlaže' nacle gone' gote' legaque'. Na' da'nan' Saulon' gwyje' lao bχoz blao che beņe' Israelen', ² na' gwnabde'ne' gwzoje' to yiš da' goxe' yosolab beņe' že' to to yodao' nita' ciuda Damasco cont yeseņezde' nape' yela' gwnabia' sene' beņe' ca' ba chesejnilaže' Jesucriston' na' gwčeje' legaque' cont che'e legaque' ciuda Jerusalénna' la'czla' beņe' byo o la' no'ole. ³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyechjen le'. ⁴ Na' gwbiže' lo yon'. Na' bende' che' to beņe' le':

—Saulo, žbixchen' chči chsaco' neda'?

⁵ Na' Saulon' boži'e xtižen' gože' le':

—žNo le' beņe'?

Nach bena' gože'ne':

—Nedan' Jesús ben' chči chsaco'. Na' dan' chgue'edo' neda', chone zi' cuino' can' chac che to go'ņ be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, žbin' chaclažo' gona'?

Nach Xancon' gože'ne':

—Beyas na' gwyej ciuda Damascon' na' zoa to beņe' ye'e le' da' cheyla' gono'.

⁷ Na' beņe' ca' zja'aclen Saulon' benit bečoļ gosac lo' yichjlažda'ogaque'na' catec besežebe' dan' goquen', le gosende' ši'i beņe' perw nono besele'ede'. ⁸ Nach beyas Saulon', perw cate' beža' lagüen' con bich ble'ede'. Nach beņe' ca' nžague'na' gosoxe' ne'e goseče'ene' Damascon'. ⁹ Na' šoņe ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to beņe' chejnilaže' Xancho Jesucriston' Damascon' beņe' le Ananías, na' Ananíasen' ble'edagüede' Xancon'. Na' Xancon' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xancon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' ņabo' to beņe' le Saulo, to beņe' ciuda Tarso. Ba choļ güiže' neda'. ¹² Na' ba bena' cont ble'edagüede' le' gwyo'o gan' zoe'na' na' gwχoa nao' yejlagüe'na' cont yele'ede'.

¹³ Nach Ananíasen' boži'e xtižen' gože' le':

—Xana', ba benda' beņe' zan cheso'e xtiža' bena', ca nac da' mal juisyw ba bene' Jerusalén len beņe' ca' ba gwlejo' cont zjanaque' lo nao'. ¹⁴ Na' chesene' ze'e nga noxe' yiš che bχoz gwnabia' ca' cont sene' yogo'lo' neto' chejnilaže'to' le'.

¹⁵ Nach Xancho Jesucriston' gože' Ananíasen':

—Gwyej, le ba gwleja' Saulon' cont šjzejni'ide' xtiža' len beņe' cbi zjanac beņe' Israel na' len rey čhegaque'

ca', na' lente le'e nacle beņe' Israel. ¹⁶ Na' gwlo'eda'ne' ca nac da' yaše' da' zi' da' gac che' dan' gwzenague' chia'.

¹⁷ Nach Ananíasen' gwyje' gan' zoa Saulon' na' gwyo'e lo' yo'ona' na' gwχoa ne'e yejlaio Saulon', gože'ne':

—Beņe' migw Saulo, Xancho Jesús en' ben' blo'elagüe' le' tnez gan' za'ona' ba gwsele' neda' zedeņa'a le' cont yele'edo' na' soa Spiritw che Diosen' len le'.

¹⁸ Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gwyje' gan' gwzoe' nisen'. ¹⁹ Ca beyoža' gwdagüe' na' beyaclaže'. Na' bega'ane' Damascon' yeto čhop ža len beņe' ca' chesejnilaže' Xancon'.

Saulon' be'e xtiža' Diosen' Damascon'

²⁰ Na' la' gwzolaote gwyje' to to yodao' be'e diža' che Jesús en', gwne' len' naque' Xi'iq Diosen'. ²¹ Na' yogo' beņe' ca' chesende' xtiže' dan' cho'ena' besyebande' na' chese' lježe':

—žGague bengan' chda choņit choļane' beņe' ca' chesejnilaže' Jesús en' ciuda Jerusalénna'? na' žgague da' na'czen' bide' nga ņa'a cont gwčeje' beņe' ca' na' šjasane' legaque' lao bχoz gwnabia' ca'?

²² Na' Saulon' tža tža Diosen' goclene'ne' cont be'e diža' che Jesús en' tcho'a, gwne' Jesús en' naque' ben' gwsele' Diosen' cont ņabi'e. Na' beņe' Israel ca' že' Damascon' bi beseželde' bin' yeseņe', le gosacbe'ede' dan' che'e legaque' naquen da' li.

Saulon' bi goque' lo na' beņe' ca' cheseque'ede' le'

²³ Na' cate' ba goc sša choe'len Saulon' beņe' Damascon' ca' xtiža' Jesucriston' nach bosoxi'a beņe' Israel ca' yesote'ne'. ²⁴ Na' gosenite' chesape' to to cho'a puert che ze'ena' dan' nyečj ciudan' cont yesezene' Saulon' yesote'ne' bate'teze choje', perw na' Saulon' gočbe'ede' ba zjachi'na'ogüe'ne'. ²⁵ Na' beņe' ca' chesejnilaže' Jesucriston' besyeletje'ne' le'e ze'e dan' nyečj ciudan' šeže'le besyegüe'ene' to lo' žome cont goc bechoje' lo ciudan'.

Gwyej Saulon' Jerusalénna'

²⁶ Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen beņe' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'.

²⁷ Nach Bernabé gwče'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesús en' šlac ngüe'e nez zeje' Damascon' na' can' goc Xancon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesús en' Damascon' sin cbi bžebe'. ²⁸ Nach postlw ca' gosejle'e can' goc che Saulon', na' gwzolao gwdalen Saulon' beņe' ca' chesejnilaže' Jesucriston' Jerusalénna'. ²⁹ Na' sin cbi bi chaž chžebe' gwzolagüe' chzejni'ide' beņe' Israel ca' diža' che Xancho Jesús en',

con beṇe' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclačže' yesote'ne'. ³⁰ Na' cate' beṇe' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach gosečhe'ene' ja'aque' ciuda Cesarea na' besyesele'ne' ciuda Tarso.

³¹ Na' beṇe' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'čhačhe' gosejnilaže' Xancho Jesúsén' na' bosozenague' čhe' do yichj do laže'gaque'. Na' Spiritw čhe Diosen' benen cont gosacčhač laže'gaque' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' beṇe' ca' ba gwlej Diosen' cont zjanaque' lo ne'e chjaṇe'e legaque'. Na' to že' gwyaje' jaṇe'e beṇe' ca' že' yež dan' nzi' Lida.

³³ Na' yež Lidan' jati'e to beṇe' le' Eneas. Ba chac xono' iz de' che'ede', natzi' late' cuerp čhe'na'. ³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. ³⁵ Na' yogo'loj beṇe' že' Lidan' na' beṇe' že' yež dan' nzi' Sarón besele'ede' bena' ba beyacde' na' gosebejyichje' costumbr čhegaque' cont gosejnilaže' Xancho Jesucriston'.

Dorcac bebane' ladjo beṇe' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejni-laže' Jesucriston' na' zoe' chone' da' güen na' chaclene' no beṇe' yaše' beṇe' chyažj čhchine'. ³⁷ Perw na' gocšene Dorcasen' na' gottechgüe', na' bosogwazje'ne' na' gosexoe'ne' to lo' cuart da' zoa yichj yo'o cha'te.

³⁸ Na' gała'ze chega'aṇ yež Lidan' len Jopen', na' beṇe' ca' chesonxen Jesucriston' Jopen' gosenēzde' Pedroa' zoe' Lidan'. Nach gosesele' čhope beṇe' jasata'yoede' Pedroa' gose'ene':

—Benšca goclen yo'o len neto' netec ṇa'a.

³⁹ Na' Pedroa' la' gwza'te' gwyaje' len beṇe' ca'. Na' cate' besežine' Jopen', gosečhe'ene' lo' yo'o gan' xoa beṇe' guaten', na' la' gosebiga'te' yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis.

⁴⁰ Nach Pedroa' bešaše' yogo'loj beṇe' ca' chyole' na' bzoa xibe' boj güiže' Diosen'. Na' beyečhje' chṇe'e cuerp čhe no'olen', na' gože'ne':

—Tabita, gwyas.

Nach la' bexa'te' yejlao da' Dorcasen' gwṇe'e Pedroa' na' la' bebe'te'. ⁴¹ Nach Pedroa' beṇe' ne'ena' bsože'e le', nach goxe' no'ole güezebe ca' na' yezica'chle beṇe' ca' zjanaque' lo' na' Diosen' na' blo'ede' legaque' ba beban Dorcasen'. ⁴² Na' yogo'loj beṇe' Jopen' gosende' can' goquen', na' beṇe' zanch gosejnilaže' Xancho Jesucriston'. ⁴³ Na' Pedroa' bega'aṇe' Jopen' zan že, gwzoe' liž to beṇe' le' Simón, beṇe' chonšagüe' yid.

Pedroa' na' Cornelio

¹⁰ Na' ciuda Cesareana' zoa to beṇe' le' Cornelio, naque' xan to gayoa soldadw, na' bosozoa la soldadw čhe' ca' Beṇe' Italia. ² La'czla' Cornelion' cbi naque' beṇe' Israel, benxene' Diosen', na' lecce ca' goston beṇe' lo' yo'o čhe', chesezoe' chesape' Diosen' bala'aṇ. Na' Cornelion' chaclenteze' beṇe' Israel beṇe' chyažj čhchine', na' zoateze' choj güiže' Diosen'. ³ Na' goc čhe', to že do cheda šone ble'edagüede' to angl beṇe' gwseła' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chṇa'chgüe' lao anglen' na' do chžebe' gože'ne':

—čBixen' Xana'?

Nach gož anglen' le':

—Diosen' ṇezde' can' zo' choj güižo'ne' na' chnežjo' dan' cheseyaže' beṇe' yaše', na' Diosen' chacláže' gac-lene' le'. ⁵ Da' nga gono' ṇa'a, gwseła' beṇe' šjasexi'e to beṇe' zoa ciuda Jopen' beṇe' le' Simón na' lecce le' Pedro. ⁶ Zoe' liž to beṇe' chonšagüe' yid. Bena' lecce le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyala' gono'.

⁷ Cate' beza' anglen' Cornelion' goxe' čhope mos čhe' na' to soldadw beṇe' chaclen le', na' soldadoa' lecce chonxene' Diosen'. ⁸ Na' Cornelion' bzejni'ide' legaque' yogo'lojte can' goquen' nach gwsele' legaque' Jopen'. Na' gosegüe'e nez zja'aque'.

⁹ Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o čhe yo'o gan' zoe'na' ca do guagwbiž cont jel güiže' Diosen'. ¹⁰ Na' šlac choelene' Diosen' diža' gwdonchgüe', con gocláže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. ¹² Na' lo'enna' zjaže' yogo' cuen beyixe' že' yežlion', be žia tap ṇi'a na', na' be chososa' le'eban' lo' yo, na' len be žia xil be chaš le'e yaba. ¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne ṇi'a biṇa' gagua' be zban zjanac ca', le cbi de šsens len ley čheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bač gwnia' gago' bi ṇao' be zban zjanacba'.

¹⁶ Da' gwyoṇ ṇi'a gož Diosen' le' ca' nach la' begüete lachen' le'e yaban'. ¹⁷ Šlac chaczelaže' Pedroa' bi zejen dan' ble'edagüeden', besežin beṇe' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. ¹⁸ Nach zižje gosenabe' še le na' zoa to beṇe' lecce le' Simón Pedro. ¹⁹ Na' Pedroa' ṇe' chone' xbab čhe dan' ble'edagüede', cate' gož Spiritw čhe Diosen' le':

—Simón, šone beṇe' chesyeyiljue' le'. ²⁰ Gwzoža' na' beyetj cont šejlano' legaque', na' bi gaczelaže' la'czla' bi zjanaque' beṇe' Israel, le neda' gwseła' legaque'.

²¹ Nach Pedroa' beyetje' jašague' beṇe' ca' gwseła' Cornelion', nach gože' legaque':

—Nga zoa', nedan' Simón Pedro. ¿Bixchen' cheyiljwle neda'?

²² Nach gose' beṇe' ca' le':

—To xan soldadw beṇe' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'loj beṇe' Israel ca' cheso'e xtiže' ca beṇe' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaque' yo'o na' besyega'an-lene' le' tže'. Nach beteyo Pedroa' gwyase' gweylene' legaque' na' gwche'e to čhope beṇe' Jopen' beṇe' chesejnilaže' Jesucriston'.

²⁴ Na' beteyo cate' besežine' ciuda Cesarean', Cornelion' bačh tobete' biše' lježe' len xmgüe' ba zjažie' liže'na' chesebeze' le'. ²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. ²⁶ Na' Pedroa' bsože'e le', gože'ne':

—Bezoža'. Lecze beṇačh neda'.

²⁷ Na' ṇe' choe'lente' le' dižan' ca' cate' gwyo'o Pedroa' lo' yo'on na' ble'ede' beṇe' zan ba že' lo yo'ona'.

²⁸ Nach gože' legaque':

—Nezeczele ley che neto' beṇe' Israel žan bi cheyała' šo'to' liž beṇe' bi zjanaque' beṇe' Israel, na' žan bi cheyała' gonto' txe len le'e bi nacle beṇe' Israel. Perw bačh bzejni'i Diosen' neda' ṇe to beṇe' cbi cheyała' gona' xbab che' naque' beṇe' zban par šo'a liže'na'.

²⁹ Da'nan' cate' beṇe' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' ṇezda' ¿bixchen' gwṇio' neda'?

³⁰ Nach Cornelion' gože'ne':

—Na'a chac tap ža do cheda šoṇe zoa' sin cbibi nagua', na' choj güiža' Diosen' liža' nga, cate'cze ble'eda' to beṇe' byo lagua'na' nyaze' to lache' da' chgo'oten be'ni'. ³¹ Nach gože' neda': "Cornelio, ca nac da' gwṇabdo' Diosen', bačh bzenague' čhen, na' ṇezde' chnežjo' da' chyažj da' chčhine' beṇe' yaše'. ³² Na' na'a gwseła' to čhope beṇe' šjasexi'e to beṇe' zoa ciuda Jopen' beṇe' le Simón Pedro. Zoe' liž to beṇe' lecze le Simón, to beṇe' chonšagüe' yid. Liž ben' chonšagüe' yiden' zoan gała'ze cho'a nisdao'. Na' cate' la' Pedroa' ližo' nga nach güe'lene' le' diža'." ³³ Nach la' gwseła'tia' beṇe' ca' bedesexi'e le', na' choxclenteco' bačh bido'. Na' ṇezcze Diosen' yogo'to' nita'to' nga gwzenagto' yogo'lojte dan' ba ben Diosen' mandadw ṇao'.

Pedroa' be'e diža' liž Cornelion'

³⁴ Nach Pedroa' gwzologüe' be'e dižan' gwne':

—Da' li bačh ṇezda' nono nła' beṇe' ṇacho nzoa Diosen' le' to šla'aze. ³⁵ Gate'teze beṇe' nación con beṇe' chesonxen Diosen' do yichj do laže' na' chesone' da' güen, Diosen' chbede' legaque'. ³⁶ Diosen' gwduxjue'ede' neto' beṇe' Israel guac soato' binlo len le' še šejnilaže'to' Xi'ṇe' Jesucriston' beṇe' naque' Xan yogo'loj beṇe'. ³⁷ Nezele dan' ba goc doxen distritw Judean' dan' gwzolao distritw Galilean' gwde

gdixjue'e da' Juanna' xtiža' Diosen' na' bzoe' beṇe' nis. ³⁸ Nezele Diosen' gwleje' Jesúsen' ben' naque' beṇe' yež Nazaret cont chaclene' chio' beṇačh, na' be'ene' Spiritw che'na' na' yeła' chnabia'. Na' gwda Jesúsen' bene' da' güen na' beyone' yogo'loj beṇe' ca' chsaca'zi' Satanás dan' chnabia' da' xigüe' ca', le Diosen' zoe' len le'. ³⁹ Neto' ṇezeto' na' choe'to' diža' che yogo' da' güen da' ben Jesúsen' na' dan' bsed blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. ⁴⁰ Perw na' Diosen' bečhis bosbane'ne' ladjo beṇe' guat ca' beyon ža na' ben Diosen' cont Jesúsen' blo'elagüe' neto'. ⁴¹ Gague yogo'loj beṇe' besele'ede' Jesúsen' caten' bebane' ladjo beṇe' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwleno'ne' txe gwde bebane' ladjo beṇe' guat ca'. ⁴² Jesúsen' bene' mandadw čixjue'eto' beṇačhen' Diosen' bzoe' le' gone' yeła' justisen' len yogo' beṇe' zjamban na' len yogo' beṇe' ba gosat. ⁴³ Na' da' ca' bosozoj yogo' beṇe' goso'e xtiža' Diosen' cani'te zjanyojen chesenan note'tez beṇe' yesejnilaže' Jesucriston', Diosen' yezi'xene' xtoła'gaque'na'.

Spiritw che Diosen' gwyo'on lo' yichjlaždao' bał beṇe' bi zjanaque' beṇe' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' beṇe' ca' chosozenag diža' dan' cho'ena'. ⁴⁵ Na' beṇe' Israel ben' chesejnilaže' Jesucriston', beṇe' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' beṇe' ca' cbi zjanaque' beṇe' Israel. ⁴⁶ Gosacbe'ede' gwyo'o Spiritw che Diosen' lo' yichjlaždao' beṇe' ca' že' liž Cornelion', le gosende' gosonxen beṇe' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'. ⁴⁷ Nach Pedroa' gože' beṇe' Israel ca' nžaguen':

—Bibi de da' gwžon yesezoa beṇe' quinga nisen', le nacbia' ba zoa Spiritw che Diosen' len legaque' can' zoan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ṇe' yeto čhop ža.

Pedroa' gože' beṇe' Jerusalén ca' can' goquen'

11 Na' postlw ca' na' yezica'chle beṇe' ca' že' distritw Judean' ben' chesejnilaže' Jesucriston' gosende' xtiža' beṇe' ca' bi zjanaque' beṇe' Israel lecze ba chosozenague' xtiža' Diosen'. ² Nach Pedroa' beze'e gweyche' ciuda Jerusalénna' gan' nita' beṇe' Israel ben' chesejnilaže' Jesucriston' na' legaque' gosene-lagüe' che', ³ gose'ene':

—¿Bixchen' ba gweyjo' gan' že' beṇe' cbi zjanaque' beṇe' Israel na' jatagwleno' legaque'? Malen' ba beno'.

⁴ Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

⁵—Šlac zoa' ciuda Jopen' choĵ güiža' Diosen', ble'edagüeda' ca to lache' xen nchej dapte squin ca' chetjen ĩe'e yaban' zan' gan' zoa'na'. ⁶ Na' gwña'yana' na' ble'eda' ĩo'enña' že' beyixe' ca' chaš yežlion' be žia tap ĩi'a na', na' ble'eda' be chososa' ĩe'eban' ĩo yo, na' be žia xil be chaš ĩe'e yaba, na' baĭ be ca' zjanacba' be znia. ⁷ Na' benda' gož Diosen' neda': "Gwyas Pedro, na' betw be ca' gwdagw." ⁸ Nach boži'an gwnia': "Xana', bi gagua' ĩegacba'. Ne tñi'aze biña' gagua' be zban zjanac ca', ĩe bi de ĩsens len ley čheto'na' gagwto' ben' zjanac ca'." ⁹ Na' da' gwchop ĩi'a Diosen' gwne': "Be bačh gwnia' gago' bi ĩao' zjanacba' be zban." ¹⁰ Šon ĩi'a gože' neda' ca' nach begüe lachen' ĩe'e yaban'. ¹¹ Za' beyož ble'edagüeda' da'na' cate' besela'ac šone beñe' byo gan' zoa'na' beñe' za'ac ciuda Cesarean' chesyey-iljue'nda'. ¹² Na' Spiritw čhe Diosen' bzejni'in neda' cheyaĭa' ša'alena' ĩegaque' sin cbi gacžejlaža', na' gw-čhi'a beñe' ĩježcho quinga xop, gwyejto' Cesarean' bžinto' liž ben' le Cornelio na' gwyo'oto' ližen'. ¹³ Nach Cornelion' be'lene' neto' diža' can' blo'elao to angl ĩe' liže'na' na' anglen' gože'ne': "Gwseĭa' beñe' šja'ac ciuda Jopen' šjasexi'e to beñe' le Simón Pedro. ¹⁴ Bena' ye'e le' len beñe' ĩo' yo'o čhio' nac gonĭe cont gata' yeĭa' mban čhele toĭi tocañe." ¹⁵ Nach cate' gwzola'gua' bia' dižan' len beñe' ca' že' liž Cornelion', Spiritw čhe Diosen' gwyo'on ĩo' yičhĭlažda'ogaque'na' can' gwyo'on ĩo' lažda'ochon' cana'. ¹⁶ Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' beñe' nis, perw da' zaca'che' gac čhele cate' yedesoa Spiritw čhe Diosen' ĩo' yičhĭlažda'olen' ĩabi'an le'e." ¹⁷ Na' ba ben Diosen' cont zoa' Spiritw čhe'na' ĩo' yičhĭlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' žnox naca' neda' gwžona' gon Diosen' dan' chaclaže' gone'?

¹⁸ Na' ca' beyož bosozenague' xtiža' Pedroa' bich bi gosenē' čhe Pedroa' dan' gwyaje' liž Cornelion', san gosoe' yeĭa' choxclen čhe Diosen', gosene':

—Na'a ba ĩezecho ĩecze len beñe' ca' bi zjanaque' beñe' Israel chazlaže' Diosen' yesyetiñjde' xtoĭa'gaque'na' cont gwnežjue' yeĭa' mban čhegaque' toĭi tocañ.

Beñe' ca' chesonxen Jesucriston' ciuda Antioquía gan' mbane Siria

¹⁹ Na' gwde gosot beñe' Israel ca' Estebanna', gosezola'güe' bosochi' bososaca'chgüe' yezica'chle beñe' ca' chesejnilaže' Jesucriston', nach beñe' ca' chesejni-laže'ne' gosasĭase'. Baĭe' ja'aque' do distritw Fenicia, na' yež ca' zjachi' to ĩo' yežlio' da' žia ĩo' nisdaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con beñe' zjanac beñe' Israel xtiža' Jesúsēn', bi bososed bosolo'eden' beñe' cbi zjanaque' beñe' Israel. ²⁰ Perw na' to čhope beñe' Chipre na' beñe' ciuda Cirene ĩecze bosoxonje' ja'aque' ciuda Antioquían', na' gosezola'güe' goseyixjue'ede' diža' güen čhe Xancho Jesucriston' len beñe' ca' cbi zjanaque' beñe' Israel. ²¹ Na' Xancho' go-

clene' ĩegaque' len yeĭa' guac čhe'na' na' beñe' zan gosebejyichje' da' ca' chesejnilaže' na' gosejnilaže' Xancho'.

²² Na' cate' beñe' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gwyaje' Antioquían'.

²³ Na' cate' bžin Bernabén' Antioquían', ble'ede' da' ĩi' ba goclenchgua Diosen' beñe' ca', na' bebecgüede'. Nach gwñeyoede' ĩegaque' ĩita'čhače' yosozenague' čhe Xancho' do yičhĭ do laže'. ²⁴ Bernabén' naque' to beñe' güen, na' chejnilaže'chgüe' Jesucriston' na' Spiritw čhe Diosen' zoachguan len ĩe'. Na' zanch beñe' Antioquían' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' ĩe', gwče'ene' Antioquían'. ²⁶ Na' gosonite' Antioquían' tgüiz gosone' txen len beñe' Antioquía ca' chesedop chesežag chesonxene' Jesucriston' na' bososed bosolo'ede' beñe' zan. Na' Antioquía na'tequen' gwzola' bososi'e beñe' ca' chesejnilaže' Jesucriston' beñe' cristian da' chosozenague' čhe Criston'.

²⁷ Šlac nita' Bernabén' na' Saulon' ĩo' ciuda Antioquían', besežin baĭ beñe' Jerusalén ben' chosozende' beñe' bi dan' ba gož Diosen' ĩegaque'. ²⁸ Na' cate' beñe' ca' besežinña', toe' beñe' le Agabo gwzeche' lao beñe' ca' zjandop zjanžag chesonxen Jesucriston' be'e diža' can' ba bzejni'i Spiritw čhe Diosen' ĩe', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinña' can' gwna Agabon'. ²⁹ Nach beñe' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' beñe' ĩježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. ³⁰ Na' gosone' can' bosoxi'ena' nach goseseĭe' Saulon' len Bernabén' distritw Judean' jasenežjue' mechon' beñe' ca' chosogüia chesenē'e beñe' chesejnilaže' Jesucriston' ciuda Jerusalénna'.

Gosote' Jacobon' na' goseyixjue' Pedroa' ĩižya

12 Na' ca' tiempa' rey Herodes bčhi' bsaque' baĭ beñe' ca' chesonxene' Jesucriston'. ² Nach bene' mandadw gosote' Jacobo beñe' biše' Juanna' len spada. ³ Na' gocbe'e rey Herodesen' chesyebe beñe' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' goĭa' ĩni cate' chesagüe' yetextil dan' bibi levadura nčhixen. ⁴ Nach Herodesen' gwđixjue'ene' ĩižya na' gwseĭe' šino'to soldadw beñe' gosape' ĩižyan', tap güeje' do ža do yel. Herodesen' bene' xbab cueje'ne' ĩižyan' te ĩnin' cont gone' yeĭa' justis čhe' lao beñe' že' ĩo' ciudan'. ⁵ Soldadw ca' gosapchgüe' Pedroa' šlac de' ĩižyan', perw na' ca' nac beñe' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw beñe' chesape' cho'a puert ližyan'. ⁷ Cate'cze zejzenez to angl beñe' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec ŋa'a gwyas.

Na' la' besyeyežte gdenŋa' zjanchej na' Pedroa'.

⁸ Nach gož anglen' le':

—Bego'o xpanto' na' bolejšelon'.

Nach ben Pedroa' ca'. Nach gož anglen' le':

—Bechele xadon' chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'. ¹⁰ Beyož besyedie' chop cuen gan' nita' soldadw ca' chesape' ližyan', besyěžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'. ¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque beñe' Israel gualaż chia' ca' yesonde' neda'.

¹² Na' ŋe' chonte Pedroa' xbaden' ca', gwze'e gwyaje' liž María xŋa' Juan ben' lecze le Marcos. Na' liž Marían' zjandop zjanžag beñe' zan chosoł güiže' Diosen'.

¹³ Nach bsiže' cho'a puert zaguanna' na' la' bchojte to bi' no'ole le Rode jaŋa'be' non'. ¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebe' bi gwsaljwbe' puerten' san beyesjesbe' gan' že' beñe' ca' jayežbe' legaque' ba bla' Pedroa'. ¹⁵ Nach gose'ebe':

—¿Gague chactonto'na'?

Perw lebe' ŋezczebe' le'na'. Nach legaque' gose'ebe' naquen bxin che'.

¹⁶ Perw Pedroa' ŋe' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'. ¹⁷ Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyała' yosozende' Jacobon' na' yezica'chle beñe' lježgaque' can' ba goquen'. Nach beze'e zjayde' ga yoble.

¹⁸ Nach cate' gwyeni', yela' güeban juisyw gwnita' soldadw ca' na' goso'e diža', gosone':

—¿Bixen' goc len Pedroa'?

¹⁹ Nach rey Herodesen' bene' mandadw jasyediljue' Pedroa' na' gwŋabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

²⁰ Ca horan' Herodesen' chža'achgüe' beñe' ciuda Tiro na' beñe' ciuda Sidón ca'. Perw na' beñe' ca' besyajažde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež beñe' Tiro na' beñe' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjaseŋabe' yesenite' binlo len le'. ²¹ Nach rey Herodesen' bžie' bia' to ža gwto'be' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao beñe' ca' že' žana'. ²² Nach beñe' ca' bososye'e, gosone':

—Diosen' choe' diža', gague beŋačhen'.

²³ Na' lo' hora' gwseła' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen beñe' le' gualaz da' yesonxene' Diosen'.

²⁴ Perw ca' nac xtiža' Xancho Jesucriston' gos gwlaļjchguan.

²⁵ Na' Bernabén' len Saulon' beyož gosone' yogo' da' cheyała' yesone' ciuda Jerusalénŋa', nach besyeya'aque' jaya'aque' ciuda Antioquían'. Na' goseche'e to beñe' le Juan na' lecze lie' Marcos.

Bernabén' na' Saulon' ja'aque' jasedixjue'ede' xtiža' Jesucriston' yež zito'

13 Na' len beñe' ca' chesedop chesežag chesonxene' Jesucriston' ciuda Antioquían' zjančixje beñe' cheseyixjue'ede' beñe' yoble bi da' che' Diosen' legaque', na' zjalen beñe' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e beñe' gasj, na' Lucio beñe' ciuda Cirene, na' Saulo, na' Manaén. Na' Manaénŋa' bgole' txen len rey Herodes ben' gwnabia' distritw Galilea. ² Na' to ža beñe' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'. ³ Nach beñe' ca' bosol güižche' Diosen' sin cbi zjane'ej zjanagüe', nach gosexoa na'gaque' yičhj Saulon' len yičhj Bernabén', gosone' ca' cont gosegüe'e xšin Diosen' lo' na'gaque'. Gwdena' bosose'e legaque'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwsełan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisdaon'. ⁵ Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che beñe' Israel ca'. Na' zjanče'e Juan ben' lecze le Marcos cont chaclene' legaque'. ⁶ Na' ca' gosaše' gosodie' doxen

Chipren' besežine' yež gan' nzi' Pafos. Na' Pafosna' besežague' to beņe' guaža' le Barjesús. Naque' beņe' Israel na' chxoayague' že' chzende' bi dan' che' Diosen' le'. ⁷ Barjesúsen' naque' xmigw gobernador ben' le Sergio Paulo. Sergio Paulon' naque' to beņe' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'. ⁸ Na' Barjesúsen' lece bososi'ene' Elimas, diža' griego zejen beņe' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'. ⁹ Na' Spiritw che Diosen' zoachguan len Saulon' ben' lece le Pablo, nach bcos lagüen' gwñachgüe' Elimasen'. ¹⁰ Nach gože'ne':

—Naco' xi'iq̄ Satanás dan' chnabia' da' xigüe' ca', yeļa' gūexoayag chio' na' yeļa' beņe' mal chio'. Bi chazlažo' bite'tez da' güen. ¿Bičen' cbi chbezo' chžono' yosozenag beņe' diža' li che Xanto' Diosen'? ¹¹ Da'nan' Xanto' Diosen' gone' castigw chio' na' choļo' to tiemp, bi gac le'edo' gwbiža'.

Nach la' gwcholtie', gwde ca to bejw lo yeļagüe'na', nach gwzologüe' chgan chtobe' cheyljue' no goxe' ne'e cont cue' nez. ¹² Gobernadore' ble'ede' can' goquen' na' gwyeļe'e xtiža' Xancho Jesucriston', na' be-banchgüede' can' že dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len beņe' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lece chese'e Marcos gwlejyichje' legaque' beyeje' Jerusalénna'. ¹⁴ Na' Pablon' len Bernabén' gosa'aque' yež Perge na' besežine' ciuda Antioquian' gan' mbane distritw Pisidia. Na' cate' bžin že che Dios nach ja'aque' yodao' che beņe' Israel ca' dan' zoa na' na' jasechi'e. ¹⁵ Na' ca beyož blab to beņe' libr gan' nyoj ley che Diosen' len dan' bosozoj beņe' ca' goso'e xtiža' Diosen' cani', beņe' ca' chesenabia' lo yodao'na' goseseļe' to beņe' gan' chi' Pablon' len Bernabén' na' gože' le-gaque':

—Beņe' migw, še de bi diža' da' chaclaže'le güe'le neyoele beņe' quinga, guac ñalen ña'a.

¹⁶ Nach Pablon' gwzechede' bene' señw len ne'ena' cont yosozenag beņe' ca' zjachi'na', na' gože' legaque':

—Le gwzenag le'e beņe' Israel na' nochle chonxenle Diosen'. ¹⁷ Dios ben' chonxen chio' beņe' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' beņe' zito'. Nach Diosen' bebeje' legaque' Egipton' len yeļa' guac chen'. ¹⁸ Na' Diosen' gwdape' yeļa' chxenlaže' čhoa iz len da' xozxta'ocho ca' šlac gosaše' latje dašen'. ¹⁹ Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio che-gaquen'. ²⁰ Nach gwde na' Diosen' gwleje' tgüeje tgüe-je juez cont gosenabi'e nación Israelen' lao tap gayoa yogaše iz bžinte tiemp che da' Samuel ben' be'e xtiža' Diosen' cani'. ²¹ Nach tiemp che da' Samuelen' da' xozxta'ocho ca' gosenabde' Diosen' gone' to rey beņe'

ñabi'e legaque'. Na' Diosen' bnežjue' legaque' rey Saúl na' gwnabi'e legaque' čhoa iz. Saúl nan' goque' xi'iq̄ ben' le' Cis, na' goque' diaža che da' ben' le Benjamín ben' gwzoa cani'te. ²² Nach bžin že Diosen' beque'e yeļa' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'iq̄ Isaí nga, le chaclaže' chone' can' chazlažan' na' chzenague' bite'tez da' chapa'ne'." ²³ Nach ña'a Diosen' ba gwseļe' yeto beņe' golje' lo diaža che da' rey Davin', ben' le Jesús. Ba gwseļe' le' cont gone' chio' beņe' Israel yeļa' mban toļi tocaņe can' gwne' cani'. ²⁴ Na' cate' biņa' solao Jesúsen' gwsed gwlo'ede' beņe', da' Juanna' gwduxjue'ede' len yogo' beņe' Israel gualaž chechon' cheyaļa' yesyetiņjde' xtoļa'gaque' na' yesezoe' nis.

²⁵ Na' cate' beyož ben Juanna' dan' yo'o lo ne'e gone', nach gože' beņe' ca' chosozenag che': "¿Chonle xbab naca' neda' ben' chbezle seļa' Diosen'? Bi naca' bena'. Za' yid bena', na' da' nacchgüe' beņe' zaca', bi zaca' go-na' mandadw che' lechja' no xele'."

²⁶ Beņe' migw, chio' naccho xi'iq̄ diaža che da' xozxta'ocho Abraham, na' nochle le'e chonxenle Diosen' tx-en len neto' beņe' Israel, xtiža' Diosen' dan' žan gone' chio' yeļa' mban toļi tocaņe naquen par chio'. ²⁷ Beņe' ciuda Jerusalén ca' len beņe' gwnabia' chegaque' ca' bi gosejli'e gwseļa' Diosen' Jesúsen', na' bi gosejni'ide' da' ca' zjanyoj che' le'e libr dan' bosozoj beņe' ca' goso'e xtiža' Diosen' cani' la'czļa' chosolaben' lo' yodaon' yogo' že che Dios. Na' dan' bi gosejni'ide', da'nan' gosechoglagüen' yesote' Jesúsen', nach goc can' nyoj che'. ²⁸ Na' la'czļa' gosenzde' bibi da' mal non Jesúsen' cont yesote' le', gosenabde' Pilaton' gone' mandadw yesot soldadw che' ca' le'. ²⁹ Na' goc che Jesúsen' yogo' dan' nyoj che' le'e Xtiža' Dios dan' bosozoj beņe' ca' gosenita' cani'. Na' beyož gote'na' nach besežin beņe' besyeļetje' cuerp che'na' le'e yag cruzen' na' bosocuaše'ne'. ³⁰ Na' gwdena' Diosen' bečhis bosbane' le' ladjo beņe' guata'. ³¹ Na' beņe' ca' zjanaque' Jesúsen' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsen' yezan že gwde bebane' ladjo beņe' guata', na' legaque' cheso'e diža' chen' len yezica'chle beņe' Israel.

³² Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'. ³³ Ba benen' len chio' naccho xi'iq̄ diaža che da' beņe' ca', dan' bosbane' Jesúsen' ladjo beņe' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'iq̄na; ña'aža ba blo'a zoaczo'." ³⁴ Na' Diosen' lece bene' cont nyojen ga yoble che' dan' bosbane' le' ladjo beņe' guaten' na' gwbat gožo' cuerp chen', žan: "Gona' güen len le' doļoļ can' goša' rey Davin'." ³⁵ Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'." ³⁶ Nezecho da' rey Davin' gwnabi'e beņe' Israel ca' gwnita' ca' tiemp chen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lece gožo' cuerp chen'. ³⁷ Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp

chen'. ³⁸ Na' cheyała' nezele beñe' migw, Jesúsen' ben' choa' diža' che', chezi'xene' xtoła' note'tez beñe' chejni-laže'ne'. ³⁹ Bi beyaccho beñe' güen len Diosen' da' bi benyañe'cho can' ža ley dan' bzoj da' Moisésen', perw note'tezcho chejni-laže'cho Jesúsen', len' ba cheyone' chio' beñe' güen. ⁴⁰ Le gwsaca' cont bi gac chele can' bosozoj beñe' ca' goso'e xtiža' Diosen' cani', žan:

⁴¹ Cheyała' gonle xbab, le'e chñelaole chia', na' cheyała' yebanele, le gwžin ža cuiayi'le.

Neda' Dios gona' to da' yebanele šlac mbanle, to da' bi šejle'le la'czla' še no chixjue'e le'e can' gaca'.

⁴² Beyož bzejni'i Pablon' beñe' ca' že'na' nach besyechoje' lo' yodaon'. Nach beñe' ca' ba goson cuine' beñe' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' le-gaque' yelate' che da' ca' ba bosozejni'ide'. ⁴³ Nach beñe' zan beñe' Israel len zan beñe' ca' ba goson cuin-gaque' beñe' Israel zja'aclene' Pablon' len Bernabén'. Nach Pablon' na' Bernabén' gosene'yoede' le-gaque' cont ni'ta'che' yesejni-laže'che' Diosen' ben' chaclen le-gaque'.

⁴⁴ Na' cate' bežag xmanña' ža che Dios yogo'lojcz beñe' lo' ciudan' besežag cont bosozenague' xtiža' Diosen'. ⁴⁵ Na' gwnita' beñe' Israel beñe' bi gosejle' che Jesúsen', na' cate' besele'ede' ba nac beñe' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'. ⁴⁶ Perw na' Pablon' len Bernabén' bi besežebe' san gose'e beñe' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle beñe' Israel gualaž cheto'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli tocañe. Da'n'an' na'a gwzejni'ito' beñe' ca' bi zjanac beñe' Israel. ⁴⁷ Gonto' ca' neče Xanto' Diosen' bač bene' mandadw gonton', le nyojen žan:

Bač nzoa' le'e cont co'ole be'ni' chian' lo' yichjlaždao' beñe' ca' bi zjanac beñe' Israel, cont beñe' ca' že' doxen yežlion' yesacbe'ede' guac nitlao xtoła'gaque'.

⁴⁸ Na' beñe' ca' bi zjanac beñe' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' beñe' ca' ba gwlej Diosen' cont gata' yela' mban čhegaque' toli tocañe, le-gaque' gosejle'e xtiža' Diosen' dan' be' Pablon' len Bernabén'. ⁴⁹ Can' goc beñe' ca' že' doxen distritwna' gosende' xtiža' Xancho Jesucriston'. ⁵⁰ Perw ba beñe' Israelen' goso'e diža' len no'ol blao ca' gosonxen Diosen' na' len beñe' gwnabia' blao ca' lo' ciudan', na' bosoš'e xbab čhegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'. ⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianña'. Gosone' ca' cont bosolo'ede' beñe' ca' chesyebej le-gaque' malen' chesone' chosolague' le-gaque'. Nach jaya'aque' yež Iconio. ⁵² Na' mbalazchgua gwnita' beñe' ca' chesonxen Jesucriston'

ciuda Antioquían', na' Spiritw che Diosen' gw-zoachguan len le-gaque'.

Pablon' len Bernabén' besežine' yež Iconio

14 Na' goquen' Pablon' len Bernabén' besežine' yež Iconion' na' ja'aque' yodao' che beñe' Israel. Na' cate' goso'e xtiža' Jesucriston', beñe' zan beñe' Israel ca' na' len zan beñe' cbi zjanac beñe' Israel gosejle'e che'. ² Perw na' gwnita' beñe' Israel ca' beñe' bi gosejle'e che Jesucriston', na' le-gaque' gosenelagüe' che beñe' ca' chesejni-laže' Jesucriston' na' gosone' cont beñe' ca' bi zjanac beñe' Israel gosezolagüe' besege'ede' Pablon' len Bernabén'. ³ Perw na' Pablon' len Bernabén' besyega'añe' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' beñachen', le be'e le-gaque' yela' guac cont gosone' da' zaca' yebanecho cont gosaclene' beñe'. ⁴ Na' beñe' ca' že' lo' yežen' gosaque' chople, ba'e' gosede'e beñe' Israel ca' ben' bi gosejni-laže' Jesucriston' na' yeba'e' gosede'e Pablon' len Bernabén'. ⁵ Nach beñe' Israel ca' gosone' yela' güexi'a len beñe' ca' cbi zjanac beñe' Israel na' len justis čhegaque' cont yesone' contr Pablon' len Bernabén' na' yosočhele' le-gaque' yej. ⁶ Perw cate' gwneze Pablon' len Bernabén' dan' chesac-laže' yesone' len le-gaque', bosyoxonje' jaya'aque' yež Litra na' yež Derbe na' yezica'chle yež ca' zjachi' distritw dan' nzi' Licaonia. ⁷ Na' lecz goseyixjue'ede' xtiža' Xancho Jesucriston' len beñe' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to beñe' golje' nxiñj ni'e ca', cate' gocte' bidao' bi goc se'e. ⁹ Con chiteze' chzenague' choe' Pablon' dižan'. Nach Pablon' gwneze le' na' gocbe'ede' bena' chejle'e Diosen' nape' yela' guac cont yeyone' ni'en'. ¹⁰ Nach Pablon' boł güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'. ¹¹ Na' že' beñe' zan chesene'e can' goquen' na' le-gaque' bososye'e gosene' diža' Licaonia:

—Xancho beñe' ca' chejni-laže'cho ba gosetje' nga chesone' yela' guac, na' chle'etecho le-gaque' ca' beñach.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'. ¹³ Na' yodao' gan' chesonxene' xangaque' Júpiteren' zoan cho'a yež. Na' bxož che Júpiteren' jaxi'e goñ be ba zjanone' xdan zjanžie' le-gacba' corona yej. Nach bxoža' gwče' beñe' zan cho'a yežen' gan' zoa puert che ze'e dan' nyechj yežen' na' goclaže' yesote' goñen' yesonxene' postlw ca'. ¹⁴ Na' Pablon' len Bernabén' cate' gosacbe'ede' can' yeson beñe' ca', gosečheza' xangaque' dan' bi gosac-laže' yesonxen beñe' ca' le-gaque'. Nach gosodie' gachol beñe' ca' gose'e le-gaque' zižje:

¹⁵ —Beñe', žbixchen' chonle ca'? Lecz beñaçh neto'. Za'to' cont chyixjue'eto' le'e cheyała' gwša' yichjlaž-da'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocañe. Le' bene' yaban', yežlion', nisdaon', beñaçh, be ca' chesaš na' bite'tezechle da' chle'echo le'e yaban', lo yežlion' na' lo nis. ¹⁶ Cani' Diosen' bi bžone' gon beñaçhen' bite'tez da' mal da' žan yesone'. ¹⁷ Perw zoacze' chone' da' güen len yogo' beñaçh cont yesenežde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

¹⁸ Na' la'czla' Pablon' len Bernabén' gosene' yogo' da' ca', cañe gosezoede' bosožone' yesot beñe' Listra ca' go'ñna' yesonxene' legaque'.

¹⁹ Nach besežin bał beñe' Israel beñe' nita' yež Iconio na' ciuda Antioquia dan' chi' distritw Pisidian', na' beñe' ca' gosego'oyele' beñe' Listra ca' cont gosaque'ne' t xen bosožele' Pablon' yej. Na' cate' gosone' xbač baçh gote' nach gosexobe' le' cho'a yeža' na' bosyocua'añe' le' na'. ²⁰ Perw na' beñe' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

²¹ Nach cate' besežine' Derben' bosozende' beñe' ca' že' na' diža' güen che Jesucriston', na' beñe' zan gosone' t xen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. ²² Na' to to yež gan' ja'aque' gosone' chaçh laže' beñe' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. ²³ Na' to to yež ga besyedie' gosebeje' beñe' yosogüia yesene'e yezica'chle beñe' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' beñe' ca' ba chesejnilaže' le'.

Pablon' len Bernabén' jaya'aque' Antioquia gan' mbane distritw Siria

²⁴ Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. ²⁵ Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia. ²⁶ Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le beñe' Antioquíanan' gosele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' beñe' xtiže'na'. Na' na'a besyežine' ba beyož gosone' dan' gosego'o beñe' ca' lo na'gaque' yesone'. ²⁷ Na' bosyotobe' beñe' ca' chesonxene' Jesucriston' na' gose'ene' yogo'lo' can' ben Diosen' len legaque' šlac zja'aque', can' goclene' legaque' cont zan beñe' bi zjanac beñe' Israel ba gwzolao chesejnilaže' Jesucriston'. ²⁸ Na' besyega'añe' Antioquían' sša len beñe' ca' chesonxene' Jesucriston'.

Gosone' yela' güexi'a len beñe' ca' že' ciuda Jerusalénna'

¹⁵ Na' šlac Pablon' len Bernabén' ñe' nite' ciuda Antioquían' besežin to chope beñe' za'ac distritw Judean' na' gosezologüe' bososejni'ide' beñe' ca' chesonxen Jesucriston' na'. Gose'ene' yogo'lo' beñe' byo cheyała' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban chegaque' toli tocañe. ² Na' Pablon' len Bernabén' gosacyože' len beñe' ca' za'ac distritw Judea dan' chosozejni'ide' ca'. Nach beñe' ca' chesonxene' Jesucriston' Antioquían' goseçhoglagüen' šja'ac to chope' Jerusalén len Pablon' na' Bernabén'. Šja'aque' šjasene'e postlw ca' že'na' na' len beñe' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i beñe' ca' za'ac distritw Judean'.

³ Nach beñe' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' beñe' ca' zja'aquen' gosodie' distritw Fenicia na' distritw Samaria. Na' yež ca' gan' že' beñe' chesonxene' Jesucriston', beñe' ca' zja'aquen' gose'e legaque' zan beñe' bi zjanac beñe' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach beñe' ca' že' distritw Fenicia na' distritw Samaria besyebchgüede' gosende' dižan'.

⁴ Na' cate' Pablon' len Bernabén' besežine' Jerusalénna', beñe' ca' chesedop chesežag chesonxene' Jesucriston', na' postlw ca' na' len beñe' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lo' can' ba goclen Diosen' legaque'. ⁵ Nach nita' to chope beñe' Fariseo beñe' ba chesonxene' Xancho Jesucriston', na' tgüeje tgüeje' gosezie' gosene'.

—Note'tez beñe' byo gonxene' Jesucriston' cheyała' soe' señw dan' nzi' circuncisión na' cheyała' gone' can' ža ley dan' bzoj da' Moisésen'.

⁶ Nach besedobe postlw ca' len beñe' ca' chosogüia chesena' lježgaque', na' bosoxi'e še naquen can' chesena beñe' ca'. ⁷ Ba chac sša cheso'e dižan' cate' gwzoža' Pedron' gože' legaque'.

—Beñe' migw, ñezele ba goc zan iz Diosen' gwleje' neda' jatixjue'eda' diža' güen che Jesucriston' len beñe' ca' bi zjanac beñe' Israel cont gosejle'e che'. ⁸ Na' Diosen' nombi'e yichjlaždao' yogo'lo' beñe', na' cont ñezecho chacde' beñe' ca' bi zjanac beñe' Israel can' chacde' chio' naccho beñe' Israel, nacha' gwsele' Spiritw chen' gwyo'on lo' yichjlaždao' beñe' ca' can' ba gwyo'on lo' yichjlažda'ochon'. ⁹ Toz ca' chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesúcrison'. ¹⁰ Ba chonle contr Diosen' dan' chaquele gwçhile beñe' ca' bi zjanac beñe' Israel cont yesa'ogüe' costumbr che chio' beñe' Israel. Ñezele catec zdebe zjanaquen, ñe chio' ñe xozxta'ochon' ca' bi goc yesone' yogo' can' ža diža' gol çheto' ca'. ¹¹ Bi cheyała' goncho ca', le ñezecho note'tez naccho, Xancho Jesúsen' chone' yela' mban checho toli to-

caṇe dan' chacde' chio', gague ṇeṇe dan' choncho can' ža ley ṇe Moisés.

¹² Beyož gwna Pedroa' ca' nach bich bi gosena beṇe' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' beṇe' ca' bi zjanac beṇe' Israel. ¹³ Na' beyož goso'e dižan' nach postlw Jacobo be'e dižan', gwne': —Beṇe' migw, le gwzenag diža' nga gua'a. ¹⁴ Simón Pedro nga ba bzejni'ide' chio' can' ben Diosen' da' nechw len beṇe' bi zjanac beṇe' Israel cont blo'e chacde' legaque', ba gwleje' bale' cont zjanaque' lo ne'e. ¹⁵ Na' dan' goc ca' chotiḷen da' ca' bosozoj beṇe' goso'e xtiža' Diosen' cani', le nyojen žan:

¹⁶ Tena' yida' da' yoble na' gona' cont ṇabia' xi'iq diaža ṇe da' rey David,

la'czla' ṇa'a nono xi'iq diaža ṇe' chnabia', na' gona' cont soa toe' da' yoble ṇabi'e.

¹⁷ Gona' ca' cont yogo' beṇe' bi zjanac beṇe' Israel guac yesejiljue' nac yesone' yesenite' binlo len neda'. Note'tez beṇe' nación guac yosoḷ güiže' neda'.

¹⁸ Can' gwna Xancho Diosen' cani'te, bene' cont gosenze beṇe' can' gaquen'.

¹⁹ Na' laḡue nyoj Xtižen' žan ca', chacda' neda' bi cheyaḷa' gonecho zed beṇe' ca' bi zjanac beṇe' Israel beṇe' ba chesebejyichje' costumbr gole ṇegaque' na' chesonxene' Diosen'. ²⁰ Con gwzojcho ye'gacchone' bi yesone' txen len bi dan' cheson beṇe' dan' chesene' naquen ṇe ḷ gua'a ḷsaca' dan' chesonxene', ṇeca yesata'lene' no no'ol cbi nac no'ol ṇegaque' o beṇe' byo cbi nac beṇe' ṇegaque', ṇeca yesagüe' be chesote' chosošoque' do ḷba'ba', ṇeca yesagüe' chen ṇe beyixe'. ²¹ Nabcho bi yesone' da' ca', le cani'te nita' beṇe' to to yež chosozejni'ide' ley ṇechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža ṇe Dios.

²² Nach postlw ca' len beṇe' chosogüia chesene'e yezica'chle beṇe' chesonxene' Jesucriston', na' len beṇe' chesedop chesežag, gosazlaže' can' gwna Jacobon', na' bosoxi'e choj ṇhope beṇe' lježe' šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac beṇe' blao len legaque'. ²³ Na' bosozoje' to cart da' gosoxe' beṇe' ca' žan:

“Neto' postlw, len beṇe' chosogüia chesene'e yezica'chle beṇe' chesonxene' Jesucriston', na' len yogo' beṇe' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle beṇe' Israel perw ba nac lježcho chonxenchon' Jesucriston'. ²⁴ Ba ṇezeto' to ṇhope beṇe' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyaḷa' soale seṇw dan' že' circunciación na' cheyaḷa' gonle yogo' bichle dan' ža ley dan' bzoj da' Moisésen'. Bi ṇezeto' gosa'aque' na' gague mandadw ṇe neto' gose'e le'e ca'. ²⁵ Da'nan' gwzoato' txen bento' yela' güexi'a gwlejto' ṇhope beṇe' quinga chseḷa'to' gan' zoalen', txen len postlw Pablon' na' len Bernabén', beṇe' ca'

chaquechgüeto'. ²⁶ ṇezeto' Pablon' len Bernabén' zan las ba ša' yesate' cheso'e xtiža' Xancho Jesucriston'. ²⁷ Na' chseḷa'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga. ²⁸ Chazlaže'to' can' bzejni'i Spiritw ṇe Diosen' neto', na' da'nan' bi gonto' mandadw bichle da' zdebe gonle san da' quinga chaqueto' chonen byen cbi gonlen. ²⁹ Bi gagwle yela' guagw dan' ba bosožie' lo ḷ gua'a ḷsacan' chesonxenen', na' bi gagwle be ca' chesote' chosošoque' do ḷba'ba', bi gagwle chen ṇe beyixe', na' bi gata'lenle no'ol cbi nac no'ol ṇe o beṇe' byo ben' cbi nac beṇe' ṇe. Na' še gwzenagle ṇe da' quinga ba gwnato' bi gonle, güenṇa' chonle že ca'. Da' na'ze chzojto' le'e cart nga. Diosen' gaclenšque' le'e.”

³⁰ Can' goquen' beṇe' ca' chesonxene' Jesucriston' Jerusalénṇa' goseselje' beṇe' ca' ṇhope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' beṇe' ca' chesonxene' Jesucriston' na' bosonežjue' legaque' carten' gosesela' beṇe' Jerusalén ca'. ³¹ Na' cate' beṇe' Antioquía ca' bosolaben' besyebede' ca' consejon' nyoj le'e carta'. ³² Na' Judasen' len Silasen' lecze gosaque' bosozende' beṇe' bin' ba gwna Diosen'. Nach gosoe'lene' beṇe' Antioquía ca' diža' zan gosone' ṇaḇ laže'gaque' na' gosaclene' legaque' cont gosonxenche' Jesucriston'. ³³ Gosenite' Antioquían' zan ža, nach cate' bžin ža šjaya'aque', beṇe' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénṇa' to šagüe' to güen. ³⁴ Na' Silasen' beḇhoglaže' yega'ane' Antioquían'. ³⁵ Na' Pablon' len Bernabén' gosenita'cze' Antioquían' na' txen len yezan beṇe' bosozejni'ide' beṇe' xtiža' Xancho Jesucriston'.

Pablon' gwyeje' da' yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjaṇa'cho nac cheson beṇe' ca'.

³⁷ Nach Bernabén' goclaže' šja'aque' na' yeseṇe'e Juan ben' lecze le Marcos. ³⁸ Perw Pablon' gwne' bi gonnen güen yeseṇe'ene' dan' gwlejyichj Marcosen' legaque' cate' besežine' distritw Panfilian' na' bi benlene' legaque' xšin Diosen'. ³⁹ Cate' gota'bia' ṇe toe' bi goclaže' gac can' ža ben' yeto, nach besyele'e. Bernabén' gwze'e gwṇe'e Marcosen' na' goso'e lo' barcw ja'aque' Chipren'. ⁴⁰ Na' Pablon' gwleje' Silasen' cont ṇe le'. Na' beṇe' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. ⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' ṇaḇ laže' beṇe' ca' chesedop chesežag chesonxene' Jesucriston'.

Timoteon' gwzologüe' chonlene' Pablon' na' Silasen' txen

16 Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to beñe' chonxene' Jesucriston' le' Timoteo. Xña' Timoteon' naque' beñe' Israel na' chonxene' Jesucriston', na' xen' naque' beñe' griego. ² Na' beñe' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. ³ Da'nana' Pablon' gwñabe' šejlen Timoteon' legaque', nach gwčhi'ene' gan' bosozoe' le' señw dan' že' circuncisión. Bene' ca' le yogo' beñe' že' na' goseñezde' xa Timoteon' bi naque' beñe' Israel na' Timoteon' biña' soe' señon', na' lecze Pablon' goclaže' yega'añe' güen len beñe' Israel ca'. Cate' beyož bzoe'ne' señua' na' gosa'aque'. ⁴ Na' to to yež ga be-sežine' bosozende' beñe' ca' chesonxene' Jesucriston' can' nac yeļa' güexi'a che postlw ca' len beñe' chosogüia cheseñe'e lježgaque' Jerusalénna' che da' ca' cheyaļa' yesone'. ⁵ Na' beñe' ca' chesedop chesežag chesonxene' Jesucriston' gosenita'čhače' gosejni-laže'ne' na' gwyanche' tža tža.

Pablon' ble'edagüede' to beñe' distritw Macedonia chata'yoede' le' šeje' laže'

⁶ Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nana' gosodie' yež ca' zjachi' distritw ca' gan' nzi' Frigia na' Galacia. ⁷ Be-sežinte' gaļa'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesúsena' latje šja'aque'. ⁸ Nach gosodie' gaļa'ze distritw Misian' na' besežine' ciuda dan' nzi' Troas dan' chi' cho'a nisdan'. ⁹ Nach že'na' Pablon' ble'edagüede' zecha to beñe' distritw Macedonia lagüe', che'e le': "Yo'o Macedonia cont gacleno' neto'." ¹⁰ Neda' Lucas gwzoo' len legaque' na' da' ble'edagüe Pablon' beñe' Macedonian', nach gwñezeto' chaclaže' Diosen' šjazeneto' beñe' Macedonia ca' diža' güen che Xancho Jesucriston'. Nach bsiñi'a četo' cont gwza'to' gwyejto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' chi' cho'a nisdan' gwyo'oto' to lo' barcw zejto' liča gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. ¹² Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to čop ža. Filipos naquen ciuda blaoch che distriton' gan' že' beñe' Roma. ¹³ Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjaseļ güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. ¹⁴ Toe' le Lidia naque' beñe' Tiatira na' chote' lache' güen da' nac color moradw, na' chonxene' Diosen' do yičj do laže'. Xancho Diosen' bene'

cont bzenague' che dan' bzejni'i Pablon' le'. ¹⁵ Nach le' len beñe' lo' yo'o che' gosezoe' nis. Gwdena' go-ta'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

¹⁶ Na' to ža zejto' gan' chosoļ güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yičjlažda'oben' chonen cont chac chñeya'abe', na' gan xen chombe' par xambe' ca' chñeya'abe'. ¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Beñe' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yeļa' mban čhele toļi tocañe.

¹⁸ Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yičjlažda'oben':

—Len yeļa' chnabia' che Jesucriston' chnia' le' bechoj lo' yičjlaždao' bi'nga.

Na' la' bechojte da' xigüen' lo' yičjlažda'oben'.

¹⁹ Na' gwdena' cate' gosacbe'e xambe' ca' ba bechoj da' xigüen' lo' yičjlažda'oben' na' bich bi gan yesone' len lebe', nach gosezene' Pablon' len Silasen' na' jas-esane' legaque' lagüe ya'a gan' že' beñe' ca' chesen-abia' ciudan'. ²⁰ Na' cate' besežine' gan' že' justis ca', gose'e legaque':

—Beñe' Israel quinga chesaše' chesebeque' da' zed lo' ciuda nga. ²¹ Na' chosolo'ede' costumbr da' bi de lsens gao' chio' naccho beñe' Roma.

²² Nach beñe' ca' lo' ciudan' gosase' contr Pablon' len Silasen', na' beñe' gwnabia' ca' gosone' mandadw goselechje' xagaque' cont goseyine' legaque' xis. ²³ Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwña'yañe' legaque' cont bi yesyechoje'. ²⁴ Beyož gose'e le' ca', nach bži'e legaque' lo' cuart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca' do chel, chosoļ güiže' Diosen' na' chesoļe' no himno chesonxene' Diosen', na' yezica'chle beñe' ca' zjade ližyan' chosozenague'. ²⁶ Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' beñe' ca' že' lo' ližyan'. ²⁷ Bosbanen ben' chape' ližyan' na' cate' ble'ede' ba zjanyaljo puert ca', la' goljte spada čhen' cont yeyot cuine', le bene' xbab ba bosyoxonj yogo' beñe' ca' zjade ližyan'.

²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwñabe' to yi', na' gwyo'osese' zjane'e gan' de Pablon' len Silasen'. Do chxizze' bzoo xibe' lao beñe' ca', le chžebchgüe'. ³⁰ Na' la' bebejte' legaque' lo' cuart gan' zjajo'en', che'e legaque':

—¿Bi cheyaļa' gona' cont gata' yeļa' mban čhia' toļi tocañe?

³¹ Nach gose'e le':

—Gwyejnilaže' Xancho Jesucriston', le' na' beņe' lo' yo'o čhio', na' gata' yeļa' mban čhele toļi tocaņe.

³² Nach ben' chape' ližyan' gwčhe'e legaque' ližen' na' gosoe'lene' le' len beņe' lo' yo'o čhen' xtiža' Xancho Jesucriston'. ³³ Nach ca hora' ben' chap ližyan' gwdibe' lo' güe' čhe Pablon' na' čhe Silasen', na' gwdena' jasoe' nis len beņe' lo' yo'o čhe' ca'. ³⁴ Nach ben' chape' ližyan' bečhe'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len beņe' lo' yo'o čhe'.

³⁵ Cate' ba gwyeni' beņe' gwnabia' ca' gosesele' xa'ag jaseže' ben' chap ližyan' yosane' beņe' ca' šjaya'aque'.

³⁶ Nach le' gože' Pablon':

—Beņe' gwnabia' ca' bač gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yeļa' justis čheto' še bi nonto' na' gosegüe'e neto' ližya, len nacto' beņe' nación Roma. ¿Na' chesone' xbab yosane' neto' šižiže? Bi gac, san yesid cuine' yesyebeje' neto'.

³⁸ Nach xa'ag ca' jasyeyeže' beņe' gwnabia' ca' can' gož Pablon' legaque'. Na' beņe' ca' besežebe' cate' goseņezde' Pablon' len Silasen' zjanaque' beņe' nación Roma. ³⁹ Nach beņe' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo' ciudan'. ⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' čhač laže' beņe' ca' chesonxene' Jesucriston' na' beyožen' besyeya'aque'.

Beņe' Tesalónica ca' gosone' contr Pablon'

17 Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' čhe beņe' Israel. ² Na' Pablon' ca' costumbr čhe' gwyeje' yodao' ža čhe Dios. Na' ca' goc, šoņe ža čhe Dios be'lene' legaque' diža'. ³ Bzejni'ide' legaque' gože'ne' beņe' ca' goso'e xtiža' Diosen' cani' bosozoje' xtiža' Criston'. Gosone' ben' seļa' Dios yedenabi'e, cheyaļa' yosoči yososaca' beņe' le' na' yesote'ne' na' techle yeyas yebane' ladjo beņe' guat ca'. Gože' beņe' Tesalónican':

—Jesúsen' ben' choa' diža' čhe', le'na' Criston' ben' gwseļa' Dios cont nabi'e.

⁴ Nach baļ beņe' Israel gosejle'e xtiža' Pablon' len Silasen' na' gosaque' txen len legaque', na' lecze zan beņe' griego beņe' chesonxen Diosen' na' zan no'ole blao lecze gosejle'e. ⁵ Perw gwnita'ch beņe' Israel beņe' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj beņe' mal beņe' chesaš lagüe ya'a na' gosaque' txen gosone' cont gwche' žaš doxen ciudan'. Nach beņe' že' lo' ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'. ⁶ Cate' besežine' liž Jasónna', noch no beņe' ca' nita'. Nach cate' bi besyeželde' Pablon' len Silasen', na' gosoxe' Jasónna'

len yebaļ beņe' chesonxene' Jesucriston' na' goseče'e legaque' lao beņe' ca' chesenabia' ciudan', na' bososye'e gosene':

—Beņe' ca' nita' liž benga chesaše' chesebeque' da' zed doxen, na' ņa'a ba besele'e gan' zoacho nga.

⁷ Jasón ni ba blebe' legaque' ližen', na' bi chesone' can' ža ley čhe César ben' nac la'zelagüe beņe' gwnabia' čhechon' chi' ciuda Roman', na' chesene' zoa yeto rey beņe' le Jesús beņe' nabi'e čhio'.

⁸ Na' cate' gosende' diža'na', beņe' lo' ciuda ca' len beņe' gwnabia' čhegaque' ca' gosebecche' žaš. ⁹ Nach Jasónna' len beņe' lježe' ca' bosozie' mechw cont beņe' gwnabia' ca' bososane' legaque', con še bich yesyežin Pablon' na' Silasen' lo' ciudan', chesene'.

Pablon' len Silasen' ja'aque' yež Berea

¹⁰ Nach že'na' beņe' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' čhe beņe' Israel ca'. ¹¹ Na' beņe' Israel ca' že' Berean' zjanacche' beņe' šagüe' clel ca' beņe' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i beņe' ca', cont yesenezde' še le can' žan. ¹² Na' zane' gosejle'e xtiža' Xancho Jesucriston' na' lecze zan beņe' griego ca' na' zan no'ole blao. ¹³ Nach beņe' Israel ca' že' Tesalónican' beņe' ca' cbi chesejle' čhe Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont beņe' Berea ca' lecz gosone' contr Pablon'.

¹⁴ Perw na' beņe' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'. ¹⁵ Na' to čhop beņe' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwseļe' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsd blo'ede' beņe' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlaž-da'ogüe' da' ble'ede' da' zan l' gua'a ļsaca' da' chesejni-laže' beņe' ca'. ¹⁷ Da'n'an' bzejni'ide' beņe' Israel ca' lo' yodao' čhegaque'na' len yezica'chle beņe' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len beņe' ca' že'na'. ¹⁸ Nach beņe' ca' že'na' gwzolao chesoe'lene' le' diža'. Baļe' chesejle'e dan' bzejni'i to beņe' le' Epicuro, na' yebaļe' chesejle'e dan' bosozoj beņe' ca' chesene' estoico. Na' baļe' gosene':

—¿Bin' chon ža benga?

Na' yebaļe' gosene':

—Čačļjede' gwzejni'ide' čhio' čhe no beņe' cobe beņe' šejnilaže'cho.

Gosene' ca' le Pablon' ba bzejni'ide' legaque' xtiža' Jesús'en' na' ba be'e diža' Jesús'en' bebane' ladjo beņe' guat. ¹⁹ Nach goseče'e Pablon' to latje dan' nzi' Areópago gan' chesedobe beņe' blao čhegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'. ²⁰ Biņa' yeneto' diža' can' nac dan' cho'o nga na' chaclaže'to' nežeto' bi zejen yogo' da' ca'.

²¹ Ca nac beņe' Atenas ca', de costumbr čhegaque' yogo' ža con chesaše' cheso'e diža' o chosozenague' čhe bi da' cobe da' de, na' lecz ca' cheson no beņe' zito' že' Atenas.

²² Nach Pablon' gwzeche' gacho' legaque' gan' chesone' yeļa' güexi'a na' gože' legaque':

—Le'e beņe' Atenas, chacbe'eda' leca chejnilaže'le zan l' gua'a lsaca'. ²³ Cate' gwdia' tnez ble'eda' gan' chonxenle zan l' gua'a lsaca', na' ble'eda' to latje gan' nyojen žan: "Čhe Xancho ben' nono nombia'." Na' ca nac ben' chonxenle sin cbi nombia'ine', čhe benan' chyixjue'eda' le'e.

²⁴ Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon beņachen' cont soe' len chio'. ²⁵ Bibi chyažje Diosen' gwnežjo beņachen' le', na' bibi gac yesone' yesaclene' le'. Diosen' cho'e yeļa' mban čhe yo-golo' beņe', cho'e legaque' biš grasyw na' cho'e legaque' yogo' bi da' zjanape'.

²⁶ Diosen' bene' beņe' nechon', na' toz ca nac yogo' beņach xi'in diaža čhe'. Na' bsi'e xņeze bat nita' to toe' na' ga yesenite'. ²⁷ Diosen' bnite' yogo' beņachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. ²⁸ Le' chone' cont zoacho mbancho na' chdacho. Nac da' li can' gosena to čhope beņe' poeta čhele ben' goso'e diža' xdan, gosene': "Naccho diaža čhe Diosen'."

²⁹ Na' dan' naccho diaža čhe Diosen' bi cheyaļa' goncho xbab nac Diosen' ca no l' gua'a lsaca' de oro, de plata o de yej. Chesaljšaže' beņachen' chesone' da' ca'. ³⁰ Cani' Diosen' be'e latje goson beņachen' con ca gwna xbab čhegaque' yeļa' cbi chejni'i čhegaque', perw na'a Diosen' chone' mandadw yogo'lo' beņe' že' doxen yežlion' yesebejyichje' da' malen' chesonen'. ³¹ Diosen' chaclaže' cuejyichjcho da' malen', le ba mbeje' Jesucriston' gone' yeļa' justis čhe yogo' beņach na' gwnežjue' castigw čhe yogo' beņe' cbi chesejnilaže' le', na' Diosen' zejcz'e to l'icha dan' gone' ca'. Na' Diosen' ba nžie' bia' bat gone' yeļa' justis čhe beņach. Na' dan' bosban Diosen' Jesucriston' ladjo beņe' guaten', nezecho Jesucristwnan' gone' yeļa' justis čhe beņachen'.

³² Cate' beņe' Atenas ca' beyož gosende' gwna Pablon' yesyeban beņe' guat ca', baļe' gosezi'diže' le' na' yebaļe' gose'ene':

—Na' gwzenagto' xtižon' yeto ža yoble.

³³ Can' goc beža' Pablon' latje gan' že' beņe' ca'.

³⁴ Perw baļ beņe' Atenas ca' gosaque' Pablon' txen na' gosonxene' Jesucriston'. Na' beņe' ca' gosaque' Pablon' txen len to beņe' byo le Dionisio na' yeto no'ole le Dámaris. Na' Dionisio' naque' txen len beņe'

gwnabia' ca' ben' cheson yeļa' güexi'a gan' nzi' Areópago.

Ca goc šlac zoa Pablon' Corinto

18 Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto. ² Cate' bžine' Corinton' bežague' to beņe' Israel le' Aquila beņe' naque' beņe' distritw Ponto, na' len no'ol čhe' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca hora' doxen gan' mbane naciónna', bene' mandadw besyežaš yogo' beņe' Israel ca' že' ciuda Roma. Nach Pablon' gwyeje' jaņe'e Aquilan' len Priscilan'. ³ Xšingaque' naquen chesone' yo'o de lache', na' toze ca nac xšin Pablon'. Nach bega'aņe' gosenite' txen na' gosone' žinņa' txen. ⁴ Na' yogo' ža čhe Dios Pablon' gwyeje' yodao' čhe beņe' Israel ca' jazejni'ide' legaque' čhe Jesucriston', cont baļ beņe' Israel len baļ beņe' bi zjanac beņe' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'ch Pablon' bsane' xšinen' cont gota'ch latje gwduxjue'ede' xtiža' Jesús'en' na' bzejni'ide' beņe' Israel ca' Jesucristwnan' naque' beņe' chesebeze' seļa' Diosen' yedenabi'e. ⁶ Perw beņe' Israel ca' beseže'e Pablon' na' bosožie' yeļa' ya' čhe'. Nach Pablon' gwšibe' xe'na' cont blo'e chbejyichje' legaque', gwne':

—Bibi doļa' napa' dan' cuiayi'le toļi tocaņe. Le'e naple doļa'. Na' na'a šjased šjalo'eda' beņe' ca' bi zjanac beņe' Israel.

⁷ Nach bechoje' lo' yodao'na' na' beze'e bežine' liž to beņe' le Justo. Justo na'na' zoe' chonxene' Diosen' na' liže' zoan cuit yodao'na'. ⁸ Na' to beņe' le' Crispo naque' beņe' gwnabia' čhe yodaon'. Na' Crispon' len yogo' beņe' lo' yo'o čhe' gosaque' txen chesejle'e čhe Xancho Jesucriston'. Na' yezan beņe' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. ⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize.

¹⁰ Neda' zoa' len le' na' bi goņa' latje no gone le' da' mal, le beņe' zan že' lo ciuda nga beņe' chesonxene' neda'.

¹¹ Ca' goquen' bega'aņ Pablon' Corinton' tgüiz yogašje bsed blo'ede' legaque' xtiža' Diosen'.

¹² Na' ca tiempen' ben' le Galión naque' gobernador distritw gan' nzi' Acaya. Nach beņe' Israel ca' nita' ciuda Corinto beņe' cbi chesonxen Jesucriston' gosaque' toze gosone' contr Pablon'. Na' goseče'ene' jas-esane'ne' gan' chon gobernadores' yeļa' justisen'.

¹³ Na' cate' besežine'na' gose'e gobernadores':

—Benga chde' chgo'oyeļe' beņe' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley čhechon'.

¹⁴ Bač zoa ne Pablon' cate' gobernador Galiónna' gože' beņe' Israel ca':

—Ca nac xya dan' chagwle nga, šaca' naquen to da' xiņj o to da' malchgua, gonan' yeļa' justis. ¹⁵ Perw

naquen ɕhe diža', na' ɕhe beɲe', na' ɕhe ley ɕhelen'. Da'nan' le gwye' nacle gonle. Bi co'o lo na' gona' yela' justis ɕhe dan' nac ca'.

¹⁶ Nach bešaše' legaque' gan' chone' yela' justisen'.

¹⁷ Nach beɲe' ca' bi zjanac beɲe' Israel gosenize' Sóstenes ben' ba nac beɲe' gwnabia' ɕhe yodaon', gosot goseyine' le' lao gobernador Galiónna', perw be-na' bibi cuent bene' legaque'.

Pablon' beyeje' Antioquían' da' yoble

¹⁸ Na' bega'ɲɕ Pablon' ciuda Corinton' yezan ža be-yož goc da' ca', na' cate' beze'ena' gože' beɲe' ca' chesonxen Jesucriston': "Nayežagcho", nach beze'e tx-en len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' baɕh beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. ¹⁹ Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ɲe' Efeson'. Na' Pablon' gwyeje' yodao' ɕhe beɲe' Israel ca' je'lene' beɲe' ca' ba zjandob na' xtiža' Dios. ²⁰ Na' beɲe' ca' že' lo' yodaon' gosata'yoede' le' yega'ɲɕhe' len legaque', perw bi goclaze'. ²¹ Nach gože' legaque':

—Nayežagcho, le chonen byen soa' lɲi dan' šo' ciuda Jerusalénna', perw güidchcza' deɲa'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. ²² Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox beɲe' ca' chesedop chesežag chesonxene' Jesucriston'. Nach beze'e beyeje' ciuda Antioquían'. ²³ Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' ɕhaɕh laže' beɲe' ca' chesonxene' Jesucriston'.

Apolos gwduxjue'ede' xtiža' Diosen' ciuda Efeson'

²⁴ Na' ca tiemp na' bžin to beɲe' Israel ciuda Efeson' beɲe' le Apolos. Naque' beɲe' ciuda Alejandría. Le' chac cho'e diža' güen lao yogo' beɲe', na' ba nsede' binlo doxen Xtiža' Diosen' dan' nyoj. ²⁵ Apolosen' chejle'e dan' bzejni'i Juanna' ɕhe Xancho Jesúsén' na' nezde' can' bzoe' beɲe' nis caten' besyetingde' xtoła'gaquen'. Na' Apolosen' be'e diža' do yichj do laže' bzejni'ide' binlo ɕhe Jesúsén', la'czla' con dan' bsd blo'e da' Juan na'zen' nezde'. ²⁶ Nach Apolosen' gwzola' be'e diža' ɕhe Xancho Jesucriston' lo' yodao' ɕhe beɲe' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' ɕhe Jesucriston' da' ca' biɲa' nezde'. ²⁷ Gwdena' cate' Apolosen' bene' xbab šeje' distritw gan' nzi' Acaya, beɲe' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' beɲue' ɕhe beɲe' ca' chesonxen Jesucriston' distritw Acaya cont beɲe' ca' bosolebe' le'. Na' Diosen' nži'ilaže' beɲe' Acaya ca' na' ba goclene' zane' cont chesejnilaže' Xancho Jesu-

criston'. Na' cate' bžin Apolosen' Acayan' be'lene' le-gaque' diža' da' goclenguan legaque'. ²⁸ Bzejni'ide' yogo'lo' bene' gože'ne' clelen' cheson beɲe' Israel gualaž ɕhen' bi chesejle'e ɕhe Jesúsén'. Bzejni'ide' le-gaque' can' nyoj Xtiža' Diosen' žan Jesúsén' naque' Cristo ben' chesebeze' yedenabi'e.

Šlac gwzoa Pablon' ciuda Efeson'

19 Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bał beɲe' chesonxene' Jesucriston'. ² Na' gože' legaque': —Zedesoa Spiritw ɕhe Diosen' lo' yichjlažda'olen' caten' gwzola' chejnilaže'le Jesucriston'? Nach gose'e le': —Bi nezeto' še zoa Spiritw ɕhe Diosen'. ³ Nach Pablon' goze'e legaque': —Bi dižan' chejle'le da' gwzoale nisen' še ca'? Nach gose'e le': —Gwzoato' nis can' bzejni'i da' Juanna'. ⁴ Nach gož Pablon' legaque': —Da' Juanna' bzoe' beɲe' nis cate' besyetingje xtoła'gaque' na' lecce gože' legaque' cheyala' yesonxene' bena' za' seła' Diosen'. Na' da' gwne' ca' be'e diža' ɕhe Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsén'. ⁶ Nach Pablon' gwzoa ne'ena' yichj to toe' na' Spiritw ɕhe Diosen' gwzoan lo' yichjlaždao' to toe', nach gosen' diža' da' cbi chesejni'ide' na' goseyixjue'ede' bi dan' gož Diosen' legaque'. ⁷ Na' yogo' beɲe' ca' zjanac ca do šižinue'.

⁸ Na' do šone bio' Pablon' bsd blo'ede' beɲe' ca' chesedop chesežag lo' yodao' ɕhe beɲe' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo' na' Diosen' cont ɲabi'e legaque' len xbab ɕhegaquen'. ⁹ Na' bchoj bał beɲe' güedenag beɲe' cbi chesejle'cze', na' lao beɲe' ca' že' yodao'na' gosen' diža' ya' ɕhe xtiža' Jesucriston' dan' chzejni'i Pablon'. Da'nana' Pablon' bechoje' gan' že' beɲe' ca' na' bebeje' ben' ba chesonxene' Jesucriston' na' gwɕhe'e legaque' gan' zoa to yo'o xen ɕhe to beɲe' le' Tiranno na' bzejni'ide' legaque' yogo' ža. ¹⁰ Na' gwzoa Pablon' ɕhop iz bzejni'ide' beɲe' ca', na' can' goc, yogo' beɲe' že' distritw Asia gosende' xtiža' Xancho Jesúsén', beɲe' zjanac beɲe' Israel lente beɲe' bi zjanac beɲe' Israel. ¹¹ Na' Diosen' bchine' Pablon' cont bene' yela' guac da' besyebanchgüe beɲe'. ¹² Na' jasesane' no bay no lache' da' ba bchelen Pablon' gan' zjade beɲe' güe' na' la' chesyeyactede' bi yižgüe' chese'ede', na' beɲe' ca' yo'o nyaz da' xigüe' yichjlažda'ogaque'na' lecce besyechojen.

¹³ Lecce chesaš bał beɲe' Israel chesyebeje' da' xigüe' da' zjajo'o lo' yichjlaždao' beɲe' na' gosaclaže' yosočhine' la Xancho Jesúsén' cont yesyebeje' da' xigüe' ca', nach gose'e da' xigüen':

—Len yela' chnabia' ɕhe Jesúsén' ben' choe' Pablon' xtiže'na' chonto' mandawd yechojle.

¹⁴ Na' zoa to bꝥoz gwnabia' ꝥhe beṇe' Israel le' Esceva, na' nita' gaže xi'ine'. Na' beṇe' quingan' bosocḥine' la Jesúsen' gosacłaze' yesyebeje' da' xigüen'. ¹⁵ Nach goc to šlas chesone' ca' cate' to da' xigüen' boži'in xtižen', gožen leḡaque':

—Nombi'a Jesúsen' na' ba benda' diža' ꝥhe Pablon', perw bi nombi'a le'e cont šejli'a xtiža'len'.

¹⁶ Nach bena' yo'o nyaz da' xigüen' bxite' gwnize' beṇe' ca' betlate' leḡaque' na' gwꝥheze' xałana'gaque'. Nach bosyoxonje' liž bena' ga'alyide' na' bedo chen zjanaque' dan' bene' leḡaque' zi'. ¹⁷ Na' goslas diža' can' goquen' goseṇezete yogo' beṇe' že' Efeson', beṇe' Israel lente beṇe' cbi zjanac beṇe' Israel. Nach yogüe' besežebe' na' gosacbe'ede' Xancho Jesúsen' naque' beṇe' zaque'.

¹⁸ Nach beṇe' zan ba chesejle'e xtiža' Xancho Jesúsen', na' zane' gosexoadole' lao beṇe' ca' chesedop chesežag chesonxene' Jesucriston' cheso'e diža' ꝥhe da' malen' ba gosone'. ¹⁹ Na' beṇe' ca' gosac beṇe' guaža' na' beṇe' güeṇe ya'a bosyotob libr ꝥhegaquen' na' gosoxen' bosozeyen' lao beṇe' lježe' beṇe' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. ²⁰ Can' goc, beṇe' zan gosende' xtiža' Xancho Jesucriston', na' gwyanch beṇe' bosozenague' ꝥhe'.

²¹ Nach gwde goc da' ca' Pablon' bene' xbab yeyeje' Jerusalénna', na' gocłaze' yedie' šjayṇe'e beṇe' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecce cheyał'a šeje' ciuda Roma. ²² Na' gwleje' ꝥhope beṇe' chesonlene' le' xšin Diosen' na' gwsele' leḡaque' distritw Macedonian', zjale' Timoteo na' Erasto, perw na' le' bega'aṇche' distritw Asian' yeto ꝥhope ža.

Beṇe' ca' besegue'ede' Pablon' gosebecḡgüe' da' zed ciuda Efeson'

²³ Na' gwche' to da' zed gual ciuda Efeson', le nita' beṇe' beseže'e xtiža' Jesúsen' dan' bsd blo'e Pablon'.

²⁴ Quinga goc: gwzoa to beṇe' le' Demetrio beṇe' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' beṇe' ca' gosonlene' žinṇa' gosonchgüe' gan, le gwda'ochguan.

²⁵ Nach btobe' beṇe' ca' goson žin txen len le' na' nochle beṇe' goson žin dan' nac ca', na' gože' leḡaque':

—Nezele ca nac žin dan' ṇlancho choncho nga, chonlenchon gan xen. ²⁶ Na' ba beneczele na' ba ble'eczele can' chon to beṇe' le Pablo chsed chlo'ede' beṇe' lo ciuda Efeso ꝥhecho nga na' lecce chsed chlo'ede' zan beṇe' že' doxen distritw Asia nga, che'e leḡaque' bibi zaca' l gua'a lšaca' da' cheson beṇaṇchen' cont chesejnilažen'. Na' beṇe' zan ba chosozenague' ꝥhe' na' chesebejyichje' dan' chejnilaže'cho. ²⁷ Le gonšč xbab nacle goncho, le xož yesene' ꝥhe žin dan' choncho nga, na' gague lezen, san leccz xož yesone' cont yodao' ꝥhe xonax Diana ꝥhechon' yega'aṇen ca to da' bibi zaca' na' len yeł'a chze na' yeł'a zaca' ꝥhe xonaxen'. Na' nezele ca nac xonax Diana ꝥhechon', yogo'cze beṇe'

distritw Asia nga na' beṇe' gate'tezechle chesonxene' le'.

²⁸ Beyož gosende' xtiža' Demetrio' beselocḡgüe' na' bososye'e gosene':

—Lecca beṇe' zaca' xonax Diana ꝥhe chio' beṇe' Efeso.

²⁹ Nach gwche' da' zed doxen lo ciudan', na' gosaque' toze' jaseṇize' ꝥhope beṇe' distritw Macedonia beṇe' gosaque' txen len Pablon', toe' le Gayo na' yetoe' Aristarco. Na' gosexobe' leḡaque' besežine' gan' chesedobe yogo' beṇe' lo ciudan'. ³⁰ Na' Pablon' gocłaze' šo'e gan' zjandobe beṇe' ca' cont güe'lene' leḡaque' diža', perw beṇe' ca' chesonxene' Jesucriston' lo ciudan' bi gosoe' latje šo'e. ³¹ Bał beṇe' zjanaque' beṇe' gwnabia' distritwna' zjanac xmigw Pablon' na' lecce gosesele' rson gose'e Pablon' bi šeje' gan' zjandobe beṇe' ca'.

³² Na' beṇe' ca' zjandoben' gosone' sšag juisyw. Gwde gwdele bososya'a to toe'. Na' beṇe' zan bi zjaṇezde' biḥen' zjandobe'na'. ³³ Beṇe' Israel ca' bosožigue' to beṇe' le Alejandro lao beṇe' ca' že'na' cont be'lene' leḡaque' diža', na' bosozejni'ide' le' bin' cheyał'a ṇe'. Na' Alejandron' gwłis ne'e cont gwṇabe' nite' šize yosozenague' diža' dan' güe'e laogaquen' gwzoe' rson ꝥhe beṇe' ca' chesejnilaže' Jesucriston'. ³⁴ Perw cate' besele'ede' le' gosacbe'ede' lecce naque' beṇe' Israel, na' besyezolagüe' da' yoble bososye'e, gosene':

—Beṇe' zaca' juisyw xonax Diana ꝥhe chio' beṇe' Efeso.

Ca do ꝥhop hor bososye'e ca' da' bi chesonxen beṇe' Israelen' xonax ꝥhegaquen'.

³⁵ Na' beṇe' güezoj ꝥhegaquen' caṇe goc bebecžie' leḡaque'. Na' gože'ne':

—Le'e beṇe' gualaž, yogo' beṇe' že' doxen yežlion' zjaṇezde' naquen ꝥhecho gapši'icho yodao' ꝥhe xonax Dianan'. Naque' beṇe' zaque', le l gua'a lšaca' čhen' blažon' le'e yaba. ³⁶ Na' nono gac ṇa da' yoble. Da'nan' le soa šize na' bich gonle da' bi zejen. ³⁷ Na' ca nac beṇe' quinga ṇche'ele nga, bibi ṇa' yesebane' lo' yodao' ꝥhecho ca' na' ṇeca ṇacho chosožie' yeł'a' ya' ꝥhe xonax Diana ꝥhechon'. ³⁸ Na' Demetrio nga len yezi-ca'chle beṇe' lježe', še chac bi chac ꝥhegaque' len beṇe' yoble, nita' beṇe' gwnabia' ꝥhechon' cont yesone' yeł'a' justis ꝥhegaquen', con šja'aque' yeso'e leḡaque' part še ca'. ³⁹ Na' še bichle da' chṇable gac, cheyał'a' goncho to yeł'a' güexi'a cont ꝥhoglaon. ⁴⁰ Perw ca nac žaš da' nga chac ṇa'a, xož baga'cho choncho contr gobiern can' že'cho nga, na' bibi de ye'gacchone' še yesenabe' bix-chen' goc žaš da' nga chac ṇa'a.

⁴¹ Beyož gože' leḡaque' ca' bene' mandadw besyežaše'.

Pablon' gwyejche' distritw Macedonia na' nación Grecia

20 Nach cate' beyož gwche'ži da' zeden', Pablon' goxe' beṇe' Efeso ca' chesonxen Jesucriston' cont ja'aque' gan' zoe'na' na' bene' ꝥhaḥ laže'gaque' cont yesenite' yesejnilaže' Jesucriston'. Nach gože' leḡaque': "Nayežagcho", na' goseyeł'a' lježe' na' beze'e beyeje' da' yoble distritw Macedonia. ² Na' gwdie' to to

yež da' zjachi' gała'ze Macedonian' bene' čačh laže' beņe' ca' chesonxene' Jesucriston', na' beyožen' gwyeyche' nación da' nzi' Grecia. ³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwņezde' zjachi'nao' beņe' Israel ca' le'. Da'nana' bene' xbab yeza' ni'e yedie' gan' mbane distritw Macedonia na'le. ⁴ Na' xonj beņe' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale beņe' ca': Sópater, beņe' yež Berea, na' Aristarco len Segundo ben' zjanac beņe' ciuda Tesalónica, na' Gayo beņe' yež Derbe, na' Timoteon' na' čhope beņe' za'ac distritw Asia, Tíquico len Trófimo. ⁶ Na' gwde lñin' cate' chesagüe' yetextil da' bibi levadura nčhixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' beņe' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmigw besedobe beņe' ca' chesonxene' Jesucriston' lo' ciuda Troasen' na' gwyejto' güe'ej gwdagwto' txen len legaue', na' Pablon' bzejni'ide' legaue' xtiža' Diosen'. Na' dan' ba zoa yeza' Pablon' ca' gwxeze nach be'e diža' bžinte do chel. ⁸ Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. ⁹ Na' to bi' güego' lebe' Eutico žiabe' cho'a ventan. Na' Pablon' ton zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo' che'ele. Nach cate' besyecose'be' bi' guat besyecose'. ¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' beņe' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len legaue'. Ne' choe'te' dižan' ca' cate' gwyeni'. Nach beze'e. ¹² Nach bi'na' blažo' cho'a ventanna', beņe' ca' že'na' besyech'e'be' besyechgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³ Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gwyejto' ciuda gan' nzi' Mitilene. ¹⁵ Bezsa'to' Mitilenen' na' beteyo bežinto' gała'ze to yežlio da' chi' lo' nisdaon' gan' nzi' Quío. Na' gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. ¹⁶ Ca' bento' bi' gwdeto' ciuda Efeson', le Pablon' bi' goclaze' šede' yež ca' zjachi' do distritw Asian'. Chacbyende' yob žine' Jerusalénna' še gała' soe' na' ža lñi dan' nzi' Pentecostés.

Pablon' bšaljlene' beņe' chosogüia cheseņe'e beņe' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' beņe' Efeson' beņe' chosogüia cheseņe'e yezica'chle beņe' ca' chesonxene' Jesucriston'. ¹⁸ Na' cate' be-sela'aque' Pablon' gože' legaue':

—Nezele can' bena' caten' gwzoo' distritw Asia gan' zoa lažlen', bena' da' güen šlac gwzoo' len le'e gwzolaotia' ža nechw žan' bžina' na'. ¹⁹ Gwzoo' bena' xšin Diosen' na' bi' benxen cuina'. Zan ni'a gwchežchgua' čhele. Na' da' zan da' bosochi bososaca' beņe' Israel ca' neda'. ²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole. ²¹ Bzejni'ida' beņe' zjanac beņe' Israel gualaž čhia' lente beņe' cbi zjanac beņe' Israel can' chaclaže' Diosen' yesyetinje xtoła'gaquen' na' yesejni-laže' Xancho Jesucriston'. ²² Na' na' yeya'a Jerusalén, le Spiritw čhe Diosen' chonen byen yeya'a, na' bi' nežda' bin' gac čhia' yežina' na'. ²³ Con nežda' to to yež gan' ba bedia' Spiritw čhe Diosen' ba bzejni'in neda' doła' gata' ližya na' gac bichle da' saca'zi'a. ²⁴ Perw bi' chi' yichja' čhe da' ca' saca'zi'a. La'czla' še yesote' neda', chzanda' yela' mban čhia'. Toze da' chi' yichja' ša'lao gona' yogo' dan' gwlo' Xancho Jesucriston' lo' na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' beņachen'.

²⁵ Ca' nac le'e, ba bzejni'ida' le'e čhe yela' chnabia' čhe Diosen', perw na'a ne tole bich le'ele neda'. ²⁶ Da'nana' chnia' le'e bibi doła' napa' še nole cuiayi'. ²⁷ Bač bzejni'ida' le'e yogo' dan' chaclaže' Diosen' nezele, bibi bcuaša'. ²⁸ Da'nana' cheyała' cuec yichjle čhe yogo'lo' dan' ba bzejni'ida' le'e na' lecce ca' le gwsed le gwlo'e yezica'chle beņe' chesedop chesežag chesonxene' Xancho Jesucriston' cont yosozenague' čhe dan' ba bzejni'ida'. Le gon ca' le Spiritw čhe Diosen' ba gwlejen le'e cont gwzejni'ile yezica'chle beņe' chesonxene'ne'. Jesucriston' bnežjw cuine' bedelalj xčhene' beque'e xtoła'chon' cont bozoe' chio' bin'lo len Diosen' da' yoble. ²⁹ Nežda' cate' bich zoa' len le'e yesela'ac beņe' yese'nde' yesexoayague' le'e cont cuejyichjle bich gwzenagle čhe Jesucriston'. ³⁰ Ladjw le'e yesechoj beņe' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaue'. ³¹ Da'nana' le gwsaca' cont nono yesexoayag le'e. Na' le gon xbab, le šon izen' ba gwzoo' bzejni'ida' le'e na' gwņeyoeda' le'e do ža do yel gwchežtia' čhele.

³² Na' na'a beņe' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalen'le Diosen' txen len yezica'chle beņe' ba gwlej Diosen' zjanaque' lo' ne'e. ³³ Bi chzelaža' bi' da' de čhe beņe', neca chzelaža' xmechw-gaque' na' neca xagaque'. ³⁴ Nezczele can' bena' žin cont bžel da' byažjda' len da' beseyažje beņe' ca' gosenite' len neda'. ³⁵ Na' bena' žinna' ca' cont blo'eda' le'e cheyała' gaclencho beņe' še bi' cheseyažjde'. Na'

šjasa'laže'le can' gwna Xancho Jesúsen': "Mbalazech zoacho caten' chnežjwcho bi dan' chnežjwcho beņe' cīe ca caten' chesoņe' chio' bi dan' chesoņe' chio'."

³⁶ Na' beyož be' Pablon' dižan' nach bzoa xiben' txen len yogō' beņe' ca' na' bosol' gūiže' Diosen'. ³⁷ Na' yogo'lole' gosebeže' che Pablon' na' goseyele' le' na' bosonope' ne'ena'. ³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

Pablon' beyeje' Jerusalén

21 Beyož bze diža' lježto' len beņe' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bezžinto' ciuda Pátara. ² Na' cate' bežinto' Pátaran' bželetō' yeto barcw dan' chzan' šejen distritw Fenicia, na' beyo'oto' lo'enna'. ³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bezžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'. ⁴ Na' jaydiljwto' beņe' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'. ⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' bol' gūižto' Diosen' cho'a nisdaon'. ⁶ Beyožen' bze diža' lježto' na' gwdeļa' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayņa'to' beņe' ca' chesonxene' Jesucriston' lo' ciuda Tolemaidan' na' bega'anlento' legaque' tža. ⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len beņe' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'. ⁹ Felipen' nita' tap xi'ine' no'ol güego' na' chosozende' beņe' bi dan' ba gož Diosen' legaque'. ¹⁰ Zan ža ba gwzoato' liž Felipen' cate' bla' to beņe' distritw Judean' beņe' le Agabo, lecze chaque' chzende' beņe' bi dan' ba gož Diosen' le'. ¹¹ Nach Agabon' gwņabe' xpant Pablon' na' bchejen' ņi'a ne'e, na' gože' neto':

—Spiritw che Diosen' ba bzenen neda' beņe' Israel ca' že' Jerusalénna' yosocheje' ņi'a na' ben' nac che' bant nga na' yesone' le' lo' na' beņe' ca' bi zjanac beņe' Israel.

¹² Cate' beyož beneto' can' gwna Agabon', neto' len beņe' Cesarea ca' gota'yoeto' Pablon' bi šeje' Jerusalénna'. ¹³ Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsen'.

¹⁴ Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xancon'.

¹⁵ Nach bsin'ato' beza'to' zjaydato' Jerusalén. ¹⁶ Na' to chope beņe' Cesarean' beņe' chesonxen Jesucriston' gosa'aque' txen len neto', na' goseche'e neto' liž to beņe' le Mnasón. Bena' ba goc sša chonxene' Jesucriston'. Naque' beņe' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jaņe'e Jacobon'

¹⁷ Na' cate' bežinto' ciuda Jerusalénna' beņe' lježto' ca' že'na' besyebede' bosoguape' neto' tiox. ¹⁸ Na' beteyo gwyejlento' Pablon' jaņa'to' Jacobon', na' bžinto'na' ba zjandop zjanžag yogō' beņe' blaō ben' chosogüia chesoņe'e yezica'chle beņe' ca' chesonxene' Jesucriston' na'. ¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan beņe' bi zjanac beņe' Israel ba chesonxene' Jesucriston' gan' ba gwyeje' je'lene' legaque' xtiža' Diosen'. ²⁰ Na' cate' bosozenague' dan' gož Pablon' legaque', nach gosole' yeļa' choxcīen che Diosen' na' gose'e Pablon':

—Beņe' migw, ņezdo' zan mil beņe' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogō' da' ca' zjanyoj le'e ley chechon' dan' bzoj Moisés. ²¹ Na' zane' ba zjanende' chsed chlo'edo' beņe' Israel gualaž chechon' nita' laž beņe' zito' bich cheyaļa' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión. ²² ¿Nacxe ye'to' legaque'? le zane' yesežag nga cate' yesende' bač zo' nga da' yoble. ²³ Güen goncho quinga: nita' tap beņe' nga beņe' zoa to da' zjango'o cho'en lao Diosen' na' chesaclaže' yesone' can' gosenen'. ²⁴ Na' cheyaļa' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogō' beņe' yesacbe'ede' bi chzo' ley chechon' to šla'ale can' chesenen', san chono' can' žanna'. ²⁵ Na' ca' nac beņe' ca' bi zjanac beņe' Israel beņe' ca' chesonxene' Jesucriston' yež yoble, ba bzojto' legaque' can' nac yeļa' güexi'a chechon', gožto'ne' bi yesagüe' yeļa' guagw dan' chesene' naquen che l' gua'a lsacan' chesejnilaže' beņe', na' bi yesagüe' chen, na' bi yesagüe' be chat chosošoque' l'ba'ba', lecze bi yesata'lene' no'ole bi nac xo'olgaque' o beņe' byo bi nac beņe' chegaque'.

Gosezene' Pablon' yodao' blaona'

²⁶ Beteyo gwza' Pablon' gwche'e beņe' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwduxjue'ede' le' bi ža yaņen' yeyož yesaque' xi'laže' cont yosonežjue' beyixe' ca' gote' che to to legaque'.

²⁷ Baĥ zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' baĭ beņe' Israel ca' za'ac distritw Asian' be-sele'ede' le' lo' yodaon' na' gosego'oyeĭe' beņe' že' do na' cont yesezene' Pablon'. ²⁸ Bososya'adie', gosene':

—Le'e beņe' gualaž, le gon txe sencho bengā. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' ņa'a ba none' yeto da' mal juisyw contr yodao' dan' nac che Dios chechon', ba gw-lo'e beņe' bi zjanac beņe' Israel lo'enņa'.

²⁹ Gosene' ca' ņeĉhe da' be-sele'ede' Pablon' lo' ciudan' chdalene' to beņe' ciuda Efeso le' Tróximo, na' gosacde' še Pablonan' gwĉhe'e le' lo' yodao'na', la'czĭa' bi bene' ca'.

³⁰ Na' gosonchgüe' to žašyey. Ľa' besedobte beņe' zan cho'a yodaon' na' goso'e lo' yodaon' gosenize' Pablon', besyebeje' le' na' la' bosyosejwte' puert ca'.

³¹ Na' ba zoa yesote' le' cate' gwņeze ben' yo'o lo' ne'e soldadw che nación Roma ben' že' lo' ciudan'. Cate' gwņezde' ba chac to žašyey juisyw doxen ciudan',

³² nach btobe' soldadw ca' len beņe' gwnabia' chegaque' ca', na' gosa'aque' zja'acsese' gan' chi' da' zeda'. Na' cate' beņe' ca' chesote' Pablon' be-sele'ede' ba be-sežin soldadw ca' len beņe' gwnabia' chegaque' ca', la' gosebezte' bich goseyine' Pablon'.

³³ Cate' ben' yo'o lo' ne'e yogo' soldadon' bžine' gan' že' beņe' ca', na' bene' mandadw gosoxe' soldadw che' ca' Pablon' na' bosocĉheje' le' ĉhope gden. Nach gwņabde' beņe' ca' že'na' no nac Pablon' na' bi bene'.

³⁴ Na' beņe' ca' že'na' bososya'adie', gwde gwdele chesena to toe'. Na' gwde cbi gwejni'i ben' yo'o lo' ne'e soldadw ca' bin' chac catec sšag chesone', nach bene' mandadw gosęĉhe'e Pablon' cuartel.

³⁵ Nach yogo' beņe' ca' zjana'ogüe' le-gaque' chesosye'e zjambeque' to žaš juisyw. Na' cate' be-sežine' cho'a nepe' che cuartelen' goselen soldadw ca' Pablon' ņeĉhe dan' chesacĭaže' beņe' ca' yesenize' le', na' yogo' beņe' ca' chesosye'e, chesene':

—Ľe gote'.

Pablon' be'lene' beņe' zan ca' diža'

³⁷ Baĥ cheso'e lo' cuartelen' cate' Pablon' gože' ben' yo'o lo' ne'e soldadw ca':

—ĽGono' latje gua' to ĉhope diža'?

Nach bena' gože'ne':

—ĽChaco' diža' griego? ³⁸ ĽBi naco' beņe' nación Egip-to ben' gwda btob tap mil beņe' güet beņe' bat ngaze na' gwĉhe'e le-gaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to beņe' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beņe' latje güe'lēna' beņe' quinga diža'.

⁴⁰ Nach bena' bnežjue' latje. Nach Pablon' gwzeche' lo' nepen' bene' seņw len ne'e cont beņe' ca' že'na' gosenite' šize bosozenague' che'. Nach gwzologüe' be'e diža' len le-gaque' diža' hebreo.

22 Gože' le-gaque':

—Beņe' gole len beņe' xcuide', le gwzenag diža' dan' gua' laole nga.

² Na' cate' gosacbe'ede' chņe' le-gaque' diža' hebreo gosenite' šize. Nach Pablon' gože' le-gaque':

³ —Neda' naca' beņe' Israel. Golja' ciuda Tarso gan' mbane distritw Cilicia, perw gwĉha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley ĉhe da' xozxta'ocho ca'. Na' gocda' chonchgua' can' chazlaže' Diosen', cayanen' chaque le'e za'acle nga ņa'a. ⁴ Na' bĉhi bsaca' zan beņe' ca' chesejnilaže' Jesucriston', goclāža' gotto' le-gaque'. Na' gwĉena' no beņe' byo na' no no'ole chesonxene' le' na' gwĉhe'egaca'ne' ližya. ⁵ Bxoz ben' naquech beņe' blao na' nochle beņe' gole blao ca' chesenabia' nación Israel chechon' zjaņezde' can' be-na'. Le-gaque' gosone' yiš dan' beĉua' gwy'a ciuda Damascon' gan' gocda' sena' baltez beņe' chesonxen Jesucriston' cont che'egaca'ne' Jerusalén ni par gonto'ne' castigw.

Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 26:12-18)

⁶ Na' šlac zya'a ciuda Damascon' ca' do guagwbiž cate' to be'ni' gual da' za' yaba gweĉhjen neda'. ⁷ Na' gwbiža' lo' yon' benda' to beņe' gože' neda': "Saulo, Saulo Ľbixĉhen' chĉhi chsaco' neda'?" ⁸ Nach boži'a xtižen', goša'ne': "ĽNo le' beņe'?" Nach gwne': "Nedan' Jesús beņe' Nazaret na' neda' chĉhi chsaco'."

⁹ Beņe' ca' zya'alēna'na' be-sežebĉhgüe' be-sele'ede' be'nin', perw bi gosejni'ide' dan' gož Jesúsen' neda'. ¹⁰ Nach goša'ne': "ĽBin' cheyaĭa' gona' Xana'?" Nach Xana' Jesúsen' gwne': "Beyas na' gwejtezē ciuda Damascon', na' cate' žino'na' to beņe' ye'e le' dan' cheyaĭa' gono'."

¹¹ Na' gwĉhoĭa' catec gwņa'chgua' be'nin', nach beņe' ca' zya'alēna' txe gosoxe'de' taca' cont bžinto' Damascon'.

¹² Na' to beņe' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo' lo' beņe' gualaž checho ca' že'na' cheso'e xtiža' Ananíasen' naque' beņe' chon da' güen. ¹³ Ananíasna' bide' gan' zonan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'.

¹⁴ Nach gože' neda': "Dios ben' chonxencho na' ben' benxen da' xozxta'ocho ca', len' ba gwleje' le' cana'te cont ņezdo' can' chaclaže' gono', na' ba ble'edo' Xi'ine' ben' nac la'zelagüe beņe' chon da' güen, na' ba bendo' xtiže'." ¹⁵ Nachen' go'o xtižen' len beņe' zan beņe' že' lo' yežlion' gwzejni'igacdo'ne' da' ca' ba bendo' na' ba ble'edo'." ¹⁶ Na' lecz gož Ananíasen' neda': "ĽBiĉhen' cuezo'? Yo'o so' nis. Na' ņabdo' Xancho Jesucriston' cont yeya' yeyibe' yichjlažda'oguo' len da' malen'." Can' gože' neda'.

Diosen' gwleje' Pablon' cont be'e xtižen' len beņe' ca' bi zjanaque' beņe' Israel

¹⁷ Na' gwdena' beyeda' ciuda Jerusalén ni na' gwya'a lo' yodao' blaon' jeļ' güiža' Diosen', na' šlac choļ' güiža'ne' ble'edagüeda' Xancho Jesucriston'. ¹⁸ Na' Xanchon' gože' neda': "Bi šedo' chojo' ciuda Jerusalén ni, le bi yosozenag beņe' quinga xtižo' dan' go'o čhian'."

¹⁹ Nach goša'ne': "Xana', legaque' zjaņezde' neda' gwya'a to to yodao' jet jatina' beņe' ca' chesonxene' le' na' bseyjwgaca'ne' ližya. ²⁰ Na' lecz naca' beņe' ca' txen cate' gosote' Esteban ben' be' xtižon', na' neda' gwņa'a xadon' che beņe' ca' gosot le'." ²¹ Nach Xancho Jesucriston' gože' neda': "Bchoj na' seļa' le' zito' go'o xtižan' len beņe' ca' bi zjanac beņe' Israel."

Pablon' len ben' yo'o lo ne'e soldadw ca'

²² Beņe' ca' zjandoben', nga zelao bosozenague' xtiža' Pablon', beseže'e da' be'e diža' che beņe' zito' beņe' bi zjanac beņe' Israel, nach gosezolagüe' chososye'e, chesene':

—Le got bena'. Bich cheyaļa' bane'.

²³ Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'.

²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nejde' bičen' beņe' lo' ciudan' chososya'adie' che'. ²⁵ Na' ba zjančeje' Pablon' cont yeseyine' le' cate' gože' to soldadw ben' zena' beņe' chnabi'e ļao to gayoa soldadw:

—Can' ža ley, bi de ļsens čhinle neda' sin cbi nezele še bin' nona', le neda' naca' beņe' nación Roma.

²⁶ Beyož gože' beņe' gwnabia' che soldadon' ca' ļa' gweje'te ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdoļan', le naque' beņe' nación Roma.

²⁷ Nach ben' yo'o lo ne'e soldadw ca' gweje'te lao Pablon' gože'ne':

—Gwna neda' žle beņe' nación Roma le'?

Nach Pablon' gože'ne':

—Beņe' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len beņe' nación Roman'.

Nach Pablon' gože'ne':

—Neda' golja' naca' beņe' nación Roma.

²⁹ Nach beņe' ca' ba nita' cont yeseyine' Pablon' ļa' besyecuate' cuiten', na' ben' yo'o lo ne'e yogo' soldadw ca' lecze bžebe' dan' ba bčeje' Pablon' cont yeseyine'ne'.

Goseseļe' Pablon' gan' chosoxi'a beņe' ca' chesenabia' Israelen'

³⁰ Nach beteyo ben' yo'o lo ne'e soldadw ca' gwseže' gdenņa' nchej Pablon'. Na' bene' mandadw besedobe bχoz gwnabia' ca' len yogo' beņe' gole blao ca' chesenabia' nación Israelen' cont nejde' bi dan' chosocuiše' Pablon'. Na' cate' ba besedobe beņe' ca' nach gwleje' Pablon' na' gwseļe' le' gwzeche' laogaquen'.

23 Nach Pablon' gwņe'e beņe' gole blao ca' chesenabia' nación Israelen' na' gože' legaque': —Beņe' migw, ža na'aža nejde' lo' lažda'ogua' ba bena' can' chazlaže' Diosen'.

² Nach Ananías ben' nacch bχoz blao bene' mandadw len beņe' ca' zjaze cuit Pablon' yesebaže' cho'ena'. ³ Na' Pablon' gože'ne':

—iDiosen' gone' le' castigw, beņe' güeņoayag! Chi'o nga cont gono' yela' justis čhia' can' ža ley čhechon' na' chono' contr ley beno' mandadw yesebaže' choa'.

⁴ Beņe' ca' že' gaļa'ze gose'e Pablon':

—Bi cheyaļa' yoži'o xtižen' ca', le naque' bχoz blao che Dios.

⁵ Nach Pablon' boži'en gwne':

—Beņe' migw, bi gwnejde' še benga bχoz blaon'. Nejde' Xtiža' Diosen' dan' nyojen žan: "Bi yoži'ile diža' zi' len beņe' gwnabia' čhelen'."

⁶ Pablon' gocbe'ede' beņe' ca' chesenabia' nación Israelen' zjanaque' čhople. Baļe' cheseļe'e can' chsed chlo'e beņe' ca' zjansi'e saduceo na' yebaļe' can' chsed chlo'e beņe' ca' zjansi'e fariseo. Nach Pablon' gože' beņe' ca' že'na':

—Beņe' migw, naca' beņe' fariseo, na' naca' xi'iņ beņe' fariseo. Na' zoa' nga chonle yela' justis čhia' neče chejli'a yesyeban beņe' guat ca'.

⁷ Beyož gwne' ca' beņe' fariseo ca' len beņe' saduceo ca' ben' zjandop zjanžag na' gosezolagüe' chosošaše', na' besechoje' čhople. ⁸ Le beņe' saduceo ca' chesene' bi yesyeban beņe' guat ca' na' bi cheseļe'e nita' angl o nochle spiritw yoble. Na' beņe' fariseo ca' cheseļe'e yesyeban beņe' guat ca' na' cheseļe'e nita' angl na' nita' nochle spiritw. ⁹ Yogo' ben' že'na' chososye'e chosošaše'. Nach to čhope beņe' zjansed ley dan' bzoj Moisésen', ben' zjanac beņe' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwņelen le', bi cheyaļa' goncho contr le', le contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeleje' Pablon' ladjo beņe' ca' na' besyēche'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyaļa' go'o xtižan' ciuda Roma.

Bosoxi'e yesote' Pablon'

¹² Na' beteyo ba| bene' Israel besedobe' na' bosoxi'e yesote' Pablon'. Na' gosečhogbi'en, gosene':

—Diosen' gone' chio' castigw še ye'ej gagwcho sin cbiņa' gotcho Pablon'.

¹³ Nde čhoa bene' bosoxi'e yesote' Pablon'. ¹⁴ Nach ja'aque' gan' že' bχoz gwnabia' ca' len bene' gole bene' blao ca' chesenabia' nación Israelen' na' gose'e le-gaque':

—Bač gwčhogbia'to' gon Diosen' neto' castigw še ye'ej gagwto' sin cbiņa' gotto' Pablon'. ¹⁵ Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyebje' cuartelen' jazenebe' Pablon'. ¹⁷ Nach Pablon' goxe' to bene' chnabi'e to gayoa soldadw na' gože'ne':

—Ben goclen gwče' bi' nga lao bene' gwnabia' čhe-len'. De to da' ye'be' le'.

¹⁸ Bene' gwnabia' che soldadon' gwče'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' bexae' na'be' gwče'lebe' to šla'ale gwñabde'be':

—ŽBi che'ndo' ŋao' neda'?

²⁰ Nach bi'na' gožbe' le':

—Bene' blao che bene' Israel gualaž čheto' ca' ba bosoxi'e yesenabe' cuejo' Pablon' gwxe na' yosode'ede' se|o'ne' gana' chesežag bene' gwnabia' čhegaquen' cont yeseyiljwože' bi da' xinj non Pablon'. ²¹ Perw bi šejli'o čhegaque'. Nde čhoa bene' ca' yesebe'na'ogüe' Pablon' tnez cont yesote' le' na' ba gosečhogbi'en bibi yese'ej yesagüe' šlac biņa' yesote'ne'. Na' ba chese-beze' gwzenago' čhegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

Gosesele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' čhope bene' gwnabia' ben' chesenabia' to gayoa güeje soldadw na' bene' mandadw yososiņa'a čhegaque' cont šja'aque' ciuda Cesarea do cheda ga šeže'le na' yeseče'e čhop gayoa soldadw bene' yesa'ac ŋi'aze na' gayonši bene' yesebia cabayw na' yečhop gayoa soldadw bene' yesoxe' lanza. ²⁴ Lecze gože' legaque' chyažje cabayw be cuia Pablon', le le'na' yeseče'e gana' zoa gobernadores' ben' le Félix, na' yesape' Pablon' cont bibi gac che' tnez. ²⁵ Nach bzoje' to cart che gobernadores' da' bgoxe' legaque', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. ²⁷ Bene' Israel ca' ba gosezene' bengana' ba bosoxi'e yesote'ne', perw cate' gwñezda' naque' bene' nación Roma, gwy'a len soldadw čhia' ca' jasla'ne' lo na'gaquen'. ²⁸ Na' cont ñezda' bičhen' chosocuiše' le', gwčhi'ane' gan' chosoxi'a bene' gwnabia' che nación Israelen'. ²⁹ Nach gwñezda' chosocuiše' le' che bize da' chesac che' len ley čhegaque'na', na' bi ŋacho bi da' mal ba none' cont yesote' le' o cont gate' ližya. ³⁰ Perw na' ba gwñezda' ba bosoxi'a bene' Israel ca' yesote' le', da'nan' la' chse|a'tia'ne' lagu' le' na' lecze bena' mandadw len bene' ca' chosocuiš le' šja'aque' lagu' na' yesene' bin' chesac čhegaque' len le'. Si'xenšco' yogo' da' quinga chñeyoeda' le'. Claudio Lisias.”

³¹ Nach soldadw ca' gosone' can' ben bene' gwnabia' čhegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antípatris.

³² Na' cate' gwyeni' besyebi'i soldadw ca' ja'ac ŋi'aze' jaya'aque' cuartelen' na' bene' ca' gosebia cabayw' ja'aclene' Pablon'. ³³ Na' cate' besežine' ciuda Cesarean' bosonežjue' gobernadores' carten' zjanoxe'na' na' lecz gosone' Pablon' lo ne'e. ³⁴ Na' gobernadores' cate' beyož blabe' carten' gwñabde' Pablon' ga bene' naque'. Na' cate' gwñezde' naque' bene' distritw Cilicia, ³⁵ nach gože'ne':

—Gwzenaga' bin' ŋao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

Pablon' be'e diža' lao gobernador Félix

24 Cate' bač goc gayo' ža zoa Pablon' ciuda Cesarean', nach bžin Ananías ben' nac bχoz blaoch che bene' Israelen' na' nche'e to čhope bene' gole blao čhegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadores' gosagüe' xya che Pablon'. ² Na' cate' jasexi'e Pablon', Tértulon' gwdagüe' xya che', gože' gobernador Félix-en':

—Si'xeno', señor gobernador, za'to' lagu' nga. Bin|o juisyw zoa nación čhechon' na' da' zan da' šagüe' ba chac da' chnabi'o neto'. ³ Gate'tez zoato' žato' chox-cleno' can' chono'na', señor gobernador, catec chbeto' can' chnabi'ona'. ⁴ Na' cont bi goneto' le' bichle zed, chata'yoeda' le' gwzenago' šlož dao' dan' zedenato' ŋa'a. ⁵ Ben' ba goxo' lagu' nga, ñezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' čhople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret. ⁶ Na' goclaže' gone' da' mal juisyw lo' yodao' čheton' na' da'nan' gwzento'ne' cont čhogbia'to' che' con can' ža ley čheton'. ⁷ Perw na' gwyaz Lisiasen' ben' nac bene' gwnabia' che soldadw ca' na' beque'ene' lo na'ton'. ⁸ Na' gože' neto' cheya|a' yidto' lagu' nga cont gwcuš-to'ne'. Guac ŋabdo' Pablon' cuino' cont ñezdo' nac da' li can' chcušto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le can' naquen. ¹⁰ Nach gobernadores' bene' seřw len Pablon' cont ne', na' Pablon' gwzologüe' gwne':

—Nezda' ba goc zan iz chono' yela' justis che nación ni, na' da'nana' chbeda' gwzoo' rson chian' laguon'.

¹¹ Na'a chac šižinw ža gwya'a Jerusalénna' jexena' Diosen'. Na' guac nabdo' bene' ca' besele'e neda' še le-ca' naquen. ¹² Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo ciudadan'. ¹³ Na' bibi gac yeson bene' quinga cont yosolo'e napa' doła' ca dan' chosocuiše' neda'. ¹⁴ Bi gw-cuaša' diža', da' li chonxena' Diosen' ben' gosonxen da' xoxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'lo' Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. ¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' na' nite' lez gon Diosen' ca'. ¹⁶ Da'nana' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi doła' napa' lao Diosen' ne lao beñačen'.

¹⁷ Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecze ca' jasana' yelaten' lo' yodao' blaon'. ¹⁸ Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, ne-ca ndop nžaga' bene' zan. ¹⁹ Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'. ²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. ²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

²² Gobernador Félixen' ba neзде' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca hora', gwne':

—Cate' yid Lisiasen' ben' nac bene' gwgnabia' che soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beche' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

²⁴ Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gobernadores' bene' mandadw gosaxe' Pablon' da' yoble na' bzenague' be' Pablon' diža' gwne' yogo'lo' bene' cheyała' yesejnilaže' Jesucriston'. ²⁵ Nach Pablon' be'lenche' le' diža' can' cheyała' gaccho bene' güen lao Diosen', na' can' gwsaca'cho cont bi goncho

da' mal, na' lecze be'lene' le' diža' can' gon Diosen' cate' žin ža gone' justis che yogo' beñač na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadores' gocde' še gwnežjo Pablon' le' mechw cont yosane' le'. Da'nana' goxe' Pablon' güeltze be'lene' le' diža'. ²⁷ Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'nana' bene' mandadw bega'an Pablon' ližyan'.

Pablon' bzoa rson che' lao gobernador Feston'

25 Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gweje' Jerusalénna'. ² Nach bxoz gwgnabia' ca' len nochle bene' blao che bene' Israel ca' ja'aque' jaseñe'e le' cont bosocuiše' Pablon'. ³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez. ⁴ Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le neda' bich chžeda' ša'a na'. ⁵ Na' le cuej no bene' gwgnabia' chele seła'le legaque' len neda' cont yosocuiše' le' lagu'a gan' gona' yela' justis še bi da' xinj ba none'.

⁶ Nach gwzoo' gobernadores' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwwey Pablon' lagüen'. ⁷ Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezo-lagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. ⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'ane' binlo len bene' Israel ca', da'nana' gože' Pablon':

—ŽBi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césaren' ba nzoe' le' cont gono' yela' justis, na' cheyała' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaque'. ¹¹ Šaca' ba gwdapa' doła' o bichle da' ba be-na' da' cheyała' gata', bi žia' bi gata'. Perw bibi nona' ca' nac dan' chosocuiše' neda' nga, na' nono zaca' gwde neda' laogaque'na'. Da'nana' chnaba' tia' lao rey Césaren' cont gone' yela' justis chian'.

¹² Nach Feston' bene' yela' güexi'a len bene' gwgnabia' che' ca' bi yesone' len Pablon' nach gože'ne':

—Ba gwgnabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

¹³ Na' cate' ba gwde yeto c̄hope ža, rey Agripa len no'ol c̄he' ben' le Berenice besežine' Cesarean' be-deseguape' Feston' tiox. ¹⁴ Na' cate' gw̄neze gobernador Feston' n̄ite' yezan ža, nach be'lene' rey Agripan' diža' c̄he Pablon', gože'ne':

—Zoa to beņe' nyixjw Félixen' ližya nga cate' bechoje'. ¹⁵ Na' cate' gwy'a'a Jerusalénna' b̄xoz gwnabia' ca' na' nochle beņe' blao c̄he beņe' Israel ca' gosenabe' c̄hoglaguan' cont gaque' castigw. ¹⁶ Perw na' goše'gaca'ne' bi de costumbr c̄he chio' beņe' nación Roma gwdecho beņe' yesaque' castigw še bi yesyedilagüen' len beņe' ca' chosocuiš le' cont yosozoa rson c̄hegaque'. ¹⁷ Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'. ¹⁸ Na' cate' bosocuiš beņe' ca' le', ne toz da' mal dan' chacda' yosobague'de' le' bibi gosene'. ¹⁹ Dan' chac c̄hegaque', bi chejnilaže' Pablon' can' chesejnilaže' legaque', na' cheso'e diža' c̄he to beņe' ba got, beņe' le Jesús, na' Pablon' že' mbancze'. ²⁰ Cate' bich bi bežellaža' gona' ca dan' chesac c̄hegaquen' na' goša' Pablon' še chaclaže' yodia'ne' Jerusalén cont gac yela' justis chen' c̄he da' ca' chosobague'de' le'. ²¹ Nach Pablon' gw̄nabe' šeje' gone' yela' justis c̄he' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

²² Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gw̄xe gwzenago' c̄he' šeca'.

²³ Nach beteyo gosacxenchgua rey Agripan' len Berenice cate' goso'e gana' chi' gobernadoren', na' lecz zjachi' beņe' ca' chesenabia' soldadw ca' na' yogo' no beņe' blao c̄he ciudad'. Na' gwdena' Feston' bene' mandadw jasexi'e Pablon'. ²⁴ Na' Feston' gwne':

—Rey Agripa, na' len yogo' le'e že'le nga len neto', ca nac bengaz laole nga, yogo' beņe' Israel beņe' že' Jerusalén len beņe' že' Cesarea nga ba gose'e neda' bengaz naque' beņe' mal na' yogo'cze' chesene' bi cheyaļa' bane'. ²⁵ Na' ba gw̄nabyoža' na' gota'bia' bibi none' da' zaca' c̄hoglaguan' c̄he' gate'. Na' ba gw̄nabe'tie' lao rey César gone' yela' justis c̄he', na' ba gw̄cheba' gwdia'ne' ciuda Roma na'ale gan' zoa rey Césaren'. ²⁶ Na' chacžejlaža', le bibi chežellaža' gwzoja' reyen' yapa'ne' bin' none'. Da'nana' bač gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho c̄he' na' gata' bi da' gwzoja'.

²⁷ Chacda' bi naquen to liča selja'ne' Roman' sin cbi gwzoja' še bin' none'.

Pablon' bzo'e' rson c̄he' lao rey Agripan'

26 Nach rey Agripan' gože' Pablon': —Guac nao' bi da' gaclenen le'.

Nach Pablon' gw̄lis ne'en lao beņe' ca' gwzologüe' bzoa rson chen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš beņe' Israel gualaž c̄hecho ca' neda'. ³ Le' nombi'o costumbr c̄he chio' beņe' Israel na' nezdō' can' chesacyož beņe' gualaž c̄hecho ca' legacze'. Da'nana' chata'yoeda' le' gapšco' yela' chxenlaže' gwzenago' chia' nga.

Quinga ben Pablon' cate' biņa' šejnilaže' Criston'

⁴ 'Yogo' beņe' Israel gualaž c̄hechon' zjanezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. ⁵ Na' še chese'nde' yeso'e diža', lecz zjanezde' goca' txe len beņe' ca' zjansi'e fariseo cate' nactia' bi' xcuide' na' beņe' fariseo ca' chesonche' yogo|o| costumbr gole can' nyoj ley c̄hechon' clel can' cheson yezi-ca'ch beņe' Israel gualaž c̄hecho ca'. ⁶ Na' legaque' chesagüe' xya chia' neče chejli'a gwžin ža cate' Diosen' yosbane' beņe' guat ca' can' gože' da' xozx-ta'ocho ca'. Neče da'nana' zoa' nga na'aža cont gac yela' justis chian'. ⁷ Beņe' zan lo šižinw cue' chio' beņe' Israel nite' chesebeze' batcan' yosban Diosen' beņe' ca' ba gosat, can' že' gone'. Da'nana' chesonxene' le' do ža do yel. Lecz neda' zoa' lez gac ca', na' da'nana' ba| beņe' Israel gualaž c̄hechon' chosocuiše' neda' nga rey Agripa. ⁸ Na' le'e chi'le chzenagle chia', žbixchen' chaquele nono šejle' dan' yosban Diosen' beņe' ca' ba gosat?

Cana' Pablon' bgue'ede' beņe' chesejnilaže' Criston'

⁹ 'Cana' neda' goda' cheyaļa' gue'eda' beņe' ca' chesonxen Jesús ben' nac beņe' Nazaret, na' da' zan benchgua' contr legaque'. ¹⁰ Beņe' zan beņe' chesejle' c̄he Jesús en' Jerusalénna' gw̄dixjua' ližya, gw̄dapa' yiš dan' bosozoj b̄xoz gwnabia' ca' cho'en diža' napa' yela' gwnabia' cont gona' ca'. Na' cate' gosec̄hoglagüe' yesote' no beņe' ca', goca' toze can' bosoxi'e yesone'. ¹¹ Na' zan las gwy'a'a to to yodao' jasaca' legaque' cont yesebejyichje' bich yesonxene' Jesús en'. Na' catec bgue'eda' legaque' gwy'a'a yež zito' jalagšiba' legaque'.

Da' yoble Pablon' cho'e diža' can' goc c̄he' cate' Diosen' bocobe' yichjlažda'ogüe'

(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noxa' yiš c̄he b̄xoz gwnabia' ca' dan' žan gw̄chi gwsaca' beņe' ca' chesonxene' Jesús en'. ¹³ Ca do guagwbiz zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyečjen neda' len beņe' ca' zya'alena' txe. ¹⁴ Na' yogo'to' gw̄bixto' lo yon', na' neda' benda' to beņe' chne' diža' hebreo gwne': "Saulo, Saulo žbixchen' chchi chsaco' neda'? Dan' chondo' neda', chone zi' cuino' ca chon to go'ñ be chlibe lo ya dan' zoa lao carroš c̄heban'." ¹⁵ Nach bol güiža'ne', goža'ne': "¿No le' beņe'?" Nach Xana' Jesús en' boži'en, gwne': "Neda' Jesús na' neda' chchi chsaco'. ¹⁶ Beyas, le bač blo'elagua' le' na' ba gwleja' le' gono' xšina' na' go'o diža' c̄he da' nga ba ble'edo' na' c̄he bichle dan' za' le'edo' da' za' gwlo'eda'

le'. ¹⁷ Na' ŋa'a seļa' le' gan' že' beŋe' ca' bi zjanac beŋe' Israel. Na' bi goŋa' latje no got le', ŋe beŋe' Israel gualaž čhio' ca' na' ŋe beŋe' bi zjanac beŋe' Israel. ¹⁸ Chseļa' le' gan' že' beŋe' bi zjanac beŋe' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo' na' Sataŋas dan' chnabia' da' xigüe' ca' na' yosozenague' che Diosen' cont ŋitlao xtoļa'gaque', na' lecze chaclaža' yesaque' txen len nochle beŋe' chesejnilaže' neda' beŋe' ba zjanac lo' na' Diosen'."

Pablon' bsed blo'ede' beŋe' xtiža' Criston'

¹⁹ 'Ca' goc čhia' rey Agripa, bzenaga' ca' dan' gož Jesúsen' neda' zoe' yaban' caten' ble'edagüeda'ne' tnez. ²⁰ Zgua'tec jazejni'ida' beŋe' ca' že' ciuda Damasco xtiže'na' na' gwdechle jazejni'ida' beŋe' ca' že' Jerusalénŋa' len beŋe' že' doxen distritw Judean', goše'gaca'ne' cheyaļa' yesebejyichje' xtoļa'gaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' beŋe' Israel gualaž checho ca' lente beŋe' ca' bi zjanac beŋe' Israel. ²¹ Na' ŋečhe dan' chona' ca', beŋe' gualaž checho beŋe' chesegue'ede' neda' gosezene' neda' yodao' blaon' na' gosaclačže' yesote' neda'. ²² Perw na' Diosen' zoe' chaclene' neda', na' da'nan' zoacza' cho'a xtižen' ža ŋa'aža len yogo'lole že'le nga, le'e nacle beŋe' blao lente le'e bi nacle beŋe' blao. Bi ŋacho bichle chzejni'ida' beŋe' da' bi bzoj da' Moisésen' len yezica'chle ben' gosole xtiža' Diosen' cani'. ²³ Gosene' Criston' ben' za' seļa' Diosen' saca'zi'e na' gate' na' gaque' beŋe' nechw yebane' ladjo beŋe' guat ca'. Na' lecz gosene' le'na' gwzende' beŋe' Israel len beŋe' bi zjanac beŋe' Israel can' cheyaļa' yesone' cont šo' be'ni' che' lo' yichjlažda'ogaque'.

Pablon' goclaže' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwŋe' zižje gože'ne':

—Čhactonton' Pablo! Dan' ba bsedteco' nan' bač chactonto'.

²⁵ Nach Pablon' gože' gubernadoren':

—Bi chactonta' señor gobernador, san diža' lin' cho'a, diža' da' zaca' gwzenago'. ²⁶ Na' rey Agripa nga nombi'e da' quinga choa' diža' čhen, da'nan' bi chžeba' choa' diža' lagüe' nga. Nežda' chacbe'ede' choa' diža' li, le dan' goc che Jesúsen' bi ŋacho goquen bagaše'ze.

²⁷ Le' rey Agripa, čhejli'o da' ca' bosozoj beŋe' ca' gosole xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—Čhacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Chŋaba' lao Diosen' žin ža cate' le' len yezica'chle beŋe' že' nga šejnilaže'le Jesucriston' can' chejni-laža'ne', še yob o še ŋe' chžach, perw cbi gata'le ližya can' dia' neda'.

³⁰ Beyož gwna Pablon' ca' bežoža' rey Agripan' len no'ol čhen' Berenice, na' len gobernador Feston' na' len beŋe' ca' gosebe' len legaque'. ³¹ Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi ŋacho ba non benga da' zaca' gate' o da' zaca' čhixjwchone' ližya.

³² Nach rey Agripan' gože' Feston':

—Šaca' bi gwŋabe' tie' lao rey Césaren' cont gac yela' justis che'na' guac yosanchone'.

Gosesele' Pablon' ciuda Roman'

27 Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo' na' to xan soldadw beŋe' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. ² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' beŋe' ciuda Tesalónica dan' chi' distritw Macedonia. ³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' beŋe' migw che' ca' cont bosonežjue' le' bi dan' byažjde'. ⁴ Na' cate' bechojto' ciuda Sidónŋa' beza'to' bedeto' gaļa'ze gan' ŋļa' yežlio dan' chi' lo' nisdao' dan' nzi' Chipre. Chečhjchgua be' clele ca' horen', na' yežliona' bcue'ejen neto' len be'na'. ⁵ Na' beyož gwdeto' lo' nisdao' dan' de gaļa'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'.

⁷ Nach gwza'to' zejto' lo' nisen' da' yoble. Zan ža zejto' šolaže', caŋe bžinto' gwdeto' ciuda gan' nzi' Gnido. Na' dan' ŋe' chečhj ben' clele gan' zejton', da'nan' bi goc šejto' liča, nach gwca'ato' zejto' chcue'ej cuinto' len yelate' yežlio dan' nga'aŋ lo' nisdao' dan' nzi' Creta, gan' bitec gwyečhj be', na' gwdeto' gaļa'ze gan' zoa to ya'a da' nzi' Salmón. ⁸ Na' zejto' gaļa'ze ga zoa yo biž chcue'ej cuinto', caŋe bžinto' gan' nzi' Buenos Puertos gaļa'ze yež dan' nzi' Lasea.

⁹ Goc zan ža zejto' ca' na' bač chžebto' šjažiyi' cuinto' lo' nisdao', le ba bžin tiemp zag cate' chečhjchgua be'. Nach Pablon' gwŋeyoede' beŋe' ca' yesebeze' na'ze. ¹⁰ Gože' legaque':

—Le'e beŋe' le'e chsa'le barcon', ba chacbe'eda' can' zejcho nga caŋe chac chzan', xož cuiayi' barcon' len yoa' čhelen', na' lente chio' yo'ocho lo' barcon' xož cuiayi'cho.

¹¹ Nach xan soldadw ca' bzenagche' che xan barcon' na' che ben' chsa' len clal ca' che Pablon'. ¹² Le bi nac latje güen cho'a nisdao' gan' zoaton' ga'aŋto' tiemp zaguen', na' gwyan beŋe' ca' gosacde' cheyaļa' sa'to' šejto' še goŋen žinto' Fenice gana' soato' šlac te da' zaguen'. Fenice naquen to yež ga chac cho'o barcw

gan' mbane Creta na' bi chactec zag, le šla'ale nla' ga chla' gwbiž na' šla'ale ga chxa gwbiž.

To be' gual gwečhjen lo nisdaon'

¹³ Cate' gwzola chečhj to be' goł dan' za' che'ełle na' beņe' ca' chososa' barcon' gosacde' guac šja'acche' gan' gosacławe', nach gozsa'to' zejto' lo nisen' da' yoble to łcue'ej che Cretan'. ¹⁴ Gague goc sša cate' ba chac to be' gual da' nzi' Noreste chečhjchguan clele gan' zej barcon'. ¹⁵ Na' chžiga'chguan barcon'. Bibi goc yesone' cont šejchto'. Na' btobławe'to' gwžiga' ben' barcon' len neto' con can' chečhjenna'. ¹⁶ Nach bžinto' to łcue'ej yežlio da' nga'aņ lo' nisen' dan' nzi' Claudia, gan' bitec chečhj be'. Na' barcw cha'o gan' yo'oton' nxoben to barcw dao' da' chon žin choslan beņe' cate' chac bi da' chac che barcw xenna'. Na' caņe goc bocueto' barcw daon' lo' da' cha'ona'. ¹⁷ Beyoža' bchejto' barcw cha'ona' do gual cont gwlo'oto' fuers čhen. Na' be-sežebe' gaga' barcon' to latje gan' nac yox da'na' nzi'in Sirte, nach bosołetje' lache' xen dan' chonen cont chžiga' ben' barcon'. Nach con zejto' lo nisen' con gan' gwej barcon'. ¹⁸ Beteyo ba chož nisen' lo' barcon' da' chečhjchgua ben', nach gosešaše' yoa' dan' nsa' barcon' gwzola bosožala'sazen' lo' nisen'. ¹⁹ Na' ža gwyoņe gocłento' legaque' bzala'to' xšinłaz barcon' lo' nisen'. ²⁰ Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwečhj be', na' bich gwzoato' lez yelato'.

²¹ Bač goc sša bi chagwto', nach Pablon' gože' beņe' ca':

—Le'e beņe', chac quinga dan' bi bzenagle čhia' caten' gwnia' le'e bi sa'cho Cretan', na' dan' bi bzenagle čhia', ba gwžiai' yoa' che barcon' len xšinłazen.

²² Perw na'a bi soayaše'le, ne tole cbi cuiayi' yela' mban čhele, san barcw ngazen' cuiayi'. ²³ Neda' chonxena' Diosen' na' ba ben cuina' lo ne'e, na' le' ba gwsele' to angl beņe' blo'elagüe' neda' nže'e. ²⁴ Nach angla' gože' neda' diža' nga: "Bi žebo' Pablo. Cheyala' žino' lao rey César ben' chi' ciuda Roma, na' da'nana' yelao', bibi gac čhio', na' lez yosla Diosen' yogo' beņe' ca' že' lo' barcon'." ²⁵ Na' dan' gwna anglen' ca', beņe', le yebe. Nežda' Diosen' gone' gac dołoł can' gož anglen' neda'.

²⁶ Da' gac čecho yecho'oņen chio' yo biž da' nga'aņ late' lo' nisen'.

²⁷ Na' cate' ba goc žta'gwbiž zejto' lo nisen' nžiga' ben' neto' nile nale lo nisdaon' dan' nzi' Adria, nach ca do chel beņe' ca' zjansa' barcon' gosacbe'ede' ba zejto' gałaze' yo biž. ²⁸ Nach besełetje' to plum lo' nisen' cont boso'ochixe' ca do gaca'te' sitjw nac nisen'. Beyož bosochixen'na' goseņezde' goquen šino'tchoa metr. Nach gosezdie' yelate' na' bosozchixen' da' yoble na' ca horen' goquen gažechoa metr. ²⁹ Na' besežebe' šjati'i barcon' yej lo' nisen', nach besełetje' tap ya xen dan' že' ancla, bosočhejen' xan barcon' cont gosoxen' len, na' do chesežebze' chesebeze' batcan' šeni'.

³⁰ Nach beņe' ca' zjansa' barcon' gosacławe' yosyoxoņje'. Besełetje' barcw dao' dan' nua' xina' barcon', con

bosode'ede' yesełetje' ancla ca' dan' nua' lagüen'.

³¹ Nach Pablon' boł güiže' xan soldadw ca', gože'ne':

—Še beņe' quinga bi yesyega'aņe' lo' barcw nga, bi yelacho.

³² Nach soldadw ca' gosečogue' don' zjanca' barcw daon' bososanen' lo' nisa'.

³³ Do šbal Pablon' gwzola gwņeyoede' yesagw beņe' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle. ³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bexue' to yetextil, be'e yela' choxcłen che Diosen' lao yogo' neto' že'to' lo barcon' na' gwxi'e to pedasen' gwdagüen'. ³⁶ Nach yogo'to' bebeto' na' lecz gwzolaoto' gwdagwto'. ³⁷ Čhop gayoa gayonšino'to' nacto' že'to' lo' barcon'. ³⁸ Na' beyož gwdagwto' ca beljeto', nach trigon' da' ne' nga'aņch lo' barcon', gosebejen' bosožalen' lo' nisdaon' cont barcon' bich goctequen ži'i.

Goxj barcon'

³⁹ Cate' gwyeni' bi zjanombi'e yežlion' gan' besežin'en', perw besele'ede' de to latje ga žia nisen' šize na' cho'enna' nac laše' lo yox. Nach gosaque' toze gosacławe' yesone' cont žin barcon' šjačhen' laše' lo yoxen'. ⁴⁰ Na' gosečogue' do che ancla ca', gosebejyčhjen' lo' nisen'. Lecze goseseže' do dan' bosočheje' yag dan' chsa' barcon' liča na' goselise' lache' dan' zoa yičhj barcon' cont bžiga' ben' len, nach zja'aque' cho'a yo bižen'. ⁴¹ Na' gosodie' ga chedił nisdaon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzola bzočjen barcon' catec fuers nsan'. ⁴² Nach soldadw ca' gosacławe' yesote' pres ca' cont bi yeseyele' nisen' na' yosyoxoņje'. ⁴³ Perw xan soldadw ca' gocławe' yosle' Pablon', da'nana' bžone' yeson soldadw ca' can' chesacławe' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo nisen' cont yesyechoje' yo biž. ⁴⁴ Na' bene' mandadw beņe' ca' bi chac yeseyela' nis yosočhine' no yagla' o bichle xšinłaz barcon' cont yesyēžine' lo yo. Na' can' gosone' na' yogüe' besežine' lo yo bižen'.

Dan' goc che Pablon' šlac zoe' Malta

28 Cate' bechojto' lo' nisdaon' bžinto' yo bižen', beņe' ca' že'na' gose'e neto' ba bžinto' gan' nzi' Malta, naquen to yež dan' chi' to lo yežlio da' nga'aņen lo' nisdaon'. ² Na' beņe' ca' že'na' gosaque' beņe' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. ³ Nach Pablon' btobe' xoņj xis bcue'en lo yin', cate' bchoj to bel be nac venen lo xis ca' gwdi'inba' ne'e goła'ditban'. ⁴ Na' besele'e beņe' Malta ca' naładit belen' na' Pablon', na' gose' lježe':

—Benga nacłje' beņe' güet beņe'. Da'nana' la'czla' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo yin' na' bexope bejen', na' bibi gocde'. ⁶ Yogo' beņe' ca' chesebeze' batcan' solao gata' ne'en yi o batca' gate'. Gosebeze' sša na' besele'ede' bibi gocde'. Nach gosone' xbab yoble, gosene' naque' to beņe' šejnilaže'cho.

⁷ Na' beņe' gwnabia' che doxen Malta le' Publio na' yežlio che' zjaden gaļa'ze latje gan' bžinton', na' blebe' neto', gwzoato' ližen' šone ža. ⁸ Na' xa Publion' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' boļ güiže' Diosen', nach gwxoā ne'en yichj beņe' güen' na' beyaque'. ⁹ Beyožen' jasexi'e yezica'chle beņe' lagüe yeža' beņe' chese'ede' yižgüe' na' gwnabde' Diosen' yeyone' legaque', na' lecze besyeyaque'. ¹⁰ Na' da' zan da' güen goson beņe' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l gua'a lsaca' che beņe' ca' le' Cástor na' Pólux. ¹² Na' bžinto' ciuda dan' nzi' Siracusa gan' bega'anto' šone ža. ¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elje, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'. ¹⁴ Nga bežagto' beņe' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwde'na' gwza' ni'ato' zejto' Roman'. ¹⁵ Na' cate' za' žinto' ciuda Roman' gosenaze beņe' lježto' že' Roman' ba zoa žinto', na' baļe' bedeseleze' neto' latje gan' nzi' Šone Tiend na' yebaļe' lagüe ya'a dan' nzi' Che Apio. Cate' ble'e Pablon' legaque' be'e yeļa' choxclen che Diosen' na' gwbede' lo' yichjlažda'ogüe'. ¹⁶ Na' cate' bžinto' Roman', xan soldadw ca' bene' yezica'chle pres ca' lo' na' beņe' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' beņe' blao che beņe' Israel ca' že' ciuda Roman'. Na' cate' beyož bese-dobe'na' gože' legaque':

—Beņe' migw, beņe' gualaž checho ca' že' ciuda Jerusalén gosenene' neda' gosone' neda' lo' na' beņe' gwnabia' che nación Roman', la'czļa' bibi bena' contr beņe' gualaž ca' na' ne' contr costumbr che da' xozxta'o'chon'. ¹⁸ Nach beņe' gwnabia' che nación Roman' gosenabyože' na' gosacļaže' yososane' neda' cate' gosabe'ede' bibi nona' da' zaca' yesote'nda'. ¹⁹ Nach beņe' gualaž ca' že' Jerusalénna' bosožoncze'

yososane' neda'. Da'nana' gwņaba' tia' lao rey Césaren' cont gac yeļa' justis čhia'. Perw bi načo gagua' xya che beņe' gualaž checho da' gosonde' neda' ca'.

²⁰ Da'nana' zoa' nga bač goxa' le'e cont le'eda' le'e na' güe'lēna' le'e diža'. Na' ncheja' gden ni neče dan' zoa' lez yosban Diosen' beņe' ca' ba gosat, cacze zan chio' beņe' Israel zoacho lez.

²¹ Nach beņe' ca' gose'ene':

—Bibi cart na' la' laoto' nga dan' za' distritw Judean' da' bosozoj beņe' Jerusalén ca' güen' diža' še bin' chac len le', na' nono beņe' gualaž na' la' beņe' ne mal čchio'. ²² Perw chaclaže'to' yeneto' go'o diža' che dan' chejli'o' che Jesúsen', le nezeteto' doxen cheseņe' che le'e chejle'le che'.

²³ Na' bosožie' bia' to ža cont šjaseņe'e le' da' yoble, na' cate' bžin žan' beņe' zan ja'aque' gan' zoen'. Nach Pablon' be'lēne' legaque' diža' do ža. Be'e diža' che dan' cheyaļa' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle beņe' goso'e xtiža' Diosen' cani' che Jesucriston', cont yesejle'e che'. ²⁴ Na' baļ beņe' ca' gosejle'e xtižen' da' be'e na' yebaļe' bi gosejle'en'. ²⁵ Dan' bi gosone' toz ca' yesone' xbab, gwzolao besyeya'aque'. Nach Pablon' gože' legaque':

—Dan' gož Spiritw che Diosen' da' Isaiásen' dan' bzoje' che da' xozxta'o'cho ca' naquen da' li, žan:

²⁶ Gwyej gož beņe' gualaž čchio' ca' xtižan':

Da' li yenele, perw na' bitw šejni'ile bi zeje dan' yene-len'.

Na' da' li le'e, perw bi gacbe'e bi zejen dan' le'elen'.

²⁷ Nacle beņe' güedenag na' bač natcze yichjlažda'olen'.

Bi chazļaže'le gwzenagle dan' chenele na' dan' chle'e;

con nacle beņe' güedenag.

Šaca' bi nacle beņe' güedenag, šejni'ile bi zejen dan' chenele na' dan' chle'e.

Nach yetinjle xtoļa'le cont yeca'an na' yocoba' yichjlažda'olen'.

²⁸ Che'nda' nezele ba gwzolaon na'a Diosen' chsele' beņe' cheseyixjue'ede' xtižen' len beņe' bi zjanac beņe' Israel cont yosozenague' che' na' gata' yeļa' mban che-gaque' toli tocaņe.

²⁹ Beyož gwna Pablon' ca', beņe' Israel ca' besyežaše' chesacyožchgüe' che dan' gwnen'.

³⁰ Na' čhop iz nya' gwzoa Pablon' ciuda Roman' to yo'o ga chyixjue', na' blebe' yogo'lo' beņe' jasene'e le'.

³¹ Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' beņe', na' be'e xtiža' Diosen' con can' go-claže'.

Romanos

1 Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. ² Diosen' ba gwzologüe' bzende' beňachen' diža' güen che', bene' cont gwnita' bene' goso'e xtižen' cani' na' bozozojen'. ³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' beňach lo diaža che da' rey David. ⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. ⁵ Na' neto', da' chejni-laže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'. ⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chňaba' lao Xacho Diosen' len Xancho Jesucriston' yesaclene' le'e na' yesone' cont soa cuzle binlo len xbab da' yo'o lo' yichjlažda'olen'.

Pablon' goclaže' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa' yela' choxcen che Diosen' par yogo' le'e, le bene' ca' že' doxen lo yežlion' cheso'e diža' can' chejni-laže'le Criston'. ⁹ Nezcze Diosen' yogo' ni'a cate' choj güiža'ne' chňaba' gaclene' le'e. Naque' ben' chejni-laža' do yichj do laža' na' chona' xšinen' choa' diža' güen che Xi'ine' Jesucriston'. ¹⁰ Chňaba' lao Diosen' goňe' latje yedeňa'a le'e že' ca' chnalaže' gona', le ba chac sša zelaža' yida'. ¹¹ Chaclaža' yedeňa'a le'e na' gwzejni'ichda' le'e cont soachachle šejnilaže'le Diosen'. ¹² Na' le'e len neda' soacho gonchachlaže' lježcho dan' chejni-laže'cho Jesucriston'.

¹³ Bene' migw, che'nda' nezele zan ni'a ba goclaža' yida' yedeňa'a le'e, perw biňa' gac yedeňa'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yezica'chle yež ga ba gwy'a. ¹⁴ Nežda' cheya'la' gua' diža' güen che Jesucriston' len yogo'lo' bene', bene' že' ciudan', na' bene' že' yixe', na' bene' chesac letr na' bene' cbi chesac letr. ¹⁵ Da'nan' che'nchgüeda' gua' xtižen' len le'e že'le Roman' can' ba bian' ga yoble.

Diža' güen che Jesucriston' nsan' yela' guac che Diosen'

¹⁶ Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocaňe. Nsan' yela' guac len neto' bene' Israel, na' lecze len le'e bi nacle bene' Israel. ¹⁷ Na' diža' güen che Jesucriston' chzejni'in chio' že' bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejni-laže' le' naque' bene' güen len le' na' gata' yela' mban che' toli tocaňe."

De xto'la' beňachen'

¹⁸ Diosen' zoe' yaban' na' ba blo'ede' beňachen' toli tocaňe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesac-laže' yesombia' bene' yoble diža' li che Diosen'. ¹⁹ Na' Diosen' gone' yesezaca'zi'e, le ba zjaňezde' zoe' da' ba blo'ede' legaque' can' ba benen'. ²⁰ Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beňach chesele'ede' da' ca' ba bene'. Da'nan' bibi de da' yosode'e beňachen' yesene' bi zjaňezde' že' zoe'. ²¹ La'czla' zjaňezde' zoa Diosen', bi chesonxene' le', neca cheso'e yela' choxcen che'. Xbab chegaquen' bibi zacan' na' zjancho' yichjlažda'ogüen' yela' bi chejle' chegaquen'. ²² Chesene' zjanaque' bene' sina' perw chesone' xbab da' bibi zaca'. ²³ Chosozoe' Diosen' to šla'ale la'czla' naque' la'zelagüe' bene' zaca' na' zoe' toli tocaňe. Na' gualaz le', chesejnilaže' no l' gua'a lsaca' che beňach bene' te che, na' no l' gua'a lsaca' che be zoa xil, che be žia tap ni'a na'ba' na' che no be xigüe'.

²⁴ Da'nan' Diosen' ba gwlejyichje' legaque' cont chesone' da' xinj can' že' lo' lažda'ogaquen', na' ba'le' ba chesonchgüe' da' nac yela' zto' len cuerp chegaquen' toe' len yetoe'. ²⁵ Diosen' gwlejyichje' legaque' cont chesone' yela' zto', le legaque' gosebejyichje' diža' li che Diosen' na' chesejle'e che da' güen-laže'. Chesejnilaže' da' ca' ben Diosen' na' bi chesejnilaže' Dios ben' cheya'la' šejnilaže'cho na' gonxencho toli tocaňe. Ca'czen' gacšca.

²⁶ Da'nan' Diosen' gwlejyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheya'la' yeson

no'olen', san cheseque'e ljež no'olgaque' cont chesone' len legaque' da' bi cheyała' yesone'. ²⁷ Na' nita' beņe' byo beņe' bitw chese'nde' yesenita'lene' no'ole, san chesezelaže' ljež beņe' byogaque' nach cheseca'a lježe' cont chesone' yeła' zto'. Na' dan' ba chbiayi' cuerp chegaquen', naquen castigw da' cheyała' yesezi'e yeła' güen da' xinj čhen'.

²⁸ Bi chesaclaže' beñačen' yosozenague' čhe Diosen', da'nan' ba gwlejšyčhje' legaque' len xbab mal čhegaquen'. Da'nan' nite' chesone' da' bi cheyała' yesone'. ²⁹ Chesonchgüe' yogo' da' xinj. Beņe' byo chesata'lene' no'ole bi nac no'ol čhegaque', na' no'olen' chesata'lene' beņe' byo bi nac beņe' čhegaque'. Chexi'e beņe'. Chesezelaže' bi da' de čhe beņe'. Zjanaque' beņe' xi'a juisyw, chesegue'e lježe', chesot lježe', chesedile', cheseziye'e, zjanacchgüe' beņe' güedenag, na' chja'aque' chjaseleje' diža' čhe beņe'. ³⁰ Cheseņe' mal čhe beņe' yoble, chesegue'ede' Diosen', na' bibi bala'aņ chesezoe' beņe' yoble. Chesa'laže'. Chesonxen cuine' cheso'e diža' zjanaque' beņe' güen. Chesaljaže' bichle da' mal da' yesone'. Bi chosozenague' čhe řaxņe'e. ³¹ Bi chesejni'ide'. Bi chesone' da' ba gosene' yesone'. Bi chesacde' beņe' yoble. Bi chesyzi'xen čhe lježe' na' bi chesyeyaše' lježe'. ³² Zjanezde' Diosen' že' toli tocaņe yesezaca'zi' ben' cheson da' ca'. Na' la'czła' zjanezde' can' že', con nita'cze' chesone' da' xinjen' na' chesyebede' cate' beņe' yoble chesone' can' cheson legaquen'.

Diosen' zejzce' to liča da' chone' castigw čhe xtoła'chon'

2 Še nacho čhe beņe' yoble da' xinjen' chone', bibi zaca' ye'cho Diosen' gague bi xtoła'cho de, note'tez naccho. Cate' chnecho čhe da' chon beņe' yoble, na' cheyechjen chio', le toz can' choncho len da' cheson legaque'. ² Nezecho še choncho da' xinj ca' nac da' ca' ba gwnian', Diosen' gone' cont saca'zi'cho čhe xtoła'chon' na' zejzce' to liča da' gone' ca'. ³ Čhaquele Diosen' bi gone' da' saca'zi'cho cate' chnecho čhe da' xinj da' chon beņe' yoble na' chontecho can' chesone'na'? Bi cheyała' gaguecho bi gone' da' saca'zi'cho, le gončen'. ⁴ Čbi chacbe'ele Diosen' nacchgüe' beņe' řagüe' na' beņe' xenlaže' len chio' napcho doła' na' chone' ca' cont gacbe'echo da' xinjen' choncho na' yetinjechon? ⁵ Le'e bi chetinjele xtoła'len' nacle beņe' yid, na' chonle cont Diosen' řa'ache' le'e na' gonche' ga saca'zi'le cate' řin řa' čhogbi'e čhe beñačen'. Cana' gwlo'e zejzce' to liča can' čhogbi'en saca'zi' to to beñač čhe xtoła'gaquen'. ⁶ Na' cana' to tocho saca'zi'cho o gone' ga gac güen čhecho con ca' nac da' ba bencho. ⁷ Na' ře cheyiljwlaže'cho nac goncho cont řjayzoacho len Diosen' toli tocaņe, na' cont yebe Diosen' chio', na' cont gone' gacchcho beņe' zaca', soacho goncho da' güen bite'teze da' gwřaglaoch. Nach Diosen' gone' cont bancho toli tocaņe. ⁸ Na' ře zoacho choncho con da' chazlaže'cho na' bi chzenagcho diža' li čhe Diosen', san zoacho chzenagcho čhe da' malen', Diosen' řa'ayičhje' chio' na' gone'

ga saca'zi'cho toli tocaņe. ⁹ Yogo' beñač beņe' chon da' xinj saca'zi'e na' řaglagüe', zgua'tec řaglaonet' beņe' Israel na' tech yezica'chle beņe'. ¹⁰ Yogo'cho ře choncho da' güen, Diosen' gone' cont řjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yičhjažda'ochon'. Zgua'tec gone' ca' len neto' nacto' beņe' Israel, na' techle gone' ca' len le'e bi nacle beņe' Israel.

¹¹ Toz ca' chon Diosen' len yogo'lo' beñač. ¹² Beņe' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' beņe' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' řanna'. ¹³ Gague con yenecho can' řa' leyna' cont Diosen' ne' naccho beņe' güen len le', san goncho can' řanna', nach Diosen' ne' naccho beņe' güen len le'. ¹⁴ Beņe' bi zjanac beņe' Israel na' bi zjanombi'e ley dan' bzoj Moisésen', tgüeje lo' lažda'ogaquen' chonen cont chesone' da' güen can' řa' leyna' cheyała' yesone', na' la'czła' bi zjanombi'e leyna' dan' zoa yičhjažda'ogaquen' čřian bia' yesone' da' güen, naquen ca' to ley len legaque'. ¹⁵ Nacbia' zjanezde' lo' lažda'ogaque' cheyała' yesone' da' ca' nřia bia' leyna' yesone', le chesone' late' güejen. Na' zjanezde' lo' yičhjažda'ogaquen' ře da' chesone' naquen güen o ře naquen mal. ¹⁶ Can' gac caten' řin řa' Diosen' gone' lo' na' Jesucriston' čhoglagüen' čhe to tocho ca' nac xbab čhechon' da' ba bencho na' bichle da' ba bencho bagaře'ze ře naquen güen o ře naquen mal. Can' čnia' cate' chyixjue'eda' diža' güen čhe Jesucriston'.

Beņe' Israel bi chesone' can' řa' leyna'

¹⁷ Na' le'e nacle beņe' Israel gualaž čhia', řeca chonle xbab zoale binlo len Diosen' da' nsedle ley dan' bzoj Moisésen', na' řeca ča'laže'le dan' nombia'le Diosen'. ¹⁸ Nezele bin' chazlaže' Diosen' na' chacbe'ele bin' nac da' güen na' bin' nac da' mal, le nsedle xtižen'. ¹⁹ Čhaquele zaca'le cont co'ole be'ni' lo' yičhjaždao' beņe' bi nombia' Diosen'. ²⁰ Na' čhaquele guac gwzejni'ile beņe' cheson clele nac cheyała' yesone', na' čhaquele guac gwsed gwlo'ele beņe' cobe xtiža' Diosen', le nombia'le diža' li čhen' na' len nsan' doxen da' cheyała' nezele. ²¹ Le'e čsed chlo'ele beņe' yoble, řbixčen' bi čsed chlo'e cuinle? Le'e řale bi cheyała' no'ole bi nac no'ol čhe', na' no'olen' bi gata'lene' ben' bi nac beņe' čhe', řbixčen' chonle da' che'le beņe' bi gone'? Le'e čhue'ele ř gua'a řsaca' da' chesejnilaže' beņe' řbixčen' čjalanle bi da' de lo' yo'o gan' ře' ř gua'a řsaca' ca'? ²³ Ča'laže'le da' nsedle ley da' bzoj Moisésen', perw chzoale Diosen' to řla'ale da' bi chonle can' řa' leyna'. ²⁴ Čac can' nyoj Xtiža' Diosen' řan: "Da' chonle da' xinj, beņe' bi zjanac beņe' Israel cheseņe' mal čhe Diosen'."

²⁵ Še choncho can' řa' leyna' zaca'czen dan' ba gwzoacho seřw lo' cuerp čhechon' da' zejen chio' beņe' Israel naccho yež čhe Diosen'. Perw ře bi choncho can' řa'

leyna', bibi zejen da' ba gwzoacho señw dan' nzi' circuncisión. ²⁶ Beñe' bi naque' beñe' Israel bi zoe' señua', na' še chone' can' ža ley che Diosen', Diosnan' ñe' naque' txen len chio' zoacho señua'. ²⁷ Na' beñe' cheson can' ža leyna', la'czla' bi zjanaque' beñe' Israel na' bi zjazoe' señw dan' nzi' circuncisión lo cuerp chen', chesone' cont nacbia' de xtoła' le'e nseidle leyna' perw bi chonle can' žanna'. ²⁸ Bi ñacho nacccho dogualje beñe' Israel da' na' ocho costumbr che nación chechon' na' dan' zoa señw lo cuerp chechon'. ²⁹ Naccho dogualje beñe' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'nan' Diosen' güe'e diža' güen checho, la'czla' še notno chñe güen checho.

3 ¿Bi da' güen da' chga'añ che chio' beñe' Israel da' goljcho lo diaža che da' xozxta'ochon' še ca'? ¿Bi da' güen da' chga'añ da' ba zoacho señw da' nzi' circuncisión? ² Da' xen da' chga'añ. Na' da' blaoch da' chga'añ, Diosen' bnežjue' da' xozxta'ochon' ca' Xtižen' da' nyojen par yogo' beñač. ³ Na' la'czla' zan beñe' gualaž checho bi gosejle'e chen, bi ñacho Diosen' bi gone' güen can' gwne' gone' len chio' naccho nación che'na'. ⁴ Goncze' con can' že'na'. Yogo' ñi'a Diosen' chñe' diža' li, la'czla' še žin ža cate' yogo'loł beñe' yesene' diža' güenlaže'. Chac can' nyoj Xtiža' Diosen' žan:

Le' gwlo'edo' beñačen' le cho'o diža' li.

Na' ca nac beñe' ca' cheson xbab bi chono' can' žon', yesacbe'ede' chonczo' can' žo'na'.

⁵ Bał beñe' chesene' cate' choncho da' xinj chlo'en ca beñe' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. ⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' beñač. Perw gonczen'.

⁷ Na' nita' bał beñe' chesone' xbab clele, chesene': "Cate' choe'cho diža' güenlaže' chlo'en ca beñe' güen juisyw nac Diosen' da' cho'e pur diža' li. Da'nan' bi cheyała' ñe' napcho doła' cate' chonlaže'cho." ⁸ Lecze chesonlaže' bał beñe' chesene' neda' bzejni'ida' guaque goncho da' mal cont gac da' güen. Da' cheyała'cze gon Diosen' cont sacazi' note'tez beñe' ža ca'.

Yogo'cho napcho doła' lao Diosen'

⁹ ¿Bixen' ša? ¿Naquech chio' beñe' Israel beñe' güenč ca beñe' bi zjanac beñe' Israel? Bi naccho ca'. Ba bzejni'ida' toz ca nac che chio' beñe' Israel len che beñe' bi zjanaque' beñe' Israel, yogo'cho de xtoła'cho. ¹⁰ Na' Xtiža' Diosen' nyojen žan:

Nono zoa beñe' zej to liča, ñe toe'.

¹¹ Nono nla' beñe' chejni'i cont gwzenague' che Diosen',

nono nla' beñe' cheyiljue' le'.

¹² Yogo' beñač ba zjanque'e nez mal.

Yogüe' ba zjanaque' ca to da' bibi zaca'.

Ñe to nono zoa beñe' chone' da' güen.

¹³ Len xtiža'gaquen' chesexoayague' beñe'.

Ca zban chla' cho'a ba che beñe' guat še bi nyeyjon binlo, ca' zban chla' xtiža'gaquen'.

Na' ca venen che bel znia nac xtiža'gaquen' da' cheso'e.

¹⁴ Pur diža' mal diža' bya' že' cho'agaquen'.

¹⁵ Con bize da' chosode'ede' cont chesote' beñe'.

¹⁶ Gate'teze chja'aque' zjanse'e yela' yaše' yela' zi' ca nac da' chesone'.

¹⁷ Bi chesozoe' binlo len lježe'.

¹⁸ Bi chesežebe' Diosen' len bi da' mal chesone'.

¹⁹ Na' ñezecho Diosen' beñe' chio' beñe' Israel ley chen'. Da'nan' ñe tocho bi chac ñacho bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' beñač, le yogüe' bi chesone' can' ža ley chen'. ²⁰ Bi ñacho zoa beñe' naque' beñe' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho beñe' güen da' xinj.

Beñe' šejnilaže' Jesucriston' gague' beñe' güen len Diosen'

²¹ Na' ña'a Diosen' ba blo'e can' goncho cont gaccho beñe' güen len le', na' bich bi že' che da' ca' ža leyna' cheyała' goncho, san že' cheyała' šejnilaže'cho Jesucriston' cont gaccho beñe' güen len le'. Doxen Xtiža' Diosen' dan' nyojen cani'te chzejni'in cheyała' šejnilaže'cho Jesucriston' cont gaccho beñe' güen. Na' toz can' chon Diosen' len yogo'loł beñač. ²³ Le yogo'cho ba bencho da' xinj, na' ñe tocho bi naccho beñe' güen can' chaclaže' Diosen' gaccho. ²⁴ Perw na' Diosen' nži'ilaže'de' chio', na' gague bi chzi'e par že' naccho beñe' güen len le', le Cristo Jesúsén' ba bñitlagüe' xtoła'chon'. ²⁵ Diosen' gwsele' Jesucriston' bnežjw cuine' gosote'ne' ñeche xtoła' beñač. Na' note'teze beñe' yesejnilaže'ne' ñitlao xtoła'gague'. Diosen' gwsele'ne' cont nacbia' zeje' to liča da' gwdape' yela' chxenlaže' bezi'xene' xtoła' beñe' ca' gwnita' cani' beñe' gosejnilaže'ne'. ²⁶ Na' lecze gwsele'ne' cont nacbia' zeje' to liča da' že' che yogo' chio' chejnilaže'cho Jesúsén' naccho beñe' güen.

²⁷ Bi cheyała' gonxen cuincho güe'cho diža' naccho beñe' güen. Šaca' choncho doxen dan' ža leyna' zaca' gonxen cuincho güe'cho diža' naccho beñe' güen, perw nono chon can' ža leyna'. Con da' chejnilaže'cho Jesucriston', da'nan' zaca' cont yeyaccho beñe' güen len Diosen'. ²⁸ Can' naquen, note'tez beñe' chejnilaže' Jesucriston', Diosen' že' naque' beñe' güen len le' da' chejnilaže'ne', gague lagüe dan' chone' can' ža leyna'.

²⁹ ¿Cadaquele Diosen' naque' Dios che chio' naccho beñe' Israel ngaze? Lecze naque' Dios che beñe' bi zjanac beñe' Israel. ³⁰ Le toze Diosen' zoa na' len' že' che yogo'cho naccho beñe' güen len le' con še chejnilaže'cho Jesucriston', na' toz can' chone' len chio' zoacho señw dan' že' circuncisión na' len beñe' cbi zjazoa señwna'. ³¹ ¿Cadaquele choncho leyna' ca to da' bibi zaca' da' žacho cheyaccho beñe' güen len Diosen' cate'

chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

Can' ben da' Abraham

4 Na' le'e beṇe' gualaž chia' len le'e bi nacle beṇe' Israel, da' xozxta'oto' Abraham žbixe ṇacho che'?
² Šaca' Abrahanna' bene' doxen can' ža leyna', zaca' gonxen cuine' da' naque' beṇe' güen, san bi bene' doxen can' žanna' na' bibi gota' da' zaca' gonxen cuine' lao Diosen'.
³ Quinga ža Xtiža' Diosen' da' nyojen: "Abrahanna' gwejni-laže' Diosen' na' da'nana' Diosen' gwne' naque' beṇe' güen len le'." ⁴ Cate' to beṇe' chone' žin, chone' gan laxjue' na' xan žinna' bi chone' to goclen cate' chnežjue' laxjuen'.
⁵ San to goclen chon Diosen' že' che chio' chejni-laže'chone' naccho beṇe' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejni-laže'chone'.
⁶ Lecz da' Davin' be'e diža' ca mba chzoa ben' chnitlao Diosen' xtoṭen' na' bibi cuent chone' še ba ben ben' da' güen o ba bene' da' mal.
⁷ Bzoy Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoṭa'chon'.

⁸ Mba zoacho še Diosen' že' checho bibi xtoṭa'cho de.

⁹ ¿Chaquale neto'zen' zoato' señw dan' že' circuncisión gac soato' mba can' gwne'?' Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' beṇe' güen len le' da' gwejni-laže'ne'.
¹⁰ Gwne' che da' Abrahanna' naque' beṇe' güen len le' cate' biṇa' soe' señw dan' že' circuncisión, gague beyož gwzoen'na' gwne' ca'.
¹¹ Na' gwdechle gwzoe' señwna' cont gwnezde' Diosen' bñitlagüe' xtoṭe' da' ba chejni-laže'ne'. Na' da'nana' Abrahanna' naque' xozxtao' yogo' beṇe' chesejni-laže' Diosen' cont nitlao xtoṭa'gaquen' la'czla' bi zjazoe' señwna'.
¹² Na' lecze naque' xozxtao' neto' bich bi xtoṭa'to' de da' chejni-laže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejni-laže'to' Diosen' can' gwejni-laže' da' Abrahanna' le'.

Diosen' bene' güen len da' Abrahanna' da' gwejni-laže'ne'

¹³ Diosen' gože' da' Abrahanna' gone' cont le' len beṇe' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejni-laže'ne'. Da'nana' gwna Diosen' naque' beṇe' güen gague da' bene' can' ža leyna'.
¹⁴ Šaca' ža Diosen' con beṇe' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len beṇe' za' yesalje lo diaža' che da' Abrahanna'.
¹⁵ Na' leyna' nsan' castigw che beṇačhen', le bi chesone' can' žanna. Šaca' bibi ley de da' gwžian bia' bi da' cheyala' gon chio' beṇač, bibi xtoṭa'cho de šeca'.

¹⁶ Can' naquen, note'teze beṇe' chesejni-laže' Diosen', none' legaque' ca xi'in diaža' che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoy da' Moisésen' gac cheto' yežlion'. Na' naczen da' li gon Diosen' güen len note'tez beṇe' chejni-laže'ne'. Na' gone' ca' cont gacbia' to goclen chone' len beṇe' ca' chesejni-laže'ne' can' gwejni-laže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejni-laže'chone',
¹⁷ chac can' gože' da' Abrahanna' gwne': "Ba nzoa' le' gaco' xozxtao' beṇe' še' nación zan." Dios ben' gwejni-laže' da' Abrahanna' nape' yeṭa' guac cont yosbane' beṇe' guat, na' chac chone' cont gac da' biṇa' gac.

¹⁸ Abrahanna' bi gwnezde' nac gac can' gwna' Diosen' gac, san con gwzoe' gwejle'e che Diosen' na' gwzoe' lez gon Diosen' cont nita' beṇe' zan xi'in diaža' che'.
¹⁹ Gwzoacze' gwejle'e can' gož Diosen' le' la'czla' ba naque' beṇe' gole par soa xi'ine', le ba zejgale' to gayoa iz, na' no'ol che' Sara naque' beṇe' güiž.
²⁰ Gwzoateze' gwejni-laže' Diosen' na' bi gocžejlaže' len da' gož Diosen' le' gone', san gwzoačhače' gwejni-laže'ne' na' benxene'ne'.
²¹ Abrahanna' gwnezde' Diosen' nape' yeṭa' guac cont gone' can' gwne'.
²² Da'nana' Diosen' gwne' naque' beṇe' güen da' gwejni-laže'ne'.

²³ Na' dan' nyojen žan Diosen' gwne' naque' beṇe' güen da' gwejni-laže'ne', gague nyojen ca' che Abraham na'zen'.
²⁴ Lecze nyojen che yogo'cho, le Diosen' lecze že' naccho beṇe' güen len le' da' chejni-laže'chone'. Cont gwnitlagüe' xtoṭa'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejni-laže'cho bečhis bosbane'ne' ladjo beṇe' guat ca' cont beyone' chio' beṇe' güen.

Zoacho binlo len Diosen' da' chejni-laže'cho Jesucriston'

5 Na' ca nac chio', da' ba chejni-laže'cho Xancho Jesucriston', Diosen' ba gwne' naccho beṇe' güen len le', na' lecze da'nana' ba zoacho binlo len le'.
² Da' chejni-laže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'.
³ Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwčejechcho cate' de bichle da' saca'zi'cho.
⁴ Na' še chonxenlaže'cho cate' chzaca'zi'chon', chlo'en zoačhačcho chejni-laže'cho Diosen'. Na' še zoačhačcho chejni-laže'chone', nezecho šjayzoacho txen len le'.
⁵ Na' dan' zoacho lez šjayzoacho txen len Diosen', bi ṇacho naquen to da' güenlaže' chaquecho gac checho ca'.
⁶ Le Diosen' ba gwsele' Spiritw chen' zoan len chio' na' chnen lo' lažda'ochon' žan chacchgüe Diosen' chio'.

⁶ Chio' beṇač naccho beṇe' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doṭa'.
⁷ Nono zoa beṇe' gwnežjw cuine' yesot beṇe' le' neče beṇe' yoble, la'czla' še nac ben' beṇe' güen, o še gwchojija tgüej

beŋe' yeyaxjde' gwnežjw yeļa' mban ċhe' yesote'ne' gualaz to beŋe' šagüe'. ⁸ San Diosen' blo'ede' chac-čhgüede' chio' da' gwseļe' Criston' gote' neċhe chio' ļa'czļa' zoacho choncho da' xinj. ⁹ Na' dan' got Criston' neċhe chio', Diosen' že' naccho beŋe' güen da' chejni-laže'cho ļe'. Na' Criston' ļecze gone' cont bi saca'zi'cho cate' žin žan' Diosen' ċhogbi'e ċhe yogo'ļoļ beŋe'. ¹⁰ Cana' bi gwzoacho binļo len Diosen'. Perw Xi'ine' Criston' bnežjw cuine' gote' neċhe chio' cont bozoe' chio' binļo len Diosen'. Na' ņa'a ba zoacho binļo len ļe' na' nezecho zoacze Criston' chone' cont žin ža šjayzoacho len Diosen'. ¹¹ Na' ļecze chebecho nombia'cho Diosen', ļe Xancho Jesucriston' ba bozoe' chio' binļo len ļe'.

Adánŋa' gwleque' da' mal yežlio nga, san Jesucriston' gwleque' da' güen

¹² Yeļa' güedenag ċhe beŋe' nechw ben' le Adán gwxe da' malen' yežlio nga, na' da' malen' nsan' yeļa' got. Can' goc, gwzolao chesat yogo' beŋaċhen', ļe yogo'ļole' chesone' da' mal. ¹³ Beŋaċhen' gwzolao chesoncze' da' xinjnen' cate' gwzoate da' Adán, ļa'czļa' biŋa' gata' ley dan' bzoj da' Moisésen'. Na' gan' bibi ley de, nono chon xbab še cheson beŋe' da' xinj. ¹⁴ Perw na' gwzolaon len da' Adánŋa' na' len beŋe' gwnita' caten' gwbane', bžinten len beŋe' gwnita' caten' gwban Moisésen', yogo'ļole' gosate' can' chesat beŋe' ža ņa'aža. Ļa'czļa' ļegaque' bi gosone' güedenag len to da' gož Diosen' ļegaque' can' ben Adánŋa', bia'cze yogüe' gosone' da' xinjnen'. Adánŋa' gwleque' yeļa' goten', san Jesucriston' ben' ba naquen seļa' Diosen', ļen' bxie' yeļa' mban toļi tocaŋe.

¹⁵ Nža' xen ca dan' gwxe caten' Adánŋa' bene' da' xinjnen' na' ca dan' gwxe cate' Diosen' gwseļe' Jesucriston'! Yogo' chio' beŋaċ gatcho lagüe da' ben Adánŋa' da' xinjnen', san yogo' chio' beŋaċ guac soa-cho mba da' nži'i Diosen' beŋaċhen' na' gwseļe' Xi'ine' Jesucriston' cont chaclene' note'tezcho. ¹⁶ Toz Adánŋa' bi bzenague' ċhe Diosen' na' da'nan' Diosen' gwne' yezezaca'zi' yogo'cze beŋaċhen' toļi tocaŋe ċhe xtoļa'gaquen'. Nach Diosen' gwseļe' toz beŋe' güen cont bñitlagüe' xtoļa' note'tezcho chejni-laže'chone' na' beyone' chio' beŋe' güen ļa'czļa' da' zan da' xinj ba bencho. ¹⁷ De yeļa' got ċhe chio' beŋaċ neċhe da' xinj da' ben toz ben' gože' Adán, san mbalaz juisyw chac ċhe chio' beŋaċ neċhe da' güen da' ben Jesucriston' bnežjw yeļa' mban ċhe' neċhe yogo'cho. Diosen' nži'ide' chio', nachen' bibi ċhċhixjue' chonze' chio' ca beŋe' güen še chejni-laže'cho Jesucriston', na' noŋe' chio' yeļa' mban toļi tocaŋe cont ņabia'cho txen len Jesucriston'.

¹⁸ Can' naquen, da' ben toz Adánŋa' da' xinj, Diosen' gwċhogbi'en saca'zi' yogo' beŋaċhen' ċhe xtoļa'gaquen'. Na' neċhe da' güen da' ben toz Jesucriston' da' bnežjw cuine' gosote'ne', da'nan' ñitlao xtoļa' note'tezcho chejni-laže'chone', cont none' chio' ca beŋe' güen. ¹⁹ Len da' xinj dan' ben Adánŋa' cate' bene' güedenag len Diosen', gwxe da' xinj da' chon yogo'

chio' beŋaċ. Na' da' bzenag Jesucriston' ċhe Diosen' na' bnežjw cuine' cont ñitlao xtoļa' beŋaċhen', da'nan' note'tezcho chejni-laže'chone' none' chio' ca beŋe' güen.

²⁰ Cate' Diosen' bnežjue' ley ċhen' da' bzoj Moisésen' na' gwcha'o gwxench da' xinj da' goson beŋaċhen', ļe bi bosozenague' ċhen. Perw na' ļa'czļa' gwcha'o gwxen da' malen', gwcha'o gwxench yeļa' ži'ilaže' ċhe Diosen' len chio' beŋaċ. ²¹ Can' chac, de yeļa' got ċhe yogo' chio' beŋaċ da' naccho beŋe' chon da' xinj, ca'cze Diosen' nži'ide' yogo' chio' beŋaċ cont note'tezcho gaccho beŋe' güen len ļe' na' gata' yeļa' mban ċhecho toļi tocaŋe še šejnilaže'cho Xancho Jesucriston'.

Bi cheyaļa' soacho goncho da' xinj san soacho goncho can' chazlaže' Criston'

6 ŽNacxen' cheyaļa' goncho ņa'a ba nezecho nži'ilaže' Diosen' chio'? ŽGonchcho da' malen' cont yezi'xenchcze Diosen' ċhe chio'? ² Gague can' goncho. Cate' gwzolao chejni-laže'cho Criston' bich goclaže'cho ņabia' da' malen' chio'. Da'nan' guac ņacho ba gotcho len da' xinjnen' cont bich gonchon. ³ ŽBi chacbe'ele can' zejen da' gwzoacho nis? Zejen da' chejni-laže'cho Jesucriston' ben' got neċhe chio', baċ naccho ca to beŋe' guat len da' xinjnen' cont bich gonchon. ⁴ Na' dan' gwzoacho nis ļecze guac ņacho bgaše'cho can' bosocuaše' Criston'. Na' con can' beċhis bosban Xancho Diosen' Criston' ladjo beŋe' guaten' len yeļa' guac xen ċhe', ca'czen' bene' len chio', ba bocobe' yiċhjaž-da'oċhon' cont soa cuzcho goncho da' güen.

⁵ Na' can' žacho ba gotcho len da' xinjnen' dan' chejni-laže'cho Criston', ļecze guac ņacho beċhis bosban Diosen' chio' can' beċhis bosbane' Criston', ļe ba bocobe' yiċhjažda'oċhon'. ⁶ Cana' ņe' chnabia' da' malen' chio' len yogo' da' choncho. perw ņa'a da' chejni-laže'cho Criston' ben' got neċhe chio', ba none' chio' ca to beŋe' guat len da' xinjnen' cont bich gonchon na' cont da' mal dan' yo'o ļo' yiċhjažda'oċhon' bich soan ņabian' chio'. ⁷ Beŋe' ba got bich zoe' chone' da' xinj, na' ca' nacczen len chio' chejni-laže'cho Criston', bich che'necho ņabia' da' malen' chio' na' bich zoacho chzenagcho ċhen. Na' chejļe'cho gone' cont soacho bancho len ļe' ņa'a na' toļi tocaŋe. ⁹ Na' nezecho Criston' beyas bebane' ladjo beŋe' guaten' na' gwbat gate' da' yoble ļe bich soe yeļa' goten' ļe'. ¹⁰ Na' cate' gosote' Criston', tñi'aze bnežjw yeļa' mban ċhe' neċhe xtoļa'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'. ¹¹ Nach dan' gote' neċhe xtoļa'chon', cheyaļa' soacho goncho cont da' mal dan' yo'o ļo' yiċhjažda'oċhon' biċh ņabian' chio', na' cheyaļa' soacho txen len Xancho Jesucriston' cont goncho dan' chazlaže' Diosen'.

¹² Da'nan' bi güe'cho latje ņabia' da' malen' cuerp ċhechon' dan' nac da' gat na' goncho bi da' xinj da' se-lažen'. ¹³ Bi cheyaļa' gon cuincho ļo na' da' gwxiyen' cont goncho da' mal len cuerp ċhechon'. Cheyaļa' gon cuincho ļo na' Diosen' cont goncho da' güen. Guac ņa-

cho Diosen' bechis bosbane' chio' ladjo beņe' guaten' da' bocobe' yichjlažda'ochon'. ¹⁴ Bich nabia' da' malen' chio', le nezecho Diosen' chbede' chio' gague neče da' choncho can' ža ley dan' bzoj da' Moisés, san dan' naque' beņe' šagüe'.

Beņe' chzenag che da' malen' naque' ca beņe' zoa xan, beņe' chnabia' le' cont gonche' da' malen'

¹⁵ ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyaļa' goncho? Bitw goncho ca'. ¹⁶ Nezecho še ba chzenagcho che to beņe' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli tocaņe še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toli tocaņe.

¹⁷ Na' choa' yeļa' choxcen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle cana'.

¹⁸ Diosen' ba bebeje' le'e lo' da' malen' na' ba ben cuinle lo' ne'en cont soale gonle da' güen. ¹⁹ Ba bzejni'ida' le'e bia' diža' che bi da' chac che chio' beņač cont šejni'ile. Nachen' chnia' le'e, con can' gwzoale bentezle da' nac da' yeļa' zto' len cuerp chelen', na' benchgualle da' malen', lecze can' cheyaļa' gon cuinle lo' na' Diosen' gonle da' güen cont chazlaže' Diosen' can' chonlen'.

²⁰ Caten' ne' zejcho choncho da' malen' bi chzenagcho che Diosen' neca choncho da' güen. ²¹ Na' bibi banez na' le'echo che da' mal ca' ba bencho, san na'a ba cheto'echo chen. Beņe' ca' ne' chesontezē' da' malen' gata' castigw chegaque' toli tocaņe. ²² Na' chio', Diosen' ba bebeje' chio' lo' da' malen' na' yo'ocho lo' ne'ena'. Da'nān' zejech choncho da' güen can' chazlaže' Diosen' na' šjayzoacho len le' toli tocaņe. ²³ Še zoacho choncho da' xinjen', gata' castigw checho toli tocaņe cate' gatcho. San Diosen' chonđadze' chio' to da' güen juisyw, chio' chejnilaže'cho Xancho Jesu-criston', chone' cont šjayzoacho len Diosen' toli tocaņe.

Naccho ca to beņe' ba got len ley da' bzoj Moisésen'

7 Beņe' migw, da' nga žia' le'e, le nombia'le ley dan' bzoj Moisésen'. Nezczecho con beņe' ca' zjamban cheyaļa'cze yosozenague' che leyna'. ² Ca to no'ole nšagna', šlac mban beņe' che' cheyaļa' soalene' le', le can' chon leyna' mandadw gone'. Na' še ba got beņe' chen', cana' ba bele' len leyna' da' chon mandadw soalene' beņe' chen'. ³ Še no'olen' soalene' beņe' yoble šlac ne' mban beņe' chen', nape' doļa' len leyna' da' chzoa xtoe'. Perw na' še ba got beņe' chen', leyna' žan ba guac yošagna'lene' beņe' yoble na' bi nacho chone' da' xinj yošagne'e.

⁴ Beņe' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoļa'chon' toli tocaņe. Na' ba gwnitlao xtoļa'chon' dan'

bnežyw Criston' yeļa' mban chen' gosote'ne' le'e yag cruzen'. Da'nān' ba zoacho txen len Criston' ben' beban ladjo beņe' guaten', na' zoacho cont goncho can' chazlaže' Diosen'. ⁵ Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nšan' castigw checho toli tocaņe cate' gatcho. ⁶ Perw na'a ba belacho len ley da' žan cheyaļa' si'cho castigw toli tocaņe, le Criston' beque'e xtoļa'chon'. Na' ba chaclaže'cho goncho can' chazlaže' Diosen', na' chonchon gague cont na' Diosen' naccho beņe' güen len len', san chonchon dan' ba bocobe Spiritw chen' yichjlažda'ochon'.

Bi güe'cho latje nabia' da' malen' chio'

⁷ Bi cheyaļa' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyaļa' gona' cont gocbe'eda' chona' da' xinj. Na' gwnezdā' naquen mal chzelaža' bi da' de che beņe', le leyna' žan: "Bi selaže'le bite'teze da' de che beņe'." ⁸ Na' cate' gwnezdā' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj.

⁹ Neda' gwzoa' to tiemp bi gocbe'eda' bi cheyaļa' selaža'. Perw cate' bžin ža gwnezdā' nžian bia' bi cheyaļa' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nān' gwnezdā' cheyaļa' sia' castigw che xtoļa'chon' toli tocaņe. ¹⁰ Leyna' nyojen cont gwzenagcho chen na' gata' yeļa' mban checho toli tocaņe, perw da' bi bzenaga' chen, bzejni'in neda' gata' castigw chia' toli tocaņe. ¹¹ Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtoļa'chon' toli tocaņe.

¹² Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to liča. ¹³ ¿Nachō leyna' da' naquen güenchguan' chonen cont saca'zi'cho che xtoļa'chon' toli tocaņe? Bi nac len. Da' mal da' yo'o lo' yichjlažda'ochon' bi ben' latje goncho can' cheyaļa' goncho, na' da'nān' gwchoglaon checho saca'zi'cho che xtoļa'chon' toli tocaņe. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. ¹⁵ Bi choncho da' güen da' chaclaže'cho goncho, san da' xinj da' chgue'echo lelen' choncho. Bi chacbe'echo bixchen' choncho ca'. ¹⁶ Na' dan' chgue'echo da' mal dan' chonchon', zejen chacbe'echo nac leyna' güen. ¹⁷ Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. ¹⁸ Nezecho bi naccho beņe' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. ¹⁹ Bi choncho da' güen da' chaclaže'cho goncho, san choncho da' xinj da' bi che'necho goncho. ²⁰ Da'nān' chnia', gague chion'

choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochon' chžonen gonchon. ²² Lo' yichjlažda'ochon' chbecho goncho can' ža ley che Diosen', ²³ perw chacbe'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

²⁴ Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. Ž Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'n' si'cho castigw toli tocaņe. Choχ-clen Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

Spiritw che Diosen' chonen chio' yela' mban toli tocaņe

8 Na' na'a da' ba naccho txen len Cristo Jesús'en', bich gata' castigw checho toli tocaņe, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. ² Cate' ne' zoacho chontezcho da' malen' nchoglaon checho si'cho castigw che xtoła'chon' toli tocaņe, perw na'a Spiritw che Diosen' ba benen chio' yela' mban toli tocaņe da' chejnilaže'cho Cristo Jesús'en' na' Spiritw chen' chnabian' yichjlažda'ochon'. Da'n' bich saca'zi'cho toli tocaņe. ³ Ley da' bzoj Moisés'en' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goc-cze cuerp chen' ca cuerp che chio' beņe' güen da' xinj. Na' Jesucriston' bnežw cuine' neče xtoła'chon' cont da' malen' bich nabian' chio' len xbab da' yo'o lo' yichjlažda'ochon'. ⁴ Diosen' gwsele'ne' cont soacho goncho da' güen can' ža ley chen' cheyaļa' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

⁵ Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. ⁶ Le še zoacho chebecho da' malen', nachle si'cho castigw toli tocaņe, na' še chebecho da' ca' chazlaže' Spiritw che Diosen', guata yela' mban checho toli tocaņe na' soa cuzcho binlo len xbab dan' yo'o lo' yichjlažda'ochon'. ⁷ Choncho ze beņe' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. ⁸ Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

⁹ Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che

Spiritw che Diosen'. Na' beņe' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' leceze naquen Spiritw che Dios.) ¹⁰ Perw na' še ba zoa Criston' len chio', Diosen' že' naccho beņe' güen len le' na' leceze šjayzoacho len le' toli tocaņe la'czla' yesat cuerp chechon' neče da' malen' dan' de yežlion'. ¹¹ Diosen' bečhis bosbane' Cristo Jesús'en' ladjo beņe' guaten', na' leceze gwžin ža cate' Diosen' yečhis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

¹² Da'n' beņe' migw, chonen byen gwzenagcho che Spiritw che Diosen'. Bi cheyaļa' gwzenagcho che da' mal dan' yo'o lo' lažda'ochon'. ¹³ Le še soacho gwzenagcho che da' mal dan' yo'o lo' lažda'ochon', saca'zi'cho toli tocaņe. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocaņe.

¹⁴ Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios. ¹⁵ Diosen' beņe' chio' Spiritw chen' caten' gwque'e chio' ca xi'ine'. Da'n' bich chžebcho Diosen' can' chžebcho to beņe' znia cate' choncho xšinen'. Bich chžebcho Diosen', san choļ güižchone', che'chone': "Xa". ¹⁶ Na' leceze Spiritw chen' chnen lo' lažda'ochon' cont nezecho naccho xi'in Dios. ¹⁷ Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyaļa'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

¹⁸ Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. ¹⁹ Diosen' bene' beņač, bene' beyixe', len bica'chle da' zjade. Na' yogo'cho len bichle da' ca' bene' zoacho lo juisyw chbezcho batcan' gon Diosen' gacchgua mba che chio' naccho xi'ine'. ²⁰ Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' le-gaquen len beyixe' ca' na' len chio' beņač. Na' txen chbezcho gone' cont gac checho binlo. ²¹ Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' leceze yesyeyacšagüe' da' ca' cont bich te chegaquen. ²² Nezecho ža na'aža yogo' da' ca' ben Diosen' chesežaglaon ca to no'ole beņe' chzan. ²³ Na' gague da' ca'ze chesežaglaon, san lencze chio' beņač chžaglaon na' chbežgüe'cho. Ba beņe' Diosen' chio' Spiritw chen' cont nezecho gwžin ža gaquech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. ²⁴ Cate' Diosen' beņe' yela' mban checho toli tocaņe gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nežde' ba goc. ²⁵ Na' še bin'a

le'echo da'na' chbezcho gac, cheyała' cuezcho gaquen sin cbi chjaxaque'laže'cho.

²⁶ Na' Spiritw che Diosen' chaclenen chio', le bi nezecho can' cheyała' goncho yol güižcho Dios, san Spiritw che Diosen' chacbe'en cate' con chebanecho na' cate' bi cheže'lecho diža' da' güe'lencho Diosen', nach chnen gualazcho len diža' da' bi chejni'icho. ²⁷ Na' Dios ben' chna' chgüie' yichjlaždao' yogo'cze beņe', chejni'ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chnab Spiriton' lagüen'.

Diosen' de'e chio' na' da'nan' nono soe chio'

²⁸ Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaže'. ²⁹ Cate' biņa' galjcho Diosen' gwneze' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' beņe' blao lao yogo'cho na' chio' gaccho ca biše' lježe' bi' xcuide'ch. ³⁰ Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' beņe' güen len le' na' bene' cont gacchgua güen checho txen len Jesucriston' yaban'.

³¹ Catec güenna' chon Diosen' len chio' ba bsi'e xnezen' gac checho yogo' da' ca'! Len' de'e chio', nachen' notno soe chio'. ³² Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho. ³³ Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuiš chio' lagüen', le ba gwne' bibi xtoła'cho de. ³⁴ Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo beņe' guat ca', chi'e chnabi'e txen len Diosen'. Na' len' chnie' gualaz chio' lao Diosen'. ³⁵ ¿De da' gwžon cont Criston' bich gacde' chio'? ¿Gwžon no da' mal da' gac checho? ¿Gwžon no yela' yaše' yela' zi' da' gac checho? ¿Gwžon no yela' xi'a che beņe' chgue'e chio'? ¿Gwžon no yela' chbił chdon checho? ¿Gwžon cate' bi de xalana'cho? ¿Gwžon še bi da' xož gac checho? ¿Gwžon še za' no beņe' gote' chio'? Bibi de da' gwžon cont Criston' bich gacde' chio'. ³⁶ Chac can' nyojcz Xtiža' Diosen' žan:

Xanto' Dios, da' chejnilaže'to' le' nita' beņe' chesacclaže' yesote' neto' do ža do yel.

Chesone' xbab nacto' ca to xila' be yesote'.

³⁷ Na' la'czla' yogo' da' mal ca' za'ac len chio', bi chac chop laže'cho, san chebechgüecho le nezecho zoacze Criston' chacde' chio'. ³⁸ Neda' nezdada' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no beņe' gwnabia', ne da' chac checho na'a o bichle da' za'za'. ³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede'

catec chacde' chio' dan' gwsele' Xancho Jesucriston' beque'e xtoła'chon'.

Diosen' gwque'e beņe' Israel ca' ca xi'ine'

⁹ Neda' naca' txen len Criston' na' choa' diža' li, bi chonlaža', chnia' chacyaše'chgüeda' na' chachgüeda' lo' lažda'ogua' che beņe' gualaž chia' beņe' bi chesejnilaže' Criston'. Spiritw che Diosen' chaclenen neda' cont nezdada' diža' lin' choa'. ³ Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont beņe' gualaž chia' ca' yesejnilaže' Criston'. Chacda' legaque', le gosalle' zjanaque' beņe' Israel ca' neda'. ⁴ Diosen' gwque'e xozxtao' neto' beņe' Israel ca' xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. ⁵ Beņe' gole blao beņe' za' che'el'te gosaque' xozxtao' neto' beņe' Israel. Na' lo diaža' chegaque'na' golje Criston' ben' gwseła' Diosen'. Criston' lecze naque' Dios na' chnabi'e yogo'te beņach, yogo'te beyixe' na' yogo'loł bichle da' de yežlio nga na' gate'teze. Cheyała' gonxen'chone' toli tocaņe. Na' can' gonščaczcho.

⁶ Na' bi cheyała' goncho xbab bi ben Diosen' can' gwne' gone' güen len neto' beņe' Israel. Gague yogo' neto' goljto' lo diaža' che da' Israelen' na Diosen' nacto' beņe' Israel, le gague yogo'to' chejnilaže'to'ne'. ⁷ Na' gague yogo' neto' goljto' lo diaža' che da' Abrahanna' nacto' dogualje xi'in diaža' che', le gague yogo'to' chejnilaže'to' Diosen' can' gwejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža' che da' Isaaquen' gona' cuent lo diaža' chion'." ⁸ Na' dan' gwne' ca' zeje diža' Diosen' chbeje' beņe' zjanaque' xi'ine' gague da' gosalle' lo diaža' che beņe' Israelen', san beņe' chesejle'e gon Diosen' gac chegaque' can' že' con can' gwejle' da' Abrahanna', le-gacze' zjanaque' xi'ine' na' zjanaque' xi'in diaža' che da' Abraham. ⁹ Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni'."

¹⁰ Na' gague da' na'zen', san lecze ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. ¹¹ Cate' biņa' yesalle' bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez beņe' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabi'a'be' lebe'." Gwne' ca' cont nezecho chbeje' beņe' gac güen chegaque', gague lagüe da' chesone' bi da' güen, san cont gac can' chnalažen'.

¹³ Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

¹⁴ Bi cheyała' goncho xbab Diosen' cbi chone' da' zej to lica dan' chone' ca'. Zejcze' to lica. ¹⁵ Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." ¹⁶ Diosen' chbeje' beņe' cont yeyaše'laže'de'

le', gague can' chaclaže' beñačen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'.¹⁷ Na' Xtiža' Diosen' nyojen can' gože' beņe' gwnabia' che Egipton', gwne': "Neda' bena' naco' rey cont chlo'eda' beņe' yela' guac chia' da' chona' len le'. Chonan' cont yeseneze beņe' že' doxen lo yežlion' zoa' chnabi'a."¹⁸ Can' naquen, Diosen' cheyaše'laže'de' con non' chazlaže' yeyaše'laže'de', na' lecze beņe' zjanaque' beņe' güedenag, lecze chazlaže' gone' legaque' beņe' güedenag.¹⁹ Na' da' chon Diosen' ca', guacte gonle xbab ñale: "Con can' ba nžia Diosen' bia' chon chio' beñačh. ¿Bixčhen' že' de xtoła'chon' še ca'?"²⁰ Perw žno nac chio' beñačh gacyožlencho Diosen'? Ca to no yeso' xguague bi gac yen' beņe' ben len: "¿Bixčhen' beno' neda' quinga?"²¹ Beņe' güen yeso' xguaguen' guac gone' con can' chazlaže' len gonan'. Chac chone' ton da' nac xdančhua na' len gona' na'ze gone' yeto da' gon žin len bite'teze.

²² Na' bi nacho chon Diosen' con can' chazlaže' len chio' beñačh yogo' ñi'a, nžie' bia' gwnežjue' castigw toli tocaņe che beņe' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' seļa'te' legaque' lo yi' gabilen' la'czla' zjazaque' yesebiaye'e.²³ Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'.²⁴ Chion' ba gwleje' gac güen checho bałcho naccho beņe' Israel na' bałcho bi naccho beņe' Israel.²⁵ Can' ža le'e libr dan' bzoj Oseas ben' be' xtiža' Diosen' cani', žan:

Beņe' ca' bi zjanaque' yež chia', neda' Dios ñia' legaque' yež chia',
na' beņe' ca' bi gocda', yapegaca'ne' chacda' legaque'.

²⁶ Na' yež gan' gož Diosen' beņe' ca': "Bi nacle yež chia'",

na'teze Dios ben' zoa toli tocaņe ye'e legaque' xi'ine'.²⁷ Na' Isaiás ben' be' xtiža' Dios cani' gwne' quinga che da' xozxtao' neto' beņe' Israel: "La'czla' chio' beņe' Israel šancho ca yox da' chi' cho'a nisdao', bał gacho šjayzoacho len Diosen'.²⁸ Le Diosen' gone' can' ba nčhoglagüen' len chio' beñačh, na' bedao'nez gone' doxen can' ba ngüie' gone'."²⁹ Gac can' ža yeto da' bzoj Isaiásen' cani', žan:

Šaca' Xancho Diosen' ben' nape yela' guac xen bi boca'ane' to čhope beņe' lo nación Israel chechon',
ba gwžiaiyo'cho can' gosac che beņe' Sodoma na' beņe' Gomorra ca'.

Beņe' Israel beņe' bi chesejnilaže' Criston'

³⁰ Quinga ba goc, beņe' bi zjanaque' beņe' Israel bi besyeyiljue' nacle yesone' cont Diosen' ne' zjanaque' beņe' güen len le', perw baļe' ba chesejnilaže' Criston' na' da'nan' ba zjanaque' beņe' güen len Diosen'.³¹ Na' zan beņe' Israel gualaž čheto' zjanao' to ley da' chžian bia' naclen' yesone' cont yesaque' beņe' güen len Diosen'. Perw bi zjanaque' beņe' güen len le', le bi

chesone' doxen can' žanna'.³² Na' bi goc yesaque' beņe' güen len Diosen', le gosacde' yesone' da' güen cont yesaque' beņe' güen len le' na' bi gosacbe'ede' con beņe' yesejnilaže'ne' yesaque' beņe' güen len le'. Goc čhegaque' ca chac che beņe' jati'i to yej.³³ Quinga nyoj Xtiža' Diosen' čhegaque':

Gan' nzi' Sión seļa' to beņe',
na' bena' zaca'lebe' ca to yej da' čhego' beņe' na' ca to yej xen da' šjati'i beņe' na' bixe',
le beņe' zan bi yesejnilaže' ben' seļa'.
Na' note'teze' yesejnilaže' bena' seļan', gwbat yesyetingjde' che dan' gosejnilaže'ne'.

10 Beņe' migw, lo' lažda'ogua' che'nchgüeda' beņe' Israel gualaž chia' yesejnilaže' Jesucriston' cont gata' yela' mban čhegaque' toli tocaņe, nachen' choļ güiža' Diosen' chñaba' gaclene' legaque'.² Nežda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'.³ Bi chesejni'ide' cheyaļa' yesejnilaže' Criston' cont yesaque' beņe' güen, san chesyeyiljue' bi da' güen da' yesone' chesacde' cont yesaque' beņe' güen len le'. Da'nan' bi chesejnilaže' Jesucriston' can' chaclaže' Diosen' yesone'.⁴ Le yogo' beņe' chesejnilaže' Criston' ba besyeyaque' beņe' güen len Diosen'. Na' chio' chejnilaže'chone' ba nezecho nono gac gonyane' can' ža ley dan' bzoj Moisésen', neca gac yeyaque' beņe' güen da' na'ogüe' lezen.

⁵ Da' Moisésen' bzoje' can' cheyaļa' gon beņe' cont gague' beņe' güen len Diosen', gwne': "Note'teze beņe' chone' cayanen' ža leyna', nachen' guac bane' toli tocaņe."⁶ Na' chio' ba naccho beņe' güen len le' da' chejnilaže'chone', na' bich choncho xbab ñacho: "¿No gac cue yaban' na' no gac yetj gan' že' beņe' guaten?" šaca' nacle goncho šjaxi'cho Criston' cont gaclene' chio'.⁸ San diža' güen da' chyixjue'eto' žan: "Ba nom-bia'cho diža' da' chaclenen chio'. Choncho xbab che len na' choe'cho diža' can' žan." Lenña' diža' da' chyixjue'eto' beņe' cont yesejnilaže' Jesucriston'.⁹ Che'to' beņe': "Še güe'lenle beņe' diža' cont yesenežde' chejni-laže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bečhis bosbane' Jesucriston' ladjo beņe' guaten', nachen' gata' yela' mban chele toli tocaņe."¹⁰ Le cheyaļa' šejle'cho lo' yichjlažda'ochon' cont yeyaccho beņe' güen len Diosen' na' lecze cheyaļa' güe'lencho beņe' diža' che dan' chejnilaže'cho Criston' cont gata' yela' mban checho toli tocaņe.

¹¹ Xtiža' Diosen' nyojen žan: "Note'tez beņe' yesejnilaže' Diosen', gwbat yesyetingjde' che da' gosejnilaže'ne'."¹² Bałcho naccho beņe' Israel na' bałcho bi naccho beņe' Israel, toz can' chon Diosen' len yogo'cho, le Xancho Jesucriston' naque' Xan yogo'loļ beņe', na' cheyaše'laže'de' note'tezcho chñabcho gaclene' chio'.¹³ Can' gwne': "Note'tez beņe' yesenabe' gaclena' legaque', neda' naca' Xanle yebeja' legaque' lo da' malen'."¹⁴ Na' žnacxe yeson beņe' yesenabe' goclen lagüen' še bi chesejnilaže'ne'? Na' žnacxe yesone' yesejnilaže'ne' še biņa' yesende' xtižen'? Na' žnacxe

yesende' xtižen' še nono zoa no güe'lene' legaque' xtižen'? ¹⁵ Na' ¿nacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: "Chbechgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'."

¹⁶ Perw gague yogo' bene' gualaž cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." ¹⁷ Bia'cze cheyała'cze yesene bene' diža' güen da' chzejni'in che Criston' cont yesejnilaže'ne'.

¹⁸ Na' chḡaba': ¿biḡa' yesene bene' Israel gualaž cheton' diža' güen da' chzejni'in che Criston'? Baḡ gosenden'. Chac can' nyoj Xtiža' Diosen' žan:

Bene' že doxen lo yežlion' ba gosende' xtižen';
ba zej xtižen' doxen.

¹⁹ Na' chḡaba' da' yoble: ¿bi gosejni'i bene' Israel gualaž cheton' diža' dan' chzejni'in che Criston'? Ba gosejni'iczdzen'. Le da' Moisésen' bzoje' da' gwna Diosen' chegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

²⁰ Nach Isaíasen' ben' be' xtiža' Diosen' cani' bi bžebe' gwđixjue'ede' da' nga gwna Diosen', žan:

Bene' bi besyeyilw neda', besyeželde' neda'.

Na' bene' bi gosenab neda', blo'elagua' legaque'.

²¹ Na' Diosen' gože' bene' Israel gualaž cheton', gwne': "Yogo' ḡi'a chḡeyoeda' le'e cont gwzenagle chia', na' zoaḡaḡhle chonle güedenag len xtižan'."

Baḡ bene' Israel yesejnilaže' Jesucriston'

11 Bi cheyała' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín. ² Biḡa' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': ³ "Xana', bene' gualaž chia' quinga ba gosote' bene' ca' goso'e xtižon', na' ba bosyoḡhinje' mes de yej ca' gan' cheyała' yesonxene' le'. Yetoga neda' zoa' chzenaga' chio' na' lencze neda' chese'nde' yesote'." ⁴ Nach Diosen' boži'e xtižen' gože'ne': "ḡe' nita' gaže mil bene' ba gwleja' bene' biḡa' yosozoa xibe' yesonxene' l gua'a lsaca' dan' nzi' Baal." ⁵ Na' ca'cze naquen ža' ḡa'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. ⁶ Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' choḡ Diosen' neto' lo yela' bene' šagüe' che' cate' chbeje' neto' še ca', san naquen to goclenze.

⁷ Zan bene' nación Israel cheton', la'czla' chesonchgüe' da' chesacde' cheyała' yesone', bi chesyeželde' naclen' yesone' cont yesaque' bene' güen len Diosen'. Perw Diosen' gwleje' baḡto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'. ⁸ Chac chegaque' can' nyoj Xtiža' Diosen' žan: "Diosen' bene' cont zjanaque' ca bene' bicze nte. Na' ža' ḡa'aža zjanaque' ca to bene' bi chle'e len yejlagüen', na' ca to bene' bi chene len naguen'." ⁹ Na' da' Davin' gwne' chegaque':

Yogo' da' de da' chesyebede' yesaquen ca to da' yeben legaque',

na' yesaquen ca to ga šjaselažoe' yesaque' castigw.

¹⁰ Yeseḡhoḡ yichjlažda'ogaquen', na' yedote yeseza-ca'zi'e can' chzaca'zi' ben' nlegw cože' no'e yoa' zi'i.

Diosen' gwleje' baḡ bene' bi zjanac bene' Israel cont chesejniilaže'ne'

¹¹ Nezeczecho zan bene' Israel gualaž cheton' bi chesejniilaže' Criston'. Na' chḡaba', ¿zjanaque' ca bene' gwyo'o yeja' ḡi'e? ¿še zjanaque' ca bene' gwbiḡe' na' gote'? Zjanaque' ca to bene' con gwyo'o yeja' ḡi'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'n'an' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. ¹² Da' yoble chnia', da' bi chesejniilaže' bene' gualaž cheto' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel cheton' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž cheto' yesenite' yesejnilaže' Diosen', na' cana'ch gac mba juisyw.

¹³ Na' le'e bi nacle bene' Israel, che'nda' nezele Diosen' gwseje' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. ¹⁴ Le chaclaža' gona' cont bene' gualaž chia' ca' yesezelaže' gon Diosen' güen len legaque' can' chone' len le'e chejniilaže'lene', na' gata' yela' mban chegaque' toḡi tocaḡe. ¹⁵ Diosen' ba bnite' zan bene' Israel gualaž cheton' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž cheto' len le'. Na' leca mba gac cate' yesyebigue' len Diosen'. ¹⁶ De costumbr che neto' nacto' bene' Israel cate' chonto' yetextil, na' chnežjwto' Diosen' to bḡoḡ dao' cuazin' cont chlo'eto'ne' doxenen naquen che'. Na' lecze še ḡaḡo to loe yaguen' naquen che Diosen', zejen lecze zoze' yaguen' naquen che'. Na' da' xozxta'oto' ca' ben' gosejniilaže' Diosen' cani' zjaza-ca'lebbe' ca bḡoḡ dao' cuazina' na' ca' loe yaguen'.

¹⁷ Nación Israel cheton' zaca'leben ca zoze' yag da' ba ḡhog xan yaga' to lao yag olivo güen na' ba bniten' šḡa'ale. Na' le'e bi nacle bene' Israel zaca'leble ca zoze' yag olivo da' ze do yixe', da' ba gwḡogue' lagüen na' ba bozoen' yag güen cont beyaquen toze. Nach guac ḡaḡo loe yag güenḡa' ba noxen' le'e na' niže' chenna'

chac banjenle. ¹⁸ Bi gaquele naquechle bene' güen ca bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

¹⁹ Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwčogogue' xozen' cont goc bozoe' chio' gualaz legaue'." ²⁰ Da' li can' žalen'. Perw da' bi gosejnilaže' Criston', Diosen' bene' len legaue' ca xoze' yag da' ba gwčog xan yaguen' len, na' ba bozoe' le'e lagüe da' chejnilaže'le Criston'. Da'nan' bi ga'laže'le, san le gwsaca' cont soačhačhle šejnilaže'lene'. ²¹ Da' bi gosejnilaže' Criston', Diosen' bene' cont gwdi gwxaca' bene' Israel gualaž cheto' ca' bene' zjazaca'lebe' ca xoze' yag güenña', na' lecze ca' gone' saca'zi'le še bi soačhačhle šejnilaže'lene'. ²² Le gonšč xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyała' soačhačhle šejnilaže'lene' cont bi gone' saca'zi'le can' ba bene' len bene' Israel gualaž cheton' bi gosejnilaže'ne'. ²³ Na' Diosen' yebede' si' lo ne'e bene' Israel gualaž cheto' ca' cate' yesejnilaže'ne', le nape' yela' guac cont yozoe' legaue' binlo len le', nach yesaque' ca xoze' yag da' bezyone' toze len yag čhen da' yoble. ²⁴ Le'e nacle ca xoze' yag olivo da' ze yixe', Diosen' gwčogogue' le'e na' bozoe' le'e lo xoze' yag güen la'czla' bi nacle dogualje xozen'. Na' naquechxe yebede' yozoe' bene' Israel gualaž cheto' ca' le'e yaguen' da' yoble bene' ca' zjazaca'lebe' ca dogualje xoze' yaguen'.

Bene' zan bene' Israel yesyeyaque' lo na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clcl ca bene' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. ²⁶ Nach gwžin ža yogo' bene' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle,

le'e za'le lo diaža che da' Jacob.

²⁷ Na' cate' žin ža yeca'a xtoła'len', cana'ch ba goc can' ba gwnia' gona'.

²⁸ Dan' bi chesejle' zan bene' Israel gualaž cheton' diža' güen che Diosen', da'nan' ba bzoe' šla'ale nación cheton' na' ba gwleje' le'e bi nacle bene' Israel cont chejle'le che'. Perw na' Diosen' ne' chacde' bene' ca', le gwleje' da' xozxta'oto' ca' cont yesaque' nación che'.

²⁹ Na' Diosen' bi chetinjde' che bene' mbeje' yesaque' nación che', neca chetinjde' che goclen da' chone' len beñačen'. ³⁰ Cana'te le'e bi bzenagle che Diosen' na' da' bi gosaclaže' bene' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'. ³¹ Na' da' bi chosozenag bene' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'le'legaue' can' cheyaše'laže'le' le'e.

³² Diosen' ba gwčoglagüe' che yogo' beñačen' de xtoła'gaue' da' bi chosozenague' che', na' ba bene' ca' cont lecze gwlo'ede' cheyaše'laže'le' yogo'cze'.

³³ Leca bene' sina' Diosen'. Nezczedede' yogo'lo!. Gwbat šejni'icho da' nžie' bia' gac o da' nžie' bia' gone' lo yela' sina' che'. ³⁴ Nyoj Xtižen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheyała' gonen'." ³⁵ Na' nono cheyała' gon xbab yebi'i Diosen' güen len le' še bi da' ba be'ene'." ³⁶ Yogo'lo! da' de naquen che Dios. Bene' beñačh, beyixe' na' bica'chle da' zjade. Na' lagüe yogo'lo! da' bene' zoe' blao. Len' gacxene' toli tocaņe. Can' gacšca.

Cheyała' gon cuincho lo na' Diosen'

12 Bene' migw, Diosen' ba cheyaše'laže'le' chio'. Da'nan' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže' gonxenchone'. ² Bi goncho ca cheson bene' bi zjanombia' Diosen'. San cheyała' nabecho Diosen' gwš'e'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

³ Diosen' nži'ilaže'le' neda' na' ba gwsele' neda' cont chyixjue'eda' xtižen'. Da'nan' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' none' grasyw checho cont goncho bi da' goncho. ⁴ Can' nac cuerp chechon', zan cuen naquen na' gague toze žin da' cheson to to cuenen. ⁵ Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

⁶ Diosen' none' grasyw chechon' gwde gwdele da' gon to tocho. Še ba none' checho čixjue'echo bi da' gože' chio', nach cheyała' čixjue'echon na' šejle'cho gaclene' chio' gonchon. ⁷ Na' še Diosen' ba none' checho gaclencho bene', cheyała' gaclencho legaue'. Na' še ba none' checho gwsed gwlo'echo bene', cheyała' gwsed gwlo'echone'. ⁸ Na' še Diosen' ba none' checho neyoecho bene' cont yesone' da' güen, cheyała' neyoecho'ne'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichjcho güia na'cho legaue'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

Da' cheyała' gon chio' chejnilaže'cho Jesucriston'

⁹ Cheyała' gaue ljež beñačhcho do yichj do laže'cho, na' cheyała' gue'echo da' malen' na' soaczcho goncho da' nac da' güen. ¹⁰ Ca chaque biše' goljcho, ca'cze cheyała' gauecho note'teze bene' lježcho na' gonchone' bene' xench ca cuincho.

¹¹ Bi gaccho beṇe' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

¹² Cheyała' yebecho da' nezecho šjayzoacho len Diosen'. Cheyała' gwyo gwčejcho cate' chy chzaca'cho. Na' lecz cheyała' yoł güižcho Diosen' zan nī'a yogo' ža.

¹³ Cheyała' gaclencho beṇe' lježcho beṇe' chesejni-laže' Diosen' še bi da' cheseyažjde' na' gwlebcnone' ližcho še zjanaque' beṇe' zito'.

¹⁴ Cheyała' ṇabcho lao Diosen' gac güen che beṇe' chosoči chososaca' chio'. ṇabcho gac da' güen chegaque', gague da' mal.

¹⁵ Cheyała' yebecho txen len beṇe' chesyebē na' cuežcho txen len beṇe' chesebež.

¹⁶ Yogo'cho cheyała' goncho toze xbab. Bi cheyała' ga'laže'cho, san yoł güižcho beṇe' yaše' beṇe' bibi chac na' bi gon cuincho beṇe' sina'.

¹⁷ Še bi da' mal chone beṇe' chio', bi ṇacho lecze da' mal yebi'icho len le'. Cheyała' cue' yichjcho goncho da' güen cont yesena beṇe' le nacen güen dan' chonchon'. ¹⁸ Cheyała' goncho bi da' gac goncho cont soacho biṇlo len yogo'loł beṇe'. ¹⁹ Chacda' le'e, nachen' chnia' cheyała' gwdecho to šla'ale bite'teze da' chesone beṇe' chio'. Diosen' gwyoecze' nac gone' len beṇe' chosoči chososaca' chio'. Xtižen' nyojen žan: "Xancho Diosen' že: Neda' yoži'a che da' mal da' chesone', na' neda' gwnežjua'ne' castigw." ²⁰ Na' lecze žan: "Še chbil chdon beṇe' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal." ²¹ Bi güe'cho latje ṇabia' da' malen' chio' na' yebi'icho mal len beṇe' chonde' chio' mal, san yebi'icho güen len legaque' cont yesyetenjde' che da' malen' chesonen'.

13 To tocho cheyała' gwzenagcho che justis beṇe' chesenabia', le Diosen' bnite' legaque' chesenabi'e. ² Še bi chzenagcho che beṇe' chesenabia', bi choncho da' nžia bia' Diosen' goncho, na' lecze chyiljwze xtoła'cho na' gaccho castigw da' bi chzenagcho čhegaquen'. ³ Bi cheyała' žebcho beṇe' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaque', con soacho goncho da' güen da' yesyebede'. ⁴ Justis ca' chesone' xšin Dios cont soacho güen. Perw še choncho da' xinj, cheyała' žebcho legaque', le zjanape' yela' chnabia' cont yesone' castigw che note'teze beṇe' cheson da' mal, le Diosen' none' lo na'gaquen' yosonežjue' castigw che beṇe' cheson da' mal. ⁵ Da'n'an' cheyała' gwzenagcho čhegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. ⁶ Lecze da'n'an' cheyała' čhixjwcho no che bien na' bichle da' cheyała' čhixjwcho, cont beṇe' ca' chesenabia' guac yesone' da' yo'o lo ne'e yesone', na' cheyała' gwzenagcho čhegaque', le Diosen' ba bzoe' legaque' cont chesone' dan' cheyała' yesone'.

⁷ Čhixjwcho še bi da' čala'cho che beṇe'. Še čala'cho che bien, čhixjwchon. Še čala'cho che im-

puestw, čhixjwchon. Na' gapcho bala'aṇ beṇe' cheyała' dap bala'aṇ. Na' gonxencho beṇe' cheyała' gacxen.

⁸ Cheyała' čhixjwcho doxen bi da' čala'cho che beṇe', na' lecze cheyała' gague yogo' ljež beṇačcho, le še chaquecho legaque', ba choncho da' non ley che Diosen' mandadw goncho. ⁹ Leyna' žan: "Bi gata'lenle no'ole bi nac no'ol čhele o beṇe' byo bi nac beṇe' čhele, bi gotle beṇe', bi cuanle, bi güe'le diža' güenlaže' che beṇe' lježle, bi selaže'le bite'teze da' de che beṇe'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho che dan' žanna': "Le gague ljež beṇačle ca chaque cuinle." ¹⁰ Še chaque lježcho, bibi da' mal gonechone'. Da'n'an' choncho doxen can' nžia bia' leyna' še ba chaque lježcho.

¹¹ Caten' gwzolaacho chejnilaže'cho Criston' gwnezecho gwžin ža yide' da' yoble. Na' ṇa'a ba za' bagwze yide' da' yoble. Da'n'an' bich cheyała' gaccho ca beṇe' chtas, beṇe' bi chon xbab. ¹² Yežlio nga zaca'leben ca ga nac čhoł, le že'chgua beṇe' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyxi'e chio'. ¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo ṇin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol čhecho o beṇe' byo bi nac beṇe' čhecho o goncho bichle da' nac da' yela' zto', na' bi cheyała' tilen lježcho o gue'echo beṇe'. ¹⁴ Cheyała' gon cuincho lo na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi ṇabian' chio'.

Toz Diosen' nezde' še beṇe' lježcho nape' doła'

14 Še zoa to beṇe' ba chejnilaže' Criston' na' biṇa' šejni'ide' nac cheyała' gone', con zoe' chacze-jlaže', le gwlebe' gague' txen len le'e, perw bi gacyožlenlne' che xbab čhen'. ² Nita' beṇe' chesejnilaže' Diosen' chesacde' bi zjanape' doła' da' chesagüe' bite'teze yela' guagw, na' lecz nita' beṇe' yoble biṇa' yesejni'ide' bite'teze da' ye'ej gagwcho naquen güen lao Diosen'. Da'n'an' chesacde' bi cheyała' yesagüe' bela' na' chesagüe' yix'e cuanze. ³ Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. ⁴ ¿Noxe nac chio' gwlaže' čhecho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

⁵ Nita' beṇe' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' beṇe' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho. ⁶ Beṇe' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' beṇe' chesacde' toz can' zaca' ža ca', lecze chesonxene' Diosen' chesone' xbabēn' ca'. Na' ben' chesagw bite'tez yela' guagw, chesonxene' Xancho

Diosen' cate' chesagüen', le cheso'e yeļa' choxclen çe Diosen' çe dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yeļa' choxclen çe'.

⁷ Ne tocho bi yo'o lo na'cho gwžičacho bia' can' soa cuezcho šlaque mbancho, na' neca yo'o lo na'cho gwžičacho bia' nac gatcho. ⁸ Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xanchon'. ⁹ Cuiñ Xancho Criston' gote' na' beyas bebane' ladjo beñe' guat ca' cont naque' Xan yogo' beñe' chesejnilaže'ne' beñe' zjamban na' beñe' ba gosat.

¹⁰ Bi cheyaļa' nacho çe beñe' lježcho zjanape' doļa' še bi da' chesone', na' bi cheyaļa' gue'e lježcho. Yogo'czecho techo lao Criston' cont le' čhogbi'en çecho še de xtoļa'cho o še bibi de. ¹¹ Nyojczte Xtiža' Diosen' žan:

Xancho Diosen' že':
Da' li naca' Dios, zoa' mbanā',
na' yogo' beñe' yedesezoa xibgaque' laguan',
na' yogüe' yesene' toz neda' zaca' yesonxen beñač.
¹² Can' naquen, yogo'czecho yodecho cuent lao Diosen' çe bite'teze da' ba bencho šlac mbancho.

Bi goncho da' gwžigan' beñe' lježcho gone' da' mal

¹³ Da'nān' chnia', bi cheyaļa' necho çe beñe' lježcho neče bi da' chesone'. Da' cheyaļa' yechoglaže'cho goncho, cuejyichjcho bi da' choncho še len chžigan' note'teze beñe' lježcho gone' da' xinj o še len chonen ca šjabix šjalažoe'. ¹⁴ Xancho Jesucriston' bzejni'ide' neda' cont nezda' bi napcho doļa' še gagwcho bite'teze yeļa' guagw. Perw še beñe' chone' xbab gape' doļa' lagüe da' gagüe' to da' gagüe', naquen mal gagüen' še ca'. ¹⁵ Še beñe' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' bnežjw cuine' gote' neče beñe' lježchon', na' chio' bi cheyaļa' gagwcho bi da' gonen cont gac čhoplaže' beñe' lježchon' cuejyichje' Criston' na' cuiaye'e. ¹⁶ Še choncho bi da' chaquecho naquen güen, perw na' beñe' lježchon' chesacde' naquen mal, bi gonchon cont bi yesene' choncho da' xinj. ¹⁷ Še ba choe'cho latje chnabia' Diosen' chio' len xbab çechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to liča, soacho binlo len Dios na' len beñe' lježcho, na' soacho mbalaz da' yo'o Spiritw çe Diosen' lo' lažda'ochon'. ¹⁸ Še choncho da' zej to liča, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho çe Criston'. Nachen' chebe Diosen' can' chonchon', na' lecze yezica'chle beñe' chesene' choncho güen.

¹⁹ Da'nān' cheyaļa' yeyiljwlaže'cho can' goncho soacho binlo tocho yetocho na' can' gaclen beñe' lježcho ca' cont yesenita'čače' yesejnilaže' Criston'.

²⁰ Diosen' ba bñitlagüe' xtoļa' beñe' lježcho na' bi cheyaļa' gagwcho da' gonen gac čhoplaže' no beñe'

lježcho na' gone' da' chacde' naquen mal. Nezda' de latje gagwcho bite'teze yeļa' guagw, perw naquen mal gagwchon še len chonen čhoplaže' beñe' lježcho.

²¹ Güenczen bi gagwcho bela' neca ye'ejcho vino na' neca goncho bichle da' goncho še len chonen cont beñe' lježcho chacčhoplaže' o gone' da' xinj o cuejyichje' bich šejnilaže' Criston'. ²² Še nezecho zoacho binlo len Diosen' da' chejnilaže'chone' na' chaquecho bi napcho doļa' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doļa' len bica' da' choncho. ²³ Na' de xtoļa'cho še chagwcho to yeļa' guagw na' chacžejlaže'cho chaquecho bilja cheyaļa' gagwchon, le bite'teze da' choncho še chaquecho naquen mal gonchon, napcho doļa' chonchon še ca'.

Cheyaļa' cue' yichjcho beñe' lježcho

15 Bałcho ba zoačhačcho chejnilaže'cho Criston' na' nezecho de latje ye'ej gagwcho bite'teze. Perw cheyaļa' gapcho yeļa' chxenlaže' len beñe' biñā' yesejni'išagüe'de', na' bi goncho con da' žan çecho. ² To tocho cheyaļa' goncho bi da' güen da' chazlaže' beñe' lježcho ca' goncho, cont gaclenen legaque' yesejnilaže'che' Diosen'. ³ Goncho ca', le ne Criston' bi bene' con da' gwnazen çe', san goc çe' can' nyoj Xtiža' Diosen', žan gože' Xe' Diosen': "Beñe' besegue'ede' le' na' goseñe' diža' bya' čhio', lencze čhia' neda' goseñe'." ⁴ Na' Xtiža' Diosen' da' bosozoj beñe' cani' chzejni'in chio' cont gwyo gwčhejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. ⁵ Diosen' chone' chio' yeļa' chxenlaže' cont chyo chčhejcho cate' chzaca'zi'cho. Na' chñablaža' lecze gone' gac yichjlažda'ole toze tole yetole, con can' chazlaže' Cristo Jesúsēn'. ⁶ Na' gone' ca' cont toze can' ñale gonxenle Dios ben' nac Xa Xancho Jesucriston'.

Diosen' chaclaže' beñe' bi zjanac beñe' Israel yesonxene' le'

⁷ Da'nān' cheyaļa' le'e to to beñe' lježcho binlo ca Criston' chle'ede' to to chio' binlo, chio' chejni-laže'chone'. Goncho ca' cont gaxen Diosen'. ⁸ Can' goc len Cristo Jesúsēn', bzexjw yichje' ben cuine' ca to beñe' güen žin cont goclene' neto' beñe' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaque'. ⁹ Na' lecze bid Criston' cont le'e bi nacle beñe' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan:

Da'nān' gua' yeļa' choxclen čhio' gan' že beñe' bi zjanac beñe' Israel,
goļa' gonxena' le'.

¹⁰ Na' ga yoble žan:

Le'e bi nacle beñe' Israel, le yebe txen len neto' beñe' gwlej Diosen' nacto' nación çe'.

¹¹ Na' lecze žan:

Yogo' le'e bi nacle beṇe' Israel, le gonxen Xancho Diosen'.

Yogo' lo'le le güe' diža' che yela' gwnabia' che'.

¹² Na' da' Isaías ben' be' xtiža' Diosen' can' bzoje' da' nga žan:

To beṇe' gualaž yide', beṇe' galje' lo diaža che da' Isaí.

Le' nabi'e beṇe' že' to to yež na' to to nación, na' beṇe' ca' bi zjanac beṇe' Israel yesebeze' gaclene' legaque'.

¹³ Diosen' chone' cont chebecho dan' nezecho šjay-zoacho len le'. Na' chṇaba' gonšque' cont soale mbalaz juisyw na' soa cuezle binlo len xbab da' yo'o yichjlaž-da'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soačhačhle yebele da' nezele šjayzoale len le'.

¹⁴ Beṇe' migw, nežda' ba nacle beṇe' šagüe' beṇe' chon da' güen, na' nežda' chejni'ichgüele na' chac chṇeyoe lježle. ¹⁵ Pero le'e cart nga ba beyaxjda' gwdiła' le'e cont gonchle xbab, le Diosen' beži'ilaže'de' neda' gwleje' neda'. ¹⁶ Gwleje' neda' cont chyixjue'eda' xtižen' len beṇe' bi zjanac beṇe' Israel. Na' Diosen' yebede' da' ba goclena' legaque' cont ba'le' gosejle'e xtižen' na' gosaque' lo ne'e cate' Spiritw čhen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclen Cristo Jesús'en' neda' chona'. ¹⁸ Bi cheyaxjda' gua' diža' che bi da' ba ben beṇe' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan beṇe' ca' bi zjanac beṇe' Israel chosozenague' che'. ¹⁹ Spiritw che Diosen' goclenen neda' cont bena' yela' guac na' bichle da' besyebane beṇe' gate'teze gwy'a be'lana' legaque' xtiža' Diosen', gwzolagua' Jerusalén na' bžintia' gan' nzi' Ilírico. Na' ba gwdixjue'eda' xtižen' doxen gan' gwsele' neda'. ²⁰ Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje beṇe' ba chosozejni'ide' xtiža' Diosen'.

²¹ Da'n'an' chac can' nyoj Xtiža' Diosen' žan:

Beṇe' ca' biṇa' yesende' xtižen' yesombi'ene', na' beṇe' ca' biṇa' yesenezde' che' yesejni'ide' che'.

Pablon' šeje' Roma

²² Da' chzejni'ida' beṇe' ga yoble xtiža' Criston', da'n'an' bi goc yida' gan' zoalen' la'czla' zan ni'a ba go-claža' yida'. ²³ Cana'te zelaža' yedeṇa'a le'e, perw na'ach ba beyož bena' da' gwlo'o Diosen' lo na' gona' do nga. ²⁴ Nach cate' ša'a España cana' chacda' tia' yedeṇa'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. ²⁵ Na'a ša'a Jerusalén šjasana' mechw da' gaclenen beṇe' lježcho ca' že' na' beṇe' ca' ba gwlej Diosen' chesejnilaže'ne'. ²⁶ Le beṇe' lježchon' že' yež ca' zjachi' distritw Macedo-nia na' Acayan' bosotobe' mechw da' gaclenen beṇe' lježcho ca' chesejnilaže' Diosen' Jerusalén ben' zjanac beṇe' yaše'. ²⁷ Beṇe' ca' bosotoben' besyebede' bosonežjue' mechon', na' naquen to goclen da' cheyała' yesone' len beṇe' Israel gualaž četo' ca', le la'czla' legaque' bi zjanaque' beṇe' Israel, ba zjanone'

čhegaque' yogo' da' güen da' ba bzejni'i Diosen' neto' beṇe' Israel, na' da'n'an' cheyała'cze yesaclene' beṇe' gualaž četo' ca' len da' cheseyažjde'. ²⁸ Cate' bač be-yož bena' lo na' beṇe' Jerusalén ca' mechon' bdooben', cana'ch sa'a ša'a Españan' na' tia' na'a le'e. ²⁹ Na' nežda' Criston' gaclene' neda' la'a gan' zoalen' cont güe'lana' le'e diža' güen che' da' gaclenen yichjlažda'olen' na' soačguacho mba.

³⁰ Beṇe' migw, nežda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'n'an', beṇe' migw, chṇaba' gacle neda' txen yoł güižcho Diosen' cont gaclene' neda'. ³¹ Nabechone' bi gaca' lo na' beṇe' gualaž četo' ca' beṇe' bi chesejnilaže' Criston' Judean', na' lecze nabechone' cont beṇe' lježcho ca' že' Jerusalén beṇe' yo'o lo na' Diosen' yesazlaže' ca dan' güe'gaca'ne'. ³² Nach še Diosen' gone' latje, mbalaz yedeṇa'a le'e na' yeyaclaža' soa' na' len le'e. ³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab čhelen'. Ca'šcacz gač.

Pablon' chguape' tiox ba' beṇe' že' Roma

16 Chṇeyoeda' le'e le gon txen len beṇe' zancho Febe cate' le'e gan' zoalen'. Ba benchgüe' xšin Diosen' len beṇe' ca' chesedop chesežag chesonxene' Jesucriston' lo yež Cencrea. ² Le gwlebe' ca cheyała' gonle len ljež chio' yo'ocho lo na' Diosen'. Na' le gac-lene' še bi da' chyažjde', le len' ba goclene' beṇe' zan na' lecze ba goclene' neda'.

³ Le gwguap tiox Priscila len beṇe' che' Aquila. Le-gaque' ba gosone' žin che Cristo Jesús'en' txen len ne-da'. ⁴ Besezanlaže' cuingaque' yesate' cont bososle' ne-da' lo na' yela' goten'. Choa' yela' choxclen čhegaque' can' gosonen'. Na' lecze yogo' beṇe' ca' bi zjanac beṇe' Israel beṇe' chesedop chesežag chesonxene' Jesu-criston' cheso'e yela' choxclen čhegaque'. ⁵ Le gwguap tiox beṇe' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox beṇe' xmigua' Epeneto. Chacda'ne', le naque' beṇe' nechw beṇe' Acaya gwejnilaže' Criston'. ⁶ Nach le gwguap tiox María no'olen' ba benchgua xšin Diosen' gan' zoalen'. ⁷ Na' le gwguap tiox beṇe' gualaž četo' Andrónico len Junias. Le gaque' byobch gosejnilaže' Criston' clal ca neda' na' txen gota'to' ližya. Lecz ca' postlw ca' yezica'chle cheso'e diža' güen čhegaque'.

⁸ Le gwguap tiox beṇe' xmigua' Amplias, le chac-da'ne' da' ba chejnilaže' Xancho Criston'. ⁹ Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'. ¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox beṇe' ca' že' liž Aristóbulo. ¹¹ Na' le gwguap tiox beṇe' gualaž čhia' Herodión na' lecze beṇe' ca' že' liž Narciso, con noe' chesejnilaže' Criston'. ¹² Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox beṇe' zancho Pérsida. Chaquechone' da' ba benchgüe' xšin

Ḫanchoŋ'. ¹³ Na' le gwguap tiox Rufo. Naque' beŋe' blao len chio' chejni-laže'cho Ḫancho Jesucriston'. Na' lece le gwguap tiox xŋe'ena', le ba none' neda' ca xi'iŋe'. ¹⁴ Le gwguap tiox Asíncrito, Flegonte, Hermas, Patrobas na' Hermes len beŋe' lježcho zjanita' len le-gaque'. ¹⁵ Na' le gwguap tiox Filólogo na' Julia na' len Nereo na' beŋe' zanen', na' Olimpás na' yogo' beŋe' lježcho nita' len le-gaque'.

¹⁶ Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' beŋe' ca' chesedop chesežag chesonxene' Criston' yogo'te yež gan' ba gwy'a chosoguape' le'e tiox.

¹⁷ Beŋe' migw, chŋeyoeda' le'e le gwsaca' cont bi gwzenagle che beŋe' zjanac beŋe' güetil, beŋe' chesac-laže' gonle da' xiŋj, le bi chesone' txen len dan' ba bsdle che Diosen'. ¹⁸ Bi chosozenague' che Ḫancho Jesucriston' san chosozenague' che da' mal da' yo'o lo yičhjažda'ogaquen' na' chesone' con can' žanŋa'. Na' cheso'e diža' xdan chosopede' beŋe' chesejle'daze cont chesexoayague' le-gaque'. ¹⁹ Yogo'ze beŋe' zjaŋezde' chzenagle che beŋe' chosozejni'ide' le'e, na' danan' chbeda'. Perw chaclaža' gacle beŋe' sina' cont gwzenagle che da' nac da' güen, gague gwzenagle che da' nac da' mal. ²⁰ Nach Dios ben' chon cont chzoa chbezcho binlo lece yob gone' cont Satanásen' dan' chnabia' da' xiğüe' ca' bi soen ŋabi'an chio'. Na' Ḫancho Jesucriston' soašque' gaclenšcace' le'e.

²¹ Timoteo ben' chonlen neda' xšin Criston' nga chguape' le'e tiox, na' lece ca' cheson beŋe' gualaž cheto' Lucio na' Jasón na' Sosípater.

²² Neda' Tercio chzoja' cart nga con can' ža Pablon', na' lece chguapa' le'e tiox, le naccho txen chejni-laže'cho Ḫanchoŋ'.

²³ Lece Gayo chguape' le'e tiox. Neda' Pablo zoa' liže' na' lece liže' nga chesežag beŋe' ca' chesonxen Criston'. Na' lece Erasto ben' nac lo ne'e mechw che ciudan' chguape' le'e tiox na' len beŋe' biše' Cuarto.

²⁴ Soašca Ḫancho Jesucriston' gaclenšque' yogo'le. Na' ca'šcace gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soačhačle šejnilaže'lene' can' ža diža' güen da' chyixjue'eda' chzejni'ida' beŋe' che Jesucriston'. Na' chzejni'ida' xtiža' Diosen' da' nono ŋa' ŋeze cate' za' xete yežlion', ²⁶ perw ŋa'a Diosen' ba bzejni'ide' chio' bi zejen da' ca' none' mandadw bosozoj beŋe' ca' bosozoj Xtižen' cani'. Na' Dios ben' zoa toli tocaŋe chaclaže' šej diža' chen' yogo' yež cont yogo' chio' beŋač šejnilaže'cho Jesucriston' na' gwzenagcho che'.

²⁷ Toze Diosen' zaque' gonxen chio' beŋač, na' tozen' napchgüe' yela' sina'. Na' da' gwsele' Ḫancho Jesucriston' chaclene' chio', da'nan' chac chonxenchone' toli. Ca'šcace gac.

1 Corintios

Pablon' chzoje' beņe' chesedop chesežague' chesonx-
ene' Jesucriston' Corinto

1 Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gw-nalaže'. Na' chguapa' le'e tiox txen len beņe' migw checho Sóstenes ben' lece chejnilaže' Jesucriston'. ² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosoĵ güiže' Xancho Jesucriston' na' zjanaque' le' txen gate'tezechle, le lece naque' Xan-gaquen'. ³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxcen che Diosen' par le'e can' chaclene' le'e lagüe chejnilaže'le Jesucriston'. ⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' čhen. ⁶ Na' ba chonle cont nacbia' xtiža' Criston' da' chejle'le naquen da' li. ⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. ⁸ Na' Diosen' gaclene' le'e soačhačhle gonle can' chazlažen' cont bibi doĵa' gaple caten' yid Xancho Jesucriston' yeto. ⁹ Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

**Nža' nža'te chesena beņe' chesonxen Jesucriston' Cor-
inton'**

¹⁰ Beņe' migw, le'e chejnilaže'le Jesucriston'. Da'nan' chņeyoeda' le'e, le gon txen len lježle na' bich gacle čople o šon taple len da' chonle xbab na' len da' žale. ¹¹ Chnia' ca' beņe' migw, le beņe' nita' liž Cloé ba gose'e neda' chdiĵe chšašle. ¹² Chnia' chdiĵe chšašle, le balĵe žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'." ¹³ ČChaquele bid Criston' neče to čhopzle? ČChaquele nedan' Pablo bnežjw cuina' gota' le'e yag cruz neče le'e? ČZsoale nis cont blo'ele chejnilaže'le neda'? Gague can'. ¹⁴ Choa' yela' choxcen che Diosen' bi bzoa' le'e nis, san Crispo na' Gayo na'zen' bzoa' nis. ¹⁵ Da'nan' noch no zoa len le'e beņe'

yesene' bzoa' legaque' nis, le bi chaclaža' no yesena gwzoe' nis cont blo'ele chejnilaže' neda'. ¹⁶ Na' neda' lece bzoa' nis beņe' ca' že' liž Estéfanos, na' bi za'laža' še zoa nochle beņe' bzoa' nis. ¹⁷ Nežda' Criston' bi gwsele' neda' cont gwzoa' beņe' nis san cont čhixjue'eda' diža' güen čhen'. Na' bi cheyiljua' no diža' da' chaque beņačhen' diža' sina' choa' cate' chyixjue'eda' diža' güen čhen', le še beņe' yesone' xbab che yela' sina' čhia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

**Criston' bedelo'ede' yela' guac che Diosen' na' yela'
sina' che'**

¹⁸ Beņe' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neče xtoĵa'gaque' le'e yag cruzen'. San chio' chejnilaže'chone', chio' ba de yela' mban checho toĵi tocaņe, nezecho diža' nan' naquen da' zaca'chgua, le nsan' yela' guac che Diosen'. ¹⁹ Chac can' nyojen žan:

Neda' gona' cont nacbia' gague da' li zjansina' beņe' ca' chesene' zjanaque' beņe' sina'.

Na' gona' cont beņe' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele čchixe beņe' ca' zjansed yela' sina' che beņačhen'? na' čchixe beņe' chososed chosolo'ede' ley che Diosen'? na' čchixe beņe' chac cheseņe' diža' xdan diža' sina' che dan' chac yežlio nga? Quinga nac chegaque', Diosen' ba blo'ele yela' sina' čhegaquen' bi naquen da' sina'. ²¹ Diosen' naque' beņe' sina' na' ba bene' cont yela' sina' che beņačhen' bi chaclenen legaque' yesombi'ene'. Le Diosen' chazlaže' con beņe' yesejle' xtiže' dan' choe'to' gata' yela' mban čhegaque' toĵi tocaņe, la'czĵa' yezica'chle beņe' chesacde' bibi zaca' xtižen' dan' choe'ton'.

²² Beņe' Israel gualaž četo' cheseņabe' yesele'ede' yela' guac cont yesejle'e bin' ža Diosen', na' beņe' chesac diža' griego cheseyiljue' no diža' da' chesacde' naquen da' sina'. ²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' beņe' Israel gualaž četo' ca' bi chesazlaže' da' chyixjue'eto' na' bitw chesejle'en. Na' beņe' bi zjanaque' beņe' Israel lece chesacde' bibi zaca' dižan' chyixjue'eton'. ²⁴ Perw chio' ba gwlej Diosen' naccho xi'ine', la'aczĵa' še naccho beņe' Israel o še bi naccho beņe' Israel, nezecho Diosen' blo'ele yela' guac čhen' na' yela' sina' čhen' dan' gwsele' Criston' bnežjw cuine'

neče chio'. ²⁵ Beñe' ca' bi chesejnilaže' Diosen' chesacde' bi nac Diosen' beñe' sina' lagüe da' be'e latje got Criston' le'e yag cruzen', na' chesacde' chlo'en bibi yeļa' guac nap Diosen'. Perw gague can', san xbab che Diosen' naquen da' sina'ch ca xbab che beñačen', na' nape' yeļa' guac xench ca beñačen'. ²⁶ Beñe' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle beñe' sina' len xbab che beñačen', gague zanle nacle beñe' chnabia', gague zanle golje lo diaža che beñe' blao. ²⁷ Diosen' ba gwleje' chio' naccho xi'ine' la'czla' bibi yeļa' sina' che yežlio nga napcho, na' chesaque beñačen' bibi chac goncho; nach Diosen' chaclene' chio' len yeļa' guac che' na' yeļa' sina' che' cont beñe' zjanac beñe' sina' len xbab che beñačen' yesacbe'ede' na' yesacde' zto'. ²⁸ Diosen' ba gwleje' chio' naccho xi'ine', zanchi naccho no beñe' yixe', no beñe' chesegue'e beñačen', na' gwleje' chio' cont gwlo'ede' beñe' zjanaque' blao len beñačen' bibi zjazaque' len le'. ²⁹ Diosen' bene' cont nono gac gonxen cuine' lagüen'. ³⁰ Diosen' ba none' chio' txen len Cristo Jesúsén, na' Criston' nse'e yeļa' sina' che Diosen' na' naque' la'zelagüe beñe' güen beñe' laždao' xilaže'. Na' dan' naccho txen len Criston', chone' chio' yeļa' sina' chen', na' yeļa' beñe' güen chen', na' yeļa' beñe' laždao' xilaže' chen', na' ba beque'e xtoļa'chon'. ³¹ Da'nan' Xtiža' Diosen' nyojen žan: "Bi cheyaļa' gonxen cuincho san gonxencho Xan-chon'."

Pablo be'e xtiža' Criston' ben' gosote' le'e yag cruz

2 Beñe' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwejni'ile na' gague bia' diža' xdan cont gaguele naca' beñe' sina'. ² San beçhoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xtoļa'chon', na' bi be'lena' le'e bichle diža'. ³ Na' cate' gwzoa' len le'e gocbe'eda' bibi chac gona', na' leca bze-ba' na' goļa' gwziza' bena' xbab še bi gwzenagle xtižan'. ⁴ Na' diža' da' be'lena' le'e gague bian' len yeļa' sina' che beñačen' cont co'oyeļa' le'e gwzenagle chia', san Spiritw che Diosen' goclenen neda' len yeļa' guac chen na' benen cont bzenagle. ⁵ Goclaža' šejnilaže'le Criston' gague neče yeļa' sina' che beñačen', san neče da' gwša' Diosen' xbab chelen' len yeļa' guac chen'.

Spiritw che Diosen' chonen yeļa' chejni'i

⁶ Na' len beñe' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che beñe' blao o beñe' gwnabia' zjanita' na'a, le te che beñe' ca' na' te che yeļa' sina' chegaquen'. ⁷ Diosen' ba bzejni'ide' neto' to yeļa' sina' da' nono gwejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoļa'chon' cont soacho mbalaz toļi tocanē. ⁸ Na' ne toze beñe' gwnabia' beñe' že' yežlio nga bi gosejni'ide' yeļa' sina' che Diosen', le šaca' gose-

jni'iden', bi bosode'e Xancho Jesucriston' ben' nac beñe' zaca' juisyw le'e yag cruzen' še ca'. ⁹ Na' Xtiža' Diosen' da' nyojen žan:

Nono zoa beñe' ba ble'ede' da' güen da' gon Diosen' len beñe' ca' chesacde' le'.

Nono na' yende' diža' can' gone',

neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len beñačen'.

¹¹ Can' naquen len beñačen', nono neze bi xbab chon beñe' yoble, con to tocho nezecho bi xbab choncho. Na' ca'cze naquen len Diosen', con Spiritw che' na'zen nezen bi xbab chone'. ¹² Na' Diosen' ba beñe' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'.

Da'nan' bi choncho xbab can' cheson beñe' bi chosozenag che Diosen'. ¹³ Na' cate' choelento' le'e xtiža' Criston', gague choe'to' diža' len yeļa' sina' cheton', san choe'to' diža' da' bzejni'i Spiritw che Diosen' neto', na' beñe' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' beñe' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. ¹⁵ Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw beñe' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. ¹⁶ Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba beñe' chio' Spiritw che' cont šejni'icho xbab che Criston'.

Gaccho txen len nochle beñe' cheson xšin Diosen'

3 Beñe' migw, bi goc gua' xtiža' Diosen' len le'e can' chona' len beñe' chosozenag che Spiritw che Diosen', le ne' chzenagle che xbab chezle. Da'nan' zaca'leble ca bidao'. ² Cate' gwzolao be'lena' le'e xtiža' Diosen' žinten ža na'aža, bina' šejni'ile da' ca' chaclaže' Diosen' šejni'ile. Da'nan' ba bsed blo'eda' le'e da' bi naquen zdebe šejni'ile. ³ Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdiļe chšašle, nacbia' chzenagle che xbab chezle can' cheson beñe' bi chesejnilaže' Criston'. ⁴ Chnia' chonle ca beñe' bi chesejni-laže' Diosen', le balļe žale: "Nacto' txen da' chsed chlo'e Pablo", na' yebalļe žale: "Nacto' txen da' chsed chlo'e Apolos'."

⁵ Le gon xbab chia' neda' Pablo na' che Apolosen', con nacto' beñe' güen xšin Dios. Na' Diosen' bene' cont gwejni'ilaže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaze'. ⁶ Neda' zaca'leba' ca to beñe' goz, le be'lena' le'e xtiža' Diosen' da' nechw, na' Apolosen' zaca'lebe'

ca' bene' chyilen, le bsed blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gweyile'le xtižen' da' be'lento' le'e. ⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsed blo'echde' le'e, san Diosen' zaca'chgüe' da' bene' cont gweyile'le xtižen'. ⁸ Beñe' chyixjue'ede' xtiža' Diosen' da' nechw na' beñe' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. ⁹ Neto' chzejni'ito' le'e xtiža' Diosen', guac nacho nacto' beñe' goz go'oñ che Diosen' na' le'e nacle yežlio gan' chac žinña'.

Na' le'e chdop chžagle chonxenle Criston' lecze zaca'leble ca to yo'o che Diosen'. ¹⁰ Na' guac nacho neda' naca' to beñe' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' n'a nita' beñe' yoble chosozejni'ide' le'e, na' guac nacho chesebeque' ze'en. Na' note'teze beñe' chacde' gone' xšin Diosen' cheyała' gonyañe' xbab še xšinen' gonon txen len lene yo'o dan' ba gwlecan'. ¹¹ Na' nono gac cuec bichle lene yo'o, le ba gwlecan', na' Jesucristo beñe' chejnilaže'cho, len' nacho naque' lene yo'ona'. ¹² Na' bite'teze ze'e da' chozoa beñe' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. ¹³ Na' cate' žin ža yid Criston', gone' cont gacbia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. ¹⁴ Na' še bencho da' naquen da' zaca', lenña' bi yeniten, na' Diosen' gone' cont soacho mbalaz da' benchon. ¹⁵ Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi šeycho.

¹⁶ ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? ¹⁷ Na' še no gone' cont chio' chdop chžagcho chonxencho Criston' cuejyichjcho diža' li čhen', Diosen' gwnežjue' castigw toli tocane che beñe' gon ca', le Diosen' zoe' len chio' na' naccho lo ne'e.

¹⁸ Bi siye' cuinle. Note'tezle še chaquele nacle beñe' sina' len yeła' sina' che yežlio nga, cheyała' gacbe'ele yeła' sina' chelen' bi gaclenen le'e len Diosen'. Na' cheyała' gacle ca to beñe' bibi chejni'i cont Diosen' gone' le'e yeła' sina' čhen'. ¹⁹ Beñe' bi chesejnilaže' Diosen', yeła' sina' čhegaquen' bi naquen da' zejen len Diosen'. Na' Xtiža' Diosen' nyojen žan: "Beñe' ca' chesacde' zjanaque' beñe' sina', Diosen' gone' cont yeła' sina' čhegaquen' gwžiyayin' legaque'." ²⁰ Na' yeto gan' nyojen žan: "Xancho nan' nezde' da' yesede che xbab che beñe' sina' ca'." ²¹ Da'n'an' bi cheyała' ga'laže'le da' nacle txen len note'teze beñe' chsed chlo'ede' le'e, le yogo'lo' bi da' de zjanaquen chele cont

yesaclenen le'e. ²² Neda', len Apolosen', na' len Pedron', gwseła' Diosen' neto' cont chaclento' le'e. Na' yežlio nga na' yeła' mbanna', na' yeła' goten', na' da' de n'a na' da' gata' bate'teze, yogo' da' ca' zjaden cont yesaclenen le'e. ²³ Na' nacle lo na' Criston' na' Criston' naque' lo na' Diosen'.

Da' yo'o lo na' postlw ca' yesone'

4 Cheyała' gacbe'ele neto' ba gwduxjue'eto' xtiža' Diosen' len le'e nacto' beñe' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' beñe'. ² Na' chonen byen gonto' con can' ngüe'e lo na'to' gonto'. ³ Na' ca naca' neda', bibi nonen len neda' še no justis che yežlio nga o še le'e nale bi chona' can' cheyała' gona'. Na' neca chnia' che cuina' še chona' can' cheyała' gona'. ⁴ Lo' lažda'ogua' chacda' bibi doła' napa' len bite'tez da' chona', perw gague da'n'an' na Diosen' chia' bibi xtoła' de. Xancho Jesucriston' ne' še chona' can' cheyała' gona' o še bi chonan'. ⁵ Da'n'an' bi cheyała' žialaole nale che note'teze beñe' še chone' can' cheyała' gone' o še bi chone'. Caten' yid Xancho Criston' yeto, canan' gone' cont nezecho da' nono neze n'a, na' gone' cont gacbe'echo can' nac xbab da' yo'o lo' yichjlaždao' beñačen'. Na' cana' na Diosen' še nocho chon güen.

⁶ Beñe' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyała' ga'laže'le da' nacle txen len to beñe' chsedde' le'e na' gue'ele yetoe'. ⁷ Na' žbixchen' chaquele zaca'chle ca yezica'chle beñe'? Diosen' beñe' yogo' da' de chele, na' da' beñe' Diosen' yogo' da' de chele, bi cheyała' ga'laže'le. ⁸ Chacljele bibi chyažjele na' chacljele ba nacle beñe' zaca'chgua len Diosen' na' guac nabilia'le ca no rey, na' chaquele bi chyažjele neto'. Yebet' šaca' da' li nacle ca no rey can' chaquelen' cont soato' mbalaz txen len le'e. ⁹ Chacda' Diosen' ba bene' cont beñe' že' yežlion' yesele'ede' neto' postlw ca beñe' zjanac la'zelagüe beñe' bibi zaca', ca beñe' nchoglaon čhegaque' yesate'. Na' beñačen' len angl ben' že' gan' zoa Diosen' cheseñe' can' chac čheto' ca to beñe' chne'e to da' yežejde'. ¹⁰ Na' da' chonto' xšin Criston' da'n'an' beñe' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle beñe' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen beñe' le'e na' cheseque'ede' neto'. ¹¹ Ža n'aža zan ni'a chdeto' gwbin chbił chdonto', bibi xalana'to' de, chesebaže' beñe' neto' na' bibi ližto' de. ¹² Len ni'a na'to' chonto' žin cont chacbanto'. Cate' chesezi'diža' beñe' neto', con chnabto' nite' mbalaz, na' cate' chosoči chososaque' neto', chy chchejto' bi da' chesonde' neto'. ¹³ Cate' cheseñe' čheto', choł güižto' legaque' diža' šagüe'. Na' ža n'aža nita' beñe' zan chesonde' neto' ca to no beb dao' o to no da' naquen zban da' ba becho'nen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e.

¹⁵ Na' la'czla' beñe' zan yesaclaže' yososed yosolo'ede'

le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwzialagua' gwduxjue'eda' le'e diža' güen che Jesucriston' cont chejnilaže'lene'. ¹⁶ Na' da'nana' chneyoeda' le'e gonle can' chonan'.

¹⁷ Da'nana' chseja' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyała' gone'. Na' chseja'ne' cont šjaysede' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' beņe' gate'teze chesedop chesežague' chesonxene' Criston'. ¹⁸ Na' baļle cha'laže'le chaquele bich yida' gan' zoalen'. ¹⁹ Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a beņe' ya'laže' ca' še yesone' can' chesenen'. ²⁰ Cate' Diosen' chnabi'e yichjlaždao' beņe', dan' chesonen' chlo'en yela' guac chen', gague xtiža'gaque' na'zen' gwlo'en še chnabi'e yichjlažda'ogaque'. ²¹ ¿Nac chaclaže'le gona? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

To beņe' gwzoalene' xna'zie' ca xo'ole'

5 Chesene' to le'e zoalenle xna'zile ca xo'olle. Da' nga naquen to yela' zto' xen, ne beņe' ca' bi chesonxen Diosen' bi chžinlaže' yesone' ca'. ² Na' la'czla' tole chonle da' malen' nac ca', chaquele güenchgua chonle lao Diosen'. Cheyała' yegüine'le na' cheyała' yebejle ben' chon ca' len le'e. ³ La'czla' bi zoa' na' len le'e, zoaczcho txen na' ba gwchoglagua' can' cheyała' gonle len ben' chon da' malen', can' gonle la'czla' ca zoa' len le'e. ⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesúsena' chaclene' le'e len yela' guac chen'. ⁵ Nach le cuej ben' ca'ale na' le gone' lo na' Satanás dan' chnabi'a' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'le toļi tocaņe cate' žin ža yid Xancho Jesúsena' yeto.

⁶ Bi cheyała' gaguele chonchguale güen lao Diosen'. ¿Bi chacbe'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin"? ⁷ Beņe' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'aņ ne late'ze levaduran' lo ližgaque' lo lnin'. Na' ca'cze chio' chejnilaže'cho Criston' bi cheyała' güe'cho latje šo' da' malen' yichjlažda'ochon'. Cheyała' cuejyichjcho yogo' da' malen' cont gaccho ca to beņe' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot beņe' Israel gualaž cheton' lo lni pascon'. ⁸ Da'nana' cheyała' cuejyichjcho bite'teze da' mal, cont gaccho ca to beņe' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyała' soacho binlo len beņe' chosozoa xtoe' na' beņe' cheson bichle da'

nac da' yela' zto' len cuerp chegaque'. ¹⁰ Gwnia' bi gac soacho binlo len beņe' cheson da' nac yela' zto', na' beņe' chesezelaže' bi da' de che beņe', na' beņe' cheseque'e da' de che beņe' na' beņe' chesonxene' l gua'a lsaca'. Na' can' gwnia' bi gac soacho binlo len le-gaque', cho'a diža' che ljež chio' chejnilaže'cho Criston'. Le šaca' cho'a diža' bi gac soacho binlo len note'tez beņe' cheson ca', bich gac bi goncho lo yežlio nga še ca'. ¹¹ San da' žia' cheyała' goncho, bi soacho binlo len to beņe' lježcho beņe' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che beņe', o chejnilaže' l gua'a lsaca', o chzi'diže' beņe', o naque' beņe' borrašw o beņe' gwban. Neča cheyała' gagwlencho beņe' lježcho beņe' cheson ca'. ¹² Bi naquen checho chogbi'acho che beņe' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyała' chogbi'acho che lježcho še chesonteze' da' mal. ¹³ Na' Diosen' chogbi'e che xtoļa' beņe' ca' bi chesejnilaže' Criston', san le'e, le yebej be-na' gwnia' chon da' malen' ladjwle.

Beņe' Corinto chesejnilaže' Criston' chesagüe' xya che lježgaque' lao justis ca'

6 Chebanda' chele can' chonle da' chagwle xya tole yetole na' chjana'le beņe' bi chosozenag che Diosen' cont chesone' yela' justis chele. Cheyała' nabe lježle le'e ba gwlej Diosen' nacle lo ne'e cont legaque' yesone' yela' justis chele. ² ¿Bi nezele žin ža cate' chio' naccho lo na' Diosen' goncho yela' justis che yezi-ca'chle beņe' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. ³ Na' lecze žin ža goncho yela' justis che angl ca'. Na' naquechxe goncho yela' justis che bi da' cheson beņe' lo yežlio nga. ⁴ Na' cate' gagwle xya che lježle, bi šejle lao beņe' bi chesejnilaže' Criston' cont yesone' yela' justis chele, le xbab chegaquen' bi naquen da' zaca'chgua len chio' chejnilaže'cho Criston'. ⁵ Žia' ca' cont yeto'ele che dan' chonle na' bich gonle ca'. ¿Ne tole bi nacle beņe' sina' cont gon yela' justis che lježle cate' bi chac chele? ⁶ ¿Da'nana' chjatagwle xya che lježle len justis ca' beņe' bi chesejnilaže' Criston'?

⁷ Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone beņe' lježlen' le'e. Jejni'a güe'le latje yeseque'e bi da' de chele. ⁸ Perw le'e chca'ale bi da' de che lježle na' da' zan da' chone lježle.

⁹ ¿Bi nezele beņe' ca' zjanaque' beņe' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' beņe' chosozoa xtoe' na' beņe' cheson bichle da' yela' zto' da' nac ca'. Na' nita' beņe' chesonxen l gua'a lsaca'. Na' nita' beņe' chesata'lene' no'ole bi nac no'ol chegaque' o beņe' byo bi nac beņe' chegaque', na' nita' beņe' byo bxej. ¹⁰ Nita' beņe' chesebane' na' beņe' chesezelaže' bi da' de che beņe', na' beņe' borrašw, na' beņe' chesezi'diža' lježgaque' na' beņe' cheseziye'e beņe' yoble cont yeseque'e da' de chegaque'. Na' ne to beņe' chon da'

mal dan' zjanac ca' bi yesyežine' yaba gan' zoa Diosen' chnabi'e. ¹¹ Balje benje da' mal dan' zjanac ca', perw na'a da' chejnilaže'le Xancho Jesúsen', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle beže' güen len je'.

Cheyała' goncho da' güen len cuerp chechon'

¹² Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czła' še de latje goncho bite'teze, bi cheyała' güe'cho latje nabia' bi dan' gonchon' chio'. ¹³ Na' da' li can' chesena yebałe', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp chechon'. ¹⁴ Diosen' bosbane' Xancho Jesucriston' ladjo beže' guat ca', na' lecze žin ža cate' yosbane' chio' ladjo beže' guat ca' len yela' guac chen'.

¹⁵ ¿Bi nezele naccho txen len Criston' na' cuerp chechon' zjanaquen che? Na' bi cheyała' goncho cuerp chechon' da' nac che Criston' lo na' no no'ole zle'.

¹⁶ Note'tezle še chata'le len no'ole bi nac no'ol chele o beže' byo bi nac beže' chele, cuerp chelen' gaquen toze len cuerp chen', can' ža Xtiža' Diosen' da' nyojen žan: "Beže' ca' chope yesaque' toze cuerp." ¹⁷ Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

¹⁸ Da'n'an' bi cheyała' gata'lencho no'ole bi nac no'ol checho o beže' byo bi nac beže' checho o goncho bichle yela' zto' da' nac ca'. Yezica'chle da' mal ca' bitec chosožiyain' cuerp chechon', perw da' ca' zjanac ca' chosožiyain' cuerp chechon'. ¹⁹ ¿Bi chacbe'ele Spiritw che Diosen' zoan lo' yichjlaždao' to tocho ca zoa to beže' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. ²⁰ Na' da' zaca' xen da' ben Xancho Criston' cont bechojcho lo na' gwxiyen'. Da'n'an' cheyała' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

Pablon' cho'e diža' che yela' güešagna'

7 Na' che dan' chnabele neda' le'e cart chelen', še beže' byon' bi chaclaže' si'e no'olen' gague' xo'ole', güenña' chone'. ² Perw na' že'chgua beže' chesadlene' no'ole bi nac no'ol chegaque', na' beže' cheson bichle da' nac da' yela' zto' len cuerp chegaquen', na' da'n'an' yejni'a gwšagna'le na' to to beže' byo soa xo'ole' na' to to no'ole soa beže' che'. ³ Na' to to beže' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len beže' che'. ⁴ No'olen' bi gac ne' to gualaze' nac gone' len

cuerp chen' na' neca beže' byon' bi gac ne' to gualaze' nac gone' len cuerp chen', san cheyała' yosozenag che lježe'. ⁵ Na' le'e nšagna'le bi gwžonje gonjen lježe' da' cheyała' gonje len cuerp chelen', perw še naquen yela' güexi'a che choptele guacze bi gonjen to term dao' cont soatezle yo' güiže' Diosen'. Na' te termen' yezoalen lježe' da' yoble, le Satanás dan' chnabia' da' xigüe' ca' co'oyelan' le'e gonje da' mal še leca žan soalen lježe'.

⁶ Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. ⁷ Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

⁸ Na' le'e nac to gualazle, chacda' güench bi gwšagna'le, na' lecze le'e ba got beže' chele bi yošagna'le, san soale to gualazle can' zoa' neda'. ⁹ Perw še leca žan soalenje no'ole o soalenje beže' byo, yejni'a gwšagna'le cont bi nabia' yela' chzelažen' le'e.

¹⁰ Na' le'e no'ole le'e nšagna'le, chona' mandadw bi yela'ale len beže' chelen'. Na' gague nedaže žia' ca', le naquen da' chon Xancho Criston' mandadw. ¹¹ Na' še no'olen' yele'e len beže' che', cheyała' soa to gualaze' bi yeque'e beže' yoble o cheyała' yeyeje' šjazyoalene' beže' che' da' yoble. Na' lecze le'e beže' byo le'e nšagna'le, bi yela'ale len xo'ollen'.

¹² Na' le'e beže' yezica'chle, nja' can' chona' xbab cheyała' gonje, la'czła' Xancho' bibi gwne' che da' ca'. To to le'e beže' byo še ba nšagna'lenje no'ole bi chejnilaže' Criston' na' chaclaže' soalencze' le', bi cheyała' yela'ale len je'. ¹³ Na' to to le'e no'ole še ba nšagna'lenje beže' bi chejnilaže' Criston' na' chaclaže' soalene' le', bi yela'ale len je'. ¹⁴ Bi naquen mal lao Diosen' soalenje beže' chele o no'ol chele beže' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'igle ca' zjanacbe' ca' xi'ig beže' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole. ¹⁵ Perw še beže' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binjo len lježcho. ¹⁶ Na' le'e no'ole še gonje güen len beže' chele na' le'e beže' byo še gonje güen len no'ol chelen', guacte gonen cont yesejnilaže' Criston'.

¹⁷ To tocho cheyała' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. ¹⁸ Še ba zoale señw dan' že' circuncisión cate' gwlej Diosen' le'e nacle xi'ine', bi gonje cont yenit señoñ'. Na' še bina' soale señoñ' cate' gwlej Diosen' le'e nacle xi'ine', bi nable yosozoe' le'e señoñ'. ¹⁹ Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'. ²⁰ Con can' naccho caten' gwlej Diosen' chio' naccho xi'ine', ca'tezeczen' cheyała' soa cuzcho. ²¹ Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont

chojle lo na' xanlen', le chixjon na' yechojle. ²² Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague beñachen'. Na' chio' biña' gaccho esclavo che bene', nac Criston' Xancho, na' guac nacho naccho esclavo che'. ²³ Da' zaca' xen da' ben Xancho Criston' cont bechojcho lo na' gwxiyen'. Da'nan' bi cheyała' goncho xbab no beñach naque' xancho. ²⁴ Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuescho, le lao Diosen' chzoa chbezcho.

²⁵ Na' can' cheyała' gac che no'ol güego' ca', Xancho Criston' bi bene' mandadw can' gac chegacbe', perw neda' ñia' can' chacda' cheyała' gac, na' ba beyaše' beži'ilaže' Xancho' neda', na' da'nan' diža' da' choa' zaca'czen gwzenagle chen. ²⁶ Ba za' da' saca'zi'cho na'a, na' da'nan' chacda' güench soa cuescho con can' ba zoacho. ²⁷ Le'e nšagna'le, bi yela'ale len xo'olle, na' le'e biña' soa xo'olle, bi chiljw xo'olle. ²⁸ Perw bi nacho naquen mal še gwšagna'le, na' neca naquen mal še no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

²⁹ Bene' migw, chaclaža' ñia' le'e da' nga: Bich chega'ñ yezan iz cont goncho dan' ngüia Diosen' goncho. Da'nan' le'e zoa xo'olle cheyała' soale gonle xšin Diosen' ca' bene' nono xo'ole' zoa. ³⁰ Na' še de da' yegüine'le, cheyała' soale gonle xšin Diosen' ca' bene' bi chegüine'. Na' še zoale mbalaz, cheyała' soale gonle xšine' ca' bene' bi zoa mbalaz. Na' še si'le bi da' si'le, cheyała' soale gonle xšin Diosen' ca' bene' bibi gwxi'e. ³¹ Na' še bi da' chčinle da' de yežlio nga, bi cheyała' cue' yichjle che len, le da' te che yogo' da' chle'echo yežlio nga.

³² Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xancho' gone'. ³³ Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. ³⁴ Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

³⁵ Ba gwnia' ca' gague cont gwžona' gwšagna'le san cont gaclena' le'e. Con chaclaža' gaguele Xancho Diosen' do yichj do laže'le sin cbi gwžonen gonle can' chazlaže'.

³⁶ Na' še to bene' chacde' cheyała' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chñabe' le'. ³⁷ Perw še zoa to bene' chacde' güench nono si' xi'ine' no'olen' na' bi nacho chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'. ³⁸ Can' naquen, bene' chnežjue' bi'

chen' chšagna'be' chone' güen, na' bene' bi chnežjue'be' chone' güench.

³⁹ Na' note'teze no'ole nšagna', cheyała' soe' len bene' che'. Perw še ba got bene' che', guac yeque'e bene' yoble, con še bene' chejnilaže' Xancho Criston'. ⁴⁰ Perw chacda' neda' soache' mbalaz še yega'ñe' to gualaze', na' chacda' xbab chian' naquen toze len xbab che Spiritw che Diosen'.

Yela' guagw da' chosožia bene' lao l' gua'a lsaca' chesejnilaže'

8 Na' gwñable nac cheyała' goncho len yela' guagw da' chosožie' lao l' gua'a lsacan' chesejnilaže'. Da' li yogo'cho chejni'icho bibi zjazaca' l' gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyiljwlaže'cho nacle goncho cont gaclen lježcho. ² Na' še chaquecho ba gwejni'icho to da' zejen, cheyała' gacbe'echo bibi de da' chejni'icho ca' cheyała' šejni'ichon. ³ Perw cate' chaquecho Diosen', nachle Diosen' nombi'e chio'.

⁴ Gwñable še guac gagwcho yela' guagw da' chosožia bene' lao l' gua'a lsacan' chesejnilaže'. Nezecho l' gua'a lsaca' ca' bibi zjazacan', na' toz Diosen' zaque' šejnilaže'chone'. ⁵ Da' li de da' zan da' chesena beñachen zjanaquen xangaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xangaque', ⁶ chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxen'chone'. Na' nezecho toze Jesucriston' naque' Xancho, na' le' bene' yogo' beñach, beyixe' na' bichle da' zjade, na' le' chone' yela' mban checho.

⁷ Gague yogo' bene' lježcho bene' chesejnilaže' Criston' chesejni'ide' da' nga nezecho. Bal'e zjyolagüe' chesone' xbab bene' zaca' l' gua'a lsaca' ca', na' cate' chesagüe' yela' guagw da' ba bžia bene' lao l' gua'a lsacan', chesacde' chesagüe' da' naquen che l' gua'a lsacan'. Da'nan' lo' yichjlažda'ogaque' chesacde' malen' chesone', le biña' yesejni'išagüe'de' naquen' naquen. ⁸ Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. ⁹ Perw bal' bene' biña' yesejni'išagüe'de' gague bi nonen len Diosen' še bin' ye'ej gagwcho. Na' neče legaque' cheyała' gwsaca'cho can' goncho cont bi goncho ca' yeselažoe' lo da' malen' neče dan' che'ej chagwchon'. ¹⁰ Le'e nezele nono nac l' gua'a lsaca' ca', na' da'nan' guac cue'le ye'ej gagwle ga chesone' l'ni' che l' gua'a lsacan' sin cbi bi doła' gaple. Na' bene' biña' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. ¹¹ Na' guacte gwžiai'cho bene' lježcho yela' chejni'i' checho, la'czla' Criston' bnežjw cuine' gote' neče le'. ¹² Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. ¹³ Da'nan' chnia' še dan' chagua' bela' chonen cont bene' lježa' lažoe' lo da' mal, gwbat'ech gagua'ba' cont ca' lažoe' lo da' malen'.

Pablon' že' naque' dogualje postlw

9 Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsen' na' bena' xšine' gan' zoale na' da'nan' chejnilaže'lene'. ² Na' la'czla' še yezica'chle beñe' bi chesejle'e naca' postlw, perw le'e chejle'le chia', le da' chejnilaže'le Xanchon' ben' gwseja' neda', chlo'en da' li naca' postlw.

³ Quinga choži'a xtiža' beñe' ca' chesene' bi gwseja' Diosen' neda' naca' postlw: ⁴ Guac naba' yeson beñe' da' ye'ej gagua' šaca' chaclaža' gona' ca'. ⁵ Na' guac gwšagna'lena' no'ole chejnilaže' Criston', na' ye'chi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson beñe' biše' Xanchon'. ⁶ ¿Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldadw zoa beñe' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono beñe' chyoe šib xila' ca' nacho bi che'eje' late' xiže'ba' cate' chsien'.

⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésen'. ⁹ Quinga bzoje' le'e ley: "Bi gwseyjwle cho'a go'ñ ca' šlac chosolej chosošošjba' trigon' cont choj xen." Na' gague da' chi' yichj Diosen' che go'ñ ca' bene' cont byojen žan ca'.

¹⁰ San že' ca' chzejni'icзде' chio' che beñe' ca' cheson xšin Diosen'. Da'nana' že' beñe' chgua'añe' go'ñ na' beñe' chonšagüe' trigw cheyała' yesenite' lez yesezi'e late' güeje cosešen'. ¹¹ Na' ca neto' ba bzejni'ito' le'e xtiža' Diosen', le gon xbab žnaquen da' zcha'och ca da' cheyała' gonle šaca' gonle da' ye'ej gagwto' na' bichle da' chyažjeto'? ¹² Naquen da' cheyała'cze gonle dan' chole'le da' cheseyažje yezica'chle beñe' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clal ca' legaque'.

Perw bi gwñabto' gonle neto' da' chyažj chchineto'. Chyo chchejlaže'to' bite'teže da' chac cheto' cont bibi gwžon šanch le'e gwzenagle diža' güen che Criston'.

¹³ Nezele beñe' cheson mandadw lo' yodao' che neto' beñe' Israel chesacbane' len da' chosonežjw beñe' Israel gualaž cheton' che yodaon', chosyocua'añe' late' güeje beyixe' ca' chesote' lao Diosen' chesagüe'ba'.

¹⁴ Na' ca'czen' non Xancho Criston' mandadw, beñe' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen chen'. ¹⁵ Perw neda' bi gwñaba' gonle da' chyažj chchinda', na' gague chojoja' da' nga cont gonle ca'. Yejni'acle gata' clal ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'.

Nyaše'chguaze naca' neda' še bi chixjue'edan'. ¹⁷ Šaca' chona' to da' ža xbab chia' chyixjue'edan', guac nia' za' ca'czen sia' bi da' gonle neda' ca' laxjua'. Perw chona'

da' gwlo'o Diosen' lo' na' gona', na' gague chona' to da' ža xbab chezan'. ¹⁸ Na' še nable bi chcu'añen len neda' da' chyixjue'eda' xtiža' Diosen', nach nia' chcu'añen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

¹⁹ Bi naca' xmos beñe', perw chzexjw yichja' chon cuina' ca' xmos yogo'te beñe' cont šanch beñe' yesejni-laže' Criston'. ²⁰ Cate' zoa' len beñe' Israel gualaž cheton', chona' can' cheson legaque' na' chona' ca' nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nežda' bi chonen byen ga'oguan' cont soa' binlo len Diosen'.

²¹ Na' cate' zoa' len beñe' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag beñe' ca' bi zjanombia' leyna' cate' chole'lena' legaque' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'. ²² Na' cate' zoa' len beñe' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nežda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lo' beñe' cont gaclena' legaque' na' ba'le' yesejni-laže' Criston'. ²³ Chi' yichja' yosozenague' diža' güen che Criston' cont soa' mbalaz t xen len yezica'chle beñe' chosozenague' xtiža' Criston'.

²⁴ Nezecho cate' chosoxonj zan beñe' cont choj to beñe' gon gan, yogüe' chesa'acses', la'czla' tozen' gon gan na' si'e premio. Na' ca chesa'acses beñe' ca' do yichj do laže', ca' to to chio' cheyała' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. ²⁵ Beñe' güitj ca' chosochejlaže' bi chesone' con can' ža cuerp chegaquen' cont chesaque' beñe' gual, le chesaclaže' yesone' gan cate' yesejitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. ²⁶ Da'nana' bi gona' ca' to beñe' chxonj, to beñe' bi nežde' ga' cheyała' yežine', o ca' to beñe' chdi'le' len ponet, beñe' bi nežde' ga' cuaže'. ²⁷ Bi chzenaga' che da' mal cate' žan gona' da' mal len cuerp chian', san chona' con ga' zelao choeda' cont chona' can' chazlaže' Diosen'. Le nežda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len beñe' yoble.

Cheyała' na'yañe'cho cont bi goncho da' malen'

10 Beñe' migw, chaclaža' nezele Diosen' gwzoe' len yogo'lo' da' xozxtao' neto' beñe' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosedie' nisdao' da' nzi' Nisdao' Xna. ² Na' yogüe' gosaque' t xen len da' Moisésen' cate' gwche'e legaque' gan' gwžialao bejon' laogaque' na' cate' gosedie' nisdao'. ³ Na' yogüe' gosagüe' toze yela' guagw da' bnežjw Diosen' legaque'. ⁴ Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo' yej, na' guac nacho Criston' goque' yej gan' bchoj nisen', le Criston' gweylene' legaque'. ⁵ Na'

la'czla' Diosen' goclene' yogüe', zane' bi gosone' cont yebe Diosen' legaque', na' da'nan' gosebiaye'e latje dašen'.

⁶ Na' yogo' da' goc čhegaque' chzejni'in chio' bi cheyała' selaže'cho goncho bi da' mal can' goson legaque'. ⁷ Da'nan' chnia' le'e, bi šejnilaže'cho l' gua'a lsaca' can' goson bał da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' l'ni." ⁸ Na' lecze bi cheyała' gata'lencho no'ole bi nac no'ol čhecho o beņe' byo bi nac beņe' čhecho. Can' goson zan da' xozxta'oto' cani', na' da'nan' šone'choa mile' gosate' yela' güen da' xinj čhegaquen' lao toze ža. ⁹ Bi cheyała' goncho Xancho Criston' prueba še gone' can' ba gwnen'. Cani' bał da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' beł znia gosotba' legaque'. ¹⁰ Na' lecze bi cheyała' bixwcho len Diosen' can' goson bał da' xozxta'oto' ca' cani', na' Diosen' gwsele' to angl čhe beņe' betue' legaque'.

¹¹ Yogo' da' ca' gosac čhegaque' zjanyojen le'e Xtiža' Diosen' cont chosozejni'in chio' nac cheyała' goncho zoacho na'a, le ba zoa yeyož yežlion'. ¹² Da'nan' note'tezcho še chaquecho ba zoachachcho chejni-laže'cho Jesucriston', cheyała' na'yaņe'cho naquen' goncho cont bi lažo'cho lo da' malen'. ¹³ Bite'teze da' mal da' žan goncho o da' chac čhecho, bi nacho zdebechle chac čhecho can' chac čhe note'teze beņe'. Diosen' zoacze' chaclene' chio' can' žen', bi cho'e latje gac čhecho da' bi soecho. Na' chzejni'ide' chio' nac goncho cont soecho bi goncho da' malen'.

¹⁴ Da'nan' beņe' migw ben' chacda', le cuejyichj yogo' bi da' cheson beņe' chesejnilaže' l' gua'a lsaca' ca'. ¹⁵ Ba chejni'ile na' guac gonle xbab čhe da' quinga chzejni'ida' le'e cont šejni'ile choa' diža' da' zaca'. ¹⁶ Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxcen čhe Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xčhene' cate' gosote'ne'. Na' dan' chagwcho late' güeje, zejen naccho txen len cuerp čhe Criston'. ¹⁷ Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

¹⁸ Le gon xbab can' cheson beņe' Israel gualaž čheto' ca', chesote' beyixe' cate' chesonxene' Diosen', na' note'tez beņe' chesagüe' xpela' ben' chesoten' zjanaque' txen chesonxene' le'. ¹⁹ Bi chaclaža' gonle xbab žia' l' gua'a lsaca' ca' zjanaquen da' zaca' o yela' guagw da' chjasežia beņe' laogaquen naquen nža'le len bite'teze yela' guagw. ²⁰ Gague can', le cate' beņe' chosožie' bi da' chosožie' lao l' gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. ²¹ Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. ²² Ža'a Diosen' chio' še goncho ca'.

Na' bi naccho beņe' gual ca Diosen' cont soecho bi da' gone' gac čhecho.

Bi goncho da' chaque beņe' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. ²⁴ Ne tocho bi cheyała' goncho da' naquen güen len chio'ze, san goncho xbab še naquen güen len beņe' lježcho.

²⁵ Bite'teze bela' chesote' lagüe' ya'a le gagon' na' bi nable še bosožien' lao l' gua'a lsacan' chesejnilaže', cont bi gacžejlaže'le še naple doła' gagwlen. ²⁶ Le Xtiža' Diosen' nyojen žan: "Čhe Xancho Dios yežlio nga, beņač, beyixe' na' yogo'te da' zjade lo yežlion'."

²⁷ Na' cate' beņe' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosožien' lao l' gua'a lsacan', le Diosen' bi che'nde' gacžejlaže'cho še napcho doła' che'ej chagwchon. ²⁸ Perw še no ye' chio': "Da' nga bosožie' lao l' gua'a lsacan'", bi gagwchon cont beņe' gwna ca' bi gacde' lenczcho chejnilaže'cho l' gua'a lsacan', o gacde' napcho doła' chagwchon. ²⁹ Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable čbixčen' cheyała' cuejyichjcho bich goncho bi da' choncho še beņe' lježcho chesacde' napcho doła' chonchon? ³⁰ Na' chonle xbab čbixčen' ža beņe' lježcho choncho da' mal chagwcho to yela' guagw še choe'cho yela' choxcen čhe Diosen' neče len? ³¹ Quinga naquen, cate' che'ej chagwcho o bite'teze da' choncho, cheyała' gonchon cont gacxen Diosen'. ³² Na' bi cheyała' goncho bite'teze da' choncho še gonen cont beņe' yoble yeselažoe' lo da' mal, la'czla' še zjanaque' beņe' Israel gualaž čheto', o še beņe' bi zjanaque' beņe' Israel, o še ljež chio' chdop chžagcho chonxencho Diosen'. ³³ Can' chona' neda', bite'teze da' chona' cheyljwlaža' nacle gona' cont to to beņe' soe' mba. Na' bi cheyljwlaža' nacle gona' da' gaclen cuina' san da' gaclen beņe' zan cont gata' yela' mban čhegaque' toli tocaņe.

11 Neda' chona' con can' ben Criston', na' chneyoe'da' le'e gonle can' chonan'.

Can' cheyała' yeson no'ol ca' cate' chdop chžagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. ³ Na' chaclaža' šejni'ile da' nga. Yogo' beņe' byo cheyała' yosozenague' čhe Criston', le Criston' naque' blaoch ca legaque', na' yogo' no'ole cheyała' yosozenague' čhe beņe' čhe', le beņe' čhen' naque' blaoch ca no'olen'. Ca'cze chon Criston', chzenague' čhe Xe' Diosen', le lecze naque' blaoch ca le'. ⁴ Note'teze beņe' byo še nzoa xłape' cate' choł güiže' Diosen' šlac ndop nžagle txen o cate' chyixjue'ede' bi da' ža Diosen', naquen da'

yela' zto', le zejen bi nac Criston' bene' blao len le'.
⁵ Na' note'teze no'ole še choj güiže' Diosen' o chy-ixjue'ede' xtiža' Diosen' sin cbi gwcuāše' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. ⁶ Na' še no'olen' bi chaclaže' gwcuāše' yichje' can' ba gwnian', yejni'a gwšib doxen yichjen'.

Da'nan' še chaquele zto' gwšiblen, nach gwcuāše'czlen can' cheson yezica'chle no'ol ca'. ⁷ Na' le'e bene' byo, bi cheyała' gwcuāše' yichjlen' cate' yol güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'. ⁸ Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. ⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. ¹⁰ Da'nan' no'ol ca' cheyała' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. ¹¹ Perw naccho txen len Xancho Jesu-criston' la'czla' še naccho bene' byo o še no'ole, na' bi cheyała' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. ¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' beñač len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole choj güiže' Dios sin cbi chcuāše' yichje', le can' nac costumbr chechon'. ¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. ¹⁵ Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuāšen' yichjen'. ¹⁶ Še nole chaquele gwšašle che da' nga ba gwnia', cheyała' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. ¹⁸ To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. ¹⁹ Na' ca'ljan' cheyała'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. ²⁰ Na' cate' chežagle chagwle txen, bi chonle xbab bnežjw cuin Xancho Jesu-criston' neče xtoła'chon', la'czla' chdop chžagle cont šjayze'elen. ²¹ To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwxattele na' chzože'le. ²² Yejni'a yega'añ ližle ye'ej gagwle clel ca gagwle lao bene' yaše' bene' bi de čhegaque'. Da' chonle ca', nacbia' chgue'e lježle bene' cheyała'

yesaque' txen len le'e da' chonxenle Diosen', na' chonle cont chesaque' tole da' bi de čhegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neče xtoła'chon'

(Mt. 26:26-29; Mr. 14:22-25; Lc. 22:14-20)

²³ Xancho Jesúsen' bzejni'ide' neda' can' šjayze'echo da' bnežjw cuine' neče xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsen' bexae' to yetextil. ²⁴ Na' be'e yela' choxcen che Diosen' na' beyož be'e yela' choxcen che' na' bzoxjen', na' gwne': "Le gagw yetextil nga. Lenña' naquen cuerp čhia' da' chnežjua' neče xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." ²⁵ Na' lecze ca' bene' cate' beyož gosagüe' xše', bexae' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xčhenan' cont gac can' gwne' gonen'. Na' bate'teze ye'ejle ca da' nga choña' che'ejle na'a, le šjayze' bi zejen len le'e dan' gwnežjw cuina' yesote' neda'."

²⁶ Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neče xtoła' beñačen'. Na' can' gonchczcho šlac biña' yide' da' yoble.

Naquen' goncho cate' chjayze'echo yela' got che Xancho Jesúsen'

²⁷ Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsen' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xčhene' da' blalje' neče xtoła'chon'. ²⁸ Da'nan' cheyała' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsen'. ²⁹ Le še ye'ej gagwcho sin cbi gonxencho Xancho Jesúsen' da' bnežjw cuine' gote' neče xtoła'chon', Diosen' gone' chio' castigw. ³⁰ Na' zanle bi zoale güen na' chacšenele na' bal bene' ba gosate' da' bi gose'ej gosagüen' do laže'. ³¹ Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. ³² Na' cate' napcho doła' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocañe can' yesezi' bene' bi chesejnilaže'ne'.

³³ Da'nan' bene' migw čhia', cate' chdop chžagle txen che'ej chagwle, le cueze lježle na' ye'ej gagwle txen.

³⁴ Na' še chbił chdonle, yejni'a yega'añ ližle ye'ej gagwle, clel ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zolena' nach nia' can' gonlen'.

Spiritw ĉhe Diosen' chaclenen to tocho cont choncho bi da' choncho

12 Na' bene' migw, chaclaža' nezele ca chon Spiritw ĉhe Diosen' chaclenen to to chio' chejni-laže'cho Jesucriston'.

² Nezele cate' bina' šejnilaže'le Criston' gwyejle'le diža' güenlaže' na' da'nana' gwyejnilaže'le ĩ gua'a ĩsaca' da' bibi biš grasyw nye'. ³ Na' da'nana' chaclaža' šejni'ile da' nga na'a. Note'teze bene' že': "Chgue'eda' Jesúsena'", bi zoa Spiritw ĉhe Diosen' len ĩe', perw bene' že': "Jesúsena' naque Xana'", že' ca' da' zoa Spiritw ĉhe Diosen' chaclenen ĩe'.

⁴ Toz Spiritw ĉhe Diosen' zoa, perw nža' nža' da' chaclenen to tocho choncho o nezecho. ⁵ Toz Xancho Jesucriston' chonxencho ĩa'czĭa' nža' nža' ca chon to tocho xšinen'. ⁶ Na' ĩa'czĭa' nža' nža' da' chon to tocho, toz Diosen' chone' cont to tocho chac choncho xšinen'.

⁷ Nacbia' zoa Spiritw ĉhe Diosen' len chio', ĩe' chonen cont to tocho chac choncho da' chaclenen yogo'cho.

⁸ Diosen' ba nsi'e xnezen' chon Spiritw ĉhen' cont baĭcho chac chzejni'icho bene' yoble xbab sina' ĉhen', na' ĩecze Spiriton' chonen cont yebaĭcho nezecho to da' nezecho na' chzejni'ichon bene'. ⁹ Na' ĩecze toz Spiritw ĉhen' chonen cont baĭcho chejnilaže'chguacho Diosen' na' chac bite'teze da' chnabechone'. Na' da' chaclen Spiriton' chio', baĭcho chac choncho cont chesyeyaque bene' chesacšene. ¹⁰ Na' ĩecze Spiritw nan' chonen cont baĭcho chac choncho yeĭa' guac, na' baĭcho chac chyixjue'echo bi da' ba gwna Diosen' chio'. Na' Spiritw ĉhe Diosen' chonen cont baĭcho chache'echo ĉhe da' chesena bene' o da' cheson bene' še zan' ĉhe Diosen' o še zan' ĉhe da' xigüe' ca', na' Spiriton' chonen cont baĭcho choe'cho gwde gwdele diža' da' bi nsedcho, na' yebaĭcho chac che'cho bene' lježcho bi zeje diža' ca'.

¹¹ Toz Spiritw ĉhe Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp ĉhechon'

¹² Cuerp ĉhechon' nsan' zan part, perw zjangoden' txen na' naquen toze. Na' ĩecze ca' chio' chejnilaže'cho Criston' naccho toze len ĩe' na' len bene' lježcho ca'.

¹³ Baĭ chio' naccho bene' Israel na' yebaĭ chio' bi naccho bene' Israel. Baĭcho naccho esclavo na' yebaĭcho bi naccho. Perw yogo'czcho gwzoacho nis par blo'echo ba ben Spiritw ĉhe Diosen' cont naccho txen len Criston', na' ĩecze toze Spiritw ĉhe Diosen' zoan ĩo' yiĉhĭaždao' yogo'cho.

¹⁴ Cuerp ĉhechon' nsan' zan part, na' nža' can' nac to to parten'. ¹⁵ Ni'acho guac nan: "Bi naca' toze len cuerpen', ĩe' bi naca' ne'en." Perw ĩa'czĭa' še nan ca', naquen toze len cuerpen'. ¹⁶ Na' nagcho guac nan: "Bi naca' toze len cuerpen', ĩe' bi naca' yejlagüen'." Perw ĩa'czĭa' še nan ca', naquen toze len cuerpen'. ¹⁷ Šaca' doxen cuerp ĉhechon' naquen yejlaecho, bi gac yenecho. Na' šaca' doxen cuerpen' naquen nagcho, bi gac ĩe'echo.

¹⁸ Perw Diosen' bžie' bia' nsa' cuerp ĉhechon' zan part da' cheson žin con can' gwyazlaže'. ¹⁹ Na' bi nya' cuerp ĉhechon' šaca' nsan' toze part. ²⁰ San cuerpen' nsan' zan part da' naquen txen cont naquen toze cuerp.

²¹ Da'nana' yejlaecho bi gac yen' na'chon': "Bi chyažj-da' le'." Na' neca gac ye' yiĉhĭchon' ni'achon': "Bi chyažj-da' le'." ²² Na' ĩa'czĭa' baĭ part cuerp ĉhechon' chaquecho bitec naquen da' gual, perw chyažjecho. ²³ Na' ĩa'czĭa' baĭ part cuerp ĉhechon' chaquecho bitec bi zacan', perw chi' yiĉhĭchon, da'nana' cheyacw xacho. Na' part ĉhe cuerp ĉhechon' da' bi chaclaže'cho le'e bene', chcuashe'chon len xacho. ²⁴ Perw part da' nsa' cuerp ĉhechon' da' naquen xdan, bi chcuashe'chon. Na' Diosen' none' cont chi' yiĉhĭcho ĉhe part ca' da' bi zjanaquen xdan. ²⁵ Na' none' cuerp ĉhechon' toz cont to to parten' chapši'i lježen lebze na' chesonen žin txen. ²⁶ Na' še guecho chac, bi zoa güen doxen cuerp ĉhechon' še ca'. Na' še to parten' chaquecho xdan o chac chonen güenchgua, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len ĩe' na' yogo'cho txen naccho cuerp ĉhen', na' guac nacho to tocho naccho ca to part güeje cuerp ĉhen'. ²⁸ Na' ca nac chio' chdop chžagcho chonx-encho Criston', da' nechw Diosen' gwleje' neto' nacto' postlw, na' da' gwchope gwleje' baĭ bene' cont chesy-ixjue'ede' da' ba gož Diosen' legaque'. Na' da' gwyone gwleje' yebaĭ bene' chososed cheselo'ede' xtižen'. Na' ĩecze gwlej Diosen' bene' cheson yeĭa' guac, na' gwleje' bene' cheson cont chesyeyaque bene' chesacšene, na' gwleje' bene' chesacšene' bene' yoble cate' bi da' chesyajžde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'.

²⁹ Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yeĭa' guac. ³⁰ Gague yogo'cho chac choncho cont chesyeyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zehen diža' ca'. ³¹ ĩe' yejĭlwlaže' gaclen Spiritw ĉhe Diosen' le'e cont gac gonĭe da' ca' zjanacch da' zaca'.

Na' de yeto da' zaca'ch naquen' cheyaĭa' soa cuezcho.

Cheyaĭa' gague lježcho

13 ĩa'czĭa' še chaccho gwde gwdele diža' da' chesac beňachen' na' da' chesac angl ca', perw še bi chaque ljež beňachcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež. ² Na' ĩa'czĭa' še ba goclen Spiritw ĉhe Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež beňachcho. Na' ĩa'czĭa' še nezecho yogo'ĭoĭ da' nono na' neze, na' ĩa'czĭa' še chejni'icho yogo'ĭoĭ da' naquen da' zaque', bibi zaca'cho še bi chaque ljež beňachcho. Na' ĩa'czĭa' še ĩeca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. ³ Na' še gwnežjwcho bene' yaše' yo-

go' bi da' de checho na' gwnežjw cuincho yosozey beņe' chio', bi gaclenen chio' lao Diosen' še bi chaque lježcho.

⁴ Še chaque lježcho, chapcho yeļa' chxenlaže' len legaue', na' choncho güen len legaue', bi chgue'echo legaue' še chac güen chegaue', na' bi chonxen cuincho len xtiža'cho, na' bi cha'laže'cho. ⁵ Na' cate' chaque lježcho bi choncho nacteze len legaue', bi choncho xbab che cuinzcho, bi chbixjwcho, na' bi chgo'olaže'cho. ⁶ Na' cate' chaque lježcho bi chbecho še chon beņe' lježcho da' mal, san chbecho še chone' da' zej to li. ⁷ Na' cate' chaque lježcho, chapcho yeļa' chxenlaže' bite'teze da' chesonde' chio', na' choncho xbab güen che yogo'loj beņe', na' zoacho lez yesone' güen yogo' las, na' chy chchejlaže'cho bite'teze da' chesone beņe' chio'.

⁸ Gwbat te che da' cheyaļa' gaue ljež beņaçcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' beņe' gwde gwdele diža' da' bi zjansede', na' gwžin ža cate' bich yažje bichle da' šejni'icho. ⁹ Biņa' nezecho na'a yogo' da' za' nezecho, na' biņa' gac chixjue'echo binlo yogo'loj da' ba gož Diosen' chio'. ¹⁰ Perw gwžin ža cate' gon Diosen' cont yogo' da' de gaquen can' cheyaļa' gaquen. Cana' te che da' bi naquen ca cheyaļa' gaquen.

¹¹ Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwzejni'icho can' chesejni'i bidao'. Na' na'a ba gwcha'ocho na' ba gwlejičjcho bich choncho can' cheson bidao'. ¹² Na'a biņa' nezecho binlo da' nac che Diosen'. Zaca'lebcho ca beņe' chņe'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. ¹³ Nachen' da' quinga šone non Diosen' mandadw goncho toli tocaņe: šejnilaže'chone', soacho lez gone' ga gacch güen checho, na' gaquecho Diosen' na' ljež beņaçcho. Na' da' zejehen goncho lao da' ca' šone, gaquecho Diosen' len ljež beņaçcho.

Beņe' ca' chesoe'lene' Diosen' diža' da' bi zjansede'

14 Cheyaļa' cue' yičjle gauele Diosen' na' len ljež beņaçle, na' lecze cheyaļa' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen beņe' bi da' chesone', da' zaca'chen da' cheseyixjue'ede' bi da' ža Diosen'. Lenņa' cheyaļa' selaže'chgualē gonle. ² Baļcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho beņaçhen' diža', le notno chejni'i xtiža'chon', con naquen diža' da' choņ Spiritw che Diosen' choe'lenchone' la'czļa' bi chejni'ichon. ³ Perw beņe' chyixjue'ede' bi da' ba gwna Diosen', chaclene' beņe' yoble yesenita'chače' yesejnilaže' Diosen', na' yesenite' mbalazech, na' chesyeyacxenlaže' še bi da' chesac chegaue'. ⁴ Cate' choe'cho gwde gwdele diža' da' bi nsedcho, yičjlažda'ocho

na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. ⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenņa' zejehen clē ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' načo, bitw gaclenen beņe' lježcho yesenita'chače' yesejni-laže'ne'. ⁶ Beņe' migw, nežda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedeņa'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nežda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

⁷ Ca nac bžejo, bi mbanen perw zoa ši'in cate' chcuež beņe' len, na' lecze ca' arpan' cate' chyņ beņe' len. Na' še toz nota da' chcuež ben' len bžejoa' o toz nota da' chyņ ben' cate' chyņe' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. ⁸ Cate' zoa to beņe' chcueže' trompeta cont cheseneze soldadw ca' naquen' yesone', še bi gwcuežen' binlo, bi yesejni'ide' cheyaļa' šja'aque' lo gwdile. ⁹ Ca'cze naquen len chio', še güe'lencho Diosen' diža' da' bi chesejni'i beņe', bi gaclenen legaue', le len legaue' naquen ca che beņe' chšalj toze'. ¹⁰ Nezecho beņe' že' doxen yežlion' gwde gwdele diža' da' chesaque', na' to to beņaç chesejni'ide' dižan' goljelene'. ¹¹ Na' še chio' bi chaccho diža' da' chac yeto beņe', nezecho naque' beņe' zito' len chio' na' naccho beņe' zito' len le'. ¹² Na' dan' chi' yičjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyaļa' cue' yičjle gaclenen le'e gonle da' gaclen lježle cont yogo'le soačhačle šejnilaže'le Diosen'.

¹³ Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyaļa' načcho lecze gaclenen chio' gwzejni'icho beņe' bi zeje diža' dan' choe'lencho Diosen'. ¹⁴ Le cate' Spiriton' chonen cont choļ güiža' Diosen' len diža' da' bi nseda', con nežda' lo' yičjlažda'ogua' choe'lēna' Diosen' diža', perw bi chona' xbab čen, le bi chejni'idan'. ¹⁵ Quinga cheyaļa' goncho cate' choļ güižcho Diosen', cheyaļa' güe'lenchone' bite'teze diža' da' choņ Spiritw čen' chio' la'czļa' še bi chejni'ichon, na' lecze cheyaļa' güe'lenchone' diža' da' chejni'icho. Na' cheyaļa' goļcho bite'teze da' choņ Spiritw che Diosen' goļcho la'czļa' še bi chejni'ichon, na' lecze cheyaļa' goļcho da' chejni'icho. ¹⁶ Le še chonxencho Diosen' o choe'cho yeļa' choxcen che' len diža' da' bi chejni'i beņe' yoble, beņe' bi chesejni'i dižan' choe'chon' bi gac yesonxene' Diosen' txen len chio'. ¹⁷ La'czļa' še choe'cho yeļa' choxcen che Diosen' binlo, perw bi chaclenen beņe' yoble še bi chesejni'ide' xtiža'chon'. ¹⁸ Choa' yeļa' choxcen che Diosen' da' choe'lencha'ne' gwde gwdele diža' da' bi nseda' clē ca le'e. ¹⁹ Perw cate' ndop nžagcho

chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clal ca gua' ši mil diža' da' bi yesejni'ide'.

²⁰ Bene' migw, bi cheyała' šo'cho xbab che bidao' biña' šejni'i, san šo'cho xbab che bene' chejni'i. Perw len da' malen' cheyała' gaccho ca bidao' bi' biña' gon da' mal. ²¹ Xtiža' Diosen' nyojen žan: "Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yosozenague' chia'." Can' ža Xancho Diosen'. ²² Da'n'an' nezecho Diosen' chchine' gwde gwdele diža' da' choe'lenchone' cont bene' bi yesejni-laže'ne' yesacbe'ede' zoacze' len chio'. Na' chio' chejni-laže'chone', Spiritw che Diosen' chonen cont bene' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'. ²³ Le gon xbab nac gac še šlac ndop nžag yogo'cho t xen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bał bene' bi chesejni'i naquen' choncho chonxenchone' o bene' bi chesejni-laže'ne', le-gaque' yesene' chactontcho. ²⁴ Perw še bene' ca' bi chesejni-laže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni'i lježcho bi da' ba gož Diosen' chio', nach yesacbe'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. ²⁵ Le yesacbe'ede' Diosen' nombi'e xbab da' chesone' lo' yichjlaž-da'ogüen', nach yosozoa xibe' yesonxene' Diosen' na' yesene': "Da' licze zoa Diosen' len bene' quinga."

Cheyała' gonxencho Diosen' binlo na' bi gonchon nacteze

²⁶ Bene' migw, cate' chežagle chonxenle Diosen' quinga gonle: Bałle de to da' gołle gonxenle Diosen', na' bałle de da' gwsed gwlo'e lježle, na' bałle de da' ba gož Spiritw che Diosen' le'e, na' bałle de gwde gwdele diža' da' güe'le da' bi nsedle, na' yebałle chaclaže'le chixjue'ele bi zejen gwde gwdele dižan' ba gwna bene' lježen'. Naquen güen gonle yogo' da' ca' con še gonlen ga gaclenen lježle. ²⁷ Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonžle na' tgüeje tgüejle, na' tena' choj bene' yozejni'ide' bi zejen diža' dan' ba be'le. ²⁸ Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. ²⁹ Na' še chixjue'ele bi da' ba gwna Diosen', lecze do chopzle o šonžle chojle chixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen lebbe len Xtiža' Diosen' dan' nyoj. ³⁰ Na' še šlac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'ele ben' yeto dižan'. ³¹ Yogo'le guac chixjue'ele da' gož Diosen' le'e, perw gonlen tgüeje tgüejle cont yogo'le šejni'ichle na' gaclenen le'e. ³² Na' le'e chixjue'ele bi da' ba gwna Diosen', cheyała' chixjue'elen con baten' naquen güen chixjue'elen. ³³ Le Diosen' chaclaže' gwsa'le binlo da' chonle caten' chdop chžagle chonxenle' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'. ³⁵ Na' še bi da' chesaclaže' no'ol ca' yeseņezde', guac yeseņabde' bene' chegaque' cate' yesyežin ližgaque', le naquen da' yela' zto' še no no'ole güe'le diža' šlac ndop nžagcho.

³⁶ Le gon xbab, gague le'e gogle bene' nechw bene' gwejni-laže' xtiža' Criston', na' bi nacho nezechle ca bene' chesedop chesežag ga yoble chesonxene'ne'. ³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gacbe'ele da' quinga chzoja' le'e naquen da' non Xancho Criston' mandadw goncho. ³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. ⁴⁰ Perw binlo gonle yogo' da' chonle cate' chdop chžagle na' bi gonlen nacteze.

Beban Criston' ladjo bene' guaten'

15 Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoačhačhle chejle'len. ² Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bač gwduxjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. ⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. ⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'. ⁶ Beyoža' jayezlo'elagüe' gwdete gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czla' bałe' ba gosate'. ⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸ Bzebte bedyelo'elagüe' neda', zaca'leba' ca' bi' golje cate' biña' žin ža, le cana' bchi bsaca' bene' ca' chesedop chesežag chesonxene' Criston'. Na' da'n'an' chacda' bicze zaca' yososi'e neda' postlw. ¹⁰ Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clal ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'. ¹¹ Da'n'an' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

Yesyeban beñe' guat ca'

¹² Yogo' neto' chyixjue'eto' beban Criston' ladjo beñe' guat ca'. Da'n'an' çbixçhen' ža balle bi yesyeban beñe' guat ca'? ¹³ Šaca' naquen diža' li dan' žale bi chosban Diosen' beñe' guat ca', zejen bi beban Criston' še ca'. ¹⁴ Na' šaca' Criston' bi bebane' ladjo beñe' guat ca', bibi zaca' xtižen' da' be'lento' le'e na' bibi zejen da' chejni-laže'lene' še ca'. ¹⁵ Ba be'lento' le'e diža' güenlaže' gw-nato' Diosen' bosbane' Criston' ladjo beñe' guaten' šaca' naquen diža' li dan' žale bi chosbane' beñe' ba gosat. ¹⁶ Le šaca' bi chosbane' beñe' ba gosat, lecze bi bosbane' Criston'. ¹⁷ Šaca' naquen da' li Diosen' bi bosbane' Criston', bibi zejen da' chejni-laže'chone' na' bi nacho beque'e xtoła'chon'. ¹⁸ Šaca' naquen da' li bi bosbane' Criston', ba gosebiayi' yogo' beñe' ba gosat beñe' gosejni-laže' Criston' še ca'. ¹⁹ Na' šaca' da' zoa-cho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clel ca' che yezica'chle beñe' še ca'.

²⁰ Perw na' da' li Diosen' bosbane' Criston' ladjo beñe' guat ca', na' da'n'an' nezecho žin ža yosbane' yezi-ca'chle beñe' chesejni-laže'ne' še ba gosate'. ²¹ Gwxe yela' goten' yežlio nga da' gwzoa' to beñe' bene' da' mal, na' lecze ca'czen' goc, to beñe' bene' cont žin ža yebancho ladjo beñe' guat. ²² Le gwxe yela' goten' cate' Adanna' bene' da' malen', da'n'an' yogo' beñaçhen' chesate'. Nach Criston' bene' cont yogo' beñe' yesaque' txen len le' yesenite' toli tocanē. ²³ To tocho yebancho ladjo beñe' guaten' cont soalencho Criston' con caten' ba bsi'e nxezenña'. Criston' gwžialagüe' bebane' ladjo beñe' guat ca' na' cate' yide' da' yoble chio' chejni-laže'chone' lecze yebancho ladjo beñe' guat še ba gotcho. ²⁴ Nach te che yežlio nga. Na' Criston' gwñitlagüe' yela' chnabia' che yogo' beñe' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e. ²⁵ Diosen' bžie' bia' zoa Criston' chnabia'che' ca' yogo' beñe' ca' na' bichle da' ca', na' Diosen' gone' cont žin ža cate' gwlej gwšošje' beñe' ca' na' bichle da' ca' bi cheson txen len le'. ²⁶ Na' cate' yeyož gwlej gwšošje' yogo' bichle da' bi chon txen len le', nach gw-cueze' yela' goten'. ²⁷ Diosen' ba nsi'e nxezen' cont yogo' lo da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e nxezen' cont yezica'chle beñe' na' bica'chle da' zjade yesaquen lo na' Criston'. ²⁸ Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' beñaçh na' yogo' angl yesacbe'ede' Diosen' naque' Xangaque', na' lecze yesacbe'e da' xigüe', beyixe' na' bichle da' zjade.

²⁹ Nita' beñe' chesezoe' nis gualaz beñe' ba gosat. Na' bibi zejen da' chesone' ca' šaca' bi žin ža yesyeban beñe' guat ca'.

³⁰ Na' neto' yogo' ža nita' beñe' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban beñe' guat ca'. ³¹ Beñe' migw, choa' diža' li chnia' chbechgüeda' ba chejni-laže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. ³² Guac nacho bež znia' ba gwdiłlena' Efeso nga ga ba gosadabaga'chgua beñe' neda'. Na' bibi zejen ba bchejda' yogo' da' ba gosonde' neda' šaca' bi yesyeban beñe' guat ca'. Na' šaca' bi yesyeban beñe' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

³³ Bi güe'le latje yesonlede' le'e. Da' li can' ža to diža' da' de, žan: "Beñe' chejlen beñe' cheson da' mal lecze solao gone' can' chesone'na'." ³⁴ Le yeyon xbab šagüe' na' cuejyichjle xbab mal dan' chonlen', le balle biña' še-jni'ile che Diosen'. Chnia' ca' da' chaclaža' gaquele zto' che da' malen' chonle.

Cuorp che beñe' yesyeban ladjo beñe' guat ca'

³⁵ Balle nabljale nac gac yesyeban beñe' guat ca' o nac gac cuerp chegaquen' cate' yesyebane'. ³⁶ Nchoł yichjlažda'olen' še chaquele bi gac yesyebane' ladjo beñe' guat ca'. Nezecho to to xoa' dao' da' chazcho cheyla' yexinjen cont la' yel dao'. ³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' çhen.

³⁸ Diosen' chone' cont chla' yag dao' dan' chazchon', bi chla' yag yoble da' bi gozcho. ³⁹ Na' gague toze ca' nac cuerp che chio' beñaçh len cuerp che be žia tap ni'a na'ba'. Nža' cuerp che beñaçh na' nža' cuerp che be žia xil, na' lecze nža' cuerp che be chesaš lo' nis. ⁴⁰ Nža' cuerp che beñaçh, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che beñaçh na' che beyixe' ca' chesaš lo' yežlion'. ⁴¹ Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'. ⁴² Nach cate' yesyeban beñe' ca' ba gosat, cuerp chegaquen' bi gaquen ca' cuerp da' gosape' cate' gosebane'. Cuorp chegaque' da' bosocuaše' lo' ban' ba beyožen', perw cuerp cobe chegaquen' gague da' te çhen. ⁴³ Bibi zaca' cuerp che beñe' guat ca', zjanaquen cuerp šen, na' cheyožen', da'n'an' chcušaše'chon lo' ba. Perw beñe' gosejni-laže' Criston', cate' yesyebane' ladjo beñe' guat ca' yesyeyac cuerp chegaque' da' güen juisyw na' da' gual. ⁴⁴ Cuorp chegaquen' zjanaquen de bela' chen cate' chosocuašen' perw cate' yesyebane' ladjo beñe' guat ca' nža' ba zjanac cuerp chegaquen', le yesyeyaqen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' chen, na' lecze cheyla' nezecho žin ža cate' yeyaqen da' cobe na' gonen con can' ža Spiritw che Diosen'.

⁴⁵ Xtiža' Diosen' nyojen žan Adán beñe' goc beñe' nechw gwzoe' gwbane' cani'. Na' na'a zoa Criston' zaca'lebde' ca' Adánna', le Criston' chone' yela' mban toli

tocane. ⁴⁶ Na'a cuerp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. ⁴⁷ Diosen' bene' beņe' nechw len bište yo cont gwzoe' lo yežlio nga, perw Xancho Criston' ben' zaca'lebbe' ca beņe' nechon' ze'e yaba. ⁴⁸ Na' chio' beņaçh, cuerp chechon' naquen ca cuerp che beņe' nechon' da' ben Diosen' len bište yo, da'n'an' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' beņe' za' yaba. ⁴⁹ Na'a šlac zoacho yežlion' naccho ca beņe' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

⁵⁰ Beņe' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'n'an' bi gac šjayzoalenchon len Diosen' toli tocane. ⁵¹ Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho. ⁵² Bedao'ņez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' beņe' ba gosat beņe' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. ⁵³ Le cuerp chechon' da' mbancho yežlio nga da' te chen. Naquen da' chat, na' cheyaļa' yayaquen da' cobe da' bi gat, da' bi gožo' na' da' bi te che. ⁵⁴ Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli tocane. ⁵⁵ Bich soe yela' goten' chio' da' yoble. Gwbatech gatcho šo'cho lo' ba." ⁵⁶ De yela' got checho na'a le chio' beņaçh choncho da' mal. Da' neze chio' beņaçh can' ža ley che Diosen' cheyaļa' goncho na' bi chzenagcho gonchon, da'n'an' chnabia' da' malen' chio'. ⁵⁷ ChoχcLen Diosen' gwseje' Xancho Jesucriston' beque'e xtoļa' chio' chejnilaže'chone'. Da'n'an' bi soe yela' goten' chio', san de yela' mban toli tocane checho.

⁵⁸ Da'n'an' beņe' migw chia', chacda' le'e na' chņeyoe-da' le'e le soaçhaçh len toze xbab. Na' le gonchgua xšin Xanchon', le nezczecho cate' choncho xšinen' chejnilaže'chone', gague da' chondadzchon'.

Beņe' Corinto chosotobe' mechw cont yesaclene' beņe' Jerusalén ca'

16 Nach nia' naquen' gonle cate' gwtoble mechw da' gaclenen beņe' ca' chesejnilaže' Diosen' Jerusalénna'. Le gon can' bena' mandaw yeson beņe' ca' chesedop chesežag chesonxene' Criston' to to yež da' zjachi' distritw Galacia. ² Yogo' ža dmigw to tole cheyaļa' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedeņa'a le'e. ³ Nach cate' la'a gan' zoalen', cana' gwzoja' cart da' yesože' beņe' ca' chaclaže'le šjasesane' xmechwlen' Jerusalénna'. ⁴ Na' še chonen byen ša'a, cuina' či'a legaque' Jerusalénna'.

Pablon' chone' xbab šjaņe'e beņe' Corinto ca'

⁵ Na' yida' gan' zoale cate' yeyož yedia' Macedonia, le cheyaļa' šjayņa'a beņe' lježcho ca' nita' na'. ⁶ Na' chacda' yega'anlena' le'e do tbio' do chop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. ⁷ Bi chaclaža' yedeņa'a le'e na'a, le con teza' še ba za'a, na' chaclaža' soa' sša len le'e cate' yida' še Xancho Diosen' goņšque' latje. ⁸ Chaclaža' yega'ana' Efeso nga žinch ža gaļa' lni dan' že' Pentecostés. ⁹ Le beņe' zan že' nga beņe' chesaclaže' yosozenague' che Criston' na' lecze že' beņe' zan beņe' bi chesaclaže' chixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecze can' chonen'. ¹¹ Ne tole bi cheyaļa' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle beņe' lježcho ca'.

¹² Na' ca nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle beņe' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

Yeto chope diža' da' chole'len Pablon' beņe' Corinto ca'

¹³ Le soa le na' can' chonlen', na' le soa len toze xbab šejnilaže'le Criston'. Bi žeble, san le soaçhaçh gonle can' chazlaže' Diosen'. ¹⁴ Na' le gague lježle bite'teze da' chonle.

¹⁵ Beņe' migw chia', nezele beņe' ca' že' liž Estéfanas gosaque' beņe' nechw gosejnilaže' Criston' distritw Acayan' na' ba gosaclenchgüe' yezica'chle beņe' lježcho beņe' chesejnilaže'ne'. ¹⁶ Da'n'an' chņeyoeda' le gwzenag chegaque' na' gonle can' chesenen', na' le gwzenag che nochle beņe' cheson xšin Diosen' na' chesaclene' beņe' lježcho ca' can' chesone'na'.

¹⁷ Chebeda' ba besela' Estéfanas, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. ¹⁸ Ba gosone' cont beyaclaža' can' ba gosoncze' len le'e cana', na' da'n'an' cheyaļa' güe'cho yela' choχcLen chegaque' che dan' ba gosonen'.

¹⁹ Beņe' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' beņe' ca' chesežag ližgaque' chesonxene' Criston' lecze chosoguapchgüe' le'e tiox. ²⁰ Nach yogo' beņe' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gacbia' chaque lježle.

²¹ Cuincza' neda' Pablo chzoja' late' dao' le'e cart nga chguapa' le'e tiox.

²² Na' še ne' nchixe balje bi chaquele Xancho Jesucriston', Diosen' gone' cont cuiaye'e toli tocane. Xancho Jesucristo, yidšco' da' yoble.

²³ Gaclenšca Xancho Jesucriston' le'e. ²⁴ Chacda' yogo'le da' naccho txen chejnilaže'cho Cristo Jesúsén'.
Da' na'zen' žia' le'e.

2 Corintios

Postlw Pablo chzoje' beņe' chesonxen Jesucriston' ciuda Corinto

1 Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxenle Diosen' lo ciuda Corinto, na' che note'tezechle beņe' že' doxen distritw Acaya beņe' ba gwlej Diosen' cont zjanaque' lo ne'e. Neda' len beņe' migw checho Timoteo chguapto' le'e tiox. ² Na' chñabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo' lo' yichjlažda'olen'.

Da' ca' gwdi gwxaca' Pablon'

³ Cheyaļa' soacho gonxencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho. ⁴ Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle beņe' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' beņe'. ⁵ Leca chyi chzaca'to' can' gwdi gwxaca' Criston', na' ca'cze leca cheyoe'xen Diosen' neto' da' chejnilaže'to' Criston'. ⁶ Da' zan da' chac cheto' da' chsed chlo'eto' xtiža' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjayzoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. ⁷ Chbezto' gwyo gwchejle da' chac chele, le nezeteto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Beņe' migw, chaclaža' nezele can' gwdi gwxaca'to' caten' gwzoato' distritw Asia. Gwdi gwxaca'chguato', con bich bi goc gonto' na' bento' xbab gatzeto'. ⁹ Da' li bento' xbab lo' yichjlažda'oto' ba za' yeļa' goten'. Na' goc cheto' ca' cont gocbe'eto' bi soeczeto' gwyo gwchejto' dan' chzaca'zi'ton' san cheyaļa' šejnilaže'to' Diosen' cont gone' chač laže'to', Dios ben' chosban beņe' guat ca'. ¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. ¹¹ Zoato' lez yoslacze' neto' con še gaclenle neto' yo'li güižlene' cheto'. Na' še zanle gonle ca', nach lecze zanle güe'le yeļa' choxcen che' cate' ba goclene' neto'.

Pablon' gwžede' šeje' ciuda Corinto

¹² Chbeda' choa' diža' can' chonto', le nezeteto' lo' lažda'oto' chonto' güen len le'e do yichj do laže'to' na' lecze len note'tezechle beņe'. Bi nacho chonto' güen neče da' nacto' beņe' sina', san da' nži'ilaže' Diosen' neto', da'nana' chaclene' neto' chonto' güen len yogo'lo' beņe'. ¹³ Cart quinga chzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo. ¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba chacbe'ele late' dao' na'a. Na' cate' žin ža yid Xancho Jesúsena' da' yoble, yebele güe'le diža' nacle neto' txen na' neto' yebeto' güe'to' diža' nacto' le'e txen.

¹⁵ Cana' gocda' yedeņa'a le'e cont da' yechop ni'a soacho txen, le bena' xbab yebele yedeņa'a le'e. ¹⁶ Goclaža' tia' yedeņa'a le'e caten' gwyo'a Macedonia na' lecze goclaža' yedia' gan' zoalna' cate' beza' Macedonian'. Na' gocda' yeyoža' gaclenle neda' yeya'a Judean'. ¹⁷ Do laža' gocda' gona' ca', gague chona' con can' žan chia' ca' cheson ba' beņe' bi chesejnilaže' Diosen', to chesene' yesone' to da' yesone' na' to chesene' bi yesonen'. ¹⁸ Ca' Diosen' chone' con can' že', lecze ca' neto' chnato' do laže'to' cate' chnato' to da' gonto'. ¹⁹ Na' lecze Jesucriston' beņe' naque' Xi'ni Diosen', toz can' naque' bate'teze, na' nac da' li yogo' can' gwnen', con can' gwduxue'eto' xtižen' len le'e, neda', Silvano na' Timoteo. ²⁰ Na' yogo' da' güen da' ba gwna Diosen' gone', nezecho gonen' da' gwsele' Jesucriston'. Da'nana' len yeļa' chaclen che Jesucriston' chonxencho Diosen' che'chone': "Gacšca ca'." ²¹ Na' Diosen' chone' cont neto' na' le'e zoačhačcho chejnilaže'cho Criston'. Na' beņe' chio' Spiritw che'na' cont gac goncho xšinen'. ²² Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca' xi'ne' na' cont nezecho yogo' da' güen da' gwne' gone', žin ža cate' gonen'.

²³ Da' biņa' yida' da' yoble Corinto gan' zoalen' yedeņa'a le'e can' gwnia' gona', biņa' yida' cont bi yedetiļa' le'e che da' malen' chonle. Diosen' nombi'e yichjlažda'ogua' na' neзде' choa' diža' li chnia' ca'. ²⁴ Nezeteto' gague neto' ye'to' le'e da' ni da' na' šejle'. Ba zoačhačle chejnilaže'le Criston', na' neto' con chaclento' le'e cont soachle mbalazch.

2 Ca' goquen' bečhoglaža' bi yedeņa'a le'e, le gocbe'eda' šaca' bedeņa'a le'e gocyaše'cho. ² Na' šaca' bena' cont gocyaše'le, nono zoa no yeyon cont

yezoa' mbalaz, le ba bena' cont gocyaše'laže'le še ca'.
³ Bzoja' carten' ca' cont cate' yida' gan' zoalna' bich gonle da' mal da' gonen gacyaše'da', le cheyała' gonle cont yebeda'. Na' zoa' lez lecze mbalaz soa le'e cate' gonle soa' neda' mbalaz. ⁴ Bzoja' le'e do chegüine'laža', da' gwzochgua' gocyaše'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüine'le, san gwzelaža' gacbe'ele leca chacda' le'e.

Gwne' cheyała' yesyezi'xene' che beñe' ben da' malen'

⁵ Da' li gocyaše'da' can' ben bena' ben da' malen', perw gague neda'zen' gocyaše'da'. Yogo'czle ba gocyaše'laže'le late' güeje can' ba goquen'. Chnia' gocyaše'le late' güeje cont bi nia' benche' chio' zi'ch ca cheyała' nia'. ⁶ Ndop nžagle txen gwchoglaole castigw che', na' da' na'zen' cheyała' si'e. ⁷ Bich güe'Ine' castigw, san yezi'xenle che' na' le gon chach laže' cont soede' yeła' chacyaše'laže' chen' na' bi cuejyichje' Diosen'. ⁸ Da'n'an' chñeyoeda' le'e le gon cont gacbe'ede' chaquelene'. ⁹ Ba bzoja' le'e cana' cont gwñezda' naquen' chonle, še chzenagle chia' len yogo' dan' gwnia' gonle. ¹⁰ Na' ña'a chaclaža' ñezele note'teze beñe' chezi'xenle che', lecze neda' chezi'xena' che'. Na' cate' chezi'xena' che beñe', še zoa da' cheyała' yezi'xena', chezi'xenan' lao Criston', na' ba bezi'xena' che bena' cont chaclena' le'e. ¹¹ Na' chezi'xenko che beñe' cont Satanás dan' chnabia' da' xigüe' ca' bi soen gonen chio' gan, le ñezecho can' chaclažen' siye'czen chio'.

Pablon' goclaže' yežague' Titon'

¹² Cate' bžina' Troas gan' gwduxjue'eda' diža' güen che Criston', nacia' Diosen' ba bene' cont beñe' že' na' gosaclaže' bosozenague'. ¹³ Perw benchgua' xbab che beñe' migw checho Titon' da' bi bžine' na'. Da'n'an' goša' beñe' ca': "Nayežagcho", na' beza' beya'a distritw Macedonian'.

Zoacho mbalaz da' nombia'cho Criston'

¹⁴ ChoχcLen Diosen', none' cont Jesucriston' ba bebeje' chio' lo na' gwxiyen' na' mbalaz cheče'e chio' soa'cho len le'. Na' gate'teze zoacho, Diosen' chone' cont chesacbe'e beñe' naquen da' güen juisyw nombia'cho Criston'. ¹⁵ Diosen' chebede' choncho cont chesacbe'e beñe' naquen da' güen juisyw yesejnilaže' Criston'. Na' bałe' chesejnilaže'ne' na' de yeła' mban chegaque' toli tocañe, na' yebałe' bi chesejnilaže'ne' na' chesebiaye'e. ¹⁶ Na' beñe' ca' chesebiayi' bi chesyebede' can' chonchon', le che'chone' yesebiaye'e. Na' beñe' chesejnilaže'ne' chesyebede', le ba goclenchone' cont ba de yeła' mban chegaque' toli tocañe. Perw chio' bi chachcho to gualazcho gwlo'echo beñe' ca' güenna' naquen yesejnilaže' Criston'. ¹⁷ Beñe' zan chosoše'e diža' da' cheso'e che Diosen' cont chesyebe beñe' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da'

nacto' Criston' txen, le Diosen' gwsele' neto' choe'to' xtižen'.

Da' cobe da' gwna Diosen' gone' cont gaclene' beñachen'

³ Bi gonle xbab chonxen cuinto' choe'to' diža' quinga. Ñezele chonto' xšin Diosen' do laže'to', na' bi chyažjen goxe'to' cart cont ñezele nac nacto', na' ñeca chyažjen gwzojle cart da' goxe'to' cate' šejto' ga yoble. ² Chaqueto' le'e da' gwduxjue'eto' xtiža' Criston' len le'e cont gwyejnilaže'lene'. Na' yogo'ze beñe' guac yesele'ede' can' ba boša' yichjlažda'olen' na' guac yeseñezde' can' chonto' xšin Diosen'. ³ Gwyejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nacia' be-cobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

⁴ Cheyaxjeto' žato' ca' le Criston' zoe' chaclene' neto' cont ñezeto' chonto' can' chazlaže' Diosen'. ⁵ Ñezeto' bi chac bi gonto' to gualazto', na' ñezeto' gague ñeche bi da' ba ben neto' bchoj xšin Diosen' güen, le Diosen' chone' cont chac bite'teze da' chac. ⁶ Na' Diosen' ba bene' cont chac chyixjue'eto' da' coben' da' gwne' gone' gaclene' chio' beñach. Na' da' coben' bi naquen ca ley che' dan' byoj cani' chzejni'in chio' beñach cuiayi'cho yeła' güen da' mal chechon', san ña'a Spiritw chen' chonen yeła' mban toli tocañe che chio' chejni-laže'chone'.

⁷ Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont beñe' Israel ca' gosacbe'ede' ley chen' naquen da' zaca'. Na' cana' catec goctitechgua cho'alao Moisésen', bi goc yesena' beñe' Israel ca' cho'alagüen', la'czla' gwdechle bega'a yeła' chactiten' šolaže'. Na' ley nan' con bzejni'in beñachen' cuiayi'cho yeła' güen da' mal chechon'. ⁸ Da'n'an' ñezecho leca zaca'ch da' chon Spiritw che Diosen' ña'a cont gata' yeła' mban checho toli tocañe. ⁹ Diosen' blo'e yeła' zaca' che ley chen' la'czla' bzejni'in chio' beñach si'cho castigw da' bi choncho can' žanna'. Na' zaca'ch xtiža' Diosen' da' de ña'a da' chzejni'in cheyone' chio' beñe' güen. ¹⁰ Da' naquen da' zaca'chgua cani', bičh naquen da' zaca' ña'a, le ba de yeto da' zaca'chgua da' xench. ¹¹ Na' da' blo'e Diosen' yeła' zaca' che da' ben žin šložze cani', cheyała' gacbe'echo leca da' xench zaca' da' coben' da' bi te che.

¹² Na' da' ñezeto' gague da' te che da' cobe da' ba gwduxjw Diosen' cont chaclene' beñachen', da'n'an' bi chedi'ito' chyixjue'eto' xtižen' sin cbi chžebto'. ¹³ Da' Moisésen' bcuaše' cho'alagüen' len to lache' bxin cont beñe' Israel ca' bi besele'ede' chenet late' güeje yeła' chactit che cho'alagüen'. Perw ña'a gague hcuaše'to' yeła' zaca' che da' chon Diosen'. ¹⁴ Beñe' Israel gualaž cheto' ca' bi gosejni'ide', ñe ža ña'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con beñe' ca' chesejnilaže' Criston' chesejni'ide' bi zejen. ¹⁵ Ža ña'aža cate' beñe' Israel gualaž cheto' ca' chosolabe' da' ca'

bzoj Moisésen', zjanaquen ca to da' ngaše' len le-gaque' yela' bi chejle' čhegaquen'. ¹⁶ Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len le-gaque'. ¹⁷ Xancho Criston' naque' toze len Spiritw čhe Diosen'. Na' cate' ba zoa Spiritw čhe Xancho' lo' yichjlaždao' beņe', bačh zoe' binlo len Diosen'. ¹⁸ Yogo' chio' chejnilaže'cho Criston', yela' zaca' juisyw čhe Xancho Criston' bich ngašen' len chio', na' ba zejech cheyaquechcho beņe' güen can' nac le', le zoa Spiritw čhe Xancho Criston' lo' lažda'ochon' chocoben xbab čhechon'.

4 Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nana' bi cheche'eto' chyixjue'eton'. ² Na' bibi chonto' bagaše'ze ca no da' nac da' yela' zto'. Bi chonleto' beņe' na' neca choša'to' xtiža' Diosen' cont yesyebē beņe' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' beņe' yesene xtiža'ton' yesenezde' lo' lažda'ogaquen' choe'to' diža' li. ³ Con beņe' ca' ba zjambiyi' yela' bi chejle' čhegaquen', le-gacze' bi chesejni'ide' diža' güen dan' choe'lento' le-gaque'. ⁴ Le beņe' bi chesejle' xtiža' Diosen' chosozenague' čhe Satanás dan' chnabia' da' xigüe' ca' latje da' yosozenague' čhe Diosen', na' Satanásen' chonen cont nčhol' yichjlažda'ogaquen'. Da'nana' diža' güen čhe Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' beņe' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. ⁵ Na' ca' nac diža' da' chyixjue'eto', chyixjue'eton' gague cont gwzenagle čhe neto', san cont gwzenagle čhe Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. ⁶ Na' Dios ben' gwne' gata' be'ni' yežlio nga gan' goc čhol', ba gwlo'e be'ni' čhen' lo' yichjlažda'ochon' cont nombia'cho Jesucriston' ben' nac beņe' zaca' juisyw, na' cate' ba nombia'chone' chacbe'echo can' nac yela' beņe' zaca' čhe Diosen'.

Pablo cho'e xtiža' Diosen' lagüe' da' chejnilaže'ne'

⁷ Cuerp čhecho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' čhen' lo' yichjlažda'ochon' na'a šlac ne' mbancho len cuerp čhecho quinga cont gacbe'echo bibi chac goncho še bi goņe' yela' guac xen čhen' cont gac bi da' goncho. ⁸ Na' neto', da' zan da' chy chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezetō Diosen' chaclene' neto'. ⁹ Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'. ¹⁰ Gate'teze chejto', con yogo' ni'a chosoči chososaca' beņe' neto' na' chesaclaže' yesote' neto' can' gosote' Jesúsēn'. Na' Diosen' cho'e latje chac čheto' ca' cont nacbia' zoacze Jesúsēn' chaclene' neto' šlac mbanto' len cuerp čheto' quinga. ¹¹ Na' šlac ne' mbanto', yogo' ža nita'cze beņe' chesaclaže' yesote' neto' lagüe' da' chyixjue'eto' xtiža' Jesúsēn'. Na' chac čheto' ca' cont nacbia' zoacze Jesúsēn' chaclene' neto'

šlac mbanto' len cuerp čheto' quinga da' yesat. ¹² Can' chac, tža tža chesaclaže' yesote' neto', san le'e ba de yela' mban čhele toli tocaņe.

¹³ Xtiža' Diosen' nyojen žan: "Chejnilaža' Diosen' na' da'nana' choa' diža' čhe." Na' ca' ben' bzoj da'na' gwejnilaže' Diosen', ca'czen' chejnilaže'to'ne' na' da'nana' choe'to' xtižen'. ¹⁴ Le nezetō Dios ben' bosban Xancho Jesúsēn' ladjo beņe' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. ¹⁵ Neče le'e bžaglaoto' yogo'lo' da' ba goc čheto'. Le chaclaže'to' gac zancho gaclenchgua Diosen' chio' cont šejnilaže'cho Xancho Jesúsēn', na' lecze gac zancho güe'cho yela' choxclen čhe' catec beņe' zacan' naque'.

¹⁶ Da'nana' bi chjaxaque'laže'to'. La'czla' tža tža zej chaxo'ch cuerp čheto' quinga, lecze tža tža Diosen' chocobche' yichjlažda'oto'. ¹⁷ Yob te čhe bite'teze da' dao' da' chžaglaochō yežlio nga. Na' da' ca' chy chzaca'cho chesaclenen chio' cont soacho mbalaz juisyoch cate' šjayzoacho len Diosen' toli tocaņe, na' lenna' da' zaca'ch ca bite'tezchle. ¹⁸ Nachen' bi chi' yichjcho čhe da' chle'echo yežlio nga, san chi' yichjcho čhe da' bi chle'echo. Le yesede čhe da' ca' zjade yežlio nga da' chle'echo, na' da' ca' bi chle'echo, gague da' yesede čhegaquen, ni'taczen toli tocaņe.

5 Cuerp čhechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen čhecho yaban' da' soa toli tocaņe; na' lenna' gague naquen to da' ben beņačh. ² Na' šlac ne' zoacho mbancho yežlio nga, chbežyaše'cho lo' lažda'ochō zelaže'chguacho šjayzoacho lo' yo'o da' non Diosen' čhecho yaban'. ³ Chona' xbab cuerp čobe da' goņe' zaca'leben ca to xacho da' chyažjen čhazcho cate' yežincho yaba. ⁴ Da' li chio' ne' chžaglaochō len cuerp čhecho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp čhecho quinga da' te čhen len to da' soa toli tocaņe. ⁵ Na' Diosen' gwleje' chio' cont šjayzoacho len le' na' gwsele' Spiritw čhen' zoan lo' yichjlažda'ochon' cont nezecho dech da' goņe' čhecho.

⁶ Da'nana' bi chacžejlaže'cho, le nezecho šlac mbancho len cuerp čhecho quinga biņa' šjayzoacho len Xancho Criston'. ⁷ Na' la'czla' biņa' le'echo da' ca' goņe' čhecho, zoacho chejnilaže'chone'. ⁸ Na' da'nana' bi chacžejlaže'cho, le chaclaže'cho cuejyichjcho cuerp čhecho quinga cont šjayzoacho len Xancho Criston'. ⁹ Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. ¹⁰ Le to tocho cheya'la' techo lao Criston' gan' chone' yela' justisen' cont čhogbi'en čhecho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Beņačhen' guac yesenite' binlo len Diosen'

¹¹ Na' dan' nezetō yogo'cho yodecho cuent lao Xancho Criston' čhe yogo'lo' da' ba bencho, da'nana' chneyoeto' beņe' yosozenague' čhe'. Diosen' neзде' do laže'to' chneyoeto' beņe' yosozenague' čhe', na' zoa'

lez lecze le'e chacbe'ele lo' lažda'olen' zoato' chonton' do laže'to'. ¹² Bi nacho chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' beñe' ca' chesenelagüe' çheto'. Beñe' ca' chesa'laže' da' ba zjansede' na' da' zjanaque' no zjanaque'. Bibi xbab chesone' çhe can' nac yichjlažda'ogaquen'. ¹³ Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. ¹⁴ Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neçe yogo'cho, na' da' naccho txen len le' guac nacho yogo'cho ba gotcho len le'. ¹⁵ Bnežjw cuine' gote' neçe yogo' chio' beñaç, cont soa cuezcho goncho can' chazlaže' na' bich soa cuezcho goncho con ca žan çhecho. Gote' na' bebane' ladjo beñe' guaten' neçe chio'. ¹⁶ Neto' cate' biña' šejnilaže'to' Criston' goqueto' bibi zaque', le bento' xbab zaca' beñe' še no naque' lo yežlio nga o še bi da' de çhe'. Perw na'a bich chonto' xbabn' ca' çhe Criston' o çhe note'teze beñe'. ¹⁷ Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoachcho ca beñe' cobe.

¹⁸ Diosen' bozoe' chio' binlo len le' na' bene' cont beyaccho ca beñe' cobe cate' gwejnilaže'cho Criston'. Na' gwlo'e lo na'cho ye'cho beñe' can' yesenite' binlo len Diosen'. ¹⁹ Ye'cho legaque' Diosen' gwsele' Criston' cont note'teze beñe' yesejnilaže' le' yesenite' binlo len Diosen', na' Diosen' bich gone' cuent çhe da' xinj dan' ba gosone'. Can' cheyała' ye'cho beñe' cont yesenite' binlo len Diosen'. ²⁰ Criston' gwsele' chio' ca cuine' na' Diosen' chaclaže' neyoecho beñe' ca cuince Criston' chneyoede' legaque', ye'chone': "Le soa binlo len Diosen'." ²¹ Criston' bibi da' mal bene'. Perw na' Diosen' bene' cont Criston' gwxcaca'zi'e neçe xtoła'chon' cont none' chio' beñe' güen da' chejnilaže'chone'.

6 Neto' chonto' xšin Diosen' txen len le'. Da'nan' chneyoeto' le'e, le gon can' chazlaže' Diosen' cont gwlo'ele naquen' to da' zaca'chgua da' beyaše' beži'ilaže'de' chio'. ² Nyoj can' gwne':

Cate' bžin ža goc da' bžia' bia', cana' bzenaga' çhio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a baç bžin žan' chaclen Diosen' beñaçen', le ža na'aža chnežjue' yela' mban toli tocañe çhe beñe' chesejnilaže' Jesucriston'.

³ Bi chonto' bite'teze da' gwžon cont beñe' bi yesejnilaže'ne', le chaclaže'to' bibi gata' da' yesenelagüe beñe' çhe xšin Diosen' da' chonto'. ⁴ Da'nan' bite'teze da' chonto' chlo'eto' chonto' xšin Diosen' ca cheyała'. Chyo chçejto' cate' chosoçi chososaca' beñe' neto', cate' chzaca'zi' chzaca'yaše'to', na' cate' za'ac bichle da' mal len neto'. ⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš çhe xtiža'ton'. Zan las bento' žin gual, na' gwlejšto' bišgal na' gwbił gwdon'to'. ⁶ Na' da' chi' yichjšto' chonto' xšin Diosen' can' chazlažen', bitw bi da' yela' zto' chonto'. Chzejni'ito' beñe'

len yela' chejni'i çhe Diosen', napt'o yela' chxenlaže' len yogo'loł beñe' na' chonto' güen len yogo'lole'. Chonto' con can' chzejni'i Spiritw çhe Diosen' neto', na' do laže'to' chaqueto' yogo'loł beñe'. ⁷ Zoato' chzejni'ito' beñe' diža' li, na' chonto' yogo'loł da' chonto' len yela' guac çhe Diosen'. Na' da' zoato' chonto' da' zej to liça, chaclenen cont soeto' tiļlento' da' malen' na' cont bi gwzenagto' çhe gwxiyen'. ⁸ Zoato' chonto' xšin Diosen' can' chazlaže' cate' chesonxen beñe' neto' na' cate' chesegue'ede' neto', cate' cheseñe' güen çheto' na' cate' cheseñe' mal. Choe'to' diža' li, cate' beñe' neto' chesejle'e çheto' na' cate' beñe' chesacde' chonlaže'to'. ⁹ Bal beñe' bi chesejle'e chonto' da' zaca', perw yebaļe' zjañezde' chonto' da' zaca'. Zan las chonto' xbab gatczto', perw ne' mbanto'. Na' la'czļa' yogo' da' ca' chac çheto', biña' yesote' neto'. ¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont beñe' zan nite' mbalaz. Na' la'czļa' bibi de çheto', yogo'loł bi da' de naquen çheto' da' nacto' Criston' txen.

¹¹ Le'e beñe' Corinto, baç be'lento' le'e yogo' diža' da' yo'o lo' lažda'oton', le chacchgüeto' le'e.

¹² Nži'ilaže'to' le'e, perw le'e bitec nži'ilaže'le neto'.

¹³ Chata'yoeda' le'e ca chon to beñe' len xi'ine', le gaque neda' ca chacda' le'e.

Spiritw çhe Diosen' zoan lo' yichjlaždao' chio' chejni-laže'chone'

¹⁴ Bi cheyała' gaccho txen len beñe' bi chesejnilaže' Criston'. Še Diosen' ba none' chio' beñe' güen len le', bich gac goncho txen len beñe' cheson da' malen'. Chio' yo'o be'ni' çhe Criston' lo' yichjlažda'ochon' bi cheyała' goncho txen len beñe' bi yo'o be'ni' çhen' lo' yichjlažda'ogaque'. ¹⁵ Criston' bi chac gone' txen len Satanás dan' chnabia' da' xigüe' ca', na' ca'cze beñe' chejnilaže' Criston' bi cheyała' gone' txen len beñe' bi chejnilaže' Criston'. ¹⁶ Nezecho bi gac še' l' gua'a l'saca' da' chesejnilaže' beñe' lo' yodao' gan' chejnilaže'cho Diosen', na' ca'cze bi chac soa Diosen' len chio' chejni-laže'chone' še zoa bichle da' chejnilaže'cho. Chac can' gwna Diosen':

Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež chia'.

¹⁷ Da'nan' cheyała' goncho can' gwna Xancho Diosen': Le yechoj len beñe' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

7 Le'e beñe' chacda', ba nezecho can' gwna Diosen' gone' güen len chio'. Da'nan' cheyała' cuejyichjšcho bich goncho bite'teze da' xinj da' gwchenen cuerp çhechon' o yichjlažda'ochon'. Na' cheyała' gapcho Diosen' bala'añ gwzenagcho çhe' tža tža na' šejch gaccho beñe' güen can' chaclaže'.

Ba bža' xbab che beņe' Corinto ca'

² Le gague neto'. Ne tole bibi beneto'. Ne tole bi bzejni'to' clele, na' ne tole bi gwziye'to'. ³ Gague žia' ca' cont tiļa' le'e, le can' ba gwnia' cana', chacda' le'e ņa'a šlac mbancho na' lecz ca' gacda' le'e cate' ba gota'.

⁴ Nežda' lo' lažda'ogua' gonle can' chazlaže' Diosen', na' chbeda' choe'lena' beņe' diža' ca' güenņa' chonle. Ba beyacxenlaža' da' gwņezda' chonle güen, na' zoa' mbalaz la'czļa' da' zan da' chac čhia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxcaca'to'. Gwnita' beņe' bososašlene' neto' na' lecze bžebto' lo' yichjlažda'oto' goqueto' nac gacto'. ⁶ Na' Dios ben' cheyoe'xene' beņe', beyoe'xene' neto' da' bela' Titon'. ⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebechda' gwņezda' da' ca'.

⁸ Chacbe'eda' gocyāše'le can' gwnia' le'e carten' bzoja' le'e. Na' gwdechle betinjda' da' bena' cont gocyāše'le, perw ņa'a bich chetinjda' da' gwseļa' carten', le šložzen' gocyāše'le. ⁹ Chbeda' ņa'a, le goclenen le'e cont begüine'laže'le che da' xinjen' benle na' betinjle čhen, can' goclaže' Diosen'. Na' can' goquen' bi bchojen mal dan' gocyāše'len'. ¹⁰ Cate' ba bencho da' xinj, Diosen' chaclaže' yegüine'cho che dan' benchon' na' yetinjechon. Na' chone' yeļa' mban toļi tocaņe che chio' chetinjje xtoļa'chon', na' leca mbalazch soacho še ba betinjecho xtoļa'chon'. Perw beņe' zan cate' chesegüine'laže' bi chesyetinjde' xtoļa'gaquen', nach yesebiaye'e. ¹¹ Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nacbia' bich bi xtoļa'le de can' benļna'. ¹² Na' ca' nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ņe' chaquele neto' na' ņe' chaclaže'le gonle can' che'to' le'e. ¹³ Na' ņa'a ba beyacxenlaže'to' da' bzenagle čheto'.

Na' lecze chebechgüeto' ca' mbalaz zoa' Titon', le yogo'le benle ga bezoa' Titon' binlo len xbab da' yo'o lo' yichjlažda'ogüen'. ¹⁴ Goša' Titon' nežda' gonle güen. Na' bi cheto'eda' da' goša'ne' ca', le ca' da' li' zjanac yogo' da' chzejni'to' le'e, lecz ca' da' li' bchoj dan' gožto' Titon', na' nacbia' be'to' diža' li'. ¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwņezele benle da' xinjen'. ¹⁶ Da'nan' chebeda' na' nežda' yeyož gonle can' chazlaže' Diosen'.

Besezande' da' gota' chegaque' gosaclene' beņe' yoble

8 Beņe' migw, chaclaže'to' nezele can' ba goclen Diosen' to' cuen to' cuen beņe' ca' chesedop

chesežag chesonxene' Criston' to to yež gan' mbane distritw Macedonian'. ² Gocchgua yeļa' yaše' yeļa' zi' čhegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebechgüede' bosotobe' mechw xen cont gosaclene' beņe' yoble.

³ Nežda' na' choa' diža' bosonežjochgüe' da' beseyažje beņe' yoble la'czļa' bibi gota' chegaque', na' con xbab čhegaczen' gosone' ca'. ⁴ Goseneyoede' güe'to' latje yosonežjue' mechw cont yesaclene' beņe' ca' chesejni-laže' Diosen'. ⁵ Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'. ⁶ Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolao btoble cana'. ⁷ Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lecz le gon güenchgua na' le gwtobe da' cheseyažje beņe'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson beņe' Macedonian' da' chesacde' Diosen' na' lježgaque'. ⁹ Nezele leca nži'ilaže' Xancho Jesucriston' chio'. Da' chacde' chio' bcua'aņe' yogo'loļ da' šagüe' da' de che' gan' zoe' len Diosen' na' bide' golje' beņe' yaše' yežlio nga, bedeyene' cont yogo' dan' de che' gaquen' čhecho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle beņe' yaše' ca' na' gwzolaole btoble mechon' do yichj do laže'le. ¹¹ Na' chacda' güen yeyož gwtoblen ņa'a do yichj do laže'le can' gwzolaole, na' gwnežjwle con ca' zelao saque'le. ¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czļa' late'ze da' de da' gwnežjwchone'. Bi chņabe' gwnežjwchone' da' bi de čhecho.

¹³ Bi žia' gonle cont bich bi yega'aņ čhele na' gata' che beņe' yoble. ¹⁴ Con chaclaža' gata' da' chyažje yogo'le. Šlac ņa'a de che le'e, cheyaļa' gaclenle beņe' ca' cheseyažjde'. Čhixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. ¹⁵ Nach gac can' nyoj Xtiža' Diosen' žan: "Beņe' botobe' da' zča'o, bitw ņacho becho'oņen che', na' beņe' botobe' late'ze, gota'cze da' byažjde'."

Titon' na' beņe' lježe' ca'

¹⁶ Choxcen Diosen' bene' cont Titon' zelaže'chgüe' gaclene' le'e con can' zelaža' neda'. ¹⁷ Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

¹⁸ Na' chselja'to' yeto beņe' lježcho len Titon'. Na' to cuen to cuen beņe' ca' chesedop chesežag chesonxen Jesucriston' cheso'e diža' che benga chselja'to', chesene' binlo chyxjue'ede' diža' güen che Jesucriston'. ¹⁹ Nachen' lecze gosebeje' le' cont sa'lene' neda' cate' ša'a gan' že' beņe' lježcho ca' šjasana' mechw dan' chtobcho. Na' gwnežjwcho mechon' cont gacxen

Xancho Jesucriston' na' cont gwlo'ele chbele chaclen bene' lježe. ²⁰ Yo'o yichjto' gonto' da' nac güen lao Xanchon' na' lao benačhen', le mechw xenna', na' bi chaclaže'to' yesene' chonto' clele len len.

²² Na' lecze chseła'to' yeto bene' lježcho len legaque'. Zan nia' ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' ze-laže'chgualle gonle can' chazlaže' Diosen'. ²³ Na' ca nac Titon', chone' xšin Diosen' txen len neda' cont chaclen-to' le'e. Na' bene' ca' yečhope, zjanite' chesone' cont Criston' chacxene', na' bene' ca' chesedop chesežag chesonxene' Jesucriston' gosebeje' legaque' na' chesesele' legaque'. ²⁴ Da'n'an' chnia' le gon güen len legaque' cont bene' ca' chesonxene' Criston' to' to yež yesenezde' chaquele legaque', na' le gwlo'e chonle güen can' gwnato' cate' be'to' diža' güen čhele.

Bosotobe' mechon'

9 Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble. ² Nezdá' chaclaže'le gaclenle le-gaque'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'n'an' bene' ca' že' zan yež distritw Macedonia lecze ba chesone' ca'. ³ Perw bia'cze chseła' bene' ca' len Titon' cont diža' dan' ba bia' čhele catec güenna' chonle bi gaquen ca da' güenlaže'. Chaclaža' yeyož gw-toble mechua' cont ba den cate' yida'. ⁴ Le še sa'len no bene' Macedonia neda' cate' yedena'a le'e da' yoble, na' yeto'eda' čhele še bina' gata' mechua', na' lecze le'e yeto'ele da' bi benle can' gwnia' gonle. ⁵ Da'n'an' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yichj do laže'le, gague gwnežjwčhe'elen.

⁶ Le gon xbab can' chesene': "Bene' chaz late'ze, late'ze chelape', na' bene' chaz da' zčha'o, da' zčha'o chelape'." ⁷ Da'n'an' to tole cheyała' gwnežjwle gaca'te' da' chebele gwnežjwle, na' bi gwnežjwčhe'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. ⁸ Diosen' nape' yela' guac cont chaclenčgüe' chio' len bite'teze da' čyažjecho. Na' chac chone' cont chata' yogo'lo' da' čyažjecho bate'teze neče gac gwnežjwcho da' čyažje bene' yoble na' goncho bichle da' güen. ⁹ Quinga nyoj Xtiža' Diosen' čhe bene' chzande' da' de čhe', žan:

Ba bnežjue' da' beseyaže' zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' biñ na' bichle da' chazcho; chone' cont chata' da' che'ej da' chagwcho. Lecz le' gone' cont gata' bichle da' čyažjele na' cont čha'o xenchen, na' gone' cont šejchle gonchle da' güen. ¹¹ Bite'teze da' chac čhele, Diosen' gone' cont gata' da' zčha'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxclen čhe Diosen'. ¹² Le da' gwnežjwle da' cheseyaže' bene' chesejnilaže' Jesucriston' ga yoble, bene' zan

yeso'e yela' choxclen čhe Diosen'. ¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen čhe Criston' do yichj do laže'le. Nach le-gaque' yeso'e yela' choxclen čhe Diosen' da' gwsele'le da' zčha'o mechw da' gaclenen legaque'. Lecz yeso'e yela' choxclen čhe' da' chaclenle yogo' bene' chesejnilaže' Criston'. ¹⁴ Na' do chesacde' le'e yoso' güiže' Diosen' yesenabe' gaclenche' le'e, le nacbia' ba nži'ilaže'chgua Diosen' le'e. ¹⁵ Choxclen Diosen' gwsele' Xancho Jesucriston' len chio'. Bibi diža' de da' nacho catec zaca' goclenña' da' bene' len chio' gwsele'ne'.

Diosen' gwleje' Pablon' cont bzejni'ide' bene'

10 Chesena bal' bene' chžeba' tila' le'e cate' zoa' len le'e na' con cate'ze zoa' zito' chzoja' cart chdiła' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'. ² Chneyoeda' le'e gonle da' güen cont bi tila' le'e caten' yedetila' bene' chesacde' chona' con can' žan čhia'. ³ Na' la'czla' zoato' lo yežlion' na' nacto' benačze, cate' chdillento' da' malen' bi chdillenton' ca' benačze. ⁴ San Diosen' non'e' neto' yela' guac cont choeto' chlej chšoštjo' yogo' da' chon gwxiyen', le bi soeto' tillenton' to gualazto'. ⁵ Can' chac, Diosen' chaclene' neto' chonto' cont chosozexjwiyichj bene' chosozenague' čhe Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'. ⁶ Na' cate' yeyož gata'bia' še yogo'le gwzenagle čhe Diosen', cana' ngüiato' gonto' castigw čhe nole bi chzenagle čhe'.

⁷ Le gon xbab čhe dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'. ⁸ Na' bi yeto'eda' güe'cha' diža' yelate' can' ba bian', le chebeda' gwseła' Xancho Criston' neto' cont bzejni'ito' le'e diža' da' goclenen le'e, gague da' bžiyayin' le'e. ⁹ Bi chaclaža' no gacde' še chzoja' cart quinga cont gwšeba' le'e. ¹⁰ Bene' ca' chesenelagüe' čhia' chesene' cate' zoa' zito' chzoja' cart znia' ca' čhe no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle. ¹¹ Bene' ca' chesenelagüe' čhia' cheyała' yesenezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

¹² Bi chaclaže'to' gonlebetto' bene' ca' chesonxen cuingaque'. Chesacde' güenčgua chesone', le to toe' con chesena' lježe' cont chesene' chesonche' güenč clcl ca' cheson bene' lježe', na' bibi zejen chesone' ca'. ¹³ Neto' bi gonxen cuinto'. Con güe'to' diža' čhe da' ca' goclen Diosen' neto' bento' gan' ba gwsele' neto', le lecze gan' zoalen' ba gwsele' neto'. ¹⁴ Da'n'an' bi chonlaže'to' cate' choe'to' diža' čhe da' ba bento' gan' zoalen', le nacto' bene' nechw bzejni'ito' le'e diža' güen čhe Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'. ¹⁵ Na' bi güe'to' diža' čhe da' bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'. ¹⁶ Na' cha-

claže'to' chixjue'eto' diža' güen çe Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' çe xšin Diosen' da' ba bento' na' bi güe'to' çe da' ba ben beñe' yoble.

¹⁷ Bi cheyaļa' gonxen cuincho, san cheyaļa' gonxen-cho Xancho Dios. ¹⁸ La'czļa' še to beñe' ñe' chone' güen, bi naquen da' šejle'cho. Perw še Xancho Diosen' ñe' chone' güen nachen' ñezecho da' li chone' güen.

Pablon' na' beñe' ca' cheson cuingaque' postlw

11 Chaclaža' gwzenagle yeto chop diža' güen da' gua' çe cuina' la'czļa' še chaquele naquen diža' da' bibi zaca'. Le gwzenag chia'. ² Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napš'i' cuine' da' chacde' toz beñe' byo beñe' si' le'. ³ Chxožda' yeseziye' beñe' le'e cont bich šejnilaže'le Criston' do laže'le na' bich gaquele toz le'. Can' gwziye' bejen' da' no'ole nechon', no'olen' gože' Eva, da' nacba' be xigüe'. ⁴ Cate' chesela'ac beñe' gan' zoale na' chosozejni'ide' le'e çe Jesús'en' nža'le can' ba bzejni'ito' le'e, o chosozejni'ide' nža'le çe Spiritw çe Diosen' o çe diža' güen chen', la' chzenagtele chegaque'. Da'n'an' chxožda' yeseziye'e le'e. ⁵ Ba nonle beñe' ca' ca postlw chele na' chonxenle legaque'. Na' neda' zaca'cha' ca le-gaque'. ⁶ La'czļa' bi choa' diža' xdan ca chesoe' le-gaque', ba ble'eczele yogo' dan' ba bento' na' ñezceze chejni'ito' xtiža' Diosen' binlo.

⁷ ¿Chaquele malen' bena' bibi laxjua' gwxia' cate' be'lena' le'e diža' güen çe Diosen'? Ben cuina' ca to beñe' bibi zaca' da' bibi laxjua' gwxia' cont bena' ga zoachle mbalaz. ⁸ Gwxia' mechw da' goson beñe' ca' chesedop chesežag chesonxene' Criston' ga yoble cont be'lena' le'e xtiža' Diosen'. ⁹ Na' cate' gwzoa' len le'e, la'czļa' bi gota' da' byažjda', bi gwñabdan' le'e. Beñe' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chçhinda'. ¹⁰ Chebeda' chac chnia' bibi gan chona' chyixjue'eda' xtiža' Diosen' len le'e o len beñe' že' yež yoble ga mbane distritw Acayan'. Na' can' ñezda' chaclen Criston' neda' choa' diža' li, can' ñezda' gwbat gonda' le'e zed cont gonle da' chyažj chçhinda'. ¹¹ Perw gague da' bi chacda' le'e bi gonda' le'e zed. Diosen' ñezde' chacda' le'e.

¹² Na' gonchca' can' chona' bibi laxjua' chzia' cont bi žel bi yosode'e beñe' ca' yesene' toz can' chesone' len da' chon neto', le can' chesaclaže' yesene'. ¹³ Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseļa' Criston' legaque'. ¹⁴ Bi yebanele can' chesonen', le ca'czen' chziye' Satanásen' chio', cheyon cuinen ca to angl beñe' chactitchgua cont gaquecho naquen to angl güen beñe' za' gan' zoa Diosen'. ¹⁵ Na' ca'czen' cheson beñe' ca' chosozenag chen, chesonlede' le'e cont

gaquele chosozejni'ide' diža' güen. Perw žin ža yesezaca'zi'e toli tocañe yeļa' güen da' mal chegaquen'.

Da' ca' gwdi gwxaca' Pablo da' naque' postlw

¹⁶ Da' yoble žia' le'e, bi gaquele chona' xbab da' bibi zaca' can' chon beñe' bi chejni'i. Perw la'czļa' še chaquele chona' xbab da' bibi zaca', le gwzenag chia' šlac gua' to chope diža' güen çe cuina'. ¹⁷ Gua' diža' güen çe cuina' la'czļa' ñezda' Xancho Criston' bi be'e diža' güen çe cuine'. Guan' ca beñe' chon xbab da' bibi zaca', beñe' bi chejni'i. ¹⁸ Beñe' zan cheso'e diža' güen çe cuingaque' çe bi da' ba gosone' o bi da' ba goc chegaque', na' ca'czen' gona' neda'. ¹⁹ Ba non cuinle beñe' sina' na' da'na'ljan' chbele chzenagle çe beñe' cheson xbab da' bibi zaca'. ²⁰ Chzenagle çe beñe' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e. ²¹ Chonljale xbab bžebto' le'e dan' bi beneto' le'e ca'.

Na' da' yoble gua' diža' ca beñe' chon xbab da' bibi zaca', le bite'teze diža' güen da' cheyaxje beñe' güe'le çe cuine' note'teze naque', lecze cheyaxjda' gua' dižan' nac ca' çe cuina'. ²² Chesonxen cuingaque' da' gosaljje gan' že' beñe' chesaque' diža' hebreo. Ñezceze lecze goljelena' beñe' chesaque' diža' hebreo. Na' chesonxen cuingaque' da' zjanaque' beñe' Israel. Ñezceze lecze beñe' Israel neda'. Na' chesonxen cuingaque' da' gosaljje lo diaža çe da' Abraham. Na' ñezceze lecze diaža çe da' Abrahanna' neda'.

²³ Chesene' Criston' gwsele' legaque' cont yesone' xšine'. Ñezceze Criston' gwsele' neda' na' ba bencha' xšinen' ca legaque'. Si'xenle dan' choa' diža' ca beñe' chon xbab da' bibi zaca', ca beñe' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clel ca da' ba goc çe legaque'. Na' zan ni'ach beñe' ca' chesegue'ede' neda' ba goseyixjue' neda' ližya clel ca dan' ba goc çe beñe' ca' chosozejni'ide' le'e. Na' zan ni'a ba bela' cbi gota'. ²⁴ Gayo' ni'a goseyin beñe' Israel gualaž chia' neda' tašjw de yid togaljechoa ni'a güeje. ²⁵ Šone' ni'a beñe' justis ca' goseyine' neda' xis. Na' tñi'a bosotacue' neda' yey yelate'ze ca gosote' neda'. Na' cate' zya'a yež zito' to lo' barcw, šon ni'a boçinj nisdaon' barcon', na' cañe bžina' yo biž. Na' lo šon ni'an beyinjenna', tñi'a gwdeļa' nisdaon' tža tyel. ²⁶ Zan ni'a ba gwya'a yež zito' jatixjue'eda' xtiža' Criston'. Zan ni'a cañe goc gwdia' yegw ca'. Zoa cate' goca' lo na' beñe' gwban. Zoa cate' beñe' Israel gualaž chia' gosaclaže' yesote' neda', na' zoa cate' beñe' bi zjanaque' beñe' Israel gosaclaže' yesote' neda'. Na' zan ni'a do lo ciuda, do ga nono beñe' že' na' do lo nisdaon' yelate'ze bi gota'. Na' yogo' ža chaš beñe' chesonlaže' chesene' zjanaque' chio' tx-en na' chxožda' yosožiaye'e xšin Diosen' dan' chonan'. ²⁷ Zan ni'a ba bena' xšin Diosen' benten ga jaxaque'chgüeda', na' zan ni'a bchejda' bi gwtasa'. Nombi'a yeļa' chbi chdon, le zan ni'a bi gota' da' ye'ej

gagua'. Na' lecze zan ni'a beyaga' bi gota' xa' da' byažj-da'.

²⁸ Da' zanch da' ba gwdi gwxaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež. ²⁹ Note'te-zle cate' bi zoačhačhle len Criston' o bi chzoele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' beņe' chese go'oyele' le'e cont chonle da' mal, leca chacda' lo' yichjlaž-da'ogua' na' chža'a dan' ba chonle can' že'na'. ³⁰ Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. ³¹ Dios beņe' cheyaļa' gonxenko toli tocaņe neзде' choa' diža' li. Len' naque' Xa Xancho Jesucriston' na' chonxen Jesucriston' le'. ³² Na' yeto da' goc čhia', cate' gwzoo' ciuda Damasco, beņe' goc gobernador šlac gwnabia' rey Aretas bnite' beņe' gosape' cho'a puert da' zoa le'e ze'e da' nyečhj ciudan' cont yesezene' neda' cate' yechoja'. ³³ Perw beņe' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyečhje ciudan' cont bi gosezene' neda'.

Da' ble'edagüe' Pablon'

12 Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'. ² Ba chejni-laža' Criston' cate' goc čhia' quinga ba goc žta' iz. Diosen' bene' neče gwya'a yaban' gan' zoen'. Bi ne-da' še gwya'a len cuerp čhia', Dios nan' neзде'. ⁴ Con neзде' bžina' gan' zoa Diosen' na' benda' beņe' ca' že' na' cheso'e diža' zaca' da' bi chac nia', diža' zaca' da' bi de latje güe' beñač yežlio nga. ⁵ Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc čhia' da' chosolo'en bi chac bi gona' to gualaza'. ⁶ Šaca' žan gonxen cuina', da' zan da' güen ba bena' da' gac gua' diža' čhen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca cheyaļa'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp čhia' nga, na' leca chaclaže' Satanásen' gacda' tole da' chac čhia' ca'. ⁸ Šone ni'a ba gwñabda' Xancho Criston' yeque'e dan' chžaglagua' len cuerp čhian'. ⁹ Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyaļa' gono'." Da'n'an' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yeļa' guac čhen'. ¹⁰ Na' da'n'an', cont gacxen Criston', chbeda' bite'teze da' chac čhia' da' chlo'en chyažjda' gaclene' neda'. Chbeda' cate' chesezi'diža' beņe' neda', cate' bi de da' chyažjda', cate' beņe' chosolagšibe' neda', na'

cate' bichle da' chžaglagua', le cate' chac čhia' ca', cana'ch chaclench Criston' neda' len yeļa' guac čhen'.

Pablon' gwche' yichje' che beņe' chesonxen Criston' Corinto

¹¹ Ba bia' diža' benxen cuina' ca chon beņe' bi chejni'i. Le'e cheyaļa' güe'le diža' čhia' naca' beņe' zaca', perw bi chonle ca'. Da'n'an' benen byen bia' dižan' ca'. Da' juisyw chonxenle beņe' ca' ba nonele ca postlw čhele. Na' neda' ne late'ze bi chyažjen cont gaca' beņe' zaca' ca legaque'. Žia' ca' la'czļa' chacbe'eda' bibi zaca' šaca' bi zoa Diosen' len neda'. ¹² Ba ble'ele naca' dogualje postlw, le cate' gwzoo' len le'e, Diosen' blo'e zoa yeļa' guac čhen' len neda' na' bene' cont goc bichle da' zaca' yesyebane beņe', na' goclene' neda' bchejda' yogo' da' goc čhia' šlac bena' xšinen' gan' zoen'. ¹³ Toze ca güenña' bena' len le'e na' can' bena' len beņe' yež yoble ga chesedop chesežague' chesonxene' Criston', con da' bi bia' latje gonle da' chyažj chčhinda'. Le si'xen da' malen' bena' bi benda' le'e zed.

¹⁴ Chaclaža' yida' deņa'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de čhele, con chaclaža' gwzenagle čhia' na' gon cuinle lo' na' Criston'. Ca no bidao' bi cheyaļa' gwnežjwbe' bi da' chyaže xaxña'be', san xaxña'be' cheyaļa' gwnežjue' da' chyaže lebe', ca'czen' naquen len le'e na' len neda'. ¹⁵ Chbeda' chzanda' bite'teze da' de čhia' na' lente cuina' cont gaclencha' le'e, la'czļa' šlac neda' chaquechda' le'e, le'e bi chaquetecle neda'.

¹⁶ Na' balle, la'czļa' chacbe'ele bi benda' le'e zed len da' byažj bčhinda', žale gwziya'a le'e. ¹⁷ ŽBi nezele bi gwziya'a le'e cate' gwseļa' note'teze beņe' ca' ba gwseļa' gan' zoale na'? ¹⁸ Gwneyoeda' Titon' bedene'e le'e na' gwseļa' yeto beņe' lježcho len le'. ŽBi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

¹⁹ ŽChaquele ba bia' diža' quinga cont nezele bibi da' xinj chonto'? Gague da'n'an' ba bia' dižan' ca'. Ba gw- nia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' neзде' yogo' da' ba gwnia' le'e, na' naca' Criston' txen chzejni'ida' le'e. ²⁰ Con chžeba' cate' yedeņa'a le'e še gata'bia' bi chonle güen can' chaclaža' gonlen', na' še ba chonle da' mal, bi šo'laže'le can' gona' len le'e. Chacda' čhixe še chdiļe chšašle na' chgue'e lježle o chloc lježle o chazlaže'le gac güen che cuinzle. Čhixe še chņe che lježle, še chčhitje diža', še cha'laže'le o še de da' zed čhele. ²¹ Chžeba' cate' yedeņa'a le'e še ga- ta'bia' zanle biņa' cuejyichjele da' malen' ba benle, na' biņa' yetinjele che da' yeļa' zto' chonle, che da' nzoa no xtrole, o da' chata'lenle no beņe' bi nac beņe' čhele o no'ole bi nac xo'olle. Na' Diosen' gone' yeto'eda' čhele na' yegüine'da' čhele še naquen ca'.

Pablon' že' gone' castigw che no chon da' malen'

13 Na'a gac šone ni'a yedeņa'a le'e. Cate' gagwcho xya che note'teze beņe', guata'bia' nape' doļa' še

yotiļen can' chesena hope o Ńone beņe' cheso'e diža' can' goquen'. ² Goša' le'e Ńlac gwzoa' len le'e caten' be- deņa'a le'e da' gwchope, bi yeyaše'da' beņe' ca' goson da' xinjen' Ńe bi yesyetinjde', na' goņa' castigw he yo- go' nochle chon da' xinjen'. Na' da' yoble žia' ca' Ńa'a Ńlac zoa' zito' len le'e. ³ Chaclaže'le gona' to da' gwlo'en chņe Criston' len neda'. Da'nan' goņa' castigw he nole chon da' xinjen'. Na' Criston' gwlo'e yeļa' guac xen he' cont saca'zi'le he da' xinj da' nonļe. ⁴ Na' ļa'czļa' Criston' ben cuine' ca beņe' bibi chac gon cate' gosote'ne' ļe'e yag cruzen', zoe' Ńa'a da' nape' yeļa' guac xen he Diosen'. Na' ļecze neto' nacto' txen len Criston' ben cuanto' ca beņe' bibi chac gon, perw gw- lo'eto' le'e zoa yeļa' guac he Diosen' len neto'.

⁵ Ļe gonyane' xbab helen' Ńe da' ļi chejnilaže'le Jesu- criston'. Nach gacbe'ele zoe' len le'e Ńe da' ļi chejni- laže'lene'. ⁶ Na' zoa' lez ļecze gacbe'ele zoe' len neto' na' nacto' postlw he'. ⁷ Choļ gūižto'ne' hele chņabto' bich bi da' mal gonļe, gague cont gacbe'ele zoa Jesu- criston' len neto', san cont soale gonļe da' gūen. Ļe toze ca nonen Ńe chesacbe'e beņe' zoe' len neto' o Ńe bi chesacbe'ede'. ⁸ Na' bibi castigw goņto' le'e Ńe chzenagle diža' ļi he Jesucriston', con gaclento' le'e, Ńe

ca'. ⁹ Yebeto' gonto' ca beņe' bibi yeļa' chnabia' nape', con Ńe le'e ba chnabia'le chonļe can' cheyaļa' gonļe. Na' zoaczo' choļ gūižto' Diosen' chņabto' gaclene' le'e gonļe doxen can' cheyaļa' gonļen'. ¹⁰ Ba bzoja' da' quinga za' yedeņa'a le'e cont yetinjele xtoļa'len' na' bi yažjen gona' znia len le'e. Diosen' gwseļe' neda' naca' postlw he' na' beņe' neda' yeļa' chnabia' cont gaclena' le'e, gague cont gwžiaya'a le'e.

¹¹ Beņe' migw hia', chņaba' gacšca gūen hele. Ļe cuec yihjle gonyane'le yogo' da' chaclaže' Diosen' gonļe. Ļe gon hah laže'le len bi da' chac hele. Ļe gac toze len ļjež le'e chejnilaže'le Criston', na' ļe soa binļo tole yetole. Diosen' chacde' chio' na' chone' cont chzoa chbezcho binļo len xbab da' yo'o ļo' yihjlaž- da'ochon', nachen' chņaba' soašcacze' len le'e. ¹² Ļe gwnopa' na' ļježle gwguap ļježle tiox cate' chežagle tx- en, cont gacbia' chaque ļježle tole yetole. ¹³ Yogo' beņe' ca' chesejnilaže' Criston' do nga chosoguape' le'e tiox.

¹⁴ Na' chņaba' Xancho Jesucriston' gaclenšcacze' le'e. Na' Diosen' gonšque' gacbe'echle chacde' le'e, na' gonšca Spiritw he Diosen' cont xbab hele gaquen toze len xbab hen. Da' na'zen' chzoja'.

Gálatas

Pablon' chguape' tiox beñe' ca' chesonxene' Criston' Galacia

1 Neda' Pablo chzoja' le'e chdop chžagle chonxenle Criston' yež ca' zjachi' distritw che Galacia. Neda' len yogo' beñe' lježcho ca' nite' nga chguapto' le'e tiox. Gague beñach gwlej neda' cont gona' xšine', san Jesucriston' txen len Xe' Diosen' ben' bosban le' ladjo beñe' guat ca', legaque' gosebeje' neda' cont naca' postlw chegaque'. ³ Na' chñaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole. ⁴ Jesucristnan' bnežw cuine' neče xtoła'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen' ⁵ ben' cheyała' gonxencho toli tocañe. Na' ca'šcacze goncho.

Bich bi yeto diža' de da' gac načo diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen. ⁷ Perw bi naquen diža' güen. Con nita' beñe' chososed chosolo'ede' xtiža' Diosen' clele na' chesone' cont chaczejlaže'le che diža' güen che Criston' dan' bsed blo'eto' le'e. ⁸ Šaca' neto' chixjue'eto' yeto da' bi naquen diža' güen che Criston', chñabda' Diosen' gone' cont cuiayi'to'. Na' la'czla' to angl beñe' za' gan' zoa Diosen' chixjue'ede' yeto da' bi naquen diža' güen che Criston', lecze chñaba' gon Diosen' cont cuiaye'le. ⁹ Can' ba gwnian', lecze can' žia' da' yoble na'a: še note'teze beñe' ba chixjue'ede' xtiža' Criston' nža'le can' ba nsedlen, chñaba' gon Diosen' cont cuiaye'le toli tocañe.

¹⁰ Chnia' ca' cont na Diosen' chona' güen, gague cont yesena beñachen' chona' güen, na' gague cont yebe beñachen' neda'. Šaca' chi' yichja' nacle gona' cont yebe beñachen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Beñe' migw, che'nda' nezele diža' güen che Criston' dan' ba be'lena' le'e bitw naquen xbab che beñach. ¹² Gague beñachen' bzenden' neda', na' neca načo beñachen' bene' cont gwejni'idan', san cuin Jesucriston' bzejni'ide' neda' diža' güen chen'.

¹³ Ba beneczele diža' can' ba bena' cate' ne' na'ogua' costumbr che neto' beñe' Israel. Leca bchi bsaca' beñe' ca' chesonxene' Criston', goclaza' yesenyite'. ¹⁴ Na' gwche'chgua yichja' che costumbr dan' gosa'o da' xozx-ta'ogua' ca' na' bsedchan' clel ca zan beñe' l gualja' beñe' lecze zjanac beñe' Israel. ¹⁵ Perw cate' biña' galj-tia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone', ¹⁶ nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesús'en' len beñe' ca' bi zjanac beñe' Israel. Na' cate' ben Diosen' ca' len neda' notno gwñabda' gwzejni'ide' neda'. ¹⁷ Na' neca gwy'a' Jerusalénna' cont postlw ca' yososed yosolo'ede' neda', beñe' ca' gwlej Diosen' cont chesone' xšine' cate' neda' za' gonan'. San la' gwy'atia' gan' nzi' Arabia, na' gwdechle beza' Arabia bežina' Damasco.

¹⁸ Na' gocch šon' iz gwy'a' Damascon', nach beza' beya'a Jerusalénna' cont bembia' Pedron' na' jaso'a' len le' žta'gwbiž. ¹⁹ Perw bitw bšaga' yezica'chle postlw ca' san toze Jacobo beñe' biše' Xanchon'. ²⁰ Nezece Diosen' da' nga chzoja' naquen diža' li.

²¹ Nach gwy'a' yež ca' zjachi' gan' nzi' Siria na' Cilicia. ²² Na' beñe' ca' chesedop chesežag chesonxene' Criston' yež ca' zjachi' distritw Judean', legaque' biña' yesombi'e neda' ca hora'. ²³ Con ba gosende' chesena beñe' chia': "Ben' bchi bsaque' neto' bich chone' ca'. Ba chyixjue'ede' cheyała' šejnilaže'cho Criston', la'czla' cana' goclaze' gone' cont nono yesejnilaže' Criston'." ²⁴ Na' beñe' Judea ca' chesejnilaže' Criston' gosonxene' Diosen' cate' gosende' can' chonan'.

Yezica'chle postlw gosazlaže' can' chon Pablon'

2 Na' gocch žta' iz gwy'a' Jerusalénna' nach da' yoble gwy'a' len Bernabén', na' lecze gwchi'a' Titon'. ² Diosen' bzejni'ide' neda' cheyała' ša'a, na' da'nan' gwy'a'. Na' btoba' beñe' ca' zjanaque' blao len beñe' ca' chesonxen Criston' Jerusalénna' na' legacze' bzejni'ida' bin' chyixjue'eda' len beñe' ca' bi zjanaque' beñe' Israel cate' choelena' legaque' diža' güen che Criston'. Bzejni'ida' legaque' bin' chsed chlo'eda', le goclaza' yesenezde' cont bi yesene' bibi zaca' dan' chona' na' da' ba bena'. ³ Ca' goquen' bitw chole gosone' byen soa beñe' lježa' Titon' señw dan' nzi' circuncisión la'czla' bi naque' beñe' Israel. ⁴ Goc ca' la'czla' gwnita' bal beñe' gosaque' txen len beñe' lježcho ca' Jerusalénna' ca hora', beñe' gague do laže' gosejnilaže' Criston', con bedesene'e še na'oto' costumbr ca' zjany-

oj le'e ley che neto' beñe' Israel. Legaque' gosaclaže' yesone' byen ga'oto' costumbr ca', la'czla' nezecho chebe Diosen' chio' dan' chejnilaže'cho Criston', gague dan' choncho can' ža leyna'. ⁵ Perw neto' ne late'ze bi bzenagto' che legaque', le goclaže'to' bi gata' da' gwžon gwzenaguechle diža' güen che Criston' da' naquen da' li. ⁶ Na' ca' nac beñe' ca' gosac beñe' blao len beñe' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czla' bitw bi nonen len neda' še gosaque' beñe' blao o še bi gosaque', le len Diosen' tozce can' zjazaca' yogo'lo' beñe'.) ⁷ Gosacbe'ede' Diosen' ngüe'e lo' na' chyixjue'eda' diža' güen che Criston' len beñe' ca' bi zjanaque' beñe' Israel can' ngüe'en lo' na' Pedron' chyixjue'eden' len beñe' Israel gualaž cheto' ca'. ⁸ Le Diosen' ben' chaclene' Pedron' len ye'la' guac chen' cont chyixjue'ede' xtiža' Criston' len beñe' Israel gualaž cheto', lecen' chaclene' neda' len ye'la' guac chen' cont chyixjue'eda' xtiža' Criston' len beñe' bi zjanaque' beñe' Israel.

⁹ Can' goquen', Jacobon' len Pedron' len Juanña', beñe' zjanacch blao len beñe' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txe len neto' na' gosazlaže' can' chonto'. Le gosacde' güencze gonto' xšin Diosen' len beñe' ca' bi zjanac beñe' Israel na' legaque' yesonen' len beñe' Israel gualaž cheto' ca'. ¹⁰ Toze dan' gose'e neto' gonto', gaclento' beñe' yaše' ca'. Na' da' licze chi'chgua yichja' chona' ca'.

Pablon' gwdi'le' Pedron' gan' nzi' Antioquía

¹¹ Na' gwdechle gwy'a gan' nzi' Antioquía. Na' šlac zoa' na' bid Pedron', na' gwdi'la'ne' can' chone', le bla'alaon chone' da' mal. ¹² Cate' za' bžine' Antioquían', gwzola'güe' che'ej chagüe' txe len beñe' ca' chesejnilaže' Criston' la'czla' bi zjanaque' beñe' Israel; perw gwdechna' cate' besežin beñe' Jerusalén ben' gwse'la' Jacobon', bich goclaže' ye'ej gagüe' txe len beñe' ca' bi zjanaque' beñe' Israel. Bžebe' še bi yesena beñe' ca' cheson xbab note'teze beñe' chejnilaže' Criston' cheya'la' soe' señw dan' že' circuncisión. ¹³ Nach yezi-ca'chle beñe' Israel ca' chesejnilaže' Criston' lece besyebi' bich gose'ej gosagüe' txe len beñe' ca' bi zjanaque' beñe' Israel, na' gosego'oye'le' Bernabén' cont lencze' bebixe'. Na' gosone' ca' cont yesebe beñe' Jerusalén ca' legaque', la'czla' goseñezde' bi naquen mal yese'ej yesagüe' txe len beñe' ca' bi zjanaque' beñe' Israel. ¹⁴ Gocbe'eda' bi chesone' can' cheya'la' gon chio' nombia'cho diža' li che Criston'. Na' da'nán' gwdi'la' Pedron' lao yogo' beñe' ca' chesedop chesežag chesonxene' Criston', goša'ne': "Le' naco' beñe' Israel, perw ba gwlejičhjo' costumbr che chio' beñe' Israel cont chono' txe len beñe' ca' bi zjanaque' beñe' Israel. Da'nán' bitw cheya'la' gono' byen yeson beñe' ca' bi zjanaque' beñe' Israel can' nac costumbr che chio' beñe' Israel."

Con beñe' chesejnilaže' Jesucriston' zjanaque' beñe' güen len Diosen'

¹⁵ Neto' goljto' nacto' beñe' Israel na' bitw goljto' lad-jo beñe' ca' cbi chesonxen Diosen'. ¹⁶ Perw ba nezetu' Diosen' bitw že' nacto' beñe' güen len le' neče da' chonto' can' ža ley dan' bzoj da' Moisésen'. Con beñe' chesejnilaže' Jesucriston' zjanaque' beñe' güen len Diosen'. Da'nán' lencze neto' chejnilaže'to' Criston' cont Diosen' že' cheto' ba nacto' beñe' güen lagüe'na'; že' ca' gague neče dan' chonto' can' ža leyna'. Le bi nacho zoa beñe' nac beñe' güen len Diosen' neče chone' bi da' ža leyna'.

¹⁷ Ba' neto' beñe' Israel ba chejnilaže'to' Criston' cont Diosen' none' neto' ca beñe' güen. Da'nán' chacbe'eto' toz ca beñe' güen da' xinj nacto' len beñe' bi zjanac beñe' Israel. Perw bi nacho Criston' chone' cont nacto' beñe' mal. Leca clelen' cheson beñe' xbab še chesacde' ca'. ¹⁸ Nezecho bi chyažjen ga'ocho costumbr che da' xozxta'o neto' beñe' Israel cont gaccho beñe' güen len Diosen'. Na' še ba gwlejičhjo' costumbr ca' na' yezola'cho yeya'ochon da' yoble, gwlo'elaon naccho beñe' güen da' xinj. ¹⁹ Ley dan' bzoj da' Moisés ba bzejni'in neda' bi naca' beñe' güen len Diosen', le bi chona' can' žanna'. Perw dan' bi gwzoen yeyonen neda' beñe' güen len Diosen', da'nán' bich chonxenan', san yo'o yichja' soacza' gwzenaga' che Diosen'. ²⁰ Criston' bnežw cuine' gote' neče xto'lan', na' dan' chejni-laža'ne' da'nán' ba none' neda' ca to beñe' guat len da' xinjen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'ih Diosen' ben' chejnilaža'. Len' chacde' chio' na' bnežw cuine' gote' neče chio'. ²¹ Diosen' nži'ilaže'de' chio' na' da'nán' gwse'le' Criston', perw chzoacho to šla'ale dan' bnežw cuine' gote' še chaquecho naccho beñe' güen len le' neče choncho dan' ža leyna', le bitw byažjen bnežw cuin Criston' neče chio' šaca'.

Naccho beñe' güen len Diosen' dan' chejnilaže'cho Criston'

3 Le'e beñe' Galacia, ncho' yichjlažda'olen'. ¿No gwziye' le'e cont chaquele cheya'la' gonxenle costumbr che da' xozxta'oto' ca'? Ba bzejni'iyane'da' le'e che dan' got Criston' le'e yag cruzen' neče chio'. ² Da' ngazen' chnabda' le'e: ¿Zoa Spiritw che Diosen' lo' yichjlažda'ole neče dan' chonle can' ža ley dan' bzoj da' Moisésen'? Bitw naquen ca', san zoan len le'e neče dan' chejnilaže'le Criston'. ³ Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. ¿Da' leca ncho' yichjlažda'olen' chaquele chyažjen gonle can' ža leyna' cont yeyož gacle can' chazlaže' Diosen'? ⁴ Da' zan da' bosochi bososaca' beñe' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheya'la' gonle can' ža leyna'? ⁵ Nezele Diosen' ba beñe' Spiritw chen' zoan len le'e na' chone' ye'la' guac da' chle'le

neče chejle'le xtiža' Criston' dan' bzeneto' le'e, gague chac ca' neče dan' chonle bi dan' ža leyna'.

⁶ Da' Abrahanna' gwejnilaže' Diosen', na' da'nan' Diosen' gwne' naque' beņe' güen lagüen'. ⁷ Da'nan' cheyaļa' nezele yogo' beņe' chesejnilaže' Diosen', Diosen' none' legaque' ca xi'iq diaža che da' Abrahanna'. ⁸ Diosen' bžie' bia' gone' len le'e bi nacle beņe' Israel can' chone' len neto' beņe' Israel, con note'tezcho chejnilaže'chone' none' chio' beņe' güen lagüen'. Da'nan' Xtižen' dan' nyojen žan gože' da' Abrahanna' diža' güen qui cate' biņa' žin ža gaquen': "Dan' chejnilažo' neda' gona' güen len beņe' ca' že' yogo' nación." ⁹ Na' can' naquen, Diosen' chone' güen len beņe' ca' chesejnilaže' le' can' bene' güen len da' Abrahanna' ben' gwejnilaže'ne'.

¹⁰ Na' note'tez beņe' chon xbab gague' beņe' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan: "Da' mal juisyw gac che note'tez beņe' še bi ņita'teze' yesone' yogoļoļ can' ža leyna' bate'teze."

¹¹ Na' Xtiža' Diosen' nyojen, žan: "Beņe' chesejnilaže' Diosen' zjanaque' beņe' güen lagüe', na' da'nan' guata'cze yeļa' mban čegaque' toļi tocaņe." Na' da' žan ca' nezecho bitw že' che note'tezcho naccho beņe' güen lagüen' neče choncho bi dan' ža leyna' goncho.

¹² Na' leyna' bi žan cheyaļa' šejnilaže'cho Diosen', san con žan: "Note'teze beņe' chon doxen can' ža leyna' gac bane' toļi tocaņe."

¹³ Perw Criston' bñitlagüe' xtoļa'chon' cont bi gac da' mal juisyw čecho dan' bi chzoecho goncho doxen can' ža leyna'. Bnežjw cuine' goc da' mal juisyw che' laz chio'. Goc che' can' nyojen, žan: "Da' mal juisyw chac che note'tez beņe' chesote' chosode'ene' le'e yag."

¹⁴ Goc ca' cont lencze le'e bi nacle beņe' Israel šejnilaže'lene' na' soale mbalaz ca mbalazen' gwzoa da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsēn', Diosen' gwsele' Spiritw čhen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Beņe' migw, gwzejni'ida' le'e len da' nga chac yežlio nga: Cate' to beņe' chze'e yiš o chone' testament, bi ņacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czļa' naquen to da' chon beņachze. ¹⁶ Na' ca' nac dan' gož Diosen' Abrahanna' gone' da' güen len le' na' len xi'iq diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. ¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' beņe', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley čhen'. Perw la'czļa' Diosen' bnežjue' leyna', bitw ņacho cbi chone' can' gwne' gone' len Abrahanna' na' len xi'iq diaža che' ca'. ¹⁸ Šaca' Diosen' že' con beņe' cheson doxen can' ža leyna'

zjanaque' beņe' güen, bitw chone' da' güen che xi'iq diaža che da' Abrahanna' can' ba gwne' gone' šaca'. Perw Abrahanna' goque' beņe' güen len le' da' gwejle'e gon Diosen' can' gože'ne'.

¹⁹ Še naquen ca' žbixčhen byažje ley dan' bzoj da' Moisésen'? Diosen' bnežjuen' da' xozxta'oto' beņe' Israel cate' ba gwde tiemp che da' Abrahanna' cont gosacbe'ede' bi chesone' can' non Diosen' mandaw yesone'. Na' bžie' bia' gonen žin šlac biņa' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'iq diaža che da' Abraham. Na' ca' nac leyna', Diosen' bene' cont angl ca' bosonežjuen' da' Moisésen'. Na' Diosen' bčhine' Moisésen' bzejni'ide' xozxta'oto' beņe' Israel ca' can' žanna'. ²⁰ Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' beņe' yoble gwzejni'ide' le' can' gone'.

Da' chzejni'i leyna' chio'

²¹ Na' bitw cheyaļa' gaguecho ley dan' bzoj da' Moisésen' chonen clele len da' gwna Diosen' gone' la'czļa' leyna' bitw gac yocoben yičhjažda'ochoñ'. Šaca' gac yocoben yičhjažda'ochoñ' guac goncho can' ža leyna' nach gaccho beņe' güen len Diosen' šaca'.

²² Perw Xtiža' Diosen' dan' nyojen žan yogo'loļ beņachēn' yesezi'e castigw toļi tocaņe neče xtoļa'gaquen', na' con beņe' yesejnilaže' Jesucriston' ņitlao xtoļa'gaque' can' bsi Diosen' xnezen', cont gac güen čegaque' can' gwne' gac che xi'iq diaža che da' Abrahanna'.

²³ Ca' nac neto' beņe' Israel, cate' biņa' neze'to' cheyaļa' šejnilaže'to' Criston', nchoglaon čheto' si'to' castigw toļi tocaņe dan' nombia'to' leyna' na' bitw chonto' can' žanna'. ²⁴ Len neto' leyna' zaca'leben ca to beņe' chgüia chne'e xi'iq beņe', da' zan da' chi'ebe' gombe' na' da' zan da' chi'ebe' bi gombe'. Perw ņa'a ba bid Criston', na' note'tezcho chejnilaže'chone', Diosen' že' naccho beņe' güen len le'. ²⁵ Na' dan' ba bid Criston' leyna' bich naquen ca beņe' chgüia chne'e neto' beņe' Israel, neto' chejnilaže'to'ne'.

²⁶ Yogo' chio' chejnilaže'cho Cristo Jesúsēn' naccho xi'iq Dios. ²⁷ Na' note'tezcho še ba gwzoacho nisen' cont blo'echo naccho txen len Criston', ba chzolao chac yičhjažda'ochoñ' can' nac yičhjažda'ogüen'. ²⁸ Na' tozeczē can' zaca'cho lao Diosen' še naccho beņe' Israel o še bi naccho, na' še naccho beņe' esclavo o še bi naccho, na' še naccho beņe' byo o še naccho no'ole. Yogo'cho ba naccho ca toze beņe' neče dan' naccho txen len Cristo Jesúsēn'. ²⁹ Na' dan' naccho txen len Criston', lao Diosen' naccho xi'iq diaža che da' Abraham, na' gon Diosen' güen len chio' can' gwne' gone' len xi'iq diaža che da' Abrahanna'.

4 To beņe' gwñi'a še zoa xi'ine', bi'nan' gac lo na'be' da' de che'. Perw na' šlac ne' nacbe' bidao' bitw ņacho mbalazēch chac chebe' clēl ca che to beņe' güen žin la'czļa' žin ža gac lo na'be' yogo' dan' de che xaben'. ² Beņe' güen žin ca' nite' lo' yo'o chosogüia

chesene'ebe' na' chesenabi'ebe' šlac biṇa' čha'obe' na' šlac žin ža co'o ḡaben' lo na'be' dan' de čhen'. ³ Can' goc len neto' beṇe' Israel šlac biṇa' yid Criston', gwxa-ca'lebo' ca xi'ṇiṇ beṇe' gwṇi'an'. Na' leyna' gwza-ca'leben ca beṇe' ca' chesenabia' xi'ṇiṇ beṇe' gwṇian' šlac biṇa' žin ža si'be' dan' de čhe ḡaben'. ⁴ Perw cate' bžin ža bžia Diosen' bia' gwseja' Xi'ṇen' yežlio nga, gwxa to no'ole le'. Na' Xi'ṇiṇ Diosen' leceze benen byen bzenague' čhe leyna'. ⁵ Na' len' bedeyene' cont yogo' chio' chejnilaže'chone' ba non Diosen' chio' ca xi'ṇe' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley čhe neto' beṇe' Israel.

⁶ Na' cont nezecho ba non Diosen' chio' ca xi'ṇe', ba gwseje' Spiritw čhen' dan' leceze naquen Spiritw čhe Xi'ṇe' Criston', zoan lo' lažda'ochon'. Na' Spiriton' chaclenen to tocho cont choj güižcho Diosen' che'chone': "Xa". ⁷ Nachen' dan' ba non Diosen' chio' ca xi'ṇe' bich cheyała' soacho ca to esclavo len dan' non leyna' mandaw goncho. None' chio' ca xi'ṇe' na' chone' güen len chio' doxen can' gwne' gone' len xi'ṇiṇ diaža čhe da' Abrahanna'.

Pablon' chi' yichje' nac cheson beṇe' ca' chesejnilaže' Criston'

⁸ Cate' biṇa' gombia'le Diosen', gwyejnilaže'le da' ca' bi cheyała' šejnilaže'cho, na' legaquen gosnabian' xbab čhele. ⁹ Perw ṇa'a ba nombia'le Diosen', o še güenč ṇacho Diosen' ba nombi'e le'e. Na' chebančgüeda' čhele dan' chebiga'le cosxaṇle na' da' yoble chonxenle costumbr ca' ca no' čhe da' ye'ej gagwcho, čhe ža ca', na' čhe cuerp čechon', na' cho'ele latje chesenabian' xbab čhele la'czla' bitw zjazacan' cont yesaclenen chio'. ¹⁰ Ba chonxenle costumbr čhe no' ža ṇi, čhe bio' ca', čhe tiemp ca' na' čhe iz ca'.

¹¹ Chžeba' še bich chzenagle čhe dan' ba bsd blo'eda' le'e, le še bich chzenagle čhen, ba gwžiyi' dan' bena' len le'e.

¹² Beṇe' migw, chata'yoeda' le'e gacbe'ele costumbr čhe neto' beṇe' Israel dan' zjanyoj le'e leyna' bi yesaclenen le'e lao Diosen' ca chacbe'eda' bi yesaclenen neda' lao Diosen'. Na' caten' bedesoa' len le'e cana', bitw ṇacho ba benle mal len neda'. ¹³ Nezecezele bega'anlena' le'e da' nechw dan' gocšenda' na' gwduxje'eda' diža' güen čhe Criston' len le'e. ¹⁴ Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no' angl čhe Dios o ca šale cuin Jesucriston'. ¹⁵ Mbalaz gwzoale cate' gwzoa' len le'e cana'. Žbixčhen' bich chebele xtižan' ṇa'a? Nežda' da' leca goquele neda' bzanele bite'teze da' de čhele na' goclaže'le lente cuinle zanele gaclenle neda'. ¹⁶ Na' ṇa'a žba chaquele chgue'eda' le'e dan' choe'lena' le'e diža' ṇin'?

¹⁷ Beṇe' ca' chososed chosolo'ede' le'e ṇa'a leca zjachi' yichjgague' le'e, perw gague cont yesone' güen len le'e, san cont yesybeje' le'e bich gonle txen len neto', na' cont cue' yichjle legacze'. ¹⁸ Naquezen güen yesebe' yichj beṇe' le'e bate'teze, gague cate'zen' zoa'

len le'e, con še yesone' güen len le'e. ¹⁹ Xi'ṇdagua', da' yoble chžaglagua' lo' lažda'ogua' neče le'e can' chžagla to no'ole beṇe' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. ²⁰ Yebechgüeda' šaca' netec ṇa'a zoa' len le'e na' šaca' gac ṇia' chonle güen, perw leca chacžejaža' čhele.

Da' Agar na' da' Saran'

²¹ Le'e chaclaže'le gonxenle costumbr čhe neto' beṇe' Israel dan' zjanyoj le'e ley dan' bzoj da' Moisésen' žbiṇa' yenele can' ža dan' nyojen? ²² Žan gwnita' čhope xi'ṇiṇ da' Abrahanna' bi' byo, tobe' gwzan to no'ol ben' goque' esclava čhe' na' yetobe' gwzan no'ol čecze', no'ole nga bi goque' esclava. ²³ Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol čecze', goljbe' neče Diosen' gože'ne' san no'ol čhen' la'czla' naque' no'ol güiž. ²⁴ Na' dan' goc čhe no'ol ca' chzejni'in chio' čhe chop dan' gwna' Diosen' gone' cont gaclene' beṇe' Israel ca'. No'ole esclava ben' le Agar zaca'lebde' ca ley dan' ben Diosen' mandaw bzoj da' Moisésen'. Bzojen' par da' xozxta'o neto' beṇe' Israel lo' ya'a Sinaí, na' beṇe' ca' zjazaca'lebde' ca esclavos. ²⁵ Na' doxen nación Israelen' zaca'leben ca da' Agaren' no'ole esclava čhe da' Abrahanna'. Diosen' bnežjue' da' xozxta'oto' ca' leyna' lo' ya'a Sinaí' gan' nzi' Arabia, na' ža ṇa'aža beṇe' Israel gualaž čheto', beṇe' guac ṇacho beṇe' Jerusalén, ṇe' zjanaque' ca esclavos neče chesacde' chonen byen yesa'ogüe' costumbr ca' dan' ža leyna'. ²⁶ Perw chio' chejnilaže'cho Criston' naccho txen len yogo' beṇe' šjaya'aque' yaba gan' zoa Diosen' gan' leceze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'. ²⁷ Quinga ža Xtiža' Diosen' dan' nyojen:

Bebe no'ole güiž, no'ole cbi chzan,
bosya'a yeja' chbe čhio', le' biṇa' gaco' bes čhe yeja' sanṇa'.

Chacdo' bi chaque Diosen' le' da' nono xi'ṇo' zoa, perw ṇita' zanch xi'ṇo' clal ca nita' čhe no'olen' ba gwzan xi'ṇiṇ beṇe' byon' gwzoalene'.

²⁸ Beṇe' migw, xi'ṇiṇ da' Abrahanna' bin' le Isaac goljbe' neče gož Diosen' Abrahanna' san no'ol čhen' la'czla' goque' no'ole güiž. Na' ca'cze chio' chejnilaže'cho Criston', Diosen' none' chio' ca xi'ṇiṇ diaža čhe da' Abrahanna' bin' goljbe' neče goc dan' gož Diosen' le'. ²⁹ Bi' čhe da' Agaren', bin' goljbe' neče gwzoalen da' Abrahanna' le', bchi bsaca'be' Isaaquen' bin' ben Spiritw čhe Diosen' cont gwzan da' Saran'. Ca'cze naquen ža ṇa'aža, beṇe' ca' chesa'o costumbr ca' dan' ža leyna' chošoči chososaque' chio' chejnilaže'cho Criston'. ³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' čhen', le bitw gwnežjua'be' dan' gwnia' gwnežjua' bi' gwzan no'ol čhio'na'." ³¹ Da'nan' beṇe' migw, nezecho zaca'lebcho ca xi'ṇiṇ da' Saran', gague ca xi'ṇiṇ da' no'ole esclavan'.

Bi cheyała' yesa'ogüe' costumbr da' bi zjazaca'

5 Caten' gwejnilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchonña'. Da'nán' bi cheyała' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale señw dan' nzi' circuncisión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. ³ Da' yoble žia' le'e, note'teze beñe' soe' señw dan' nzi' circuncisión, lecce cheyała' gone' yogo'lo' bite'teze dan' ža ley dan' bzoj da' Moisésen'. ⁴ Na' še chaquele gonle doxen can' ža leyna' cont gacle beñe' güen len Diosen', ba chzoale Criston' to šla'ale še can' chaquele, na' bich chonle xbab catequen' nži'ilaže' Diosen' chio'. ⁵ Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho beñe' güen len le' cate' yežincho gan' zoe'na'. ⁶ Ca nac chio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gaque lježcho cont gacbia' chejni-laže'chone'.

⁷ Cana' gwzoale chonle can' chebe Diosen', perw na'a žnon' ba ben cont bich chzenagle che diža' li che Diosen'? ⁸ Dios ben' gwleje' le'e nacle xi'ine', bitw na'cho le'na' chone' cont chzenagle che diža' yoble. ⁹ Le gon xbab can' ža diža' nga: "Late'ze levadura chonen cont chas doxen cuazina'." ¹⁰ Perw na' zoa' lez gon Xancho Jesucriston' cont gwzenagle čhia'. Na' Diosen' gwnežjue' castigw che beñe' chon cont chacžejlaže'le, note'teze naque'.

¹¹ Beñe' migw, ca nac neda', šaca' ne' chsed chlo'eda' nia' yogo' beñe' byo cheyała' yesezoe' señw dan' že' circuncisión cont yesenite' binlo len Diosen', bilja chosoči chososaca' beñe' Israel gualaž čhian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nán' bi chesazlaže' xtižan'. ¹² Na' ca nac beñe' ca' cheson cont chaquele bilja chebe Diosen' le'e še bi zoale señon', yebeda' šaca' yesečog cuingaque' yelate'.

¹³ Beñe' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ocho dan' ža ley cont soacho binlo len le'. Perw bitw cheyała' goncho bite'teze da' mal dan' ža lažda'ochon' goncho. Dan' cheyała' goncho, cheyała' gaclen lježcho lagüe dan' chaque lježcho tocho yetocho. ¹⁴ Na' ba zoaccho choncho yogo'lo' can' ža leyna' še choncho can' nyojen žan: "Cheyała' gaque lježcho ca chaque cuincho." ¹⁵ Perw še chacyožlen lježcho o chdiljen lježcho, chži-ayi'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Čhnia' le'e to da' zejen, cheyała' soateze soacho goncho can' chaclaže' Spiritw che Diosen'. Na' še gon-

cho ca', bitw gwzenagcho che da' mal dan' yo'o lo' yičhjažda'ochon'. ¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'nán' bitw choncho da' mal dan' ža lažda'ochon' goncho. ¹⁸ Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

¹⁹ Nacbia'cze beñe' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol čhegaque' o beñe' byo bi zjanac beñe' čhegaque'; chesebede' chesone' bichle da' yela' zto' len cuerp čhegaque'; ²⁰ chesejnilaže' l' gua'a šsaca'; chosozenague' xtiža' beñe' ca' chesenelen da' xi'igüe'; cheseque'e lježe'; bitw nite' binlo len lježe'; chesacxi'a lježe'; cheseloque'; zjachi' yičhje' gac güen che cuingacze' sin cbi yesone' xbab nac gac che lježe'; bitw chesone' t xen len lježe'; ²¹ chesezelaže' bi da' de che beñe' yoble; chesote' beñe'; zjanaque' beñe' borrašw; žalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble čhnia' le'e can' ba gwnicza', nono yežin yaban' gan' zoa Diosen' čhnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaquecho ljež beñe'čcho; soacho mbalaz dan' nombia'cho Diosen'; soacho binlo len xbab dan' yo'o lo' yičhjažda'ochon'; gapcho yela' chxenlaže' len ljež beñe'čcho bite'teze da' chesonde' chio'; goncho güen len beñe' yezica'chle; gaccho beñe' šagüe' len yogo'lo' beñe'; goncho bi da' si' lo' na'cho goncho; ²³ gaccho beñe' gwzewjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. ²⁴ Na' chio' ba naccho t xen len Cristo, bich choe'cho latje nabia' da' malen' chio' cont goncho can' žanna'. ²⁵ Spiritw che Diosen' ba beñen yela' mban toli tocañe checho, na' da'nán' cheyała' soacho goncho can' chaclažen'.

²⁶ Na' bi cheyała' ga'laže'cho gaquecho leca beñe' güen naccho, le še goncho ca', chonen cont yeseža'a beñe' lježcho chio' na' yesegue'ede' chio'.

Cheyała' gaclen lježcho

6 Beñe' migw, še to beñe' lježchon' ba blažoe' bene' da' mal, chio' chzenagcho che Spiritw che Diosen' cheyała' gaclenchwne' yetinjden' cont yezoe' binlo len Diosen'. Na' cheyała' gwsaca'cho, le xož lecce chio' lažo'cho goncho da' malen'. ² To tocho cheyała' gaclen beñe' lježcho ca' bite'teze da' chesac čhegaque', le can' gwna Criston' chaclaže' goncho.

³ Na' še goncho xbab naccho beñe' güen cate' bi naccho, chziye'ze cuincho' še ca'. ⁴ To tocho cheyała' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clel ca beñe'

yoble. ⁵ Le to tocho čhoglao Diosen' čhecho še bencho güen o še bencho mal.

⁶ Še no chsed chlo'e chio' xtiža' Diosen', cheyaļa' gwnežjwchone' late' bi da' šagüe' da' güen da' de čhecho.

⁷ Bitw güe'le latje no si'ye' le'e, bitw gac gwcuša'e'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, ļenņa' yelapcho." ⁸ Ben' chon con can' ža da' mal dan' yo'o ļo' lažda'ogüe', gwžin ža cuiaye'e toļi tocaņe; perw ben' chon can' chazlaže' Spiritw čhe Diosen', Spiriton' gonen cont bane' toļi tocaņe. ⁹ Na' bitw cheyaļa' yeche'echo goncho da' güenņa', ļe gwžin ža cate' Diosen' gone' cont soacho mbalaz juisyw, con še bi cuejyčjcho choncho can' chaclažen'. ¹⁰ Da'nan' cheyaļa' goncho güen len yogo'ļoļ beņe' bate'teze de latje, na' chonchen byen goncho güen len beņe' chesejnilaže' Criston' clēl ca len yezica'chle beņe'.

Yeto čhope dan' che' Pablon' ļegaque'

¹¹ Le ņa'šc letr cha'o quinga, ļe cuina' chzoja' le'e.

¹² Beņe' ca' chesaclaže' yesone' byen soale seņw dan' že' circuncisión chesacde' yesyēbe beņe' Israel gualaž čheto' ca' ļegaque' še ba bosozoe' le'e seņon'. Chesye-ijwlaže' nacle yesone' cont nono yosočhi yososaca' ļe-

gaque' da' chesejle'e Criston' bnežjw cuine' neče chio' cate' gote' ļe'e yag cruzen'. ¹³ Beņe' ca' chesene' cheyaļa' soale seņon' zjachi' yičjgaque' ley dan' bzoj da' Moisésen' perw ne ļegaque' cbi chesone' can' žanņa'. Con chesaclaže' soale seņon' cont yesonxen cuingaque' lao beņe' Israel gualaž čheton'. ¹⁴ Ca nac neda', bitw gonxen cuina', san gonxena' Ūancho Jesucriston' dan' bnežjw cuine' gote' ļe'e yag cruzen' neče chio'. Bitwbi nonen len neda' še beņačhen' yesyēbede' neda', ļe neda' bich chebeda' da' ca' chesena beņačhen'. ¹⁵ Na' len chio' chejnilaže'cho Cristo Jesúsen' nežda' bibi nonen še zoacho seņw dan' že' circuncisión o še bi zoachon, perw zaca'chgua dan' ba bocob Diosen' yičjlažda'ochon'. ¹⁶ Lao Diosen' naccho dogualje beņe' Israel še ba chejnilaže'cho Jesucriston'. Na' chņaba' gaclen Diosen' yogo'le ba zoale chzenagle čhe' cont soa cuezchle binļo len xbab čhele, na' ļecze chņaba' yeyaše' yeži'ilaže'de' le'e.

¹⁷ Na' ņa'a chņabšca' bich gonļe güedenag len xtižan', ļe cuerp čhia' nga nsan' yiž čhe dan' bosočhi bososaca' beņe' neda' neče chyixjue'eda' xtiža' Ūancho Jesúsen'.

¹⁸ Beņe' migw, chņaba' soašca Ūancho Jesucriston' gaclenšque' le'e len xbab dan' yo'o yičjlažda'olen'. Da' na'zen' chzoja' ņa'a.

Efesios

Pablon' bzoje' beņe' chesejnilaže' Criston' ciuda Efeso

1 Neda' Pablo naca' postlw ĉhe Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže'le Criston'.

² Chņabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab ĉhelen'.

Diosen' chaclenchgüe' chio' da' ngode'cho txen len Criston'

³ Cheyala' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba beņe' chio' yogo' da' chyaže yichjlažda'ochon' cont šjayzoacho len le' yaban'. ⁴ Na' da' bnežjw cuin Criston' neĉhe chio', da'nan' Diosen' gwleje' chio' cate' biņa' xe yežlion' cont gaccho beņe' laždao' xilaže' na' bibi doļa' gapcho lagüen'.

⁵ Diosen' chacde' chio' cate' biņa' soacho. Da'nan' bsi'e xņezen' none' chio' ca xi'ine' con can' gwnalaže', na' da'nan' gwsele' Jesucriston' neĉhe chio'. ⁶ Cheyala' soaczcho gonxencho Diosen' catec nži'ilaže'de' chio', le gwsele' Jesucriston' ben' chacde' cont le' goclenchgüe' chio'. ⁷ Caten' got Criston', blalj xĉhene' neĉhe da' xiņjen' ben' chio' chejnilaže'chone'. Da'nan' Diosen' bezi'xene' xtoļa'chon', le nži'ilaže'chgüede' chio'. ⁸ Na' chonchgüe' güen len chio', chone' chio' doxen yeļa' sina' na' yeļa' chejni'i da' chyažejecho. ⁹ Na' bzejni'ide' chio' da' gwnalaže' da' nono gwneze cani' da' bžie' bia' gac. ¹⁰ Le Diosen' bžie' bia' žin ža cate' yogo' beņe' že' yaba len beņe' že' yežlion' yosozenague' ĉhe Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xņezen' none' chio' ca xi'ine' cont gac lo na'cho da' chaclaže' goņe' chio'. Na' Diosen' chone' cont chac dan' chsi'e xņezen' na' chone' da' neзде' naquen güen.

¹² Cani'te neto' beņe' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' beņe' zaca' juisyw. ¹³ Na' lecze ca' le'e, cate' benele diža' güen ĉhe Criston' dan' nac da' li na' gwnezele chaclaže' goņe' yeļa' mban ĉhecho toļi tocaņe, nach gwyejnilaže'lene'. Da'nan' lecze le'e ba nacle txen len Criston', na' Spiritw ĉhe Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'. ¹⁴ Lecze zoan lo' yichjlažda'ochon' cont nezecho žin ža gac lo na'cho yogo' da' ca' za' goņch Diosen' chio' naccho xi'ine' cate' goņe' cuerp cobe ĉhechon'.

Na' goņche' chio' da' ca' cont gonxenchone' da' naque' beņe' zaca' juisyw.

Pablon' gwņabe' gwnežjw Diosen' beņe' chesejnilaže'ne' yeļa' sina' ĉhe'

¹⁵ Da'nan' cate' benda' diža' can' chejnilaže'le Xancho Jesúsēn' na' can' chaquele yezica'chle beņe' chesejnilaže'ne', gwzolagua' ¹⁶ choa' yeļa' choxclen ĉhe Diosen' neĉhe le'e cate' choļ güiža' Diosen', na' bi chezi'laža' chona' ca'. ¹⁷ Dios ben' chonxen Xancho Jesucriston', ben' nac Xe' na' ben' nac beņe' zaca' juisyw, len' choļ güiža'. Na' chņabda'ne' cue' yeļa' sina' ĉhen' lo' yichjlažda'olen' na' gaclene' le'e cont gombia'chlēne'.

¹⁸ Na' chņaba' šo' be'ni' ĉhe' lo' yichjlažda'olen' cont nezele bi da' güenņa' zoacho lez gone' len chion' ba gwleje' naccho xi'ine'. Na' chņaba' gone' cont nezele catec güen juisyw nac yogo' da' ca' za' goņe' yesaquen ĉhe chio' chejnilaže'chone'. ¹⁹ Na' lecze chņaba' šo' be'ni' ĉhe' lo' yichjlažda'olen' cont nezele leca nape' yeļa' guac xen cont gaclene' chio' chejnilaže'chone'. Blo'e yeļa' guac xen juisyw ĉhe' ²⁰ cate' bosbane' Criston' ladjo beņe' guaten'. Na' gwde bosbane'ne' nach nzoe'ne' cuite' yaban' gan' chesenabi'e txen. ²¹ Le Criston' chnabia'che' ca note'teze angl. Chnabia'che' ca beņach, na' ca da' xigüe', na' ca bi da' chesejnilaže' beņe', na' ca note'tezechle chesenabia' na'a na' tiemp da' za' za'. ²² Diosen' ba gwlo'e lo na' Criston' yogo' beņe' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. ²³ Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac naĉho nya' Criston' neĉhe chio' chejnilaže'chone'. Na' Criston' zoe' chnabi'e doxen.

Diosen' chacde' chio'

2 Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple doļa' lao Diosen'. Da'nan' gocle ca beņe' guat da' bi bzenagle ĉhe'. ² Con gwzacze beņe' da' mal can' cheson yezica'chle beņe' bi chesejnilaže' Diosen', na' bzenagle ĉhe Satanás dan' chnabia' da' xigüe' ca' dan' zjanyeĉhjen beņachen'. Na' ža na'aža Satanásēn' ne' chnabian' yichjlaždao' beņe' bi chosozenag ĉhe Diosen'. ³ Na' ca'cze gwzoa yogo'cho, gwzoatezcho bencho bi da' mal can' gwnan ĉhecho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gw-

choglaon checho si'cho castigw che xtoła'chon' toli to-
cañe, can' gac len yezica'chle beñe' bi chosozenag che
Diosen'. ⁴ Goccho ca beñe' guat len yichjlažda'ochon'
da' gwzoacho bentezcho da' malen'. Na' šlac ñe' nac-
cho ca', Diosen' leca beyaše' beži'ilaže'de' chio' na' goc-
chgüede' chio'. Na' lagüe da' nži'ilaže' Diosen' chio',
da'n'an' bocobe' yichjlažda'ochon' cate' gwejnilaže'cho
Criston', na' beñe' yeļa' mban checho toli tocañe. ⁶ Na'
da' bocobe' yichjlažda'ochon', guac ñacho bene' len
chio' can' bene' len Cristo Jesús'en' cate' bosbane' le'
ladjo beñe' guat ca'. Na' da' naccho txen len Criston',
mbalaz bač zoacho chbezcho len le' ña'a can' soacho
cate' yežincho yaban' gan' chi'ena'. ⁷ Diosen' goclene'
chio' ca' cont tiemp'en' za' za' gwlo'echde' catequen'
nži'ilaže'chgüede' chio', le gonchgüe' zanch da' güen
len chio' naccho txen len Cristo Jesús'en'. ⁸ Da' nži'ilaže'
Diosen' chio', ba beñe' yeļa' mban checho toli tocañe
cate' gwejnilaže'cho Criston'. Con bene' to goclen,
gague ñeche bi da' güen da' ben chio'. ⁹ Le Diosen' bi
chaclaže' güe'cho diža' o gaquecho bñitlagüe'
xtoła'chon' ñeche bi da' güen da' ba bencho. ¹⁰ Diosen'
bene' chio' na' cate' gwejnilaže'cho Cristo Jesús'en' bo-
cobe' yichjlažda'ochon' cont soacho goncho da' güen.
Cate' biña' soacho, bsi'e xñezen cont soacho goncho
da' güen.

**Beñe' Israel na' beñe' bi zjanaque' beñe' Israel, Criston'
bozoe' legaque' binlo toe' yetoe'**

¹¹ Da'n'an' le gon xbab can' goc len le'e cana', le'e
goljle bi nacle beñe' Israel can' nac neto'. Canan' neto'
che' lježto': "Chio' zoacho señw da' že' circuncisión", na'
che'to' le'e: "Bi zoale señw da' že' circuncisión" (señw
da' chosozoa beñe' Israel gualaž cheto' ca' lo cuerp
che bi' byo dao' ca'). ¹² Na' le gon xbab can' gwzoale
cana', bi nombia'le Criston', bi nacle nación che
Diosen' ca neto' beñe' Israel nacto', na' Diosen' bi
gwne' gaclene' le'e can' gwne' gaclene' neto' beñe' Is-
rael. Bi gwzoale lez šjazyoale len Diosen' na' ñeca
gwejnilaže'le Diosen' lo yežlio nga. ¹³ Perw Criston'
bnežw cuine' gosote'ne' na' blalj xchene' ñeche chio'.
Na' ña'a da' chejnilaže'lene' ba nacle txen len Cristo
Jesús'en'. Na' ba nacle toze len neto' beñe' Israel,
la'czla' cana' gocle beñe' zito' len neto' na' len Diosen'.
¹⁴ Cana' neto' beñe' Israel na' le'e bi nacle beñe' Israel
bgue'e lježcho. Perw Criston' ba bene' cont naccho
toze na' ba bozoe' chio' binlo tocho yetocho. ¹⁵ Caten'
bnežw cuine' gote', bozoe' ca'ale ley da' bzoj da'
Moisés'en' len yogo' da' žan cheyaļa' goncho. Na'
bzoen' ca'ale cont bozoe' chio' chejnilaže'chone' binlo
tocho yetocho na' beyone' chio' to yež cobe che', chio'
naccho beñe' Israel lente chio' bi naccho beñe' Israel.
¹⁶ Da' bnežw cuine' gote' le'e yag cruzen', zoacho binlo
len Diosen', chio' naccho beñe' Israel na' chio' bi nac-
cho beñe' Israel, na' lecze naccho toze na' bich chgue'e
lježcho.

¹⁷ Na' Criston' caten' bide' yežlion' bedeye'e diža',
gwne' beñachen' guac yesenite' binlo len Diosen',
gwdixjue'eden' len le'e bi nacle beñe' Israel, le'e bi

nombia'le xtiža' Diosen' cana', na' lente neto' nacto'
beñe' Israel, neto' nombia'to' xtižen'. ¹⁸ Le chio' chejni-
laže'cho Criston', chio' naccho beñe' Israel na' len chio'
bi naccho beñe' Israel, toz Spiritw che Diosen' chacle-
nen chio' cont choe'lencho Diosen' diža'. ¹⁹ Da'n'an' le'e
bi nacle beñe' Israel bich nacle ca beñe' zito' len
Diosen'. San yogo' chio' chejnilaže'cho Criston' ba nac-
cho txen, le Diosen' ba none' chio' ca beñe' lo' yo'o
che'. ²⁰ Chio' chejnilaže'chone' zaca'lebcho ca to yo'o de
yej. Na' neto' postlw na' yezica'chle beñe' chesoe'lene'
le'e xtiža' Criston' zaca'lebto' ca lene yo'ona'. Na' Jesu-
criston' zaca'lebe' ca yej squin che yo'ona'. ²¹ Na' chio'
naccho txen len Criston' lecze zaca'lebcho ca yej da'
zjancua' zjangoden' gan' chac yo'o de yeja'. Zjangoden'
txen na' zej cha' yo'ona'. Ca'cze chio' naccho txen len
Xancho Criston' na' len lježcho, na' naccho ca to yo'o
gan' zoa Diosen'. ²² Le'e txen len neto' na' len note'teze
beñe' chesejnilaže' Criston' naccho ca to yo'o gan' zoa
Diosen', le zoa Spiritw chen' lo' yichjlažda'ochon'.

**Diosen' gwleje' postlw Pablon' cont jatixjue'ede' xtižen'
len beñe' bi zjanac beñe' Israel**

3 Na' da' naquen ca', neda' Pablo chol güiža'
Diosen' ñeche le'e. Dia' ližya nga da' chyixjue'eda'
xtiža' Cristo Jesús'en' len le'e bi nacle beñe' Israel.
² Chacda' ba ñezeljele nži'ilaže' Diosen' neda' na' bsi'e
xñezen' chzejni'ida' le'e xtižen'. ³ Ba bzejni'ide' neda'
da' nono gwñeze, can' ba bzoja' le'e to chope diža' le'e
cart nga. ⁴ Cate' gwlable cart nga gacbe'ele chejni'ida'
da' nono gwejni'i cana' che Criston'. ⁵ Cana' Spiritw
che Diosen' bi bzejni'in beñe' da' nono gwñeze che
Criston', perw ña'a ba bzejni'in neto' postlw che
Diosen', na' ba bzejni'in nochle neto' gwleje' cont
choe'to' xtižen', neto' nacto' lo' na' Diosen'. ⁶ Da' nga
bzejni'in neto', le'e bi nacle beñe' Israel txen len neto'
nacto' beñe' Israel si'cho da' gwna Diosen' gone' che
chio' naccho xi'ine' ñeche da' chejnilaže'cho Cristo
Jesús'en', na' txen naccho ca toze beñe', na' txenña'
chaclen Diosen' chio' can' gwne' gone'.

⁷ La'czla' bitec bi zaca', Diosen' gwleje' neda' len yeļa'
guac chen' cont chyixjue'eda' diža' güen chen'. ⁸ Chac-
da' ñe late'ze bibi zaca' ladjo yogo' beñe' ba gwlej
Diosen' zjanaque' lo' ne'e. Bia'cze nži'ilaže'de' neda' na'
gwleje' neda' cont chyixjue'eda' len beñe' bi zjanac
beñe' Israel catec da' zan da' güen juisyw gone' len yo-
go' chio' chejnilaže'cho Criston'. ⁹ Na' Diosen' gwlo'e lo'
na' chzejni'ida' yogo'lo' beñe' da' nžie' bia' gac. Gwzo-
laoten cate' gwxe yežlion', nono gwñeze da' nžie' bia'
gac, con toz Diosen' gwñezde', Dios ben' bene' yogo'lo'
beñe', yogo' beyixe' na' yogo' bichle da' de. ¹⁰ Le
Diosen' nžie' bia' beñe' ca' zjanac angl blao che' na' an-
gl gwnabia' zjanita' yaban' yesele'ede' can' chone' len
chio' chdop chžagcho chonxencho Jesucriston', cont
yesacbe'ede' nape' yeļa' sina' len yogo'lo' da' chone'.
¹¹ Chone' can' bžie' bia' gone' caten' biña' xe yežlion', le
cani'te bsi'e xñezen' seļe' Xancho Jesucriston'. ¹² Na'
naccho txen len Criston' da' chejnilaže'chone'. Da'n'an'
bi chžebcho Diosen', san chbecho ñezecho chac

choe'lenchwne' diža'. ¹³ Nachen' chņeyoeda' le'e bi gaczejlaže'le che da' chac chia' nga chy chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gaczejlaže'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' choj güiža' Xa Xancho Jesucriston'. ¹⁵ Le' bxie' yogo' diaža che chio' zoa-cho yežlio nga na' che beņe' že' yaba. ¹⁶ Diosen' naque' beņe' zaca' juisyw na' nape' la'zelagüe' yela' guac xen. Nachen' chņabda'ne' gone' ga soa Spiritw chen' lo' laž-da'olen' cont soa chačh laže'le len yela' guac chen. ¹⁷ Chņaba' soateze soa Criston' len le'e da' chejni-laže'lene'. Na' chņaba' soaczle gaquele Diosen' na' gague lježle do yichj do laže'le, ¹⁸ cont gac šejni'ile txen len yezica'chle beņe' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'. ¹⁹ Le' biņa' šejni'icho catec chaquechgüede' chio'. Na' lecze chņaba' zej gacchle beņe' güen doxen can' nac Diosen'.

²⁰ Na' Diosen' chac chone' yogo'loj, na' chone' da' gualch ca da' chņabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'. ²¹ Na' chio' chdop chžagcho chonxencho Criston', cheyaļa' gonxencho Diosen' na'a na' toli tocaņe da' gwseļe' Cristo Jesúsēn' neče chio'. Na' can' gonšaczcho.

Naccho toze len yogo' beņe' chesejnilaže' Criston'

4 Neda' dia' ližya nga da' chyixjue'eda' xtiža' Xancho Jesucriston'. Nachen' chņeyoeda' šejšcale gonle güen can' cheyaļa' goncho da' gwlej Diosen' chio' naccho xi'ine'. ² Na' chata'yoeda' le'e bi gonxen cuinle, san le gon xbab bitec bi zaca'le; na' gacle beņe' šagüe' na' gape yela' chxenlaže' len beņe' lježle na' le gacde' bite'teze yesone'. ³ Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczle gonle toze xbab len beņe' lježle, le Diosen' ba bozoe' le'e binlo tole yetole. ⁴ Yogo' chio' chejnilaže'cho Criston' naccho ca toz beņe', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoačo lez gone' güen len chio'. ⁵ Toz Jesucriston' naque' Xancho, na' toz can' chejni-laže'chone', na' toz ca zejen cate' chzoačo nis. ⁶ Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

⁷ Na' Criston' chaclene' to točo na' none' checho gwde gwdele da' gon to točo. ⁸ Da'nān' nyoj Xtiža' Diosen' žan:

Cate' beyepe' yaban' bebeje' beņe' zan lo' na' gwxiyen' cont beči'e legaque'.

Na' bi'e che beņačhen' da' gac gon to toe'.

⁹ Na' can' žan: "Beyepe' yaban'", zejen betje' golje' beņačh yežlio nga na' gwden' gote' bgaše'. ¹⁰ Na' ben' betj golje' beņačh, lecze len' beyepe' yaban' gan' zoa

Diosen', na' na'a zoe' chnabi'e doxen. ¹¹ Na' lecze len' none' che baļcho naccho postlw, na' none' che baļcho chyixjue'echo bi da' ba gwne', na' none' che yebaļcho chje'cho diža' güen chen' len beņe' biņa' yesenden', na' yebaļcho none' checho chgüia chņa'cho beņe' chesonxene' le' na' chsed chlo'echo legaque'. ¹² Can' chon Criston' cont chio' naccho lo' ne'en chac choncho xšinen'. Na' chonchon cont to to chio' naccho toze len le' zejech gacchcho can' chazlažen'. ¹³ Diosen' chaclaže' yogo'cho gaccho toze šejnilaže'cho Xi'inēn' do yichj do laže'cho na' gombia'chone' binlo. Chaclaže' gacyaņe'cho can' cheyaļa' gaccho, na' gaccho beņe' güen can' nac Criston'. ¹⁴ Na' še gaccho ca', bich šo'cho xbab ca che to bidao', šejcho qui šejcho ca'ale na'ochto to to yela' chejnilaže' da' chesaljaže' beņe' güenlaže' na' beņe' gwxiye' cont chesonlede' chio'. ¹⁵ Na' cheyaļa' güe'lencho beņe' diža' li, perw gaccho beņe' šagüe' len legaque' cont yesacbe'ede' le chaquechone'. Goncho ca' cont zejech gacchcho beņe' šagüe' beņe' güen can' nac Criston' ben' chnabi'e chio'. ¹⁶ Cate' to to cuen cuerp chechon' ngoden' na' noxe' lježen len bela' na' len žit na' len bečhj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyaļa'. Na' ca'cze chio' chejnilaže'cho Criston' ngode'cho txen cont to točo goncho da' non Diosen' checho goncho, na' yogo'cho txen zej gacchcho beņe' šagüe' na' zej gaquech lježcho.

Diosen' ba bocobe' yichjlaždao' chio' chejnilaže'chone'

¹⁷ Da' nga chnia' le'e, Xancho Criston' none' mandaw gwzejni'idan' le'e: bi cheyaļa' soačo goncho xbab ca cheson beņe' bi chesejnilaže' Diosen', le bibi zacan'. ¹⁸ Nčoļ yichjlažda'ogaque'. Na' bi zjanape' yela' mban toli tocaņe ca da' non Diosen' chio', neca chesejni'ide' che Diosen', le zjanaque' beņe' güedenag len le'. ¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. ²⁰ Le'e ba nsedle can' ža Criston' na' nezele bi cheyaļa' goncho ca', ²¹ le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li čhen'. ²² Nezele bich cheyaļa' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwze-laže' chechon' ne' chonlen chio' cont bentezcho da' malen'. ²³ San na'a cheyaļa' gwša'cho xbab da' choncho lo' yichjlažda'ochon'. ²⁴ Cheyaļa' güe'cho latje yocobech Diosen' yichjlažda'ochon' cont soačo goncho da' zej to li can' chon le', na' gaccho beņe' laždao' xilaže' can' chazlaže' le'.

²⁵ Da'nān' bich gonlaže'cho, san güe'len lježcho diža' li, le ngode' lježcho naccho ca toze beņe'.

²⁶ Na' cate' chža'acho bi cheyaļa' goncho da' xinj. Cheyaļa' yob yeyacxenlaže'cho na' bich ža'acho do ža. ²⁷ Na' bi güe'cho latje cont Satanās dan' chnabia' da' xigüe' ca' nābian' xbab chechon' cont goncho da' xinj.

²⁸ Na' nole še ba yolaole chbanle, bich cheyaļa' cuanle. Cheyaļa' gonle žin da' nac güen len ni'a na'le cont gata' da' gwnežjwle beņe' chyažj chchine.

²⁹ Na' bi cheyała' güe'cho bite'teze diža' zban, san güe'cho diža' šagüe' len yogo'lo' beñe', con can' chyaž-je to toe' cont gaclenen le'. Goncho ca' cont xtiža'chon' gaquen da' zaca' gwzenag beñe'. ³⁰ Na' bi goncho cont yeyaše'laže' Spiritw çe Diosen', le Diosen' ba bene' ga zoan lo' yichjlažda'ochon' cont ñezecho naccho xi'ine' na' ñezecho žin ža yedyexi'e chio'.

³¹ Cheyała' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi ñecho çe beñe', ñeca gaccho beñe' xi'a. ³² San cheyała' gaccho beñe' šagüe' na' yeyaše' lježcho tocho yetocho. Na' cheyała' yezi'xen çe lježcho bite'tez da' chesonde' chio' con can' bezi'xen Diosen' çechecho cate' gwejnilaže'cho Criston'.

Cheyała' goncho can' chon Diosen'

5 Nachen' cheyała' soacho goncho can' chon Diosen', le naccho xi'ine' na' chacde' chio'.
² Cheyała' soacho gague lježcho ca Criston' chacde' chio' na' bnežjw cuine' gote' ñeče chio'. Na' chebe Diosen' da' bene' ca', can' chebe beñe' to da' chl'a' zix.
³ Da' naccho lo' na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol çechecho o beñe' byo bi nac beñe' çechecho o goncho bichle da' nac da' yela' zto' len cuerp çechon'. Na' bi cheyała' selaže'cho da' de çe beñe'. ⁴ Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxcen çe Diosen'. ⁵ Nita' beñe' byo ben' chesata'lene' no'ole bi nac xo'olgaque' na' nita' no'ole ben' chesata'lene' beñe' byo bi nac beñe' çeagaque', na' nita' beñe' chesyebede' dan' naquen da' yela' zto'; na' nita' beñe' chesezelaže' bi da' de çe beñe'. Ba ñezeczele beñe' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac beñe' chesezelaže' bi de çe beñe', toz ca malen' chesone' len da' cheson beñe' chesejnilaže' l' gúa'a' l'sacan'.) ⁶ Bi güe'le latje no siye' le'e len diža' güenlaže'. Diosen' chnežjue' castigw toli tocañe çe beñe' ca' bi chosozenag çe', beñe' cheson da' mal ca' ba gwnia'. ⁷ Da'n'an' bi cheyała' gaccho txen len beñe' cheson ca'.
⁸ Cana' nchol' yichjlažda'ochon', perw ña'a ba yo'on be'ni' çe Xancho Criston', na' cheyała' soacho goncho da' güen can' chaclaže' Diosen' gon chio' nom-bia'chone'. ⁹ Na' še ba gwo'o be'ni' çe Criston' lo' yichjlažda'ochon', nach gaccho beñe' šagüe' na' goncho da' güen da' zej to l'icha. ¹⁰ Cheyała' gwsedcho cont ñezecho can' chaclaže' Xancho Criston' goncho. ¹¹ Bi cheyała' goncho txen len da' malen' cheson beñe' ca' zjančo' yichjlažda'ogaque', le chesone' da' bibi zaca'. San cheyała' gwzejni'icho legaque' da' malen' chesone', ¹² le naquen da' cheto'echo güe'cho diža' çe da' ca' chesone' do багаše'ze. ¹³ Na' cate' be'ni' çe Criston' šon' lo' yichjlaždao' beñe', nach yesacbe'ede' çe bite'teze da' chesone' še naquen da' mal, le be'ni' chen' chzejni'in beñachen' çe xbab çeagaque' na' bi

da' chesone' še naquen güen o še naquen mal.

¹⁴ Da'n'an' nyojen quinga çe note'teze beñe' chon da' malen':

Naco' ca beñe' chtas na' ca beñe' guat da' bi chzenago' çe Diosen'.

Bzenag çe' cont Criston' cue'e be'ni' lo' yichjlažda'oguo'.

¹⁵ Nachen' cheyała' soacho ña'cho dan' choncho.

Cheyała' goncho da' naquen da' sina', gague goncho ca beñe' bi chejni'i. ¹⁶ Na' yogo' ža cheyała' goncho can' chazlaže' Diosen', le ña'a že'chgua beñe' chesone' da' malen'. ¹⁷ Bi goncho ca beñe' bibi xbab nye'. Cheyała' šejni'icho can' chaclaže' Diosen' goncho cont gonchon. ¹⁸ Na' bi cheyała' gaccho beñe' borrašw, le beñe' chesozođe' chosožiayi' cuine'. San chio' cheyała' güe'cho latje soachgua Spiritw çe Diosen' lo' lažda'ochon' ñabi-an' chio' len da' choncho. ¹⁹ Cheyała' gwšajlen lježcho no salmos na' gojlen lježcho no himnos o bichle da' ža Spiritw çe Diosen' gojcho. Na' cheyała' ñechon na' gojchon do yichj do laže'cho gonxenčo Xancho Jesucriston'. ²⁰ Yogo' ni'a cheyała' güe'cho yela' choxcen çe Xacho Diosen' çe yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxcen çe'.

Can' cheyała' soalen beñe' lo' yo'o çechon'

²¹ Da' chapcho Diosen' bala'añ cheyała' gwzexjw yichjcho gwzenagcho tocho yetocho.

²² Na' le'e no'ole, le'e nšagna'le, to tole cheyała' gwzenagle çe beñe' çehe, le chzenagle çe Xancho Criston' cate' chzenagle çeagaque'. ²³ Diosen' nzoe' beñe' çehe cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac ñacho naccho cuerp çe Criston', na' le' non'e' chio' yela' mban toli tocañe. ²⁴ Na' ca chio' chonxencho Criston' cheyała' gwzenagcho çe', ca'czen' le'e no'ole le'e nšagna'le, to tole cheyała' gwzenagle çe beñe' çehe yogo' bin' chese' le'e.

²⁵ Na' le'e beñe' byo le'e nšagna'le, to tole cheyała' gague no'ol çhelen' con can' chaque Criston' chio' chonxenchwne' na' bnežjw cuine' ñeče chio' cate' gosote'ne'. ²⁶ Na' cont gwlo'e chio' lo' na' Diosen', bey-one' lažda'ochon' xilaže' cate' gwejle'cho xtižen'. ²⁷ Na' bene' ca' cont yebede' chio' cate' yežincho lagüen', bibi xto'la'cho gata' na' ñe bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. ²⁸ Na' con can' nži'ilaže' Criston' chio', can' cheyała' ži'ilaže' to to beñe' byo no'ol çhen'. Le'e beñe' byo, to tole cheyała' ži'ile no'ol çhelen' can' nži'ile cuerp çhelen', le nži'icze cuinle cate' chonle ca'. ²⁹ Nono zoa no chgue'e cuerp çe', san yogo'cho nži'icho cuerp çechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'. ³⁰ Na' chone' ca' da' naccho ca to cuen güeje cuerp çhen', ca žit da' yo'e na' ca xpele'. ³¹ Na' Xtiža' Diosen' nyojen žan: "Da'n'an' beñe' byo le'e len xaxñe'e na' si'e no'olen' gwšagna'lene' le' na' yesaque' toze." ³² Diža' quinga ba bzoja' naquen to da' nono gwejni'i cani', perw chnia'

naquen to da' chzejni'in chio' chdop chžagcho chonxencho Criston' cont nezecho can' cheyała' soacho len le'. ³³ Na' lecze ca' le'e beņe' byo le'e nšagna'le, to tole cheyała' gague no'ol chele can' chaque cuinle, na' le'e no'ole nšagna'le, to tole cheyała' gagle bala'aņ beņe' chele.

6 Na' le'e bidao', le gwzenag che xaxna'le, le can' cheyała' gon chio' naccho txen len Xancho Criston'. ² Cate' Diosen' bnežjue' xoxta'oto' ca' ley čhen', gwne': "Le gap bala'aņ xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' čhen, gwne': "Le gap bala'aņ xaxna'le ³ cont gac güen chele na' cont banle sša lo yezlio nga."

⁴ Na' le'e nita' xi'ınle, le yosgol le yosča'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

⁵ Na' le'e mos, le gwzenag che xan žin čhelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle čhegague'.

⁶ Le gwzenag čhegague' do yichj do laže'le, gague cate'zen' chesene'e can' chonlen', le nacle beņe' güen xšin Criston', na' can' chaclaže' Diosen' goncho. ⁷ Na' cheyała' güe'laže'cho goncho žin che beņe' cont yebe Xancho Criston' chio', gague cont yebe beņe' nac xan žin na'ze. ⁸ Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

⁹ Na' le'e nacle beņe' xan žin, le gon güen len beņe' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson beņe' güen žin čhelen', na' toz can' chone' len yogo'lo beņe' note'teze zjanaque'.

Can' goncho cont Satanásen' bi gonen chio' gan

¹⁰ Nachen' beņe' migw, da' naccho txen len Xancho Criston', cheyała' soačhačcho šejnilaže'chone', le nape' yela' guac xen cont chaclene' chio'. ¹¹ Cheyała' gon cuincho gual doxen can' chaclaže' Diosen' goncho, cont soačhačcho bi šejle'cho che Satanás dan' chn-abia' da' xigüe' ca' cate' chyiljwlažen' siyen' chio'. ¹² Le gague beņe' nac bela' chenna' chdiilencho, san chdiilencho da' xigüe' ca', da' ca' besyeyaquen da' mal, na' bichle da' chesenabia' beņe' že' yežlio nga beņe' nchoj yichjlažda'ogaque' len da' malen'. Chdiilencho yogo'loj spiritw mal ca' gate'teze chesašen. ¹³ Da'nan' cheyała' gon cuincho gual doxen can' chaclaže' Diosen', cont

Satanásen' bi soeczen chio' ža cate' tiłlenen chio'. Na' cate' ba bencho can' chazlaže' Diosen', nach cheyała' soačhačcho len le'. ¹⁴ Na' cont soačhačcho bi siye' Satanásen' chio', cheyała' güe'cho diža' li yogo' ni'a. Na' še goncho ca', gaclenen chio' ca da' chčhej soldadon' cho'a li'e. Na' cheyała' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya chcue'ejen cho'alčo'e. ¹⁵ Na' cheyała' soacho probnidw güe'lencho beņe' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon beņe', gaclenen chio' can' chaclen xel soldadon' le'. ¹⁶ Na' da' zejechen ca' bichle da' goncho, cheyała' soačhačcho šejnilaže'cho Diosen'. Na' še soačhačcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'niņen zja'aquen gan' zien', na' chcue'ejen le' len da' ca' zja'ac yeseyidjon cuerp čhen'. ¹⁷ Na' cheyała' yosa'laže'cho Criston' ba beņe' yela' mban čhecho toli tocaņe, cont gaclenen chio' ca chaclen lapa' de ya da' chčhin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab čhen cont gaquen len le'e ca to spada da' chčhin soldadon'. ¹⁸ Na' do tiemp cheyała' yoł güižcho Diosen' nabcho yogo' da' chzejni'i Spiritw čhen' chio'. Na' cheyała' gaccho beņe' banlaže' na' yoł güižchone' sin cbi yeche'echo, nabcho gaclene' yogo' beņe' ba gwleje' cont zjanaque' lo ne'e. ¹⁹ Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' beņe' diža' güen che Criston' da' nono gwņeze cani'. ²⁰ Le Diosen' gwsele' neda' ca gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

Pablon' chone' čhač laže'gague'

²¹ Chsel'a' beņe' migw čhecho Tíquico güe'e diža' doxen can' chac cont nezele can' chac čhia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyała' gone'. ²² Nachen' chsel'a'ne' cont nezele can' chac čheto' na' cont gone' čhač laže'le.

²³ Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuzle binlo len yichjlažda'olen', na' lecze yesonšque' cont yogo'le gague lježle na' soačhačle šejnilaže'lene'.

²⁴ Soašcacze Diosen' gaclene' yogo' beņe' chesacde' Xancho Jesucriston' sin cbi yesebeze'. Da' na'zen' chzoja'.

Filipenses

Pablo bzoje' carten' šlac die' ližya

1 Neda' Pablo chseļa' cart nga txen len beņe' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsén'. Na' le'e nchojle chgüia chņa'le beņe' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nĩa' le'e len cart nga. ² Chņabš-ca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda'olen'.

Pablo chņabde' Diosen' gaclene' beņe' ca' chesejnilaže' Criston' Filipos

³ Yogo' nĩa' cate' chjayze'eda' le'e, choa' yelā' choxclen che Diosen' ba naccho txen chejnilaže'chone'. ⁴ Na' yogo' nĩa' cate' choj güiža' Diosen', chbeda' chņaba' gaclene' le'e. ⁵ Na' choa' yelā' choxclen chen' naccho txen chejle'cho diža' güen che Jesucriston', gwzolaoten cate' za' gwyejnilaže'lnē'. ⁶ Na' da' nga nezdā', Diosen' gwzolaagüe' chone' to da' güen lo' yichjlažda'olen' canā', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. ⁷ Da' cheyalā'cze gona' xbab chele ca', le chacchgüeda' le'e. Na' nezdā' Diosen' ba goclene' le'e can' ba goclene' neda' šlac dia' ližya nga, na' šlac ba gwđixjue'eda' diža' güen che Criston' len beņe' bi gosejle'e chen, bzejni'ida' legaque' naquen diža' li. ⁸ Diosen' nezdē' chacchgüeda' yogo'le, le Cristo Jesúsén' chone' cont chacda' le'e. ⁹ Na' chņabda' Diosen' gonšque' cont gaquechlnē' na' gaqueche lježle na' lecze šejni'ichle yogo'lo' da' chaclaže' Diosen' šejni'ile na' gacbe'ele bi da' naquech güen gonle cont gaclen lježle. ¹⁰ Chņaba' da' ca' cont gacbe'ele bin' chazlaže' Diosen' gonle, na' lecze cont soacze do laže'le na' bibi doļa' gaple cate' žin ža yid Criston' da' yoble. ¹¹ Nach gaclen Jesucriston' le'e gonchgualē da' nac güen, na' Diosen' si'e yelā' bala'aņ na' yezica'chle beņe' yesonxene' Diosen' can' chonlen'.

Pablon' chacde' Criston' do yichj do laže'

¹² Beņe' migw, che'nda' nezele yogo' dan' ba goc chia' ba gosaclenen cont beņe' zanch gosende' diža' güen che Criston'. ¹³ Le yogo'lo' soldadw gop ca' cheson žin che beņe' gwnabia' nga, na' yezica'chle beņe' že' do nga zjanezde' dia' ližya neče choa' xtiža' Criston'. ¹⁴ Na' beņe' zan beņe' lježcho že' nga lecze ba

chesejnilaže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'nān' le-gaque' lecze ba cheseyaxjchde' cheso'e xtiža' Diosen' sin ca chesežebe'.

¹⁵ Da' li bale' cheseyixjue'ede' xtiža' Criston' da' chesacxi'ede' neda' na' da' chesacclaže' yesacche' blaoch ca neda', perw yezica'chle beņe' ca' cheseyixjue'eden' do laže'. ¹⁶ Na' beņe' ca' to cuen cheseyixjue'ede' xtiža' Criston' cont yesacxen cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'. ¹⁷ Na' beņe' ca' yezi-ca'chle cheseyixjue'eden' lagüe chesacde' Criston' na' chesacde' neda', le zjanezde' neda' dia' ližya nga neče chzejni'ida' beņe' bi chesejle'e diža' güen che Criston', chape'gaca'ne' naquen da' li. ¹⁸ Perw bibi nonen len neda' še cheseyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dehcze da' chebeda', ¹⁹ le nezdā' yechoja' güen len da' quinga chac chia' lagüe dan' chņable gaclen Diosen' neda' na' lagüe dan' zoa Spiritw che Jesucriston' len neda' chonen chačh laža'. ²⁰ Da'nān' zoa' lez gaclen Diosen' neda' gua' xtiža' Criston' sin cbi žeba'. Na' la'czlā' še soacha' o la'czlā' še gata', chaclaža' si' Criston' yelā' bala'aņ na'a len da' gona' na' len da' gac chia' con can' ba gwxi'e yelā' bala'aņ. ²¹ Chzelaža' gacxen Criston' len bite'tez da' chona' šlac ne' mbana', na' lecze nezdā' soa' mbalazchgua cate' ba gota', le šjayzoalēna'ne'. ²² Perw še soacha' yežlio nga na' goncha' xšin Xancho Criston' cont šanch beņe' yesejnilaže'ne', o še gata', bi nezdā' non' nac güench. ²³ Naquen zdebe nĩa' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. ²⁴ Perw lecze chona' xbab le'e chyažjele soacha' banča'. ²⁵ Na' da' chacbe'eda' chyažjele soacha', nezdā' soacha' len le'e cont gaclēna' soachle mbalaz da' chejnilaže'le Criston' na' soačhačhle šejnilaže'lnē'. ²⁶ Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsén' cont bechoja' ližyan'.

²⁷ Na' bite'teze gac, le soa le gon da' güen can' cheyalā' gon chio' ba bzenagcho che diža' güen che Criston'. Le gon ca' cont še yedeņa'a le'e o še bi yedeņa'a le'e, con che'nda' yenda' rson chele zoačhačhle len toze xbab, chonle txen len beņe' lježle, na' chonle con ca zelao chzaque'le cont yezica'chle beņe' yosozenague' xtiža' Criston' da' ba chejnilaže'le, ²⁸ nēca žeble še bi yesone beņe' le'e neče chesegue'ede' le'e. Še bi žeble da' yesonde' le'e, gonen cont yesacbe'ede' ba zoa yesebiaye'e toli tocaņe; lecze

gonen cont yesacbe'ede' Diosen' gone' cont šjayzoale len le'. Yogo' da' ca' zjanaquen da' gon Diosen'. ²⁹ Na' Diosen' ba bsi'e xņezen' gacxen Criston', gague lagüe da' chejnilaže'lene' na'zen', san lecze gacxene' da' yosoči yososaca' beņe' le'e neče chejnilaže'lene'. ³⁰ Le'e len neda', toz can' chosoči chososaca' beņe' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' ņa'a.

Criston' chacxene' da' bzande' yela' zaca' che' cont bide' golje' beņach

2 Nezdā' zoale mbalaz da' chejnilaže'le Criston', nezdā' chaclaže'le gonle da' güen lagüe dan' chaque Criston' le'e, nezdā' zoa Spiritw çhen' len le'e, na' nezdā' chaque lježle na' cheyaše'laže'lene' cate' bi da' chesac che'. ² Da'nān' chņeyoeda' le'e, le gon cont yebechgüeda' nezdā' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. ³ Bibi cheyała' goncho cont gac güen che cuincho na' bibi goncho cont gacxen cuincho, san cheyała' gwzejxwlaže'cho na' goncho xbab zaca'ch beņe' lježcho clēl ca chio'. ⁴ Ne tocho bi cheyała' cue' yichjcho che cuincho, san cheyała' cue' yichjcho che dan' gaclenen beņe' lježcho ca'.

⁵ Cheyała' goncho xbab ca xbab da' ben Cristo Jesúsen'. ⁶ Le la'czla' naque' Dios, bzande' yela' chn- abia' che' na' yela' bala'añ xen che' dan' nape' lagüe da' naque' toz len Xe' Diosen' cont bide' golje' beņach. ⁷ Bzoe' to šla'ale yogo' da' zaca' dan' gota' che', na' ben cuine' beņe' güen xšin Diosen' cate' golje' beņach. ⁸ Na' ba naque' beņachen' bzexjwlaže' cont bene' con can' gwna Xe' Diosen'. Bzenague' che' cont bnežjw cuine' gosote'ne' le'e yag cruz ca chesote' beņe' malchgua. ⁹ Da'nān' Diosen' benxengüe' le' na' bsi'e xņezen' cont Jesucriston' naque' Xan beņach, angl, da' xigüe' na' yogo' bichle da' de, na' cont Jesucriston' chn- abia'che' ca note'tezechle. ¹⁰ Na' žin ža cate' yogo'loj beņach na' yogo'loj angl ca' yosozoa xibgaque' lao Jesucriston', beņe' že' yaba, yežlion' na' gate'tezechle. Na' lecze ca' yeson da' xigüe' ca'. ¹¹ Yogo'loj beņe' yo'o biš grasyw yosozexjwiyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

Beņe' chesejnilaže' Criston' zjazaca'lebde' ca be'ni'

¹² Da'nān' beņe' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' ņa'a bi zoa' len le'e. To tole le gon cont nacbia' Diosen' ba beņe' le'e yela' mban toli tocaņe, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soečo da' malen' še ba chzenagčo çhen. ¹³ Na' Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin cbi gacyožlenle', neca žeše'le che'. ¹⁵ Le gon ca' cont yesacbe'e beņe'

chonle can' chazlaže' Diosen' sin cbi doļa' gaple. Bibi da' xinj gonle. Bi gonle ca cheson beņe' laždao' mal ben' chesonchgua clele. Nach gacle ca to da' chseni' len yezica'chle beņe' že' yežlio nga, ¹⁶ güe'lenle le- gague' xtiža' Criston' da' nsa' yela' mban toli tocaņe. Še gonle ca', nach cate' yid Criston' da' yoble, yebechgüe- da' can' benlen' na' nezdā' dan' bžaglagua' bena' xšin Diosen' gan' zoalen', gague bendadzan'ņa'. ¹⁷ Le'e chzane cuinle chonle xšin Diosen' lagüe dan' chejni- laže'lene', na' da'nān' zaca'leble ca to beyixe' be ba gosot beņe' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'nān' zaca'leba' ca to vino da' chosolalje beņe' lao Diosen' cate' chesonxene'ne'. ¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesúsen' latje yob seļa' Timo- teo gan' zoalen', le yebechgüeda' yenda' can' ba chonlen'. ²⁰ Le nono nochle zoa beņe' seļa' beņe' chi'chgua yichje' gac güen chele can' chi' yichj Timo- teon'. ²¹ Yezica'chle beņe' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac. ²² Perw nezeczele ca zoacze Timoteon' chone' da' zaca', na' nezele can' ba goclene' neda' cont gwduxue'eda' xtiža' Diosen' zan yež. Ca beņe' chaque xe' zoe' chaclene'ne' len xšinen', can' zoa Timoteon' chaclene' neda'. ²³ Da'nān' zoa' lez guac seļa'ne' gan' zoalen' cate' la' neztēda' nac gac chia' nga, ²⁴ na' seļa'ne' la'czla' chejli'a gon Xancho Criston' cont lecze neda' yob yedēna'a le'e.

²⁵ Na' lecze chacda' chonen byen yesela' beņe' ljež- cho Epafrodito gan' zoalen', ben' gwseļa'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxcaca'to' tx- en. ²⁶ Che'nchgüede' yele'ede' le'e, na' leca da' chacde' gwnezele gocšende'. ²⁷ Na' da' li gocšenchgüede', yelate'ze ca gote', perw Diosen' beyaše'de' le', na' bi ņacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. ²⁸ Da'nān' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le che'. ²⁹ Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle beņe' chon can' ba benen'. ³⁰ Le yelate'ze ca gote' da' bzane cuine' goc- lene' neda' nga len xšin Criston', can' goncze le'e šaca' zoale nga len neda'.

Soa cuezcho goncho can' chazlaže' Diosen'

3 Na' ņa'a beņe' migw, cheyała' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab çhen. ² Le gwsaca' cont bi gwzenagle che beņe' ca' chesene' cheyała' soale señw dan' že' circuncisión da'

yeseçhogue' lo cuerp çhelen', le zjanaque' beñe' zban na' chesyela'ide' chesone' da' mal. ³ Le de to señw çhecho cont ñezecho naccho xi'ñ Dios. Señwna' naquen da' ba beñ Diosen' chio' Spiritw çhen' cont chaclenen chio' chonxenchone'. Chebechgüecho chejnilaže'cho Cristo Jesúsén', na' bi zoacho lez gata' bichle da' gacle-nen chio' lao Diosen', ca no señw da' zoa lo cuerp çhech'on' o bichle da' goncho. ⁴ De da' zan da' guac gona' xbab gaclenen neda' lao Diosen' šaca' chacda' yebe Diosen' neda' ñeçhe da' ba bena' o nac naca'. Nono zoa no ñacho ba benche' da' zan da' yebe Diosen' ca neda'. ⁵ Le naca' beñe' Israel na' golja' lo diaža çhe da' Benjamín, na' bosozoe' neda' señw çhe circuncisión to xmanzda'. Na' goljlana' diža' hebreo da' nac xaxña'a beñe' chesaque' diža' hebreo. Na' bsedyaña' ley dan' bzoj da' Moisésén' con can' chosozejni'i beñe' fariseo ca' len. ⁶ Na' leca gwche' yichja' diža' gole çhe beñe' Is-rael gualaž çhia'. Da'nana' bçhi bsaca' beñe' ca' chesejnilaže' Criston'. Na' con ga zelao gwzoeda' bzenaga' çhe yogo' dan' ža ley çheton' cheyała' gonto' o bi cheyała' gonto'. ⁷ Na' cana' bena' xbab yogo' da' ca' yesaclenen neda' cont yebe Diosen' neda', perw ña'a ba chacbe'eda' bi yesaclenen. Ba bchojyichja' da' ca' cate' gwyejnilaža' Criston', le gocbe'eda' bi yesaclenen neda' lao Diosen'. ⁸ Na' ña'a da' nombi'a Xana' Cristo Jesúsén' naquen da' zaca'chgua len neda'. Bibi zaca' yogo' da' ca' godca' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. ⁹ Le zelaže'chgua' gaca' toz len Criston', na' zelaža' ña Diosen' naca' beñe' güen len le'. Na' ñezda' ñe' naca' beñe' güen len le' da' chejnilaža' Criston', gague lagüe da' chona' bi da' ža ley dan' bzoj Moisésén' cheyała' goncho. Le con beñe' chesejnilaže' Criston' none' legaque' ca beñe' güen. ¹⁰ Chacclaža' gombia'cha' Criston' na' gombi'a yela' guac çhe' dan' nape' lagüe bebane' ladjo beñe' guaten', na' chzanlaže' cuina' saca'zi'a can' gwdi gwxaca' le'. Na' ca Criston' gote' ñeçhe xtołan', chacclaža' gaca' ca to beñe' guat len da' malen', bich gonan'. ¹¹ Zoa' chbeza' ca', le cheyiljwlaža' nacle gona' cont yeçhis yosban Diosen' neda' ladjo beñe' guat ca' cate' ba gota'.

Pablo chaclaže' gac yichjlažda'ogüe' can' nac yichjlaždao' Criston'

¹² Bi ñia' baçh nac yichjlažda'ogua' can' cheyała' gaquen, le biña' gaquen can' nac yichjlaždao' Cristo Jesúsén'. Perw chona' con ga zelao saqueda' cont gaguech yichjlažda'ogua' can' nac çhe le', le ba gwleje' neda' naca' xi'ine'. ¹³ Beñe' migw, ñezda' biña' gac yichjlažda'ogua' can' cheyała' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gac. ¹⁴ Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsén' lagüe da' chejnilaža'ne'.

¹⁵ Na' yogo'cho še ba zej chaccho can' chaclaže' Diosen' gaccho, cheyała' goncho xbabén' ca', na' še yo'ocho bichle xbab yoble, Diosen' gwzejni'iden' chio'.

¹⁶ Perw na' cheyała' soaczcho goncho can' ba bzejni'i Diosen' chio'.

¹⁷ Beñe' migw, le gon can' chona' neda', na' le ña' can' cheson yezica'chle beñe' cheson can' ba bzejni'ida' le'e, cont gonle can' chesonen'. ¹⁸ Da' yoble žia' can' ba gwnia' zan las, can' zjanita' beñe' zan, nacbina' chesegue'ede' Criston' ben' bnežjw cuine' gote' le'e yag cruzen' ñeçhe xtołachon'. Na' chbeža' da' chesone' ca'. ¹⁹ Žin ža yesebiayi' beñe' ca' toli tocañe, le chesyebchde' chese'ej chesagüe' clcl ca yesonxene' Diosen'. Chesaclaže' cheso'e diža' çhe bi da' yela' zto' da' chesone', na' zjachi' yichje' tlaoze da' chac yežlio nga.

²⁰ Perw chio', bich choncho xbab nac lažcho yežlion, le ñezecho naquen gan' zoa Xancho Jesucriston' ben' non chio' yela' mban toli tocañe, na' chbezcho batcan' yide' da' yoble. ²¹ Na' caten' yide' da' yoble, gone' cont cuerp çhecho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp çhe le'. Gone' ca', le nape' yela' guac ñeçhe gone' cont yogo'loł da' zjade yosozenaquen çhe'.

Cheyała' soacho mbalaz da' chejnilaže'cho Criston'

4 Na' ña'a beñe' migw, chacda' le'e na' che'nchgüeda' le'e lježcho da' yoble. Chbechgüeda' da' chejni-laže'le Criston', na' zoa' mbalaz ñeçhe le'e. Le'e beñe' chacda', le soaçaçh šejnilaže'le Xancho Jesucriston'.

² Na' chñeyoeda' le' Evodia, na' lecze ca' le' Síntique, le soašca binlo na' le gac txen tole yetole da' chejni-laže'le Xanchon'. ³ Na' ca nac le' beñe' lježa', len' beno' xšin Diosen' do yichj do lažo' txen len neda' cana', na' chñeyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle beñe' lježcho ca', na' zjanyoj la yogo' beñe' ca' le'e libr çhe Diosen' gan' zjanyoj la beñe' ba zjanape' yela' mban toli tocañe.

⁴ Le yebe yogo'te ža da' chejnilaže'le Xancho Jesucriston'. Da' yoble žia', le yebe. ⁵ Le gon cont yogo'loł beñe' yesenezde' nacle beñe' šagüe', le ba zoa yid Xanchon' da' yoble.

⁶ Bi gacle tole bite'teze da' chac çhele, san le yoł güiž Diosen', ñable gaclene' le'e bite'teze da' chac, na' le güe'e yela' choçclen cate' bi da' ñabelene'. ⁷ Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesúsén', cont bi gacle tole. Na' cate' le' ba chone' cont zoa chbezcho binlo len xbab çhechon', ñeca gacbe'echo bixçhen' zoachguacho binlo.

Cheyała' cue' yichjcho çhe da' zjanac güen

⁸ Na' da' la'zelagüe dan' chaclaža' ñeyoeda' le'e beñe' migw, cue' yichjle çhe diža' li, çhe dan' nac da' zaque', çhe dan' zej to liçha, çhe dan' bibi da' mal nsa', çhe dan' naquen binlo, na' çhe da' zaca' yebecho. Bite'teze

da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsd blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

Can' gosaclen beņe' Filipos ca' Pablon'

¹⁰ Chbechgüeda' lao Xancho Cristo Jesús en' da' ba chi' yichjle chaclenle neda' da' yoble. Nežda' gwzoale chonle xbab chia', perw bi beņen gaclenle neda'. ¹¹ Na' žia' da' qui gague neče byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. ¹² Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. ¹³ Chac chona' bite'teze da' cheyała' gona', le zoa Criston' len neda' chac-lene'nda'. ¹⁴ Perw beņle güen gwseła'le da' goclenen neda' cont naccho txen len dan' chy chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, beņle txen len neda' cate' beza' distritw Macedonian', gwseła'le da'

byažjda', na' nono nochle beņe' ca' chesedop chesežag chesonxene' Criston' yež yoble goson ca'. ¹⁶ Le cate' ne' zoa' Tesalónica gwseła'le da' byažjda' zan ni'a. ¹⁷ Perw gague chzelaža' bi da' gonle neda', san chzelaža' soacze gonle güen cont yebe Diosen' le'e. ¹⁸ Ba beņle doxen da' cheyała' gonle na' da' zča'och ca'te' da' cheyała' gonle. Ba decze da' zča'o chia' na'a. Bibi chyažjda', le ba beņ Epafrodito da' gwseła'le chia'. Na' da' gwseła'le zaca'leben ca to yal da' chla' zix da' chzey bxozen' lao Diosen', le Diosen' chebede' can' beņen'. ¹⁹ Na' Dios chia' nan' goncze' yogo'te bi da' chyažjele lagüe chejni-laže'le Cristo Jesús en', le yogo' da' de yo'on lo ne'e. ²⁰ Cheyała' gonxencho Xancho Diosen' toli tocaņe. Can' gonšcaczcho.

Pablon' zelagüe' bzede' legaque' diža'

²¹ Le gwguap tiox yogo'lo! beņe' Filipos ca' yo'o lo na' Diosen' da' chesejni-laže' Jesucriston'. Beņe' lježcho ca' nita' nga len neda' chguapto' le'e tiox. ²² Na' lecze yogo' beņe' Roma quinga ba yo'o lo na' Diosen' chosoguape' le'e tiox, lente beņe' ca' cheson žin che rey ben' nac la'zelagüe' beņe' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.

Colosenses

Pablon' chzoje' beņe' chesonxen Jesucriston' ciuda Colosas

1 Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len beņe' lježcho Timoteon' chguapto' le'e tiox. ² Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' beņe' ca' že' Colosasen'

³ Yogo' ni'a cate' chol' güižto' Dios ben' nac Xa Xancho Jesucriston' choe'to' yeļa' choxcen che' can' chonlen'. ⁴ Le ba beneto' diža' can' chejnilaže'le Cristo Jesúsēn' na' can' chaquele yogo' beņe' ca' yezica'chle zjanaque' lo na' Diosen'. ⁵ Na' ņezetō' chejnilaže'lene' na' chaquele legaue' lagüe da' zoale lez šjayzoale len Diosen'. Caten' gwzolao bzenagle che xtiža' Diosen' da' naquen da' güen na' da' li, gwejni'ile gac chele ca'. ⁶ Na' xtiža' Diosen' da' ba bzenagle ba goslasen doxen, na' beņe' zan ba chosozenague' čhen. Na' legaue' lecce chesone' güen ca gwzolao le'e chonle caten' gwejni'ile diža' li da' chzejni'in nži'ilaže' Diosen' le'e, na' ņe' chonle güen ža ņa'aža. ⁷ Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chonneto', na' zoateze' chone' can' ža Criston' da' chaclaže' gaclene' le'e. ⁸ Len' ba gože' neto' ba ben Spiritw che Diosen' cont chaquele Diosen' na' chaquete lježle.

⁹ Da'nān' caten' gwnezeto' ca güenņa' chonle, gwzolaoto' yogo' ni'a cate' chol' güižto' Diosen' chnabeto'ne' gaclene' le'e. Chnabto' gon Spiritw čhen' le'e yogo' cuen yeļa' sina' na' yeļa' chejni'i' cont nezele nacyaņen' chaclaže' gonle. ¹⁰ Chnabto' soale gonle can' cheyaļa' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'lnē'. ¹¹ Chnabto' gaclen Diosen' le'e len yeļa' guac xen che' cont soatezle šejnilaže'lene' na' gaple yeļa' chxenlaže' bite'tezen' chac. ¹² Na' chnabto' soale mbalaz güe'le yeļa' choxcen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw. ¹³ Bebeje' chio' lo na' gwxyien' cate' da' čholen' ņe' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont ņa'a gwzenagcho che le'. ¹⁴ Na' Xi'in Diosen' bnežjw cuine' gote' cont beque'e xtoļa'chon' na' chezi'xen Diosen' čhecho.

Criston' bozoe' chio' binlo len Diosen'

¹⁵ Criston' naque' cayaņen' nac Xe' Dios ben' nono chle'e. Ba zoacze Criston' cate' biņa' xe yežlion' na' cate' biņa' gata' yogo'loj da' de le'e yaban' na' lo yežlion'. ¹⁶ Criston' bene' yaban' na' yežlion', bene' beņe' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' beņe' ca' bi chosozenag che Diosen'. Na' Criston' bene' cont nita' beņe' ca' na' yogo' da' ca' cont gacxene'. ¹⁷ Criston' ba zoacze' cate' biņa' nita' yogo'loj da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'. ¹⁸ Na' Criston' chnabi'e chio' chdop chžagcho chonxenchone'. Len' bxie' yeļa' mban toli tocaņe che beņe' chesejnilaže'ne', na' naque' beņe' nechw bebane' ladjo beņe' guaten' ben' bich nabia' yeļa' goten' le'. Da'nān' naque' la'zelaogüe beņe' blao na' chnabi'e yogo'loj beņe' na' bica'chle da' zjade. ¹⁹ Na' Diosen' chazlaže' dan' nac yichjlaždao' Criston' cayaņen' nac yichjlaždao' le' na' dan' nac yeļa' guac che Xi'ine' Criston' doxen can' nac yeļa' guac che le'. ²⁰ Na' lecce chazlaže' yozoe' binlo len le' yogo' beņe' že' yaban' na' yežlion', le Xi'ine' Criston' bnežjw cuine' blalj xčhene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgue'elne' na' gwzoale benle da' malen'. Perw ņa'a ba bozoa Criston' le'e binlo len Diosen', ²² le bnežjw cuine' neče chio' caten' gosote'ne'. Na' beyone' lažda'ochon' xilaže' cont bibi doļa' gapcho cate' yežincho lao Diosen', na' bibi de da' zaca' yosocuiše' chio' lagüen'. ²³ Na' še soacho šejnilaže'cho Criston' na' soačhačcho len toze xbab, na' soateze soacho lez šjayzoacho len Diosen' can' gwzelaže'cho gac čhecho cate' bzenagcho xtižen' da' nechw, nachen' bibi doļa' gapcho cate' yežincho lao Diosen'. Na' diža' güen čhen' ba bžinen doxen yežlion' cont beñačen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsd blo'ede' beņe' chesonxen Criston'

²⁴ Da' zan da' chy chzaca' lagüe da' chyixjue'eda' xtiža' Diosen' len le'e bi nacle beņe' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' ne-

da', guac n̄acho cuin Criston' chžaglagüe'. ²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. ²⁶ Cani' nono n̄a' n̄eze da' güen da' chon Diosen' len beñe' chesejnilaže'ne', perw n̄a'a Diosen' ba bzejni'iden' chio', chion' naccho lo ne'e. ²⁷ Diosen' chaclaže' n̄ezecho leca güen juisyw chone' len note'tezcho chejnilaže'chone', la'czla' bi naccho beñe' Israel. Cana' nono gwñeze gone' da' güen juisyw len note'tezcho, perw n̄a'a Diosen' ba bzejni'ide' chio' zoacce Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'. ²⁸ Choe'lena' yogo' beñe' diža' che Criston', cha'ta'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' beñe' chesejnilaže' Criston' yesaque' cayanen' chaclaže' Diosen'. ²⁹ Da'nan' chona' con ga zelao choeda' chyixjue'eda' beñe' xtižen', na' chaclenchgüe' neda' len yela' guac xen chen'.

2 Chaclaža' n̄ezele chonchgua' ga zelao choeda' cont chaclena' le'e na' beñe' lježcho že' Laodicea na' yezica'chle beñe' lježcho biña' yesele'ede'nda'. ² Chaclaža' gona' chačh laže'le cont yichjlažda'olen' yesaquen toze lagüe da' chaque lježle. Na' chaclaža' n̄ezeyane'le can' cheyała' gonle xbab cont šejni'ile da' ba bzejni'i Diosen' chio' che Criston' da' nono gwñeze cani'. ³ Criston' nse'e doxen yela' sina' na' yela' chejni'i che Diosen' cont gwzejni'iden' chio'. ⁴ Chnia' ca' cont nono siye'e le'e len diža' da' chaquele naquen xdan. ⁵ Na' la'czla' bi zoa' na'le len le'e, zoa' chona' xbab chele na' chebeda' n̄ezda' chonle can' cheyała' gonle na' zoachachle chejnilaže'le Criston'.

⁶ Na' n̄a'a, con can' ba gwzolaole chejnilaže'le Criston' na' ba nonlene' xanle, con can' soachachle len le'. ⁷ Le soachach le šejnilaže'ch Criston' can' ba bsedlena', cont gacle ca to yag da' ba gwyaz loen sitjw. Na' le soa le güe'chgua yela' choxcen che Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Beñe' že' yežlion' chosozejni'ide' da' zan da' chesene' cheyała' goncho da' bibi zjazaca', na' bitw chosozejni'ide' che Criston'.

⁹ Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. ¹⁰ Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuzcho binlo. ¹¹ Na' lecce da' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa beñe' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. ¹² Na' da' gwzoacho nis caten' gwwejnilaže'chone', zejen con can' got Criston' neče xtoła'chon', lecc ca' chio' ba naccho ca to beñe' guat len da' malen' cont bi gonchon. Zejen

bgaše'cho can' bgašen', na' lecce zejen bečhis bosban Diosen' chio' ladjo beñe' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. ¹³ Cana' gwxcaca'lebcho ca to beñe' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo beñe' guat ca', le bocobe' yichjlažda'ochon' na' bezi'xene' xtoła'chon'. ¹⁴ Bi bencho yogo'loj can' ža ley che Diosen' cheyała' goncho, na' benchō da' žan bi cheyała' goncho. Da'nan' gota' xya checho len leyna' na' nchoglaon checho saca'zi'cho toli tocanē. Perw Criston' bnežjw cuine' bosode'ene' le'e yag cruza' neče doła' xya chechon', na' da'nan' n̄ezecho Diosen' ba bñitlagüe' xtoła'chon'. ¹⁵ Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' beñachen' ba blej bšošen'.

Cue' yichjcho che da' ca' zjazacan' len Diosen'

¹⁶ Bi gwzenagle che beñe' ca' chesena chonle mal che'ej chagwle bi da' che'ej chagwle, o beñe' chesene' chele da' bi chonle no ža l̄ni, o beñe' chesena qui ca' goncho cate' naquen bio' che'ej, o beñe' chesena ža ni ža na' nac ža che Dios. ¹⁷ Yogo' da' ca' con bosozejni'in late'lasze che Criston', perw n̄a'a da' bid Criston' bich chyažjecho da' ca', le ba nombia'chone'. ¹⁸ Bi gwzenagle še no beñe' chzejni'ide' cheyała' gon cuinle ca to da' bibi zaca' cont soale binlo len Diosen', o beñe' chzejni'ide' cheyała' gonxenle no angl o gonle bi da' že' ble'edagüede', le bi chebe Diosen' beñe' cheson da' ca'. Beñe' ca' chosozejni'ide' ca' chesacde' xbab da' chesaljaže' zaca'chguan, len bitw bi zacan', ¹⁹ le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len beñe' lježcho ca to cuen güeje cuerp chechon' ngoden' txen, le xpela'chon' na' bečhj bnia' ca' zjanoxen' len con ca non Dios chegaquen.

²⁰ Chio' naccho txen len Criston', guac n̄acho Criston' ba none' chio' ca to beñe' guat len da' xinjen' cont bi gonchon, ca beñe' guaten' goc le' le'e yag cruzen'. Da'nan' bi cheyała' gwzenagcho cate' chesena beñe' da' zan da' goncho cont soacho binlo len Diosen', le bi naccho beñe' che yežlion'. ¿Bixchen' chzenagle che yela' sina' che yežlio nga da' ca' chesene' cheyała' gonle na' da' ca' chesene' bi cheyała' gonle?

²¹ Chesene': "Bi goxe'le da' nga", "Bi ye'ej gagwle da' na'", "Bi canle da' na'". ²² Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chchinchon, na' dan' chesene' cheyała' goncho len da' ca', con xbab chegaczen'. ²³ Guacte goncho xbab nac da' sina' da' chesene' cheyała' goncho, na' goncho xbab gaclenen chio' gonxencho Diosen', le chesene' cheyała' gwči gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

3 Can' beĥis bosban Diosen' Criston' ladjo beĥe' guat ca', lecze can' bocobe' yichjlažda'ochon'. Da'nan' cheyała' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e t xen len Diosen'. ² Na' cheyała' yebecho da' naquen da' zaca' len Diosen', gague da' naquen da' zaca' len beŋaĥen'. ³ Le guac ŋacho Criston' ba none' chio' ca to beĥe' guat len da' malen' cont da' malen' bich ŋabian' chio', na' mbancho len Criston' ŋa'a cont naccho t xen len Diosen'. ⁴ Criston' noŋe' chio' yeła' mban toli tocaŋe. Na' cate' le' yide' da' yoble, šjayzoacho t xen len le' gan' yo'ochgua be'ni'.

Can' bencho cana' na' can' cheyała' goncho ŋa'a

⁵ Da'nan' cheyała' cuejyichjcho da' mal da' žan goncho len cuerp ĥeĥon' dan' nac ĥe yežlio nga. Bitw gata'lencho no'ole bi nac no'ol ĥeĥo o beĥe' byo bi nac beĥe' ĥeĥo. Bitw goncho bichle da' yeła' zto' len cuerp ĥeĥon' ŋeca yebecho bi da' nac da' yeła' zto'. Bitw selaže'cho goncho bite'teze da' mal, ŋeca selaže'cho da' zan da' gata' ĥeĥo, le toz ca malen' nac yeła' chzelažen' len da' cheson beĥe' chesejnilaže' l gua'a lsa'ca' ca'. ⁶ Žin ža cate' Diosen' gone' cont beĥe' cheson da' ca' yesezaca'zi'e toli tocaŋe. ⁷ Le'e lecze gwzoale cana' benle da' mal ca' ba gwnia'. ⁸ Perw ŋa'a cheyała' cuejyichjle yogo' da' mal. Bitw ža'a lježle, bitw locle, bitw gacle beĥe' xi'a len lježle, bitw ŋele ĥe lježle, na' bitw güe'le diža' zban. ⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyała' gwzenagle ĥen da' yoble. ¹⁰ Ba chzenagcho ĥe Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab ĥeĥon' can' nac ĥen'. ¹¹ Na' chio' ba bocob Diosen' yichjlažda'ochon', bibi nonen še naccho beĥe' Israel o še bi naccho. Bibi nonen še zoacho seŋw da' že' circuncišion' o še bi zoachon, na' bibi nonen še naccho beĥe' zito', la'czla' še za'cho gan' že' beĥe' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

¹² Diosen' gwleje' chio' cont naccho lo ne'ena' na' chacde' chio'. Da'nan' cheyała' yeyaše'cho beĥe' na' gaccho beĥe' šagüe' len yogo'loj beĥe'. Bi cheyała' ga'laže'cho, san gaccho beĥe' chzexjwlaže' na' gapcho yeła' chxenlaže' len yogo'loj beĥe'. ¹³ Na' cheyała' gwdecho ca'ale še bi chac ĥeĥo len beĥe' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' ĥeĥo. ¹⁴ Na' yeto da' zejechen goncho ca yogo' da' ca', cheyała' gague lježcho, le še chaque lježcho gaclenen goncho yogo' da' ca' can' cheyała' gonchon. ¹⁵ Diosen' gwleje' chio' cont soa cuezcho binlo, na' cheyała' gwzenagcho ĥe Criston' na' gacbe'echo yogo'cho naccho toze cont soa cuezcho binlo. Na' lecze cheyała' soacho güe'cho yeła' choxclen ĥe Diosen'.

¹⁶ Cheyała' soacho goncho xbab ĥe xtiža' Criston' na' gwzenagcho ĥen, na' lecze soacho gwzejni'i lježcho na' ŋeyoe lježcho len doxen yeła' sina' ĥe Diosen'

cont yogo'cho goncho da' güen. Na' cheyała' gołcho no salmos, no himnos, na' bichle da' ža Spiritw ĥe Diosen' gołcho, na' güe'cho yeła' choxclen ĥe Diosen' lo' yichjlažda'ochon'. ¹⁷ Na' bite'teze da' goncho na' bite'teze diža' güe'cho, cheyała' ŋabcho gaclen Xancho Jesús'en' gonchon can' chazlaže', na' güe'cho yeła' choxclen ĥe Xacho Diosen' con can' chaclen Xancho Jesús'en' chio' chonchon'.

Can' cheyała' goncho len lježcho

¹⁸ Le'e no'ole nšagna'le, to tole le gwzenag ĥe beĥe' ĥele, le can' cheyała' gon chio' chejnilaže'cho Xancho Criston'. ¹⁹ Na' le'e beĥe' byo nšagna'le, to tole le gague no'ol ĥele na' bi gonle znia len legaque'. ²⁰ Na' le'e bi' bixjw, le gwzenag ĥe yogo'loj bi da' yesena xaxŋa'le, le can' chazlaže' Xancho Criston' gonle. ²¹ Na' le'e nacle xaxŋa' bi' bixjw, bi gonle cont yeseloc bi' ĥele ca', le še gonle ga yeselocbe', yesaquebe' zdebe yosozenagbe' ĥele. ²² Na' le'e chonle xšin beĥe', le gwzenag yogo'loj can' ža xan žinŋa' gonle. Bitw gonlele xan žinŋa' gonle ca beĥe' chonchgua žin cate'zen' ĥŋe'e le'e, san le gon žinŋa' do yichj do laže'le da' chejnilaže'le Diosen'. ²³ Na' bite'teze da' gonle, le gonen do yichj do laže'le cont yebe Xancho Criston', gague contze yebe beĥe'. ²⁴ Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'. ²⁵ Na' note'tezcho še bi choncho can' cheyała' goncho, Xancho Diosen' gone' saca'zi'cho ŋeĥe dan' ba bencho. Na' toz can' chon Diosen' len yogo'loj beĥe'.

4 Na' le'e nacle xan žin, le gon güen na' le gac beĥe' šagüe' len beĥe' cheson xšin'len', le nezczele Criston' ben' zoa yaban' naque' Xanle.

² Yogo'te ža cheyała' ŋabcho gaclen Diosen' chio' len da' choncho na' len bichle da' chac ĥeĥo, na' cheyała' güe'cho yeła' choxclen ĥe', na' bi cheyała' güedcho yoł güižcho Diosen'. ³ Na' le ŋabe Xancho Diosen' gone' cont gac güe'lento' beĥe' xtiža' Criston' da' biŋa' yesejni'ide', le ŋeĥe dan' ba bia' xtiže'n'an' dia' ližya nga. ⁴ Na' le ŋabe Diosen' gaclene' neda' gwzejni'ida' beĥe' diža' güen ĥe Criston' binlo cont yesejni'iden'.

⁵ Cheyała' soacho goncho güen len beĥe' biŋa' yesejni'laže' Criston' ŋa'a šlac de latje. ⁶ Na' cheyała' güe'cho diža' šagüe' diža' da' zejen len yogo'loj beĥe', na' cheyała' goncho xbab nac yoži'icho xtiža' yogüe'.

Pablo chguape' beĥe' migw ĥe' ca' tiox

⁷ Beĥe' lježcho Tíquico ye'e le'e yogo'loj can' chac ĥia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' t xen len neda'. ⁸ Ba gwseła'ne' gan' zolen' cont ŋezele can' chac ĥeto' na' cont gone' ĥaĥ laže'le. ⁹ Na' t xen len le' zeza' beĥe' lježcho Onésimo ben' nac beĥe' gualaž ĥele. Zoacze' chejnilaže' Criston' can' cheyała' gone' na' chaquechone'. Legaque' yese'e le'e yogo' da' ba chac nga.

¹⁰ Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'. ¹¹ Nach Jesús ben' lecze le' Justo lecze chguape' le'e tiox. Šonze beņe' Israel ca' chesaclene' neda' len da' chona' cont beņe' zan yosozenague' che Diosen' na' ņabi'e yičhjaž-da'ogaquen'. Ba gosonchgüe' čhačh laža' can' ba gosaclene' neda'. ¹² Nach lecze beņe' gualaž čhele Epafras chguape' le'e tiox. Chone' xšin Criston' na' yogo' ņi'a cate' choł güiže' Diosen' chņabchgüe' gwzejni'i Diosen' le'e yogo'loł da' chaclaže' gonle cont soačhačhle gonlen na' gacle cayanen' chazlaže' Diosen'. ¹³ Che'nda' ņezele zoateze' choł güiže' Diosen' ņeče

le'e chejnilaže'le Criston' le'e nita'le Colosas, Laodicea na' Hierápolis. ¹⁴ Nach Lucas ben' chon rmed, ben' chaquecho, chguape' le'e tiox na' lecze ca' Demas.

¹⁵ Le gwguapšca tiox beņe' lježcho ca' že' Laodicea, len Ninfas na' beņe' ca' chesedop chesežag chesonxene' Diosen' ližen'. ¹⁶ Na' cate' yeyož gwlabable cart nga, le gwnežjon beņe' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwseła' che beņe' Laodicean'. ¹⁷ Na' le ye' Arquipo chņeyoeda'ne' gwza'lagüe' gone' dołoł xšin Diosen' da' gwlo'o Xancho Criston' lo ne'e gone'.

¹⁸ Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' ņa'a.

1 Tesalonicenses

Pablo bzoje' beṇe' Tesalónica ca' ben' chesonxene' Jesucriston'

1 Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chṇabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda'olen'.

Beṇe' Tesalónica bosolo'ede' chesejle'e che Jesucriston'

2 Yogo' ṇi'a cate' choḷ güižto' Xacho Diosen' choe'to' yela' choxcḷen che' par yogo'le. Na' cate' choḷ güižto'ne' chjayza'laže'to' yogo'loḷ da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoaḇhaḇle chbezle yid Xancho Jesucriston' yeto. 4 Nezetot' beṇe' migw, Diosen' chacde' le'e na' ba gwleje' le'e cont nacle lo ne'e. 5 Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' godlenen neto' bzejni'ito' le'e len yela' guac chen na' nezetot' diža' dan' bzejni'ito' le'e naquen da' ji. Na' nezele can' bento' da' güen šlac gwzoato' len le'e cont goclento' le'e.

6 Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwduxjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. 7 Na' da' zoale chonle da' güenna', beṇe' ca' chesejnilaže' Jesucriston' distritw Macedonia na' distritw Acaya ba zjanezde' naquen cheyaḷa' yesone'. 8 Doxen ba bzenele beṇe' xtiža' Xancho Jesucriston', gague beṇe' že' Macedonia na' Acaya na'zen'. Na' ca'cze yogo'ze beṇe' ba zjanezde' can' chejnilaže'le Diosen', na' da'nan' bi chyažjen güe'to' diža' chele. 9 Na' beṇe' zan cheso'e diža' ca güen beṇle len neto' caten' bedena'to' le'e na' cheso'e diža' can' benle gwlejyichjle cbich chejnilaže'le l' gua'a lsaca' chele ca', san ṇa'a ba chejnilaže'le ben' nac dogualje Dios ben' zoa toḷi tocaṇe. 10 Na' cheso'e diža' can' chbezle yetj Xi'ine' Jesús'en' yaban' yide' yežlio nga yeto, ben' bosban Diosen' ladjo beṇe' guaten'. Na' dan' chejnilaže'cho Jesús'en' ba bosle' chio' cont bi saca'zi'cho cate' žin ža beṇe' bi chosozenague' che Diosen' yesaḷe'chgüede' toḷi tocaṇe.

Pablon' gwzoe' Tesalónican'

2 Beṇe' migw, le'e nezele dan' bedena'to' le'e goclenchguan le'e. 2 Na' nezele can' gwdi gwzaca'to'

cate' gwyejto' Filipos, na' can' gosezi'diža' beṇe' ca' neto' dan' gwduxjue'eto' che Jesucriston'. Perw Diosen' godlene' neto' cont bi bžebto' gwduxjue'eto' diža' güen che' len le'e la'czla' beṇe' zan bosožone' chixjue'eton'.

3 Dan' gota'yoeto' le'e gwzenagle che Diosen' bitw ṇa'cho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e. 4 San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe beṇe', san cont yebe Diosen' ben' neze bin' yo'o lo' yichjlažda'ochon'. 5 Nezele can' bento', ne ṇi'aze biṇa' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuiñ Diosen' nezele can' naquen. 6 Na' neca cheyljwlaže'to' nacle gonto' cont yesonxen beṇe' neto'. Neca ṇacho chaclaže'to' gonxenle neto', na' neca chaclaže'to' yezi-ca'chle beṇe' yesone' ca'. Zaca'to' gonto' ga gwzenagle cheto' la fuers da' gwseḷa' Criston' neto' choe'to' xtiže'na', perw bitw chonto' ca'. 7 Nži'ito' le'e cacze no'ole šagüe' nži'ide' xi'ine' bi' chosgol chosḇha'ogüe'. 8 Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuanto' bento' ga zelao gwzaque'to' cont goclento' le'e, le chaqueto' le'e. 9 Za'laže'czle beṇe' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwduxjue'eto' le'e diža' güen che Diosen'.

10 Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna naptot' doḷa'. 11 Nezele can' gota'yoeto' le'e gonle da' güen na' can' bento' chaḇ laže' to tole gonlen. Bento' can' chon to beṇe' byo len xi'ine'. 12 Bento' mandadw gonle da' güen ca cheyaḷa' gon chio' naccho lo na' Diosen', le ba gwleje' chio' par ṇabia'cho txen len le' na' par gone' gac da' mba juisyw checho cate' šjayzoa'cho len le'.

13 Bate'teze choe'to' yela' choxcḷen che Diosen' dan' bzenagle xtiže'na' caten' gwduxjue'eton' le'e. Zacbe'ele bi naquen xtiža' beṇaḇ, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. 14 Na' bene' migw, ba goc chele can' goc che beṇe' chesedop chesežag chesonxene' Jesucriston' zan part Judean'. Beṇe' Israel gualaž chegaque' bosocḇi bososaque' legaque', na' lecze can' bosocḇi bososaca' beṇe' gualaž chelen' le'e. 15 Na' beṇe' Israel ca' gosote' Xancho Jesucriston' con can' gosote' da' beṇe' gosoe'lene' legaque' xtiža' Diosen' can'. Na' lecze can' gosone' bosolağšibe' neto'. Na' ža

na'aža ñe' nite' chesone' da' bi chazlaže' Diosen' na' chesegue'ede' yogo'loĵ beñaçhen', ¹⁶ Ĵe chosožone' gwzejni'ito' yezica'chle beñe' bi da' cheyaĵa' goncho cont gata' yeĵa' mban çhecho toĴi tocañe. Can' chesone' do tiemp chosozanch xtoĵa'gaquen' na' Diosen' ba chža'achgüe' Ĵegaque'.

Pablo goclaze' šjajne'e beñe' nita' Tesalónica

¹⁷ Na' neto' beñe' migw, cate' zoato' ga bi chle'e Ĵježcho, chjayze'eto' le'e. Da'n'an' cate' ba goc sša biña' le'e Ĵježcho ba chaczejlaže'to' çhele na' goclaze'to' yedeña'to' le'e. Na' to çhop ñi'a godca' yida', perw Satanás dan' chnabia' da' xigüe' ca' bi benen latje. ¹⁹ Chabeto' chonchguale güen na' da'n'an' zoato' lez soachguato' mbalaz cate' yid Xancho Jesucriston' da' yoble, Ĵe yebede' bzjeni'ito' le'e cont chzenagle çhe'. Da' Ĵi le'e chonĴe cont chabeto' na' cont zoato' mbalaz.

³ Na' bich gwzoeto' dan' bi chle'e Ĵježchon'. Da'n'an' beçhoglaže'to' gwseĵa'to' beñe' Ĵježcho Timoteon' gan' zoalen' na' neto' bega'ant'o' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in beñe' çhe Criston'. Gwseĵa'to'ne' bedeyata'yoede' le'e bi soayaše'le na' bedeyene' çhaçh laže'le cont zoaçaçhle chejni-laže'chle Criston'. ³ Gwseĵa'to'ne' gan' zoalen' cont ñe tole bi gaczejlaže'le bixçhen' chy chzaca'le. Ba ñezele chio' chejnilaže'cho Criston' cheyaĵa' saca'zi'cho Ĵo yežlio nga. ⁴ Caten' gwzoalento' le'e bzeneto' le'e Ĵeca yosoçhi yososaca' beñe' chio'. Na' ñezele ba chac can' gwnato'na'. ⁵ Na' dan' bi gocxenĵaža' dan' biña' la' rson çhelen', nachen' gwseĵa' Timoteon' gan' zoalen' cont ñezda' še do laže'le chejnilaže'le Criston'. Ĵe bena' xbab godca' še ba gwzoe gwxiyen' benĴen le'e. Ĵe še ba benĴen le'e, con bendadzeto' xšin Diosen' len le'e še ca'.

⁶ Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'loĵ beñe'. Na' Ĵecze gwne' chjayze'ele neto' na' zelaže'le yežagcho da' yoble Ĵecze can' chaclaže' neto'. ⁷ Ca'czen' beñe' migw, chžaglaoto' na' chy chzaca'to', perw ba beyacxenĵaže'to' gwñezeto' can' zoateze zoale chejnilaže'le Criston'. ⁸ Da' Ĵi ba beyacxenĵaže'to' na' zoato' mbalaz dan' zoaçaçhle chejni-laže'le Xancho Criston'. ⁹ Na' da'n'an' Ĵeca chabeto' lao Diosen' can' chonĴe na' Ĵeca choe'chguato' yeĵa' choçclen çhe' can' chonĴen'. ¹⁰ Ĵeca choĴ güižto'ne' do ža do yel chñabeto'ne' gone' ga ye'e Ĵježcho da' yoble cont gwzejni'ichto' le'e na' šejchle šejnilaže'chlene'.

¹¹ Chñabeto' Xacho Diosen' len Xancho Jesucriston' yesone' latje yedeña'to' le'e. ¹² Na' chñabeto' Xancho gone' cont gaquech Ĵježle tole yetole na' gone' ga gaquechle yogo' beñaçhen' con catezen' chaqueto' le'e. ¹³ Chñabeczeto'ne' gone' cont soaçaçhle šejnilaže'lene' na' gac lažda'olen' xilaže' lao Xancho Diosen' sin cbibi doĵa' gaple cate' yid Xancho Jesúsen' da' yoble nçhe'e yogo'loĵ beñe' ba gwleĵ Diosa' cont zjanaque' Ĵo ne'e.

Pablon' bzejni'ide' can' che'ne Diosen' yesezoa yesebeze'

⁴ Na'a beñe' migw, baçh bsed blo'eto' le'e gonĴe can' chazlaže' Diosen', na' baçh zoale chonĴe ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

² Ba ñezczele bica' da' ca' bento' mandadw gonĴe na' zjanaquen con ca' ža Xancho Jesúsen'. ³ Diosen' chaclaže' soatez soacho gaccho beñe' laždao' xilaže'. Bi chazlaže' gata'lencho no'ol bi nac no'ol çhecho o beñe' byo bi nac beñe' çhecho. ⁴ Chaclaže' ñeze to tole naquen' cheyaĵa' soalen xo'ollen' sin cbi gaple doĵa' na' gonelene' ca' beñe' zaca'. ⁵ Bitw gonĴe can' cheson beñe' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. ⁶ Ne tole bitw gonĴe da' bi cheyaĵa' gonĴe na' siye' beñe' Ĵježle na' soalenĴe no'ol çhe'. Ba be'czto' diža' bosñiseto' le'e can' gon Xancho Diosen' cont yesezaca'zi'chgua beñe' cheson bite'tez da' xinjen' zjanac ca'. ⁷ Diosen' gwleje' chio' cont gaccho beñe' laždao' xilaže', gague cont goncho bi da' xinj da' zjanac ca'. ⁸ Da'n'an' note'tez le'e še bi chzenagle çhe da' qui ba bzejni'ito' le'e, gague xtiža' beñaçhen' chzoale ca'ale, san Diosa' chzoale ca'ale. Ĵen' beñe' chio' Spiritw çhen' na' Spiriton' naquen laždao' xilaže'.

⁹ Bitw chyažjen gwzoja' le'e can' cheyaĵa' gague Ĵjež chio' chejnilaže'cho Jesucriston'. Dios nan' ba bsedde' le'e cont chaque Ĵježle tole yetole. ¹⁰ Na' da' Ĵi ba chaquele yogo' beñe' Ĵježcho ca' nita' doxen Macedonian'. Na' chata'yoeto' le'e beñe' migw, Ĵe gaquech Ĵegaque'. ¹¹ To tole Ĵe yeyiljwlaže' bi žin gonĴe cont soa cuezle biñĴo can' nonto' mandadw na' bitw tale gwgüia ña'le bi cheson beñe' yoble. ¹² Ĵe gon can' ba gwnia' cont beñe' bi zjanaque' txen len chio' yesacbe'ede' chonĴe güen, na' Ĵecze cont bibi gac falt še bi dan' chyažj chçhinele.

Can' gac cate' yid Criston' da' yoble

¹³ Beñe' migw, chaclaže'to' ñezele can' yesac çhe beñe' gosejnilaže' Jesucriston' na' ba gosate'. Chaclaže'to' ñezelen cont bi yegüine'le ca' cheson beñe' bi nita' lez šjasyezoe' len Jesucriston'. ¹⁴ Nezecho gosot beñe' Jesúsen' na' bebane' ladjo beñe' guat ca'. Ĵecze ñezecho Diosen' gone' cont yid Jesúsen' da' yoble nçhe'e beñe' ca' ba gosat con beñe' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesúsen' mandadw gwzeneto'. Chio' mbancho ña'a chejnilaže'chone', še ñe' mbancho cate' yide' da' yoble, bitw ñacho yobch yežagchone' clal ca' beñe' ca' ba gosat. ¹⁶ Na' ca' nac Xancho Jesúsen', cuine' yetje' le'e yaban', na' ñe' zižje gone' mandadw yesyeban beñe' guaten', na' to angl blaona' ñe', na' yenecho cuež trompeta çhe Diosen'. Nach beñe' ca' ba gosat beñe' gosejnilaže' Criston', Ĵegaque' zgua'tec yesyebane' ladjo beñe' guaten'. ¹⁷ Na' ca' yeyoža', chio' chejni-

laže'chone' še ne' mbancho yežlio nga, gon Diosen' cont yeyepcho txen len legaue' le'e yaban' to lo' bejw na' yežagcho Xancho Jesúsen' le'e yaban'. Nach šjayzoacho len le' toli tocañe. ¹⁸ Da'nan' le gon čač laže' lježle tole yetole güe'le diža' can' gaca'.

5 Beñe' migw, bitw chyažjen gwzoja' cont gwzenda' le'e bi ža bi hor yid Xancho Jesúsen' yeto. Nezele con yalzelaže'le žin ža žin hor can' chžin beñe' gwban beñe' chda šeže'le. ³ Na' šlac chesena beñe': "Mba zoacho, bibi chac čhecho", cate' concze žin ža yesebiaye'e. Can' chac čhe no'ole cate' yalzelaže' chaque' bes čhe yela' san, ca'czen' zjayalzelaže' yesebiayi' beñe' ca' bi chesejnilaže'ne'. Bitw gac yosoxonje'. ⁴ Perw chio' beñe' migw, bi nčho'le yičhjažda'ochon', da'nan' bitw gac čhecho can' chac čhe beñe' chzenyal gwbanña' le'. ⁵ Diosen' ba bzejni'ide' chio' nombia'chone' na' be'ni' čhen' ba chsenin' len chio'; da'nan' bitw nčho'le yičhjažda'ochon'. ⁶ Cheya'la' gonyane'cho xbab naquen' chaclaže' Diosen' goncho na' nabia' cuincho goncho can' chazlaže'na'. ⁷ Beñe' ca' cbi chosozenag čhe Diosen' zjazaca'lebe' ca beñe' zjantas na' ca beñe' chesezože. ⁸ Perw ba bzejni'i Diosen' chio' cont bi goncho can' chesone'na'. Da'nan' cheya'la' nabia' cuincho goncho can' chazlažen'. Cheya'la' šejnilaže'cho Diosen' na' gaue lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldaw ben' nyaze' to de ya da' chcue'ejen le' cont bibi chac čhe' cate' chdile' len beñe'. ⁹ Gague gwlej Diosen' chio' cont saca'zi'cho čhe xto'la'chon'. Gwleje' chio' cont šejnilaže'cho Xancho Jesucriston' na' šjayzoacho len le'. ¹⁰ Na' Jesucriston' bnežjw cuine' neče chio' cate' gosot beñe' le' cont šjayzoacho len le' la'czla' še mbancho o še ba gotcho cate' yide' da' yoble. ¹¹ Da'nan' le gonch can' ba chonle, le gon čač laže' lježle tole yetole na' le gaclench lježle cont soačhačle šejnilaže'le Jesucriston'.

Pablon' bzejni'ide' beñe' chesejnilaže' Jesucriston' can' cheya'la' yesone'

¹² Chata'yoeto' le'e beñe' migw, gapple bala'añ beñe' ca' cheson xšin Xancho Jesucriston' chosogüia

chesene' le'e na' chosozejni'ide' le'e naquen' cheya'la' soa cuezle. ¹³ Gapchualne' bala'añ na' gauechgüele legaue' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca'cze beñe' migw, le ti'e beñe' bi chesaclaže' yeson žin, le gon čač laže' beñe' chesacde' zdebe chosozenague' čhe Jesucriston', na' le gaclen beñe' biña' yesejni'ide' naquen' cheya'la' yesone'. Le soa le gap yela' chxenlaže' len yogo'lo' beñe'.

¹⁵ Še bi da' mal cheson beñe' len le'e, le gon byen bi yoži'ile da' mal len legaue'. Le yeyiljwlaže' naclen' gonle güen len lježle tole yetole na' len note'tez beñe'.

¹⁶ Do tiemp le yebe. ¹⁷ Le soateze le soa le yo' güiž Diosen'. ¹⁸ Le güe' yela' choxclen čhe Diosen' bite'tez da' chac čhele, le da'nan' chaclaže' gon chio' chejnilaže'cho Cristo Jesúsen'.

¹⁹ Bitw gwžonle gon Spiritw čhe Diosen' can' chaclažen' gonen len le'e o len beñe' yoble. ²⁰ Bi gwzoale ca'ale dan' chesena beñe' cheso'e diža' dan' ba gož Diosen' legaue'. ²¹ Na' le gonyane' xbab čhe yogo'lo' diža' da' cheso'e cont soale gwzenagle čhe da' nac güen. ²² Na' bitw gonle bite'tez da' nac da' mal.

²³ Diosen' chone' ca chzoa chbezcho binlo len xbab dan' yo'o lo' yičhjažda'ochon'. Na' chñabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yičhjažda'olen' neca len cuerp čhelen' cont bibi do'la' gapple caten' yid Xancho Jesucriston' yeto. ²⁴ Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

Pablon' gwñabe' gaclen Diosen' beñe' Tesalónican'

²⁵ Beñe' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nabia' chaque lježle.

²⁷ Chona' mandaw gwlable cart nga ga yesene yogo'lo' beñe' lježcho ca' nita' gan' zoalna', le can' chaclaže' Xancho Jesucriston' gonle.

²⁸ Na' soateze Xancho Jesucriston' gaclenšque' le'e. Da' na'ze chzoja' na'a.

2 Tesalonicenses

Pablon' bzoje' beṇe' Tesalónican' beṇe' chesonxen Jesucriston'

1 Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chṇabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda'olen'.

Cate' yid Criston' da' yoble Diosen' gwnežjue' da' yesezaca'zi' beṇe' bi chosozenag che'

³ Beṇe' migw, neto' cheyała' soateze soato' güe'to' yela' choxcen che Diosen' che dan' chonlen'. Cheyała' gonto' ca' da' zejle chejnilaže'chle Diosen' na' zej chaquech lježle. ⁴ Da'n'an' chbeto' choe'to' xtiža'len' len yezica'chle beṇe' ba gwlej Diosen' na' chesežague' chesonxene' Jesucriston' ga yoble. Choe'to' diža' ca güen chonle dan' chyo chchejele chejnilaže'le Jesucriston' la'czla' da' zan da' chac chele na' chosoči chososaca' beṇe' le'e. Da'n'an' ṇezecho Diosen' zejcz'e' to liča da' ṇhogbi'e zaca'le par yeyejle yaban' gan' zoe' chnabi'e.

⁶ Na' Diosen' zeje' to liča da' gone' cont yesezaca'zi' beṇe' ca' chosoči chososaque' le'e. ⁷ Na' lecze zeje' to liča da' gwcueze' yogo'te dan' chyi chzaca'chon'. Gwcuezen' cate' le'echo yetj Xancho Jesús'en' le'e yaban' len angl che' ca' beṇe' zjanse'e yela' guac che'. Yetje' nyechjde' yi' bej. ⁸ Na' gwnežjue' da' yesezaca'zi' beṇe' ca' bi zjanombi'e Diosen', na' ṇeca chosozenague' che diža' güen dan' chzejni'in che Xancho Jesucriston'. ⁹ Le-gaque' yesezaca'zi'e toli tocaṇe. Gwbat šjasyenite' len Xancho Jesucriston' ben' nac beṇe' zaca' juisyw na' nape' yela' guac xen. ¹⁰ Cate' žin žan' yid Jesucriston' da' yoble, chio' chejnilaže'chone' na' naccho lo ne'e gwlo'echo naque' beṇe' zaca' juisyw na' yebanecho catec beṇe' güen naque'. Nacto' txen len le'e da' ba chejle'le che diža' dan' be'lento' le'e.

¹¹ Da'n'an' zoatez zoato' chṇabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chṇabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. ¹² Chṇabto' gonle cont Xancho Jesucriston' gacxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

Choj ben' gonchgua güedenag len Diosen'

2 Beṇe' migw, da' yoble chnia' le'e ca gac cate' yid Xancho Jesucriston' yeto, yotobe' chio' šjayzoacho txen len le'. ² Chṇeyoeto' le'e bitw gaczejlaže'le o žeble še no yid yedezejni'ide' le'e, ṇe' Spiritw che Diosen' žan ba bžin ža yid Jesucriston' da' yoble. Na' ṇeca gaczejlaže'le še bi da' yenele o še la' no cart güenlaže' da' chesena beṇe' gwseła' neto', žan ba bžin ža yid Jesucriston'. ³ Bi güe'le latje no siye' le'e še bi yeseṇe' o še bi da' yesone'. Le cate' za' yid Xancho Jesús'en' da' yoble, beṇe' zan yesase' yesyedabague' Diosen'. Lecze cana' choj to beṇe' blao beṇe' gonchgüe' güedenag len Diosen'. Benan' ba naquen yeyeje' lo yi' gabilen'. ⁴ Gaque' beṇe' ya'laže' na' gue'ede' Diosen' na' lecz ca' gue'ede' bite'tezech da' chesejnilaže' beṇe'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen beṇe' le'.

⁵ ŽBi za'laže'le cate' gwzoo' len le'e bzejni'ida' le'e can' gac cate' yid Jesucriston' da' yoble? ⁶ Na' ṇa'a ṇezeczle bi dan' chžon choj beṇe' blao ben' gonchgua güedenag len Diosen', perw cate' ba bžin ža bžin hor, cana' choje'. ⁷ Ba nita' beṇe' chesonchgüe' güedenag len Diosen' ṇa'a, perw ṇe' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'. ⁸ Cana'chen' choj beṇe' blaon' ben' gonchgua güedenag len Diosen'. Nach Xancho Jesús'en' yide' nyechjchgüede' be'ni', na' cate' beṇe' blaon' le'ede' le' nach Xanchon' güe'e diža' na' ši'en goten le'. Can' gone' yonitlagüe'ne'. ⁹ Na' cate' choj beṇe' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane beṇe' contze gonlede' le-gaque'. ¹⁰ Yogo'te da' mal gone' gonlede' beṇe' ba naquen yesebiaye'e toli tocaṇe. Yesebiaye'e da' bi chesejle'e diža' lin', le lenṇa' zaca' yesejle'e cont gata' yela' mban chegaque' toli tocaṇe. ¹¹ Na' da'n'an' Diosen' güe'le latje yeseziye'e legaque' cont yosozenague' diža' güenlaže'. ¹² Nach yesezaca'zi'e toli tocaṇe da' bitw gosejle'e diža' li che Xanchon' san besyebede' da' malen'.

Diosen' chbeje' beṇe' na' chone' cont gac šjasyenite' len le' toli tocaṇe

¹³ Beṇe' migw, chaque Xancho Jesucriston' le'e. Na' neto' cheyała' soatez soato' güe'to' yela' choxcen che Diosen' da' gwleje' le'e cate' biṇa' xe yežlion' cont šjayzoale len le'. Na' cate' gwzolao chejle'le diža' li che

Diosen' nach gwsele' Spiritw chen' chonen cont nacle bene' laždao' xilaže'. ¹⁴ Neče da'nan' gwlej Diosen' le'e, na' dan' gwejele'le diža' güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'nan' bene' migw, le soa čačh le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'. ¹⁶ Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chñabda' cuin Xancho Jesucriston' len Xacho Diosen' yesone' čačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

Gwñab Pablon' yosoļ güiže' Diosen' gaclene' le' len bene' lježe' ca'

3 Na'a bene' migw, yoļ güižscale Diosen' gaclene' neto' cont yob šjadixjue'eto' che Xancho Jesucriston' doxen, na' cont bene' yezica'chle yesebede' yosozenague' can' ba ben le'e. ² Lecze ñabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. ³ Xancho Jesucriston' zoatez zoe' chone' can' že' gone', na' gaclene' le'e cont soačhačhle šejnilaže'lene'. Na' lecze gwcuas gwcue'eje' le'e len da' malen'. ⁴ Na' ñezeto' chaclenze' le'e cont chonle da' ba bento' mandadw gonle na' cont ñita'czle gonlen. ⁵ Chñabda' Xancho Jesucriston' gone' cont ñezele catec chaque Diosen' chio'. Na' lecze chñabda'ne' gone' cont gwyo gwčejele len da' chyi chzaca'le can' gwzoa Criston' byo bčeje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyaļa' gonle txen len note'tez

bene' lježchon' bene' bi chesaclaže' yesone' žin, le bi chesone' ca nac da' bsed blo'eto' legaque'. ⁷ Neto' benczto' žin cate' gwzoato' len le'e, na' da'nan' ñezele can' cheyaļa' gonle. ⁸ Cuent čheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwñabeto' le'e da' byažje bčhineto'. ⁹ Zaca'czto' ša gwñabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyaļa' gonle. ¹⁰ Caten' gwzoato' len le'e bžiato' bia' gwnato': "Še no bi gon žin, bi cheyaļa' gagüe'." ¹¹ Perw na' ba beneto' diža' chesene' balle bitw bi žin chonle, con chdale chacle diža'. ¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen. ¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. ¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwñabde' Diosen' gaclene' bene' Tesalónica

¹⁶ Na' chñabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'o'chon', gonšcacze' cont soa cuezle ca' yogo'te ža bite'teze da' chac. Len' soašcacze' len yogo'le.

¹⁷ Na' cuinca' neda' Pablo chzoja' late' dao' le'e cart nga chguapa' le'e tiox. Can' chonca' len yogo' cart dan' chselā' cont nacbia' nedan' chselan', le ba nombia'le letr čhian' can' chzojan'. ¹⁸ Xancho Jesucriston' gaclenšque' yogo'le. Da' na'zen' chzoja' ña'a.

1 Timoteo

Pablo chzoje' cart çe Timoteo

1 Neda' Pablo chzoja' cart nga çhio' le' Timoteo. Naca' postlw çe Jesucriston', le Diosen' len Xancho Jesucriston' gosone' mandadw chona' xşinen'. Dios nan' nonę' chio' yela' mban toli tocaņe na' Xancho Jesucriston' chone' cont zoacho lez şjayzoacho len le' toli tocaņe. ² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaşe' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguoñ'.

Nita' beņe' chosozejni'ide' diža' güenlaže'

³ Caten' gwza'a Efeson' gwy'a'a Macedonian' gwņeyoeda' le' cont bega'aņo' Efeson' neçe nita' bal beņe' chosozejni'ide' beņe' Efeso ca' diža' güenlaže'. Con bi cheyož yedo chesonchgüe' xbab çe diaža çe da' xozxta'ocho ca' na' cheso'e zan cuent çe legaque'. Na' da' yoble chņeyoeda' le' gono' mandadw bich yosozejni'ide' çe da' ca'. Dan' chosozejni'ide' chonen ga yesaczejlaže' beņe', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

⁵ Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' beņe' laždao' xilaže', cheyała' yesone' dan' nezecho naquen güen yogo' ni'a, na' cheyała' yeseljle' diža' li çe Diosen' do yichj do laže'. ⁶ Beņe' ca' chosozejni'ide' diža' güenlaže' bi chesone' ca', na' da'nana' cheso'e diža' da' bibi zaca'. ⁷ La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwçhinchon can' cheyała' gwçhinchon. ⁹ Na' lecze nezecho ley nan' gague chosbagan' beņe' cheson da' güen, san chosbagan' beņe' cheson da' mal na' beņe' cheson güedenag len dan' nonen mandadw goncho. Chosbagan' beņe' bi chosozenag çe Diosen', na' beņe' chesonteze' da' malen', na' beņe' bi chesape' Diosen' bala'aņ neca chesonxene'ne', na' beņe' chesot no xaxna'gaque', na' len nochle beņe' güet beņe'. ¹⁰ Lecze chosbagan' beņe' chesata'lene' no'ole bi nac xo'olgaque' o beņe' byo bi nac beņe' chegaque', na' no beņe' byo beņe' chesata'lenteze' ljež beņe' byoe' gualaz no'ole, na' beņe' cheseçe'xoçje' beņe' yoble cont chesote' legaque' chesezi'e mechw, na' beņe' ca' chesonlaže', na' beņe'

ca' cheso'e diža' güenlaže' lao justis, na' note'teze beņe' cheson da' zej clele len diža' güen da' ba bzejni'i Diosen' chio'. ¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'edan' beņe'.

Pablon' cho'e yela' choçcnen çe Diosen' na' çe Jesucriston'

¹² Choa' yela' choçcnen çe Xancho Jesucriston' ben' chon cont chac chyixjue'eda' xtiže'na'. Choçcnenen' chacde' gona' xşinen' can' chazlaže' na' da'nana' gwleje'nda' gonan'. ¹³ Gwleje' neda' la'czla' cana' bia' diža' bya' çe' na' bgue'eda'ne' na' bçi bsaca' beņe' ca' chesonxene' le'. Na' la'czla' bena' ca', Diosen' beyaşe' beži'ilaže'de' neda', le biņa' şejnilaža'ne' ca hora' na' biņa' gacbe'eda' chona' clele. ¹⁴ Nach Xancho Jesucriston' nži'ilaže'chgüede' neda' na' goclene'nda' cont gwejnilaža'ne', na' na'a chacda'ne' na' lecze chacda' yezica'chle beņe'.

¹⁵ Da' nga naquen to diža' li da' zaca' şejele'cho: Jesucriston' bide' yežlio nga cont beque'e xtoła' chio' beņe' güen da' xinj. Na' chacda' neda' naca' beņe' la'zelagüe gwyanç xtoła'. ¹⁶ Na' la'czla' naca' beņe' la'zelagüe gwyanç xtoła', Jesucriston' beyaşe'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont beņe' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocaņe. ¹⁷ Cheyała' gonxencho Diosen' ben' nac Rey chechon' toli tocaņe. Gague da' te çhen'. Zoacze' la'czla' bi chle'echone' na' naque' la'zelagüe beņe' sina'. Totc le' zaque' gonxencho na' gapchone' bala'aņ toli tocaņe. Na' can' gonščaczcho.

¹⁸ Xi'ina' Timoteo, ben xbab çe dižan' gosoe' beņe' ca' bosozende' le' can' gwna Diosen' çhio' cana'. Na' can' ba gose'e le' gono' xşin Diosen', lecze can' chņeyoeda' le' gonon' do yichj do lažo', la'czla' še gacdo' zdebe gonon'. Soaçhaço' şejnilažo' Diosen', na' soatezo' gono' cont neždo' lo' laždago' bibi da' mal chono'. ¹⁹ Bal beņe' chesonteze' da' malen' la'czla' zjaņeztede' lo' lažda'ogüe' bi cheyała' yesonen', na' da'nana' ba gosebejyichje' bich chesejnilaže' Diosen'. ²⁰ Can' goc çe Himeneo na' çe Alejandro. Da'nana' ba gwñabda' Diosen' yesaque' lo' na' Satanás dan' chnabia' da' xigüe' ca', na' gonen con ca chaclažen' len legaque' cont yesacbe'ede' bi cheyała' yeseneye'e çe Diosen'.

Dan' cheyała' nabecho Diosen' gone'

2 Na' dan' nac da' žialao xen gon chio' chonxencho Diosen': cheyała' nabecho Diosen' gone' bi dan' chyažje chio' lente dan' cheseyažje yogo'loł beñe', na' nabechone' gaclene' yogo'loł beñe', na' güe'cho yela' chołcłen che Diosen' che bi da' güen da' chesac che yogüe'. ² Cheyała' nabecho Diosen' gaclene' beñe' gwnabia' ca', no rey, no gobernador na' nochle beñe' ca' chesenabia', cont soa cuezcho binlo na' bibi gwžon gonxencho Diosen', neca gata' da' gwžon goncho bichle da' cheyała' goncho. ³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' noñe' chio' yela' mban toli tocañe. ⁴ Le chaclaže' gwnežjue' yela' mban toli tocañe che yogo'loł beñe' na' chaclaže' yesejni'ide' diža' li che'. ⁵ Toz Diosen' zoa beñe' zaca' yesonxen yogo'loł beñe', na' lecz toz ben' chozoe' chio' binlo len Diosen', le'na' Jesucriston' ben' golje beñach. ⁶ Jesucristw nan' bnežjw cuine' gote' neče da' mal da' goson yogo'loł beñach, na' cate' bžin ža Diosen' bžie' bia', cana' bene' cont goseneze beñachen' che'. ⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' beñe' ca' bi zjanac beñe' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' beñe' ca' yosoł güiže' Diosen' yesaque' beñe' laždao' xilaže' cont yeselis na'gaquen' laogüen' sin cbi yeseže'e beñe' o yosošašlene' beñe'. ⁹ Na' ca' nac no'ol ca' chesonxen Jesucriston', bi cheyała' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. ¹⁰ San cheyała' yesebec yichjgaque' yesone' da' güen ca' chaclaže' Diosen' yeson yogo' beñe' chesejnilaže'ne'. ¹¹ Na' no'ol ca' lecze cheyała' nite' šize yosozenague' che beñe' ca' chososed chosolo'ede' xtiža' Diosen', na' yesone' con da' yese'ene'. ¹² Neda' bi chona' latje cont no'ol ca' yosozejni'ide' beñe' byo latje lagüe', na' neca chona' latje yesenabi'e beñe' byo. Cheyała' yesenite' šize, ¹³ le cate' Diosen' bene' beñachen' zgua'tec bene' Adánna' na' gwdechle bene' Evan'. ¹⁴ Na' cate' Satanás dan' chnabia' da' xigüe' ca' gwxoayaguen beñe' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' beñe' güen da' xinj. ¹⁵ Perw na' la'czla' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle beñe', na' še zjanite' chesone' can' chazlaže' Diosen' len yela' sina' da' ba bnežjue' legaque'.

Can' yeson beñe' ca' yosogüia yesene'e yezica'chle beñe' chesonxene' Diosen'

3 De to diža' da' zaca' šejle'cho da' žan: "Beñe' chesaclaže' yosogüia yesene'e yezica'chle beñe' chesonxene' Diosen', chesaclaže' yesone' to da' güen, še ca'." ² Na' beñe' gwłane' gone' žin dan' nac ca' cheyała' soateze' gone' da' güen yogo' ža sin cbi gone' da' zaca' tiłchone'. Cheyała' soa toz no'ol che', na' cheyała' gaque' beñe' yo'o xbab, na' gaque' beñe' chnabia' cuine' chone' da' güen, na' gaque' beñe' chon da' zej toli cont beñe' yoble yesape' le' bala'añ. Cheyała' yebede' gwlebe' beñe' liže', na' cheyała' gaque' beñe' chac chzejni'ide' xtiža' Diosen' binlo. ³ Beñe' chzože' bi gac gwłane' žinna'. Bi cheyała' gaque' beñe' yolao chdile chšaše'. Cheyała' gaque' beñe' šagüe' beñe' chon güen len yezica'chle beñe', na' bi cheyała' gaque' beñe' chon znia, neca selaže'chgüe' gone' gan mechw. ⁴ Na' cheyała' gaque' beñe' neze can' gone' cont xi'ine' ca' na' nochle beñe' nita' liže' yosozenague' che' na' yesape' le' bala'añ. ⁵ Le še bi neze' nac gone' cont xi'ine' ca' yosozenagbe' che' na' yesapbe' le' bala'añ, bi gac gone' cont beñe' chesedop chesežag chesonxene' Diosen' yosozenague' che'. ⁶ Bi cuejle beñe' za' chzolao chejnilaže' Diosen' cont gwgüia ne'e beñe' ca' chesonxene' Diosen', le beñe' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. ⁷ Na' beñe' cuejle cheyała' soe' gone' cont beñe' ca' bi zjanac txen yesenezde' chone' güen, le še gone' da' malen' yesene' beñe' che' na' Satanásen' co'oyelan' le' gonche' da' malen'.

Beñe' ca' yeson žin bixjw

⁸ Na' lecze cate' cuejle beñe' yeson žin bixjw da' chata' len beñe' ca' chesonxene' Diosen', le cuej beñe' cheson güen cont gapcho legaque' bala'añ. Lecz cheyała' yesaque' beñe' chesoe' diža' li da' šejle'cho, beñe' bi zjayolagüe' chesezožde', na' beñe' bi yesezelaže' yeseni'e che xšin Diosen' dan' yesone'na'. ⁹ Cheyała' yesaque' beñe' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' beñe' cheson da' güen cont yesenezde' lo' yichjlažda'ogüe' chesone' can' chazlaže' Diosen'. ¹⁰ Na' cate' za' cuejle beñe' ca' yeson žin bixjwna', le na'yañe' can' chesonen', na' še gata'bia' chesonen' binlo bibi cheseçhoe', nachen' cuejle legaque'. ¹¹ Na' no'ol ca' yeson xšin Diosen' lecze cheyała' yesone' cont gapchone' bala'añ. Bi cuejle no'ole chnie' che beñe' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. ¹² Na' cate' cuejle beñe' byo yeson žin bixjw da' chata' ladjo beñe' ca' chesonxene' Diosen', le cuej beñe' zoa toze no'ol che', na' beñe' chon cont bi' che' ca' na' nochle beñe' nita' liže' chosozenague' che'. ¹³ Le še beñe' ca' cheson žin bixjon' yesone' binlo dan' yo'o lo' na'gaque' yesone',

nach yesejnilaže'chgüe' Jesucriston' sin cbi yesežebe', na' yezica'chle beñe' yesape' legaque' bała'añ.

Da' chejni'icho che Diosen' dan' nono gwñeze cana'

¹⁴ Chzoja' le' da' quinga da' cheyała' gonle la'czła' zoa' lez yob yida' gan' zon', ¹⁵ cont še šeda' ba ñezdo' nac cheyała' yeson beñe' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocañe. Na' chio' chdop chžagcho chonxenchone' yo'o lo na'cho choncho cont chesombia' beñe' diža' li che Diosen'. ¹⁶ Da' licze da' za-ca'chgua dan' ba bzejni'i Diosen' chio'. Cana' nono gwñeze da' quinga dan' bzejni'ide' chio' che Jesucriston', žan:

Diosen' bide' golje' beñaçh,
na' Spiritw che Diosen' blo'en naque' beñe' güen juisyw.

Na' beñe' ca' zjanac angl che Diosen' bedeseñe'e le'.
Na' bžin ža Diosen' bene' cont beyepe' yaba gan' yo'ochgua be'ni'.

Na' beñe' ca' cheso'e xtižen' ba goseyixjue'eden' len beñe' že' nación zito',
na' zan beñe' že' lo yežlion' ba chesejle'e che'.

Žin ža bał beñe' yesebejyichje' diža' li che Diosen'

4 Na' Spiritw che Diosen' ba ben' diža' li cont šejni'icho žin ža cate' bał beñe' yesebejyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesexoayaguen legaque'.
² Da' xigüe' ca' yesonen cont nita' beñe' yosozejni'ide' diža' güenlaže' da' siyen' beñe', na' beñe' ca' yosozejni'ide' diža' güenlažen' bibi yesacde' lo' yichjlaž-da'ogüe' caten' yeseziye'e beñe'.
³ Yosožone' yosošagna' beñe' na' yosožone' ye'ej gagwcho bał yela' guagw, la'czła' Diosen' bene' cont zjade yela' guagw ca' cont chio' chonxencho Criston' na' nombia'cho diža' li çhen' gagwchon na' güe'cho yela' choçcilen che'.
⁴ Yogo' dan' ben Diosen' naquen güen na' bi naquen da' gue'echo, con še güe'cho yela' choçcilen che' caten' gagwchon.
⁵ Na' ñezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choçcilen che' cate' gagwchon.

Can' gon Timoteo xšin Diosen'

⁶ Ca nac beñe' ljež chio' chonxencho Jesucriston', cheyała' gwzejni'ido' legaque' da' quinga ba gwnia' le' cont gacleno' legaque' can' chazlaže' Jesucriston', le gwleje' le' cont gwzejni'ido' beñe'. Lecz gonon çhaçh-lažo' še gwzejni'ido' beñe' xtiža' Diosen' dan' chejle'cho, le naquen to diža' güen, na' ba bzenago' çhen do yichj do lažo'.
⁷ Bi gwzenago' che diža' güenlaže' dan' chesaljlaže' beñe' bi chesonxene' Diosen'. Ben byen soaczo' gono' can' chazlaže' Diosen'.
⁸ Ñezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho binlo ña'a na' lecz ca' cate' šjayzoacho len le' toli tocañe.

⁹ Can' ža to diža' dan' zaca' šejle'cho na' dan' zaca' gwzenagcho çhen do yichj do laže'cho.
¹⁰ Na' cont choncho can' chazlaže' Diosen', da'nan' chonchguacho xšinen' na' chyo chçhejlaže'cho cate' chzi'diža' beñe' chio', le ñezecho Diosen' zoe' toli tocañe na' zoacho lez gone' güen len chio'. Le' chaclaže' gwnežjue' yela' mban toli tocañe che yogo' beñaçh, na' can' nacczen gone' len beñe' chesejnilaže' Jesucriston'.

¹¹ Da'nan' bzejni'i beñe' da' ca' ba gwnian' na' ben mandadw yosozenague' che yogo'czen.
¹² Bi go'o latje yosoza beñe' le' šla'ale lagüe da' naco' beñe' xcuide'. Len xtižo' na' len da' chono' ben güen cont yogo' beñe' chesejnilaže' Criston' yesape' le' bala'añ. Len xtižo' na' len da' chono' blo'e legaque' ca cheyała' yesacde' Diosen' na' beñe' lježgaque', ca cheyała' yeseni-ta'çhaçe' yesejnilaže'ne' na' ca cheyała' yesaque' beñe' laždao' xilaže'.
¹³ Na' ña'a šlac biña' yida' da' yoble, gwlec yichjo' gwlabo' Xtiža' Diosen' dan' nyojen len beñe' ca' chesedop chesežag chesonxene' Jesucriston'. Na' gwñeyoede' yosozenague' çhen na' bzejni'ide' bi zejen.
¹⁴ Bi gatlažo' dan' gwlo'o Diosen' lo nao' gono' caten' goseçoa na' beñe' blao ca' yichjon', beñe' ca' chosogüia cheseñe'e ljež chio' chonxencho Diosen', bosozende' le' gwlej Diosen' gono' xšinen'.

¹⁵ Cheyała' cuec yichjo' do yichj do lažo' gono' da' ca' gwlej Diosen' le' gono' cont yogo' beñe' yesele'ede' zejcho' chono' da' güen.
¹⁶ Na' gwsaco' can' soa cuezo' cont soaçhaço' gono' con can' chazlaže' Diosen' na' soaçhaço' gwzejni'ido' beñe' xtiža' Diosen' con can' naquen. Ben ca' cont gaclenen le' na' lecz gaclenen beñe' ca' chosozenag xtižon' cont šjayzoalenle Diosen' cate' žin ža.

Can' cheyała' gon Timoteo len yezica'chle beñe' chesejnilaže' Criston'

5 Še no beñe' byo gole chone' bi da' mal, bi tiło'ne', san gwñeyoede' cuejyichjen', con ben xbab naque' xao'. Na' še no beñe' xcuide' chone' bi da' mal, gwñeyoede' cuejyichjen', con ben xbab naque' beñe' bišo'.
² Na' še no no'ol gole chone' bi da' mal, gwñeyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwñeyoede' cuejyichjen', con ben xbab naque' beñe' zano'. Cheyała' gwsaco' cont gaco' beñe' laždao' xilaže' len legaque'.

³ Chio' chdop chžagcho chonxencho Criston' cheyała' gwnežjwcho da' cheseyažje no'ol ca' ba gosat beñe' çhegaque' še da' li zjanaque' beñe' chyažj ççhine.
⁴ Perw še nita' no xi'ingaque' no xesoagaque', bzejni'ide' legaque' cheyała' yosonežjue' da' cheseyažje no'ol ca', le no'ol ca' ba bososgole' legaque', na' Diosen' chaclaže' yesone' güen len legaque' cont yoso-lo'e chesejnilaže'ne'.
⁵ No'ol ca' nono zoa beñe' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' le-gaque' na' do ža do yel yesenite' yesenabde'ne' gac-lene' legaque'.
⁶ Perw no'ol güezeb ca' chesacde' yesone' con ca' žan çhegaque', len Diosen' yichjlaž-da'ogaquen' naquen ca' che to beñe' ba got la'czła' ñe'

zjambane'. ⁷ Ben mandadw neche bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tiŕe legaque'. ⁸ Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho čhen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

⁹ Quinga nezdno' no'ol güezeb ca' cheyaŕa' gwche-lo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'.

¹⁰ Cuejle con no'ol ca' zjaņezze bene' ba gosonchgüe' da' güen, ca no da' quinga: še bosgole' bi' che' binlo, še blebe' bene' liže', še goclene' yezica'chle bene' chesonxene' Diosen', še goclene' bene' ca' cheseyi chesezane', o še ba bene' bite'tezchle da' güen.

¹¹ Bene' ca' chesedop chesežag chesonxene' Jesucriston' bi cheyaŕa' yesego'o lo' na'gaque' yosogüe'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble, ¹² na' yesape' doŕa' še yesebejyichje' xšin Criston' dan' gosečhebe' yesone'. ¹³ Na' lecze no'ol güezeb xcuide' ca' bi naquen güen gwco'olaochwne' yeselaže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž bene' yesezi'diže' bi chac, le bi cheyaŕa' yesone' dan' nac ca'.

¹⁴ Da'nan' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont bene' ca' cheseque'ede' chio' yesene' chesone' da' mal. ¹⁵ Chnia' ca' le nita' baŕ no'ol güezeb xcuide' ca' ba gosebejyichje' Criston' na' chosozenague' che Satanásen'.

¹⁶ Note'tez bene' chejnilaže' Criston', še nita' no'ol güezeb lo' diaža čhegaque', cheyaŕa' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyaŕa' yesego'o lo' na' bene' ca' chesedop chesežag chesonxene' Criston'.

¹⁷ Na' ca' nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyaŕa' yesacxene', na' cheyaŕa' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' bene' bi zejen. ¹⁸ Cheyaŕa' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'ņ cont ca' gagwba' cate' chlej chšošjba' trigon' neche choj xen'." Na' lecz nyojen žan: "Bene' güen žin cheyaŕa' si' laxjue'."

¹⁹ Bi gono' cuent cate' no'ol bene' gagw xya che to bene' blao bene' nchoj chgüia chne'e bene' lježe' chesonxene' Criston' še bi zoa yeto bene' o yečhope bene' co' da' baŕi. ²⁰ Na' še da' li' ba bene' da' malen', cheyaŕa' tiŕo'ne' lao bene' ca' chesedop chesežag

chesonxene' Criston' cont yezica'chle bene' ca' yesežebe' yesone' da' malen' nac ca'. ²¹ Na' toze can' cheyaŕa' gono' len note'teze bene', bitw nacho baŕi bene' gonxenchguachone' na' yebaŕe' gonchone' nacteze. Na' Diosen' len Xancho Jesucriston' na' len an-gl bene' ca' zjanchoj chesone' mandadw che' zjaņezde' chona' mandadw gono' yogo' da' ca' ba gwnia' nga. ²² Bitw yob cuejo' bene' güia ne'e lježe' cont gague leno' gapo' doŕa' še ben' gwlejon' gone' da' mal. Gwsaco' cont bibi doŕa' gapo'.

²³ Na' dan' tolize chac li'o, bi ye'ejo' toze nis, san güe'ej late' güeje vino.

²⁴ Baŕi bene' nacbia' chesone' da' mal na' yogo'ze bene' zjaņezde' can' chesonen' la'czla' biņa' žin ža yesezi'e castigw čhen. Na' baŕi bene' chesone' da' malen' dan' ngaše' na' da' bi nacbia', perw žin ža gwlo'elaon. ²⁵ Na' lecz ca' naquen len bene' ca' cheson da' güen, nacbia' še da' güenna' chesone', na' la'czla' gague nŕa' da' güenna' chesone', bi nacho yega'aņcze bagaše'ze dan' chesonen'.

6 Na' bene' ca' chesejnilaže' Criston', bene' zjanac esclavos, cheyaŕa' yesacbe'ede' bene' ca' zjanaque' xan žin čhegaquen' zjazaque' cont yosozenague' čhegaque'. Cheyaŕa' yesape' legaque' bala'aņ cont nono ne yela' ya' che Diosen', neca no ne che dan' chzejni'ichon'. ² Bene' ca' zjanac esclavos, še xangaque' lecze chesejnilaže' Criston', bi cheyaŕa' yesone' xbab bi yosozenague' čhegaque' neche zjanaque' txen chesonxene' Criston', san nachle cheyaŕa' yesone' žinņa' do laže'che' na' cheyaŕa' yesacde' xan žin ca' ca' bene' biše', lagüe zjanaque' txen chesejnilaže' Criston'. Bzejni' da' ca' ba gwnia' cheyaŕa' yesone' na' gwneyoe bene' yosozenague' čhen.

Cheyaŕa' soacho mbalaz len da' de čecho

³ Nita' bene' chosozejni'ide' xbab čhegacze' na' bi chososed chosolo'ede' diža' li' che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. ⁴ Bene' ca' chosozejni'ide' dan' zej clele chesonxen cuingaque', chesacde' zjaņezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'. ⁵ Con bi cheyož chedo chesediŕ chosošaše', le ba yo'o da' malen' lo' yičhilažda'ogüe' na' bi zjanombi'e diža' li' che Diosen'. Con chesacde' yososed yosolo'ede' xtiža' Diosen' cont yesaque' bene' gwñi'a. Bi gono' txen len ben' cheson ca'. ⁶ Da' li' zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de čecho. ⁷ Ga'alcho bla'cho yežlion' na' ga'alcho cate' yeza'cho. ⁸ Na' še de da' che'ej chagwcho na' še de xaŕana'cho da' chyažjecho, cheyaŕa' soacho mba len da' ca'. ⁹ Bene' ca' chesezelaže' yesaque' bene' gwñi'a chosozenague' che da' malen' na' cheselažoe' lo' na' gwxiyen'. Chesezelaže' da' zan da' gata' čhegaque' da' yesede čhen, na' da' ca' chesezelaže' chesonen mal len

legaue' na' žin ža yesebiaye'e. ¹⁰ Beņe' chzelaže' mechw nach chzenague' che bite'teze da' mal. Na' nita' beņe' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaohgüe' yela' güen da' mal chegaue'na'.

Cheyla' cuec yichj Timoteon' gone' xšin Criston'

¹¹ Na' ca nac le' Timoteo, bi gono' can' cheson beņe' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soačhačo' šejnilažo'ne', goque beņe', byo bchejlaže' cate' de da' saca'zi'o, na' goc beņe' šagüe'. ¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocaņe, le Diosen' gwleje' le' šjayzo' len le', na' ba bi'o diža' lao beņe' zan žo' chejnilažo'ne'. ¹³ Dios ben' chnežjo yela' mban che yogo' beņachen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaue' zjaņezde' chona' mandadw ¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. ¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle beņe' gwnabia'. ¹⁶ Totec Dios nan' bi nacho žin ža gate'. Na' catec yo'ochgua be'ni' gan'

zoen', nono gac bigue' gaļa'ze gan' zoe'na'. Nono zoa yežlio nga beņe' ba ble'ede' Diosen' na' nono gac le'e le'. Cheyla' gonxenchone' le chnabi'e toli tocaņe. Na' can' gonšcaczcho.

¹⁷ Na' ca nac beņe' ca' chesejnilaže' Criston', beņe' zjanac beņe' gwņi'a lo yežlio nga, gože' bi yesaque' beņe' ya'laže'. Na' yo'o legaue' bi yesone' xbab yesenite' mba lagüe zjanaue' beņe' gwņi'a, le yob te che bite'tez da' de chegaue'. Yo'o legaue' yesezoe' lez yesenite' mbalaz len Dios ben' zoe' toli tocaņe. Toga le' chone' chio' yogo' da' güen da' chyažjecho na' da' chbecho. ¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaue' cont yesaclene' beņe' na' yesebede' yesone' ca'. ¹⁹ Še yesone' ca', na' gaquen ca to yela' gwņi'a da' bi te chen, le Diosen' chaclaže' yesaclene' beņe', na' gone' cont yesenite' mba cate' šjasyenite' len le' toli tocaņe še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che beņe' chosošalj diža' da' bibi zaca', ne che dan' chesene beņe' dan' bi zej lebe len diža' li che Diosen'. Chesonlaže' chesene' cheso'e diža' sina'. ²¹ Beņe' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'.

Chņabšca' gaclen Diosen' le'. Da' na'zen' chzoja'.

2 Timoteo

Pablon' chzoje' Timoteon'

1 Neda' Pablo naca' postlw che Jesucriston', le Diosen' gwnalaže' gwsele' neda' chyixjue'eda' can' gwne' gone' cont note'teze beņe' yesejnilaže' Jesucriston' gata' yela' mban chegaque' toli tocaņe. ² Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše'laže'de' le', na' yesonšque' ca so' binlo len xbab da' yo'o lo' yichjlaž-da'oguoñ'.

Cheyla' güe'cho diža' che Jesucriston'

³ Chonxena' Diosen' do yichj do laža' can' goson da' xozxta'ogua', na' nezdada' lo' yichjlažda'ogua' chona' can' chazlaže' Diosen'. Na' yogo' ni'a cate' choi güiža' Diosen', lagüe ža na' šeže'le, choa' yela' choxcen che dan' chonon'. ⁴ Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'. ⁵ Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezdada' lec ca' chono' le' na'a.

⁶ Da'nana' chneyoeda' le' da' yoble, güe'lažo' gono' da' gwlo'o Diosen' lo' nao' gono' caten' gwwoa' na'ton' yichjon'. ⁷ Diosen' beņe' chio' Spiritw čhen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'.

⁸ Da'nana' chneyoeda' le', bi yeto'edo' chixjue'edo' xtiža' Xancho Jesucriston', na' neca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyla' gono' can' chonan' na' gwyo gwčhejlažo' bi da' gac čhio' cate' chixjue'edo' diža' güen čhen', le zoa Diosen' chaclene' chio' len yela' guac čhen'. ⁹ Diosen' ba noņe' chio' yela' mban toli tocaņe na' gwleje' chio' cont naccho lo' ne'en. Na' bene' ca' da' nži'ilaže'de' chio', gague neče bi da' güen bench. Cate' biņa' xe yežlion' bsi'e xneze sele' Jesucriston' cont gaclene' chio'. ¹⁰ Na' na'a Diosen' ba blo'e nži'ilaže'de' chio', le ba gwsele' Jesucriston' ben' chon yela' mban chechon' toli tocaņe. Na' žin ža gwcuez Jesucriston' yela' goten' na' gone' cont chio' chejle'cho diža' güen čhen' šjayzoacho len le' toli tocaņe.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' beņe' bi zjanac beņe' Israel. ¹² Na' dan' chona' ca', chžaglagua' da' quinga chac

chia', perw bi cheto'eda' čhen, le nombi'a Diosen' ben' chejnilaža'. Ba ben cuina' lo' ne'e, na' nezdada' nape' yela' guac gone' cont ne' soačhača' šejnilaža'ne' caten' žin ža yid Jesucriston' da' yoble.

¹³ Soačhačo' gwzejni'ido' beņe' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'. ¹⁴ Be' latje gaclen Spiritw che Diosen' le' cont soatezo' gwzejni'ido' beņe' diža' li da' bsed blo'eda' le'e, le zoa Spiriton' lo' lažda'ochon'.

¹⁵ Nezdada' Figelo na' Hermógenes len yezica'chle beņe' migw chia' ca' že' distritw che Asia ba gosebejyichje'nda'. ¹⁶ Na' chnaba' gaclenšca Xancho Diosen' Onesiforo len beņe' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga.

¹⁷ Cate' bide' Roma nga, bene' byen beyiljue' neda' con cate'ch beželde'nda'. ¹⁸ Nezdada' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

Cheyla' gwyo gwčhejcho len da' saca'zi'cho

2 Xi'indagua', chnaba' soačhačo' šejnilažo' Jesucriston' lagüe' da' nži'ilaže'de' le'. ² Na' yogo' da' ba bendo' gwduxjue'eda' lao beņe' zan, da' ca' bsed blo'en beņe' yosozenag čhen do yichj do laže'gaque', beņe' ca' guac yosozejni'iden' beņe' yoble.

³ Na' byo bčhej len da' saca'zi'o šlac chono' xšin Jesucriston'. Goc ca to soldadw beņe' bi chžeb bi gac che'. ⁴ Nezecho beņe' zej yela' soldadon' bi chac gon xšine' šlac zeje' lao gwdiła', san chbejyichjen' cont gone' bin' ža ben' nac xan soldadw ca'. ⁵ Na' nezecho beņe' chja'ac lo' güitj cheyla' yesone' cayanen' ba bosoxi'e yesone' cate' yeseyitje', cont gac yesezi'e da' yesone' gan. ⁶ Na' leze nezecho beņe' chela'le chone' žin yiže' chzi'e da' nechw da' chbia lao coseš čhen'. ⁷ Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab che Jesucristw ben' beyas bebane' ladjo beņe' guaten', ben' nac xi'in diaža' che da' rey Davin'. Čhe len' chzejni'ida' cate' chyixjue'eda' diža' güen čhe'. ⁹ Na' da' chyixjue'eda' diža' güen čhen' chosoči chososaque'nda' na' dia' ližya nga ca to no beņe' mal juisyw. Perw nezdada' bibi gac yesone' cont bi gas jalje xtiža' Diosen' lo' yežlion'. ¹⁰ Da'nana' chzanlaže' cuina' gac bi da' gac chia' lagüe da' chyixjue'eda' xtiža' Diosen', le chaclaža' yezica'chle beņe' ba gwleje' cont gata' yela' mban chegaque' toli tocaņe yesejnilaže' Je-

sucriston', na' žin ža šjasyezoe' len le' toli tocaṇe gan' chac da' güen juisyw. ¹¹ Diža' quinga zjanaquen da' li: Še chejnilaže'cho Criston' ben' got neče xtoła'chon', chio' lecze naccho ca to beṇe' guat len da' xinjen' cont bich gonchon.

Na' con can' bosban Diosen' Criston' ladjo beṇe' guaten',

lecze ca' bocobe' yičhjaždao' chio' cont šjayzoacho txen len le'.

¹² Na' še soačhačcho šejnilaže'chone' bite'teze chac checho, lecze gone' cont ṇabia'cho txen len le'.

San še cuejyichjcho Criston', lecze le' cuejyichje' chio'.

¹³ Na' la'czla' še chio' bi goncho can' gwnacho goncho, Diosen' zoe' chone' con da' ba gwne' gone', le Diosen' bi gac gwše'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' beṇe' ca' chesejnilaže' Jesucriston' da' ca' ba bzejni'ida'. Na' yosnisdo' legaque' naquen mal len Xancho Diosen' yesedił yosošašen lježe' che bize diža'. Bibi zejen yesone' ca', le cate' beṇe' chesende' chesedił chosošaše', chonen cont bi yesejle'e che xtiža' Diosen'. ¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to liča. ¹⁶ Bi gono' txen len beṇe' chesoe'chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' beṇe' yesonche' da' mal. ¹⁷ Dižan' nac ca' chžiyin' beṇe' ca to yižgüe' mal. Can' ba goc che Himeneo na' Fileto, ¹⁸ gosebejyichje' diža' li da' chzejni'in che Criston'. Chososed chosolo'ede' chesene' bi soacho lez žin ža yebancho ladjo beṇe' guaten', le chesene' ba gwde che da' ca'. Na' bał beṇe' ba chesejnilaže' Criston' chesacžejlaže' ṇa'a neče xtiža' beṇe' ca'. ¹⁹ San chio' zoačhačcho chzenagcho diža' li che Criston' na' Diosen' chone' cont bi chbejyichjchon. Da'nan' zaca'lebcho ca to lene yo'o da' nac da' gual. Na' nyojce Xtiža' Diosen' žan: "Diosen' nezde' no beṇe' zjajo'o lo ne'e." Na' lecze nyojen žan: "Note'tez beṇe' že' chejnilaže' Xancho Diosen', cheyała' cuejyichje' bich gone' da' mal."

²⁰ Nezecho to liž beṇe' gwṇi'a de no tas platw na' no yeso' xguag de oro de plata da' zjazaca'chgua. Lecze de yeso' xguag de gona', na' de no batia na' bichle de yag da' chesonen žin da' bitec zjazaca'. ²¹ Can' naquen len chio', note'tezcho še cuejyichjcho da' malen', nach Xancho Diosen' gwčhine' chio' neče goncho da' zan da' güen da' chaclaže' goncho. Na' še goncho ca', saca'lebcho ca to tas o to xguag de oro da' zaca'chgua.

²² Na' ca nac le', cheyała' cuejyichjo' bite'teze da' mal da' chzelaže' lažda'oguon' gono', da' ca' chesezelaže' note'teze beṇe' güego' yesone'. Beyiljwlaže' nac gono' cont gaco' beṇe' güen len Diosen' na' cont soačhačcho šejnilažo'ne', cont gacdo' Diosen', na' cont soa cuezo' binlo len beṇe' lježo' ca'. Ben ca' txen len yogo' beṇe' chesenab goclen lao Xancho Diosen', beṇe' zjanac beṇe' laždao' xilaže'. ²³ Bi gono' txen len beṇe' bi

chesejni'ide', beṇe' chosošaše' cheso'e diža' da' bibi zejen, le xtiža'gaquen' chonen ga chesacyož beṇe'.

²⁴ Chio' choncho xšin Diosen' bi cheyała' tiļe gwšašlencho beṇe'. Cheyała' gaccho beṇe' šagüe' len yogo'ze beṇe', cheyała' nezecho naquen' gwzejni'icho legaque' che Diosen', na' cheyała' gapcho yela' chxenlaže' len legaque'. ²⁵ Na' cate' güe'cho consejw che beṇe' bi chesaclaže' yosozenague' diža' li che Criston', cheyała' güe'lencho legaque' diža' šagüe', na' cuezcho gaclen Diosen' legaque' yosoša' xbab chegaquen' cont yosozenague' che diža' li chen'. ²⁶ Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

Naquen' yeson beṇe' cate' ba zoa yid Xancho Jesucriston' da' yoble

3 Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. ² Beṇe' zan yesonxen cuingaque', na' zane' yesebec yichje' gata' da' zča'o xmechwgaque'. Zane' yeso'e diža' ca güenṇa' chesone' na' yesaque' beṇe' ya'laže'. Yesene'e che Diosen'. Bi yosozenague' che xaxṇa'gaque'. Bi yeso'e yela' choxclen che Diosen' na' bi yesape' le' bala'aṇ. ³ Bi yesacde' beṇe', bi yesyezi'xen che lježe', yesene' mal che beṇe' yoble, con yesonteze' bite'teze da' mal da' žan chegaque', yesacchgüe' beṇe' znia, na' yesegue'ede' bite'tez da' nac da' güen. ⁴ Yosode lježgaque' lo na' beṇe' chesegue'ede' legaque', bi yesežebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'. ⁵ Lecze da' zan da' yesone' cont yesaque' beṇe' chesonxenchgüe' Diosen', perw bi soa yela' guac che Diosen' len legaque'.

Bi gono' txen len beṇe' ca' cheson da' ca' ba gwnian'. ⁶ Beṇe' ca' cheson ca' chja'aque' liž no'ole beṇe' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesonteze' da' mal can' ža lo' lažda'ogaquen'. ⁷ No'ol ca' chosozenague' che note'teze' že' gwzejni'ide' legaque', perw na' bi chžin ža yesejni'ide' diža' li che Diosen'.

⁸ Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' beṇe' gwxiye' ṇa'a chesegue'ede' diža' li che Diosen'. Nčoļ yičhjažda'ogaque' yela' güen da' mal chegaquen', na' gague' da' li chesejnilaže' Diosen'. ⁹ Bi gac yesonlede' beṇe' sša, le yob gac chegaque' can' goc che da' Janes na' da' Jambres, žin ža cate' yezica'chle beṇe' yesacbe'ede' chosozejni'ide' clele yela' bi chejni'i chegaque'.

Consejw da' zelagüe' da' bnežjw Pablon' Timoteon'

¹⁰ Na' le' Timoteo, nezeczedo' can' ba bzejni'ida' le' na' can' zoa' chona' da' güen. Nezdō' chi' yichja' gona' yogo'loł da' ža Diosen'. Nezdō' zoačhača' chejnilaža'

Diosen' bite'tez da' chac čhia'. Na' ñezdo' napa' yela' chxenlaže' len ljež beñača' na' zoacza' chacda' le-gaque'. Ñezdo' bi chbejyichja' xšin Diosen' da' chona', la'czla' da' zan da' ba bosochi bososaca' beñe' neda'. Na' ñezdo' da' ca' gosonde' neda' cate' gwzoa' ciuda Antioquía na' cate' gwy'a yež Iconio len yež Lистра, na' can' gwdi gwxaca'. Na' ñezdo' Xancho Jesucriston' bosle' neda' lo yogo' da' ca' da' goc čhia'. ¹² Da' li yesenita' beñe' yosochi yososaque' note'tez chio' chejnilaže'cho Cristo Jesús'en', chio' chi' yichjcho chzenagcho čhe'. ¹³ Beñe' mal beñe' güexoayag ca' šja'acze' yesonche' da' xinj'en', yeseziye'e beñe' na' lecze yesejle'e čhe diža' güenlaže' da' yesoe' beñe' yoble.

¹⁴ Na' le' Timoteo, cheyała' soačhačo' gwzenago' čhe da' ca' chejni'ido' čhe Criston'. Ñezdo' naquen diža' li, le bzejni'iton' le'. ¹⁵ Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyała' šejnilaže'cho Cristo Jesús'en' cont gata' yela' mban čhecho toli tocañe. ¹⁶ Cuiñ Diosen' bzejni'ide' beñe' ca' bosozoj Xtižen' cont bosozoj' xbab čhen'. Da'nan' doxen Xtiža' Diosen' dan' nyojen zaca'chguan da' chzejni'in chio' čhe Diosen', chdiñen chio' cate' choncho da' xinj, na' chzejni'in chio' nac goncho cont na' Diosen' choncho da' güen. ¹⁷ Na' chio' chejnilaže'cho Diosen', Xtižen' chzejni'in chio' yogo'lo' da' cheyała' ñezecho cont soacho goncho yogo' da' güen.

4 Yid Xancho Jesucriston' da' yoble cont gone' yela' justis čhe yogo' beñač, beñe' ñe' zjamban lente beñe' ba gosat, na' caten' yide' da' yoble nach solao ñabi'e yežlio nga. Na' Timoteo, Diosen' len Xancho Jesucriston' zjañezde' chona' mandadw gono' da' quinga: ² Čhixjue'edo' xtiža' Diosen' cate' ñlatjo' na' cate' chacdo' bi ñlatjo'. Be'len beñe' diža' cont yeseñezde' chesone' da' xinj, gwdiñ legaque' čhe da' malen' chesone' cont yesyetinjden', na' gwđap yela' chxenlaže' bzejni'ide' da' cheyała' yesone'. ³ Gwžin ža cate' bi yesaclaže' beñe' yosozenague' xtiža' Diosen' da' chzejni'icho da' naquen da' li, na' yosotobe' beñe' yosozejni'ide' legaque' diža' yoble da' yesazlaže' le-gacze'. ⁴ Yesebejyichje' bich yosozenague' čhe diža' jin' na' yosozenagche' čhe diža' da' chesaljlaže' beñe'. ⁵ Perw ca naco' le', cheyała' gaco' beñe' yo'o xbab, na' gwđap yela' chxenlaže' len yogo'te da' sacazi'o, na' soatezo' go'o diža' güen čhe Jesucriston' do yichj do lažo'. Ben yogo' da' gwlo'o Diosen' lo nao' gono'.

⁶ Na' ca nac neda', ba zoa yesote' neda', da' li ba chžin ža šjayzoa' len Diosen'. ⁷ Na' chebeda' guac ñia' do yichj do laža' ba gwđiñena' da' chgue'e Diosen'. Ba bena' yogo'lo' da' gwlo'o Diosen' lo na' gona' na' ba

gwzoačhača' chejnilaža' Jesucriston' na' ñe' zoačhačcza'. ⁸ Na' cate' šjayzoa' len Diosen', gone' cont soa' mba da' bena' güen šlac mbana'. Xancho Jesucriston' zeje' to liča, na' cate' žin ža čhoglagüe' nac gac čhe yogo'lo' beñe', gague neda'zen' gone' soa' mba, san yogo' nochle beñe' chesyebede' chesebeze' baten' yide' da' yoble, lecze gone' cont legaque' yesenite' mba.

Da' chaclaže' Pablon' gon Timoteon'

⁹ Ben byen con ga zelao saque'do' yob yido' nga. ¹⁰ Ben ca', le Demas ba gwlejyichje'nda' na' ba zjayde' yež Tesalónica da' chi'chgua yichje' bin' gata' čhe' lo yežlio nga. Na' Crescente ba zeje' Galacia na' Titon' ba zeje' Dalmacia. ¹¹ Yetoga Lucas nga'anlen neda' nga. Na' čhe'šco' Marcos cate' yido', cont gaclene' neda' len xšin Dios da' chona'. ¹² Ca nac Tíquicon', ba gwseła'ne' ciuda Efeso. ¹³ Na' chaclaža' goxo' xadon čhia' da' bocua'aña' yež Troas liž Carpo cate' yido', na' lecze goxo' libr ca', na' da' žialaoch goxo' yid ca' da' ba zjanyoj.

¹⁴ Alejandro beñe' güečhač yan' ba benchgüe' mal len neda'. Xancho Diosen' gwnežjue' le' castigw čhe da' malen' bene'. ¹⁵ Na' gwsaco' len le', le chonchgüe' clele len xtiža' Diosen' da' chyixjue'echo.

¹⁶ Cate' bosodie' neda' lo na' justis ca' da' nechw, nono gwzoa no gaclen neda', yogo' beñe' ca' godca' yesaclen neda' gosebejyichje'nda'. Diosen' yezi'xene' čhegaque' da' bi gosaclene'nda'. ¹⁷ Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' beñe' ca' že' na', beñe' bi zjanac beñe' Israel. Na' bosle' neda' lo na' yela' goten'. ¹⁸ Na' ñezda' yoslacze Xancho Jesucriston' neda' lo yogo' da' mal da' gac čhia', na' guaclencze' neda' šlac žin ža šjayzoalena'ne' gan' zoe' chnabi'e. Cheyała' gonxenchwne' toli tocañe. Can' gonščacžcho.

Pablo chguape' tiox yeto čhope' na' chñablaže' gaclen Diosen' legaque'

¹⁹ Gwguapšco' tiox Prisca na' Aquila na' lecz ca' beñe' lo' yo'o čhe Onesíforo. ²⁰ Erasto bega'añe' ciuda Corinto, na' bocua'aña' Trófimo yež Mileto, le gocšende'.

²¹ Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezi-ca'chle beñe' chesejnilaže' Jesucriston' nga chosoguape' le' tiox.

²² Chñaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

Tito

Pablon' bzoje' cart nga

1 Neda' Pablo chona' xšin Diosen' na' naca' postlw che Jesucriston' cont gaclena' beṇe' ca' gwleṇ Diosen' yesejnilaže'ne', cont yesenezde' can' ža diža' li che Diosen'. Na' diža' li čhen' chzejni'in can' goncho da' chazlaže', ² na' chzejni'in zoacho lez šjayzoacho len Diosen' toli tocaṇe. Za' xe yežlion' Diosen' gwne' beṇe' yesejnilaže' le' šjasyenite' len le' toli tocaṇe, na' Diosen' bi chonlaže' bite'teze da' že'. ³ Na' ṇa'a ba chac da' bžie' bia' gac da' ba chzejni'ida' beṇe' xtižen', le Dios ben' noṇe' yeḷa' mban čecho toli tocaṇe gwlo'e lo na' chyxjue'eda' beṇe' xtižen'. ⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' noṇe' yeḷa' mban čecho toli tocaṇe yesaclenšque' le'e na' yesyeyaše'de' le'e na' yesone' cont soa cuezle binlo len xbab čhelen'.

Da' chon Titon' gan' nzi' Creta

⁵ Cate' bocua'aṇa' le' gan' zoa yežlio da' nzi' Creta dan' chi' lo nisdaon', gwnia' gwzožo' gono' dan' chona' cate' gwzoa' na', to to yež cuejo' beṇe' blao beṇe' yosozejni'i na' yosogüia yesene'e yezica'chle beṇe' chesejnilaže' Jesucriston'. ⁶ Na' še zoa beṇe' zoacze' chone' da' güen cont bibi de da' yosode'e beṇe' yesene' da' xinjen' chone', še naque' beṇe' zoa toz no'ol che', še xi'ine' ca' chesejnilaže' Criston', na' še bi zjanaque' beṇe' chesyedabaga', san chosozenague' cont bi zjalaže' chesone' da' xinj, ca beṇe' nac ca' cheyaḷa' cuejo' güia ṇa' lježe'. ⁷ Cate' cuejo' beṇe' co' Diosen' lo ne'e güia ṇe'e yezica'chle beṇe' chesejnilaže' Jesucriston', cuejo' beṇe' zoacze' chone' güen. Bi cuejo' beṇe' ya'laže', beṇe' naque' beṇe' loc, na' beṇe' borrašw. Bi cuejo' beṇe' chebede' cueque' žaš, na' ṇeca cuejo' beṇe' zelaže' gone' da' xinj cont gone' gan mechw. ⁸ Beṇe' cuejo' cheyaḷa' gaque' beṇe' chbede' chlebe' beṇe' zito' ližen'. Cheyaḷa' gaque' beṇe' zoateze' chone' da' güen na' beṇe' chon xbab, beṇe' chon da' zej to licha, beṇe' chon da' chazlaže' Diosen' na' beṇe' chon con ga zelao chzaque'de' cont chone' bi da' ža Diosen'. ⁹ Cheyaḷa' gaque' beṇe' zoačhače' do laže' chzenague' diža' li che Diosen' da' bzejni'ida' cont gac gwzejni'ide' beṇe' yoble diža' güenṇa', na' gone' čhačhlaže' cont yesenite' yesejle'e da' naquen da' li, na' gac gwlo'ede' beṇe' ca' chesene' contr diža' li che Diosen' cont yesenezde' clelen' chesone'.

¹⁰ Chnia' gono' ca', le nita' beṇe' zan beṇe' Israel gualaž čhia' na' yebaḷ beṇe' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' beṇe'. ¹¹ Na' da' zjachi' yichjgaque' yesone' gan mechw, da'nan' chosozejni'ide' da' zej clele. Cheyaḷa' gonle cont yesenite' šize bich yosozejni'ide' diža' güenlažen', le clelen' chesone'. Na' beṇe' zan len beṇe' lo' yo'lo chegaque' chesacžejlaže' che xtiža' Diosen' ṇeche xtiža'gaquen'.

¹² Cana' gwzoa to beṇe' gwṇeya'a, goque' beṇe' Creta, na' gwne' che beṇe' gualaž che' ca': "Beṇe' Creta bate'teze zjanaque' beṇe' güenlaže' na' zjanaque' ca bež znia' yeḷa' güen da' xinj čhegaquen'. Lecze zjanaque' beṇe' lia na' beṇe' xagüed." ¹³ Na' da' li can' gwnen'. Da'nan' tiḷo' legaque' che da' xinjen' chesonen' cont ṇita'čhače' yesejle'e xtiža' Criston'. ¹⁴ Gono' ca' cont bich yosozenague' che diža' güenlažen' chesaljalaže' beṇe' Israel gualaž čhia' ca', na' ṇeca yosozenague' che nochle beṇe' ba gosebejyichje' diža' li che Diosen'.

¹⁵ Diosen' ba none' yichjlažda'ochon' xilaže', na' ṇe da' chagwcho ṇe da' choxe'cho bi chžonen gac yichjlažda'ochon' xilaže'. San ca nac beṇe' yichjlaždao' mal ca', beṇe' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'. ¹⁶ Chesene' zjanombi'e Diosen', perw nacbia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' beṇe' güedenag len xtižen' na' bi chesac yesone' da' güen.

Xtiža' Diosen' da' chsed chlo'echo beṇe' naquen güen

2 Na' le', cheyaḷa' gwzejni'ido' beṇe' yesone' can' ža diža' li che Diosen'. ² Bzejni'i beṇe' byo gol ca' bi yesezožde', san yesenite' cont beṇe' yezica'chle yesape' legaque' bala'aṇ. Bzejni'i legaque' to toe' cheyaḷa' yesenabia' cuine' cont yesenite' yesone' da' güen, na' bzejni'i legaque' cheyaḷa' yesenita'čhače' yesejnilaže' Diosen'. Cheyaḷa' yesacde' beṇe' na' yesape' yeḷa' chxenlaže' bite'teze da' chac. ³ Lecze ca' bzejni'i no'ol gole ca' cont yesenite' yesonxene' Diosen', na' bi yesene' che beṇe', ṇeca yesezožde'. Cheyaḷa' yesenite' yesone' da' güen cont yeseneze beṇe' yezica'chle can' cheyaḷa' yesone'. ⁴ Na' no'ol gol ca' cheyaḷa' yosozejni'ide' no'ol xcuide' ca' yesenite' binlo len beṇe' che to toe' na' yesacde' legaque' len bi čhegaque' ca'. ⁵ Na' yosozejni'ide' legaque' cont to toe'

yesenabia' cuine' na' yesone' da' zaca' yesone' cont yesaque' beñe' laždao' xilaže' len yogo' da' chesone', na' yosogüia yesena' ližgaque' binlo, yesaque' beñe' šagüe' na' yosozenag to toe' che beñe' čhegaque'. No'ole xcuide' ca' cheyała' yesone' güen can' ba gwnian' cont nono ñe mal che xtiža' Diosen'.

⁶ Na' ľecze cheyała' ñeyoedo' beñe' byo xcuide' ca' cont to toe' yesenabia' cuine' na' yesone' da' cheyała' yesone'. ⁷ Na' le', bite'teze da' gono', ben con da' nac güen cont yesacbe'e beñe' yoble naquen' cheyała' yesone'. Cate' chsed chlo'edo' beñe', bzejni'i ľegaque' do lažo', benen cont nacbia' chapo' Diosen' bala'ñ. ⁸ Bsed blo'e diža' ľi cont nono ña xtižon' naquen mal. Na' še soatezo' gwsed gwlo'edo' diža' ľi, nachen' beñe' ca' chesexi'a chio' yesyeto'ede' da' bi chesyěželde' bi da' mal yesene' čhecho.

⁹ Gož beñe' güen žin ca' yosozenague' che xan-gaquen' na' yesone' bite'teze da' yese'ene' sin cbi yosyožiče xtiža'gaquen'. ¹⁰ Bi yesebane' bi da' de che xan-gaquen', san yesenite' do laže' cont yezica'chle beñe' yesele'ede' chesone' güen na' yesacbe'ede' güenna' nac xtiža' Diosen', Dios ben' noñe' yeła' mban čhecho toľi tocañe.

¹¹ Diosen' nži'ilaže'de' chio' beñač na' ba blo'e cha-claže' goñe' yeła' mban toľi tocañe che yogo'cho. ¹² Na' da' none' ca' chzejni'in chio' cheyała' cuejyichjcho yogo' da' choncho da' bi chazlaže' na' yogo' da' chzelaže'cho gata' čhecho o da' chzelaže'cho goncho da' bi naquen güen lagüen'. To tocho cheyała' soa cuzcho nabia' cuincho cont goncho da' nac da' zaca'. Na' cheyała' goncho da' zej to ľicha; na' cheyała' soacho gonxencho Diosen' yežlio nga. ¹³ Ľe šlac zoacho yežlio nga zoacho mbalaz ñezecho žin ža yid Jesucriston' da' yoble nse'e be'ni' juisyw. Naque' Dios čhecho ben' chonxencho na' ben' noñe' yeła' mban čhecho toľi tocañe, na' zaca'chgüe'. ¹⁴ Ľen' bnežjw cuine' ñeče chio' cate' gosote'ne' cont bñitlagüe' xtoła'chon', na' beya' beyibe' yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

¹⁵ Can' cheyała' gwzejni'ido' beñe'. Na' cheyała' goño' čhač laže' yesone' da' güen na' tiľo' beñe' cheson da' xinj, ľe Diosen' ba gwsele' le' na' ba beñe' le' yeła' chn-abia' cont gwzejni'ido' ľegaque'. Bi go'o latje yosozoe' le' to šļa'ale.

Can' cheyała' gon chio' chejnilaže'cho Jesucriston'

3 Da' yoble yozzendo' beñe' chesejnilaže' Jesucriston' cheyała' yosozexjwyichje' yosozenague' che justis ca' na' che beñe' gwnabia' čhegaque' ca' na' bate'teze cheyała' yesone' da' güen. ² Yozzendo' ľegaque' bi cheyała' yesene' mal che note'teze beñe'. Bi cheyała' yesediľ yosošaše', san cheyała' yesaque' beñe' šagüe' na' yesape' yeła' chxenlaže' len yogo'loľ beñe'.

³ Chio' ľecze bi gwejni'icho cana' na' bencho güedenag len Diosen'. Gwejle'cho diža' güenlažen' na' ben-

tezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a ľježcho. Be-segue'e beñe' chio' na' bgue'e ľježcho. ⁴ Perw bžin ža Dios ben' noñe' yeła' mban čhecho toľi tocañe blo'ede' chio' catec beñe' šagüe' naque' na' catec chacde' chio' beñač. ⁵ Noñe' chio' yeła' mban toľi tocañe gague ñeče bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw čhen' boboben yichjlažda'ochon'. ⁶ Diosen' gwsele' Spiritw čhen' zoan lo' yichjlažda'ochon' chaclenchguan chio', ľe Jesucristw ben' noñe' yeła' mban čhecho toľi tocañe gwñabde'ne' selen'. ⁷ Na' ca' ba beyaše' beži'ilaže'de' chio' cont beyone' chio' beñe' güen lagüen' na' cont soa cuzcho ñezecho žin ža šjazyoacho len ľe' toľi tocañe.

⁸ Da' ca' ba gwnia' nga zjanaquen da' ľi, na' gono' byen yosozenag beñe' ca' gwzejni'ido' čhen. Ľe beñe' ca' ba chesejnilaže' Diosen' cheyała' yesebec yichj-gaque' yesone' da' güen. Na' da' quinga ba gwnia' zjazaca'chguan na' yesaclenen note'teze beñe'. ⁹ Perw bi gono' txen len beñe' chesediľ chosošaše' che bize diža' da' bi zejen. Na' bi cuec yichjo' che diaža che da' xozxta'ocho ca'. Bi gono' txen len beñe' chesediľ chosošaše' che bi zejen dan' nyoj ľe'e ľey da' bzoj da' Moisésen', ľe da' chesone' ca' bi chaclenen beñe' na' bi naquen da' zaca'.

¹⁰ Na' beñe' ca' cheson cont beñe' ca' chesedop chesežague' chesonxene' Jesucriston' chesechoje' čople, ñeyoedo' ľegaque' bich yesone' ca'. Na' še ba gwñeyoedo' ľegaque' to čhope ñi'a na' bi chosozenague', yebejo' ľegaque' ca'ale. ¹¹ Ľe da' bi chosozenague' nachen' ñezecho zjambiaye'e na' zjanape' doľa' che da' xinjen' chesone'.

Can' cheyała' gon Titon'

¹² Cate' seľa' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, ľe ba bečhoglaža' yega'aña' na' tiemp zag. ¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez. ¹⁴ Beñe' ľježcho ca' chesejnilaže' Criston' cheyała' yesoe'laže' yesone' da' nac güen na' yesaclene' beñe' chyažj chčhine. Ľe cheyała' gaccho beñe' chon da' zaca'.

Beñe' ľjež Pablon' chosoguape' Titon' tiox

¹⁵ Yogo' beñe' cheson xšin Diosen' txen len neda' nga chosoguape' le' tiox. Na' chñaba' gwguapšco' tiox beñe' ca' zoaleno' na', beñe' ca' chesacde' chio' da' nacho txen chejnilaže'cho Criston'. Diosen' gaclenšque' yogo'le. Da' na'zen' chzoja'.

Filemón

Pablo chzoje' carten'

1 Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len beñe' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. ² Na' lecce chguapto' tiox beñe' ca' chesedop chesežague' chesonxene' Jesucriston' ližo'. Na' le' Apia, naco' ca beñe' zanto', na' le' Arquipo, chono' neto' txen choncho xšin Diosen', lecce chguapto' le'e tiox. ³ Chñabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacde' beñe' lježe'

⁴ Na' le' Filemón, yogo' ni'a cate' chjayze'eda' le' šlac choj güiža' Diosen', choa' yeja' choxclen che' can' ba chono'. ⁵ Ba benda' diža' can' chejnilažo' Xancho Jesucriston' na' can' chacdo' lježcho beñe' lecce chesejnilaže' Jesucriston'. ⁶ Na' chñaba' gaclen Diosen' beñe' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chñaba' gaclene' legaque' cont yesacbe'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. ⁷ Beñe' migw, leca chbeda' na' chac chaçh laža' nezda' chacchgüedo' beñe' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwñabe' yezi'xen Filemónna' che Onésimo

⁸ Dan' chacdo' Criston' na' chacdo' beñe' lježo' ca', da'nan' chñeyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwçhina' yeja' chnabia' da' yo'o lo na'. Perw bi žan gona' ca'. Neda' Pablo ba naca' beñe' gole na' lecce na'a ba dia' ližya nga da' chyixjue'eda' xtiža' Jesucriston'. ¹⁰ Na' chñaba' goclen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

¹¹ Cana' bi goque' mos güen chio', san na'a ba naque' mos güen chio' na' lecce ca' chia' neda'. ¹² Ba chesela'ne' laguo', na' chñeyoeda' le' yolebo'ne' na' yezi'xeno' che', le leca chacda'ne'. ¹³ Zelaža' yega'anlene' neda' cont gaclene' neda', gone' da' cheyała' gono' šlac dia' ližya nga da' chyixjue'eda' xtiža' Jesucriston'. ¹⁴ Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on. ¹⁵ Diosen' be'e latje beza' Onésimon' ližon' šlož cont soale txen toli tocañe. ¹⁶ Na' na'a bich naque' mos chio' na'ze san naque' ca beñe' bišo' da' naque' txen len chio' chejnilaže'cho Xancho Jesucriston'. Lecca chacda'ne', na' le' cheyała' gacchdo'ne', gague con ca chacdo' note'teze beñaçh, san can' chacdo' beñe' lježo' chesejnilaže' Xancho'.

¹⁷ Da'nan' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedeña'a le'e. ¹⁸ Na' še bi da' mal bende' le' o še bi da' chałe' chio', neda' chixjuan'. ¹⁹ Cuincza' neda' Pablo chzoja' da' nga, neda' chixjua' bi da' chałe'. Na' bibi chnia' che da' chało' le' chia' neda' da' ba de yeja' mban chio' toli tocañe. ²⁰ Beñe' migw, da' chaquecho Xancho Jesucriston' chaclaža' gono' dan' chñaba' nga ca to goclen chia'. Benšca ca soa' mbalaz, le naccho txen len Criston'.

²¹ Zoa' lez gwzenago' chia' na' goncho' güen clel ca dan' žia' le', da'nan' chzoja' le'. ²² Na' yeto da' chñaba', chaclaža' yedesoa' ližon' cate' yida' gan' zoalen'. Le zoa' lez yob gac yedyeña'a le'e can' chñable lao Diosen' cate' choj güižlene'.

Beñe' ca' nita' len Pablon' chosoguape' Filemónna' tiox

²³ Epafra die' ližya nga txen len neda' da' chyixjue'ede' xtiža' Cristo Jesúsén'. Na' le' chguape' le'e tiox. ²⁴ Na' leccz ca' beñe' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclenšcacze' le'. Da' na'zen' chzoja'.

Hebreos

Diosen' gwsele' Xi'inē' cont be'lene' beṇaḇhen' diža'

1 Cani' Diosen' be'lene' da' xozxta'ochō ca' diža' len beṇe' gwsele' gosoe' xtižen'. Zan las gosoe' da' beṇe' ca' xtižen' na' nža'te ca' gosoen' to toe'. ² Perw ṇa'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inēn' bedezejni'ide' chio'. Na' Xi'inē Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'inē Diosen' yogo' beṇaḇ, beyixe', na' bica'chle da' bene'. ³ Na' Xi'inē Diosen' chlo'e catec beṇe' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'inē Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjaychi'e cuit Xe' Diosen' ben' nac beṇe' zaca' juisyw na' chnabi'e txen len le'.

Xi'inē Diosen' zaca'che' ca angl ca'

⁴ Naque' beṇe' zaca'chgua ca angl ben' cheson žin che Diosen', na' Diosen' bene' cont leca ba chacx-enche' ca angl ca'. ⁵ Diosen' biṇa' ye'e ne to angl ca dan' gože' Xi'inēn', gože'ne':

Len' naco' Xi'inā;
ṇa'aža ba blo'a zoaczo'.

Na' biṇa' güe'e diža' che note'teze angl can' bi'e diža' che Xi'inēn', gwne':

Neda' gona' cont gacbia' naca' Xe',
na' gona' cont gacbia' naque' Xi'inā.

⁶ Na' da' nac Xi'inē Diosen' la'zelagüe beṇe' zaca', da'nān' cate' Diosen' gwsele'ne' yežlio nga gwne':

Yogo'loḷ angl chia' cheyała' yesonxene' le'.

⁷ Na' che angl ca' gwne':

Chona' cont angl chia' ca' beṇe' chesone' žin chia' chesaque' ca be' dan' cheḇj na' chesaque' ca yi' beḷ.

⁸ Perw che Xi'inēn' be'e diža', gwne':

Len' naco' Dios na' ṇabi'o toḷi tocaṇe.

Na' leca güen chnabi'o, chono' con da' zej to liča.

⁹ Chebedo' da' zej to liča na' chgue'edo' da' malen'.

Da'nān' neda' Dios ben' chonxeno' ba bena' cont zoa-cho' mbalazech ca note'teze beṇe'.

¹⁰ Na' da' yoble gozna Diosen' che Xi'inēn':

Xāna' Dios, beno' yežlion' ža gwlaste,
na' yogo' da' chle'echo le'e yaban' lecze le' benon'.

¹¹ Na' gwžin ža cate' te che yogo' dan' chle'echo le'e yaban' na' lo yežlion',

perw le' bi te chio'; soaczo' toḷi tocaṇe.

Na' gwša'a le'e yaban' na' yežlion' ca to beṇe' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to beṇe' cate' chotob xe'.

Perw le', tozecze can' gaco' toḷi tocaṇe, gwbat žin ža te chio'.

¹³ Diosen' biṇa' ye'e ne to angl ca dan' gože' Xi'inēn', gože'ne':

Gwche'edo' cuita' nga ṇabia'cho txen,

na' gona' cont yogo' no chesegue'e le' yosozeḇjw yich-je' yosozenague' chio'.

¹⁴ Na' ca nac angl ca', yogue' zjanaque' beṇe' cheson xšin Diosen', na' chsele' legaque' chesaclene' chio' ba gwleje' šjayzoacho len le'.

Cheyała' gwzenagcho che Diosen' cont yeque'e xtoła'chon'

2 Na' da' nac Xi'inē Diosen' beṇe' zaca'ch ca angl ca', do yichj do laže'cho cheyała' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon. ² Diosen' go-claže' yosozenag da' xozxta'ochō ca' che ley che' dan' goseyixjue'e angl ca'. Da'nān' Diosen' bnežjue' castigw da' cheyała' si' to toe' bate'tez bi bosozenague' chen, con ca nac da' mal da' gosone'. ³ Gague da' yelacho bi si'cho castigw še bi gwzenagcho xtiža' Xāncho Jesúsēn' da' gwduxjue'ede' že' chaclaže' goṇe' yela' mban checho toḷi tocaṇe. Da' zaca'chgua da' ben Xāncho Jesúsēn' cont gata' yela' mban checho toḷi tocaṇe. Cuine' gwduxjue'eden' da' nechw, na' beṇe' ca' gosodalen le' bosolo'ede' chio' le naquen da' li.

⁴ Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xāncho Jesuscriston' naquen da' li.

Jesucriston' goque' can' nac chio' beṇaḇḇ

⁵ Na' gague angl can' yesenabia' cate' žin ža gata' yežlio cobe dan' choe'cho diža' chen. ⁶ Na' de late' Xtiža' Diosen' gan' nyoj diža' da' be'len to beṇe' Diosen', gwne':

¿Bixchen' nži'ilažo' neto' beṇaḇḇ? le bitec bi zaca'to'.
Na' ¿bixchen' chi' yichjo' chacleno' neto'?

⁷ Beno' cont beṇaḇḇen' zjanaque' blaō, na' con angl ca'ze zjanaquech blaō ca beṇaḇḇ.

Na' beno' cont beṇaḇhen' naque' beṇe' zaca' na' cont chaxcene'.

Beno' cont yogo'loḷ da' zjade yesaquen lo na' beṇaḇh, na' len yogo'loḷ beyixe' yesacba' lo na'gaque'.

Na' da' ben Diosen' cont yogo'loḷ da' de yesaquen lo na' beṇaḇhen' na' yogo' beyixe' yesacba' lo na'gaquen', bibi bocua'aṇ Diosen' da' bi gwlo'e lo na' beṇaḇhen', la'czla' ṇa'a biṇa' le'echo yesac yogon' na' yogo'ba' lo na' beṇaḇhen'.⁹ Perw yogo'loḷ ba yo'ocze lo na' Jesúsén', la'czla' šlac gwzoe' yežlio nga angl ca' gosacche' blaoch ca le'. Perw ṇa'a da' bzanlaže' cuine' gote', da'nan' Diosen' bene' cont chaxcenne' ca legaque' na' cont nacbia' naque' beṇe' zaca' juisyw. Le da' nži'ilaže' Diosen' chio' beṇaḇh, da'nan' bžie' bia' got Jesúsén' cont gac yequ'e xtoḷa' to to beṇaḇh.

¹⁰ Diosen' bene' beṇaḇh, bene' beyixe' ca' na' bite'tezehle da' zjade cont chaxcene'. Na' Diosen' chaclaže' beṇe' zan yesaque' xi'iṇe' na' šjasyezoe' len le' gan' yo'ochgua be'ni', na' güenṇa' bene' bžie' bia' gwxcaca'zi' Jesúsén' cont gac goṇe' yeḷa' mban toḷi tocaṇe che chio' beṇaḇh. ¹¹ Jesúsén' ba gwlo'e chio' lo na' Diosen' na' t xen len Jesúsén' naccho xi'iṇ Dios. Da'nan' bi cheto'e Jesúsén' ṇe' naccho biše' lježe'. ¹² Quinga gwna Jesúsén' gože' Diosen':

Gwzejni'ida' beṇe' biše' lježa' ca' can' nac yichjlažda'oguon',

na' t xen len beṇe' ca' zjandop zjanžag chesonxene' le' goḷa' gonxena' le'.

¹³ Nach Jesúsén' gwne':

Neda' soacha' šejnilaža' Diosen'.

Nach da' yoble gozne':

Nga zoa' t xen len beṇe' ca' gwlo'o Diosen' lo na', beṇe' ca' ba gwque'e ca xi'iṇe'.

¹⁴ Chion' ba gwca'a Diosen' ca xi'iṇe' naccho beṇe' bela' chen, na' da'nan' Jesúsén' lecce golje' goque' beṇe' bela' chen cont bnežjo cuine' gosote'ne'. Na' da' got Jesúsén', da'nan' gwzoede' bzoe' šla'ale Satanás dan' chnabia' da' xigüe' ca' na' dan' choṇen yeḷa' got che beṇaḇhen'. ¹⁵ Jesúsén' bene' cont bich chžebcho gatcho, can' chesežeb yezica'chle beṇaḇh šlac de yeḷa' mban čegaque', chesežebe' yesate'. ¹⁶ Jesúsén' bide' yežlion', gague cont gaclene' angl ca', san cont gaclene' chio' naccho xi'iṇ diaža che da' Abrahanna'. ¹⁷ Na' da'nan' benen byen goc Jesúsén' doxen can' nac chio' beṇaḇh cont naque' bxož blao čecho lao Diosen'. Na' bnežjw cuine' ṇitlagüe' xtoḷa'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' ṇitlagüe' xtoḷa'chon', zaca'lebde' ca bxož blao che nación Israel čechon' ben' gwwey lao Diosen' beḷue' chen che beyixe' cont gwṇabe' yezi'xen Diosen' xtoḷa'gaquen'. ¹⁸ Na' da' bžaglao Jesúsén' cate' gwlo'oyeḷa' gwxiyen' le' gone' da' mal, perw bibi da' mal bene', da'nan' ṇezde' naclen' gaclene' chio' cate' chgo'oyeḷa' gwxiyen' chio' goncho da' mal.

Jesúsén' zaca'che' ca da' Moisésén'

3 Beṇe' migw, Diosen' ba gwleje' chio' naccho lo ne'e, na' cheyaḷa' goncho xbab che Cristo Jesús

ben' gwsele'. Naque' bxož blao čecho na' ben' chejni-laže'cho. ² Jesúsén' bene' cayaṇen' gwna Dios ben' gwseḷa' le' šlac gwde' yežlion', ca'cze ben da' Moisésén' cate' le' goclene' da' xozxta'ocho ca' cani', beṇe' ca' gosac diaža che Dios. ³ Perw Jesúsén' zaca'che' ca da' Moisésén', le len' bxie' diaža che Diosen', na' da' Moisésén' naque' con to beṇe' za' lo diaža che Diosen'. ⁴ Gwnita' beṇaḇh beṇe' bxie' to to diaža yežlio nga, san ca nac Diosen', len' bxie' yogo'te da' zjade. ⁵ Da' Moisésén' goque' ca xmos Diosen' cate' bene' con can' gwna Diosen' cont goclene' da' xozxta'ocho beṇe' ca' gosaque' diaža che Diosen'. Na' da' Moisésén' be'e diža' che da' za' gac da' za' čixjue'e Diosen' beṇaḇhen' ca tiempa'. ⁶ Perw Criston' bi goque' ca to mos dan' gwzoe' bene' can' gwna Diosen', san da' naque' Xi'iṇ Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoaḇhaḇcho chejni-laže'chone' na' chebecho ṇezecho gac güen čecho.

Guac soacho mbalaz len Diosen'

⁷ Da'nan' cheyaḷa' gwzenagcho can' ža Spiritw che Diosen' len da' nga da' nyojen, žan:

Še Diosen' ṇie' le'e ṇa'a,

⁸ bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle'e še leda' dan' goša' legaque' gwnežjua' da' yezezaca'zi'e ṇeche xtoḷa'gaquen'.

Bi gosejle'e čhia' cate' gosaše' latje dašen', la'czla' čhoa iz besele'ede' can' bena' len legaque'.

¹⁰ Da'nan' bža'a beṇe' ca' gwntan' na' gwnia':

“Yogo' las chesejle'e diža' güenlaže',

na' bi chosozenague' čhia' cont yesone' can' chazlažan'.”

¹¹ Nachen' bža'a legaque' na' da' baḷi gwlo'a gwnia':

“Gwbat ṇite' mbalaz yesyezi'laže' can' chezi'laža' ne-da'.”

¹² Beṇe' migw, bi güe'le latje ṇabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toḷi tocaṇe. ¹³ Na' šlac ṇa'a ṇe' decze latje gwzenagcho che Diosen', le ṇeyoe lježe' tža tža cont ṇe tole bi gonle xbabn' clele, gaquele bibi nonen gontezle da' xinj. ¹⁴ Da' li naccho Criston' t xen še ṇe' zoacho chejni-laže'chone' cate' žin ža gatcho, con can' gwzola'cho chejni-laže'chone'.

¹⁵ Nyoj Xtiža' Diosen' che chio', žan:

Še Diosen' ṇie' le'e ṇa'a,

bi gonle güedenag can' goson da' xozxta'ole cani' cate' besyedabague' Diosen'.

¹⁶ Na' da' žan ca', choen' diža' che da' xozxta'ocho ca' bebej da' Moisésén' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. ¹⁷ Da'nan' čhoa iz Diosen' bže'e legaque' ṇeche gosone' da' xinjen', na' gosat ben' besyedabague' Diosen' šlac ṇe' zjalaže' latje dašen'.

¹⁸ Na' legaque', da' bi bosozenague' che Diosen', da' baḷi gwlo'e, gwne' bi güe'le latje yesenite' mbalaz

yesyezi'laže' can' chezi'laže' Diosen'. ¹⁹ Na' nacbia' da' bi gosejle'e che Diosen', da'nan' bi goc nite' mbalaz yesyezi'laže' can' chezi'laže' le'.

4 Na' ca' nezecho lece neče chio' Diosen' gwne' beņe' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyaļa' gwsaca'cho cont bi goncho güedenag len le'. ² Chio' ba benecho diža' güen cont gac soacho mbalaz ca diža' dan' gosene da' xozxta'ochó ca' cani', perw diža' da' gosende' bi goclenen legaque', le bi gosejle'en. ³ Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ochó ca', žan:

Nachen' bža'a legaque' na' gwlo'a da' baļi, gwnia':
"Gwbat nite' mbalaz yesyezi'laže' can' chezi'laža' ne-da'."

Na' nezecho Diosen' gwzolaģüe' chezi'laže' cate' beyož bxie' yaban' na' yežlion' na' bichle da' bene' ža gwlaste.

⁴ Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

⁵ Na' lece nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

⁶ Na' ne' naquen da' li baļ beņe' yesejle'e xtiža' Diosen' na' nite' mbalaz yesyezi'laže' can' chezi'laže' le', na' beņe' ca' gosende' diža' güen čhen' cani' bi gosejle'en, na' bi goc yesenite' mbalaz yesyezi'laže' yela' güedenag čhegaquen'. ⁷ Na' gwdechle gwne' Diosen' da' yoble gwne': "Na'a guac nita'le mbalaz yezi'laže'le." Na' bene' cont da' rey David bzoje' da' nga, žan:

Še Diosen' nie' le'e na'a,
bi gonle güedenag.

⁸ Da' Josué gwčhi'e da' xozxtao' chio' beņe' Israel gan' gosezi'e yežlion' da' bnežjw Diosen' legaque', perw bi bene' cont yesenita' beņe' ca' mbalaz yesyezi'laže'. Da'nan' Diosen' be'e diža' gwdele, gwne' gwžin ža yesenite' mbalaz yesyezi'laže'. ⁹ Na' da'nan' beņe' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca' mbalazen' gwzoa le' cate' gwzolaģüe' chezi'laže'. ¹⁰ Na' beņe' ca' ba nita' mbalaz chesyzezi'laže' can' chezi'laže' Diosen', bich chesone' can' ža xbab čhegaquen', san chesone' can' ža Diosen'. Da'nan' žacho zjanite' mbalaz chesyzezi'laže' can' zoa Diosen' mbalaz chezi'laže' da' beyož bxie' yogo' da' zjade. ¹¹ Da'nan' cheyaļa' güe'laže'cho šejle'cho xtiža' Diosen' do yičj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac čhecho še goncho güedenag len xtižen' can' goson da' xozxta'ochó ca'.

¹² Xtiža' Diosen' chazen lo' yičjlaždao' beņe' chesenden' na' chaclenen beņe' chosozenag čhen. Na' zaca'leben ca to spada da' nlačgua chop la'a. Perw chonch Xtiža' Diosen' ca to spada, le chlo'en chio' še chzenagcho čhe Diosen' o še čhe cuincho, na' chzejni'in chio' čhe xbab da' yo'o lo' yičjlažda'ochon' na'

len yogo' da' chzelaže'cho še naquen güen o naquen mal. ¹³ Bibi de da' bi neze nle'e Diosen', ne to beņač, angl, da' xigüe' o bi da' zjade. Diosen' neze' yogo'te da' yo'o lo' yičjlažda'ochon'. Na' gwžin ža nabyožde' chio' čhe yogo'te da' ba bencho.

Jesús'en' naque' bχoz gwnabia' čhecho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' bχoz blao čhecho beņe' la'zelagüe zaca'. Da'nan' cheyaļa' soačhačcho šejnilaže'chone' can' ba be'cho diža' goncho. ¹⁵ Jesús'en' ben' nac bχoz blao čhechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayaņen' čžaglao chio', perw bibi da' mal bene'. ¹⁶ Na' dan' zoe' naque' bχoz blao čhechon' ben' cheyaše'de' chio', da'nan' cheyaļa' yoļ güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' čhecho na' gaclene' chio' bate'teze chacbe'echo chyažjecho gac-lene' chio', le nži'ilaže'de' chio'.

5 Yogo' beņe' ca' ba gosaque' bχoz blao čhe nación Israel čhechon' gosac lo ne'e šjasesane' bi da' šjasesane' lao Diosen' na' gosote' beyixe' bosolalje' xčhen-gacba' cont Diosen' bezi'xene' xtoļa' da' xozxta'ochó ca'. ² Na' bχoz ca' gosape' yela' chxenlaže' len beņe' biņa' yesejni'i can' cheyaļa' yesone' na' len beņe' ba nχoayag da' malen' legaque', le lece beņač beņe' güen da' xinj legaque'. ³ Da'nan' benen byen bχoz ca' gosote' beyixe' na' bosolalje' xčhembra' cont gosenabe' yezi'xen Diosen' xtoļen' lente xtoļa' yezica'chle beņe'.

⁴ Na' ne to bχoz ca' bi benxen cuine' neca gwlej cuine' cont gaque' bχoz blao, san Diosen' gwleje' to toe' gosaque' bχoz blao can' gwleje' da' Aarón. ⁵ Na' ca'cze goc len Criston', bitw beyiljue' nac gone' cont gacxene', neca gwlej cuine' cont naque' bχoz blao čhecho, san Diosen' gwleje'ne' na' gože'ne':

Len' naco' Xi'ina',
na'aža ba bena' cont nacbia' zoaczo'.

⁶ Na' ga yoble nyoj yeto da' gwne':

Naco' bχoz toļi tocaņe can' nac bχoz ben' le'
Melquisedec.

⁷ Na' Criston' šlac gwzoe' yežlion' boļ güiže' Xe' Diosen' ben' nape' yela' guac cont yosle' le' bi gate', gwņe' zižje na' gwcheže' gwņabe' gaclene' le'. Na' da' bzejw yičj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yela' goten'.

⁸ Na' la'czļa' Criston' naque' Xi'in Dios, bžaglagüe' yogo'loļ da' ca' goc čhe' cate' bzenague' čhe Diosen' cont gwejni'ide' can' chac čhe chio' beņač. ⁹ Na' beyož goc čhe' yogo'loļ da' goclaže' Diosen', nach ba guaque' gwnežjue' yela' mban toļi tocaņe čhe yogo' beņe' yosozenague' čhe'. ¹⁰ Can' naquen, Diosen' gwleje' le' cont naque' bχoz blao čhecho, na' naque' ca bχoz Melquisedec.

Gwsaca'cho cont bi cuejyichjcho xtiža' Diosen'

¹¹ Na' ñe' de da' zan da' chaclaža' ñia' le'e çe da' ngan', perw naquen zdebe ñian' ca šejni'ilen, le bich chebele šejni'ilen. ¹² Ba goļe' gwzejni'ile beņe' xtiža' Diosen', perw gualaz da' gonļe ca', chyažjele no yozejni'i le'e da' yoble da' ca' bsdle da' nechw. Da'nān' zaca'leble ca to bidao' biņa' gac gagw na' con chaže'be'. ¹³ Na' bene' zjanac ca to bidao' ñe' chaže', biņa' yesejni'ide' xtiža' Diosen' binļo cont yesone' da' zej to licha len Diosen'. ¹⁴ Na' dan' ža xtiža' Diosen' da' naquech zdebe, zaca'leben ca yeļa' guagw da' chagw beņe' gole. Na' beņe' chesejni'i lenņa' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' çe Diosen'.

6 Cana' betinjecho xtoļa'chon', gwejniļaže'cho Criston', na' bsdcho diža' güen çe'. Goccho ca to beņe' guat len yichjlažda'ochon' ñeče da' choncho da' xinj, perw ba betinjecho xtoļa'chon' ña'a. Bich chyažjen yezolaocho šejniļaže'cho Diosen'. Bich chyažjen gwsedchcho çe dan' chesezoa beņe' nis o çe dan' chxoā na'cho yichj beņe' na' chñabcho gaclen Diosen' le-gaque'. Bich chyažjen gwsedchcho can' gac cate' yečhis yosban Diosen' beņe' guat ca' o caten' čhog-bi'en yezezaca'zi' beņe' ca' ba goson da' xinj. Ba nsedcho da' ca', na' ña'a bačh cheyaļa' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. ³ Lenņa' goncho ña'a še Diosen' gonšque' latje.

⁴ Nita' beņe' ba gwo'o be'ni' çe Criston' lo' yichjlažda'ogaque', na' ba chesacbe'ede' can' nac yeļa' mban da' choņ Criston', na' ba zoa Spiritw çe Diosen' lo' yichjlažda'ogaque'. ⁵ Ba zjaņezde' xtiža' Diosen' naquen güen na' ba zjanombi'e yeļa' guac çe Diosen' da' za' gwlo'echde' beņačen'. ⁶ Na' še žin ža bich yesejniļaže' Criston' na' yesebejyichje' xtižen', bich gac yesyetingjde' çe dan' ba gosebejyichje'ne', le lo' yichjlažda'ogaque' chesone' txen len beņe' ca' bosode'e Xi'iq Diosen' le'e yag cruzen', na' chesone' cont nochle beņe' yesegue'ede' le'. ⁷ Cheyaļa' gac yichjlažda'ochon' ca to yežlio güen gan' chesaz beņe'. Cheyož chac yejon' zan ñi'a, nach chac cosešen'. Na' chata' dan' cheseyažje beņe' chesazen'. Na' nacbia' Diosen' chebede' yežlion' nac ca'. ⁸ Bi gaccho ca to yežlio gan' chla' yag yeše' na' bichle yixe' da' nono chagw. Yežlion' nac ca' bibi zacan', na' ba zoa cuejyichj xanen len na' yixe' da' chla' lagüen žin ža šeyen.

Ñezecho šjayzoacho len Diosen'

⁹ Le'e beņe' migw, chacda' le'e, na' la'czļa' ba bia' dižan' ca', ñezda' bilja gonļe can' cheson beņe' chesebejyichje' xtiža' Diosen'. Chacda' gonļe güen da' ba gwlej Diosen' le'e cont šjayzoale len le'. ¹⁰ Diosen' zeje' to licha, na' bi ganļaže' can' ba benļe xšinen' na' can' ñe' chonļen ña'a chaclenļe yezica'chle beņe' chesejniļaže'ne'. Na' chonļe ca' da' chaquele Diosen'. ¹¹ Na' chaclaža' to tole soatezle gonchle ca' do yichj do laže'le

šlac biņa' žin ža gatle, cont ñezele šjayzoale len Diosen'. ¹² Chaclaža' bi gacle beņe' xagüed len da' ža Diosen'. Na' chaclaža' gonļe can' ba goson beņe' zan beņe' gosenite' gosejniļaže' Diosen' cani', gosejle'e gon Diosen' can' gože' legaque' gone', na' gosape' yeļa' chxenļaže' cate'ch bžin ža benen'.

¹³ Cate' Diosen' gože' da' Abraham xi'iq diaža çe' yesaque' beņe' zan, bzoa cuine' gwlo'e da' baļi gac can' gwnen', le nono zoa beņe' napch yeļa' gwnabia' ca Diosen'. ¹⁴ Gwne': "Da' li goncza' cont gac güen čhio' na' cont yesac xi'iq diaža čhio' beņe' zan." ¹⁵ Na' Abrahanna' gwdape' yeļa' chxenļaže' šlac gwleze', nach bžin ža gwzolao chac can' gwna Diosen'. ¹⁶ Beņačen' zjayolagüe' chosozoe' Diosen' cue'e da' baļi çe bi dan' chesene', le Diosen' chnabia'che' ca legaque'. Chesone' ca' cont beņe' ca' chesacyože' len legaque' yesejle'e na' yesyeyacxenļaže'. ¹⁷ Na' Diosen' bzoa cuine' cue'e da' baļi cont ñeze beņe' ca' zjanac xi'iq diaža çe da' Abrahanna' gague da' te çe dan' gwne' gonen'. ¹⁸ Diosen' bene' čhope da' qui: gwne' can' gone' na' lecze bzoa cuine' cue'e da' baļi gac can' gwnen', na' gague da' te bi gac can' gwnen'. Chaclaže' čhio' ba betinjecho xtoļa'chon' yebecho ñezecho šjayzoacho len le'. Na' Diosen' bi chac güe'e diža' güenļaže'. ¹⁹ Na' da' ñezecho šjayzoacho len Diosen', bi soa xbab čhechon' quile ca'le. Jesúsen' ba gwžialagüe' gwo'e gan' zoa Diosen' gan' nono beņačh goc šo', na' bene' cont čhio' gac šo'cho. Le naque' bxož blao čhecho toļi tocaņe, na' naque' ca bxož Melquisedec.

Jesúsen' naque' ca bxož Melquisedec

7 Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe beņe' blao gwleje' le' cont goque' bxož. Na' goquen' Abrahanna' zeze'e lao gwdile gan' bene' gan' gayo' rey, na' Melquisedequen' jašague'ne' na' gwduxje'ede' gac da' güen çe da' Abrahanna'. ² Ca horen' Abrahanna' zeze'e zonse'e yogo'loļ da' jaytobe' da' bene' gan' lo yeļa' gwdiļen', na' gwlequen' ši cuen na' bnežjue' to cuen çe bxož Melquisedequen'. Na' Melquisedec zejen diža' "rey beņe' zej to licha". Na' goque' rey çe beņe' zjanite' binļo, le Salem gan' gwnabi'e zejen diža' "zjanite' binļo". ³ Bi nyojen še no goc da' xaxņa' Melquisedequen'. Neca nyojen še no goc xozxta'ogüe', na' ñeca nyojen baten' golje' na' baten' gote'. Da'nān' žacho Melquisedequen' zaca'lebde' ca Xi'iq Dios ben' zoa toļi tocaņe naque' bxož čhecho, le bi golje Melquisedequen' lo diaža çe nochle bxož, na' ñeca gwzoa nochle beņe' lo diaža çe' beņe' tie' gwļane' xlatje'.

⁴ Le gon xbab catec beņe' blao goc bxož Melquisedequen'. Da'nān' da' xozxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjuen' bxož Melquisedequen'. ⁵ Na' da' xozxta'ocho beņe' ca' gosajle lo diaža çe da' Leví, ben' besyeyaļe' gosaque' bxož çe nación Israel čhechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' çe yezica'chle beņe'

gualaž čhegaque' ca'. Na' yogo'cze' gosaque' diaža čhe da' Abrahanna', bχoz ca' na' beŋe' yezica'chle. ⁶ Perw Melquisedequen' la'czla' bi golje' lo diaža čhe da' Leví, Abrahanna' bnežjue'ne' to cuen lo ši cuen da' ca' jay-tobe', na' Melquisedequen' gwnabde' Diosen' gac güen čhe da' Abrahanna' ben' gwna Diosen' yesac xi'ing diaža čhe' beŋe' zan. ⁷ Na' ŋezecho beŋe' chac chŋabde' Diosen' gac güen čhe beŋe' yoble zaca'che' ca ben' gac čhe' da' güenna'. ⁸ Na' beŋe' ca' zjanac bχoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de čhe beŋe' Israel gualaž čhechon', na' bχoz ca' zjanaque' con ljež beŋačho beŋe' chesat. Na' čhe bχoz Melquisedequen' ben' gwxi' to cuen lo ši cuen da' jaytab da' Abrahanna', Xtiža' Diosen' choen' diža' čhe' ca to beŋe' ŋe' zoacze. ⁹ Na' da' bnežjo Abrahanna' le' da' ca', guac ŋacho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža čhe da' Abrahanna', na' Leví nan' goque' χozxta' beŋe' ca' gosac lo na'gaque' bosotobe' da' ca' bosonežjo beŋe' Israel gualaž čhecho ca' čhe Diosen'.

¹¹ Na' Diosen' bnežjue' beŋe' Israel gualaž čhecho ca' ley čen' cani' cont benen žin t xen len da' goson bχoz ca' beŋe' gosalle' lo diaža čhe da' Levín'. Perw bχoz ca' bi goc yesone' cont yichjlaždao' beŋačen' yesaquen xilaže' len Diosen'. Da'n'an' byažjecho bid Jesúsén' naque' bχoz čhecho toli tocaŋe, na' le' naque' ca bχoz Melquisedequen', gague ca da' bχoz Aarón. ¹² Na' cont goc zoa Jesúsén' naque' bχoz čhechon', byažjen bža' ley da' nonen mandadw non' gac bχoz. ¹³ Le Xancho Jesúsén' ben' nac bχoz čhechon' bi golje' lo diaža čhe da' Leví, na' noch no ŋa' choj lo diaža čhe Jesúsén' beŋe' naque' bχoz. ¹⁴ Nezczecho Xancho Jesúsén' golje' lo diaža čhe da' Judá, na' da' Moisésén' bi bzoje' le'e leyna' ga ŋan beŋe' galje' lo diaža čhe da' Judán' guac yesaque' bχoz.

¹⁵ Na' nacbia' ba bža' leyna', le ba zoa Jesúsén' naque' bχoz cobe čhechon' na' naque' ca bχoz Melquisedequen'. ¹⁶ Bito golje' lo diaža čhe da' Leví can' gosac bχoz ca' beŋe' goson žin can' ža ley da' bzoj da' Moisésén', san naque' bχoz da' bi gwzoe yela' goten' le' na' zoe' toli tocaŋe. ¹⁷ Quinga nyoj da' gwna Diosen' čhe', žan:

Naco' bχoz toli tocaŋe, can' nac bχoz ben' le' Melquisedec.

¹⁸ Na' bχoz ca' gwna Diosen' ŋita' cana', bich nžie' bia' ŋite' ŋa'a, le dan' bžia bia' leyna' yesone' bi goc yeca'an xtoła' beŋačen' to ši'i. ¹⁹ Na' leyna' lecze bi goc gonon cont yesac yichjlaždao' beŋačen' xilaže' len Diosen'. Perw ŋa'a ba chaquech güen čhecho, le ba zoa bχoz čhecho beŋe' ba beca'a xtoła'chon' to ši'i cont zoacho binlo len Diosen' na' chac chŋelenchone'.

²⁰ Na' cont ŋezecho Jesúsén' naque' bχoz čhecho, Diosen' bzoa cuine' gwlo'e da' bałi le soacze Jesúsén' gague' bχoz čhechon'. ²¹ Beŋe' ca' gosaque' bχoz can' bzoj da' Moisésén', Diosen' bitw bzoa cuine' cue'e da' bałi cont šejle'cho zjanaque' bχoz. Perw nyoj can' gože' Jesúsén', žan:

Diosen' bzoa cuine' gwlo'e da' bałi na' bi gwše'e can' ba gože'ne' gone':

"Naco' bχoz toli tocaŋe can' nac bχoz ben' le' Melquisedec."

²² Na' da'n'an' zoa Jesúsén' chone' cont ŋezecho Diosen' gaclene' chio' toli tocaŋe can' gwne' gone'. Na' can' za' gwne' gaclene' chio' ŋa'a, zaca'chen ca da' gože' da' χozxta'ocho ca' cani'. ²³ Na' beŋe' ca' gosaque' bχoz can' ža ley dan' bzoj da' Miosésén', gosaque' beŋe' zan, le cate' gosat tgüeje tgüeje', la' benita'te beŋe' yoble. ²⁴ Perw Jesúsén' zoe' toli tocaŋe, na' da'n'an' naque' bχoz čhecho toli tocaŋe. ²⁵ Da'n'an' chac čone' yela' mban toli tocaŋe čhe chio' chŋabcho yezixen Diosen' čhecho, le zoacze' toli tocaŋe chŋabe' goclen lao Diosen' čhe chio' chejnilaže'chone'.

²⁶ Na' Jesúsén' nacyaŋe' beŋe' chyažjecho gague' bχoz blao čhecho cont gaclene' chio', le naque' beŋe' laždao' xilaže'. Bibi da' xinj none' na' ŋeca none' bi xbab mal, con bibi doła' nape'. Nža'le naque' len beŋač beŋe' cheson da' xinj. Jesúsén' ba beyepe' zoe' gan' zoa Diosen', na' chnabi'e t xen len le'. ²⁷ Nža'le naque' len bχoz blao ca' gosenita' cani'. Legaque' tža tža byažjen gosote' beyixe' bosolalje' xčhembra' cont gosenabe' bezi'xen Diosen' xtoła'gague', na' gwdechle gosote' beyixe' yoble bosolalje' xčhembra' cate' gosenabe' bezi'xen Diosen' xtoła' yezica'chle beŋe' Israel gualaž čhecho ca'. Perw Jesúsén' šni'aze bnežjw cuine' ŋeche xtoła' beŋačen' cate' gosote'ne' le'e yag cruzen', na' bi byažjde' gote' beyixe' can' goson bχoz ca' tža tža ŋeche xtoła'gague' na' ŋeche xtoła' beŋe' yezica'chle. ²⁸ Beŋe' gosac bχoz blao can' ža ley da' bzoj da' Moisésén' gosaque' beŋe' güen da' xinj can' zjanac yezica'chle beŋe'. Na' cate' ba goc zan iz bzoj Moisésén' leyna', Diosen' bzoa cuine' gwlo'e da' bałi zoacze Xi'ine' Jesúsén' naque' bχoz blao čhecho. Na' Xi'ine' Jesúsén' zoacze' toli tocaŋe na' nac yichjlaždagüen' cayaŋen' chazlaže' Diosen'.

Jesúsén' bene' cont gwzolao chac da' cobe da' gwna Diosen' gone' cont gaclene' chio'

8 Da' nga zejehen lao yogo' da' ba gwnia': zoa bχoz blao čhechon' ben' nac cayaŋe' chazlaže' Diosen', na' ba chi'e yaban' chnabi'e t xen len Diosen' ben' nac la'zelagüe beŋe' zaca'. ² Chone' žin gan' zoa Xancho Diosen', gague lo' yo'o dan' goson beŋač cont yesonxene' le'. ³ Na' yogo' bχoz blao čhe beŋe' Israel gualaž čhechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xčhembra' lao Diosen'. Na' dan' nac Jesúsén' bχoz blao čhecho, benen byen bnežjw cuine' blalj xčhene' ŋeche xtoła'chon'. ⁴ Na' šaca' ŋe' zoe' yežlio nga bi naque' bχoz, le nita' bχoz čhe beŋe' Israel gualaž čhechon' ch-jasesane' bi da' chjasesane' lao Diosen' con can' ža ley dan' bzoj da' Moisésén'. ⁵ Na' beŋe' ca', chesone' bi da' chesone' lo' yodao' da' naquen ca l' gua'a lsaca' čhe yaban' gan' zoa Diosen'. Na' ŋezecho naquen ca l' gua'a lsaca' čhe yaban' gan' zoa Diosen', le cate' za' gon Moisésén' yodao' dan' chacte chedobe gan' goson

bɔz ca' žin ɕhe Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoacho lo ya'an." ⁶ Na' da' chon Jesúsen', da' xen zaca'chen ca da' cheson bɔz ɕhe beņe' Israel gualaž ɕhechon', na' can' gwna Diosen' gaclene' chio' lagüe da' bnežjw cuin Jesúsen' neɕhe xtoła'chon', leceze da' xen zaca'chen ca dan' gože' da' xozxta'ocho ca' cani'.

⁷ Le Diosen' gože' da' xozxta'ocho ca' gac güen ɕhegaque' še yesone' can' ža ley ɕhen', perw bi bosozenague', na' da'nan' byažjen gwdixjue' to da' cobe. ⁸ Na' Diosen' bi bebede' legaque', san gwne':

Gwžin ža cate' ĩia' to da' cobe da' gona' gaclena' le'e nacle xi'ĩn diaža ɕhe beņe' ca' gosonite' Israel, na' len le'e nacle xi'ĩn diaža ɕhe beņe' ca' gosonite' Judá.

Neda' naca' Xanle Dios žia' ca'.

⁹ Nža' can' goša' da' xozxta'ole gona' gaclena' le-gaque' cani',

bži'ilaže'da' legaque' na' bena' cont besyechoje' lo na' beņe' nación Egipto.

Legaque' bi gosone' can' goša'ne' cont gac güen ɕhegaque'.

Na' da'nan' gwleza' bich goclena'ne', neda' Xanle Dios žia' ca'.

¹⁰ Na' quinga gona' gaclena' xi'ĩn diaža ɕhe le'e nacle beņe' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación ɕhia'.

¹¹ Na' bi yažjen yosozejni'i lježe' cont yesombi'e neda', neca yažjen yosozejni'i no beņe' biše' lježe',

le cana' yogo'lole' yesombi'e neda',

bi' bixjw lente beņe' nac beņe' gole. ¹² Canan' yezi'xena' xtoła'gaquen', na' bich gona' cuent še bi da' malen' ba gosonen'.

¹³ Na' Diosen' be'e diža' ɕhe da' cobe da' gwne' gone' gaclene' nación ɕhechon', na' da'nan' nezecho ba bzoe' to šla'ale da'na' gože' da' xozxta'ocho ca' cani'. Na' da' gole da' ba bzoe' to šla'ale ba zoa yeniten.

Yodao' da' zoa yežlion' na' dan' zoa yaba gan' zoa Diosen'

9 Cani' Diosen' gože' da' xozxta'ocho ca' gaclene' le-gaque' na' gac güen ɕhegaque' še yesone' can' ža ley ɕhen'. Na' šlac ne' chon žin da' nechw da'na' gože' legaque' cani', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga. ² Gosone' yodao' da' nsan' ɕhope quart. Na' lo' quart nechon' bosozoe' to candeler na' to mes gan' bosocue'e yetextil da' naquen ɕhe Dios. Na' quartna' bososi'en Latje ɕhe Dios. ³ Na' bosozie' to lache' lo' yo'ona' cont bchojen ɕhope quart, na' quart gwchopen' bososi'en Latje ga Zoa Dios. ⁴ Na' lo' quart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguzje' oro doxenen. Na' lo' cajan' gosegüe'e to yeso' de oro gan' gosegüe'e late

yeła' guagw da' nzi' maná, na' gosegüe'e carrot ɕhe da' Aarón dan' bexeje. Lecze lo' caj nan' gosego'ošagüe' yej ta'a ca' gan' byoj yogo' dan' bžia' bia' Diosen' yesone' cont gaclene' legaque'. ⁵ Na' cože' cajan' bosonite' ɕhope l' gua'a šsaca' beņe' gosone' ca angl beņe' bososi'e querubines, cont nacbia' zoa Diosen' gan' žia' cajan' na' naque' beņe' zaca' juisyw. Na' cože' cajan' ladjo angl ca' gan' nžiljo xilgaquen', bosozie' xɕhen beyixe' cate' gosenabe' yezi'xen Diosen' xtoła' beņe' Israel gualaž ɕhecho ca' to to iz. Perw bi chonen byen güe'cho diža' ĩa'a doxen can' goca'.

⁶ Na' beyož gosone' yodaon' na' bosonite' yogo' da' ca' lo'enña', nach yogo' ža bɔz ca' goso'e lo' quart nechon' na' gosone' can' bžia' bia' Diosen' gosone' gosonxene' le'. ⁷ Na' quart gwchopen', toz bɔz blao goc gwyo'e lo'enña' tñi'a tgüiz. Na' cate' gwyo'ena' ben byen beņe' chon ɕhe beyixe' bži'en lo' cajan' cont Diosen' bezi'xene' xtole' na' bezi'xente' xtoła' yezi-ca'chle beņe' Israel gualaž ɕhecho neɕhe da' xinj da' gosone' sin cbi gosacbe'ede'. ⁸ Na' da' bi de šsens šo' nochle beņe' lo' quart gwchopen', Spiritw ɕhe Diosen' chzejni'in chio' biņa' gac šo' beņaɕhen' gan' nac latje ga zoa Diosen' šlac ne' chon žin yodao' nechua' lo' yežlion'. ⁹ Na' yodaon' len yogo' da' cheson bɔz ca' lo'enña' chlo'en chio' zoacho ĩa'a can' chac yaban' gan' zoa Diosen'. Na' la'czla' da' zan chesoe' beņe' Diosen' na' be zan beyixe' chesote' chesonxene' le', bibi yeła' guac zjansa' da' ca' cont yesenezde' bibi doła' zjanape' len Diosen'. ¹⁰ Na' da' ca' cheson beņe' gualaž ɕhechon' lo' yodaon' naquen costumbr ɕhe no nis yeła' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp ɕhegaque' na'ze. Na' ba gosonen žin šlac Diosen' biņa' gwše'e costumbr ca' len da' coben'.

¹¹ Na' ĩa'a Criston' naque' bɔz blao ɕhecho na' ba bžin ža bxie' costumbr güen ca'. Na' zoe' yaban' naque' bɔz ɕhecho lao Diosen', na' gan' zoen' zaca'chen ca yodao' da' goson beņaɕhen' yežlio nga. ¹² Na' bi beņe' chon ɕhe no šib no go'ñ dao' cate' gwyo'e gwñabe' cont Diosen' bezi'xene' xtoła'chon', san da' bnežjw cuine' gosote'ne' na' blalj xɕhene' neɕhe xtoła'chon' tñi'aze le'e yag cruzen', da'nan' goc gwyo'e gan' zoa Diosen' na' ba beque'e xtoła'chon' toli tocaņe. ¹³ Na' ley da' bzoj da' Moisésen' nyojen žan da' zan da' cheson beņe' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwše'e bɔzzen' legaque' xɕhen no šib no go'ñ na' nɕhixen len de da' chega'ñ cate' chosozeye' to vaca' dao'. ¹⁴ Na' xɕhen Criston' da' bedelalje' neɕhe xtoła'chon' zaca'chen ca xɕhen beyixe' ca', le xɕhenen' cheyonen yichjlažda'ochon' xilaže' len da' xinj da' ba bencho. Da'nan' bich nchoglaon ɕhecho gatcho neɕhe xtoła'chon', san soaczcho gonxenko Diosen' ben' zoa toli tocaņe. Spiritw ɕhe Diosen' goclenen Criston' bnežjo cuine' beque'e xtoła'chon', na' bibi xtoła' Criston' gota'.

¹⁵ Criston' bedelalj xɕhene' cont gwzolao chac da' coben' dan' gwna Diosen' gone' cont soacho binlo len

le'. Na' ba bxie' da' coben' cont balteze bene' ba gwlej Diosen' šjasyenite' len le' toli tocaṇe. Na' da' got Criston' bedelalj xchene', da'nan gwnitlao xtoła' bene' ca' gosejnilaže' Diosen' šlac ṇe' chon žin dan' gwdixjue' da' nechw dan' gwne' gone' cont chio' bene' Israel soa-cho biṇlo len le'. ¹⁶ Cate' to bene' ba bene' testament, cate'ch ba gota'bia' ba got bena' ben testamanta', cana'ch gac can' žanna'. ¹⁷ Le to testament bi gac can' žan šlac ṇe' mban ben' ben len. Cate'ch ba gote' canan' gac can' žanna'. ¹⁸ Na' goc ca' len da' nechon' da' gož Diosen' da' xozxta'ocho ca' gone' gaclene' legaue'. Da'nan' bžie' bia' bosolalje' xchen beyixe' cont gwxen. ¹⁹ Cate' da' Moisésen' beyož be'lene' da' xozxta'ocho ca' diža' che yogo' dan' bžia' bia' Diosen' yesone' can' ža ley chen', nach Moisésen' bžie' legaue' xchen goṇ dao' na' xchen šib dao' na' nis. Bžie' legaue' da' ca' len late' yiša' xa xila' da' mben color xṇa na' len to xis yixe' dao' da' nzi' hisopo. Lecze bžie' en lao libren' gan' nyoj ley chen'. ²⁰ Na' da' Moisésen' gože' legaue': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." ²¹ Na' lecz ca' bene' bžie' chenna' yodaon' na' yeso' ša' ca' bosochine' gan' gosonxene' Diosen'. ²² Ley dan' bzoj Moisésen' nžian bia' gwže'e bxozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še biṇa' lalj chen, Diosen' bi yezi'xene' xtoła' beṇaṇchen'.

Criston' gote' blalj xchene' cont beque'e xtoła' bene' chesejnilaže'ne'

²³ Can' goc benen byen bosoži'e xchen beyixe' lo' yo-daon' na' lo da' ca' bosochine' yodaon' cont gosonen žin lao Diosen', na' yodaon' naquen con to l gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch. ²⁴ Na' gan' gwo'o Criston' gague naquen to yodao' da' naquen con to l gua'a lsaca' cont nezecho can' nac yaban'. Le' beyepe' yaban' na' gwo'e gan' zoa Diosen' cont chṇe' gualaz chio' lagüen'. ²⁵ Bxoz blao che bene' Israel gualaž checho ca' cheso'e yodaon' tñi'a tgüiz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ṇi'a gosote'ne'. Tñi'aze blalj xchene' neče xtoła' beṇaṇchen'. ²⁶ Šaca' byažjen blalj xchene' zan ṇi'a, ba gote' zan ṇi'a gwzolaon cate' gwmete yežlion', perw bi benen byen gac che' ca'. Bedelalj xchene' tñi'aze cate' gwna Diosen' ba bžin ža che', cont chac cheque'e xtoła' beṇaṇch. ²⁷ Na' can' chac che beṇaṇchen', žin ža gat to toe' na' te yesate' nach ṇa Diosen' che to toe' še yesezaca'zi'e o še yesenite' mbalaz. ²⁸ Na' can' yesat beṇaṇchen' tñi'aze, ca'cze bnežjw cuin Criston' tñi'aze gosote'ne' cont chac cheque'e xtoła' beṇaṇchen'. Nach žin ža yide' da' yoble perw gague cont yeque'e xtoła' beṇaṇchen', san cont yeče'e bene' ca' chesebeze' bat-can' yide' nach ṇite' mbalaz len le'.

10 Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho ṇa'a ba bid Criston'. Perw leyna' bi goc yocoben

yichjlaždao' bene' ca' gosejnilaže' Diosen' la'czla' gosote' beyixe' yogo' iz. ² Šaca' yichjlažda'ogaue' beyaquen güen cate' gosote' beyixe' ca' na' cate' bxoz ca' bosoži'e legaue' xchemban' neče xtoła'gaquen', ba gwnitlao xtoła'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. ³ Perw da' chesote' beyixe' ca' na' bichle da' chesone' neče xtoła'gaquen' to to iz, bi chac yesanlaže' zjanape' doła'. ⁴ Le xchen no goṇ dao' no šib dao' bi gac yeca'an xtoła' beṇaṇch.

⁵ Da'nan' cate' Criston' bide' yežlio nga gože' Diosen': Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'. Zelažo' gwnežjw cuina' gona' can' chazlažo', le da'nan' beno' cont golja beṇaṇch.

⁶ Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gaquen', gague da' can' chbedo'.

⁷ Da'nan' gwnia' can' nyoj le'e libr gan' žan: "Dios chia', za'a nga zedeyena' con can' chazlažo'."

⁸ Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'. ⁹ Nach Criston' gože' Diosen': "Za'a nga zedeyena' con can' chazlažo'". Da'nan' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'.

¹⁰ Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tñi'aze cani', da'nan' ba beyac yichjlažda'ocho xilaže' lao Diosen', chio' chejni-laže'chone'.

¹¹ To to bxoz che bene' Israel gualaž checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyla' yesone', la'czla' xchen beyixen' bi gac yeca'an xtoła' beṇaṇchen'. ¹² San Criston' tñi'azen' bnežjw yela' mban che' na' zaca'czen cont yeca'an xtoła' beṇaṇchen' toli tocaṇe. Na' beyož bnežjw cuine' zjaychi'e gan' chnabi'e txen len Diosen'. ¹³ Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. ¹⁴ Na' da' bnežjw cuin Criston' tñi'aze cani', bene' cont chio' naccho lo na' Diosen' beyac lažda'ochon' xilaže' toli tocaṇe. ¹⁵ Na' Spiritw che Diosen' lecze benen cont nezecho naquen ca', le nyojen, žan:

¹⁶ Quinga gona' gaclena' legaue' cate' žin ža, gona' cont šo' yichjgaue' da' nžia' bia' yesone', na' gona' cont yesyebeden' lo' yichjlažda'ogaquen', can' ža Xancho Diosen'.

¹⁷ Na' nyoj yeto da' ža Spiritw che Diosen', žan: Na' bich gona' cuent še bi da' malen' ba gosonen' o še bi xtoła'gaue' ba gota'.

¹⁸ Na' cate' ba gwnitlao xtoła'chon' bich chyažjen gotcho no beyixe' neče xtoła'chon'.

Cheyała' soacho gonxencho Diosen' neca žebcho

¹⁹ Beņe' migw, űezecho gac šo'cho gan' zoa Diosen' neca žebcho, le Jesucriston' blalj xčhenen' na' beque'e xtoła'chon'. ²⁰ Guac nacho gwsaljue' to nez cobe, to da' chonon chio' yela' mban toli tocaņe, le da' bnežjw cuine' gote' neče chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'. ²¹ Na' zoa bxož blao čhechon' naque' beņe' zaca'chgua, na' naque' Xan yogo' chio' gwlej Diosen' cont chejnilaže'chone'. ²² Da'n'an' cheyała' soacho gonxencho Diosen' do yičj do laže'cho neca žebcho, na' cheyała' soacho šejle'cho xčhen Jesu-criston' ba beca'an xtoła'cho, le nezecho ba gwzoacho nis da' chejnilaže'chone'. ²³ Na' can' gwzolaicho be'cho diža' gwnacho šjayzoacho len Diosen', ca'cze cheyała' goncho bate'teze, na' da' li šjayzoaczcho len Diosen', le zoacze' chone' con can' gwnen'. ²⁴ Lecze cheyała' yey-iljwlaže'cho nacle gaclen lježcho cont gaguech lježcho tocho yetocho na' gonchcho da' güen. ²⁵ Na' bi cuejy-ičjcho da' chdop chžagcho txen chonxencho Diosen' ca chesebejyičj bal beņe'. Cheyała' űeyoe lježcho soaczcho šejnilaže'cho Criston', na' gonchcho ca' űa'a ba nacia' ba zoa te če yežlion'.

²⁶ Še űe' chontezechcho da' xinj la'czla' ba nom-bia'cho diža' li če Criston', bibi de bichle da' gon žin cont űitlao xtoła'chon'. ²⁷ Na' cheyała'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' beņe' chesegue'e Diosen'. ²⁸ Cani' da' xozxta'ochcho ca' gosote' note'teze beņe' bi bzenague' če ley da' bzoj da' Moisésen', bi besyeyaše'de' legaque', con še gwnita' čhope o šone beņe' toz can' goso'e diža' če da' xinjen' none'. ²⁹ Na' da' mal juisyoch gac če chio' še gue'echo Xi'ű Diosen' na' gaguecho bibi zaca' xčhen Criston' da' blalje' cont beque'e xtoła'chon' na' še űecho če Spiritw če Dios ben' nži'ilaže'de' chio'. Le da' blalj xčhen Criston' gwzolaicho chac da' cobe da' gwna Diosen' gone' gaclene' beņe' yesejnilaže'ne'. ³⁰ Nombia'cho Diosen' na' űezecho len' gwne': "Neda' yoži'a če da' mal da' chesone' na' neda' gona' cont yesezaca'zi'e." Na' lecze nyojen žan: "Xancho Diosen' čhogbi'e nac gac če beņe' ca' ba gwque'e ca xi'űe'." ³¹ Na' leca naquen da' žebcho še cuejyičjcho Diosen' ben' zoa toli tocaņe, le gone' cont saca'zi'cho toli tocaņe.

³² Perw le šjayza'laže' can' bchejele da' zan da' gwdi gwxcaca'le cate' beyož gwyo'o be'ni' če Criston' lo' yičjilažda'olen'. ³³ Tgüejje gosezi'diže' le'e lao yogo' beņe' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' beņe' lježle ca'. ³⁴ Beyaše'le beņe' lježcho ca' beņe' gosata' ližya na' goclenle legaque', na' gwzoale mbalaz la'czla' beņe' besegue'e le'e goseque'e bi da' gota' čhele, le űezele de da' zaca'ch čhele yaban' da' bi te čhen. ³⁵ Da'n'an' bi cuejyičjle da' chejnilaže'le Diosen', neca žeble, le žin ža cate' soachgualle mbalaz. ³⁶ Cheyała' gwyo gwčhejle cont yeyož gonle yogo'lo' da' chnalaže' Diosen', na' tena' gone' cont soale mbal-

az toli tocaņe can' gwne'. ³⁷ Can' nyoj Xtiža' Diosen', žan:

La' žinte ža yid ben' seļa' gan' zoalen', bich šede'.

³⁸ Na' xi'űna' beņe' zjanac beņe' güen len neda' yesata' yela' mban če toli tocaņe da' chesejnilaže' neda'.

Na' še bich yesejnilaže' neda', bich yebeda' legaque'.

³⁹ Perw chio' bi naccho ca beņe' ca' bich yesejnilaže'ne', beņe' yesebiayi'. Chio' zoaczcho chejnilaže'chone' na' šjayzoacho len Diosen' toli tocaņe.

Da' chejnilaže'cho Diosen' naquen to da' zejen

11 Še chejnilaže'cho Diosen' űezecho gac da' güen da' chbezcho gac, na' űezecho gon Diosen' gac can' že' da' biņa' le'echo. ² Bal beņe' gwlas ca' bebe Diosen' legaque' da' gosejnilaže'ne'.

³ Da' chejnilaže'chone' chejle'cho con gwņie' na' goc yaban' len yežlion'. Na' bibi bčhine' da' le'echo cate' bene' yogo' da' ca' chle'echo.

⁴ Cani' da' xozxta'ochcho Abel gwyejnilaže' Diosen' na' da'n'an' bnežjue' Diosen' to da' gocch da' güen ca da' bnežjw beņe' biše' Caín. Na' dan' bebe Diosen' dan' bnežjw Abelen' le', da'n'an' gwņeze Abelen' naque' beņe' güen len Diosen'. Na' la'czla' ba got Abelen', da' gwzoe' gwyejnilaže' Diosen', naquen ca to da' chņey-oen chio' soaczcho šejnilaže'cho Diosen'.

⁵ Na' lecze da' xozxta'ochcho Enoc gwzoe' gwyejnilaže' Diosen', na' da'n'an' Diosen' bezi' beque'ene' šlac űe' mbane'. Bi gote', con noch no ble'e le'. Na' nyoj Xtiža' Diosen', žan Diosen' bebede' Enoquen' šlac gwzoe' yežlion'. ⁶ Na' Diosen' bi chebede' note'teze beņe' bi chejnilaže'ne'. Le note'tez beņe' yo' güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocaņe če note'tez beņe' űabden' le' do yičj do laže'.

⁷ Na' ca nac da' Noé, lecze gwyejnilaže' Diosen', na' cate' Diosen' bosņisde' le' can' za' gac, gwyejle' Noén' can' gož Diosen' le', na' do bžebe' bene' to barcw gan' gwyo'e len beņe' lo' yo'o če' ca' cont bi gosate' lo nisen'. Na' da' gwyejle' Noén' can' gwna Diosen', blo'ede' yezica'chle beņe' že' na' zjanape' doļa' da' bi bosozenague' če Diosen'. Na' lecze da' gwyejnilaže' Diosen', goc gwna Diosen' naque' beņe' güen len le'.

⁸ Da' Abrahanna' lecze gwyejnilaže' Diosen'. Da'n'an' bzenague' cate' bo' güiž Diosen' le' na' gože'ne' šejje' ga de to yežlio zito' da' gaquen če'. Na' gwyeje' la'czla' bi nombi'e latjen'. ⁹ Na' Abrahanna', da' gwyejnilaže' Diosen' jasoe' laž beņe' zito' da' gwna Diosen' gac če' na' gac če xi'ű diaža' če'. Gwzoe' lo' yo'o de lache'ze na' lecz lo' yo'o de lache'ze gwnita' xi'űe' Isaaquen' na' xi'ű xesoe' Jacob beņe' lecze gož Diosen' gac yežlion' čhegaque'. ¹⁰ Abrahanna' gwzoa gwleze' ca' lo yežlion', le gwņezde' žin ža šjayzoe' gan' zoa Diosen' gan' naquen to ciuda güen da' bi te čhen, ciuda da' ben Diosen'.

¹¹ Na' Saran' no'ol nac no'ol če Abrahanna', la'czla' naque' beņe' güiž na' naque' beņe' gole par soa xi'űe', Diosen' bene' to yela' guac cont gwzoa xi'űe', le gwyejle'e gon Diosen' con can' gwne' gone'. ¹² Ca' goquen'

gwzoa bi' che da' Abrahanna' la'czla' goque' bene' gole par soa xi'ine', nachen' xi'in diaža che' gosaque' bene' zan can' zjanac beljw ca' na' can' nac yox da' chi' cho'a nesdaon' da' nono chac gwlab.

¹³ Yogo' bene' ca' ne' chesejnilaže' Diosen' cate' bžin gosate'. Na' la'czla' bina' gac lo na'gaque' dan' gože' le-gaque' gac čhegaquen', bi gosaczejlaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. ¹⁴ Na' da' goso'e diža' bibi lažgaque' de yežlion', nacbia' goseze-laže' yesyežine' ga yoble gan' gac lažgaque'. ¹⁵ Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbaben' ca'. ¹⁶ Gosezelaže' yesyežine' yaban', le gosejle'e na'len' nac lažgaque', na' goseņezde' nacchen güenč ca yežlion'. Da'nan' Diosen' bi cheto'ede' čhegaque' že' naque' Dios ben' chesonxene', na' ba benšagüe' to ciuda gan' zjanite'.

¹⁷ Na' Abrahanna' da' gwejnilaže' Diosen' da'nan' bzenague' cate' Diosen' bene' le' prueba gože'ne' cheyala' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czla' gwņezde' Diosen' gože'ne': ¹⁸ "Gona' cont ŋita' xi'in diaža čhio' bene' yesac xi'in diaža che Isaaquen'." ¹⁹ Da' Abrahanna' bečhoglaže' gote'be', le gwņezde' Diosen' chac chosbane' bene' guat. Perw na' Diosen' bi be'e latje gote'be'. Da'nan' guac ŋacho bosbane'be' ladjo bene' guaten', la'czla' gague gotbe'.

²⁰ Gwdechle Isaaquen' gwejnilaže' Diosen'. Da'nan' gwñabde' Diosen' gone' güen len xi'ine' Jacob na' Esaú. ²¹ Lecze da' Jacoben' gwejnilaže' Diosen'. Da'nan' cate' ba zoa gate', gwñabde' Diosen' gone' güen len xi'in xeso'e' ca' bin' gosac xi'in da' José. Na' bcheque' yičhje' benxene' Diosen' ŋchiše'teze' carrot che'. ²² Na' da' Josén' gwejnilaže' Diosen', na' gwejle'e žin ža yesyechoj bene' gualaž che' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit benat čhen' cate' yesyeya'aque'.

²³ Cate' golje da' Moisésen', da' leca gosejnilaže' xaxne'en Diosen', bi besežebe' yesyedabague' dan' bžia bia' reyen' yesone', gwne' cheyala' yesote' bi' byo čhegaque' ca'. Šone bio' bosocuaše'be' ližgaquen', le gosacde' nacchguabe' xdan. ²⁴ Nach bi' no'ol che rey beque'ebe' bosča'ogüe'be'. Perw cate' ba gwcha'o da' Moisésen' bžone' yesone' le' ca' xi'in bi' no'ol che rey che Egipton', le gwejnilaže' Diosen'. ²⁵ Da'nan' gwyazlaže'che' bžaglagüe' txen len bene' gualaž che' ca' yogo' dan' bososaca'zi' bene' Egipto ca' legaque', clal ca' gone' txen len bene' Egipto ca', le gocbe'ede' yob te che yela' chebe che da' xinj ca' cheson legaque'. ²⁶ Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac che' yogo' yela' gwñi'a da' de che bene' Egipto ca', le gwņezde' gwžin ža gon Diosen' cont soe' mbalaz. ²⁷ Na' da' gwejnilaže' Diosen', bi bžebe' rey cate' bžin ža besyechoj'e Egipton' la'czla' reyna' bža'achgüe' legaque', con gwzoacze'

bzenague' che Diosen'. Gwņezde' zoacze Diosen' la'czla' bi chle'echone'.

²⁸ Nach Moisésen' da' gwejnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosoži'e xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. ²⁹ Na' da' xozxta'ocho ca' gwnita' cani', da' gosejnilaže' Diosen' da'nan' Diosen' bene' cont Nisdao' Xñan' goquen čhople, na' bla' yo biž gacholen cont goc goseļague'. Perw bene' Egipto ca' cate' gosaclaže' leze yeselague' nisdaon', bocuaše' nisa' gan' cheseden', na' gosate' gose'eje' nisen'.

³⁰ Lecze da' gosejnilaže' da' xozxta'ocho ca' Diosen', da'nan' Diosen' bene' cont bebix ze'e da' gwečhj doxen ciuda Jericó cate' gosečhje' ze'en yogo' ža lao gaže ža. ³¹ Na' da' no'olen' le' Rahab, no'olen' goque' no'ol zle', lecze gwejnilaže' Diosen', na' da'nan' bi gwžiyae' txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jaseņe'e lažen'.

³² Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che da' rey David, che da' Samuel, na' che yezica'chle bene' goso'e xtiža' Diosen' cani'. ³³ Da' gosejnilaže' Diosen' besechoje' gosone' gan cate' gosediļe' len no rey, na' baļe' gosaque' bene' gwnabia' na' gosone' byen goson bene' yoble da' güen, yebaļe' besele'ede' ben Diosen' bi da' güen da' gwne' gone' len legaque', yebaļe' Diosen' bene' cont bež znia bi gosagwba' legaque' na' bi gosoneba' le-gaque' zi' cate' gosegüe'e legaque' gan' že'ban'.

³⁴ Lecze da' gosejnilaže' Diosen', baļe' bi goseye' cate' bene' bosozale' legaque' lo yi', yebaļe' besyele' cate' bene' gosaclaže' yesote' legaque' len spada, yebaļe' beyon Diosen' legaque' bene' gual cate' bich zjanale', yebaļe' goclene'ne' gosaque' soldadw gual cont gosone' gan cate' soldadw bene' zito' gosediļlene' le-gaque'. ³⁵ Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o čhegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosaclaže' yesyele' lo na' bene' mal ca'. Goso'e latje bosochi bososaque' legaque', le goseņezde' gwžin cate' Diosen' yečhis yosbane' le-gaque' ladjo bene' guat ca' cont yesenite' len le'.

³⁶ Gwnita' yebaļe' bene' leca gosezi'diža' bene' legaque' na' leca goseyine' legaque', na' bosochje' legaque' gden na' goseyixjue' legaque' ližya. ³⁷ Na' bene' ca' be-segue'e legaque' gosote' legaque', baļe' bosochle' le-gaque' yej, yebaļe' bosozoxje' cuerp čhegaquen' len sier, yebaļe' gosote' len spada. Na' baļe' bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' čhegaque', leca nyaše' gosac čhegaque' catec bosochi bososaca' bene' le-gaque'. ³⁸ Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjaza-

ca'chgüe' na' beñe' že' yežlio nga bi zjazaque' yesenite' txen len legaque'. ³⁹ Diosen' bebede' yogo' beñe' ca' da' gosejnilaže' le', perw šlac gosenite' biña' gone' yogo' da' güen da' gwne' gone' che xi'iq̄ diaža che da' Abrahanna'. ⁴⁰ Le goclaže' gone' ga gac che chio' zoa-cho ña'a yogo' da' güen da' gwne' gone', cont txen len beñe' ca' gosejnilaže'ne' cani', yeyož gaccho can' chazlažen'.

Cheyała' soacho goncho xbab che Jesúsén'

12 Nezecho ba gwnita' beñe' zan gosone' da' güen neče da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo. ² Jesúsén' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca Jesúsén' byo bčeje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnežde' za' gon Diosen' cont soe' mbalaz len le'. Na' ña'a Jesúsén' ba chi'e chnabi'e txen len Diosen'.

³ Cheyała' goncho xbab can' byo bčejljaže' Jesúsén' len yogo' da' ca' gosone beñe' mal ca' le' na' bene' can' gwna Diosen'. Na' ca'cze cheyała' gwyo gwčejljaže'cho goncho can' chazlaže' Diosen' la'czla' še chaquechon zdebe; bi cheyała' yeche'echo. ⁴ Da' zan da' ba bžaglaole chdiillenle da' malen', perw biña' lalj xchenle na' biña' yesote' le'e. ⁵ ¿Ba gonlaže'le can' ža Diosen' chneyoede' chio' can' chon beñe' chneyoe xi'iq̄e? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj, na' bi gaco' tole cate' chdi'e' le'.

⁶ Le Xancho Diosen' chzejni'ide' yogo' beñe' chacde', na' chnežjue' da' saca'zi' yogo' beñe' ba gwque'e ca xi'iq̄e' cate' chesone' da' xinj.

⁷ Cheyała' gwyo gwčejljaže'cho cate' Diosen' chone' chio' da' saca'zi'cho, le chonde' chio' ca beñachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. ⁸ Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'iq̄e', le yogo' beñe' ba gwque'e ca xi'iq̄e' chnežjue' da' yesezaca'zi'e cate' chesontezbe' da' xinjen'. ⁹ Yogo' xaxña'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyała' yesone'. Nacchxe cheyała' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocañe. ¹⁰ Na' xaxña'chon' to chop izzen' šlac bososgole' chio' gosone' castigw checho con ca gosaclaže'. San Diosen' nežde' bi da' nac güen par chio', na' chdi'e' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'. ¹¹ Na' bite'tez da' chyi chzaca'cho, šlac

chaquen bi chazlaže'chon, perw cate' ba gwden chaclenen goncho da' zej to liča na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'nan' le soa le gon can' chazlaže' Diosen' sin cbi yeche'ele. ¹³ Le soa le gon da' güen cont gaclenle beñe' ca' ñe' chesacžejljaže' naquen' yesone' cont legaque' yosozenagche' che Diosen' na' bi yesebejyichje' xtižen'.

¹⁴ Le yeyiljwlaže' nacle gonle soale binlo len yogo'cze beñe', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. ¹⁵ Le gaclen lježe' cont ne tole bi ganlaže'le catequen' nžilaže' Diosen' chio', le cate' chzolaicho choncho güedenag len Diosen', bedao' chča'o chxenen na' guacte gonen cont beñe' zan yesonche' da' xinj. ¹⁶ Bi gata'lenle beñe' byo bi nac beñe' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyała' gwnežjo Diosen' le' dan' golje' goque' beñe' nechw. ¹⁷ Nezele gwdechle goclaže' yeyac lo ne'e da' bdie' lo na' beñe' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

¹⁸ Nža'le chac che chio' ña'a na' can' goc che da' xoxta'ochocani' cate' Diosen' bnežjue' legaque' ley chen'. Cate' betje' lo ya'a Sinaí gwyechj yi' bel ya'ana', gwxoan žen, beyaquen cho, na' gwyechjchgua be'. ¹⁹ Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'. ²⁰ Besežebchgüe', le Diosen' ba gožle' legaque' še noe' yesebigue' lo ya'an cheyała' yesote'ne' yosoche'le'ne' yej, na' lecz ca' yesone' še len beyixe'. ²¹ Da' zaca' žebcho goc lo ya'an, lente da' Moisésen' gwne': "Leca chaž chžeba' can' chaquen'."

²² Perw chio' chejnilaže'cho Criston' ba naccho txen len Diosen' ben' zoa toli tocañe na' len yogo' angl che' beñe' že' yaban' chesonxene'ne', beñe' zjanaque' beñe' zan juisyw. Da'nan' guac ñacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. ²³ Na' naccho txen len yogo'lojte beñe' chesedop chesežag chesonxene' Jesucriston' gate'teze, beñe' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxña'be', le si'cho da' güen da' gon Diosen' chio'. Na' naccho txen len Diosen' beñe' choglaogüen' che yogo' beñach še de xtoła'gaque'. Lecze naccho txen len beñe' ca' ba gosat, beñe' gosaque' beñe' güen lao Diosen' da' gosejnilaže'ne', na' ña'a ba beyož zjanacyane' can' chaclaže' Diosen'. ²⁴ Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' beñachen'. Na' blalj xchenen' cont ba bnitlao Diosen' xtoła' chio' chejnilaže'chone'. Da'nan' xchen Jesúsén' zaca'chen ca xchen da' Abelen' da' gwllaj caten' betw beñe' bišen' le'.

²⁵ Da' mal juisyw še goncho güedenag len Diosen' cate' chne' chio'. Bene' cont gosezaca'zi' da' xozxta'ochó ca' cate' gosone' güedenag len xtižen' da' gwnelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' choe'lene' chio' lo' lažda'ochon' zoe' yaba na'ate. ²⁶ Le-ca gwxo' cate' Diosen' betje' lo ya'a Sinaín' cont be'lene' da' xozxta'ochó ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." ²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. ²⁸ Da'nán' cheyała' güe'cho yeła' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyała' gacbe'echo beñe' zaca'chgua nac Diosen' cont gonxenchone' do yichj do laže'cho can' chazlažen'. ²⁹ Cheyała' gwzenagcho čhen', le Dios chechon' leca chgue'ede' da' malen', na' sele' lo yi' gabił beñe' ca' bi yesyetingjde' che da' xinjen', da'nán' zaca'lebde' ca' yi' beł.

Da' chazlaže' Diosen' goncho

13 Bitw gwsanle gague lježle, le yogo'cho chejni-laže'cho Jesucriston' naccho ca' biše' lježcho. ² Na' bi ganlaže'le cheyała' gwleble beñe' za'ac zito' ližlen' beñe' chesejnilaže' Jesucriston'. Bał xozxta'ochó ca' cate' bosolebe' beñe' zito' ližgaquen' bosolebe' angl beñe' gwseła' Diosen' neca gosacbe'ede'. ³ Cheyała' gonle xbab che beñe' lježcho ca' chesata' ližya cont gaclenle legaque'. Na' cheyała' gonle xbab can' gałe'le šaca' chac chele can' chac che beñe' ca'. Na' bi ganlaže'le beñe' lježcho bi da' chosoči chososaca' beñe' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gałe'le šaca' chac chele can' chac che beñe' ca'. ⁴ Na' le'e nšagna'le, yogo'le le soa do laže'le len no'ol chele o beñe' chele na' bi talenle beñe' yoble, le Diosen' gone' saca'zi' beñe' chesata'lene' no'ole bi zjanac no'ol čhegaque' o beñe' byo bi zjanac beñe' čhegaque'. ⁵ Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." ⁶ Da'nán' bibi de da' žebcho, na' to tocho guac nacho: Xana' Diosen' zoe' chaclene' neda'. Bi žeba' bi da' gone beñachen' neda'. ⁷ Le šjayze'e beñe' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze beñe' gosacbe'ede' gosenite' gosejnilaže' Diosen', na' le nita' le šejnilaže' Diosen' can' gosonen'. ⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gague' toli' tocañe. ⁹ Bi güe'le latje yeseziye' beñe' le'e len bi diža' yoble da' chosozejni'ide', le nža' xen can' chososed chosolo'e bałe'. Da' chon Diosen' lo' lažda'ochon' neče

da' nži'ilaže'chgüede' chio', lenna' chaclenen chio', gague da' ca' chesena beñe' cheyała' ye'ej gagwcho. Na' ca' nac da' ca' chesene' cheyała' ye'ej gagwcho cont yebe Diosen' chio', biña' yesaclenen beñe' ca' chesene' cheyała' gagwchon, na' neca gaclenen chio'.

¹⁰ Xancho Jesucriston' bnežjw cuine' gosote'ne' neče chio', na' da' chejnilaže'chone' ba gwnitlao xtoła'chon'; perw beñe' ca' ne' chosolalje' xchen beyixe' na' chosoz-eye'ba' cate' cheseñabe' yezi'xen Diosen' čhegaque', da' got Jesucriston' bi chaclenen legaque'. ¹¹ Nezecho tñi'a tgüiz beñe' nac bxoz blao che beñe' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chñabde'ne' yezi'xene' xtoła' yogo'loł gague'. Nach yezica'chle bxoz ca' chosozeye' cuerp che beyixe' ca' cho'a yežen'. ¹² Na' ca' ca'le' goc che Jesúsén' dan' gosote'ne' cho'a ciuda Jerusalénna' cate' bnežjw cuine' cont beque'e xtoła'chon' len xchene' dan' blaljen'. ¹³ Da'nán' cheyała' šejnilaže'cho Jesúsén' na' cuejyichjcho costumbr gol ca', la'czła' yeseque'e beñe' chio' da' choncho ca'.

¹⁴ Gate'tez zoacho lo yežlio nga da' te čhen, perw chbezcho šjayzoalencho Diosen' lo ciuda da' bi te čhen. ¹⁵ Da' ba beca'a Jesucriston' xtoła'chon' cheyała' güe'cho yeła' choxclen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. ¹⁶ Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho beñe' bi de čhegaque', le chazlaže' Diosen' cate' chonxenchone' choncho ca'. ¹⁷ Le gwzenag che beñe' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia cheseñe'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag čhegaque' cont yesyebede' na' cont da' chesone' bi gaquen to da' zdebe, le še gonle güedenag len le-gaque', bibi da' güen chga'añ chele še ca'.

¹⁸ Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen. ¹⁹ Na' leca chata'yoeda' le'e yol güižle Diosen' nable yob gac yidcha' gan' zualen'.

Chñabe' gaclen Diosen' legaque'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bečhis bosbane' Xancho Jesucriston' ladjo beñe' guat, le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' beñe' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca' to beñe' güeye' xila' beñe' chon da' güen juisyw len be che' ca'. ²¹ Na' chñabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli' tocañe. Na' ca' gonšcaczcho.

²² Beṇe' migw, chṇabšca' bi gaquele zed da' ba bzoja' le'e chṇeyoeda' le'e nga, le bitec naquen da' toṇe.

²³ Na' chzenda' le'e beṇe' migw ḡhecho Timoteon' ba bechoje' lṇžyan' na' chbeza'ne' nga. Na' še yob yele'e nach ḡhi'ane' cate' yedeṇa'a le'e.

²⁴ Ca nac neda', chguapa' tiox beṇe' blao ca' chosoze-jni'ide' le'e na' chosogüia cheseṇe'e le'e, na' ḷecze chguapa' tiox yogo' nochle beṇe' chesejnilaže' Diosen'. Beṇe' lježcho ca' za'ac Italia ḷecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

Santiago

Santiago'n chguape' tiox beṇe' ca' zjanaslas zan yež

1 Neda' Santiago naca' beṇe' güen žin che Diosen' na' che Xancho Jesucriston'. Chguapa' le'e tiox, le'e nacle šižinw cue' xi'in diaža che da' Israel, le'e chejni-laže'le Jesucriston' na' naslasle yežlion'.

Nac nezecho can' che'ne Diosen' goncho

² Beṇe' migw, cheyała' yebechgüecho cate' chac bite'teze da' chac checho. ³ Cate' chac bi da' chac checho chonen chio' prueba še gončhačhlaže'cho šejnilaže'cho Diosen'. Na' nezecho cate' chončhačhlaže'cho chejnilaže'chone', chaclenen chio' cont gapchcho yeła' chxenlaže' len bite'teze da' chac checho. ⁴ Na' da'nana' cheyała' gaple yeła' chxenlaže' bite'teze dan' chac chele na' gončhačhlaže'le šejnilaže'le Diosen' cont gacle can' chaclaže' le'.

⁵ Note'tezcho cate' bi nezecho naquen' chaclaže' Diosen' goncho, cheyała' ṇabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdiže' chio' cate' chṇabechone' gaclene' chio'. ⁶ Perw cate' chṇabechone' gwzejni'ide' chio', cheyała' šejle'cho chzenagcze' chechon' na' bitw gacžejlaže'cho. Bena' chacžejlaže' še chzenag Diosen' che', zaca'lebde' ca nisdao' dan' chas chata' cate' chečj be' lagüen' na' chjatan' nile na'le. ⁷ Ben' chacžejlaže' še chzenag Diosen' che', bitw cheyała' soe' lez gwnežjw Diosen' le' bite'teze da' chṇabe'. ⁸ Na' ben' chon ca' bitw nežde' bi xbab chone', con šayičj šayen chaque' len bite'teze dan' chonen'.

⁹ Na' beṇe' migw, le'e chejnilaže'le Diosen', še nole nacle beṇe' yaše', le soa mbalaz, le nacle beṇe' zaque' len Diosen'. ¹⁰ Na' beṇe' migw, še nole nacle beṇe' gwṇi'a, le soa mbalaz dan' ba chacbe'ele lao Diosen' bitw zaca'chle clē ca yezica'chle beṇe'; na' yob te che yeła' gwṇi'an' can' chde che yej ca' zjaze yiže'. ¹¹ Cate' chṇa'chgua gwbižen' chesecquad yiže' ca', na' cheseyiṇj laga' che yejen' na' bich chosolo'en xdan. Can' chac len yej ca', lecze can' gac len beṇe' gwṇi'a ca', yeyol yenite' lao xšinen'.

Cheyała' soateze soacho šejnilaže'cho Jesucriston' bite'teze dan' chac checho

¹² Še chyo chčejejaže'cho len da' chac checho na' chončhačhlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocaṇe can' gwne' ban yogo'cho chaquechone'. ¹³ Na' note'tezcho

cate' žan goncho da' malen', bitw gac ṇacho Dios nan' chgo'oyeje' chio' goncho da' malen', le Diosen' bitw chgo'oyeje' beṇe' yesone' da' mal. Lecze ca' le', bitw bi de da' chgo'oyeja' le' cont gone' da' malen'. ¹⁴ Yeła' chzelaže' checho dan' yo'o lo' yičjlažda'ocho chonen cont chzelaže'cho choncho da' mal. ¹⁵ Na' še ba choncho can' ža yeła' chzelaže' dan' yo'o lo' yičjlažda'ocho' na' zoacho choncho da' malen', nach gwžin ža cate' cuejyičj Diosen' chio' na' bitw šjayzoacho len le'.

¹⁶ Beṇe' migw, bitw siye' cuinle gonle xbab Dios nan' chgo'oyeje' le'e cont gonle da' malen'. ¹⁷ Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. ¹⁸ Gwyazlaže' Diosen' bocobe' yičjlažda'ocho' cate' gwyejle'cho che diža' li čhen'. Na' ba bocobe' yičjlažda'ocho' cont žialaocho len beṇe' nechw ca' chesejnilaže'ne'. Na' da' ba bocobe' yičjlaždao' chio', nezecho za' gone' ca' len beṇe' zan.

Can' goncho cont yebe Diosen' chio'

¹⁹ Beṇe' migw, nezele cheyała' yebecho gwzenagcho che diža' güen, na' cheyała' goncho xbab cate' za' necho, na' neca la' ža'atecho. ²⁰ Cate' chža'acho, bitw chac goncho güen can' chaclaže' Diosen' goncho. ²¹ Da'nana' cheyała' cuejyičjcho yogo'lo' da' xinjen' ba benchon' na' yogo'lo' da' chgue'e Diosen' da' gwcha'o gw Xenen lo' yičjlažda'ocho cate' biṇa' šejnilaže'chone'. Cheyała' gwzewjw yičjcho na' gwzenagcho diža' li che Diosen' dan' ba yo'o lo' yičjlažda'ocho', cont gata' yeła' mban checho toli tocaṇe.

²² Na' cheyała' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. ²³ Ben' chene diža' li che Diosen' na' bi chone' can' žanna', zaca'lebde' ca to beṇe' chṇa' cho'alagüen' lo spejw, ²⁴ le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. ²⁵ Perw beṇe' zoacze' chzenague' xtiža' Diosen' do yičj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

²⁶ Note'tezcho še choncho xbab choncho can' chaclaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan'

choncho še ca'. ²⁷ Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažide', na' cuejyichjcho bich goncho da' xinj dan' cheson beñe' ca' bi zjanombia' Diosen'.

Toze can' cheyała' goncho len yogo' beñe'

2 Beñe' migw, Xancho Jesucriston' naque' la'ze-lagüe beñe' zaca', na' še chejnilaže'chone', toze can' cheyała' goncho len note'teze beñe', bitw ñacho balze beñe' gonxenchguachone' na' yebale' gonechone' nacteze. ² Še yesela' çhope beñe' gan' chdop chžagcho chonxencho Jesucriston', na' toe' naque' beñe' gwñi'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' beñe' yaše' na' nyaze' lache' de'exo', toze can' cheyała' goncho len chope'. ³ Bitw naquen güen še gonxencho beñe' gwñi'a na'ze na' ye'chone': "Gwche'edo' lo yag siy nga ga nac binlo", na' ye'cho beñe' yaše'na':

"Gwzechateze do dan' na'le", o še ye'chone': "Gwche'etezdo' lo yo". ⁴ Bitw naquen güen lao Diosen' še cuinzcho çhoglaochon ñacho noen' zaque' na' noen' bi zaca'. Xbab çhechon' naquen da' mal še goncho ca'.

⁵ Beñe' migw, Diosen' ba gwleje' zan beñe' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac çhe note'teze chio' chaquecho le'. ⁶ Perw na' chonje beñe' yaše' ca' ca beñe' bibi zjazaca'. Na' beñe' gwñi'a ca' chongaclene' ca beñe' zjazaca'chgua; len legaquen' chosoçhi chososaque' le'e na' cheseçhe'xoçje' le'e lao justis ca'. ⁷ Lecze legaquen' chosožie' ye'la' ya' çhe Jesucriston' ben' naccho txen, ben' naque' beñe' zaca'.

⁸ Ley dan' nac da' žialao lao yogo' da' ca' nye'la' le'e Xtiža' Diosen' žan: "Le gague ljež beñe'çhle ca' chaque cuinle." Še da' licze chonje can' žanna' chonczle güen. ⁹ Perw ley çhe Diosen' chçhoglaon çhele naple do'la' še chonxenle bal beñe' na' yebale' chongaclene' ca beñe' bibi zaca'. ¹⁰ Can' naquen, note'teze beñe' zoe' chone' do'lo' can' ža leyna', perw na' še ba gwçhoe' to da' dao', len doxen leyna' chape' do'la' še ca'. ¹¹ Diosen' ben' gwna: "Bitw gata'lenle no'ole bi nac no'ol çhele o beñe' byo bi nac beñe' çhele", leczen' gwne': "Bi gotle beñe'". Na' la'czla' bitw chata'lencho no'ole bi nac no'ol çhecho o beñe' byo bi nac beñe' çhecho, še ba naccho beñe' güet beñe', bia'cze napcho do'la' len leyna'. ¹² Xtiža' Diosen' chaclenen chio' cont bi gwzenagcho çhe da' malen'. Na' cheyała' güe'cho diža' güen na' soacho goncho bichle can' žanna', le Diosen' goñe' da' saca'zi'cho še bi choncho can' žanna'. ¹³ Diosen' gwnežjwchgüe' da' saca'zi' beñe' ca' bi chesyejaše' chesyeži'ilaže'de' ljež beñe'çhe'. Perw beñe' ca' chesyejaše' chesyeži'ilaže'de' ljež beñe'çhe', Diosen' yeyaše' yeži'ilaže'de' legaque'.

Bitwbi zejen še con žacho chejnilaže'cho Jesucriston'

¹⁴ Beñe' migw, še to beñe' že' chejnilaže' Jesucriston' perw bi chone' da' nac güen, bitwbi zejen že' ca'. Bitw

chaclenen le' cont gata' ye'la' mban çhe' toli tocañe še con žaze' ca'. ¹⁵ Bal beñe' lježcho beñe' chesejnilaže' Jesucriston' bi de da' yese'e'j yesagüe' na' bi de xałana'gague'. ¹⁶ Na' še bitw gaclenchone' len dan' cheseyažide', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažje-len'", bitwbi zejen dan' con ñacho ca'. ¹⁷ Da'nana', še con žacho chejnilaže'cho Jesucriston' perw bitw choncho da' nac da' güen, bitwczze bi zejen dan' žacho chejnilaže'chonen'.

¹⁸ Nita' beñe' chesene' guac yesejnilaže' Jesucriston' la ca yesone' da' nac da' güen. Na' lecze nita' beñe' chesene' še chejnilaže'cho Jesucriston' cheyała' goncho da' nac güen. Na' žia' le'e, še ñacho chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesacbe'e beñe' le chejnilaže'chonen'. ¹⁹ Chejle'cho toze Diosen' zaque' gonxenchone', na' ca'czen' cheyała' šejle'cho. Perw gague da' ca'zen' cheyała' goncho. Da' xigüe' ca' lecze chesejlen' toze Diosen' naque' beñe' zaca' na' chesexizen chesežeben. ²⁰ Chnecho diža' da' bi zejen še con žacho chejnilaže'cho Jesucriston' na' bitw choncho da' güenña', le bi gaclenen chio' še con žazcho chejnilaže'chone'. ²¹ Da' xoxta'ocho Abrahanna' blo'e le gwejnilaže' Diosen' dan' bzenague' çhe Diosen'. Da'nana' bzande' xi'ine' Isaaquen' gote'be' cont gonxene' Diosen'. Na' dan' bzenague' çhe Diosen', da'nana' Diosen' gwne' çhe' le naque' beñe' güen len le'. ²² Na' nezecho can' ben da' Abrahanna', gague con gwejnilaže'ze Diosen', san lecze bzenague' çhe'. Na' dan' bene' ca' blo'e le gwejnilaže' Diosen'. ²³ Da'nana' goc can' nyoj Xtiža' Diosen' çhe', žan: "Abraham gwejnilaže' Diosen' na' da'nana' Diosen' gwne' naque' beñe' güen len le'." Na' lecze nyojen çhe Abrahanna' goque' beñe' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho beñe' güen len le', san dan' chzenagcho çhe', da'nana' že' naccho beñe' güen len le'. ²⁵ Na' da' Rahab goque' no'ole zle' no'ol con gwej len note'teze beñe' byo, perw bzenague' çhe Diosen' cate' blebe' beñe' ca' çhope jasegüia jaseñe'e laže'na'. Na' blo'ede' legaque' yetole nez ga jaya'aque' cont bi jasyexen soldadw çhe rey legaque'. Na' dan' goclene' beñe' ca', blo'e gwejnilaže' Diosen'. Na' gwna Diosen' naque' beñe' güen len le'. ²⁶ Quinga naquen: Še to beñe' bich nye'e biš grasyw, nacbia' naque' beñe' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

Choncho da' xinj len xtiža'cho

3 Beñe' migw, nezecho neto' chsed chlo'eto' beñe' yoble xtiža' Diosen' saca'zi'chto' še bi gonto' can' žanna'. Da'nana' žia' le'e, gague la' si'te lo na'le gwsed gwlo'ele beñe' yoble xtiža' Diosen'. ² Zan ñi'a yogo'cho choncho da' xinj. Perw še to beñe' bitw chone' da' xinj len xtiže'na', nacchgüe' beñe' güen na' gwzoeczde' ña-

bie' doxen cuerp ĉhen' še ca'. ³ Caten' chgo'ochō freno cho'a cabayw ca' cont yosozenagba' ĉhecho, na' šja'acba' con gate'teze chaclaže'cho šejlenchoba'. ⁴ Na' ĩecze beņe' ca' chososa' barcw xen ca' chosoĉhine' yag da'oze dan' chosose'eden' cont chejen con gate'teze chesende', ĩa'czĩa' še chžiga' to be' gual ĩegaquen'. ⁵ Ca'czen' naquen len ĩože'chon'. Toze da' dao' rizen' naquen lao cuerp ĉhechon', perw chac chĥelenchon diža' da' zjazaca'. Na' ca nac to yi' dao' riz, guac gwzeyen to ya'adao' xen, ca'czen' naquen len ĩože'chon' cate' chĥelenchon diža' mal. ⁶ ĩože'chon' naquen to da' chnabia' chonchguan da' xinĵ juisyw lao doxen cuerp ĉhechon'. ĩože'chon' naquen ca to yi' beĭ da' chla'an chca'an nile na'le chzeyen bite'teze da' de, ĩe še choe'cho diža' malen' chyaĭa'ch yogo'ĭoĭte da' xinĵ dan' chonchon', na' chonen cont zoacho chonchguacho da' xinĵ yešĭale mbancho. Na' ĉhe gwxiyen' chzenagcho caten' choe'cho diža' mal ca'. ⁷ Chac chnabia'cho yogo'te beyix'e, be žia tap ni'a na', be žia xil, be chda nxobe ĩe'e, na' be ca' že' ĩo' nis. Ba gwnita' beņe' gosnabi'e'ba'. ⁸ Perw ĥe to chio' bitw soeĉho ĩože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca venen ĉhe to beĭ znia. ⁹ Len xtiža'chon' chonxencho Dios ben' naque' Xaĉho. Na' ĩecze len xtiža'chon' chžiachō yeĭa' ya' ĉhe ĩjež beņaĉcho beņe' ca' ben Diosen' can' nac ĩe'. ¹⁰ Na' cho'achō na' chĉhoj diža' šagüe' cate' chonxencho Diosen' na' ĩecze chĉhoj diža' mal cate' chžiachō yeĭa' ya' ĉhe ĩjež beņaĉcho. Beņe' migw, bitw choncho ca cheyaĭa' goncho. ¹¹ Nezecho ga chal nis bitw žia nis sia na' nis zbapĵ toz beĵ. ¹² Na' ĩecze ca' beņe' migw, nezecho to yag yixgüigw bitw chbian frut dan' nzi' aceituna, na' ĥeca yag uvas chbian yixgüigw. Na' ĩecze ca' ga chal nis, bitw chĉhoj nis sia to beĵ ga žia nis zbapĵ.

Can' goncho še Diosen' ba beņe' chio' yeĭa' sina' ĉhen'

¹³ Še note'tezle žale nacle beņe' sina' na' chejni'ile xtiža' Diosen', cheyaĭa' gonĭe yogo'ĭoĭ can' chazlaže' Diosen'. Cheyaĭa' gonĭe da' güen sin cbi gonxen cuinĭe cont nacbia' nacle beņe' sina'. ¹⁴ Perw še chgue'e ĩježle na' chzelaže'le gacĉhle beņe' blaoch ca beņe' ĩježle, bitw cheyaĭa' ĥale nacle beņe' sina', ĩe con chonĭaže'len' še ca'. ¹⁵ Na' še chgue'e ĩježle na' chzelaže'le gacle beņe' blaoch ca beņe' ĩježle, bitw nacle beņe' sina', san xbab ĉhelen' zan' ĉhe Satanás dan' chnabia' da' xigüe' ca', na' con chonĭe da' xinĵen' can' ža lažda'olen' na' can' cheson beņe' ca' bi zjanombia' Diosen'. ¹⁶ Še chgue'e ĩježcho na' chzelaže'cho gacĉho beņe' blaoch ca ĩegaque', bitw zoacho binĭo len ĩegaque' še ca', na' choncho yogo'te da' xinĵ. ¹⁷ Cate' Diosen' chone' chio' yeĭa' sina' ĉhen', chaclaže'cho goncho yogo' da' nac da' güen. Chaclaže'cho soacho binĭo len ĩježcho na' nacĉho beņe' xenĭaže' na' chzexĵw yichĵcho cont chzenag ĉhe ĩježcho. Na' ĩecze cheyaše' cheži'ilaže' ĩježcho na' choncho da' güen len ĩegaque', na' toz ca choncho len note'tez beņe'. Na' bite'tez da' choncho, chonchon do laže'cho. ¹⁸ Nach še chebecho

yesezoa yesebez beņe' binĭo na' chaclencho beņe' yezi-ca'ĉhle cont yesezoa yesebeze' binĭo, na' chaclenen cont yeson beņe' da' güen.

Bitw gac goncho can' cheson beņe' bi zjanombia' Diosen'

⁴ Chdiĭe chšašlen ĩježle, na' chonĭe ca' dan' yo'o nyaz da' malen' yichĵlažda'olen' na' chnabian' le'e cont chonĭe con ca žan ĉhele. ² Chzelaže'chguale bi da' gata' ĉhele na' chdiĭe chšašlen ĩježle na' chaclaže'tele gotle beņe' cont gata' ĉhele dan' chzelaže'len'. Perw bitw gata' dan' che'nelen' lagüete chonĭe da' xinĵ na' bi chĥabele Diosen' gone' cont gata' dan' chyažjelen'. ³ Na' cate' chĥabele Diosen' gone' cont gata' bi dan' gata' ĉhele, bitw chonen', ĩe con che'nele gata' dan' chzelaže'le ĩo' lažda'olen' cont gonĭe con nacteze žan ĉhele. ⁴ Na' da' chzenagle ĉhe dan' ža xbab ĉhelen' na' chonĭe can' chzelažen'na', chonĭe txen len beņe' ca' bi zjanombia' Diosen', na' chonĭe contr Diosen'. Na' note'tezcho še chaclaže'cho goncho txen len beņe' mal ca', choncho contr Diosen' na' bich chaqueĉhōne' ca cheyaĭa'. Zaca'lebcho ca to no'ole nzoa xto, no'ole ben' bich chacde' beņe' ĉhe'. ⁵ Chonĭjale xbab Xtiža' Diosen' bitw bi zacan' gan' nyojen žan: "Spiriĵw ĉhe Diosen' dan' zoan ĩo' lažda'ochon' chzelaže'chguan gwzenagĉho ĉhe toz Diosen'." ⁶ Diosen' chaclenĉgüe' chio' cont chzenagĉho ĉhe toz ĩe'. Da'nān' nyoj Xtiža' Diosen' žan: "Diosen' chone' contr beņe' ca' chesonxen cuin-gaque', perw chaclene' beņe' ca' chesacbe'ede' bi chosozenague' ĉhe' ca cheyaĭa'." ⁷ Da'nān' cheyaĭa' gon cuincho ĩo na' Diosen' na' gwyo gwĉheĭlaže'cho bi gwzenagĉho ĉhe Satanásen'. Še goncho ca', gw-cuaseczen ca'ale. ⁸ ĩe soa ĩe yoĭ güiž Diosen', nach soe' gaclene' le'e. Cheyaĭa' cuejyichĵle da' xinĵ da' chonĭe. Na' še chonĭe xbab guac gonxencho Diosen' na' gontezcho can' ža lažda'ochon', clelen' chonĭe xbabēn' še ca', na' cheyaĭa' güe'le latje yeyon Diosen' yichĵlažda'olen' xilaže'. ⁹ Bi cheyaĭa' yebele, san cheyaĭa' yegüine'le neĉhe da' xinĵen' ba benĭen' na' yeto'ele ĉhen'. ¹⁰ Cheyaĭa' gwzexĵw yichĵle lao Xancho Diosen', nach Diosen' gone' cont gacxenĭe.

Bi cheyaĭa' ĥacho ĉhe ĩježcho nape' doĭa'

¹¹ Beņe' migw, bi cheyaĭa' ĥelaocho ĉhe ĩježcho. Ben' chĥelagüe' ĉhe ĩježe' o chosbague'de' ĩježe', benān' chĥe' ĉhe ĩeĵ ĉhe Diosen' na' chzoe' ĩeyna' ca'ale. Na' nezecho ben' chon ca' bi chzenague' ĉhe ĩeyna'. Na' dan' chon cuine' ca beņe' zaque' cont že' ĉhe beņe' ĩježe' nape' doĭa', chone' ĩeĵ ĉhe Diosen' ca to da' bibi zaca'. ¹² Toz Dios nan' gwĉixĵue' ĩeyna', na' toz ĩe'na' zaque' ĉhoglagüe' ĉhe to toĉho še napĉho doĭa'. Na' toz ĩe' zaque' gone' cont bi šjaya'ac beņe' ĩo yi' gabilen', na' ĩecze zaque' cont yeseĭe' beņe' ĩo yi' gabilen'. Perw chio' bitw zaca'cho ĥacho ĉhe beņe' ĩježcho zjanape' doĭa'.

Bitw ñezecho bin' gac gwxe güižj

¹³ Na' le gwzenag da' nga: Baļle chçhogbia'len šejle to ga šejle gonle negosyw cont gonle gan. Na' chbejle to ža cate' šejle na' chçhogbia'len yega'anle na' tgüiz, ¹⁴ ñeca chacbe'ele bi ñezecho bin' gac çhecho o nac goncho gwxe güižj. Yeļa' mban çhechon' zaca'leben ca to bejw, le bejon' šložže chle'echon na' cheyasen. ¹⁵ Cheyaļa' ñacho: "Še Xancho Diosen' gone' latje bancho, na' goncho to da' goncho." ¹⁶ Perw da' xinjen' choncho še chonxen cuincho chžiacho bia' naquen' goncho sin cbi ñabecho Diosen'. ¹⁷ Na' še ñezecho cheyaļa' goncho da' nac güen na' bi chonchon, napcho doļa' lao Diosen'.

Da' malchgua gac çhe beņe' gwñi'a ca' beņe' bi chosozenag çhe Diosen'

5 Na' ca nac le'e beņe' gwñi'a, le'e bi chzenagle çhe Diosen', le soayaše' na' le cuežyaše', le leca za' saca'zi'le. ² Lao Diosen' dan' de çhele naquen ca to da' ba chbiayi', na' lache' šagüe' çhelen' naquen ca to da' ba chle'e belziļa'. ³ Na' mechw çhelen' dan' nac de oro na' de plata, len Diosen' naquen ca to da' ba chzen xçhe'en. Da'n'an' žin ža žaglaochgualo lo yi' gabilen'. Ba gwche' yichjle tloaze btoble da' sçha'o xmechwlen', la'czļa' ba zoa gon Diosen' da' saca'zi'le. ⁴ Cheyaļa' gonle xbab can' beņle len beņe' güen žin çhele ca', beņe' yaše' ca' besyelap coseš çhelen'. Benlele le-gaque' dan' bitw gwdixjwlene' ca cheyaļa'. Na' dan' bi bnežjwle laxjwgaquen' ca cheyaļa', chlo'en nacle beņe' güen da' xinj. Diosen' chzenague' çhe beņe' güen žin ca' dan' chesyegüine'de', Dios ben' nape la'zelagüe yeļa' guac xen. ⁵ Zoatezle che'ej chagwšagüe'le na' chonditjele dan' de çhele chonle con ca žan çhele, na' bi chacbe'ele ba zoa gon Diosen' da' saca'zi'le. Na' lagüe dan' chonle ca', zaca'leble ca to beyixe' ben' chgüe'ej chguagwšagüe'cho cont ba chaņe'ba' cate' žin ža gotchoba'. ⁶ Na' gan' chi'le chonle yeļa' justisen', ba gwçhoglaolen yesote' beņe' goson da' güen, beņe' bibi gosonde' le'e.

Cuezcho batcan' yid Xancho Jesucriston' da' yoble na' yoļ güižcho Dios

⁷ Ca nac le'e beņe' migw, le gape yeļa' chxenlaže' len dan' chyi chzaca'le, le ba zoa yid Xancho Jesucriston' da' yoble. Beņe' ca' chesaz, chesenite' chesebeze' cosešen', le cosešen' naquen da' zaca'. Na' chesape' yeļa' chxenlaže' chesebeze' chde tiemp yejon', le cate' chbeze yejon', cana'chen' chosyotobe' cosešen'. ⁸ Da'n'an' bite'teze dan' chyi chzaca'le, cheyaļa' gapple yeļa' chxenlaže' na' gonçhaçhlaže'le šejnilaže'le Xancho

Jesucriston', le ba zoa yide' da' yoble. ⁹ Beņe' migw, bitw yosbaga' lježle še bin' chac çhele. Še bin' yosbaga' lježle, ba zoa yid Xancho' da' yoble na' çhoglagüen' çhele napple doļa'. ¹⁰ Le gon xbab çhe da' beņe' ca' goso'e xtiža' Xancho Diosen' cani'. Leca bosochi bososaca' beņe' legaque', perw bia'cze bosoyo bosochije', can' cheyaļa' gonle. ¹¹ Da' li mbalaz beņe' ca' gwnita'teze' gosonçhaçhlaže' gosejnilaže' Diosen' la'czļa' besežaglagüe'. Na' ba benele xtiža' da' Job can' bençhaçhlaže' gwejnilaže' Diosen', la'czļa' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clal can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Beņe' migw, da' naquen da' žialao, gwbat gwzoale no co' da' baļi çhe bite'teze. Bitw ñale yaban' co'on da' baļi choe'le diža' li, ñeca ñale yežlio nga co'on da' baļi choe'le diža' li, ñeca bite'tezechle. Cheyaļa' güe'cho diža' li da' šejle' beņe' cont Diosen' bi çhoglagüen' çhecho saca'zi'cho.

¹³ Note'tezcho cate' chac bi da' chac çhecho, cheyaļa' yoļ güižcho Dios. Na' note'tezcho cate' zoacho mbalaz, cheyaļa' goļcho gonxenchone'. ¹⁴ Note'tezcho cate' chacšenecho, cheyaļa' gaxcho beņe' ca' gwlejcho cont chosogüia cheseņe'e chio' chdop chžagcho chonxenchoncho Jesucriston'. Na' yosotope' yichjcho late' set, na' yosoļ güiže' Dios, yesenabe' yeyaquecho len yeļa' guac çhe Xancho Jesucriston' lagüe' da' chejnilaže'chone'.

¹⁵ Na' chio', cate' choļ güižcho Xancho Diosen', cheyaļa' šejle'cho le chzenagcze' çhecho cont yeyone' ben' chacšenon', na' še ba bene' da' xinj, güezi'xencze Xancho' çhe'. ¹⁶ Da'n'an' cheyaļa' xoadoļa'cho lao beņe' lježcho na' yoļ güižcho Dios tocho yetocho cont ca' yezoacho güen še bin' chac çhecho. Na' še naccho beņe' güen len Diosen', Diosen' chzenagcze' çhecho cate' choļ güižchone' na' chone' da' zan da' güen dan' chñabechone' gone'. ¹⁷ Le gon xbab çhe Elías ben' be' xtiža' Diosen' cani'te. Goque' beñaçh cayanen' nac chio'. Na' cate' boļ güiže' Diosen' do yichj do laže' gwñabe' bi gac yejw, na' Diosen' bzenague' çhe' na' bitw goc yejon' lao šon iz yogašjo. ¹⁸ Na' yetñi'a cate' boļ güiže' Diosen' gwñabde'ne' sele' yejon' da' yoble, nach Diosen' gwselen'. Na' goc coseš çhe beņe' ca' da' yoble.

¹⁹ Beņe' migw, cate' to beņe' lježcho ba gwlejyichje' dan' nac da' li dan' bzejni'i Diosen' chio', cheyaļa' gaclenchone' cont yetinjde' xtole'na'. ²⁰ Chaclaža' ñezele, cate' choncho cont note'teze beņe' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czļa' še naquen da' zan. Da' na'zen' chzoja' ña'a.

1 Pedro

Pedro chzoje' cart nga che beñe' ca' zjanaslas chesejni-laže' Criston'

1 Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca beñe' zito' len yezica'chle beñe' že' yežlio nga. ² Con can' bsi'e xnezen' gwlatte, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuzle binlochgua len xbab chelen'.

Zoacho lez šjayzoacho len Diosen'

³ Cheyaļa' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo beñe' guat ca'. ⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'. ⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biña' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachgualle mbalaz la'czla' chonen byen da' zan da' chyi chzaca'le šlož güeje na'a. ⁷ La'czla' da' te che oron', beñačen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clal ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'añ xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biña' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile beñe' cayanen' chebele. ⁹ Na' da' chejnilaže'le Jesucriston', žin ža šjayzoale len Diosen'.

¹⁰ Da' beñe' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in legaque' yid

Criston' yežlion' na' saca'zi'e na' yeyoža' gwlo'e Diosen' naque' beñe' zaca' juisyw. Da'nan' bososedyañe' na' besyeyiljwyože' non' seļa' Diosen' gaclene' chio' na' batcan' yide'. ¹² Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' beñe' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' beñe' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyaļa' gac lažda'ochon' xilaže' len yogo' da' choncho

¹³ Da'nan' cheyaļa' soale len toze xbab na' gonle con ga zelao saque'le cont gonle can' chazlaže' Diosen'. Cheyaļa' soale yebele gon Diosen' gacchgua mba chele caten' yid Jesucriston' da' yoble. ¹⁴ Na' da' nacle xi'ñ Dios cheyaļa' gwzenagle che', na' bich gwzenagle che da' malen' can' gwna lažda'olen' gonle cana' cate' biña' šejni'ile che Diosen'. ¹⁵ Dios nan' ba gwleje' chio' naccho xi'ñe', na' le' naque' beñe' laždao' xilaže'. Na' con ca' nac le' beñe' laždao' xilaže', lecze can' cheyaļa' gaccho beñe' laždao' xilaže' len yogo' da' choncho. ¹⁶ Le Xtiža' Diosen' nyojen žan: "Cheyaļa' gacle beñe' laždao' xilaže', le neda' Dios naca' beñe' laždao' xilaže'."

¹⁷ Chio' choj güižcho Diosen' che'chone': "Xato' Dios". Na' Diosen' chchoglagüen' che to to chio' beñač še nocho napcho doļa' ca' nac da' choncho, na' toz can' chone' len note'tezcho. Da'nan' cheyaļa' žebcho goncho da' bi chazlaže' Diosen' šlac zoacho yežlio nga.

¹⁸ Nezecho Diosen' ba bebeje' chio' lo da' ca' bosozejni'i da' xozxta'ochcho ca' chio' da' bibi zaca'. Na' nezecho ca' nac no mechw de plata o de oro na' bichle da' ca' chesede chen, bi goc yesyebjen chio' lo da' ca' choncho da' bibi zaca'. ¹⁹ San byažjen gwseļa' Diosen' Criston' blalj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca' to xila' dao' be bibi yižgüe' da', be bibi naqueba'. Ben' nac ca' gosot beñe' Israel gualaž cheton' cont bezi'xen Diosen' xtoļa'gaque'. ²⁰ Za' xe yežlion' Diosen' gwleje' Criston' cont bnežjw cuine' neche xtoļa'chon'. Na' Diosen' gwsele'ne' nga na'a ba zoa te che yežlion' cont chaclene' chio'. ²¹ Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo beñe' guaten' na' blo'e nac Xi'ñe' Criston' beñe' zaca' juisyw. Nachen' zoacho

chejnilaže'cho Diosen' na' zoacho lez gon Diosen' güen len chio'.

²² Na' da' chaclen Spiritw çe Diosen' chio', ba chzenagcho diža' li çe Diosen' na' choncho can' že'. Da'n'an' ba beyac lažda'ochon' xilaže', na' da'n'an' do laže'cho ba chaquecho yezica'chle beņe' chesejnilaže' Jesucriston'. Na' ca'cze cheyaļa' goncho, cheyaļa' gague lježcho do yičj do laže'cho, gague gaquechone' de diža'ze. ²³ Χαχῆα' chio' zoacho yežlio nga zjanaque' beņe' chesat, perw gague neche da' goljcho len le-gague' naccho xi'iq̄ Dios, san naccho xi'iq̄e' da' bocobe' yičjilažda'ochon' cate' gwyejle'cho xtižen'. Na' xtižen' zoan toli tocaņe, gague da' te čhen. ²⁴ Chac can' nyojen, žan:

Yogo' beñač chesede çe' ca chesede çe no yiçe' dao',

na' yogo' da' chebe beñachen' yežlio nga da' chesacde' zaca'chguan, zaca'leben ca yej da' žia yiçe'.

Chesebiž yiçe' ca' na' chesecquad chesebiž yej da' zjažia yiçe'.

²⁵ Perw xtiža' Diosen' zoan toli tocaņe, gague da' te čhen.

Na' xtiže' nan' diža' güen da' ba gwdixjue'eto' len le'e.

2 Da'n'an' cheyaļa' cuejyičjcho yogo' bite'teze da' xinj da' choncho. Bi gonlaže'cho, bi goncho contze yesaque beņe' naccho beņe' güen, bi xi'acho beņe', bi necho diža' mal çe beņe'. ² Na' ca bi' che'eñ dao' žan yesaže'be' xiže'gacbe', can' cheyaļa' selaže'cho yenecho xtiža' Diosen', le naquen da' güenchgua, na' cate' chzenagchon chaclenen chio' cont choncho can' cheyaļa' gon chio' ba de yela' mban çechecho toli tocaņe. ³ Le ba chacbe'echo na'a Xancho Criston' naque' beņe' šagüe'.

Criston' zaca'lebde' ca to yej squin çe ye'o

⁴ Cheyaļa' gwzenagcho çe Xancho Jesucriston' ben' chon chio' yela' mban toli tocaņe. Beņe' zan chesegue'ede' le' la'czļa' Diosen' gwleje'ne' cont chaclene' chio' na' zaca'chgüe' len Diosen'. Da'n'an' Jesucriston' zaca'lebde' ca to yej güen da' gwlej beņe' cont gaquen yej squin ližen', perw beņe' goson žinḡa' bi gosazlažen' na' gosebequen' šļa'ale. ⁵ Na' chio' napcho yela' mban da' chejnilaže'cho Jesucriston'. Da'n'an' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca b̄ox beņe' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. ⁶ Na' Xtiža' Diosen' nyojen, žan:

Sela' to beņe' ciuda Sión na' zaca'lebde' ca to yej da' zaca' da' gwlej beņe' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

⁷ Nach len chio' chejnilaže'chone', Jesucriston' naque' leca beņe' zaca'. San beņe' bi chesejnilaže'ne', nyojczde da' nga čhegaque', žan:

Yej da' bi gosaclaže' beņe' güen yo'o ca' yosočhine',

len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' beņe' na' ca to yej da' chgo'o ni'e na' chjasebiže'.

Nyojen žan chesečhegüe' le bi chosozenague' xtiža' Diosen'; na' Diosen' bžie' bia' yesac čhegaque' ca'.

Chio' chejnilaže'cho Diosen' naccho xi'iq̄e'

⁹ Na' chio', Diosen' ba gwleje' chio' cont chejni-laže'chone'. Na' len Diosen' naccho ca rey na' ca b̄ox. Gwleje' chio' cont naccho nación çe', na' nactecho di-aža' çe', le chaclaže' čhixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen čhen' lo' yičjilažda'ochon' cont soacho goncho da' güen. ¹⁰ Cana' le'e bi gwyejnilaže'le Diosen' na' bi gocle nación çe', perw ḡa'a ba nacle nación çe'. Cana' biḡa' yeyaše'de' le'e, san ḡa'a Diosen' ba beyaše' beži'ilaže'de' le'e.

Cheyaļa' goncho can' chazlaže' Diosen'

¹¹ Chacda' le'e beņe' migw, na' chḡeyoeda' le'e le gon xbab le yežlio nga bi naquen lažle. Da'n'an' bitw gonle bite'teze da' xinj da' žan gonle len cuerp čhelen', le še gonlen, gwžonen soa yičjilažda'olen' binlo len Diosen'.

¹² Le soa le gon da' güen cont beņe' ca' bi chesejnilaže' Diosen' yesele'ede' da' güen da' chonle, na' la'czļa' ḡa'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža čhogbi'en nac gac çe to toe'.

¹³ Da' chejnilaže'le Xancho Criston', le gwzenag çe yogo' beņe' ba bosozoa beñachen' cont yeseñabi'e le'e. Le gwzenag çe rey ben' chnabia' doxen gan' zoachon', ¹⁴ na' lecze le gwzenag çe beņe' gwnabia' ca' chseļa' reyen'. Le nac lo na'gague' yesone' castigw çe beņe' ca' cheson da' xinj na' yesonxene' beņe' cheson can' cheyaļa' yesone'. ¹⁵ Diosen' chaclaže' goncho da' güen cont beņe' ca' bi chesejni'i çe', ben' zjančhoj yičjilažda'ogaque', bi žel diža' da' yeseņe' yosocuiše' chio'.

¹⁶ Cheyaļa' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyaļa' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. ¹⁷ Cheyaļa' gapcho bala'aḡ yogo'lo beņe'. Na' cheyaļa' gague beņe' lježcho beņe' chesonxene' Jesucriston'. Cheyaļa' žebcho goncho da' bi chazlaže' Diosen'. Na' cheyaļa' gapcho beņe' gwnabia' čhechon' bala'aḡ.

Criston' byo bčheje' dan' gwxcaca'zi'ena'

¹⁸ Le'e chonle žin çe beņe', le gwzenag çe xan žin čele da' chaple legaque' bala'aḡ. Gague tloaze gwzenagle çe xan žin čhelen' še zjanaque' beņe' šagüe' beņe' yo'o xbab, san lecze le gwzenag čhe-gaque' še zjanaque' beņe' znia. ¹⁹ Še bibi da' mal nonle na' bia'cze chosoči chososaque' le'e, chebe Diosen' chyo chčheje' len da' chesonde' le'e lagüe nezele cha-

claže' Diosen' goncho ca'. ²⁰ Perw bibi zacan' še ba benje bi da' xinj na' chyo chčejele cate' chesebaže' le'e. San še chosoči chososaque' le'e cate' chonje da' güen na' chyo chčejele len da' chesonde' le'e, nachle chebe Diosen' le'e. ²¹ Le Diosen' gwleje' chio' cont gwyo gwčejecho len bi da' yosoči yososaca' bene' chio', na' Criston' gwxcaca'zi'e neče chio' na' byo bčejele len da' goc che' cont nezecho ca'czen' cheyała' goncho. ²² Bibi da' xinj ben Criston', ne to diža' güenlaže' bi be'e. ²³ Cate' gosezi'diža' bene' le', bi boži'e dižan' nac ca' len legaue'. Na' cate' bosochi bososaque'ne', bi gwne' yebi'e mal len legaue'. Ben cuine' lo na' Diosen', le gwneзде' Diosen' chogbi'en yezezaca'zi' bene' ca' con can' cheyała' gac chegaue'. ²⁴ Criston' bnežw cuine' neče xtoła'chon' cate' gosote'ne' le'e yag cruzen'. Da'nan' cheyała' cuejyichje'cho da' xinjen' choncho na' soacho goncho da' güen. Gwxcaca'zi'e cont bozoe' chio' binlo. ²⁵ Goccho ca xila' be gosaczeje, perw na'a ba naccho ca be yo'o lo na' xamba' cont chyoeba', le Criston' chgüia chne'e chio' na' yo'o lo ne'e lažda'ochon' chcuas chcue'ejen' len da' malen'.

Can' cheyała' yeson bene' zjanšagna'

3 Na' lecze le'e no'ole nšagna'le, to tole cheyała' gwzenagle che bene' chele. Bałe' bina' yosozenague' xtiža' Diosen', na' še gwzenagle chegaue', yesacbe'ede' xtiža' Diosen' naquen da' güen la'czla' bibi ye'ne'. Na' yosozenague' che Diosen' ² cate' yesele'ede' chaple legaue' bala'an' na' chi' yichjele soa cuezle cont lažda'olen' gaquen xilaže' len Diosen'. ³ Na' le'e no'ole, bi nacho naquen da' žialao gon cuinje xdan yopa'a no yichjele, gwguala' yenje no bga', gwguala'le no ret, co'ole no niy de oro, na' chazle lache' šagüe'. ⁴ Dan' nac da' žialao, gac lažda'olen' güen, la'czla' nono chle'e len. Zaca'chguan len Diosen' gaccho bene' nexjwlaže' na' bene' xenlaže', le bi te che yichjlažda'ochon'. ⁵ Gosenita' no'ole cani' no'olen' gosejnilaže' Diosen' na' goson cuine' lo ne'e. Legaue' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. ⁶ Da' Sara, no'ol che da' xozxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonje da' güen na' bi žeble, nach yesena bene' nacle xi'in' da' Saran' lagüe chonje can' benen'.

⁷ Na' le'e bene' byo nšagna'le, lecze cheyała' gacle bene' šagüe' len no'ol chele na' gaplene' bala'an', le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' noče' chio' yela' mban toli tocanje, ca'tezeczen' ba none' len legaue'. Nachen' cheyała' goncho güen len legaue' cont bibi gwžon gwzenag Diosen' checho cate' choł güižchone'.

Can' goncho še yosoči yososaca' bene' chio' la'czla' choncho da' güen

⁸ Yogo'cho cheyała' goncho toze xbab na' cheyała' yeyaše'cho lo' lažda'ochon' še bi da' chac che bene' lježcho. Cheyała' gaque lježcho do laže'cho ca bene'

biše' lježcho, na' cheyała' gaccho bene' šagüe' len bene' lježcho na' bi gon cuincho bene' xen. ⁹ Še bi da' mal cheson bene' len chio', bi nacho lecze da' mal yebi'icho len legaue'. Na' še bene' chesezi'diže' chio', bitw yoži'icho dižan' nac ca' len legaue', san nacho gac da' güen chegaue'. Le Diosen' ba gwleje' chio' cont goncho ca' na' cont gone' latje soacho mbalaz.

¹⁰ Goncho ca' le nyojen, žan:

Bene' chaclaže' soa cueze' mbalaz, cheyała' gwsaque' bich güe'e bite'teze diža' mal, na' gwsaque' bich güe'e bite'teze diža' güenlaže'.

¹¹ Cheyała' cuejyichje' yogo' da' mal na' gone' da' güen.

Cheyała' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to licha,

na' chzenague' chegaue' cate' chosoł güiže'ne'.

San bene' ca' cheson da' xinj, Diosen' ngüie' gone' cont yezezaca'zi'e.

¹³ Na' nono zoa no gone chio' mal še zoatezcho choncho da' güen do yichj do laže'cho. ¹⁴ Na' la'czla' še tgüej cate' yosoči yososaca' bene' chio' lagüe choncho da'

zej to licha, Diosen' gone' soacho mbalaz. Na' bi cheyała' žebcho bene', neca gaczejlaže'cho. ¹⁵ San cheyała' gonxencho Criston' lo' lažda'ochon', le naque' Xancho. Na' bate'teze cheyała' soacho probnidw cont

yoži'icho xtiža' bene' še yesenabde' chio' bixchen' zoacho lez šjayzoacho len Diosen' toli tocanje. Na' cheyała' gapcho legaue' bala'an' na' güe'lenchone' diža' šagüe'.

¹⁶ Tža tža cheyała' goncho cont nezecho lo' yichjlažda'ocho bibi doła' napcho len Diosen'; nachen' cate' yesezi'diže' chio' da' chejnilaže'cho Criston', yesacbe'ede' le choncho güen na' yesacde' zto'.

¹⁷ Yejni'a saca'zi'cho neče choncho da' güen, še can' chaclaže' Diosen' gac checho, clel ca saca'zi'cho neče choncho da' xinj.

¹⁸ Le Criston' lecze gwdi gwxaque'. La'czla' gwyejcz'e to licha len Diosen', bnežw cuine' gote' neče xtoła' benach tni'aze, na' da' bene' ca' zaca'czen' toli tocanje. Gote' cont ba bozoe' chio' binlo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw chen'. ¹⁹ Na' len Spiritw chen' gwyeje' jatixjue'ede' xtiža' Diosen' len bene' ca' ba zjanyeyw gan' yezezaca'zi'e toli tocanje. ²⁰ Legaue' bi bosozenague' che Diosen' ža gwlaste, la'czla' gw dape' yela' chxenlaže' len legaue', gwleze' yosozenague' šlac da' Noén' bene' to barcw xen. Na' to chopga bene' goso'o lo' barcon' na' bi gosebiaye'e lo' nisen', con xono'gue' besyela. ²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocanje. Na' gague gwzoacho nisen' cont beyaccho xilaže' len cuerp chechon', san gwñabecho Diosen' beyone' lažda'ochon' xilaže' cont nezecho bibi doła' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. ²² Na' na'a Jesucriston' ba beyepe' yaban' gan' chnabi'e txen len

Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

Diosen' none' da' gon to tocho cont chaclen lježcho

4 Criston' goque' bene' bela' chen na' gwxaca'zi'e yežlio nga, da'nan' chio' cheyała' gončhač-laže'cho bi gacžejaže'cho cate' saca'zi'cho. Goncho ca', le cate' ba gwzaca'zi'cho chaclenen bich chzenagcho che da' malen'. ² Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' beñač, san soa cuezcho goncho con can' chazlaže' Diosen'. ³ Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' laž-da'olen', gwzožele, benle no žaš len lni chelen' na' güe'ejchguale, na' gwyejnilaže'le l gua'a lsaca' da' ca' gwna Diosen' bi cheyała' šejnilaže'chon. ⁴ Na' bene' ca' ne' cheson ca' chesyebande' bich chonle txen len le-gaque' can' chesaše' chosožiyai' cuingaque', nach chesezi'diže' le'e. ⁵ Perw žin ža cate' Diosen' nabyožde' legaque' che yogo'loj da' ba gosone', Dios ben' chbeze' čhogbi'en nac gac che bene' zjamban len bene' ca' ba gosat. ⁶ Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocanē' can' zoa le', la'czla' nchoglagüen' de yela' got che yogo' beñač yežlio nga.

⁷ Ba zoa te che yežlion'. Da'nan' cheyała' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'. ⁸ Na' da' nac da' žialaoch, cheyała' gague lježcho do yichj do laže'cho, le cate' chaque lježcho chezi'xencho che-gaque' bite'teze da' chesonde' chio'. ⁹ Na' cheyała' gwlebcho bene' lježcho cate' yeside' ližchon' sin cbi bixjwcho. ¹⁰ Con can' ba goclen Diosen' to tocho da' nonē' chio' grasyw che bi da' chac choncho, can' cheyała' gaclen lježcho len dan' choncho. Cheyała' gw-čhincho bite'teze grasyw da' nonē' Diosen' chio' con can' chaclaže' gwčhinchon, le nža' nža'te da' nonē' che to tocho choncho. ¹¹ Še Diosen' ba none' checho čixjue'echo xtižen', le xtiže' na'zen' cheyała' čixjue'echo. Na' še ba none' checho gaclencho bene', cheyała' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocanē' na' zaca'cze' nabi'e toli tocanē'. Can' gacšca.

Guata' da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac chelen' chosoči chososaca'čgua bene' le'e. Bi naquen da' yebanele, san gwlo'en še da' li chejni-laže'le Diosen'. ¹³ Cheyała' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw. ¹⁴ Mbalaz chac

chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoon chaclenen le'e. Bene' ca' chosoči chososaque' le'e cheseñe' mal che Criston', san le'e chonxenlne'.

¹⁵ Na' še saca'zi'le, yejni'a gaquen neče chonle da' güen, gague neče da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'. ¹⁶ Le še saca'zi'le neče chejni-laže'le Criston', bi cheyała' gaquele zto' can' chac chele, san cheyała' gonxenle Diosen' da' ba chejnilaže'lne'.

¹⁷ Ba bžin ža Diosen' ba chone' cont chy chzaca' chio' naccho xi'ñe' neče bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yezezaca'zi' bene' ca' bi chosozenag diža' güen chen'. ¹⁸ Na' ca nac bene' zja'ac to liča, nacchguaze yesyele' bi yezezaca'zi'e toli tocanē, nach bene' bi chesejnilaže' Diosen' na' cheson-teze' da' xinj, gague bi de da' yosla legaque'. ¹⁹ Da'nan' cate' chsi' Diosen' xnezen' chy chzaca'cho, cheyała' soacho gonczcho da' güen na' gon cuincho lo na' Diosen', le len' bene' chio' beñač na' zocze' chaclene' chio'.

Can' cheyała' gon chio' chejnilaže'cho Criston'

5 Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' chole'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca le'e šjay-zoalenlne'. ² Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen. ³ Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesacbe'ede' lecze can' cheyała' yeson legaque'. ⁴ Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyała', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyała' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdiłlene' bene' zjanac ya'laže', san chaclene' bene' chosozexjwlaže' lagüen'.

⁶ Cheyała' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho.

⁷ Na' cheyała' gwcu'a'ňcho yogo'loj da' chi' yichjcho chen lo na' Diosen', le len' chgüia chne'e chio'.

⁸ Cheyała' goncho byen goncho da' nac da' zaca', na' cheyała' gwsaca'cho cont Satanás dan' chnabi'a' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac gonen gwžiyin' chio', ca to bež znia chosya'aba' chdaba' chyiljwba' be gagwba'.

⁹ Cheyała' soačhačcho bi gwzenagcho çe Satanásen' na' soačhačcho šejnilaže'cho Jesucriston', le nezecho beņe' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac çe chio'. ¹⁰ Perw cate' ba gwde da' chy chzaca'cho šlož dao' ņa'a, cuin Diosen' gone' cont gacch yičhjažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac çecho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. ¹¹ Cheyała' soacho gonxenchone' toli tocaņe da' naque' beņe' zaca' juisyw, na' ņabia'che' ca note'tezechle. Can' gonščaczcho.

Pedron' chguape' tiox beņe' ca' yosolab carten'

¹² Beņe' migw çecho Silvano, ben' chacda', zoateze' chone' can' cheyała' gone', na' ba bzoje' xtiža' le'e cart dao' nga. Na' le'e cart nga chņeyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'nan' cheyała' soaczle šejnilaže'Ine'.

¹³ Beņe' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. ¹⁴ Cate' chdop chžagle txen le gwnopa' na' lježle cate' gwguap lježle tiox cont gacbia' chaque lježle.

Na' chņaba' yogo'le chejnilaže'le Criston' soa cuezle binlo len xbab da' yo'o lo' yičhjažda'olen'. Da' na'zen' chnia'.

2 Pedro

Pedron' bzoje' cart nga che bene' chesonxen Jesucriston'

1 Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' noņe' yela' mban checho toli tocaņe le zejce' to licha. Na' da' zaca'chguan chejnilaže'chone'. ² Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'Ine' na' nombia'le Jesús ben' nac Xanchon'.

Can' cheyala' gon chio' chejnilaže'cho Jesucriston'

³ Dan' nap Diosen' yela' guac xennan', ba noņe' chio' yogo' da' chyažjecho cont de yela' mban checho toli tocaņe na' cont goncho can' chazlažen'. Noņe' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'. ⁴ Na' da' naque' bene' zaca' bene' šagüe', da'nana' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nana' yichjlažda'ochon' chesyayaquen güen can' nac yichjlažda'ogüen', na' chac chbejyichjcho da' mal da' chžiayin' bene' bi chesejnilaže' Diosen', lagüe chesone' con ca žan čegaque'. ⁵ Na' da'nana' chio' chejnilaže'cho Jesucriston' cheyala' goncho con ga zelao saque'cho cont gonchcho da' güen, na' cont šejni'ichcho. ⁶ Na' cheyala' goncho con ga zelao saque'cho cont bi nabia' da' malen' chio'. Cheyala' soačhačcho šejnilaže'cho Diosen' caten' chyi chzaca'cho, na' cheyala' soaczcho gonxenchone'. ⁷ Na' cheyala' ži'icho bene' lježcho ben' chesejnilaže' Jesucriston', na' lecze cheyala' gaquecho yogo'ze bene'. ⁸ Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen. ⁹ Na' note'tez bene' bi chon da' ca' ba gwnia' cheyala' goncho, ncho l yichjlažda'ogüe' na' bina' šejni'išagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'. ¹⁰ Da'nana' bene' migw, cheyala' gonchcho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho, ¹¹ na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocaņe, Jesucristw ben' noņe' yela' mban checho toli tocaņe.

¹² Da'nana' ba gwchoglaža' yogo' ni'a güe'lana' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoačhačle chejnilaže'le diža' li che Diosen' dan' nombia'le. ¹³ Nan' chacda' šlac ne' mbana' cheyala' gona' cont šjayze'elen. ¹⁴ Le nezda' yob žin ža gata', con can' ba bzejni'i Xancho Jesucriston' neda'. ¹⁵ Da'nana' gona' con ga zelao saque'da' cont šjayze'ele can' gwnia' che da' quinga cate' ba gata'.

Postlw ca' besele'ede' cate' Diosen' blo'ede' yela' zaca' che Criston'

¹⁶ Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.

¹⁷ Ble'eto'ne' cate' Xacho Diosen' bnežjue'ne' yela' bala'aņ xen na' cate' Dios ben' nac bene' zaca' juisyw bene' cont gwyečhje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'." ¹⁸ Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

¹⁹ Napcho Xtiža' Diosen' dan' bosozoj bene' ca' goso'e xtižen' can' na' nezecho naquen da' li. Na' güen gonle še gwzenagle che dan' bosozojen', le gwseñin' lo' yichjlažda'olen' ca to yi' da' chseñi' ga nac čhol. Bi cheyala' yeche'echo gwzenagcho čhen tža tža šlac žin ža yid Criston' da' yoble na' co'оче' be'ni' čhen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. ²⁰ Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' can', ne tozen bi gac šejni'ichon to gualazcho, ²¹ le ne toz da' ca' bosozoje' bi zan' che xbab čegacze'. San bene' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

Bene' ca' chosozejni'ide' xtiža' Diosen' clele

2 Can' lecze besechoj ba l bene' gualaž četo' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiayin' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocaņe. Perw žin ža yesebiaye'e yalzelaže'.

² Beṇe' zan yosozenague' čhegaque' na' yesone' da' xiṇj dan' nac da' yeḷa' zto' can' yeson ḷegaque'. Na' neče yesone' ca', yesenita' beṇe' yesene' bibi zaca' diža' güen čhe Diosen' da' chlo'en chio' dogualje nez güenna'. ³ Na' beṇe' güenlaže' ca' yesezelaže' yeseque'e xmechwle. Da'nan' yosozejni'ide' le'e diža' da' yesaljaže' cont gwnežjwle ḷegaque' mechw. Perw cani'te Diosen' ba nžie' bia' yesebiaye'e.

⁴ Nezecho Diosen' bi bezi'xene' čhe angl ca' cate' gosone' da' xiṇj, san gwseḷe' ḷegaque' lo yi' gabilen' gan' nac ḷeca čhoḷ, na' zjanite' zjancheje' gden šlac žin ža gone' yesezaca'zi'e toḷi tocaṇe. ⁵ Neca bezi'xen Diosen' čhe beṇe' ca' že' lo yežlion' beṇe' bi bosozenag čhe' caten' gwzoa da' Noé. Gwseḷe' yejw sio' juisyw da' bžiyain' ḷegaque'. Na' Noén' gwzoe' gwdixjue'ede' can' cheyaḷa' yesone' da' zej to ḷicha. Da'nan' Diosen' bosle' le' len yegaže beṇe' lježe'. ⁶ Na' Diosen' ḷecze bečhoglaže' bžiyi'tečze' ciuda Sodoma len ciuda Gomorra cani' yeḷa' güen da' xiṇj čhe beṇe' ca' že'na'. Bz-eye' ciuda ca' na' yešinga de bega'aṇ. Na' bene' ca' cont chosni'sde' beṇe' za' za'ac gwnežjue' castigw čhegaque' še bi yosozenague' čhe'. ⁷ Na' cate' Diosen' bžiyaye'e ciuda ca', bosle' ben' le Lot ben' goc beṇe' güen len le', le Loten' gocchgüede' zi' lo' lažda'ogüe' čhe da' yeḷa' zto' goson beṇe' mal ca' že' ciuda ca'. ⁸ Loten' goque' beṇe' güen na' bžaglagüe' lo' lažda'ogüe' tža tža ble'ede' goson beṇe' ca' da' bi cheyaḷa' yesone' na' bende' diža' čhe da' malen' gosone'. ⁹ Can' naquen, Xancho Diosen' nezde' nac gone' yosle' chio' chejni-laže'chone' lao da' ca' yesonen cuejyichjchone', na' nezde' nac gone' cont beṇe' ca' bi zjanac beṇe' güen len le' yesenite' yesezaca'zi'e na'a na' cate'ch žin ža čhogbi'en yesezaca'zi'e toḷi tocaṇe.

¹⁰ Diosen' gwnežjwchgüe' da' yesezaca'zi' beṇe' ca' chesonteze' da' yeḷa' zto' can' chesezelaže' lažda'ogaquen' yesone' len cuerp čhegaquen'. Beṇe' ca' bi chesape' Xancho Diosen' bala'aṇ cont yosozenague' čhe'. Bitw chesežebe' chesone' con bi žan čhegaque', na' neca chesežebe' chesezi'diže' no angl beṇe' zaca' na' no da' xigüe'. ¹¹ San ca nac angl čhe Diosen', zjanaque' beṇe' gualch ca chio' beṇač na' zjanapche' yeḷa' chnabia' xench ca chio', perw ḷegaque' bi cheseyaxjde' yesezi'diže' no beṇe' zaca' na' no da' xigüe', san cheso'e diža' šagüe' chosocuiše' beṇe' ca' na' len no da' xigüe' lao Xancho Diosen'.

¹² Beṇe' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen beṇačhen' ḷegacba' na' yesote'ba'. Na' ca'cze yesebiayi' beṇe' ca' chosozejni'i diža' güenlažen', ¹³ yesezaca'zi'e da' chosochi chososaque' beṇe' yoble. Chesazlaže' chesaše' chese'ej chesagwxatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwxate' catec chziye' da' malen' ḷegaque'. Da'nan' zjazaca'lebde' ca to da' bzigüe' da' dope to lo lache' šiš o ca to yiž xen da' žia cho'alao beṇe'.

¹⁴ Bate'teze chesele'ede' no'ole, chesezelaže' yesa-ta'lenteze' ḷegaque', na' bi chjasexaque'ede' len da' xiṇjen' chesonen'. Chese'go'oyeḷe' beṇe' biṇa' yesenita'čhače' len Jesucriston' cont yesone' da' xiṇjen' txen len ḷegaque'. Beṇe' ca' chosozejni'i diža' güenlažen' ba zjayolagüe' chesezelaže' bi de čhe beṇe'. Diosen' ḷeca chgue'ede' yogo' da' chesone'. ¹⁵ Le ba gosebejyichje' xnež Diosen' da' zej to ḷicha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'iṇ da' Beor. Balaanna' gwzelaže' yeseyixjue'ne' len mechw cont ṇabe' gac da' mal čhe beṇe' Israel. ¹⁶ Na' Diosen' bene' cont xpurren' be bi chac chneba' gwnečzba' ca to beṇač na' gwdiḷba' le' čhe yeḷa' tont čhen', gožba' le' cueze' bich gone' da' xiṇjen' nac ca'.

¹⁷ Beṇe' ca' chosozejni'ide' diža' güenlažen' zjazaca'lebde' ca bej gan' bibi nis žia na' ca bejw da' nžiga' to be' gual. Ba nchoglaon čhegaque' yesezaca'zi'e gabil toḷi tocaṇe ga nacchua čhoḷ. ¹⁸ Le cheso'e'chgüe' diža' chesonxen cuingaque' na' chese'go'oyeḷe' beṇe' za' besyechoj lo da' xiṇjen' cont da' yoble yesonteze' da' yeḷa' zto' da' chesezelaže' yesone' len cuerp čhegaquen' can' chesoncze beṇe' ca'. ¹⁹ Beṇe' ca' chosozejni'ide' diža' güenlaže' chese'e ḷegaque' guac yesenite' mbalaz yesone' bite'ze žan čhegaque', la'czla' zjanaque' ca to esclavo len da' nac da' yeḷa' zto'. Le note'tezcho naccho ca to esclavo len da' xiṇjen' cate' choncho con can' žan goncho. ²⁰ Na' beṇe' ba zjanombi'e Xancho Jesucriston' ben' noṇe' yeḷa' mban čecho toḷi tocaṇe, ba besyechoje' lo' da' xiṇj ca' dan' nac da' yeḷa' zto' dan' gosone' cate' biṇa' yesombi'ene', na' še soe da' xiṇjen' ḷegaque' na' da' yoble yeso'e latje ṇabian' ḷegaque' cont yesonchen', da' malch gac čhegaque' clal ca caten' biṇa' yesyechoje' lo da' xiṇjen' da' nechua'. ²¹ Yejni'a šaca' bi gosombi'e xnež Diosen' da' zej to ḷicha clal ca gosebejyichje' nez güen da' nžia bia' Diosen' šejlencho. ²² Ba goc čhegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bač bguazjchoba' cheyo'oba' lo gonan' da' yoble."

Yid Jesucriston' da' yoble

3 Beṇe' migw čhia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab čhe diža' güen da' ba nombia'le. ² Le šjayze'e diža' da' bosozoj beṇe' ca' gosac lo na' Diosen' ben' goso'e xtižen' cani'. Na' ḷecze le šjayze'e dan' nžia bia' Xancho Jesucriston' goncho, Jesucristw ben' noṇe' yeḷa' mban čecho toḷi tocaṇe. Lenṇa' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te čhe yežlion', na' yesechoj beṇe' yesonle' čhe xtiža' Diosen' na' yesenite' yesone' con can' ža xbab mal čhegaquen'. ⁴ Na' yesonle' čhe Diosen' yesene': "žBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža ṇa'aža ḷecze can' goc cate' gwnita' da' xozxta'ocho ca', na' ḷecze ca'czen' goc caten' gwxete yežlion'." ⁵ Beṇe' chesena

ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyečj mbi'in doxen, na' bčhine' nisen' cate' benen'.
⁶ Nach bžin ža cate' da' ca' bene' bžiaye'en len yejw sio' juisyw da' goc cate' bexoa nisen' lo yežlion'.⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi' beže' mal ca' toli tocaņe.

⁸ Na' le'e beže' migw čhia', chacda' le'e, na' che'nda' bi ganlaže'le da' nga, len Xancho Diosen' toz ca nac to ža o to mil iz, bi naquen sša len le'.⁹ Bał beže' chesacde' ba chže Xancho Diosen' da' biņa' yid Jesucriston' da' yoble can' gwne' yide'. Perw bi nacho chžede', san da' nape' yeļa' chxenlaže' len chio' beņačh na' chbeze da' bi chaclaže' cuiayi' note'tezcho. Chacclaže' yogo'cho yetinje xtoļa'chon'.

¹⁰ Na' Xancho Jesucriston' yide' da' yoble cate' bi naņe'laže' beže', can' chac cate' cho'o gwban liž beže' šeže'le. Nach gac to sšag xen, na' te čhe yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

¹¹ Na' da' nezecho yesyenit yogo' da' ca' can' ba gwnia', cheyaļa' gon cuincho lo na' Diosen' na' soaczcho gonxenchone' do yičj do laže'cho.¹² Na' cheyaļa' soa cuzcho batcan' žin ža gon Diosen' gac juisyw, na' gon-

cho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten.¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con beže' cheson da' güen da' zej to liča yesenita' cana'.

¹⁴ Da'nana' beže' migw čhia', šlac chbezcho gac da' ca', cheyaļa' goncho con ga zelao saque'cho cont soacho binlo len Diosen' cont bibi doļa' de da' gwchenen yičjlažda'ochon'.¹⁵ Na' cheyaļa' gacbe'echo nape Xancho Diosen' yeļa' chxenlaže' len chio' beņačh cont gwzenagcho čhe' na' gone' yeļa' mban čhecho toli tocaņe. Lecze can' ba bzoj postlw Pablon' čhecho len' chaquecho, cho'e dižan' len yeļa' sina' da' bnežjw Diosen' le'.¹⁶ Na' yogo' cart čhe' ca' chesoen' diža' čhe da' quinga ba bzoja', la'czļa' bzoje' bał da' nac zdebe šejni'icho. Na' beže' biņa' yesejni'i xtiža' Diosen' binlo na' biņa' yesezoačače' yesejnilaže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nana' zjangüe'e nez da' gwžiayin' legaque'.

¹⁷ Chacda' le'e beže' migw čhia', na' ba nezele da' ca' ba bzoja' le'e. Na' le gwsaca' cont bi šejle'le xtiža' beže' bi chosozenag čhe Diosen', beže' cheson da' zej clele, san le soačačh le gwzenag čhe Diosen'.¹⁸ Na' zej gacbe'echle catec chaque Xancho Jesucriston' le'e na' zej gombia'chlne', Jesucristw ben' noņe' yeļa' mban čhecho toli tocaņe. Cheyaļa' soacho gonxenchwne' na'a na' toli tocaņe. Can' gonščaczcho.

1 Juan

Jesucriston' chenežjue' yela' mban toli tocanē che beņe chesejnilaže'ne'

1 Chyixjue'eda' le'e che ben' nzi' Xtiža' Dios, ben' chnežjue' yela' mban toli tocanē che beņe' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'. ² Len' golje' beņaçh na' ble'eto'ne' na' choe'to' diža' ža-to' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' beņaçh. ³ Chyixjue'eto' le'e che bena' ble'eto' na' che bena' bzenagto' xtižen' cont gonle' neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'. ⁴ Chzajt' le'e cart nga cont soale yebechgüele.

Diosen' naque' la'zelagüe beņe' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe beņe' güen beņe' laždao' xilaže'. Bibi da' xinj none'. ⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li. ⁷ Diosen' naque' la'zelagüe beņe' güen beņe' laždao' xilaže'. Na' še chio' zoacho choncho da' güenña' can' zoa Diosen' chone' da' güenña', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lo' xto'la'chon'.

⁸ Še žacho bibi xto'la'cho de, chziye'ze cuinchon' na' bi choe'cho diža' li. ⁹ Perw na' še chxoado'la'cho lao Diosen', chezi'xene' do'la' chechon' na' chñitlagüe' yogo'te da' xinj da' choncho, le chone' con can' že' na' chone' da' zej to li. ¹⁰ Še žacho bibi da' mal na' goncho, choncho Diosen' ca to beņe' güenlaže' na' biña' še-jle'cho diža' li chen'.

Criston' chñabe' gaclen Xacho Diosen' chio'

2 Xi'inda'ogua', chzoja' le' cart nga cont cbi gonle' da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chñabe' yezi'xen Xacho Diosen' checho. ² Jesucriston' blalj xchene' neče xto'la'chon' cont yozoe' chio' binlo len Diosen', na' gague neče xto'la' chio'zen' blalj xchene' san neče xto'la' yogo'lo' beņaçh.

³ Na' še choncho can' ža Diosen' nachen' guac načo ba nombia'chwne'. ⁴ Na' še žacho ba nombia'chwne' na' bi choncho can' že'na', naccho beņe' güenlaže' na'

diža' li che Diosen' biña' šon' yichjlažda'ochon'. ⁵ Ba chaquecho Diosen' ca cheya'la' gaquechone' še choncho con can' že'na', na' še ba choncho ca', nezecho ba nacchone' txen. ⁶ Na' note'tezcho še žacho naccho Diosen' txen, cheya'la' soacho goncho da' güen can' ben Jesucriston'.

Dan' ža Diosen' cheya'la' goncho

⁷ Le'e beņe' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejni-laže'le Jesucriston', le naquen diža' da' ba benele. ⁸ Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len beņaçhen' na' ba chzolao chde che yogo' da' ca' da' chgue'e Diosen'. Na' dan' chona' mandadw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

⁹ Note'tezcho la'czla' žacho ba noncho Diosen' txen, bi naquen ca' še chgue'e lježcho; nac cho'lo' lažda'ochon'. ¹⁰ Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'. ¹¹ Na' note'tezcho še chgue'e lježcho nac cho'lo' lažda'ochon' na' zejcho ca to beņe' lcho' beņe' bi chacbe'e galen' yeque'e, le bi chacbe'echo can' cheya'la' goncho.

¹² Ba bzoja' da' quinga par le'e xi'inda'ogua', le Diosen' ba bezi'xene' chele dan' chejni-laže'le Jesucriston' do yichj do laže'le. ¹³ Ba bzoja' da' quinga par le'e beņe' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e beņe' güego' chaban, le bač gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. ¹⁴ Ba bzoja' da' quinga par le'e beņe' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e beņe' güego' chaban da' ngo'o yichjle xtiža' Diosen' na' da'nana' ba gwzoele bi chzenagle che Satanásen'.

¹⁵ Bi selaže'le gacle toze len beņe' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. ¹⁶ Beņe' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi

naquen che Xacho Diosen', naquen che da' mal dan' de yežlio nga. ¹⁷ Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocaņe.

Nezecho bin' nac da' li

¹⁸ Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'n'an' nezecho ba zoa žin ža te che yežlion'. ¹⁹ Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejni-laže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacbia' bi zjanaque' chio' txen.

²⁰ Criston' ba bene' chio' Spiritw che Diosen' na' da'n'an' yogo'cho nezecho can' ža diža' li che Diosen'.

²¹ Chzoja' le'e da' nga le bač nombia'le diža' li che Diosen', gague nacho bi nombia'lennā', na' lecz ca' nezele ne toz diža' güenlaže' ca nchiže diža' li che'na'.

²² Bene' güenlaže' ben' ža Diosen' bi gwsele' Jesucriston' golje' beņač. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'.

²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejni-laže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. ²⁵ Na' da' gwna Jesucriston' gone' checho, gone' yeļa' mban toli tocaņe.

²⁶ Ba bzoja' le'e da' nga bia' diža' che bene' ca' chesacilaže' yesonlede' le'e. ²⁷ Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lo' dan' cheyaļa' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'n'an' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyaļa' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuša'chone' cate' le'echo ba ble'e. ²⁹ Na' nezecho Criston' zeje' chone' con can' cheyaļa' gone', lecze ca' nezecho yogo'czecho še zejcho choncho can' cheyaļa' goncho naccho xi'in Dios.

Naquen' goncho še naccho xi'in Dios

3 Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Bene' bi chesejni-laže' Diosen' bi chesejni'ide' naccho xi'in Dios, le bi chesacbe'ede' non' nac Diosen'. ² Xi'inda'ogua', chio' chejni-laže'cho Jesucriston' bač naccho xi'in Dios. Na' biņa' gata'bia' nac gaccho. Con

nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. ³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho. ⁵ Nezczecho Jesucriston' bide' yežlio nga cont beque'e xtoļa' chio' beņač, na' ca' nac Jesucriston', le bibi da' xinj none'.

⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biņa' šejni'icho che' na' biņa' gombia'chone'. ⁷ Xi'inda'ogua', bi güe'le latje no siye' le'e, še choncho da' güen can' cheyaļa' goncho, zejcho to liča can' zej Jesucriston'.

⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwzete yežlion'. Na' bid Xi'in Diosen' yežlio nga par gwczue' dan' chon Satanásen'.

⁹ Note'tezcho še Diosen' ba gwque'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. ¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

Cheyaļa' gaque lježcho

¹¹ Na' da' nga ba beneczecho cate' gwzolaaocho chejni-laže'cho Jesucriston': cheyaļa' gaque lježcho tocho yetocho. ¹² Bi gaccho ca goc da' Caín, goque' xi'in Satanásen' na' beyote' bene' biše'. ¿Nezele bičen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

¹³ Da'n'an' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e. ¹⁴ Nezecho bich mbiayi' yichjlažda'ochon', san ba de yeļa' mban checho toli tocaņe le ba chaque lježcho. Na' še bi chaque lježcho, ne' mbiayi' yichjlažda'ochon'.

¹⁵ Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yeļa' mban che' toli tocaņe. ¹⁶ Bzane cuin Jesucriston' neče chio' gosote'ne' dan' leca chacde' chio', da'n'an' nezecho can' cheyaļa' gaque lježcho. Na' ca'cze chio' cheyaļa' zane cuincho gatcho cont gaclen lježcho še chonen byen. ¹⁷ Na' cate' de da' de checho na' nezecho bene' lježcho chyažjden', še bi chyaše'chone' bi gac nacho chaquecho Diosen'. ¹⁸ Xi'inda'ogua', bi cheyaļa' gaque lježcho de diža'ze. Cheyaļa' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. ²⁰ Na' še zoa cate'

choncho xbab bi zaca'cho par na Diosen' xi'ine' chio', Diosen' zaca'che' ca xbab chechon' na' nezde' yogo' lo. Da'nan' cheya'la' gwzenagcho can' žen', gague con can' ža xbab chechon'. ²¹ Le'e be'ne' chacda', še lo' yichjlaž-da'ochon' chacbe'echo bitw napcho do'la', nachen' bich chžebcho Diosen'. ²² Na' bite'tez dan' chnabechone' chončen', le choncho da' nžie' bia' goncho na' can' chaclažen'. ²³ Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gague lježcho tocho yetocho, con can' nžie' bia'. ²⁴ Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba be'ne' chio' Spiritw chen' zoan lo' laž-da'ochon.

Spiritw che Diosen' na' dan' chon contr Criston'

4 Le'e be'ne' chacda', bi šejle'le che yogo' be'ne' chesene' cheso'e diža' dan' gož Spiritw che Diosen' legaue', san le gone' prueba še xtiža'gaquen' naquen da' bzejni'i Dios o še cbi naquen. Le gone' prueba, le ba chaš be'ne' zan be'ne' chesonlaže' chesene' cheseyixjue'ede' dan' gož Diosen' legaue'. ² Na' quinga guac nezecho še Spiritw che Diosen' bzejni'in legaue' dižan' cheso'e: yogo' be'ne' cheso'e diža' chesene' Jesucriston' naque' Dios golje' be'nač, nezecho yo'o Spiritw che Diosen' lo' yichjlažda'ogüe'. ³ Na' be'ne' cheso'e diža' chesene' Jesucriston' bi naque' Dios golje' be'nač, nezecho Spiritw che Diosen' bi yo'on lo' yichjlažda'ogüe'. Be'ne' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

⁴ Xi'inda'ogua', ba nacle Diosen' t xen na' da'nan' bi chejle'le che be'ne' güenlaže' ca'. Chzoele cbi chejle'le chegaue' neche da' yo'o Spiritw che Diosen' lo' laž-da'olen' chzejni'in le'e, na' Spiriton' chnabia'chen ca Satanásen' dan' zoa len be'ne' ca' bi chosozenag che Diosen' yežlio nga. ⁵ Be'ne' ca' bi chosozenague' che Diosen' cheso'e diža' che dan' chac yežlio nga, na' da'nan' be'ne' lježe' ca' chosozenague' chegaue'. ⁶ Ca nac chio', ba naccho Diosen' t xen. Da'nan' yezica'chle be'ne' chosozenague' che Diosen' lecz chosozenague' xtiža'chon'. Na' be'ne' ca' cbi zjanaue' Diosen' t xen bi chosozenague' diža' chechon'. Can' chac nezecho no be'ne' yo'o Spiritw che Diosen' lo' lažda'ogüe' chzejni'in le' diža' li na' no be'ne' chzenague' diža' güenlaže' dan' chzejni'i Satanásen' le'.

Diosen' chacde' be'nač

⁷ Le'e be'ne' chacda', cheya'la' soacho gague lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacbia' naccho xi'in Dios na' nombia'chone'. ⁸ Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' be'načen', le con can' nac yichjlažda'ogüe'. ⁹ Dan' ben Diosen' bzejni'ide' chio' can' chacde' chio', gwsele' laje'e Xi'ine' yežlio nga cont note'tezcho ban-

cho to'li toca'ne še chejnilaže'chone' do yichj do laže'cho. ¹⁰ Bi goquecho Diosen'; lelen' gocde' chio' na' gwsele' Xi'ine' Jesucriston' cont bnitlagüe' xto'la'chon'.

¹¹ Le'e be'ne' chacda', dan' chaque Diosen' chio' lecz ca' cheya'la' gague lježcho tocho yetocho. ¹² Nono zoa be'ne' ba ble'ede' Diosen'. Perw na' še zoacho chaque lježcho tocho yetocho, nacbia' Diosen' zoacze' len chio' na' ba chaquechone' can' cheya'la' gaguechone'. ¹³ Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'. ¹⁴ Na' neto' postlw ba ble'eto' na' choe'to' diža' nezetot' gwsele' Xacho Diosen' Xi'inen' cont gwnitlagüe' xto'la' note'tez be'ne' šejnilaže' le'. ¹⁵ Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho t xen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' be'načen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. ¹⁷ Diosen' zoacze' chaclene' chio' cont chaquechone' can' cheya'la' gaguechone' na' chaque lježcho can' cheya'la' gague lježcho, na' Diosen' chone' ca' cont bi žebcho cate' žin ža gone' yela' justis che yogo' be'nač. Na' bi žebcho še zoacho chaque lježcho yežlio nga can' chon Jesucriston'. ¹⁸ Še chaquecho Diosen' ca cheya'la', bibi de da' žebcho. Caten' chžebchon' naquen ca to castigw len chio', na' še ne' chžebcho bi'na' gaguecho Diosen' can' cheya'la' gaguechone'.

¹⁹ Chio' chaquecho Diosen' le len' gocde' chio' da' nechw. ²⁰ Note'tezcho še chgue'e lježcho, la'czla' žacho chaquecho Diosen', con chonlaže'chon'. ¿Naxe goncho gaguecho Diosen' ben' bi chle'echo še bi chaque lježcho be'ne' chle'etecho? ²¹ Na' ba bene' mandadw can' cheya'la' gon chio' chaquechone', že lecz cheya'la' gague lježcho.

Gwcuascho da' malen'

5 Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gague lježcho, le lecz xi'in Dios be'ne' lježchon'. ² Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. ³ Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. ⁴ Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon. ⁵ Na' noch no chzoede' chcuase' da' xinj dan' de yežlio nga san be'ne' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

Diosen' cho'e diža' že' Jesucriston' naque' dogualje
Xi'ine'

⁶ Quinga ben Jesucriston' šlac bide' yežlio nga, bnežjw cuine' gwzoe' nis na' blalj xčhene'. Bi nacho con gwzoaze' nis, san lecz blalj xčhene'. Na' Spiritw čhe Diosen' choen' diža' bene' ca', na' Spiriton' choen' pur diža' li. ⁷ Na' nita' šone beņe' chesegü'e da' balj yaban' cheso'e diža' čhe Jesucriston': Xacho Diosen', len Jesucriston' ben' nzi' Xtiža' Dios na' len Spiritw čhe Diosen'. Na' toz can' cheso'e diža' čhe Jesucriston'. ⁸ Lecz de šone da' chesego'on da' balj chesoen' diža' čhe Jesucriston' yežlio nga: Spiritw čhe Diosen', na' dan' gwzoe' nis na' dan' blalj xčhene'. Na' toz ca chesoen' xtižen'. ⁹ Chejle'cho xtiža' beņachen', na' nacch xtiža' Diosen' da' zaca'ch, na' Diosen' ba bi'e diža' čhe Xi'ine' Jesucriston'. ¹⁰ Na' še chejle'cho Jesucriston' naque' dogualje Xi'in' Dios, nezecho lo' lažda'ochon' xtiža' Xacho Diosen' dan' bi'e čhe' naquen da' li. Na' še bi chejle'cho čhe Diosen', chonchone' ca to beņe' güenlaže' da' bi chzenagcho diža' dan' cho'e čhe Xi'ine'na'. ¹¹ Na' xtiža' Diosen' chzejni'in chio' guata' yeļa' mban čhe beņachen' toli tocaņe še yesejnilaže' Xi'ine' Jesucriston'. ¹² Quinga naquen, de yeļa' mban čhecho toli tocaņe še chejnilaže'cho Jesucriston', na' bi de yeļa' mban čhecho toli tocaņe še bi chejnilaže'chone'.

Can' beyož cart nga da' bzoj Postlw San Juan

¹³ Ba bzoja' le'e cart nga, le'e chejnilaže'le Xi'in' Diosen', cont nezele de yeļa' mban čhele toli tocaņe.

¹⁴ Na' bitw chžebcho choj güižcho Diosen', le nezecho chzenague' čhecho cate' chņabcho lagüen' da' chazlaže'. ¹⁵ Na' cate' nezecho chzenague' čhecho bite'tez dan' chņabechone', lecz nezecho goņe' da' ca' ba gwņabechone'.

¹⁶ Na' še chacbe'echo beņe' lježcho chone' bi da' xinj da' bi zaca' seļa' Diosen' le' lo yi' gabil, cheyaļa' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bal beņe' zacan' seļa' Diosen' legaque' lo yi' gabil. Bi žia' nable gaclen Diosen' beņe' ca'. ¹⁷ Napcho doļa' še choncho bite'tez da' xinj, perw gague yogo' da' xinj dan' chonchon' seļa' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlaž-da'ochon' bi zoacho choncho da' xinjen' le zoa Jesucriston' ben' nac Xi'in' Diosen' chcuase' chio' len dan' chon Satanásen', na' da'nan' bi soen gwžiayin' chio'.

¹⁹ Lecz nezecho Diosen' zoe' len chio', perw beņe' ca' bi chosozenague' čhe', Satanásen' chnabian' yichjlaž-da'ogaquen'.

²⁰ Na' nezecho ba bid Xi'in' Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yeļa' mban toli tocaņe čhe beņe' chejnilaže' le'. ²¹ Xi'in'da'ogua', gague nochle šejnilaže'le san ben' nac dogualje Dios. Da' na'zen' chzoja'.

2 Juan

Chio' nombia'cho diža' li ĉhe Diosen' cheyaļa' gaque lježcho

1 Neda' naca' beņe' gole blao, na' chzoja' le' no'ole, len' ba gwlej Diosen' chzenago' xtižen', na' len xi'iqno' ca'. Da' li ĉhadā' le'e, na' gague nedaze' san lencze' yogo' beņe' yezica'chle beņe' zjanombia' diža' li ĉhe Diosen' chesacde' le'e. ² Chaqueto' le'e da' yo'o diža' li ĉhe Diosen' lo' lažda'ochon' na' soan lo' lažda'ochon' gaclenen chio' toli tocaņe. ³ Xacho Diosen' na' len Xi'iqne' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li ĉhe Diosen' na' ba chaque lježle tole yetole.

⁴ Leca gwbeda' cate' gwņezda' baļ bi' ĉchio' ca' ba nita'be' chesombe' can' ža diža' li ĉhe Xacho Diosen' can' bžie' bia' goncho. ⁵ Dan' cheyaļa' goncho, no'ole, cheyaļa' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. ⁶ Še chaquecho Diosen' goncho da' nžie' bia'. Na' ņezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyaļa' gaque lježcho.

Chaš beņe' chesonlede'

⁷ Beņe' zan chesaše' lo yežlion' chosozejni'ide' clele, le cheso'e diža' ĉhe Jesucriston' chesene' bi naque' Dios ben' bide' golje' beņaçh. Note'tez beņe' chon ca' naque' beņe' gwxiye' na' chone' contr Criston'. ⁸ Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹ Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni'i beņe' chio', bi zoa Diosen' len chio' še ca'. Na' note'tezcho še zoacho chzenagcho ĉhe dan' bsed blo'e Criston', Xacho Diosen' len Xi'iqne' Criston' nite' len chio'. ¹⁰ Na' še no beņe' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. ¹¹ Cheyaļa' gonelene' ca', le še gwlebelene' zejen txen chonlenne' da' xiņjen'.

Goclaže' šjane'e legaque'

¹² De da' zan da' ņia' le'e perw bich chaclaža' gwzozan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

¹³ Xi'iqn' no'ole bilon', no'ole ben' lecze gwlej Diosen' cont chzenague' ĉhe', chosoguape' le'e tiox. Da' na'zen' chzoja' ņa'a.

3 Juan

Postlw San Juanna' cho'e diža' güen çe ben' le Gayo

1 Neda' naca' beṇe' gole blao, na' chzoja' cart nga par le', xmigua' Gayo. Da' li chacda' le'.

² Beṇe' migw, chṇaba' lao Diosen' gac güen ḥio' na' so' güen ca güenna' ba zoa lo' yiḥjlažda'oguo'. ³ Leca bebeda' cate' besela'ac to ḥhope beṇe' lježcho gosoe diža' can' zoaczo' chono' güen da' chzenago' diža' li çe Diosen' do yiḥj do lažo'. ⁴ Len neda' le'e nacle ca xi'ina', na' bich bi de da' chbechda' ca chbeda' chṇezda' chzenagle diža' li çe Diosen' do yiḥj do laže'le.

⁵ Beṇe' migw, chono' güen dan' chacleno' beṇe' lježcho ca' beṇe' zjanac beṇe' zito'. ⁶ Legaque' ba gosoe diža' len neto' chdop chžagto' nga chonxento' Jesu-criston' can' bži'ido' legaque'. Na' cate' yesele'e da' yoble güešco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'. ⁷ Ba gosa'ac laže' cont cheso'e xtiža' Criston' na' bibi goclen chesezi'e çe beṇe' ca' bi chesejle'e çe Criston'.

⁸ Da'nana' cheyała' gwlebcho beṇe' ca', gaclenchwne' na' gonchone' txen cont yesombia' beṇe' diža' li çe Diosen'.

Diótrfes chone' da' mal

⁹ Baḥ bzoja' le'e chdop chžagle chonxenle Jesu-criston', perw na' Diótrfes chaclaže' gaque' la'zelaoze beṇe' blao len le'e na' bi chzenague' ḥeto'. ¹⁰ Da'nana'

caten' yida' dezṇa'a le'e na' yapa'ne' çe yogo' dan' chone' contr neto' na' diža' güenlaže' dan' chṇe' ḥeto'. Na' gague da' na'zen' chone', lec bi chlebe' beṇe' lježchon' liže' beṇe' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesu-criston' cate' chleble legaque'.

¹¹ Beṇe' migw, bi gono' txen len beṇe' ca' cheson da' xinjen', san ben txen len beṇe' ca' cheson da' güen. Note'tez beṇe' zoateze' chone' da' güen, nacbia' nom-bi'e Diosen', na' note'tez beṇe' zoateze' chone' da' xinjen', nacbia' biṇa' gombi'e Diosen'.

Demetrimon' chone' da' güen

¹² Yogo'ze beṇe' cheso'e diža' güen çe Demetrio na' nacbia' zejlene' diža' li çe Diosen'. Lencze neto' choe'to' diža' žato' chone' da' güen, na' ṇezele choe'to' diža' li.

Can' beyož carten'

¹³ Dech da' zan da' godca' ṇia' le'e, perw bich chaclaža' gwzojan' le'e yiš. ¹⁴ Zoa' lez yob yežagcho cont güe'cho diža' cho'a cate' soacho txen.

¹⁵ Soago' binjo len xbab dan' yo'o lo' yiḥjlažda'oguo'. Beṇe' migw ḥion' nita' nga chosoguape' le' tiox. Na' chṇaba' gwguapšco' tiox to to beṇe' migw ḥeto' ca' nita' gan' zoalen'. Da' na'zen' chzoja' ṇa'a.

Judas

San Judas chzoje' beṇe' ca' zjanaque' lo na' Diosen'

1 Neda' Judas naca' beṇe' güen žin che Jesucriston', na' naca' beṇe' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. ² Chṇaba' gon Xacho Diosen' cont gacbe'echle cheyaše' cheži'ilaže'chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gacbe'echle chacchgüede' le'e.

Beṇe' ca' chososed chosolo'ede' diža' güenlaže'

(2 Pedro 2:1-17)

³ Beṇe' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocaṇe. Perw ṇa'a ba chonen byen chzoja' chṇeyoeda' le'e soačhačhle šejle'le diža' li che Diosen' da' bzejni'ide' chio' to ši'ize, chio' naccho lo ne'en. ⁴ Nita' baḷ beṇe' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyaḷa' yosozenag yogo' beṇačhen' che', na' len Xancho Jesucriston'. Cana'te byoj Xtiža' Diosen' žan beṇe' cheson ca' yesežaglaochgüe' neče xtoḷa'gaquen'.

⁵ Na' la'czla' ba gwṇezele yogo' can' goquen', chaclaža' gona' cont šjayza'laže'le Xancho Diosen' bosle' da' xozxta'o neto' beṇe' Israel lo na' beṇe' Egipto ca', perw gwdechle bžiaye'e baḷteze' bi gosejle'e che'. ⁶ Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' beṇe' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua čhoḷ, na' zjancheje' gden toli tocaṇe cont yesezaca'zi'e cate' žin ža gac juisyw. ⁷ Na' lecze ca' beṇe' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež beṇe' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiayi'tecczen'. Na' da' bene' ca', chosṇisde' chio' beṇačh gata' castigw lo yi' gabil toli tocaṇe che beṇe' bi yosozenag che'.

⁸ Na' bia'cze beṇe' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da'

yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' beṇe' zjazaca'chgua. ⁹ Perw nža'le cheson angl che Diosen', le cani' gwzoa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tiḷe' le'." ¹⁰ Perw beṇe' quinga chesezi'diže' bite'teze da' bi chesejni'ide'. Na' cheson-teze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosoži-ayin' legaque'.

¹¹ Nyaše'chgua gac chegaque'. Zjanite' chesegue'e lježgaque' can' ben da' Caín, na' lecze chesoe'laže' chesone' da' mal cont yesone' gan mechw can' ben da' Balaam. Chesone' güedenag len beṇe' ca' gwlej Diosen' cont chesenabi'e legaque' cacze güedenag ben da' ben' gože' Coré cani', na' can' gwžiayi' da' Corén' neče yela' güedenag čhen', lecz ca' yesebi-aye'e. ¹² Na' cate' le'e che'ej chagwle txen cont chlo'ele chaque lježle, legaque' chesagwxatteze' con nacteze žan chegaque' na' chese'ejchgüe' gualaz da' yesone' güen len beṇe' lježe'. Na' da' bibi zaca' can' chesone', da'nan' zjazaca'lebde' ca bzigüe' da' dope to le'e lache' šiš, na' lecze zjazaca'lebde' ca beṇe' güeye' xila' beṇe' chṇa' cuine' na' bi chṇe'e xila' ca'. Lecze zjazaca'lebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbižen lo yo. ¹³ Na' neče yela' zton' cheson beṇe' ca', zjazaca'lebde' ca nisdao' da' chas chata' na' checho'onen bžina' ga nac lo yo cho'a nisdao'. Na' zjazaca'lebde' ca beljw da' bich zjažian xišne'en gan' cheyaḷa' yesebian, le Diosen' bžie' bia' yesezaca'zi'e toli tocaṇe gan' nac leca čhoḷ.

¹⁴ Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che beṇe' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca' ¹⁵ cont čhogbi'en yesezaca'zi' yogo' beṇe' zjanape' doḷa'. Yogo' beṇe' ca' bi bosozenag che' yesezaca'zi'e toli tocaṇe neče da' gosone' da' mal juisyw yela' güedenag chegaquen' na' neče da' gosone' diža' ya' che'." ¹⁶ Na' ca nac beṇe' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na'

chosopede' beṇe' yoble cont yesone' gan mechw o
cont yesaclen beṇe' legaque'.

**San Judas che'e beṇe' chesonxen Jesucriston' can'
cheyała' yesone'**

¹⁷ San le'e beṇe' migw, beṇe' chacda', cheyała'
šjayze'ele diža' nga gosena postlw ca' beṇe' ca' gwlej
Xancho Jesucriston'. ¹⁸ Gosene': "Tiempen' cate' ba zoa
yid Xancho Jesucriston', ṇita' beṇe' bi yesejle' che
Diosen' na' yesonle' che' na' yesonteze' con da' žan
čhegaque' da' nac yela' zto'." ¹⁹ Na' ṇa'a beṇe' ca'
chesone' cont le'e chejnilaže'le Criston' bi chonle toze
xbab, san nža' nža'te ca žale. Chesone' xbab che da'
chnalaže' cuerp čhegaque', le bi yo'o Spiritw che
Diosen' lo' yichjlažda'ogaquen'.

²⁰ Perw le'e beṇe' migw, chacda' le'e, na' chṇeyoeda'
le gončaḥč laže'le cont sočaḥčle šejle'le diža' li che
Diosen' da' zaca'chgua. Na' le yol güiž Diosen' ye'line'
da' chzejni'i Spiritw čhen' le'e. ²¹ Na' le soa le gon cont
gacbe'ele chaque Diosen' le'e. Na' da' cheyaše'
cheži'ilaže' Xancho Jesucriston' chio', gone' cont šjay-
zoalenchone' toli tocaṇe. Da'nan' le soa le cueze bat-
can' gone' ca'.

²² Bał beṇe' chesacžejaže' še cheyała' yesone' can' ža
Diosen'. Le gwzejni'i legaque'. ²³ Na' beṇe' ca' ba
chesezolagüe' chosozenague' che diža' güenlažen', le
gon con ga zelao saca'le cont yesyechoje' lo nez
malen' na' le co'o legaque' nez güenṇa'. Na' yebał
beṇe' chesonchgüe' da' xinj, na' lecze cheyała'
yeyaše'cho legaque', perw do chaž chžebcho, do
chgue'echo dan' chesonen' na' cheyała' gwsaca'cho
cont bi goncho txen len da' xinjen' chesonen'.

Judasen' chonxene' Diosen'

²⁴ Cheyała' gonxenko toz Dios ben' zaca' gonxen-
cho, ben' nonē' yela' mban čhecho toli tocaṇe. Dios
nan' naque' beṇe' sina' juisyw. Chac chone' cont bi
lažo'cho goncho da' xinj, na' chac chone' cont bibi
xtoła'cho gata' cate' yežincho lagüen' gan' yo'ochgua
be'ni'. Leca yebecho cana'. Diosen' naque' la'zelagüe
beṇe' zaca' beṇe' blao, na' zaque' chnabi'e doxen.
Naque' Xan yogo' beṇač na' yogo' bica'chle da' de.
Len' gocxene' cate' biṇa' xe yežlion' na' cheyała' gonx-
enchone' toli tocaṇe dan' gwsele' Xancho Jesucriston'
chaclene' chio'. Ca'sca gac. Da' na'zen' chzoja'.

Apocalipsis

Diosen' bzejni'ide' Jesucriston' diža' quinga

1 Diosen' bzejni'ide' Jesucriston' diža' quinga cont le' gwlo'ede' beṇe' ca' chesejnilaže'ne' can' ba zoa gac. Nach ba gwsele' to beṇe' nac angl che' cont bzejni'iden' neda' Juan, neda' naca' ben' chon xšine'. ² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz beṇe' ca' yosolab da' nga chzoja' da' bzene Diosen' neda' na' beṇe' ca' yesende' yosolab beṇe' yoble len, še da' li yosozenague' čhen, le ba zoa gac can' žanna'.

Juanna' chzoje' beṇe' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw čhen' yesenitašque' yesaclene' le'e na' yesone' soa cuesle binjo len xbab čhelen', Dios ben' ba zoacze' cate' biṇa' xe yežlion', na' soacze' toli tocaṇe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. ⁵ Na' Jesucriston' lecze soašque' gaclene' le'e na' gone' soa cuesle binjo. Jesucriston' naque' ben' cho'e diža' li che Diosen'. Naque' beṇe' nechw bebane' ladjo beṇe' guaten' ben' bich ṇabia' yeļa' goten' le'. Na' le' chnabi'e yogo' nochle beṇe' gwnabia' že' yežlio nga. Dan' chacde' chio' bnežjw cuine' gosote'ne' na' blalj xčhene' cont bnitlagüe' xtoļa'chon'. ⁶ Nach ba gwleje' chio' cont ṇabia'cho txen len le' ca no rey na' cont soacho gonxenchon' Diosen' ca no bxož, Dios ben' nac Xe' na' lecze naque' ben' chonxene'. Cheyaļa' gonxenchone' toli tocaṇe, le zoacze' chnabi'e toli tocaṇe. Can' gonščaczcho.

⁷ Jesucriston' yide' da' yoble to lo' bejw, na' yogo'lo' beṇe' yesele'ede' le', lente beṇe' ca' gosot le'. Na' beṇe' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

⁸ "Neda' naca' Dios ben' ben yežlion' len yogo' bichle da' de, na' naca' ben' gon cont te čhen. Da'nana' zaca'lebda' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yeļa' guac xen juisyw, ben' ba zoacze' cate' biṇa' xe yežlion' na' soacze' toli tocaṇe.

Juan ble'edaogüede' leca beṇe' zaca' juisyw nac Criston'

⁹ Neda' Juan naca' beṇe' lježle dan' naccho txen chzenagcho che Jesúsen' cont Diosen' chnabi'e yičjlažda'ocho, na' toz can' chosoči chososaca' beṇe' chio' neče xtižen', na' txen chaclen Jesucriston' chio' cont chyo chčejcho len yogo' da' chac čhecho. Da' ba gwduxjue'eda' xtiža' Diosen' na' ba bia' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisdaon'. ¹⁰ Na' to ža dmigw Spiritw che Diosen' benen cont ble'edaogüeda', na' benda' Jesucriston' chṇe' cožan' zižjehgua ca ga chbež trompeta. ¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te čhen. Da'nana' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' seļon' lao beṇe' ca' nita' gaž yež che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwyečhja' gwṇa'a non' chṇe na' ble'eda' gaže candeler de oro. ¹³ Na' gacho' candeler ca' gaže, ble'eda' to beṇe' nac ca to beṇač perw gočbe'eda' bi naque' beṇačze. Nyaze' to lache' toṇ da' bžinte lo ṇi'e na' nchej cho'alčo'en ca to bant de oro. ¹⁴ Na' yiša' yičjjen' naquen da' šiš ca xa xila' o ca no beye'. Na' yejlagüen' gosactiten ca to yi' da' čaļa'ṇin. ¹⁵ ṇi'e ca' ble'edan' ca to de bronze da' nlačhgua cate' naquen ya'alj xoan lo yi'. Na' ši'en nenen zižjehgua ca chziž yegw cate' dechgua nis. ¹⁶ Na' noxe' gaže beljw len ne'e ličan' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' chṇa'chguan.

¹⁷ Na' cate' ble'eda'ne' gwbiža' xṇi'en gottia' šlat. Nach bli ne'e ličan' gwxoen' yičjja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čhen. ¹⁸ Naca' ben' nsa' yeļa' mban. Cana' gota' perw bebana' ladjo beṇe' guat na' zoacza' toli tocaṇe. Na' naquen lo na' ṇia' bat yesat to to beṇe' na' nac gac čhegaque' cate' bač gosate'. ¹⁹ Na' ṇa'a bzoj diža' che da' ca' ba ble'edo' na' diža' che da' ca' chac ṇa'a na' diža' che da' ca' za' gac. ²⁰ Na' da' nono ṇa' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže beṇe' ca' cheso'e xtiža' len gaže cuen beṇe' ca' chesedop chesežag chesonxene'

neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

Da' gwna Jesucriston' che bene' ca' chesonxen le' lo ciuda ca' gaže: Da' gože' bene' Efeso ca'

2 'Bzoy ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' lichen' na' ch-da' gacho candeler de oro ca' gaže, na' yo'one' nedan' chapa'ne' diža' quinga: ² "Neze nle'eda' ca güenña' chonle, can' chchejlaže'le zoale chonchguale xšinan'. Nezda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chacbe'ele bi zjanaque' dogualje postlw. ³ Ba byo bchejle len yogo' dan' ba goc chele na' ba benchguale xšinan' na' bi jaxaque'laže'le. ⁴ Perw da' nga bi chazlaža' can' chonle, da' bich chaquele neda' can' goquele neda' cana'. ⁵ Da'nan' le gon xbab can' gwzoale goquele neda' na' can' gwzoale bzenagle chia' na' yetinje xtoła'le cont da' yoble gonle güen can' benle cana'. Na' še bi yetinjele xtoła'len', yedeyena' cont bich gacle candeler chia'. ⁶ Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezechle da' xinj, le neda' lecze chgue'eda' can' chesonen'. ⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagwle da' chbia lo yag yela' mban da' zoa latje xdan che Diosen'."

Da' gože' bene' Esmirna ca'

⁸ Na' na'a bzoy ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: ⁹ "Neze nle'eda' ca güenña' chonle. Nezda' chyi chzaca'le. Nezda' nacchguale bene' yaše', la'czla' de chele da' zaca'ch clel ca yela' gwñi'an'. Na' ca nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bałe' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'. ¹⁰ Bi žeble da' ca' za' gac chele, le Satanásen' gonen cont yeseyixjue' bałle ližya cont gata'bia' še soen gonen cuejyichjle xtižan'. Na' lo to chope ža yosoči yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocaņe. ¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocaņe dan' žacho yela' got gwchope."

Da' gože' bene' Pérgamo ca'

¹² Na' bzoy ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: ¹³ "Neze nle'eda' ca güenña' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'. ¹⁴ Perw de to chope da' chonle da' bi chazlaža'. Le nita' bałle chzejni' lježe' guac gontezle da' xinj. Ca'cze nac dan' bzejni'i da' Balaam da' rey Balac cani'. Da'nan' gwsele' no'ole gosego'oyele' bene' Israel ca' cont gosagüe' yela' guagw da' nac che l gua'a lsaca' gosejni-laže' bene' zito' ca' na' cont gosone' da' yela' zto' len cuerp chegaque'. ¹⁵ Na' lecze nita' bałle chzenagle che dan' chgue'eda' dan' chososed chosolo'e bene' ca' zjanzi' nicolaítas. ¹⁶ Da'nan' le yetinje che da' xinjen' chonle. Na' še bi yetinjele xtoła'len', la' yidtia' yedetiile' na' nole chonle da' xinjen' len spada dan' chchoj choan'. ¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca maná, na' gona' to yej šiš che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len."

Da' gože' bene' Tiatira ca'

¹⁸ Na' bzoy ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' chała'nin na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapa'ne' diža' quinga: ¹⁹ "Neze nle'eda' ca güenña' chonle, nezda' zoale chaquele neda', chejnilaže'lenda', chonchguale xšinan' na' chchejele bite'teze chac chele, na' nezda' chonchle güen na'a clel can' benle cana'. ²⁰ Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bałe' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l gua'a lsaca' chesejnilaže'. ²¹ Ba gwleza' cont yetinjde' che yela' zto' dan' chonen', perw bi chaclaže' yetinjden', na' bina' cuejyichje' yela' zton' chonen'. ²² Da'nan' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesałe'chgüede' še bi yesebejyichje' da' ca' chzejni'ide' legaque' yesone'. ²³ Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombi'a yogo'te xbab da' yo'o lo' yichjlaždao' benach,

na' gona' cont to toe' soe' mbalaz o saca'zi'e con ca nac da' ba bene'. ²⁴ Na' le'e zoale Tiatiran' le'e bi chonle can' chsed chlo'e no'ole güenlažen' na' nēca nsedle dan' chesene' chesejni'ide' che Satanásen' dan' nono nom-bia', bi nīa' bichle da' cheyała' gonle. ²⁵ Con soaczle gonle da' güen can' chonle tža tža, cont ne' chonle güen caten' yida' da' yoble. ²⁶ Note'tezle še soele bi cuejyichjle xtižan', na' še soele ne' soatezle gonle can' nona' mandadw cate'ch yida' da' yoble, gona' cont nābia'le nación ca' txen len neda'. ²⁷ Ca Xan' ba bene' cont chnabi'a nación ca', lecze can' gona' cont beñe' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan beñe' nación ca' yosozenague' chegaque', na' beñe' ca' bi chosozenag, yosožiaye'e legaque' ca to beñe' chzoxj to no yeso' xguague. ²⁸ Na' gwnežjua' legaque' beljw xsilen'. ²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' beñe' Sardis ca'

3 'Na' lecze bzoj ben' choe' xtiža' len beñe' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: "Neze nle'eda' yogo'lo' dan' chonle. Nez-da' nacle ca beñe' guat la'czla' chze chele nable yela' mban toli tocañe. ² Le gon xbab can' chonle na' le še-jnilaže'ch neda' na' le gwzenag chia' šlac biña' yeyož cuiayi'le, le dan' chonlen' bi naquen can' chebe Dios ben' chonxena'. ³ Le soa le gon xbab che xtižan' dan' bosozejni'i beñe' le'e na' da' bzenagle chen cana'. Le gwzenag chen na'a da' yoble cont yetinjele xtoła'len'. Na' še bi gonle xbab yetinje xtoła'len', žin ža yedexenyala' le'e na' goña' castigw chele ca chzenyal to no beñe' gwban cate' chbane'. Bi nezele bi ža bi hor. ⁴ Bia'cze nita' balle beñe' Sardis biña' gonle da' malen' txen len beñe' yezica'chle. Na' le'e nac lažda'olen' xilaže' len neda', žin ža goña' lache' šiš chazle na' talenle neda', le zaca'le cont gonle neda' txen. ⁵ Note'tezle še soele bi cuejyichjle xtižan', žin ža goña' lache' šiš chazle, na' gwbat yoxia' lalen' le'e libr chia' gan' nyoj la yogo' beñe' zjanape' yela' mban toli tocañe, na' güe'lena' Xan' diža' na' len beñe' zjanac angl che' ca' yapega-ca'ne' nacle neda' txen. ⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Da' gože' beñe' Filadelfia ca'

⁷ Na' lecze bzoj ben' choe' xtiža' len beñe' ca' chesedop chesežag chesonxen neda' lo ciuda Filadelfia, yo'one' naca' beñe' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o beñe' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: ⁸ "Neze nle'eda' ca güenna' chonle. Nach

ba gwsaljua' ca to puert che le'e da' nono gac yosejyw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e. ⁹ Ba! beñe' Israel že' gan' zolen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabi'a da' xigüe' ca'. Na' ca nac legaque', gona' cont žin ža yesape' le'e bala'an cate' yesacbe'ede' chacda' le'e. ¹⁰ Ba byo bchejle len yogo' dan' gwdi gwxaca'le na' benle can' nona' mandadw, na' da'nan' gona' yechojle güen cate' žin ža saca'zi' yogo' beñačh. Cana' gata'bia' che to to beñačh še yosozenague' chia' o še bi yosozenague'. ¹¹ Ba zoa yida' da' yoble. Le soačhač le šejnilaže'nda' na' gwzenagle chia' cont bibi gwžon soale mbalaz toli tocañe. ¹² Note'tezle še soele bi cuejyichjle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenlne' toli tocañe. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. ¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' beñe' Laodicea ca'

¹⁴ Na' bzoj ben' choe' xtiža' len beñe' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' beñačh na' yogo'lo' bichle da' de le'e yaban' na' lo yežlion'. Yo'one' neda' chapa'ne' diža' quinga: ¹⁵ "Neze nle'eda' ca chonle, bi nācho chgue'ele neda' na' nēca chaquele neda'. Yebechda' šaca' chgue'ele neda' o šaca' chaquele neda'. ¹⁶ Na' da' bi chonle cuent gaquele neda', da'nan' ba zoa cuejyichja' le'e bich gona' le'e ca xi'ina'. ¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca beñe' zban nacle len Diosen'. Bi chacbe'ele nacle ca to beñe' bi chle'e o ca to beñe' laže' ga'alyid da' bi chejni'ile xtižan' nēca chzenagle chen. ¹⁸ Da'nan' chnia' le'e cheyała' si'le da' goña' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' goña' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xalana' beñe' nyaz to lache' šiš xila'. Gonle ca' cont bich le'eda' le'e ca to beñe' laže' ga'alyid, beñe' cheyała' gaque zto'. Na' le güe' latje yocoba' xbab chelen' cont bich gacle ca to beñe' bi chle'e, beñe' chyažje rmed che yejlagüe' cont le'ede', san gacbe'ele da' chaclaže' Diosen' gonle. ¹⁹ Note'teze beñe' chacda', chdiła'ne' na' chnežjua'ne' castigw cate' chone' da' xinj. Da'nan' cheyała' cuec yichjle yetinjele xtoła'len'. ²⁰ Chnia' to tole ca to beñe' zecha cho'a yo'o chelen' chñie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. ²¹ Na'

note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabi'a'to' txen. ²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Ben' že' yaban' chesonxene' Diosen'

4 Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. ³ Na' ble'eda' ben' chi' chnabian' chactite' ca chactit yejese, yej da' nzi' jasje na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda. ⁴ Na' cue'ej cuit Diosen' gan' chi'e chnabi'e zjachi' yetapechoa beñe' gwlej Diosen' zjanaque' blao, beñe' chesenabi'e txen len le'. Zjanyaze' lache' šiš na' zjazoa corona de oro yichj to togaque'. ⁵ Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' čala'ñin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. ⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap beñe' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. ⁷ Beñe' nechw naque' ca to león, na' beñe' gwchope ca to go'ñ, na' beñe' gwyoñe nac cho'alagüe' ca che beñach, na' beñe' gwdape naque' ca to bsia be ze lo be'. ⁸ Na' dapte beñe' ca' to toe' žia xop güeje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Łeca beñe' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli tocañe.

⁹ Na' yogo' ñi'a cate' beñe' ca' tap cheso'e diža' catec beñe' zaca' nac Dios ben' chi' chnabi'a', ben' zoacze toli tocañe, yogo' ñi'a cate' chesonxene' le' cheso'e yela' choxcen che', ¹⁰ beñe' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli tocañe chesonxene' le' gan' chi'e chnabi'e na' chosonite' corona čhegaquen' xñi'en, chesene':

¹¹ Xanto' Dios, zaco' gonxento' le',

na' soato' le' bala'añ na' güe'to' diža' che yela' guac xen čhion',

le len' beno' yogo'lo' da' de,

na' beno' yogo'lo'len con ca gwnalažo'.

Jesucristw ben' zaca'lebe ca xila' daon' gosot beñe' Israel ca' ñeche xtoła'gaque'

5 Na' ble'eda' Dios ben' chi' chnabi'a', len ne'e liča noxe' to yiš da' ndobyoyen na' nyoj chop la'aten na' nyeyjon nyišen' gaže seyw. ² Na' ble'eda' to angl gual gwne' zižje gwne':

—čNon' zaca' gwzoxj seyw ca' cont šaš yišen'?

³ Na' nono bžel beñe' zaca' gwzaše' yišen' ñeca yaban' na' ñe yežlion' na' ñeca gan' že' beñe' guat ca'. Ne to nono bžel beñe' la'č le'ezden' nac naquen. ⁴ Na' gwchežchgua' da' nono zoa beñe' zaca' gwzaše' yišen' gwlaben' na' ñeca zaque' ña'ze' nac naquen. ⁵ Nach to beñe' gwlej Diosen' cont naque' blao gože'nda':

—Bitw cuežo'. Gwña'šc, na' zoa Jesucristw ben' golje

lo diaža che da' Judá, naque' rey can' nac da' xozx-ta'ogüe' David, na' da' nape' yela' chnabi'a' xen zaca'lebe' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac ñitlao xtoła' beñachen'.

⁶ Nach ble'eda'ne' zeche' gan' chi' ben' chnabian' na' ladjo beñe' ca' tap ben' zjažia xil, do gacho' beñe' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'. ⁷ Nach ben' ble'eda' ca to xila' dao' jaxi'e yiš dan' noxe' ben' len ne'e liča gan' chi'e chnabi'en. ⁸ Na' cate' jaxi'e yišen' beñe' ca' tap lente beñe' blao ca' tapechoa bosozoa xibgaque' lagüen'. Na' to to beñe' blao ca' zjanoxe' to arpa na' to barser de oro gan' chey yal, na' yalen' zejen xtiža' beñe' ca' zjanac lo na' Diosen', dižan' cheso'e'lene' le' caten' choso' güiže'ne'. ⁹ Nach beñe' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen',

le bnežjw cuino' gosote' le'.

Blalj xčheno' cont bñitlaguo' xtoła'to', na' gwxi'o neto' cont nacto' lo na' Dios, neto' nacto' beñe' to to nación, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey, na' zoato' chonxento' Dios čheton' ca bxož, na' žin ža ñabi'a'to' lo yežlion'.

¹¹ Nach gwña'a na' ble'eda' beñe' zan juisyw angl, ñeca gwzoeda' gwlabane'. Zjazeča angl ca' cue'ej cuit ben' chi' chnabian' na' gan' že' beñe' ca' tap na' beñe' blao ca' tapechoa. ¹² Na' benda' cheso'e' dižan' zižje chesene':

Jesucriston' bnežjw cuine' ñeche xtoła' beñachen', na' da'n'an' zaca'lebe' ca xila' daon' gosot beñe' Israel cont gwnitlao xtoła'gaque'.

Na' Jesucriston' zaca'cze' gonxenchone', le chnabi'e doxen, na' yo'o lo ne'e yogo'te da' zjade. Naque' beñe' sina' gual, na' nape' yela' guac xen.

Cheya'la' güe'chone' yela' bala'añ, na' güe'cho diža' naque' beñe' zaca' juisyw.

¹³ Na' lecce benda' yogo' beṇe' že' yaban' na' yežlion' na' beṇe' že' latje che beṇe' guat, na' beṇe' zjanita' lo nisdao', cheso'e diža' chesene':

Toḷi tocaṇe chonxencho Dios ben' chi' chnabia' na' Jesucriston' ben' zaca'lebde' ca xila' daon' gosot beṇe' Israel cont gwnitlao xtoḷa'gaque'.

Zjanape' yeḷa' bala'aṇ, na' zjanaque' beṇe' zaca' juisyw,

na' zjanape' yeḷa' guac xen juisyw toḷi tocaṇe.

Na' benda' lecce can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach beṇe' ca' tap ben' zjažia xil gosene':

—Ca'šcacze gac.

Na' beṇe' blao ca' tapechoa bosozoa xibgaque' gosonxene' Dios ben' zoa toḷi tocaṇe.

Seyw ca' gaže

6 Ca nac seyw ca' gaže, ble'eda' cate' ben' zaca'lebde' ca xila' daon' be gosot beṇe' gualaž cheto' neče xtoḷa'gaque' bzojje' seyw nechon'. Nach beṇe' ca' tap zjažia xil, toe' gwne' zižje, ca zižjen' chašjw chtin yi' gwzio', gwne':

—Da, na' gwṇa' da' nga.

² Na' cate' gwṇa'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yičhje' neče da' ba bene' gan lo gwdile, na' ṇa'a ba zeje' da' yoble cont tillene' nochle beṇe' chesegue'ede' le' na' gone' gan legaque'.

³ Na' ben' zaca'lebde' ca xila' dao' be gosot beṇe' gualaž cheto' neče xtoḷa'gaque', cate' bzojje' seyw gwchope benda' gwne' yeto ben' žia xil, ben' nac beṇe' gwchope, gwne':

—Da, na' gwṇa' da' nga.

⁴ Nach bchoj yeto cabayw, na' bena' nacba' be xṇa. Na' ben' žie' cože'ban' gwyo'o lo ne'e gone' cont beṇe' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot beṇe' gualaž cheto' neče xtoḷa'gaque' bzojje' seyw gwyoṇe, benda' gwne' beṇe' gwyoṇe ben' žia xil, gwne':

—Da, na' gwṇa' da' nga.

Nach gwṇa'a na' ble'eda' to cabayw gasj na' ben' žie' cože'ban' noxe' to xigonz. ⁶ Na' benda' gwne' to beṇe' do gan' že' beṇe' ca' tap ben' zjažia xil, gože' ben' žia cože' cabayw gasja', gwne':

—Gwyej jažiai' trigw na' cebada cont yesaquen gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot beṇe' gualaž cheto' neče xtoḷa'gaque' bzojje' seyw gwdape, benda' gwne' beṇe' gwdape ben' žia xil, gwne':

—Da, na' gwṇa' da' nga.

⁸ Nach gwṇa'a na' ble'eda' to cabayw be gaše, na' ben' žie' cože'ban' lie' Yeḷa' Got. Na' yeto beṇe' zej

cože', lie' Latje Gan' Že' Beṇe' Guat. Na' gosac lo na'gaque' bosoxie' gwdile gan' gosat beṇe' zan, na' gosone' cont gosat yezane' gwbin, na' gosone' cont yezan beṇe' gosate' len yižgüe', na' gosone' cont be znia gosotba' yezane', na' goc ca' lao to tlcw yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot beṇe' gualaž cheto' neče xtoḷa'gaque' bzojje' seyw gayo', ble'eda' mes gan' beṇe' ca' že' yaban' chosozeye' bi dan' chosozeye' cate' chesonxene' Diosen', na' xṇi'a mesen' ble'eda' beṇe' ca' ba gosot yezica'chle beṇe' le-gaque' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'. ¹⁰ Na' beṇe' guat ca' gosenē' zižje gosene':

—Xanto' Dios, le' naco' beṇe' laždao' xilaže' juisyw na' zoaczo' chono' con ca žo'. ¿Batcan' gono' yeḷa' justis che beṇe' ca' že' yežlion' ben' gosot neto'? ¿Batcan' gono' cont yezezaca'zi'e da' bosolalje' xchenton'?

¹¹ Nach Diosen' bnežjue' to to beṇe' guat ca' tgüeje xagaque' da' šiš da' gosaze'. Na' gože' legaque' yesyezi'laže'che' yeto chop ža šlac yezaza' beṇe' cheyaḷa' yesat can' gosate' lagüe da' chesonxene' Criston', beṇe' zjanac ca biše' lježe'.

¹² Nach ben' zaca'lebde' ca xila' daon' be gosot beṇe' gualaž cheto' neče xtoḷa'gaque', cate' bzojje' seyw gwchope, gwṇa'a na' leca gwxo'. Na' gwbižen' beyaquen gasj ca lache' gasj da' chesaz beṇe' chesegüine', na' doxen bion' beyaquen xṇa ca chen. ¹³ Na' beljw ca' beseyinjen besežinten lo yežlion' can' chyinj no yixgüigw da' žia lo xyaguen cate' chechj to be' gual da' chtan len. ¹⁴ Nach le'e yaban' benitteczen ca to no yiš da' chedobloḷen. Na' yogo' ya'a ca' na' no yežlio dao' da' ca' zjachi' lo' nisdan' bososa' xišnan'. ¹⁵ Nach yogo' loḷ beṇe' že' yežlion', yogo' beṇe' ca' chesenabia' lo yežlion', yogo' xan soldadw, yogo' beṇe' blao beṇe' gwṇi'a, yogo' beṇe' cheson xšin beṇe' yoble ca beyixe', na' len yezica'chle beṇe', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. ¹⁶ Na' gosene':

—Chešca bdiṇj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot beṇe' neče xtoḷa'gaque' bi gone' saca'zi'cho. ¹⁷ Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

Beṇe' Israel ca' beṇe' zjanyiše' seyw che Diosen'

7 Gwdena' ble'eda' tap angl zjazeche' tap squin che yežlion' bosozague' ben' cont bi gwyechjen lo yežlion', lo nisdan' o gan' ze yag ca'. ² Na' ble'eda' yeto angl beṇe' za' gan' chla' gwbiž na' noxe' to da' gwchine' gwčiše'de' seyw che Dios loxga beṇe' ca' chesonxen le', Dios beṇe' zoa toḷi tocaṇe. Na' anglen' gwne' zižje bol güiže' angl ca' tap ben' zjanac lo ne'e yesone' gac yeḷa' zi' lo yežlion' len lo nisdan'. ³ Gože' legaque':

—Bi gwžiaiyl'e yežlion', ñe nisdaon', ñe yag ca' šlac biña' gwčhiša' seyw çe Dios çecheo loxga beñe' ca' chesonxen le'.

⁴ Na' benda' gwne' bał beñe' bčhiše' seyon' beñe' za'ac lo yogo' diaža çe beñe' Israel, na' yogüe' gosac to gayoa tapeyon mile'. ⁵ Šižinw mile' za'aque' lo diaža çe da' Judá, šižinw mile' lo diaža çe da' Rubén, šižinw mile' lo diaža çe da' Gad, ⁶ na' šižinw mile' lo diaža çe da' Aser, šižinw mile' lo diaža çe da' Neftalí, šižinw mile' lo diaža çe da' Manasés, ⁷ na' šižinw mile' lo diaža çe da' Simeón, šižinw mile' lo diaža çe da' Leví, šižinw mile' lo diaža çe da' Isacar, ⁸ šižinw mile' lo diaža çe da' Zabulón, šižinw mile' lo diaža çe da' José na' šižinw mile' lo diaža çe da' Benjamín.

Beñe' zan zjanyaze' lache' šiš

⁹ Na' gwdena' gwña'a da' yoble na' ble'eda' zjaze beñe' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot beñe' Israel ñeče xtoł'a'gaque'. Na' nono goc yosolab bał beñe' že', le gosaque' beñe' zan juisyw, beñe' to to nación, to to yež, to to diaža, na' gosaque' beñe' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin. ¹⁰ Na' chesyebede' bososye'e gosene':

Xanto' Dios ben' chi' chnabia' na' Jesucristw ben' zaca'lebde' ca xila' daon' be gosot beñe' Israel ñeče xtoł'a'gaque',

legaque' ba gosone' yeł'a' mban çecheo tołi tocañe. ¹¹ Nach yogo' loł angl ca' zjaze' cue'ej cuite' gan' chi'e chnabi'e, na' beñe' blao ca' tapechoa na' beñe' ca' tap zjažia xil, yogo' lołe' jasechaze' cosčo'ale lo yon' gosonxene' Diosen', ¹² gosene':

Chac can' cheyał'a' gac, Dios čheto'.
Zaca'czo' gonxento' le' tołi tocañe,
le naco' beñe' zaca' juisyw,
naco' la'zelagüe beñe' sina',
zaco' güe'to' yeł'a' choxclen čhio' na' güe'to' yeł'a'
bala'añ čhio' tołi tocañe,
chnabi'o doxen, na' napo' la'zelagüe yeł'a' guac xen.
Can' nacczen.

¹³ Nach to beñe' blao ben' nac txen len beñe' tapechoa ca' gože'nda':

—¿Nezdo' no zjanac beñe' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' ñezdo' beñe' gole, bi ñezda' neda'.

Nach gože' neda':

—Beñe' quinga ba gosale'de' da' ba gosac čhegaque' yežlion'. Na' bač gwnitlao xtoł'a'gaque' na' ba zjanyaze' lache' šiš, le chesejnilaže' Jesucristw ben' blalj xčhene' ca xila' dao' be gosot beñe' Israel cont bezi'xen Diosen' xtoł'a'gaque'. ¹⁵ Da'n'an' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' legaque'. ¹⁶ Bich yesebil yesedone', na' gwbižen' bich gwzeyen legaque', ñeca yesacde' zeye'. ¹⁷ Le Jesucristw ben' zaca'lebde' ca xila' daon' ben' gosot beñe' Israel ñeče xtoł'a'gaque', len

chgüia chñe'e legaque'. Ze' lao Diosen' gachoł gan' chi'e chnabi'e na' gone' cont ñita'chgüe' mbalaz. Gone' cont bich yesebeže' ñeca yesegüine'de'.

Seyw gažen'

8 Gwde gože' neda' ca', nach Jesucristw ben' zaca'lebde' ca xila' daon' be gosot beñe' gualaž čheton' bzojje' seyw gaže da' nyiše' yiša', na' cate' bzojjen' gocži yaban' do gašj hor. ² Na' ble'eda' gaže angl ca' zjazeche' lao Diosen', na' bnežjue' legaque' tgüeje trompeta. ³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' beñe' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zča'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len ši'i beñe' ca' chesonxene' Diosen' bate'teze chosoł güiže'ne'. ⁴ Nach gwyas žen çe yala' noxe' anglen' gwloen lao Diosen' len xtiža' beñe' ca' chesonxene' le'. ⁵ Nach anglen' gwxi'e ya'alj da' žia lo mesen' gwlo'en loł barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozan' cho'agaque' cont yosocuežen'.

⁷ Angl nechon' bcuež trompeta čhen', na' gwche'chgua yej lo yežlion' na' nčhixen yi' na' chen. Na' da' zča'o yežlion' gwžiaiyl', yelate'ze ca goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yiže' ga' da' de lo yežlion' goseyen.

⁸ Nach angl gwchope bcuež trompeta čhen', na' to da' nac ca to ya'a xen blažon' lo' nisdaon' čala'ñinen. Na' yelate'ze ca goc gašje nisdaon' beyaquen chen.

⁹ Na' yelate'ze ca goc gašje be ca' že' lo' nisdaon' gosatba', na' leze yeto ca'te' barcw ca' čaš lo nisen' gosebiayin'.

¹⁰ Nach angl gwyoñe bcuež trompeta čhen' na' to beljw xen blažon' le'e yaba čala'ñinen ca to yi' yech. Jago'oñen lo da' zan yegw na' da' zan ga chal nis lo yežlion', yelate'ze ca goc gašje yegw ca' na' ga chal nis dan' zjade yežlion' gan' jago'oñenna'. ¹¹ Na' beljon' nzin' Da' Zła', na' nisen' gan' jago'oñenna' beyaquen zła' na' beñe' zan gosat dan' gose'eje' nisen'.

¹² Nach angl gwdape bcuež trompeta čhen' na' yelate'ze ca goc gašje gwbižen' gwžiaiyl', lecze yeto ca'te' bion' gwžiaiyl' na' lecze yelate'ze ca goc gašje beljw ca' gosebiayin'. Na' da' ca' gosebiayin' bich bososenin'. Da'n'an' gwdena' goc čhoł yelate'ze ca goc gašj ža gašj yel, na goc ca' yogo' ža yogo' yel.

¹³ Nach gwña'a na' ble'eda' chda lo be' to angl do gachoł le'e yaban' na' benda' gwñe' zižje, gwne':

—iNyaše'chgua yesac çe beñe' ca' že' yežlion' yeyož yosocuež angl ca' yešoñe trompeta čhegaquen'!

9 Nach angl beñe' gayo' bcuež trompeta čhen' na' ble'eda' to beljw da' blažon' le'e yaban' jago'oñen

lo yežlion'. Na' beljon' goquen ca to beñe' na' Diosen' bnežjue'ne' xinya cont saljue' yechw zitjwchgua dan' nac lo gabil'. ² Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc choł le'e yaban' can' chac cate' chi'chgua žen-dao', lao gwbižen' len lo be' goquen choł catec gwche' ženña'. ³ Gan' gwyas ženña' besežaš biše'zo zan gwyasba' lo yežlion', be yeseyižba' beñe' can' cheson bejxoni' be chaš yežlio. ⁴ Diosen' gože'ba' bibi yesone-ba' yiže' ga', ñe da' zjanaze' na' ñeca yag ca' ze yežlion', san yeseyižba' beñe' ca' bi nyiše' sey che Diosen' loxgagaque'. ⁵ Na' bi be'e latje yesotba' legaque', san šašba' gayo' bio' yosoči yososaca'ba' beñe' ca'. Na' cate' yeseyižba' beñe', yesežaglagüe' can' chžaglaochi cate' chyž bejxonin' chio'. ⁶ Na' cate' žin ža yesomba' ca', beñe' že' yežlion' yeseñablaže' yesate', perw bi yesate'; yesaclaže' bich yesenite', perw bi gac can' yesaclažen'.

⁷ Ca nac biše'zo ca', ble'eda' zjanacba' ca cabayw be šja'ac lo gwdiłe. Yičjgacban' zjazoa da' nac ca corona de oro. Cho'alaoban' naquen ca cho'alao beñach. ⁸ Zjažiaba' yiša' da' nac ca yiša' yičj no'ole. Łayban' zjanaquen ca lay bež znia be nzi' león. ⁹ Na' zjanyazba' to da' nac de ya da' chcue'ejen cuerp chegacban'. Na' sšag da' chesomba' len xilgacban' chñiñen ca chñiñ cate' chesa'acses cabayw zan zja'acba' lo gwdiłe zjanxobba' carret. ¹⁰ Na' lo xban biše'zo ca' zjazoa liba' zjanaquen ca xban bejxoni' cont yeseyižba' beñe', na' goc lo na'gacba' yosoči yososaca'ba' beñe' že' yežlion' gayo' bio', yeseyižba' legaque'. ¹¹ Angl ben' beyac da' xigüe' dan' chnabia' gabilen' naquen xan biše'zo ca'. Lenña' nzi' Abadón diža' hebreo na' lecze nzin' Apolión diža' griego, na' zejen diža' Da' Chžiyain'.

¹² Ba gwde yeła' zi' nechon' na' za' za'ac yečhopen.

¹³ Nach bcuež angl gwxopen' trompeta čhen', na' benda' gwne to beñe' do gan' zoa mes de oro dan' ze lao Diosen', mes da' žia lozen dapte squin, mesen' gan' beñe' ca' že' yaban' chosozeye' bi da' chosozeye' cate' chesonxene' Diosen'. ¹⁴ Na' boł güiže' angl gwxop ben' noxe' trompetan', gože'ne':

—Besež dap angl ca' ben' besyeyac beñe' mal ben' zjanchej cho'a yegw da' nzi' Eufrates.

¹⁵ Nach beseže' angl ca' tap beñe' ca' bnita' Diosen' cont yesaše' lo iz, bio', ža na' horen' nžie' bia' yesote' beñach, na' caten' gosaše', yelate'ze ca goc gašje beñe' že' yežlion' gosote'. ¹⁶ Na' gwnita' čop gayoa millón soldadw chegaque' zjažie' cože' cabayon'.

¹⁷ Quinga ble'edaogüeda' cabayw ca' na' angl ca' beñe' besyeyac beñe' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'al-čho'gaque' na' yana' chñan' ca color che yi' na' chñan' da' azul na' da' gaše. Na' yičj cabayw ca' zjanaquen ca yičj bež znia be nzi' león, na' chchoj yi' cho'agacba' len žen na' len azufre da' čala'ñiñ. ¹⁸ Yelate'ze ca goc gašje beñe' že' yežlion' gosat len yi' na' len žen na' len azufre da' bchoj lo cho'agacba'. ¹⁹ Na' bosočin cho'agacba' na' len xbangacba' cont gosotba' beñach, na' xbangacban' gosaquen ca beł na' zjansa' yičjjen cont goseyi'ñen beñe'.

²⁰ Na' beñe' ca' besyega'an bi gosat cate' gwyas cabayw ca' lo yežlion', legaque' bi besyetiñde' che da' mal ca' chesone', ñeca bososane' da' chesonxene' da' xigüe' ca' na' lo gua'a lsaca' chegaque' ca' da' zjanac de oro, de plata, de bronce, de yej o de yag, la'czla' lo gua'a lsaca' ca' bi chesele'en, ñeca chesenen, na' ñeca chac yesa'aquen. ²¹ Na' ñeca besyetiñde' cont yesebejyichje' bichle da' mal da' chesone', ca dan' chesote' beñe', da' chesone' txen len no beñe' guaža', da' chesone' da' yeła' zto' len cuerp chegaquen', na' da' chesebane' da' de che beñe'.

Angl beñe' noxe' yiš dao' ndobyoyen

10 Nach ble'eda' yeto angl gual gwze'e yaban' betje' lo yežlion'. To bejw nyečjjen le' na' zoa to pita' yičjjen'. Cho'alagüen' chñatiten ca gwbiž, na' yeñe' ca' ble'edan' zjanaquen ca bdope da' čala'ñiñ. ² Anglen' noxe' to yiš dao' da' ba beyašen. Na' bzoa šla'a ñie' lica lo nisdaon' na' yešla'an bzoe' lo yežlion'. ³ Na' bosye'e zižje ca zižje chosya'a be nzi' león. Na' cate' bosye'e gwne gwzio' gaž ñi'a na' to to gwzion' zoa da' gosenan. ⁴ Beyož goc ca' na' ba zoa gwzoja' diža' da' benda' šlac gwne gwzion' cate' to beñe' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yičjlažda'oguo'.

⁵ Nach angl ben' zoa šla'a ñie' lo nisdaon' na' yešla'an lo yežlion' gwłis ne'e ličan' yabale. ⁶ Na' gwlo'e da' bali gac can' ža Dios ben' zoa toli tocañe, ben' ben le'e yaba len yogo'te da' chle'echo le'enna', bene' yežlion', beñach, beyiže', na' bite'tezechle da' de lo yežlion', na' bene' nisdaon' len be ca' na' da' ca' že' lo'enna'. Gwne':

—Bich cuez Diosen' gone' can' ba nžie' bia' gone'.

⁷ San cate' žin ža gwcuež angl gažen' trompeta čhen', cana'ch gac da' nžia Diosen' bia' gac, can' ba gože' beñe' ca' goso'e xtižen', da' nono gwneze cani'.

⁸ Nach da' yoble ben' zoa yaban' ben' ba benczeda' gwñie' neda', gwne':

—Gwyey jaxi' yiš dao' dan' ba beyaš dan' noxe' angl ben' zecha zoa šla'a ñie' lo nisdaon' na' yešla'an lo yežlion'.

⁹ Da'nana' gwy'a gan' zoa anglen' janaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix ca šina' beser, perw lo' li'on yeyaquen zla'.

¹⁰ Nach bexoa' yišen' noxe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. ¹¹ Nach anglen' gože' neda':

—Da' yoble cheyala' go'o xtiža' Diosen' na' ñao' can' gac che zan yež, che zan nación, che beñe' chesac gwde gwdele diža' da' de yežlion', na' che zan beñe' gwnabia'.

Čhope beñe' goso'e xtiža' Diosen'

11 Nach anglen' beñe' neda' to ya ca nac da' chosočhine' cate' chosočixe' yo'o, na' gože'nda':

—Gwyej jachiḡe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' baḷ beṇe' že' chesonxene' le'. ² Perw bi gw-chiḡo' chy'o'on, le ba naquen lo na' beṇe' bi zjanac beṇe' Israel beṇe' bi chesejnilaže' Diosen' cont yesone' nacteze chesaclaže' lo ciuda che Dios lao ḡhopenon bio'. ³ Na' seḷa' ḡhope beṇe' yeso'e xtiža', na' yesaze' lache' gasj ca to beṇe' cheḡuine' na' yeseyiḡjue'ede' xtižan' lao to mil ḡhop gayoa gayon ža.

⁴ Beṇe' ca' ḡhope zjazaca'lebe' ca yag olivos ca' ḡhope na' ca candelar ca' ḡhope da' zjazoa lao Diosen' ben' nac ḡan yežlio. ⁵ Na' še no chaclaže' gonxi'e leḡaque', choj yi' cho'a beṇe' ca' yeso'e xtižan' na' gwzeyen beṇe' chḡue'ede' leḡaque'. Can' gac yesat note'teze beṇe' chende' gonxi'e beṇe' ca' ḡhope. ⁶ Na' beṇe' ca' yeseyiḡjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežaglae beṇe' že' yežlion'. ⁷ Perw cate' yeyož yeso'e xtižan', nach choj lo' gabiḷ gan' nac yechw zitḡwchgua to bež xigüe' nižba' le-gaque' na' gotteba' leḡaque'. ⁸ Na' beṇe' ca' že'na' yosyocua'ane' cuerp cheḡaquen' gan' chesetoḷen la cay che ciuda blaon' gan' gosote' ḡancho Jesucriston'. Ciudadan' zaca'leben ca ciuda Sodoma na' ca nación Egipto. ⁹ Na' šoṇe ža yo gašje beṇe' za'ac zan yež na' zan nación, beṇe' zjanac zan diaža, beṇe' chesac gwde gwdele diža' da' de lo yežlion', yesene'e beṇe' guat ca' na' bi yeso'e latje yesegaše'. ¹⁰ Beṇe' ca' že' yežlion' yesyebede' da' gosat beṇe' ca' ḡhope, na' yosonežjo lježe' bi da' yosonežjo lježe' da' chesyebede' dan' bich nita' beṇe' ca' yeso'e xtiža' Diosen' len leḡaque', le leca zed chesacden'. ¹¹ Na' ble'edaogüeda' gwde šoṇe ža yogašje Diosen' bosbane' beṇe' ca' ḡhope na' gosezeche' da' yoble. Na' yogo' beṇe' besele'e leḡaque' besežebchḡüe'. ¹² Nach beṇe' ca' gosoe' xtiža' Diosen' gosende' gož Diosen' leḡaque' zižje:

—Le yeda, le yeyep nga.

Nach beṇe' ca' chesegue'e leḡaque' besele'ede' besyeyep'e yaban' to lo' bejw. ¹³ Šlac chesyeyep'en' leca gwxo' na' gwžiayi' late' ciudadan', na' gaže mil beṇe' gosat caten' gwxon'. Na' beṇe' ca' besyega'an' besežebchḡüe' na' gosonxene' Dios ben' zoa yaba.

¹⁴ Ba gwde yeḷa' zi' gwchopen' na' za' gac da' gwyoṇe.

Can' goc cate' angl gaže bcueže' trompeta ḡhen'

¹⁵ Nach angl beṇe' gažen' bcuež trompeta ḡhen' na' benda' baḷ beṇe' ca' že' yaban' gosene' zižje, gosene': Doxen yeḷa' chnabia' che yežlion' baḡ naquen lo na' ḡancho Diosen' na' lo na' Cristo ben' gwleje' cont chnabi'e.

Na' Diosen' zoacze' chnabi'e toḷi tocaṇe.

¹⁶ Nach beṇe' blao ca' tapechoa ben' zjachi' cue'ej cuit Diosen', jasechaze' cošġo'ale lo yon' gosonxene' Diosen', ¹⁷ gosene':

Chonto' yeḷa' choḡclen ḡchio' ḡanto',
le naco' Dios ben' nap yeḷa' guac xen.

Ba zoaczo' cate' biṇa' ḡe yežlion',
na' soaczo' toḷi tocaṇe.

Na' ba gwzolao chnabi'o len yeḷa' guac xen ḡhion' cont gac can' chazlažo' doxen.

¹⁸ Beṇe' nación ca' že' yežlion' beseže'e le',
perw ba bžin ža gono' yesezaca'zi'e.

Ba bžin ža ḡhoglaguo' che yogo' beṇe' ca' ba gosat še noe' nap doḷa'.

Na' gono' cont beṇe' güen xšino' ca' beṇe' ca' gosoe' xtižon' yesenite' mbalaz,
len yogo' beṇe' gwlejo' cont zjanaque' lo nao', beṇe' gosonxen le'.

Con yogo' beṇe' gosonxen le' yesenite' mba, beṇe' gole len beṇe' xcuide'.

Lece ba bžin ža yesebiayi' beṇe' ca' bosožiayi' ljež beṇače' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' beṇe' Israel gualaž ḡheto' ca' yesone' cont gaclene' le-gaque'. Na' šlac gwṇa'a, gwyp yes, gocchgua sšag, gošj gwtin, gwxo' na' gwche'chgua yej.

No'olen' na' beḷ be zoa gaž yiḡhḡ

12 Na' ble'edaogüeda' to da' yebanchḡüecho le'e yaban', ble'eda' to no'ole na' nyaze' gwbižen' ca xe'. Nleje' lo bion' na' zoa to corona yiḡhḡe' da' žian šižinw beljw. ² No'olen' no'e bdao' na' chosye'e, le chaque' bes che yeḷa' sanṇa'. ³ Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca to beḷ be žia gaž yiḡhḡ, be xen juisyw. Nacha' be ḡṇa na' žia ši lozba' na' zoa tgüeje corona to to yiḡhḡban'. ⁴ Na' bta xbamban' cont bḡhinjen zan beljw ca' žia le'e yaban' na' bese-lažon' lo yežlion', yelate'ze ca goc gašje beljw ca' zjažia le'e yaban' bḡhinj xbamban'. Na' gwlezba' ḡṇi'a no'olen' ba zoa sanṇa' cont yebba' bdao' ḡhen' cate' sane'be'. ⁵ Nach no'olna' gwḡxane' to bi' byo bi' ṇabia' nación ca' na' žan ca žan yosozenague' chebe'. Nach Diosen' be-yo'ebe' gan' chi'e chnabi'e. ⁶ Nach no'olen' boxonjde' belen', na' gwyeje' to latje daš da' benšagüe' Diosen' che', gan' yeso'ene' da' ye'ej gagüe' lao to mil ḡhop gayoa gayon ža.

⁷ Gwde na' goc to gwdiḷe yaban', le angl blao ben' le' Miguel na' soldadw che' ca' gosediḷlene' beḷ ben' žia gaž yiḡhḡ lencze angl che belen' beṇe' ca' besyeyac da' xigüe'. ⁸ Na' belen' len da' xigüe' ca' bi gosezoen angl ben' zjanac beṇe' che Dios, na' bich bi latje gota' che belen' yaba, ṇeca che da' xigüe' ca' zjanac leba' txen. ⁹ Angl che Diosen' bosozale'ba' lo yežlion'. Na' lece bosozaḷe' da' xigüe' ca' lo yežlion'. Belnan' ben' zoa ža gwlaste nacha' gwxiye' na' leba' Satanás, na' ṇe' zoaczba' ṇa'a chziye'ba' yogo' beṇaḡ.

¹⁰ Nach benda' to beṇe' zoa yaban' gwṇe' zižje gwne':

—Baḡ bžin ža ben Dios chechon' cont beṇe' ca' chesejnilaže'ne' zjanite' len le'. Baḡ bžin ža nacbia' Dios chechon' nape' yeḷa' guac xen. Ba bžin ža chnabi'e cont gac con da' cheyaḷa'cze gac. Na' ba bžin ža Criston' ben' gwleje' cont ṇabi'e baḡ chnabi'lene' le'.

Gac da' cheyała'cze gac, le Satanás dan' ba gwzoa lao Diosen' do ža do yel bcuišen beņe' chesejnilaže' Criston', bač besyebejen'. ¹¹ Na' beņe' gosejnilaže' Criston' na' ba gosate', gosezoede' bi bosozenague' che Satanásen', le gosejle'e Jesucriston' blaj xchene' neče xtoła'gaque' na' goso'e diža' chesejnilaže'ne'. Beņe' ca' ba gosat gosacbe'ede' yejñi'a yesate' clel ca yesebejyichje' Jesucriston'. ¹² Yaban' cheyała' gosya'an yela' chebe chen, na' le'e že'le gan' zoa Diosen' cheyała' yebele, perw nyaše'chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zوالen' chaclocchguan, le nezen yešložga de latj chen.

¹³ Nach cate' beļen' gocbe'eba' bosozale'ba' lo yežlion', blagsesba' no'olen' gwxañ bi' byo daon'.

¹⁴ Perw Diosen' bnežjue' čhop xile' da' xen ca xil bsi-adao' cont gwyje' latje dašo gan' bi goc žin beļen', latje gan' benšagüe' che' gan' yeso'ene' da' ye'ej gagüe' šon iz yo gašje. ¹⁵ Na' bchoj nis zil cho'a beļen' goquen to yegw cont bžinen gan' zoa no'olen' na' guan' le'.

¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a beļen'. ¹⁷ Nach beļen' blocchguaba' no'olen' na' gwyje'ba' jatillemba' yezica'chle xi'ñe' da' chosozenague' che Diosen', chesone' con da' že' na' zjanita'čhače' chesejnilaže' xtiža' Jesucriston'.

Čhope bež xigüe' be ble'e Juan

13 Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. ² Ble'eda' bežen' nacba' ca to tigr, perw ñi'ana'ban' zjanaquen ca ñi'a na' oso na' cho'aban' naquen ca cho'a león. Nach beļ ben' žia gaž yichj bnežjwba' bežen' yela' guac na' yela' chnabia' čheban' cont gwnabia'ba' na' cont gosenita' beñač bosozenague' čheba'. ³ Ble'eda' to yichj bežen' nacchguan güe', ca to da' gatlemba', perw beyacba'. Na' yogo'loļ beñač besyebande' dan' beyacban' na' bosozenague' čheba'. ⁴ Yogo'ze beņe' gosonxene' beļen' dan' bamba' cont gwnabia' bež xigüen', na' leče gosonxene' bež xigüen', gosene':

—Nono zoa beņe' nap yela' chnabia' xen ca bež nga, na' nono zoa beņe' soede' tillene'ba'.

⁵ Leče nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' čhopeyon bio'. ⁶ Na' gwnechguaba' yela' ya' che Diosen' na' che yaba gan' zoe' na' len che yezica'chle beņe' ca' že' yaban'. ⁷ Na' gwyo'o lo na' bežen' gwdiļlemba' beņe' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' nación, yogo' yež, yogo' diaža na' beņe' chesac gwde gwdele diža' da' de lo yežlion'. ⁸ Na' yogo' beņe' že' yežlion' beņe' bi zjanyoj lagaque' le'e libr che Jesucriston', gosonxene' bežen'. Le cate' gwmete yežlion' Jesucriston' bzoje' le'e libr che' la yogo' beņe' nežde' gata' yela' mban čhegaque' toļi tocaņe, Jesu-

cristw ben' zaca'lebde' ca xila' dao' be gosot beņe' gualaž čheto' neče xtoła'gaque'.

⁹ Note'tez le'e žia nagle da' chene, le gwzenag da' nga ñia' le'e. ¹⁰ Beņe' yeseyixjue' ljež beñače' ližya, decze de ližya yesata' legaque'. Na' beņe' yesot ljež beñače' len spada, decze de gac čhegaque' ca'. Da'nan' chonen byen soačhač chio' ba gwlej Diosen' cont naccho lo ne'e, gwyo gwčhejcho len bi da' gac čhecho na' soačhačcho šejnilaže'chone'.

¹¹ Gwdena' ble'eda' yeto bež xigüen' be bchoj lo' yo. Na' žia čhop lozba' da' nac ca loz xila', perw be'ba' diža' can' choe' beļ ben' žia gaž yichjen' diža'. ¹² Na' bež nechon' bamba' cont bež gwchopen' gwnabia'ba' par le-ba' na' bež gwchopen' bamba' cont yogo' beņe' že' yežlion' gosonxene' bež nechon' ben' beyaque len güe' dan' naquen ze da' got leba'. ¹³ Na' bež gwchopen' bamba' zan da' bebanchgüe beņe' len yela' guac čheban', na' bamba' cont besele'ede' yi' le'e yaban' na' bese-lažon' lo yežlion'. ¹⁴ Na' da' bamba' da' ca' gan' zoa bež nechon', gwziye'ba' beņe' že' yežlion' cont bosozenague' čheba'. Nach bamba' mandadw gosone' to l gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'. ¹⁵ Na' goc lo na' bež gwchopen' bamba' cont l gua'a lsacan' gwyo'on biš grasyw. Na' goc gwñen, benen mandadw gosote' yogo' beņe' bi gosonxenen'. ¹⁶ Na' bež gwchopen' leče bamba' byen gosezoa yogo' beņe' señw che bežen' le'e na'gaque' liča o loxgagaque', bene' gole len bi' bixjw, na' bene' gwñi'a len beņe' yaše', na' bene' cheson xšin beņe' yoble ca beyixe' len yezica'chle beņe'. ¹⁷ Na' note'teze beņe' še bi zoe' señw che bežen' o laba' o número da' zejen laba', bi goc bi si'e neca goc bi gote'. ¹⁸ Chyažjecho yela' sina' cont šejni'icho da' nga. Beņe' chejni'i guac gwlaben' número čheban', le naquen número da' chčin beñač, na' número čheban' naquen xop gayoa gayon xop.

Da' gosol beņe' ca' to gayoa tapeyon mil gosonxene' Diosen'

14 Na' gwña'a na' ble'eda' Jesucristw ben' zaca'lebde' ca xila' dao' be gosot beņe' gualaž čheto' neče xtoła'gaquen', zeche' lo ya'a Sión len to gayoa tapeyon mil beņe' yoble. Na' zjanyoj la Jesucriston' len la Xe' Diosen' loxgagaque'. ² Na' benda' chesoļ beņe' zan beņe' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' beņe' zan chosogoļe' arpan' to ši'ize. ³ Na' gosole' to da' cobe lao Diosen' na' lao beņe' ca' tap zjažia xil na' lao beņe' blao ca' tapechoa gan' chi' Diosen' chnabi'e. Noch no beņe' yoble goc gol len, con beņe' ca' to gayoa tapeyon mil na'ze gosac bososed' dan' gosolen' cont gosonxene' Diosen', le-gacze' bebej Criston' lo na' Satanásen' šlac ñe' nite' yežlion'. ⁴ Beņe' ca' gosolen' zjanaque' beņe' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje'

chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlaw coseš da' bnežjw beŋe' Israel gualaž čheto' ca' lo na' Diosen'. ⁵ Gwbat goso'e diža' güenlaže' na' bibi doļa' zjanape' lao Diosen' ben' chi'e chnabi'e.

Da' gosena šone angl

⁶ Nach ble'eda' yeto angl le'e yaban' chde' lo be'. Na' gwđixjue'ede' diža' güen che Diosen' da' bi te chen len beŋe' že' yežlion', len beŋe' zjanac to to nación, to to yež, to to diaža, na' beŋe' chesac gwde gwdele diža' da' de yežlion'. ⁷ Gwŋe' zižje gože' legaque':

—Le žeb Diosen' na' le gonxene', le ba bžin hor gone' yela' justis che beŋač. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Bač bžin ža cuiayi' ciuda Babilonia da' nac da' bla. Bač bžin ža cuiayi' ciuda che beŋe' ca' bosozoe' Diosen' ca'ale na' gosebete' da' nac yela' zto', le ba gosego'oyele' beŋe' že' yogo' nación cont chesone' güedenag len Diosen'.

⁹ Nach yeto angl zej cože' beŋe' gwchopa' be'e diža' zižje gwne':

—Note'teze beŋe' chesonxen bež xigüen' len l gua'a lsaca' cheba' na' cheso'e latje chesezoa seŋw che beža' loxgagaque' o taca'gaque', ¹⁰ Diosen' ba nžie' bia' yesesaca'zi'chgua beŋe' ca'. Yesezaca'zi'e gan' chaļa' yi' len azufre lao angl che Diosen' na' lao ben' zaca'lebde' ca xila' dao' ben' gosot beŋe' Israel neče xtoļa'gaque'. ¹¹ Tolj tocane chas žen che yi' gan' yesezaca'zi'en. Na' beŋe' ca' chesonxen bežen' len l gua'a lsaca' cheban', na' beŋe' zjazoa seŋw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. ¹² Da'nan' chonen byen soačhač chio' ba gwlej Diosen' cont naccho lo ne'en, gwyo gw-čejcho len bi da' chac checho, chio' chzenagcho che da' non Diosen' mandaw goncho na' bi chbejyichjcho dan' chejnilaže'cho Jesús'en.

¹³ Nach benda' to beŋe' zoa yaban' gwne':

—Bzoy da' nga: "Mbalaz beŋe' ca' ne' chesejnilaže' Xancho Jesucriston' žinte ža yesate'. Can' chac ŋa'a na' can' gac bate'teze."

Na' Spiritw che Diosen' žan:

—Da' li ŋite' mbalaz, le yesyezi'laže' len xšingaquen', na' gacbia' yogo' da' güen da' ba gosone'.

Yotob Diosen' beŋe' bi chosozenague' che' cont yesezaca'zi'e

¹⁴ Nach gwŋa'a da' yoble na' ble'eda' to bejw šiš le'e yaban' na' cože' bejon' chi' to beŋe' nac ca to beŋač. Na' zoa to corona de oro yichjen' na' noxe' to da' nzi' hoz da' nłachgua. ¹⁵ Na' yeto angl bchoj lo' gan' chesonxene' Diosen' yaban' na' gwŋe' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lece noxe' yeto hoz da' nłachgua. ¹⁸ Na' lece bezchoj yetoe' ben' yo'o lo ne'e yi' da' chaļa' lo mes gan' chesonxene' Diosen'. Na' angl nga gwŋe' zižje bol güiže' angl gwchopa' ben' lece noxe' hoz, gože'ne':

—Ba güe uvas da' žia lo yežlion'. Bečoguen len hoz chion' dan' nłachgua cont yotobchon.

¹⁹ Nach anglen' bečogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' beŋe' ca' bi bosozenag che' na' gwlo'e legaque' ga yesezaca'zi'e. ²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayoa mil metr.

Angl ca' zjajo'o lo na'gaque' gaže yela' zi' da' zelao yesac

15 Na' ble'eda' yeto da' leca zaca' yebanecho le'e yaban'. Ble'eda' gaže angl beŋe' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' beŋe' ca' cheson da' xinj.

² Lecze ble'eda' to da' nac ca to nisdao' de vidrw da' nchixen yi'. Na' cho'a nisdaon' zjazecha beŋe' ca' gosezoede' bi gosonxene' bežen' na' l gua'a lsaca' dan' nac ca leba', na' bi goso'e latje yosozoe' legaque' seŋw cheba' o número da' zejen laba'. Na' zjanoxe' tgüeje arpa da' bnežjw Diosen' legaque'. ³ Na' ble'eda' legaque' chesonxene' Diosen' cheso'e to da' bsede da' Moisésen' beŋe' Israel gualaž čheto' ca', Moisés ben' ben xšin Diosen' cani'. Lecze cheso'e da' naquen to da' bsede Jesucriston' legaque', Jesucristw ben' zaca'lebde' ca xila' dao' be gosot beŋe' gualaž čheto' neče xtoļa'gaque'. Quinga žan:

Xanto' Dios, yogo' da' ba beno' len yela' guac xen chio'

naquen da' güen juisyw na' da' zaca' yebanecho. Yogo' da' chono' zejen to liča na' naquen da' zaca'. Len' chnabi'o nación ca'.

⁴ Nono zoa beŋe' bi cheyaļa' žebe' le' Xanto', da' choŋo' castigw che da' malen'.

Nono zoa beŋe' bi cheyaļa' gonxene' le'.

Tozo' le' naco' beŋe' laždao' xilaže' juisyw.

Na' beŋe' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejzen to liča.

⁵ Gwde benda' da'na' nach gwŋa'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. ⁶ Na' ble'eda' gaž angl ca' zjajo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alčo'e to bant de

oro. ⁷ Na' ble'eda' beñe' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli tocañe chlocchgüe' da' cheson beñe' bi chosozenag çe'. ⁸ Na' doxen gan' chesonxene' Diosen' yaban' gwche'chguan ca žen çe be'ni' da' nsa' Diosen' na' çe yela' guac xen çe'. Nono goc šo' gan' chacxen Diosen' šlac biña' yeyož yesac yela' zi' ca' gaž da' zjanac lo na' gaž angl ca'.

Tas ca' gaže na' yela' zi' ca' gosac cate' bososčo'en

16 Na' benda' gwñe Diosen' zižjehgua, zoe' gan' chacxene', gože' angl ca' gaže:

—Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson beñe' ca' bi chosozenag chia', na' gona' ga yesezaca'zi'chgüe'.

² Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' beñe' ca' zjazoa señw çe bežen' na' chesonxene' l' gua'a lsaca' da' nac ca leba', gosebie' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo nisaon' na' nisaon' beyaquen chen ca chen çe beñe' guat, na' gosat yogo' be ca' že' lo' nisen'.

⁴ Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen. ⁵ Nach benda' gwñe angl ben' chape' nisen' da' de lo yežlion', gože' Diosen':

—Xanto' Dios, len' naco' beñe' laždao' xilaže' juisyw. Ba zoaczo' le' cate' za' xe yežlion'. Zejcz'o' l'icha can' ba gwchoglaguo' chac da' quinga, ⁶ le beñe' že' yežlion' ba gosote' beñe' ca' gosote' xtižon' na' gosote' nochle beñe' gosac lo nao'. Da'nan' ba beno' cont yese'eje' chen neče da' bosolalje' xchen beñe' ca'. Na' da' chac chegaque' naquen da' cheyala'cze gac.

⁷ Nach benda' gwñe to beñe' do cho'a mes gan' beñe' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to l'icha cate' chchogbi'o çe beñe'.

⁸ Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen beñach. ⁹ Yögüe' leca goseye', perw bi besyetingde' xtoła'gaque' na' bi gosonxene' Diosen', con gosen'e' yela' ya' çe Dios ben' be' latje goc da' ca' chesozaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac choł doxen gan' chnabia'ban'. Na' beñachen' gosagwxetje lože'gaquen catec gosesezaca'zi'e. ¹¹ Na' gosen'e' yela' ya' çe Dios ben' zoa yaban' neče dan' chesozaca'zi'en na' neče güe' xen dan' zjažia lo cuerp chegaquen', perw ne ca' bi besyetingde' çe da' mal dan' gosonen'.

¹² Nach angl gwxopen' jalalje' dan' yože lo' tas chen' lo yegw xen da' nzi' Eufrates, na' bebiž nis yegon' cont beyaquen to nez ga yesede beñe' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca blož. Ton bchojen cho'a beł be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'. ¹⁴ Na' da' xigüe' quinga gosonen yela' guac da' besyebane beñe', na' jasetoben yogo' beñe' gwnabia' ca' že' gate'teze lo yežlion' cont yesediłlene' Dios ben' nap la'zelagüe yela' guac xen cate' žin ža gac ca'. ¹⁵ Na' benda' ben' nac Xi'iñ Dios gwne':

—Le gwzenag da' nga: ba zoa yida' da' yoble, yedex- enyala' beñe' bi chosozenag chia' can' chzenyal beñe' gwban ga chjalane'. Mbalaz zjazoa note'teze beñe' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še biña' yesyetingde' xtoła'gaquen' caten' yida', na' yogo'ze beñe' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' beñe' gwnabia' ca' že' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas chen' lo be', na' benda' gwñe Diosen' zižje, gan' zoe' chesonxene' le' yaban' gan' lecze chi'e chnabi'e, gwne':

—Bač goc da' cheyala' gac.

¹⁸ Nach gwyp yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' beñachen' lo yežlion'. ¹⁹ Na' ciuda da' nac la'zelagüe blao lo yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo yežlion'. Diosen' bich gwleze' bene' cont goseyi' gosezaca'chgua beñe' že' ciuda Babilonia çe da' mal da' ba gosonteque', le blocchgüe' yela' mal chegaquen'. ²⁰ Na' catequen' gwxo' besyennittecze yogo' yež da' zjachi' lo' nisaon' na' yogo' ya'a ca'. ²¹ Na' gwche'chgua yej ži'a lo yežlion', yej zi'i da' cha'a do tapa rob güeje beselažon' cože' beñe'. Na' beñe' že' yežlion' gosen'e' yela' ya' çe Diosen' neče dan' besežaglaochgüe' len yej dan' gwchen'.

Diosen' be'e castigw çe ciuda blao da' zaca'lebe ca to no'ole zle'

17 Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo nisaon' ca', no'olen' nac no'ol zle'. ² Yogo' beñe' gwnabia' ca' že' yežlion' ba besyebede' bosozenague' çe' gualaz çe Diosen', na' da'nan' guac nacho zjanaque' xtoe'. Na' beñe' že' yežlion' da' besyebechde' le' clal ca Diosen', guac nacho gosožode' da' ba gose'eje' vino da' bnežjue' legaque'.

³ Nach šlac ben Spiritw çe Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xña be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' çe Dios. ⁴ No'olen' nyaze' lache' da' nac moradw na' xña, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zjejen chbede' chone' da' yela' zto' na' bichle da'

chgue'e Dios. ⁵ Na' loxgue' nyoj diža' da' žan naquen' naque', diža' da' bi gosejni'i beṇaḥ, žan: "Naca' ciuda Babilonia na' nacchgua' blao. Naca' no'ole zle', le chona' cont beṇe' že' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'." ⁶ Na' ble'eda' chzože no'olen', le ba güe'ej'e xḥen beṇe' ca' zjanac lo na' Diosen', beṇe' goso'e diža' chesejnilaže' Jesúsen', na' da' ṇacho güe'ej'e xḥengaque' zeje diža' betue' zane'. Na' cate' ble'eda' no'olen' leca bebanda'. ⁷ Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. ⁸ Bežen' ble'edo' gwzoaba' gwnabia'ba' šlož na' bich zoaba' ṇa'a, perw yechojba' lo' yechw zitjwchgua dan' nac lo gabiḷen' gan' yo'oba' ṇa'a cont soaba' ṇabia'ba' yežlož, na' techle yeyo'oba' na' saca'zi'ba' toli tocaṇe. Cate' gwxe yežlion' Diosen' bzoje' la beṇe' ca' zjanape' yela' mban toli tocaṇe le'e libr ḥen'. Na' beṇe' ca' bi zjanyoj lagaque' le'e libr ḥe Diosen' yesyebande' cate' yesele'ede' bežen' gwzoa, ben' bi zoa ṇa'a perw soaba' da' yoble.

⁹ Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. ¹⁰ Na' lecze zejen gaž beṇe' gwnabia'. Gayoe' ba gosenite' gosenabi'e na' ba gwnit yela' gwnabia' ḥegaquen'. Toe' chnabi'e ṇa'a na' ben' yeto beṇe' bzeben' za' yedeṇabi'e, na' cate' yide', šložže yedeṇabi'e. ¹¹ Na' bež ben' gwzoa cana' perw bich zoaba' ṇa'a, zejen yeto beṇe' gwnabia', beṇe' xono'. Naque' to beṇe' ca' gaže gosenabi'e na' ṇabi'e da' yoble, perw Diosen' gone' cont cuiaye'e na' ḥi saque' toli tocaṇe.

¹² Na' lozba' ca' ši dan' ble'edo', zejen ši beṇe' gwnabia' beṇe' za' za'ac cont yesenabi'e. Na' gac lo na'gaque' yesenabi'e txen len bežen', perw šložže. ¹³ Na' yogo'te beṇe' ca' ši, toz ca yesone' yesegüe'e lo na' bežen' yela' gwnabia' ḥegaquen' na' bichle da' chac chesone' cont bežen' gacchba' blao. ¹⁴ Na' yesedillene' Jesucristw ben' zaca'lebde' ca xila' dao' ben' gosot beṇe' gualaż ḥeto' neḥe xto'la'gaque', na' Jesucriston' gone' gan lo gwdiḷen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle beṇe' gwnabia'. Na' beṇe' ca' yeson txen len Jesucriston' zjanaque' beṇe' ca' ba gwlej Diosen' cont zjanaque' xi'ine', beṇe' ca' nezde' yesenita'ḥaḥe' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' beṇe' zan juisyw, beṇe' yež zan na' nación zan, beṇe' chesac gwde gwdele diža' da' de lo yežlion'. ¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši beṇe' gwnabia'. Na' yesaque' txen yeseque'e da' de ḥe no'olen' na' yosyocua'aṇe'ne' ga'alyide'. Tena' yesagüe' xpelen' na' yosozeye' bi da' yega'aṇ da' bi yesagüe'. ¹⁷ Le Diosen' güe'e latje yesaque' txen yesone' yogo' da' ca' ṇa bežen', na' yesone' yela' chnabia' ḥegaque' lo na' bežen' cont yeyož gac yogo' dan'

ba gwna Diosen'. ¹⁸ Na' no'olen' baḥ ble'edo', naque' ciuda blaochgua da' chnabian' beṇe' gwnabia' ca' že' doxen lo yežlion'.

Can' gac cate' cuiayi' ciuda Babilonian'

18 Gwdena' ble'eda' yeto angl beṇe' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' ḥe' da' nse'e. ² Na' anglen' gwṇe' zižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e beṇaḥ. ³ Cuiayin', le beṇe' ca' že' ciudan' gosego'oyele' beṇe' že' yogo' nación cont bosozoe' Diosen' ca'ale bi gosonxene' le'. Na' beṇe' gwnabia' ca' že' yežlion' ba gosonchgüe' da' mal txen len beṇe' Babilonia ca' catequen' besyebede' gosone' da' yela' zto', na' beṇe' güen delgens ca' že' lo yežlion' ba gosaque' beṇe' gwni'a, le beṇe' Babilonia ca' gosonditjchgüede' dan' gota' ḥegaque' gosezi'en.

⁴ Nach benda' gwṇe' yeto beṇe' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len beṇe' ca' na' cont bi saca'zi'le txen len legaque', ⁵ le dechgua xto'la' beṇe' Babilonia ca', na' bich cuz Diosen' gwnežjue' castigw ḥegaque'. ⁶ Yesezaca'zi'šque' lagüe dan' bosochi bososaque' beṇe', na' yesežaglaošque' da' xench ca dan' bosochi bososaque' beṇe' yoble. Gacšca ḥegaque' castigw gualch ca da' gosone' ḥe beṇe'. ⁷ Con can' gota'chgua da' šagüe' da' güen ḥegaque' na' gosone' con bi da' žan ḥegaque', chṇablaža' gacchgua ḥegaque' yela' yaše' yela' zi' cont yesyegüine'chgüede'. Beṇe' Babilonia ca' ba gosone' xbab lo' yichjlaž-da'ogaque' gosene': "Gwbat te yela' chnabia' ḥeton'; gwbat soato yela' güine', neto' že'to' ciuda blao nga." ⁸ Da'nan' lo toze ža gac yogo' da' ca' gosacde' gwbat gac ḥegaque'. Beṇe' zan yesat, beṇe' zan yesegüine'de', na' yesebil' yesedone', na' yeseye' len yi'. Gac ca' ḥe beṇe' že' ciuda Babilonian', le Xancho Diosen' nape' yela' guac xen cont gone' yesezaca'zi'e neḥe xto'la'gaque'.

⁹ Beṇe' gwnabia' ca' že' lo yežlion' beṇe' bosozenag ḥe beṇe' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' ḥas cate' šey ciudan'. ¹⁰ Na' yesyega'aṇe' zito'le yesene'e can' gac ḥe beṇe' Babilonia ca', le yesežebchgüe'. Na' yesene':

—iNyaše'chgua chac ḥe ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach beṇe' güen delgens ca' že' yežlion' beṇe' yesebeže' na' yesegüine'de' cate' cuiayi' ciudan', le noch no si' dan' yesoten'. ¹² Nono žel beṇe' si' da' yesote' da' nac de oro, de plata, de yej zaca', na' de perlas. Nono žel beṇe' si' lache' la'ay da' chesote' de lino, de sed, na' lache' moradw na' lache' xṇa. Nono žel beṇe' si' da' yesote' da' nac de yag da' chla' zix o de bichle yag

zaque', de marfil, de ya na' de mármol. ¹³ Nono žel beṇe' si' canel, no set zix, no yal, no mirra, no perfume, no vino, no set yeḷa' guagw, no yezi' šiš, no trigw, no burr bžina', no xila', no cabayw, no carret, na' no beṇačh beṇe' yesote' ca beyixe'. ¹⁴ Na' beṇe' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' beṇe' Babilonia ca' yesezi'e lo yeḷa' gwñi'a chegaquen'. Gwbatech yesezi'e da' ca'.

¹⁵ Na' beṇe' güen delgens ca' beṇe' gosote' da' ca' gozezi' beṇe' Babilonian', ben' gosata' yeḷa' gwñi'a chegaque' neče beṇe' Babilonia ca', yeseze' zito'le yesežebchgüe' che dan' chesežagla' beṇe' Babilonian'. Na' yesebeže' na' yesegüine'de', ¹⁶ na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Beṇe' gwže' ciudan' gosazchgüe' lache' šagüe' lache' zaque', no lache' moradw na' no lache' xḡa. Gosonchgua cuingaque' xdan len oro, len yej zaca' da' chesactiten, na' len perlas. ¹⁷ Perw ḡa'a zejzenez gwžiyai' yogo' da' šagüe' chegaquen'.

Yogo' xan barcw ca', yogo' beṇe' ca' chja'ac lo' barcw ca', len beṇe' ca' cheson žin lo' barcon' na' nochle beṇe' cheson žin lo' nisdaon', yogüe' yeseze' zito'le yesene'e. ¹⁸ Na' yesele'ede' čhas žen cate' šey ciudan' na' yesene':

—Bina' gata' yeto ciuda yoble doxen lo yežlion' da' žinlaže' ca' ciuda nga len yeḷa' gwñi'a yeḷa' šagüe' čhen.

¹⁹ Na' yosožia yo bište yichjgaque' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neče yeḷa' gwñi'a che beṇe' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' ḡa'a zejzenez gwžiyai' ciudan'.

²⁰ Perw le'e že'le yaban', le yebe. Le'e gwseḷa' Diosen' gocle postlw che', na' le'e gwseḷe' be'le xtižen', na' yezi-ca'chle le'e zoale lo na' Diosen', le yebe. Le Diosen' ba gwčhoglagüe' yesebiayi' beṇe' Babilonia ca' neče dan' bosochi bososaque' le'e.

²¹ Nach to angl gual bcese' to yej xen ca dan' chon žin gan' chi' molin xen, na' bzalen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzala' lo' nisdaon', na' gwbatech le'echon da' yoble. ²² Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel beṇe' zjansed cont yesone' no xšinlaze' da' chosočhine', neca yenecho sšag che beṇe' chesot len molin lo ciudan'. ²³ Gwbatech le'echo be'ni' che lámpara, na' gwbatech yenecho beṇe' cheson lni che yeḷa' güešagna'. Yesebiayi' beṇe' güen delgens che ciudan' beṇe' zjanac beṇe' blao lo yežlion', le beṇe' Babilonia ca' ba goseziye'e beṇe' že' yogo' nación len yeḷa' güaža' chegaquen'.

²⁴ Beṇe' Babilonia ca' gosote' beṇe' goso'e xtiža' Diosen' na' nochle beṇe' gwlej Diosen' cont gosaque' lo ne'e, na' beṇe' ciuda nan' zjanape' doḷa' che yeḷa' got che yezica'chle beṇe' gosot beṇe' doxen lo yežlion'.

19 Gwdena' benda' beṇe' zan juisyw beṇe' že' yaban' chesonxene' Diosen', na' nen zižje, chesene':

Beṇe' güen juisyw nac Dios čhechon'.

Ba bene' cont chio' chejniłaže'chone' zoacho len le'.

Naque' beṇe' zaca' juisyw, na' nape' yeḷa' guac xen.

² Zejcz'e to liča na' chone' can' cheyaḷa'cze gac dan' chčhoglagüe' yesezaca'zi' beṇe' bi chosozenag che'.

Ba gwčhoglagüe' cuiayi' ciuda xen da' zaca'lebe ca to no'ole zle',

le beṇe' lo ciudan' gosego'oyele' beṇe' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwčhoglagüe' cuiayi' laž beṇe' Babilonia ca',

le cheyaḷa'cze yesezaca'zi'e da' gosote' beṇe' ca' gosonxen le'.

³ Nach da' yoble gosene':

—Beṇe' güen juisyw nac Diosen'. Toḷi tocaṇe čhas žen gan' šey ciudan'.

⁴ Nach beṇe' blao ca' tapechoa na' beṇe' ca' tap beṇe' žia xil jasechaze' cosčo'ale lo yon' gosonxene' Diosen' gan' chi'e chnabi'e, gosene':

—Can' cheyaḷa' gac. Beṇe' güen juisyw nac Diosen'.

⁵ Na' benda' gwne' to beṇe' do gan' chi' Diosen' chnabi'e, gwne':

Yogo' chio' naccho beṇe' güen xšin Diosen' cheyaḷa' gonxenchone',

chio' chzenagcho che', chio' naccho beṇe' gole na' chio' naccho beṇe' xcuide' na' bi' bixjw.

Yeḷa' güešagna' che ben' zaca'lebde' ca xila' daon' gosot beṇe' Israel neče xtoḷa'gaque'

⁶ Nach benda' be xḡe che beṇe' zan juisyw chesonxene' Diosen'. Na' xtiža'gaquen' nenen ca chac ga chziž yegon' cate' dechguan na' ca nen cate' leca chašjw chtin, chesene':

iBeṇe' güen juisyw Xancho Diosen'!

Len' nape' la'zelagüe yeḷa' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yeḷa' güešagna' che ben' zaca'lebde' ca xila' dao' be gosot beṇe' Israel neče xtoḷa'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoj da' nga: "Mbalaz beṇe' ca' ba goxe' cont yesenite' cate' gac lni che yeḷa' güešagna' che ben' zaca'lebde' ca xila' dao' be gosot beṇe' Israel neče xtoḷa'gaquen'."

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi beṇe' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chese-bejyichje' xtiža' Jesúsén' da' chesejle'e. Benxen Diosen'.

Na' note'teze bene' cheso'e diža' li che Jesúsén', zoa Spiritw che Diosen' chzejni'in legaque' cont cheso'e xtižen'.

Bene' žia cože' cabayw šiš

¹¹ Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejcze' to licha can' chchoglagüe' saca'zi' bene' bi chosozenag che' na' can' chdillene' da' malen'. ¹² Na' ble'eda' yejlagüe' ca' chesactiten ca to yi' da' čala'niñ, na' zjzooa zan corona yichje'. Na' ble'eda' nyoj yeto le' loxgüen' da' nombia' toze le'. ¹³ Ble'eda' nyaze' to lache' da' dope chen, na' le' Xtiža' Dios. ¹⁴ Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüjeje cabayw šiš.

¹⁵ Cho'a ben' le' Xtiža' Dios chchoj to spada da' nľachgua da' gwčhine' čhine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'chgua bene' ba goson da' malen', le Dios ben' nap la'zelagüe yela' guac xen chlocchgüe' can' ba gosonen'. ¹⁶ Na' le'e xcamise' na' le'e xichje' nyoj diža' quinga žan: "Naca' Rey ben' chn-abia' yezica'chle rey na' naca' Xan yezica'chle bene' gwnabia'."

¹⁷ Nach ble'eda' to angl bene' zecha lo gwbižen', na' bosye'e boľ güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' goñ Diosen' gagwle. ¹⁸ Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹ Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesediłlene' Jesús ben' žia cože' cabayw šišen' len soldadw che' ca'. ²⁰ Na' bež nechon' gocba' lo na' Jesúsén'. Na' ľecze ca' goc che bež xigüe' gwchope ben' choe' diža' güenlaže' na' bemb'a' yela' guac cont beñačen' bosozenague' che bež nechon', cont gosonxene' ľ gua'a ľsaca' čheba' na' cont gosezoe' señw čheba'. Chopteba' gosacba' lo na' Jesúsén', na' ca' zjambamba' bosozale'ba' lo' yi' gabił gan' čala'niñ azufre, yi' xen da' nac ca to nisdao'. ²¹ Nach bene' ca' yezica'chle, Jesúsén' ben' žia cože' cabayw šišen' betue' legaque' len spada da' chchoj cho'en', na' yogo' šod ca' gosagwaxatba' xpela'gaquen'.

Can' gac lo to mil iz

20 Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabiłen',

na' noxe' to gden xen. ² Na' anglen' bexo'e beł ben' zoa gaž yichj, be bla' da' nechw ža gwlaste. Ľeba' chn-abia'ba' da' xigüe' ca' na' leba' Satanás. Anglen' bčhe-je'ba' gdenña' to mil iz. ³ Nach beyož bčheje'ba', na' bzałe'ba' lo' yechw gabiłen' na' la' bseyjwkie' cho'a yechon' na' bčhišen' to seyw. Bene' ca' cont bich siye'ba' beñač šlac biña' te to mil iz. Na' cate' ba gwde to mil izen', cana'ch yeseže'ba' gdenna' cont yechojba' yešlož dao'.

⁴ Nach ble'eda' bene' ca' gwlo'o Diosen' lo na'gaque' gosone' yela' justis che beñač zjachi'e gan' chesen-abi'e. Na' ľecze ble'eda' bene' bi gosonxene' bež xigüen' len ľ gua'a ľsaca' čheba' neca goso'e latje yoso-zoe' señw čheba' loxgagaque' o taca'gaque'. Goseni-ta'čhače' goso'e diža' chesejnilaže' Jesúsén' na' gosey-ixjue'ede' xtiža' Diosen'. Da'n'an' bene' ca' besegue'ede' Diosen' gosote' legaque' gosečogue' yengaque'. Perw Diosen' bene' cont besyebane' ladjo bene' guat ca', na' txen len Criston' gosonabi'e to mil iz. ⁵ Cate'ch ba goc to mil iz besyeban bene' ca' gosonita'čhačh gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. ⁶ Mbalaz nita' bene' ca' bełis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac čhegaque' can' gac che bene' ca' yesežaglagüe' neče xtoła'gaque' tołi tocaņe, da'n'an' žacho yela' got gwchope. San yesenite' yesonx-ene' Diosen' na' yesonxene' Criston', na' da'n'an' guac nacho yesaque' bxož. Ľegaque' yesenabi'e len Criston' to mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabi'a' da' xigüe' ca' lo' yechw zitjwchgua dan' nac lo gabił gan' bseyjuen'. ⁸ Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoiben legaque' cont yesediłlene' Criston', na' yesaque' bene' zan juisyw ca' yox da' čhi' cho'a nisdao' da' nono chac gwlab. ⁹ Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' čhi' ciuda dan' chaque Diosen' gan' že' bene' ca' gwle-je' cont zjanaque' lo ne'e. Na' cate' gosečhe' ciudadn', Diosen' bene' cont bchoj yi' le'e yaban' bzeytecczen ľegaque'. ¹⁰ Na' ca' nac Satanás dan' gwziye' bene' ca' že' yežlion', angl che Diosen' bosozalen' lo yi' gabił gan' čala' azufre, yi' xen da' nac ca to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen beñačen' bež nechon'. Na' yesežaglaon do ža do yel tołi tocaņe.

Goc yela' justis che bene' ca' ba gosat

¹¹ Nach ble'eda' čhi' Diosen' to lo siy xen da' nac da' šiš, čhi'e chnabi'e. Na' čhna'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. ¹² Na' ble'eda' bene' ba gosat, bene' gole len bene' xcuide' len bi bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'loł da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban

toĵi tocaņe. Na' bene' yeĵa' justis ĉhegaque' con ca gosone' ŝlac gosebane', ĵe yogo' da' gosone' zjanyojen ĵe'e libr ca'. ¹³ Yogo' beņe' gosat ĵo' nisdaon' besyechoje' zjazeche' lao Diosen', na' yogo' beņe' gosat ga yoble ĵecze besyechoje' zjazeche' lagüe' cont bene' yeĵa' justis ĉhe to toe' con ca gosone' ŝlac gosebane'.

¹⁴ Nach Diosen' bcueze' yeĵa' goten' nombia'cho, na' bene' cont noch no gwže' latje ĉhe beņe' guat ca' na' bñitlagüen'. Na' beņe' bi bosozenag ĉhe Dios, yogo' beņe' bi nyoj lagaque' ĵe'e libr gan' nyoj la beņe' zjanap yeĵa' mban toĵi tocaņe, bosozalē' ĵegaque' ĵo yi' gabiĵ da' nac da' xen ca to nisdao'. Na' dan' goc ĉhegaque', ĵenņa' yeĵa' got gwchope ĉhegaque'.

Yežlion' na' ĵe'e yaban' besyeyaquen da' cobe

21 Gwdena' ble'eda' ĵe'e yaban' ba beyaquen da' cobe na' ĵecze ca' yežlion', ĵe yaba dan' goc da' nechw na' yežlio nechua' besyeniten. Na' ĵecze bich gota' nisdao'. ² Neda' Juan ble'eda' ciuda ĉhe Diosen', ciuda Jerusalén cobe da' chi' yaban' gan' zoa Diosen', betjen ĵo yežlion'. Ba nonen' xdan ca to no'ole beņe' ba bpa'a cuine' cont naque' xdan cate' gwšagne'e. ³ Na' do gan' chi' Diosen' chnabi'e benda' gwņe to beņe' zižje, gwne':

—Gwņa'šč, Diosen' ba betje' zoalene' beņaçh. Soateze' len ĵegaque', ĵe gwleje' ĵegaque' cont zjanaque' yež ĉhe', na' yesonxene'ne'. ⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' ĉhen. Nono gat, nono šey ĵa, ĵe ba gwde ĉhe yogo' da' ca' gota' ĵo yežlio nechon'.

⁵ Nach Dios ben' chi' chnabi'e gwne':

—Da' ĵi ba chocoba' yogo'ĵoĵ da' de.

Ĵecze gwne':

—Bzoj diža' quinga ba bendo', ĵe naquen diža' ĵi na' gac can' gwnian'.

⁶ Nach gože' neda':

—Baĉh goc da' cheyaĵa' gac. Neda' naca' ben' ben yežlion' len yogo' bichle da' de, na' naca' ben' gon cont te ĉhen. Da'nan' zaca'lebda' ca letr nechw da' nzi' A na' letr bzebe da' nzi' Z. Note'teze beņe' chaclaže' si'e da' gwnežjua'ne', gwnežjua'ne' yeĵa' mban toĵi tocaņe da' zaca'lebe ca nis ya'a da' che'ejcho cate' chbiĵecho, na' bi sia' laxjuen. ⁷ Na' beņe' chesejnilaže' neda', še ba gosezoede' bi yesebejyĉhje' xtižan', gac ĉhegaque' yogo' da' šagüe' da' ba bia' diža' ĉhen, na' yesonxene' neda', na' gwlo'a zjanaque' xi'ina'. ⁸ Perw ca nac beņe' ca' chesežeb yosozenague' ĉhia', beņe' bi chesejnilaže' neda', beņe' cheson da' ca' chgue'eda', beņe' chesot ĵjež beņaçhe', beņe' cheson da' nac da' yeĵa' zto' len cuerp ĉhegaque', beņe' cheson txen len bite'teze yeĵa' guaža', beņe' chesejnilaže' ĵ gua'a ĵsaca', na' yogo' beņe' cheso'e diža' güenĵaže', yogo' beņe' ca' yesezaca'zi'e toĵi tocaņe ĵo yi' xen da' nac ca to nisdao', yi' gabiĵ gan' ĉala' azufren'. Na' da' gac ĉhegaquen', ĵenņa' žacho yeĵa' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yeĵa' zi' ca' ĵa'zelagüe ĵo yežlion'. Gwbigue' gan' zoan' na' gože' neda':

—Da len neda' cont gwlo'eda' ĵe' beņe' ca' zjaza-ca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot beņe' Israel ĵeĉhe xtoĵa'gaque', guac ĵacho ĵe' si'e no'olen'.

¹⁰ Nach Spiritw ĉhe Diosen' benen cont gwya'alena' anglen' to ĵo ya'a xen da' nac sibe, na' blo'ede' neda' ciuda Jerusalén da' nac ciuda ĉhe Dios. Ble'eda' gwzoan yaba gan' zoa Diosen' na' chetjen ĵo yežlion'.

¹¹ Na' ciudan' goctitchguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jaspe da' chle'echo ca vidrw. ¹² To ze'e xen da' nac sibe nyeĉhjen ciudan', na' nita' šižinw puert ĉhen, na' to to cho'a puerten' zecha tgüeje angl. Na' ĵe'e puert ca' zjanyoj la šižinw beņe' ca' bosoxie' šižinw cuen diaža ĉhe neto' nacto' beņe' Israel. ¹³ Na' ĵe'e ze'e dan' zoa šĵa'a ciudan' gan' chla' gwbiž nita' šoņe puert, na' šĵa'a gan' chxoa gwbiž yešoņen, na' šĵa'a zej yichjelen yešoņen, na' šĵa'a zej xanelen yešoņen. ¹⁴ Na' ze'e dan' nyeĉhje ciudan', lenenņa' naquen de šižinw yej xen, na' zjanyoj ĵe'e yej ca' la šižinw neto' nacto' postlw ĉhe Jesucristw ben' zaca'lebde' ca xila' dao' ben' gosot beņe' gualaž ĉeto' ĵeĉhe xtoĵa'gaquen'.

¹⁵ Na' angl ben' be'len neda' diža' noxe' to ya da' nac de oro da' bĉhine' gwxi'e medidw ciudan', ĉhe ze'e ĉhen na' ĉhe puert ca'. ¹⁶ Ciudan' naquen da' cuadradw, toze ca naquen zlaga' len toņ. Anglen' bchixe' ciudan' len ya ĉhen' na' goquen ĉhope mil ĉhope gayoa kilómetros to to šĵa'an, ca'te' ndoņen, ca'te' zlagan' na' ca'te' siben'. ¹⁷ Nach bchixe' ze'e dan' nyeĉhjen ciudan' na' goquen gayontap metr yeĵa' sib ĉhen, metr da' nombia' beņaçh, ĵe ĵenņa' bĉhin anglen' gwxi'e medidon'.

¹⁸ Ze'e da' nyeĉhjen ciudan' naquen de yej da' zaca' da' nzi' jaspe, na' doxen ciudan' naquen de oro na' nĵan' ca to vidrw da' nac xilaže'. ¹⁹ Na' ze'e da' nyeĉhjen ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyoņe de ágata; da' gwdepe de esmeralda; ²⁰ da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. ²¹ Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de ĵo ciudan' naquen de oro na' zjanĵan' ca vidrw da' nac xilaže'.

²² Bibi yodao' ble'eda' ĵo ciudan', ĵe beņe' ca' že' ciudan' zjanite' lao Xancho Dios ben' nap ĵa'zelagüe yeĵa' guac xen na' lao Jesucristw ben' zaca'lebde' ca xila' dao' ben' gosot beņe' gualaž ĉeto' ĵeĉhe xtoĵa'gaque'. Ĵegaque' chesonxen beņe' ĵo ciudan'. ²³ Beņe' ca' že' ciudan' bi cheseyažjde' gwbižen' ĵe bion' yososenin' ĵo ciudan', ĵe be'ni' da' nyeĉhjen Diosen'

chsenin' len legaque' na' lecz ca' be'ni' da' nsa' Jesucriston'. ²⁴ Na' be'ni' che Diosen' gwsenin' len bene' za'ac yogo' naci6n bene' chesejnilaže' Diosen', na' bene' gwnabia' ca' že' yežlion' yesonxene' Diosen' yosonežjue'ne' bi da' zaca' da' šagüe' da' de čhegaque', len no yeļa' bala'aŋ da' de čhegaque'. ²⁵ Bitw šeyjw puert ca' zjanita' ciudan' lagüe' ža, na' gwbat gac šeže'le. ²⁶ Can' ba gwnia', yeļa' zaca' yeļa' xdan da' zjade yogo' naci6n len yeļa' bala'aŋ da' zjade che bene' gwnabia' che naci6n ca', yosonežjuen' Diosen' lo ciudan'. ²⁷ Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yeļa' mban toli tocaŋe, legacze' gac yeso'e na'.

22 Nach anglen' blo'ede' neda' yegw gan' yože nis da' chnežjon beŋačen' yeļa' mban toli tocaŋe. Nisen' nacten ca' vidrw le nyadichguan. Yegwna' chchojen do gan' chi' Diosen' chnabi'e txe len Jesucriston' ben' zaca'lebde' ca xila' dao' ben' gosot bene' gualaž četo' neče xtoļa'gaquen'. ² Na' gachoļ nez yo xen che ciudan' na' chop la'a cho'a yegon' ze yag da' chnežjon beŋačen' yeļa' mban toli tocaŋe. Na' yogo' bio' chesebian frut, šižiwŋ ŋi'a chesebian lao tgüiz, na' bene' naci6n ca' yosočhine' xlaguenna' ca rmed cont yesenite' güen. ³ Gwbat gata' bi da' chgue'e Diosen' lo ciudan', le ciudanan' cui'e nabi'e txe len Jesucristw ben' zaca'lebde' ca xila' dao' ben' gosot bene' gualaž četo' neče xtoļa'gaque', na' yogo' bene' že' ciudan' yesonxene' le'. ⁴ Yesenite' yesele'ede' cho'alao Diosen', na' yoj la Diosen' loxgagaque'. ⁵ Gwbatech gac šeže'le lo ciudan'. Na' bene' že' lo ciudan' bi yeseyažjde' be'ni' che no lámpara o che gwbiž, le be'ni' da' nyečhj Xancho Diosen' gwsenin' len legaque'. Na' yesenabi'e len le' toli tocaŋe.

Ba zoa yid Jesucriston' da' yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gacbe'ele da' ca' za' gac.

⁷ Nach gwna Jesús'en':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr čhio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xŋi'a angl ben' blo'e neda' da' ca', godca' gonxena'ne'.

⁹ Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr čhion'. San benxen Dios.

¹⁰ Lecze gože' neda':

—Bi gwcuša' diža' ca' ba bzojo', le ba zoa gac da' ca' bzojon'. ¹¹ Na' bene' cheson da' mal, yesonchcze' da' malen' chesonen'. Na' bene' cheson da' yeļa' zto', yesonchcze' da' yeļa' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'aŋcze'.

¹² Nach Jesús'en' gozne':

—Da' li ba zoa yida' da' yoble, na' yedeyena' gac güen che to to beŋačh o saca'zi'e con can' ba ben to toe'. ¹³ Neda' naca' ben' ben yežlion' len yogo' bichle da' de, na' naca' ben' gon cont te čen. Da'nan' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te čen.

¹⁴ Mbalaz bene' ca' ŋita'teze' cheseŋabe' yeca'a xtoļa'gaque' cont yesaque' txe len bene' ca' ba ble'edo' ben' ba besyeyach xaļa'gaque'. Legaque' gac yesagüe' frut dan' chbia yag yeļa' mban toli tocaŋe, na' gac yeso'e cho'a puert che ciudan'. ¹⁵ Perw ca nac bene' ca' cheson da' nac da' zban, bene' ca' cheson txe len no yeļa' guaža', bene' cheson da' nac da' yeļa' zto' len cuerp čhegaque', bene' chesot ljež beŋače', bene' chesejnilaže' l' gua'a lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda čhian'.

¹⁶ —Neda' Jesús ba gwseļa' angl čhian' cont ba bzende' le' yogo' da' ca' ba bzojon'. Na' cheyaļa' gwnežjon' bene' ca' chesedop chesežag chesonxene' neda'. Neda' naca' xi'iŋ diaža che da' rey David na' naca' ben' gwseļa' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonxencho Jesús'en' chŋablaže'cho yob yidšca Jesús'en' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'šque' yide' da' yoble.

Na' note'teze bene' chaclaže' si'e da' gwnežjw Jesús'en' le', cheyaļa' yedena'ben', na' gwnežjue'ne' yeļa' mban toli tocaŋe da' zaca'lebe ca nis ya'a da' che'ejcho cate' chbiļecho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yeļa' zi' dan' zjanyoj le'e libr nga. ¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr čhen' gan' nyoj la bene' ca' zjanape' yeļa' mban toli tocaŋe na' gone' cont bi gac šo'le lo ciuda čhen', neca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenšcacze' yogo'le. Da' na'zen' chzoja'.